


Melĥ Mékōōlē



New Testament in Akoose (CM:bss:Akoose)

Mel̃ Mék̃ōl̃ē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48

Contents

Matyo	1
Makōse	59
Lukase	95
Jōne	153
Mbēltéd	194
Roma	248
1 Kōrinto	273
2 Kōrinto	298
Galesia	315
Efesus	324
Filipi	333
Kolose	340
1 Tesalonika	346
2 Tesalonika	352
1 Timoti	356
2 Timoti	364
Titus	369
Filēmōn	373
Hibru	375
Jemse	394
1 Petro	401
2 Petro	408
1 Jōne	413
2 Jōne	420
3 Jōne	421
Jude	423
Mam nīme mēbenléd	426

Nkalanŋ mí bwâm míme Yesuε ngáne Matyo átélé N̄dibned n̄ kálag

Nkalanŋ mí bwâm ngáne Matyo átélé níhóbe nén bán Yesuε mó adé Nsoode awě Dyõb dénhõbpē aá mós̄lõm á nkõñsé te. Mbwiined ne mó dõo Dyõb dénlõnēdtē mekan míme ánhõbpē aá mós̄belé ábē bad se' bõód. Mmén nkalanŋ ní bwâm nídé áyāl e nkõñsé n̄syāā.

Mekan míme Yesuε áyágté'áá békábé mó áte metón métáan. (1) Abé áde bad bé nkamlen ní Dyõb bétáñgéné awõñ ne mbeltéd n̄māb, mekan míme mébē n̄māb ne mekan míme mébenléd ne bó (E'p̄ed 5-7); (2) Nsón míme bembap̄ee dyõm ne bébē bétáñgéné abel (Eped 10); (3) Ngáne nkamlen ní Dyõb nídí (Eped 13); (4) Ngáne mod átáñgéné Dyõb abele (Eped 18); (5) Mekan míme mébenlad ne ngáne ébēē áde Kr̄ist̄aa áp̄eé (E'p̄ed 24-25).

Nkabtéd n̄ kálag

Nchyaátén ne echyáa éche Yesu Kr̄ist̄aa 1.1-2.23

Nsón míme Jõne, Ndusenε 3.1-12

Edusen ne mekágsen míme Yesuε 3.13-4.11

Nsón míme Yesuε á mbwóg e Galilia 4.12-18.35

Nsón míme Yesuε áde áhídté á Galilia áp̄e á Jerusalem 19.1-20.34

E'pun bé asóg ábe Yesuε á Jerusalem ne benben ne á Jerusalem 21-27

Mpuu ne alúmed áde Sáñgwéé álúmtáá bad yāl áde ámáá apuu 28.1-20

Betaa ábe Yesuε (Luk 3.23-38)

¹ Tóñgé e betaa ábe Yesu Kr̄ist̄aa edii nén. Yesuε ambíd á nchyaátén míme k̄ñ Dabide, Dabide mó-'ε abíd á nchyaátén míme Abrahamε.*

² Abrahamε mó abédé sáá awě Aisige. Aisige-'ε ambé sáá awě Jakõbe, Jakõbe-'ε mó anchyáá Judaa bõõbe baányan.

³ Judaa bó mwaád Tamaa, bénchyāā Perεε ne Zeraa. Perεε ambé sáá awě Hεserõne, Hεserõne-'ε sáá awě Rame.

⁴ Rame mó abédé sáá awě Aminadabe, Aminadabe-'ε abédé sáá awě Nashõne. Nashõne ambé sáá awě Salmõne.

⁵ Salmõne bó mwaád, Rahabe bó-'aá bénchyāā Boase. Boase bó mwaád Rute bénchyāā Obede, Obede-'ε ambé sáá awě Jese.

⁶ Jese ambé sáá awě k̄ñ Dabide.

K̄ñ Dabide bó Uria mwaád béchyāā Solomonε.

⁷ Solomonε ambé sáá awě Rehoboame, Rehoboame-'ε mó ambé sáá awě Abijaa, Abijaa ambé sáá awě Asaa.

⁸ Asaa ambé sáá awě Jehosafade, Jehosafade mó-'ε ambé sáá awě Jorame, Jorame mó-'ε ambé sáá awě Uzzia.

⁹ Uzzia abédé sáá awě Jotame, Jotame mó-'ε ambé sáá awě Ahasε. Ahasε mó-'ε ambé sáá awě Hezekaya.

¹⁰ Hezekaya-'ε ambé sáá awě Manase. Manase-'ε sáá awě Amõse. Amõse mó ambé sáá awě Josia.

¹¹ Josia móo anchyáá Jekonyase bõõbe baányan, á pónde eche bad bé alonŋ á Israel bēnkweé nzum bonŋ bad bé Babilõn bésweén bó áwāb alonŋ.

* 1:1 Mmén nchoo nídé káñne á kálag e Dyõb e'só 5.1, 6.9, 10.1, 11.10, 27.

¹² Ade nén dēmmadté atóm, káəŋ ne á pónđé echě bēnchyāā'é Yesue, betaa ábe Yesue bēbédéε; Jekonyase móə ambé sáá awě Sheltyεε, Sheltyεε-ε mó ambé sáá awě Zerubabele.

¹³ Zerubabele ambé sáá awě Abuteε, Abuteε-ε sáá awě Elyakime. Elyakime-ε ambé sáá awě Azəə.

¹⁴ Azəə abédé sáá awě Zadoge, Zadoge mó-ε ambé sáá awě Akime, Akime-ε sáá awě Eliude.

¹⁵ Eliude mó ambé sáá awě Elizaa. Elizaa-ε sáá awě Matane. Matane mó-ε ambé sáá awě Jakəbe.

¹⁶ Jakəbe mó abédé sáá awě Josebe. Josebe mó awónη Maria awě anchyáá Yesue awě béchəgeé bán Krīstəə.

¹⁷ Né-əə, nyonŋel ésyāəl, mbooted ne Abrahamε əpe wée Dabide, édé dyôm-é-nyonŋel ne éniin. Mbooted ne Dabide əpe pónđé eche béswééné bad bé Israel á Babilon áde bēnkweé nzum, édé dyôm-é-nyonŋel ne éniin. Bootya pónđé eche bēnswēnnē bad bé Israel á Babilon áde bēnkweé nzum, káəŋne á pónđé eche béchyáá Yesue, áde dyôm-é-nyonŋel ne éniin.

Echyáa éche Yesue

(Luk 2.1-7)

¹⁸ Echyáa éche Yesue ébédé nén: Maria, nyaá awě Yesue, ábédé ngon e mmwaád echě enkēmbíi mwENCHÓM. Bēnkíi mó mod nhóg awě béchəgé'áá bán Josebe. Bon byánán Maria əsū á e'wónŋé wée Josebe, ényinnēd nén bán adé nkog á ngíne e Edəədəŋ éche Esáá.

¹⁹ Josebe-ε, ngáne ábédé mó mod a bwām, enkēndəŋgé Maria e'son awóged. Né-əə, abel'é'áá mbonšén áchene mó á mesəəm-té.

²⁰ A pónđé echě nímé mewēmtən médíi mó áte, ángel e Dyöb empií mó áde ánánŋé nló. Angel ne enláá mó nén aá, "A-Joseb, mod á mbyaa níme Dabide, weebáá' Maria atéd née mmwaád awónη, áyāle Edəədəŋ éche Esáá chəə épíidé mó bon abé nkog.

²¹ Achyāā mwān a mwENCHÓM, échuu-ε mó đīn wéé Yesue† áyāle nén móəhūd ábē bad á mbéB-te."

²² Mmén mésyāəl mēmbenléd álóned e'yale ábe Dyöb dénlōmēnnē nkal é'dəədəŋ aá,

²³ "Nyénəne', ngon e mmwaád echě eéBíi mwENCHÓM éBē nkog, echyáá-ε mwān a mwENCHÓM, béchəg-ke mó bán Emmanueleε."

Adén đīn adé nén bán, "Dyöb adé ne sé."

²⁴ Née Josebe əsyánŋé əsē, ambəl ngáne ángel enlāā'é mó. Antéd Maria née awě mmwaád.

²⁵ Bon káəŋ ne pónđé eche Maria áchyáá mwān, Josebe enkēndyēnné mó. Josebe anchuú-ε ane mwān đīn aá Yesue.

2

Belāŋ-bé-betintine bébidé á akuu əhyε dé abε Yesue edúbé

¹ Bēnchyāā Yesue á dyad á Betlehem á mbwóg e Judeya á pónđé eche Herəde ábédé kəŋ. Bad behóg ábe beláá'áá betintine ábii mekan, bēmbíd á akuu,* bépē á Jerusalem. ² Ade bépédé á Jerusalem, bēnsədéd bánken, "Héé kəŋ e bad bé Israel, ane awě achyáádté wén ádíi? Sényiné tintine á akuu awě alūmte nén bán achyáádté. Nē dəə ákəáá bon sépag ábe mó edúbé."

³ Adé kəŋ Herəde áwógé nē, nē dēntagéd mó á mewēmtən-té bwāmbwam. Dēntagéd mó, átāgəd-te bad bé Jerusalem bésyāəl.

† **1:21 Yesue:** Adén đīn ádíi bán Mod a e'sooson. * **2:1 A akuu:** Pəd echě etondεε ábídeé.

⁴ Herode anlad ábe beprise bémbáá ne bemeléede bé mbéndé bésyāāl áte. Bon ásedté bó aaken, “Héé Ane awě Dyōb Awógté, awě bésineé, áchyāādtē?”

⁵ Dóo békwénténé mó bán, “Béchyāā mó á dyad á Betelhem, á mbwóg e Judeya. Nkal é'dáádəŋ antél aá,

⁶ ‘A-bad bé Betelhem á ndəəb e Juda, ádēn dyad áde dyad ahóg áde áde etógnén bwāmbwam átínté e myad mé alon á Juda.

Ayāle mod ábíđ átínté echēn, awě ályāgēđ ábēm bad bé alon á Israel.’ ”

⁷ Néé Herode áwógé nē, anchélé ábē belāŋ-bé-betintine á kun-tē, bon ásedté bó nyaa e pónđe echē tintine ne ámbídtē.

⁸ Dóo álómé bó á Betelhem aá, “Nyékag, nyétōŋ anən. Nzé nyēnyíné wéé ane mwān áchyāádté, nyétim ámbíđ nyéhye nyéláá me, ábel bon mémpē níke míbe mó edúbé.”

⁹ Ade bémáá mekan míme kēŋ álāngé bó awóg, bēmbóótéd akε ámpē. Bon áde bēnóné ámín, bēnyín melemlē mé tintine míme bēnyínnē á akuu néé ákagké bó á'sō. Ane tintine ankē kóəŋ atyéém wéé ane mwān áchyāādtē.

¹⁰ Anyín áde bēnyíné ane tintine, bēnwōg menyinje bwāmbwam.

¹¹ Bēnsāl á ndáb-te. Néé bésólé, bēnyín ane mwān bó nyan, Maria. Bēmbwōgē ane mwān mebóbōŋ ábe mó edúbé. Bēmbíđēd mendε áwed míme bēnwānlédté mó, bēbē-’ε mó. Mmē mendε mébédé gól, † mǎg mé e’lod é’ bwām míme béchəgεé bán frankinsen‡ ne mía. §

¹² Néé bémáá ane mwān edúbé abε, bēmbwōgē esú áwāb alon, bon bēmpōŋ nzii empée, áyāle Dyōb dénlāā bó á nló-te aá béetimé’ ámbíđ wéé Herode.

Bésōbnē Yesue, békééné mó á alon á Egipto

¹³ Ade ábē belāŋ-bé-betintine bémáá akε, ángel e Dyōb enláá Josebe á nló-te aá, “Hidé ásē, étēđ anén mwān bó nyan esoben bó, étimən bó á Egipto. Nyédye-’ε áwed kóəŋ né nlāngé nyé méé nyéhide, áyāle Herode álōm bad áhed anén mwān, áwúu mó.”

¹⁴ Mmē nkuu dēn, Josebe anhidé ásē, atéd mwān bó nyan, ákēen bó nkuu ne nkuu, átímnád bó á Egipto.

¹⁵ Áwed dóo bendyεé’ε kóəŋ ne pónđe eche Herode áwédé. Nén dēmbenléd álóned e’yale ábe Dyōb dénlōmēnnē nkal é'dáádəŋ aá, “Nlébpé awem Mwān méé ábíđ á alon á Egipto.”

Béwúú e’ched é’ bán á Betelhem

¹⁶ Ade Herode ásóŋténé nén aá belāŋ-bé-betintine bē bédógé mó, anlŋ bwāmbwam. Anlóm éche sánze á Betelhem ne ene pεđ e mbwóg esyāāl, aá béwúu bán bé baachóm bésyāāl ábe béepede mwě ríláán. Ambel nē átāŋgen ne pónđe eche belāŋ-bé-betintine bēnlāā-’é mó bán bēnkōlē tintine awě anlúmed echyáa éche Yesue anyín.

¹⁷ Nén dēmbenléd álóned e’yale ábe Dyōb dénlōmēnnē nkal é'dáádəŋ Jeremayaa. Jeremayaa anhób aá,

¹⁸ “Bad bēnwōg e’saad ne awé á ngine áde ábíde’áá á Rama, áde Rashεε áchyεε’ε ábe bán.

Bélénté’áá mó awé, bon eékobpe aléned áyāle nén bán bēmmad mó awé.”

Josebe, Maria, ne Yesue bébidé á Egipto bétim á Nazaret

¹⁹ Ámbíđ e kwééd eche Herode, ángel e Dyōb empií Josebe á nló-te áde ámbēē abé á Egipto, élāngē mó nén aá,

²⁰ “Téd awōŋ mmwaád bó mwān, nyétime ámbíđ á alon á Israel. Herode ne ábē bad ábe bēhédé’áá ane mwān awúu bémáá awé.”

† **2:11 Gól:** Edii ekii éche édé nkun bwāmbwam éche élúmtē bán Yesue adé kēŋ. ‡ **2:11 Frankinsen:** Ábédé dyōg áde bēbagnéé Dyōb mendε. § **2:11 Mia:** Mébédéε dyōg áde bēnabndté ndim.

²¹ Née Joseβε áwógé nê, anlad yǎl, atéd Maria bó mwǎn, bóḡbḡo bétim ámbíd á alon á Israel.

²² Bon áde Joseβε áwógé bán Achelaυe atédé atii dé nkamlen áde sáá, k̄n̄ Herode á mbwóg e Judeya, ambán atim ámbíd áwed. Angel e Dyöb enhýé mó mekan mémpēe aláa á nló-te. Nê dēmbēl, á mbwóg e Galilia dḡo ántimmé ake.

²³ Ankě alon á dyad ámbáá ahóg áde béchógé'áá bán Nazaret. Nén dēmbenléd álóned e'yale ábe Dyöb dénlōmēnnē bekal bé'daádəŋ t̄n̄gēne Yesue áá, "Abyēēn née Mod a Nazaret."

3

Nkalan m̄me J̄one, Ndusenē (Mak 1.1-8; Luk 3.1-18; J̄on 1.19-28)

¹ Et̄un é p̄ondé ámbíd enē, J̄one, Ndusenē ámbíd nkal é'daádəŋ a Dyöb. Akalé'áá eyale é Dyöb á ehyánge á Judeya, álāngē bad áá,

² "Nyétede abel dé mbéb áyāle nén nkamlen ní Dyöb rídé benben."

³ J̄one mó abédé mod awē nkal é'daádəŋ Yesayaa áhóbé'áá, áde ánhōbpē áá, "Ehánge ébide' á ehyánge bán, 'Nyébonḡen epe éche Sánḡwéé. Nyétii echē nzii.'"

⁴ J̄one ahágé'áá mbóté éche bébēnlé nyon éche ébídé á yǎl e kamēl.* Awáá'áá ngóá a ngob e nyam. E'chuu ne bengóméé bóo bébédé ndyééd echē.

⁵ Bad bébídé'áá á Jerusalem, ne m̄m̄n̄í myad mé mbwóg e Judeya esyáál ne á melon mémpēe m̄ime mébédé á nkəg mé edib é mbáá é Jodan, békag wée J̄one.

⁶ Née bēmpaléé m̄māb mbéb áte, J̄one ádusen bó á edib é Jodan.

⁷ Bon áde J̄one ányíné née Befarisia ne Besadusia béhúé' é ábel bon ádusen bó, anláá bó áá, "Píí é nyǎ chén! Nzéé m̄m̄m̄ alánge nyé áá nkáásé ní Dyöb r̄húé' bon aléb-pe nyé áá nyékúme abánge?"

⁸ Nyéke nyébele mam m̄ime mélūmēd nén bán nyētēdté ádēn abé dé mbéb.

⁹ Nyéewémtán nén bán nzé nyēhóbé bán, nyédé bán ábe Abrahamē, nyéekudté nkógsen ní Dyöb. Bon r̄lāa nyé nén mēé, Dyöb áhele ábenléd m̄mēn meláá átimēd mó bán ábe Abrahamē.

¹⁰ Bḡoḡ-pḡo ehón émáá anaa á nkan̄ m̄ mel. Né-ḡo, bwel ké é'héé ábe béēchyāā' e'pum é' bwām, békwel bó bébwém-me bó á muú-te.

¹¹ Ndusan nyé bḡoḡ ne mendib álúmed nén bán nyēhǎŋléné áden abé dé mbéb. Bon mod ampée ahúé', awē atómé me. Meékwognedéé ké ápém m̄ime metámbé. Adusen nyé ne Edaádəŋ éche Esáá, ádusen-ne nyé ne muú.

¹² Awánlé echē epeben á ekáá, ábel nén, ápeb m̄ime menyán ámin. Nzé amadé, álād mbum é bwām áte, ákōo ch̄o. Bon álād e'pḡo, ahyáád bó á ebonde é muú éche éēd̄imē'."

Bédúséné Yesue (Mak 1.9-11; Luk 3.21-22)

¹³ Bḡoḡ-pḡo, Yesue ámbíd á mbwóg e Galilia, áke wée J̄one á edib é Jodan ábel nén J̄one ádusen mó.

¹⁴ Bon J̄one anwanén mó mewēmtēn ah̄n̄ŋlen, áhōbē nén áá, "Née édii bán we-é wembé edusan me, chán étimé abé éche wewe éhyagké áwēm wéé r̄dusen we?"

¹⁵ Bon Yesue ankwentén mó áá, "Mwě ébē nē bḡoḡ ábel nén débēl mam mésyāāl bwām ngáne Dyöb áhedéé." Né-ḡo, J̄one ankwentén mó adusen.

¹⁶ Melemlem mé p̄ondé m̄ime J̄one ámáá Yesue adusen, Yesue ansyáó á mendib-te. Dḡo ngob e dyöb énédnédé, bon ányīnē née Edaádəŋ é Dyöb ébídé

* **3:4 Kamēl:** Edii nyam echē edé née nyag echē bébenladté á ehyánge ápém nted.

ádyōb ésudé ásē néε élāā, étyéém-me mó á nló mīn. ¹⁷ Ehób chό-'ε ámpē ébidē ádyōb nén, “Awem Mwān a nlém nén, awógte με menyīnge bwāmbwam.”

4

Satanε akāgé Yesuε (Mak 1.12-13; Luk 4.1-13)

¹ Ambīd e pōndé, Edāádəŋ é Dyōb éntimén Yesuε á ehyānge ábel nén Satanε ákəg mó.

² Yesuε andid yāl nzaa á mekáne-tê móom mé e'pun méniin. Ambīd e ene pōndé nzaa ewagé'áá mó.

³ Dóo Satanε ápédé boŋ álāngé mó aá, “Nzé Wε-εé edé Mwān a Dyōb, kamlén nímén meláá métim e'wεle.”

⁴ Boŋ Yesuε antimtén mó aá, “Eténlédé á kálag e Dyōb nén bán, ‘Saké ndyééd chēmpen edide moonyoŋ á alongé. Boŋ eyale téé éche Dyōb áhóbé, chόó édídé moonyoŋ á alongé.’ ”

⁵ Dóo Satanε ákééné Yesuε á Jerusalem, dyad áde ásáá boŋ átyēēmān mó á nzongε e Ndáb-e-Dyōb mīn,

⁶ álāngé mó aá, “Nzé wε-εé edé Mwān a Dyōb, éheb á bwεle-mīn hén éhūn á ndəəb, áyāle éténlédé á kálag e Dyōb nén bán,

‘Dyōb dékamlén éche ángel áśáb wε, épēm-me wε ámīn ábel weébōmē ekuu á aláá.’ ”

⁷ Yesuε-'ε antimtén mó aá, “Boŋ kálag e Dyōb ehóbé ámpē nén aá, ‘Weékāgē Sāŋgwéé ádoŋ Dyōb áte.’ ”

⁸ Satanε antéd Yesuε ámpē, búmō bétyéém á mbəəd mīn, boŋ álūmtē mó meloŋ mé nkōŋsé mésyāāl ne nhon nīsyāāl míme rídé áwēd-te.

⁹ Dóo álāngéé mó aá, “Měbě wε ábén bwēm é'syāāl nzé ebwógké με mebóbóŋ boŋ ébāg-ke με edúbé.”

¹⁰ Dóo Yesuε álāngéé mó aá, “Syəə με á dīd-te, a-Satan! Eténlédé nén bán,

‘Ebwógke’ Sāŋgwéé ádoŋ Dyōb mebóbóŋ, ébage-'ε mó edúbé. Mwēnpən-naá étāŋgéné abele.’ ”

¹¹ Né-əó, Satanε antédé Yesuε, ákē. Ángel émpě, éwōŋgén Yesuε.

Yesuε aboótédé míme nsón á Galilia (Mak 1.14-15; Luk 4.14-15)

¹² Ene pōndé bénhē Jəne, Ndusenε á mbwəg. Ade Yesuε áwógé nē, antīm ámbīd á mbwóg e Galilia.

¹³ Anhidé á dyad á Nazaret, áke ádyēē á dyad á Kapenahum. Kapenahum abédé á nkəg mé edib-é-nzab é Galilia, á abwóg á hōm á túmbé e Zεbulon ne e Naftali.

¹⁴ Yesuε ankě á Kapenahum álóned mekan míme nkal é'dəədəŋ Yesayaa ánhōbpē aá,

¹⁵ “A-mbwóg e Zεbulon, a-mbwóg e Naftali, ntimned ne edīb é nkwě, á múde mé edīb ní Jodan, Galilia mbwóg echě bad ábe béesě bad bé Israel bédyεε'é.

¹⁶ Bad ábe bébédé á ehíntén-té békúdé e'nyínen bé ekíde; Bad ábe bébédé á nsəl ní soŋ békúdé e'soósoŋ.”

¹⁷ Bootya pōndé echě Yesuε ánkéé á Galilia ambootéd eyale é Dyōb akal áhōbē nén aá, “Nyéhəŋlən abé dé mbéb, áyāle nkamlen ní Dyōb rídé benben.”

Yesuε apwεdé bembapεε bé'sō (Mak 1.16-20; Luk 5.1-11)

¹⁸ Epun ehóg Yesuε akagé'áá á nkin mé edib-é-nzab é Galilia. Annyín bãn bé baachóm bébε; Simōne awě béchágé'áá bán Petro, bó mwānyan Andreyā nēε bébwémεé mbínzé. Bébédεε bekób-bé-súu.

¹⁹ Dóo álānggēé bó aá “Nyéhíde me. Ngáne nyékóβεé súu bōob, mēyāgēd nyé ngáne nyétēdtē bad nlém á abum áhíd me.”

²⁰ Abwōg-ábwōg bēntēdé échab mbínzé, béhídē-'ε mó.

²¹ Nēε bésídté á'sō, Yesuε annyín bãn bé baachóm bémpēε bébε; Jemsε bó mwānyan Jōne, bãn ábe Zebēdiε. Bóobe sáá bémbē á bōle-tē, bébwémé'áá échab mbínzé. Hē dóo Yesuε áchēnlεé bó bad bébε aá béhíde mó.

²² Abwōg-ábwōg bēntēdé sáá ne bōle, béhídē-'ε Yesuε.

Yesuε ayágté'áá, áchōjté-'ε bad

(Luk 6.17-19)

²³ Yesuε akagé'áá myad mésyāāl á alon á Galilia áyāgtē eyale é Dyōb á ndáb é mekáne, ákalé-'ε nkalan mí bwām mé nkamlēn ní Dyōb. Achōjté'áá bad bé nkole bésyāāl ne nyaa e nkole téé echē émbē áfíntē echáb.

²⁴ Né-óó mekan míme Yesuε ábélé'áá nwógnádtáá á mbwóg e Siria esyāál. Nē dēnkān bad bépééné'áá bad bé nkole bésyāāl áwē. Bépééné'áá bad áwē ábe békónlé'áá nkole ne mewε nyaa ne nyaa. Bad ábe e'dáádān bé mbéb bémbēε áte, bad ábe béhúne ekikíd, ne bad ábe béwédé eped, Yesuε áchōjté ábē bad bésyāāl.

²⁵ Nē dēnkān, ndun e mod ehídé'áá Yesuε. Bad bébídé'áá melon bootya á Galilia ne mbwóg e Myad Dyóm, Jerusalem, Judeya, ne ped echē edé á múde mé edib é Jodan míminí.

5

Yesuε ayágté bad á ekone mín

¹ Ade Yesuε ányíné ene ndun e mod, anchágé é ekone mín, ádyēē ásē. Ahed-taá ábē bembapεε bétáné mó

² bon ábootéd bó ayáged, áhābē aá,

³ “Nnam mbē ne bad ábe bédé atóg á edáádān-tē áyāle bédé ásē e nkamlēn mí mín.

⁴ Nnam ne bad ábe bélebe', áyāle Dyōb déwōgēd bó menyinje ámpē.

⁵ Nnam ne bad ábe bépwítédé, áyāle nkōnsé rísyāāl mébē mímāb.

⁶ Nnam mbē ne bad ábe bédé nzaa ne píd ábel mam míme Dyōb áhedéé aá mébenled, áyāle Dyōb dékōdēd bó.

⁷ Nnam ne bad ábe béwóge bad bémpēε ngol, áyāle Dyōb dōmpē déwōg bó ngol.

⁸ Nnam ne bad ábe békénlé nlém á abum, áyāle bényin Dyōb.

⁹ Nnam ne bad ábe békóme nsañ, áyāle Dyōb déchag bó ábē bãn.

¹⁰ Nnam ne bad ábe békude metake áyāle bébεléε mam míme Dyōb áhedéé. Bédé ásē e nkamlēn mí mín.

¹¹ Nnam mbē ne nyé ábe bad bésyāá'ε, nyé ábe bétagtéé, bébānē nyé e'bébtéd é' mam áyāl, bébídē-'ε nyé mbónj é metóm áyāl, á dñn ádēm.

¹² Nyéwóge bwām, nyébé-'ε menyinje áyāle nsábe míme nyékudté ádyōb ríchábé ámin. Nēn dóo bad bétágté'áá bekal bé'dáádān bé' bōód.

Nkwě míme mbódé e'nyin, ne etrukān éche békōngé

(Mak 9.50; Luk 14.34-35)

¹³ “Nyédé etógnēn á alongé á bad bé nkōnsé ngáne nkwxé rídí etógnēn áyāle ndyééd. Bon nzé nkwxé mbódé alan chán béhele-se bényinēd mó ámpē? Méesaá dyam dé abelēn ámpē. Né-óó, apim dóo bépiméé, bad békōgtáád mó ámin.

¹⁴ Nyéē nyédé nêngáne etrukánj álúmed bad bé nkõnsé bésyāāl nzii e Dyõb. Dyad áde álõjnédé á ekone mín déesõmээ.

¹⁵ Mod eémāā-'aá etrukánj achod se ákõõ chõ á ebwõg-sé, bonj abelé ákēlē chõ ámīn, ábel nén ényĩnte kenzээ awě adé á ndáb-te ekíde.

¹⁶ Nyémpē nyépe'ne', melelem née etrukánj. Nzé bad bényiné nsón mí bwām míme nyébelээ, béken Dyõb, awēn Titээ awě adé ámīn.

Ayáged áde Yesue tângene mbéndé

¹⁷ “Nyéewémtán nén bán mpedé á nkõnsé ábõded mbéndé éche Mosεε ne mekan míme bekal bé'dáõdõnj báyágté nyé. Meépedээ ábõded mó, bonj mpedé álõned mó.

¹⁸ Ne mbále nlânge nyé nén meé, káõnj ne á asóg dé nkõnj ní sé ne mí mín, ké mwämpīn mé eyale nhóg awě atēnlédé á mbéndé e Dyõb eéhídtээ áse káõnj né mésyāāl mélóné.*

¹⁹ Né-õõ, kenzээ awě abóõ mbéndé póg átĩntē échē mbéndé é Dyõb, ké ene echē béwémténé bán eesaa etõgnén, áyágtē-'ε bad bémpēe aá bébel melelem, ene ndín e mod ēbē ndimtene átĩntē e bad ábe bédé áse e nkamlēn mí mín. Bonj kenzээ awě abele ngáne mbéndé éhóbé, áyágtē-'ε bad bémpēe ábel melelem, ábē etõgnén bwámbwam átĩntē e bad ábe bédé áse e nkamlēn mí mín.

²⁰ Né-õõ, nlânge nyé nén meé, ésebán abele á Dyõb ádēn átómé áde Befarisia ne bemeléede bé mbéndé, né nyémpē nyéesónlé á nkamlēn mí mín mbéd.”

Ayáged áde Yesue tângene melingá

(Luk 12.57-59)

²¹ Yesue ambád ahób aá, “Nyéwógé nén bán bénlāā bad bé' bõõd bán, ‘Mod eewúé mod. Kenzээ awě awúú mod, bétāngéné mó akáad.’

²² Bonj nlânge nyé nén meé, kenzээ awě alĩjnē† mwānyanj bétāngéné mó akáad. Kenzээ awě ásyānj mwānyanj bēpēēn mó á kóte e bad bémbáá békáad mó. Kenzээ-'ε awě áchõg mwānyanj aá, ‘Edimdim é chõm chén’, béhele bébwém mó á dũ-á-muú.

²³ Né-õõ, nzé ekag á menyán mé mende áke dé abe Dyõb mende, bonj ekāmténé nén wéé nyé mod nyéwánléné kãkã,

²⁴ ébānē mímõnj mende áse á'sõ é' menyán mé mende. Esébe éke ébēl nsanj ne ane mod bonj étīm ámbíd éke ébe mende.

²⁵ Nzé mod ahede we áke dé asõmen á kóte, bēl káõnj nyúmõ nyépe á nchemten byánán nyéēpē á kóte. Esebé nê, ahelése asõmén we á kóte. Kóte-'ε ébēé we á mekáá mé plúse, plúse chõ-'ε éhē we á mbwõg.

²⁶ Ne mbále, nlânge we meé, weéhēlē-se ebíd á ndáb e mbwõg-tē wē káõnj né etwedé ádõnj alúm ásyāāl.

Ayáged áde Yesue tângene akáb dé mesón

²⁷ “Nyéwógé ngáne béhóbé nén bán, ‘Nyéekábé mesón á ndáb e'wõngé.’

²⁸ Bonj nlânge nyé meé, kenzээ awě anõné mmwáad bonj awémtén aá né mōnnañned mó, amaá asón akáb ne ane mmwáad áwe nlém-tē.

²⁹ Nzé ádonj díd ábelte we mbéb, ehúd dõ, épim. Edé mbonj ábõd dõ, tómaa bõ ábwém echõnj yāl esyāāl á dũ-á-muú.

³⁰ Melelem nê, nzé echõnj ekáá ébelte we mbéb, esél chõ, épim chõ. Edé mbonj ábõd chõ tómaa bõ ábwém echõnj yāl esyāāl á dũ-á-muú.

Ayáged áde Yesue tângene abõo-dé-e'wõngé

(Mat 19.9; Mak 10.11-12; Luk 16.18)

* **5:18** Né mésyāāl mélóné káa áde ayáge ásyāāl dlóné. † **5:22** Kenzээ awě alĩjnē; donje á kálag áwóó kenzээ awě alĩ njēn.

31 “Kálag e Dyöb ehóbé ámpē nén, ‘Kénzée awě anané mwaád á e’wóngé atəngéné ábe mó apab áde álúmte nén bán anané mó á e’wóngé.’

32 Bonj nlänge nyé nén meé, nzé mod anané mwaád á e’wóngé ésebán ane mmwaád akábe asón, bonj ane mmwaád akií mod ampée awón, né nchóm awě anané mó á e’wóngé mó atímté mó mmwaád awě akábe’ mesón. Kénzée-’e awě awóó mmwaád awě bénáné á e’wóngé né mómpē akábe asón.

Ayáged áde Yesue tänge amwé dé melě

33 “Nyêwógé nén bán bénlāā bad bé’ bōód bán, ‘Mod eemwág melě ngên, bonj nzé mod amwédé melě atəngéné ábēl dyam áde ámwééné melě á’sō é Dyöb.’

34 Bonj nlänge nyé nén meé, nyéemwág melě ké mehóg. Nyéemwág melě á đin dé nkamlen mí mín, áyāle áhed dōó Dyöb áwóó e’dii bé nkamlen.

35 Nyéemwág-ke á đin dé nkōnsé, áyāle áhed dōó Dyöb ásúme mekuu. Nyéēbenlād-te ké đin á dyad á Jerusalem, áyāle ádii dyad áde kəh embáá.

36 Nyéemwág melě ké á đin dé nló mímēn, áyāle nyéēhēlēē ké mbum e esid póg ahəhən awen nló, ápúbed ké’ é áhined chó.

37 Bonj nzé ehóbé wée móbele dyam, ehób wée, ‘Ee, mēbel dō.’ Ké-’e wée, ‘Aáy, méebēnlé.’ Kéchée éche ébádé áhed né ébidé wée Satanē.

*Ayáged áde Yesue tänge akun-á-yāl
(Luk 6.29-30)*

38 “Nyêwógé ngáne behóbé nén bán, ‘Nzé mod atúbé mod đid, bétúb mómpē đid. Nzé mod ahúdé-’e mod ason, behúd mómpē ason.’

39 Bonj nlänge nyé nén meé, nzé mod abelé wē mbéb, éched yāl. Nzé mod abomé wē abén á akəg ahóg, ékunnéd mó ádíní ampē.

40 Nzé mod ahede wē asómen á kóte ákobēn wē mímōh nkobe, ébag mó káəh ne echoh súde.

41 Nzé mod anyágté wē aá ékeēn mó máyl mehóg, ékēēn mó máyl mébe.

42 Kénzée awě achómé wē chóm, bée mó. Nzé mod ahóbe-’e aá, ébál mó chóm éche éwóó, ebál mó.

*Ayáged áde Yesue tänge bad bé ekəyi
(Luk 6.27-28, 32-36)*

43 “Nyêwógé ngáne behóbé bán, ‘Edəh mwānyon, ékəə-’e mod awě akəó wē.’

44 Bonj nlänge nyé nén meé, nyédəh bad ábe békóó nyé, nyékānnad-te ábe bétagte nyé.

45 Nzé nyébelé nē, né nyéēbē bán ábe Titée awēn awě adé ámīn. Alóme’ enyen ne mbúú wée bad bé mbéb ne bé bwám nyaa póg.

46 Nzé edəó bad ábe bédáó wē bēnpēn, nē déepiinédte wē nsábe ké nhóg. Káəhne besaad-bé-táásē bómpē bébele melemlen.

47 Nzé elente’ ábōh bad bēnpēn né ebele melemlen ngáne kénzée ampée ábelé. Káəhne bad ábe béesš bad bé Israel bébele nē.

48 Né-óó, mbeltéd mímēn nítəngéné nēe nityéémé bwám, nēngáne mbeltéd míme awēn Titée awě adé ámīn.

6

Ayáged áde Yesue tänge awóngen bad

1 “Nyétéd pónde! Nyéēbēlē nsón ní Dyöb ábel bonj bad bényín nyé. Nzé nyébele nē, né nyéekudte nsábe wée awēn Titée awě adé á nkamlen mí mín.

2 “Né-óó, nzé ebage mod chóm éche átógnéné, weékūmé nkəh nēngáne bad ábe bédoge yāl. Békume nkəh á ndáb é mekáne ne á dyad-tē wée bad bédíí,

ábel boŋ bényín bó. Ne mbále nlânge nyé meé, bémáá mímab nsábe ísyā̄l akud.

³ Boŋ nzé ebage mod chõm éche átógnéné, weébēlē'-se ké awoŋ wën awě étómténé adəŋ abíí.

⁴ Nê débēl mod ké nhóg éebíí'é chõm éche ébágé mó. Dyõb, awoŋ Titée awě anyíne mam míme mébenled á e'koŋned-te mó̄sābē wε.

Ayáged áde Yesue tâŋgene mekáne
(Luk 11.2-4)

⁵ “Nzé nyêkanne', nyéekánné' née bedog-badé, ábe nzé békánné' bédəə atyéem á ndáb é mekáne ne á mbom, ábel boŋ bad bényín bó. Ne mbále nlânge nyé nén meé, bémáá mímāb nsábe ísyā̄l akud.

⁶ Boŋ pen, nzé mod akánné', asól áwē toŋ-tê, ádíb ekob, boŋ ákānnē wée eche sán Dyõbe awě mod éenyínēē. Ene pónde awóŋ Titée awě anyíne' mam míme méde á e'koŋned-te āsābē wε.

⁷ Nzé nyêkánné', nyéebádnán e'yale mbád ne mbád, ngáne bad ábe béesě bad bé Israel bébeléé. Bébelé béwēmtān bán Dyõb déwōg bó mekáne áyāle bébúde e'yale áte.

⁸ Nyéebág née bó, áyāle Dyõb, awên Titée, amaá abíi chõm éche nyétógnéné byánán nyéēsedéd mó.

⁹ Né-ɔ́, enén nyaa e mekáne chõo nyétāŋgéné akáne, Dyõb, Titée awêd, awě adé ámín, edúbé ébê ne ádoŋ dín.

¹⁰ Mmōŋ nkamlɛn níhye rítéd etál.

Bad bé nkõŋsé bébel mekan míme éhedéé, ngáne ébenlaadté ámín.

¹¹ Bag sé echəd ndyééd e epun e bín é' chii.*

¹² Lagsén sé mímed mbéb, ngáne sémpē sélagsanné mod téé awě abelé sé mbéb.

¹³ Weémwāg-se sêhún á mekáŋsen-tê, boŋ húd sé á mekáá mé Satan.†

¹⁴ Nzé nyêlagsan bad mewusé míme bébenlé nyé, né Dyõb Titée awên awě áde ámín mómpē ālagsén nyé.

¹⁵ Boŋ nzé nyéēlagsán bad, né ké Dyõb awên Titée éelagsénné nyé.

Ayáged áde Yesue
tâŋgene adid á yāl nzaa á mekáne-tê

¹⁶ “Nzé edide yāl nzaa á mekáne-tê, weésudné' ngáne bedog-badé bébeléé. Béchemte' e'só á nló ábel boŋ bad béchem bán bédide yāl nzaa á mekáne-tê. Ne mbále, nlânge nyé nén meé bémáá mímāb nsábe ísyā̄l akud.

¹⁷ Boŋ nzé edide yāl nzaa á mekáne-tê, éwōbē e'só, ésedē'-e nló áte.

¹⁸ Bēl nê, ábel boŋ bad béchemé bán edide yāl nzaa á mekáne-tê, étōméé awóŋ Titée awě mod éenyínēē. Anyíne' mam míme méde á e'koŋned-te, mó-'aá āsābē wε.

Ayáged áde Yesue
tâŋgene awóŋ á bwēm

(Luk 12.33-34)

¹⁹ “Nyéekõŋnád yāl nhon á nkõŋsé wén, wée sii ne ngag bébēbēdtē, bechíb-pe ámpē bébóó ndáb, béchíb.

²⁰ Boŋ nyékoo mímēn nhon wée sii ne ngag bébēbēdté, bechíb-pe ámpē bébóó'é ndáb se béchíb.

²¹ Nyébíí bán wée nhon míbáŋkē mod, áhed dõo nlém-me míbáŋkē mó.

* **6:11** Bag sé ndyééd e epun é bín é' chii káa ndyééd e epun é bín é' chán. † **6:13** Donje á kálag dé'sõ ábádé bán Nkamlɛn, ngine ne ehúmé bédii áboŋ á ngindé ne á ngindé.

22 “Did dɔɔ áde ngáne etrukán é yǎl e mod. Nzé did ákénlé wε áte, echoŋ yǎl esyǎál chómpē ebélé ekélé.

23 Nzé déekēnle, yǎl chómpē ɛlɔn wε áte ne ehíntén. Né-ɔɔ, nzé chóm éche ényínte nyé ekíde étímé abé chóm éche étímté nyé á ehíntén-tê, né échē ehíntén échē nyébēē áte étōmtēn ngíne abé.

24 “Modmod eéhēlēē-se abé mbàledε a bewónj bébe. Alūmēd nhóg edəŋge tómaa aníníí, ké’ε átīmēn nhóg, abán-’ε aníníí áyāl. Weéhēlēē-se ebé mbàledε a bad bébe abé ahóg. Weéhēlēē-se ebé mbàledε a Dyɔb se ebé-’ε mbàledε a mɔnε.

25 “Né-ɔɔ, nlāŋge nyé nén mēé nyéētāgē áte á alongé, se nyéhōbē nén bán cheé nyédyēē, ké’ε nzé-chómé nyémwēē, ké’ε cheé nyéwāā’ē á yǎl. Eesaá mbále bán alongé átómé ndyééd-ε? Yǎl-le ámpē eesaá etógnén tómaa mbóté-yε?

26 Nyénɔne menɔn, méewēnēē bwēm, méēpādēē, méewóo-’áa hóm áde békɔŋgé medyé. Kénê, Dyɔb awên Titée awē adé ámín adídte mól! Nyéebíí’ē bán nyéde etógnén bwāmbwam tómaa menɔn-ε?

27 Nzé-módé áwēn tíntē ahele átāg áte kááŋ, abád ké epun ehóg áwē alongé?‡

28 Cheé-ɔ́ ékáá bonj nyétagé áte áyāle mbóté éche nyéwāā’é? Nyénɔne’ mbonja éche édé á mehín-te ngáne ékwogéé. Eebelée ntǔ, éebaŋgéé mesan.

29 Nlāŋge nyé nén mēé, ké kāŋ Solomonε ne nímē nhɔn nisyāāl eewāā’áa mbóté éche épédé échén mbonja ké póg e’bonj.

30 Nzé Dyɔb áhελεε áwāādtē e’sum ábē é’bāg chii bonj chǎn béhé bó á dù, né éetómmé nyé awáad né-yε? Chán adúbe adíí nyé mwāmpín nén?

31 Né-ɔɔ nyéētāgē áte bán, ‘Cheé sédyēē? Cheé sémwēē?’ Ké-’ε bán, ‘Cheé séwāā’é?’

32 Bad ábe béesē bad bé Israel bóɔ béchyεε’ ákud échén ndín é bwēm. Awên Titée awē adé ámín abíí aá nyétógnéné ábén bwēm é’syāāl.

33 Bonj nyésébe nyé nyéhεd mam mé nkamlen ní Dyɔb tómaa mam mésyāāl, nyébele-’ε ngáne Dyɔb áhεdnεé nyé. Nzé nyébele nê, né Dyɔb débē nyé ábíníí bwēm é’syāāl.

34 Né-ɔɔ nyéētāgē áte áyāle epun é’ chǎn. Epun é’ chǎn chén éwōŋ nímē metake nímē mékwognéd chó. Epun téé éwóó nímē metake.

7

*Ayáged áde Yesuε
tāŋgene bad ábe békáadte baáb
(Luk 6.37-38, 41-42)*

1 “Mod eekáádté waáb. Nzé eekáádté wēn, né Dyɔb dómpē dékāād wε.

2 Nyaa echē ékáádté wēn, chóɔ Dyɔb dómpē dékāádtē wε. Melemlem mé nhəgtéd nímē ébénlédé móɔ Dyɔb dómpē débénlédte.

3 Cheé ékáá bonj éwāmsān mwǎ púuted anyín á did áwēn, ésebán ehεle nkɔg nímē nídé mmōŋ á did anyín?

4 Chán ehεle-se eláá mwānyonj wεé ámwε móhūd mó púuted á did, áde nkɔg nídíí mmōŋ á did?

5 A-edog-bad! Sébé ehūd nkɔg nímē nídé mmōŋ á did, dɔɔ wétōŋ’é púuted echē edé mwānyonj á did anyín, bonj ehūd-te chó.

6 Weetédé mam mé Dyɔb se ébē mbwé, áyāle ékunnéd wε yǎl ékūm-mε wε. Weebwémmé nguú échōŋ ngeεe áyāle édyanťéd chó ámín.

*Hεdén Dyɔb kéchéé éche ehεdεé
(Luk 11.9-13)*

‡ 6:27 Abád ké epun ehóg áwē alongé káa áchab tómaa ngáne adlí.

7 “Hedén Dyöb, äbë wε. Hëd, Dyöb débël enyín, kùm ekob, Dyöb dédibnéd wε.

8 Ayäle kénzée awë ahëdné Dyöb, äküd, awë ahédé-’ε, änyín. Kénzée-’ε awë akumé ekob, Dyöb dédibnéd mó.

9 Sáa-a-mwän ahée mwän áhédénné ewele, bonj ábe mó aláá?

10 Ké-’ε nyé ahée mwän áhédénné súu, bonj ábe mó nyä?

11 Nzé e’bébtéd é’ bad née nyé nyébage áben bán kase é bwëm, tógtén-naá echen Sánj awë adé ámín? Chán-nō éebaá bad ábe béhédné mó kase é bwëm?

12 Né-óó, kéchéé éche édásá wéé bad bébel áwōñ, ébel chó áwāb. Nén dō mbéndé e Dyöb ne bekal-bé-e’dáádəñ ékoo’é ayáged.”

*Nzii e alongé áde déemaá’
elélé áte
(Luk 13.24)*

13 Yesuε ambád aá, “Bwéé á ekob éche éhíné áte, áyāle ekob éche ékag á dü-á-muú ékálé áte, nzii eched-te etánlédé, bad ábe bébwag-kε áhed bébúú áte.

14 Bonj ekob é nzii e alongé áde déemaá’ edé mwämpín. Nzii-’ε echë etime áwed elélé abwε áte. Nguse é bad chóó ébwag-kε áhed.

*Bekal-bé-e’dáádəñ bé metóm
(Luk 6.43-44)*

15 “Nyétéd pónde ne bekal-bé-e’dáádəñ bé metóm. Bélúmte byánán bépwéédtedé née ndyōñ ní mbód, bonj áwab nlém-té bédé ebébtéd née ngā.

16 Nyéēchem bó á mbéltéd nímāb. Mewāñ méchyáa e’pum é’ besabé-yε? Ké-’ε mekód méchyáa’ e’pum é’ máñgəle-yε?

17 Melemlem-’aá bwel ké é’hée ábe é’kwoge’ bwām, é’chyáa-’ε e’pum é’ bwām. Bonj ké é’hée ábe béekwōgé’ bwām, béēchyāā-’é e’pum é’ bwām.

18 Bwel é’ bwām béehelée e’pum bé mbéb achyáa. Bwel bé mbéb-pε béehelée e’pum é’ bwām achyáa.

19 Bwel ké é’hée ábe béēchyāā’ e’pum é’ bwām, nwóó-nzag äkwel bó, abwém bó á dü.

20 Né-óó, nyéēbīī bekal-bé-e’dáádəñ bé metóm á mbéltéd nímāb.

*Bad ábe béhide Yesuε
ne nlém nibe
(Luk 13.25-27)*

21 “Saké mod téé awë achəgtaad mε aá, ‘A-Sánj, A-Sánj,’ äsöl á nkamlen ní mín. Bad ábe bébele ngáne echem Sánj awë adé ámín áhédnéé bó, bóó bésöl.

22 Ade epun é nkáásé mé asóg épéé, bad híin bépě áwēm, bélāngē mε bán, ‘A-Sánj, A-Sánj, ngómē sēkänlé’ áá bad mam míme Dyöb álómné’ áá sé áá mébenléd, á dīn ádōñ, sébenléd-te ádōñ dīn ábíded bad e’dáádəñ bé mbéb áte, sébelé-’ε menyáké híin!’

23 Héé mélāā’ é bó mεé, ‘Meebīī’ é mε nyé. Nyésyəə mε á dīd-te! E’bébtéd é’ bad ngên!’ ”

*Belóñ-bé-ndáb bébe:
a debyée ne a eyákél
(Luk 6.47-49)*

24 Yesuε ambád ámpē aá, “Né-óó, mod téé awë awógé ábēm e’yale bén, bonj ábelé-’ε ngáne é’hóbéé, ádíi née mod a mekínzé awë alóó ndáb á ebēn é aláá mín ábel bonj éwúú ásē.

25 Ambíd e nê, mbúú e ngíne enchá, e’díb é’lóné, ekukud-te étóm wéé ene ndáb émbēē, bonj enkēnkweé, áyāle enlōñnéd á aláá mín.

²⁶ Bon kenzéé awě awógé ábêm e'yale bén, bon eébele ngáne é'hóbéé, adii nêngáne eyókéł é mod éche élóó eche ndáb á nsíí mín.

²⁷ Ambíd e nê, mbúú e ngíne enchó, e'díb é'lóne, ekukud-te étóm wée ene ndáb émbēē. Ene ndáb enkwě. Enkúme émād-te ahented áte.”

Kunze eche Yesue awóó áyáged

²⁸ Ade Yesue áamáá mímén mésyāēl ahób, amute áde áwóglánnáá mó démbē menyáké bwāmbwam áyāle nyaa echē áyágté'áá.

²⁹ Ayágté'áá bó nēe mod awě nzé ahóbé, né éamáá. Eeyágté'áá, nêngáne bemeléede bé mbéndé.

8

Yesue achōjté mod awě meləḡ məkóbé

(Mak 1.40-45; Luk 5.12-16)

¹ Yesue ansūd á ekone sé. Ade ápédé é ekone sé ndun e mod ehídé'áá mó.

² Hê dōo mod nhóg awě meləḡ məkóbé ápédé áwē bon ábwāgē mebóbón ne edúbé ésyāēl, áhōbē nén aá, “A-Sán, nzé edəə ehēle ébēl me nsán.”*

³ Dōo Yesue ábídté ekáá, ábānē mó á yāl bon álāngē mó aá, “Ndəə, sán!” Abwāg-ábwāg mímē meləḡ mēmáá ane mod á yāl.

⁴ Dōo Yesue álāngéé mó aá, “Weelāngé modmod dyam áde ábénlédé, bon kě élúmed yāl wée prise, ásimen wē. Ebag-ke mende ngáne mbéndé e Mosēe éhēdēé, álúmed bad wēé mósāā.”

Yesue achōjté mbəlede a mod ambáá a sánze
(Luk 7.1-10)

⁵ Ambíd e nê, Yesue ankě á dyad á Kapenahum. Nēe ápédé áwed, mod ambáá a sánze é Roma ambé awě akamlaan mbwókēl e sánze. Ane mod anhye mó achán, áhōbē

⁶ aá “A-Sán, awēm mbəlede eédyé'é bwām, adé á anon de nkole á ndáb. Eéhēlēē ahide áse. Atage bwāmbwam.”

⁷ Yesue anláá mó aá, “Mēpě, ríchōōd-te mó.”

⁸ Dōo mod ambáá a sánze ne átimtanné Yesue aá, “A-Sán, mměn meékwognedéé ákob wē nken áwēm ndáb, bon hób ké eyale, awēm mbəlede ádyéé bwām.

⁹ Mměn ndii mod awě adé áse e nkamlēn, mměn-ne nwóó sánze éche ríklanné. Nlānge póg mēé, 'Kág', ékág-ke nē dēn, empée mēé 'Hyäg', éhyäg-ke né dēn. Nzé nlānge awēm mbəlede mēé, 'Bēl échéń', ábēlé-'é né dēn.”

¹⁰ Ade Yesue áwógé nê, yāl enkóm mó áte. Dōo álāngéé bad ábe behídé'áá mó aá, “Ne mbále, nlānge nyé mēé, meényīnēē mod a alon á Israel ké nhóg awě awóó nyaa e adúbe echē anén nken-e-mod áwóó.

¹¹ Nlānge-'é nyé nén mēé póndé echē ngande ébēē á nkamlēn rí Dyōb, bad híin ábe bēnkētāngēń abé áhed bēbīd á akuu ne á mbəḡ abé á ngande nchoo ne betaa, Abrahamē, Aisigē ne Jakōbē.

¹² Bon bēbīdēd bad ábe bēntāngēń abé á nkamlēn rí Dyōb á ebwóg-te, bēbwém bó á ehíntēn-tē. Áhed-táá bēchyéé'é bēdyāg-ke meson á nsəl.”

¹³ Dōo Yesue álāngéé ane mod á sánze aá, “Súé' á ndáb, ébenled ngáne édúbpé.” Melemlem mé póndé mbəlede awě ane mod ambáá a sánze andyě bwām.

* **8:2** Mměn ntelédé rídé á Kálag e Levitikus eped dyóm ne é'láán nchoo móom méniin ne rítáan ápe nchoo móom méniin ne ntóób (Lev 13.45-46).

*Yesuε achōjté ekud é bad
(Mak 1.29-34; Luk 4.38-41)*

¹⁴ Adě Yesuε ápédé á ndáb wée Petro, antán Petro mwaád nyaá á anōj dé nkole, ahéb dēnsog mó.

¹⁵ Née Yesuε áchāngé mó á ekáá, ahéb ámāā mó. Anhidé ásē, ákōb-pε Yesuε nken.

¹⁶ Ene ngukél bad bēmpεén bad híin wée Yesuε, ábe e'dáádāj bé mbéb bēmbēē áte. Yesuε ambenléd ábē e'yale bé nsəl abídéd ábē e'dáádāj bé mbéb, áchōōd-tε bad bésyāāl ábe békónlé'áá.

¹⁷ Yesuε ambēl nímén mésyāāl álóned e'yale ábe Dyōb dénlōmēnnē nkal é'dáádāj Yesayaa nén aá, “Ankobén syánē nkole nisyāāl ne nímēd metake.”

*Bad ábe bēmpōn Yesuε ahid
(Luk 9.57-62)*

¹⁸ Ade Yesuε ányíné ngáne ndun e mod élājnédé mó, anláá ábē bembapεε aá bóbōō bétime á pēd e edib-é-nzab eníníí.

¹⁹ Hē dōō meléede a mbéndé nhóg ápédé áwē boj áhōbē aá, “A-meléed, mēhīd wε kēhéé áde ékagké.”

²⁰ Yesuε antimtén mó aá, “E'ubwōg é'wóó ábab e'lóm wée bésóléé, menōn-ne ámpē méwóó nímab mūm, boj Mwān-a-Moonyōj eewóó'é hōm ádē ábānnéé nló.”

²¹ Dōō mod ampée awē mómpē ahidé'áá Yesuε álāngéé mó aá, “A-Sāj, mwē, nśébe nke nlíme echem sāj.”

²² Dōō Yesuε átimtanné mó aá, “Hídé me, chené ndim ní bad mēn nlímmē nímāb ndim.”

*Yesuε ahóódté ekukud
(Mak 4.35-41; Luk 8.22-25)*

²³ Ene pónde dōō Yesuε ásólé á bōle-tē ne ábē bembapεε boj bēbwōgē eke.

²⁴ Adě bépédé á edib-te, dōō ekukud é ngíne ébóótédé atóm. Embē ngíne nyaa echē káōjne bōle bēmpōnné asú ásē á mendíb-te. A pónde eched Yesuε akúné'áá.

²⁵ Hē-'aá bembapεε bényeméé mó ásē boj bēlāngē mó bán, “A-Sāj, sōn, wōngén, pón syánē dewág-ōō!”

²⁶ Yesuε ankwentén bó aá, “Cheé ékáá boj nyéwōgē mbwōg? Cheé ékáá boj ádēn adúbe ábē mwāmpīn nén?” Dōō átyémé ámīn, boj ákamlán ekukud éche étómé'áá, ne edib éche éhódé'áá áte. Abwōg-ábwōg ekukud énsēle, edib ámpē éche éhódé'áá áte énsōg ahod.

²⁷ Yāl enkóm bembapεε áte bwāmbwam áde bényíné nē, bésēdté bánken, “Ebál é mod éhéé chén éche káōj ne ekukud ne mendíb bēwógnéé?”

*Yesuε achōjté bad bébe
ábε e'dáádāj bé mbéb bēmbēē áte
(Mak 5.1-20; Luk 8.26-39)*

²⁸ Ade Yesuε ne ábē bembapεε bépédé á múde mé edib-é-nzab nímíníí, á mbwōg e bad bé Gerasin, bad bébe ábe bēmbīd á soóbade bēmbōmén mó. E'dáádāj bé mbéb bēmbē ábē bad bébe áte. Abē bad bēmbē nganjlen nyaa echē mod ké nhóg éechue'aá ene nzii abwε.

²⁹ Anyín áde bényíné Yesuε, bēmbootéd abón bán, “A-Mwān a Dyōb, cheé syánē déwōjné? Epedé hén ákōgsen sé áde pónde éēpēdēē-yε?”

³⁰ Esog é nguu chó-'ε ébédé benben ne áhed, édyāg medyé.

³¹ Hēé ábē e'dáádāj bé mbéb é'cháa-'ε Yesuε bán, “Sēbíí bán wēbīdēd sé, boj tēdé sēsīl á esog é nguu-tē éche édé híníí nē.”

³² Dóo Yesue ákamlanné ábê e'dəádəŋ bé mbéb aá, “Nyébíd!” Abíd áde ábê e'dəádəŋ bé mbéb é'bídé ábê bad áte, bénsəl nguú chē áte. Abwōg-ábwōg, échē esəg é nguú émpādē ásē, ényəgté' á eláá é nkin mé edib-é-nzab, éhún á edib-tê, éwé'-é.

³³ Benən bé nguú béntōm mehélé á dyad-tê, békag békanklé bad dyam áde ábénlédé ne ábê bad ábe e'dəádəŋ bé mbéb bémbēé áte.

³⁴ Awóg áde ábê bad bé dyad béwógé nê, bémpādē ásē áke dé atán Yesue. Néé bénýiné mó, bēnchāŋ mó bán, áhide áwab mbwóg.

9

Yesue achōjté mod awě awédé eped

(Mak 2.1-12; Luk 5.17-26)

¹ Ambíd e ene pónde, Yesue ansól á bǎle-tê ámpē, áchābē edib-é-nzab, átīm ámbíd áwē dyad wéé ádyéé'áá.

² Ape áde Yesue ápedé áwē dyad, bad behóg bēmpēén mod á mekále mín awě awédé eped. Ade Yesue ányíne adúbe áde ábê bad, anláá ane mod awě awédé eped aá, “A-mwān, weewógé mbwóg, nlagséné wē mbéb.”

³ Hē dóo donje dé bemeléede bé mbéndé bénýonjéé áte bán, “Anén mod asyāə Dyōb!”

⁴ Yesue anchēm bó mewēmtēn áte. Héé ásedtēé bó aáken, “Cheé ékáá bon nyēwōŋ nímén mewēmtēn mé mbéb áte?”

⁵ Ahéé adé dyam ásad, áhób wēé, ‘Nlagséné wē mbéb,’ káa áhób wēé, ‘Syāə ásē, ébooted áke?’

⁶ Bon mǎlūmēd nyé mēé Mwān-a-Moonyon awóó kunze á nkōŋsé álagsen mbéb.” Héé álāŋjéé ane mod awě awédé eped aá, “Syāə ásē, étēd nímōŋ mekále, ésúé' á ndáb.”

⁷ Dóo ane mod áhídté ásē bon ásūē'-é á ndáb.

⁸ Mbwóg ménkōb bad ábe bénýin ngáne ádén akan ábénlédé. Bébootéd-tē Dyōb áken áde ábágé baányon kunze ábel échén ndín é mam.

Yesue achénlé Matyo áhid mó

(Mak 2.13-17; Luk 5.27-32)

⁹ Ambíd enê Yesue ansyāə áde abwóg á hōm. Ade ákagké nê, annyín mod awě béchágé'áá bán, Matyo. Matyo andyēé ásē á ndáb eche ásánté'áá tááse áte. Héé Yesue álāŋjéé mó nén aá, “Hídé me.” Dóo Matyo átyéémé ámīn, bon áhíde'-é mó.

¹⁰ Ambíd e pónde Yesue ankē á ndáb wéé Matyo* ádyé ndyééd. Ekuđ é besaad bé tááse né bad bé mbéb bēmpēe bēmpē bēdyēēn Yesue ne ábē bēmpāēē áhed.

¹¹ Néé donje dé Befarisia bénýiné ngáne Yesue ádyééné échē ndín é bad, bēnsédéd ábē bēmpāēē bánken, “Cheé ékáá bon awēn meléede ádyāŋ ndyééd ne besaad bé tááse ne bebel bé mbéb bēmpēe?”

¹² Dóo Yesue ákwēntanné bó aá, “Bad ábe bēdyéé bwām béetógnēné mod-a-bwēl. Bad ábe bēkonle' bóo bétógnéné mod-a-bwēl.

¹³ Nyéke nyéhēd áte ábel nyésōŋtēn ábén e'yale ábe é'ténlédé á kálag e Dyōb nén bán, ‘Chōm éche níhēdnéé bad édii nlém ní ngol, saké mendē.’ Meépedéé á nkōŋsé áchéle bad ábe békóbnédé á'sō é Dyōb, bon mpedé áyāle bad bé mbéb.”

* **9:10** Ndáb wéé Matyo káa ndáb eche Yesue.

Nsɛdtéd t̃ngene ádid yǎl nzaa á mekáne-tê

(Mak 2.18-22; Luk 5.33-39)

14 Hê dɔɔ bembapɛɛ ábe Jɔne, Ndusɛne bɛpédé wéɛ Yesue boŋ bɛsɛdté mó bánken, “Cheé ékáá boŋ sé ne Befarisia sédidé yǎl nzaa á mekáne-tê, boŋ ábōŋ bembapɛɛ pɛn béedidé?”

15 Yesue ankwentén bó ne ngan aá, “Chán bad ábe bélébpé á ngande e e'wóngé béhele bélebe' áde bédíí ne mod awě akudé sómbé? Béehelée. Boŋ epun épě éche békobénné bó mod awě akudé sómbé. Echê epun dɔɔ bédidté yǎl nzaa á mekáne-tê.

16 Nyébíí nén bán, nzé mod anabpe' mbóté, eetédéé epɛd é abad ékɔɔlɛ se ánanbéd nchun mí mbóté, áyǎle nzé échê epɛd é abad ékɔɔlɛ ébóótédé abób áte ébelé éhábéd abad dé nchun. Nê ábele' échê epɔn é mbóté ékale' áte tómaa ngáne énsébɛɛ abé.

17 Melemlem nêngáne mod éetédɛɛ m̃m mékɔɔlɛ se ápen mó á nchun mé ntyág ní ngob e nyam. Ayǎle nzé abelé nê, né m̃m méhód kááŋ ntyág ní'yéd? M̃m mémád asyoge, ntyág-ke ámpɛ níbéb. Boŋ bétédéé m̃m mékɔɔlɛ béhé á ntyág mékɔɔlɛ-te. Nê ábele' m̃m mébé bwám, ntyág-ke ámpɛ níbé bwám.”

Yesue apuúdté ngɔndérɛ póg echě enwé

(Mak 5.21-43; Luk 8.40-56)

18 Ade Yesue álángeé bad m̃mén mekan, mod a nkamlɛn nhóg ampě áwé abwóg mebóbōŋ ne edúbé ésyǎl, áhōbē nén aá, “Awem mwǎn a mmwaád awédé bɔɔb nén dɛn, hyǎg ébán mó ekáá á yǎl ábel nén ápuu.”

19 Né-ɔɔ Yesue ampádé ásɛ ne ábē bembapɛɛ béhídé ane mod.

20 Ade békagké nê, mmwaád nhóg ambé awě anwóŋ nkole míme mekií mébídé'áá mó á yǎl pónde ésyǎl. Mmê nkole níbéde mó á yǎl á etún é dyóm-a-mwé ne níbe. Héɛ ane mmwaád ábídé Yesue á mbíd, ásitán mó mesó mé nkobe míme ánwǎá'é.

21 Ambel nê áyǎle ánwǎlé mewɛmtɛn aá, nzé mósiténé m̃mē nkobe, aá né móodyéé bwám.

22 Dɔɔ Yesue ákúnnédé boŋ anyín ane mmwaád. Anyín áde anyíné mó dɔɔ álángeé mó aá, “A-mwǎn-a-mmwaád, adúbe ádōŋ ádíde wɛ bwám.” Abwōg-ábwōg ane mmwaád andyéé bwám.

23 Yesue ampě á ndáb echě ane mod a nkamlɛn. Ade ásólé á ndáb-te, antán ndun e mod ébele ntógag ní ngine ne bad ábe bétóo e'lón, békōnɛ-'ɛ nkáŋgé ní kwééd.

24 Dɔɔ Yesue áhóbéé aá, “Nyé moosyǎl nyébíd á ebwóg, áyǎle anén mwǎn-a-mmwaád eewédéé, akúne kúnén.” Héɛ bó moosyǎl bɛbóótédé mó awɔɔ.

25 Boŋ áde ene ndun e mod émáá abíd á ebwóg dɔɔ Yesue ásólé á toŋ echě bennaádté ane mwǎn. Néɛ Yesue áchéngé mó á ekáá, apádé-'ɛ ásɛ ábwōg-ábwōg.

26 Adén akan dɛnkanléd ene pɛd e aloŋ esyǎl.

Yesue achōŋté bad bé ndím bébe

27 Néɛ Yesue áhídté ádê abwóg á hōm, bad bébe ábe bɛnkwe ndím béhídé'áá mó ámbíd, bélébpɛ-'ɛ e'saad bán, “A-Mwǎn a mbyaa míme Dabide, wóg sé ngol.”

28 Ade Yesue ásólé á ndáb-te, ábê bad bébe ábe bɛnkwe ndím bɛntán mó. Dɔɔ Yesue ásedtéé bó aá, “Nyédúbé nén bán nhele níbel nyényínen-ɛ?” Bɛnkwentén mó bán, “ɛɛ. A-Sáj, sɛdúbé.”

²⁹ Dóo Yesue ábáné bó mekáá á mīd, bon ahōbē nén aá, “Nyêwóó adúbe bán nyéēnyīnēn, né-óó ébenled ngáne nyédúbpe.”

³⁰ Abwōg-ábwōg bébootéd-te anyīnen. Bon Yesue asím bó etúu áte, álāngē bó aá, “Nyéelāngé mod ké nhóg ádén dyam áde ábénlédé.”

³¹ Bon ké nê, née bébídé áhed, bémbē békēen nkalan ene ped é alon ésyāal ngáne Yesue ábélé menyáké.

*Yesue achōnté mod
awě eehóbe'áá dyam*

³² Née ábē bad bébe ábe bēnkwx̄ ndīm ábe Yesue áchōnté béhídté, bad bēmpēen mod wée Yesue awě ankwē ebóbé áyāle edāádān é mbéb émbē mó áte.

³³ Bon áde Yesue amáá ane mod échē edāádān é mbéb abided áte, ambootéd dyam ahób. Nén dénkōbēd ndun e mod echē ebédé áhed menyáké, béhōbē-é bán, “Dyam née ádén déēbēnlēdēē á Israel mbéd.”

³⁴ Bon Befarisia pen béhōbē nén bán, ahēle bad e'dāádān bé mbéb ahúd áte áyāle kōn e e'dāádān bé mbéb chōo ebage mó ngíne ábel nê.

Yesue awógé bad ngal

³⁵ Né-óó Yesue akagé'áá myad mésyāal, mémháá ne mésad ene ped e alon, áyāgtē eyale é Dyōb á ndáb é mekáne, ákalé-é nkalan ní bwām mé nkamlēn ní Dyōb. Yesue achōnté'áá bad bé nkole bésyāal ne nyaa é nkole ésyāal éche émbē átintē echáb.

³⁶ Ade Yesue anyīné ndun e mod, ngal enlóg mó á nlém-tē bwāmbwam áyāle echáb. Ambé bó ngal áyāle bétágé'áá áte, béewóo-é nwōngēn. Bémbē née rídyōn ní mbód míme méewōo nnōn.

³⁷ Dóo álāngēé ábē bembapēē aá, “Nzag echyáá bwāmbwam, bwēm é'hēdnaad apád, bon bepád béebuu'é áte.

³⁸ Né-óó, nyékāne nén bán nwóo-nzag álōm bepád.”

10

*Bembapēē bé nlómag
dyōm ne bébe*

(Mak 3.13-19; Luk 6.12-16)

¹ Ambíd e nê Yesue anlād ábē bembapēē dyōm ne bébe áte. Ambé bó kunze ábided bad e'dāádān bé mbéb áte, áhood bad bé nkole ne nyaa é nkole ésyāal.

² Mīn míme bembapēē bé nlómag dyōm ne bébe ábe Yesue mōmén: A'só, Simōne awě béchágé'áá bán Petro ne mwānyan Andreyā. Jemse bó mwānyan Jōne, bán ábe Zebēdiē,

³ Filibē ne Batolomyo, Tōmasē ne Matyo nsaad-a-táásē, Jemse mwān awě Alfōse, ne Tadiose,

⁴ Simōne awě ambé á epepé é kán e alon, ne Judas Iskariōde awě antīm Yesue asóm.

*Yesue alāngé bembapēē bé nlómag
ngáne bébenlé míme nsōn*

(Mak 6.7-13; Luk 9.1-6)

⁵ Abē bad dyōm ne bébe bóo Yesue ánlōmmē. Anláá bó aá, “Nyéēkāg á myad míme méesē myad mé alon á Israel, nyéēkāg-ke dyad ké ahóg á alon á Samaria.

⁶ Bon nyékag wée bad bé Israel. Bédé née rídyōn ní mbód míme mbóó.

⁷ Nyékag, ngáne nyékagké, nyéhānte nén bán, 'Nkamlēn ní mín rídé benben.'

⁸ Nyéchoṅte bad bé nkole, nyépuudte bad ábe béwédé, nyéchoṅte bad ábe békōnle nkole mé melān ábel bésān, nyébídte-é bad e'dāádān bé mbéb áte.

Mbagé nyé ngine ábel mímén mésyāāl, meéhēdnēé nyé nsábe. Né-ɔ́ nyémpē nyéke nyébele melemlē nyéēhēdnē bad nsábe.

⁹ Nyéewánlé mənē ké nhóg áyāl.

¹⁰ Nyéewánlé ekwε, ké'ε mbóté éβε áyāl. Nyéewánlé metámbé, ké'ε ntón. Ayāle mod a nsón atánǵéné ndyééd akud wεε mod awě ábenléé nsón.

¹¹ Nzé nyésólé dyad ké ahéé, nyéhēd mod awě akwěnténé nyé nken akob, nyédyēé áwe ndáb káǵ ne pónde éche nyéhídtéé áde dyad.

¹² Ndáb ké ehéé echē nyésólé áte, nyélēlēd bad ábe bédé áwēd-te nén bán, 'Nsaǵ mǵē ne nyé.'

¹³ Nzé bad ábe bédé áwēd-te békóbé nyé nken, mímén melentēn mé nsaǵ rí Dyōb mǵē ne bó. Boǵ nzé béekobe nyé nken, mímén melentēn rísú ne nyé.

¹⁴ Boǵ nzé nyēpedé ndáb ké'ε dyad ké áhéé, boǵ béekwentene nyé awóǵlēn, nyékūd ebumbú á mekuu áde nyéhídtéé áhed, álúmed nén bán, Dyōb déekobéé bó.

¹⁵ Ne mbále, nlánǵe nyé nén méé á Epun é Nkáásé, nkóǵsen míme myad mé Sodom ne Gomora bényínnē mébē mwǻmpǵn tómaa míme bad ábe bédé áde dyad."

*Metake míme
bembapεε békudté*

á dǵn áde Yesuε

(Mak 13.9-13; Luk 21.12-17)

¹⁶ Yesuε ambád aá, "Nyénǵne", nlóme nyé née rǵdyǵn mí mbód átǵnté e ngǵ. Né-ɔ́ nyébē mekǵnzé née nyǵ, nyépwiited-te née élāǵ.

¹⁷ Nyétéd pónde, áyāle bad bēbē ábe békéén nyé á kóte, béswǻdtéd nyé e'tǵǵú áwab ndáb é mekáne.

¹⁸ Áyāl e echēm bépéén nyé á'sō é' benkamlēne ne é' kǵn. Bébēl nē ábel nyékale bó nkalanǵ mí bwám, nyékale-'ε bad ábe béesē bad bé Israel.

¹⁹ Nzé bépééné nyé ké ahéé ákáad nyé, mod eétǵǵé' áte áyāle chǵm-εε áhǵbpē ké'ε ngáne áhǵbpē chǵ. Ade pónde épéé, chǵm ébē éche áhǵbpē.

²⁰ E'yale ábe áhǵbpē béebáá ábē, bēhūū ne Edǵǵdǵn éche eche Sǵn awě áhǵbpē mǵ.

²¹ Mod áβε mwǻnyǵn á mekáá mé bad bémǵpē ábel bēwúu mǵ. Sée mwǻn ámpē ábēl melemlē ne mwǻn. Mwǻn ákunnén sáá ne nyanǵ yǵl ábēl bēwúu-'ε bó.

²² Mod asyǵāl ákǵó nyé, áyāl echēm, boǵ kénzēé awě ákaán míme metake nlém káǵ ne a asóǵ, ákūd e'soóson.

²³ Nzé bétǵgté nyé á dyad ahóg, nyényǵged nyéke ádíní. Ne mbále, nlánǵe nyé nén méé, nyéepaá nsón amad á myad mé alonǵ á Israel mésyāāl, boǵ Mwǻn-a-Moonyonǵ ápag.

²⁴ Mwǻn-a-ayǵge eetóméé mod awě ayǵgte mǵ. Mbǵledε-'ε eetóméé eche sǵn.

²⁵ Né-ɔ́ mwǻn-a-ayǵge eetǵǵǵenεé née áhēdeé edúbé éche étómé éche mod awě ayǵgte mǵ. Mbǵledε-'ε ámpē eetǵǵǵenεé née áhēdeé edúbé éche étómé éche eche sǵn. Nzé bēchúúde sáá-a-mbwǵg bán Belzεbulε, né bēchuú bad ábe bédé áwe ndáb mǵn míme mébēbé tómaa nē.

Mod awě bétǵǵéné abǵn

(Luk 12.2-7)

²⁶ "Né-ɔ́ nyéebáá' moonyonǵ. Ayāle dyamdyam déesaá á e'koǵnéd-te áde déebíd áwed. Ké ahóg-ke déesaá, áde ásóǵmé boǵ bán déebyéenné.

²⁷ Mam mésyāāl míme rǵlǵǵéé nyé á ehǵntēn-tē, nyéhǵb mǵ á e'nyínēn bē ekíde. Mésyāāl-le míme nyéwóǵé á kun-tē, nyékal mǵ á nhéné.

28 Nyéewógé mbwóg ne moonyon awě ahɛle awúú ekob é yǎl, bon eéhēlē' edǎádəŋ awúú. Bon nyébáa Dyǒb áde ahɛle ábébéd ekob é yǎl, abébéd-te edǎádəŋ á dǔ-á-muú.

29 Eesaá mbále nén bán, bésóme' ndun ébe áyǎle kábpe póg-ε? Ké nê, ké póg eehúnéé á ndǎǎb ésebé á nkwenten míme echen Sǎŋ Dyǒbε.

30 Bon ne nyé, Dyǒb ábíí kǎáŋne mesonǵé mé e'sid ábe é'dé nyé á nló.

31 Né-ǎǎ, nyéewógé mbwóg, nyêdé etógnén tómaa ndun, ké êmbuú ké áte.

*Abid Yesuε mbón,
ké'ε ábǎŋ mó áyǎl
(Luk 12.8-9)*

32 “Kéznéé awě ábid me mbón á'sǒ é' baányon, me-ε mǎbid mó mbón á'sǒ wée echem Sǎŋ awě adé ámín.

33 Bon kéznéé-ε awě ábǎŋ me áyǎl á'sǒ é' baányon, me-ε mǎbǎŋ mó áyǎl á'sǒ wée echem Sǎŋ awě adé ámín.

*Yesuε ad ngabén chǎǎ
mǎpééné átínté e baányon
(Luk 12.51-53; 14.26-27)*

34 “Nyéewémtán nén bán, nhyedé á nkǒŋsé ápεen nsan. Aáy, meépedéé ápεen nsan, bon ngabén.

35 Mpedé ákón mwǎn a mwenchóm átǎŋgen sǎá, mwǎn a mmwaád átǎŋgen nyaá, mmwaád-te átǎŋgen nyǎŋ-kǎlé.

36 Bad bé ekoyí bé mod bébid áwe ndáb-te dǎn.

37 “Kéznéé awě adǎǎ nyaá ké'ε sǎá tómaa me eékwognedéé awém mbapεε abé. Kéznéé-ε awě adǎǎ awe mwǎn a mwenchóm ké'ε awe mwǎn a mmwaád tómaa me, eékwognedéé awém mbapεε abé.

38 Kéznéé-ε awě éepém adé awǒg se áhídne me, eékwognedéé ábé awém mbapεε.

39 Kéznéé awě ahede adé alonǵé ason, ábǎd dǎ. Bon kéznéé-ε awě ábǎd adé alonǵé áyǎle echem, ákud alonǵé áde déemaá'.

*Nsábe ní Dyǒb ne bad
ábé békobe' ábē bembǎledε
(Mak 9.41)*

40 “Kéznéé awě akobé nyé nken, né me-εé ákóbé nken. Kéznéé-ε awě akobé me nken né echem Sǎŋ awě alómé me mǎǎ ákóbé nken.

41 Kéznéé awě akobé nkal é'dǎádəŋ nken áyǎle ádíí nkal é'dǎádəŋ, ákud nsábe mé nkal é'dǎádəŋ. Kéznéé-ε awě akobé mod awě asǎá nken áyǎle ásǎá, ákud nsábe míme mod awě asǎá.

42 Ne mbále, nlǎŋge nyé nén meé, kéznéé awě abagé ké mendíb mámwe ngên wée anén nhóg awě ahíde me, ké ane awě eébude etógnén abé, atǎŋgéné née ákúde nsábe ní Dyǒb.”

11

*Jǎne, Ndusene alomé
ábē bembapεε wée Yesuε
(Luk 7.18-35)*

1 Ade Yesuε amǎá ábē bembapεε dyǒm ne bébe nímén mésyǎl alyǎgten, anhidé adé abwóg á hǒm áke déyǎged ne ákal eyale é Dyǒb á myad míme mébéde benben ne áhed.

2 Ene pǎndé Jǎne, Ndusene ambé á mbwǒg. Ade áwógé mam mésyǎl míme Krístǎá ábélé'áá, anlóm ábē bembapεε áwē.

³ Anhób aá béseded mós bánken, mós adé ane awě Dyöb áhóbé aá mósölöm-ε, ngé bésine' mod ampée?

⁴ Hée Yesue átimtanné bós aá, “Nyétime' ámbíd, nyéke nyéláa Jone mekan míme nyéwógé ne míme nyényínne' díd.

⁵ Nyéláa mós bán, bad ábe bēnkwe' ndím bényínne', ábe bésyágtáá, békag bwám, ábe meləŋ ménkōbpē, bésáá. Ábe bēnkwe' ndóg bēwógne', ábe bēnwē, bēpuude', nkalanj mí bwám-me ampē níkalte' wée betóótōkē bé bad.

⁶ Nnam mbê-ε ne kénzée awě eéhəŋlene nlém á abum təŋgene me.”

Yesue ahóbé təŋgene

Jone Ndusene

⁷ Ade bembapεε ábē Jone bétimée ámbíd nē, dós Yesue ábóótédé ndun e mod echě embé áhed akale təŋgene Jone. Ansedéd bós aáken, “Póndé echě nyémbídtē áke dētán Jone á ehyánge, cheé nyéwēmtēnnē bán nyéēnyín? Apab á chyaá áde epub éságtée-yε?

⁸ Cheé nyénkonjé abíd áke dé anyín? Mod awě ahédé mbóté echě ébóó bwámbwam-ε? Bad ábe bēhāg échē ndín é mbóté bēdyεε dāsō á ndáb é kəŋ.

⁹ Nyéláa me, cheé nyémbídtē áke dényín. Nkal é'dəádəŋ mós nyénkéé anyín-ε? Nē dēn! Ne mbále nlāŋge nyé meé, nyényíné mod awě atómé nkal é'dəádəŋ.

¹⁰ Jone mós adé ane awě bēhóbé'áá áde bétélé e'yale ábe Dyöb áhóbé aá, 'Nəné', nlóme mímem mēsénze míme mēsēbē wε á'sō, áboŋsen wε nzii.'

¹¹ Ne mbále, nlāŋge nyé nén meé, mod ké nhóg awě abídé á abum dé mmwáád eetóméé Jone, Ndusene. Boŋ ké nē, mod awě adé ndimten áyāle bad ábe bédé á nkamlen mí mín, adé etógnén tómaa Jone.

¹² Bootya ne póndé echě Jone, Ndusene ábóótédé nkalanj ní Dyöb akal káəŋ ne epub é'chii, nkamlen mí mín níkude metake híin á mekáá mé bad, e'wanje é' bad-te é'kume míme nkamlen nzum.*

¹³ Mbéndé ne bekal bé'dəádəŋ bēhóbé təŋgene míme nkamlen káəŋ ne póndé echě Jone.

¹⁴ Né-óó, nzé nyēbōŋséné échab ehób adúbe, Jone mós adé ane awě bēhóbé'áá áde bēnhōpē bán, Elaijaa ahúε'.

¹⁵ Kénzée awě awóó metúu áwóge'.

¹⁶ “Boŋ cheé méhəgtēnné nyonjel e'chii? Enén nyonjel edii nēŋgáne bēndem ábe bēdyée á dyad-tē, boŋ bēlēbpē nhóg ne aníní,

¹⁷ bán, 'Sétónjé nyé e'lon,

boŋ nyéeságeé.

Sékónné nyé nkəŋgé ní kwééd,

boŋ ké nē nyéēlēbēε'.

¹⁸ Ayāle, Jone abédé, eéyoke'áá ndyééd adyé, eemwáge'áá-ε míim, bēhōbē bán, 'Edəádəŋ é mbéb édé mós áte.'

¹⁹ Mwān-a-Moonyonj apedé, ádyāg ndyééd, ámwāg-ke míim, bēhóbē bán, 'Nyénóne mós, adəá ndyééd bwámbwam. Mmwé-míime ngēn, awonje belad bé táásε ne bebel bé mbéb.' Boŋ káəŋ ne á asóg, mam míme mébenléd mélūmēd nén bán, debyée á Dyöb átəŋgéné.”

Myad míme bad bēnkēndúbée Yesue

(Luk 10.13-15)

²⁰ Bad ábe bēbédé á myad míme Yesue ámbenlé ekud é menyáké áte bēnkēnhəŋlénne' ádab abé dé mbéb. Né-óó Yesue ambootéd bós akáne áte,

²¹ áhōbē aá, “A-bad bé Korazin, ébēēn nyé ebébtéd! Ebēēn nyémpē ebébtéd á-bad bé Betsaida! Ayāle nzé émbē bán, ndəle é mekan éche Dyöb ábélé áwēn

* **11:12** E'wanje é' bad-te é'kume míme nkamlen nzum káa nípag ne ewanje.

myad, mêm̄benléd nê á dyad á Tirε ne dyad á Sid̄on, né bénwāā melebe se etún, bémwagtéd-te mbúmbú áyāl álúmed nén bán, béh̄h̄léné ádab abé dé mbéb.

²² Mbále, nl̄nge nyé nén m̄éé, á mbwε mé nkáásé, nkáá míme bad bé Tirε ne bé Sid̄on mébē mwāmp̄in tómaa mím̄en.

²³ Nyé bad bé Kapenahum ámp̄ē, nyēwēmtan bán, nyēmaá apε ádyōb, boŋ bésudéd nyé káŋse ásē á dū-á-muú. Nzé menyáké míme Dyōb abélé áwēn dyad mêm̄benléd á Sodom† né ádē dyad ádíi adé chii.

²⁴ Boŋ ne mbále nl̄nge nyé nén m̄éé á mbwε mé nkáásé Dyōb d̄élūm̄ēd nḡal ne bad bé Sodom tómaa ne nyé.”

*Yesuε alébpe bad aá,
béhyag áwē*

(Luk 10.21-22)

²⁵ Ene Póndé Yesuε anhób aá, “A-Tê, Sán̄gwéé a nkoŋ mí mín ne í sé, nságn̄en míbê ne wε, áyāle elúmté mp̄in mí bēndem mam míme ébāŋné bad bé debyéé ne bad bé nsōŋten.

²⁶ Εε, A-Tê, nê d̄ēn d̄óó éd̄áá wεé ébenled.”

²⁷ D̄óó ábádεé aá, “Echem Sán̄j ebagé mekan mésyāāl áwem mekáá. Mod ké nhóg eékoŋtεé mwān abii ésebé Dyōb Titéε. Mod ké nhóg-ke ámp̄ē eebíi’é ngáne Titéε ákōŋté abé ésebé mwān, ne kénzεé awē mwān ád̄áá aá mólúmed m̄ó.

²⁸ “Nyéhyag áwēm, nyé bad bésyāāl ábe nyékómé nted míme ídélé apém, m̄bε nyé nkóme-áte.

²⁹ Nyék̄wεnt̄en áhíd mím̄em mekuu, nyéyógke-’ε awēm, áyāle mpwiítédé, nchii-’ε nlém á abum. Nyéhyag, nyéékud nkóme-áte.

³⁰ Ayāle ayáged ádēm déeleléé áte, nted mím̄em-me méedeeléé.”

12

*Atón dé Mbwε-mé-nkóme-áte
(Mak 2.23-28; Luk 6.1-5)*

¹ Mwāmp̄in mí póndé ámbid e nê, Yesuε ne ábē bembapεε bétómé’áá á nzag é ngun-té.* Nén ábédé á mbwε-mé-nkóme-áte. Nzaa ewagáá ábē bembapεε. Né-óó bēmbóotéd e’sóg é’ ngun apád, bép̄ake’, bedyāg.

² Befarisia bényin nê, d̄óó b̄elán̄gεé Yesuε bán, “N̄oné’, ábōŋ bembapεε bébele dyam áde mbéndé éebagéé kunze abel á mbwε-mé-nkóme-áte.”†

³ D̄óó Yesuε átimtanné bó aá, “Nédē nyéeláá’é mbéd á kálag e Dyōb dyam áde k̄ŋ Dabidε ámbenlé áde nzaa ékóbé m̄ó ne ábē bad-ε?

⁴ Eténlédé nén bán, ansól á Ndáb-e-Dyōb m̄ó ne bad ábe bēnwoón m̄ó, bedyé e’wεle ábe é’bédé ndε e Dyōb, ábe ech̄ed mbéndé éebagéé mod ké nhóg kunze ádyé. Ké bad ábe bēnwoón m̄ó bēnk̄ent̄ŋḡénné adyé. Beprise bēnp̄en bóó bēnt̄ŋḡēn adyé.

⁵ Káa nyéeláá’é á mbéndé eche Mosεε nén bán, mbwε-mé-nkóme-áte téé, beprise bé Ndáb-e-Dyōb bék̄wag mbéndé e mbwε-mé-nkóme-áte áyāle nsón míme bébeléé boŋ ké nê, nê déesaá mbéb á’sō é’ Dyōb-ε?

⁶ Nl̄nge nyé nén m̄éé dyam adé hén b̄oob áde adé etógn̄én tómaa Ndáb-e-Dyōb.

† **11:23** Dyōb démbēbēd dyad á Sodom áyāle ebébtéd éche émbē áwed. * **12:1** Echē ngun ébédé nyaa e ngun eche bébenléé e’wεle. † **12:2** Bad bēnk̄ent̄ŋḡénné nsón abel á mbwε-mé-nkóme-áte. Ne Befarisia, apád ádē bembapεε bép̄ádé’áá ngun ébédéé n̄éé abel dé nsón.

7 Eténlédé ngáne Dyöb áhóbé aá ‘Chöm éche níhednéé bad édíi nlém ní ngol saké abe dé mende.’ Nzé nyênkonj ábén e’yale asôhten né nyéēhēlēē-se nyéchəgé bad bán, bédé bebel bé mbéb áde béebeléé mbéb.

8 Nyébíi-óó nén bán Mwän-a-Moonyonj awóó nkamlen káəne ámín e mbwε-mé-nkóme-áte.”

*Yesuε achöhté mod
awě ekáá éwédé
(Mak 3.1-6; Luk 6.6-11)*

9 Ambíd e pónDé, Yesuε anhidé hê, áke asól á ndáb e mekáne.

10 Mod abédé áhed awě ekáá éwédé. Bad behóg ábe bēhédé’áá Yesuε awusé akóben, bēnsédéd mó bánken, “Eched mbéndé ebagé kunze ádid mod bwām á mbwε-mé-nkóme-áte-ye?”

11 Dóó ásedtēé bó aáken, “Nyé ahéé mímē mpom ní mbód méhūnnē á echóg-te á mbwε-mé-nkóme-áte boj eékag mó ahúd?”

12 Nzé nyéhele-se nyébel nê ne mbód ngên, tógtēnnē moonyonj awě adé etógnén tómaa mbód. Né-óó, mbéndé eésáá nén bán mod eébelē bwām á mbwε-mé-nkóme-áte.”

13 Dóó álāngēé ane mod awě ekáá énwēē aá, “Sálé ekáá áte.” Asále áde ane mod ásánlé ekáá áte, ekáá éndyēé mó bwām ámpē néε échíníí.

14 Ade nén ábénlédé, Befarisia bémbid á ndáb e mekáne, bébootéd Yesuε ahəge, áwúú mó.

Yesuε, mbəledε awě Dyöb ápwédé

15 Yesuε ambíí aá bēhəgke mó. Nê dēmbēl anhidé ádē abwóg á hóm. Ade áhídté, ndun e mod enhíd mó, anchoód-te bad bé nkole bésyāāl.

16 Boj ansím bó etúú áte aá béēlāngē bad nyaa e mod eche módíí.

17 Ambel nén álóned e’yale ábe Dyöb dénlōmēnnē nkal é’dəədəj Yesayaa aá,

18 “Nyénəne’, awēm mbəledε nén awě mīpwédé, ndəá mó nwógne-’ε mó menyinje.

Mēlōm échēm edəədəj ébē ne mó.

Abidéd mbakú echē etyéémé átíntē e bad ábe béesš bad bé Israel.

19 Eebeléé nswan ne bad, éetəgé-’aá.

Béewóg-kaá mó ehób á dyad-tē.

20 Eekógédte ngen echē enəgkē, éedíméd-taá etrukánj éche éhede adím.

Abel nén káəj né mbeltéd ní bwām múmó rítédé etál.

21 A dīn ádē dóó bad ábe béesš bad bé Israel bésúmmé nlém.”

*Bad bán Yesuε abenlaad
ngine eche Belzebule
(Mak 3.20-30; Luk 11.14-23)*

22 Dóó bépééné mod wéε Yesuε, awě ankwě ndím, ákwē-’ε ebóbé áyāle edəədəj é mbéb émbē mó áte. Yesuε anchoód mó. Ambootéd anyínen, áhōbē-’ε akan.

23 Ade bad bésyāāl bényíné nê, yāl enkóm bó áte bwāmbwam. Bēn ne bēn bēmbootéd ahób nén bán, “Ehele-se ébé né anén mod adii mwän a mbyaa níme Dabidε awě bésiné-’yōō?”

24 Boj áde Befarisia bēwógé nê, bēnhōb bán, “Saá ngine eche Belzebule awě akamlan e’dəədəj bé mbéb chóó ábenlaadté ábided bad e’dəədəj bé mbéb áte-ye?”

25 Yesuε ambíí nímbāb mewēmten, né-óó, anláá bó aá, “Alonj ké ahéé áde ákábné áte, boj nchemten méesš, débēb. Dyad ké áhéé-’ε, ké’ε abum á ndáb áde ákábné áte, boj nchemten-ne méesš, déētyēmēē.

²⁶ Né-ɔ́, nzé Satanε awanne Satanε, né awanne eche yǎl. Chán-nō mímē nkamlɛn méhɛnlé atyéem?

²⁷ Nzé ngíne eche Belzɛbulɛ chɔ́o m̀bɛnladté ábided bad e'dáádəŋ bé mbéb áte, né ngíne eche nzéé-'ɔ́ ábɛn bad ábe bébidte e'dáádəŋ bé mbéb bébɛnladté? Bɛn bɔ́o békwid nyé nkáá.

²⁸ Boŋ ngáne édíí nɛn bán ngíne e Edáádəŋ é Dyöb chɔ́o m̀bɛnladté ábided bad e'dáádəŋ bé mbéb áte, nê álúmte nɛn bán nkamlɛn ní Dyöb nípedé átínté echɛn.

²⁹ “Mod eéhɛlɛɛ-se asól á ndáb e mod a ngíne se ádūm ábē bwɛm ésebán asébpé mó ahaŋ. Amaa-'áa mó ahaŋ boŋ atéd ábē bwɛm é'syāāl.

³⁰ “Kéznzéé awě éesě ne mɛ, né atəŋgan mɛ. Kéznzéé-'ε awě eewóŋgán mɛ álad, né apáa páán.

³¹ Né-ɔ́, nlānge nyé mɛé, Dyöb délagsɛn bad mbéb ké ríhée míme bébélé ne nzyəŋ ké ehée eche bésyáá Dyöb. Boŋ kéznzéé awě ahóbé e'bébtéd é' mekan təŋgene Edáádəŋ éche Ésáá éekudté alagsɛn.

³² Dyöb délagsɛn kéznzéé awě ahóbé eyale é mbéb təŋgene Mwän-a-Moonyon, boŋ déelagsɛnné kéznzéé awě ahóbé eyale é mbéb təŋgene Edáádəŋ éche Ésáá, ken bɔ́ob ké'ε á pónde échě ehúé'.

*A epum dɔ́o bécheméé bwɛl
(Luk 6.43-45)*

³³ “Nzé epum é' bwɛl ébóó, né bwɛl ábe é'chyáá échě epum bómpē é'bóó. Nzé epum é bwɛl ébébé, né bwɛl ábe é'chyáá échě epum bómpē é'bébé. Ayāle á epum dɔ́o bécheméé bwɛl.

³⁴ Píí e nyǎ chén! Chán nyéhɛlɛé-se nyéhób mekan mé bwám, áde nyé bɛn nyédíí mbéb? Mam míme níloné mod á nlém-tê, mó-'áa mébide mó á nsəl.

³⁵ Mod a bwám abɛle bwám áyāle é'bídé mó á nlém-tê wéε bwám é'kóŋnéde. Mod a mbéb-pe abɛle mbéb áyāle m̀bídé mó á nlém-tê wéε mbéb ríkóŋnéde.

³⁶ Nlānge nyé nɛn mɛé, á mbwɛ míme Dyöb dékāádté bad bé nkòŋsé, mod tée ábě nzom échě enkəŋ boŋ ahób ekúkú é eyale tée échě ámbidedtē á nsəl.

³⁷ Né-ɔ́, kéchéé échě wénhəbpē chɔ́o ékəŋ boŋ ésūū nzom káa ékwɛ nkáá.”

*Béhédné Yesuε e'chemléd
(Mak 8.11-12; Luk 11.29-32)*

³⁸ Dɔ́o donge dé bemeléede bé mbéndé ne Befarisia bɛlāngeé Yesuε nɛn bán “A-meléed, sɛhɛde nɛn bán élúmed sé e'chemléd ábe é'lúmte nɛn bán echoŋ ngíne ehúú ne Dyöb.”

³⁹ Yesuε antimtén bó aá, “Echén ebébtéd é nyonɣɛl, nyééhɛdɛɛ Dyöb awógen, nyéhɛde-'ε e'chemléd bé menyáké! Boŋ nyéekudté nzése e'chemléd bé menyáké ábe nkal é'dáádəŋ Jonaa.

⁴⁰ Jonaa ambé e'pun é'láán á abum á súu e mbáá-tê. Melemlem dɔ́o Mwän-a-Moonyon ábɛɛ á ndɔ́ob-sé e'pun é'láán.

⁴¹ A mbwɛ mé nkáásé, bad bé Ninivɛ bényemé á soŋ-tê nchoo ne enén nyonɣɛl e bad. Bétyēem mbóŋ échě ékwid enén nyonɣɛl e bad nkáá, áyāle áde Jonaa ákánlé'áá bad bé Ninivɛ eyale é Dyöb, bɛntédé abel dé mbéb. Boŋ mod adé hén bɔ́ob awě atómé Jonaa, boŋ nyéewóglánné mó.

⁴² A mbwɛ mé nkáásé, mmwaád awě akamlánnáá alon á Seba, ányemé á soŋ-tê, nchoo ne nyonɣɛl e bad bé' chii, átyēem mbóŋ échě ékwid bó nkáá. Békwe nkáá áyāle áde Solomone áyágté'áá, ane mmwaád ambíd se nchabnede wéε nkòŋsé rísogé áhyɛ dé awóglɛn mam mé debyéé míme Solomone áyágté'áá. Boŋ chii nɛn mod adé hén awě atómé Solomone.”

*Nzé edəədəŋ é mbéb
étimé mod á yəl ámpē*

(Luk 11.24-26)

⁴³ Yesue ambád ahób aá, “Nzé edəədəŋ é mbéb ébídé mod áte, ébelé ébwāgē á ehyánge áhed abwóg áde ékōmméé áte. Nzé éekude,

⁴⁴ ébelé éhób aá, ‘Mětīm ámbíd á ndáb eche mémbídtē áte.’ Ape áde épagké ébelé étán née chōmchōm éesaá á ndáb-te, née ndáb ésáá áte ne née bənábpé-’ε chó áte.

⁴⁵ Hée ékagké bəəb, éke épēēn e’dəədəŋ bé mbéb bēmpēe saámbé ábe é’dé ebébtéd tómaa mwēn, bon é’hye é’sól ane mod áte, é’bwóg-ke e’dii áhed. Ene pónde, ane mod abāg ebébtéd tómaa ngáne ánsēbēē abé. Né-əó, nê dōó ébenlédte ne nyonǵel e ebébtéd e’chii.”

Túmbé eche Yesue

(Mak 3.31-35; Luk 8.19-21)

⁴⁶ Ade Yesue álāngéé bad nímén mekan, nyaá ne Yesue baányan bēmpě bétyéem á ebwóg-te. Béhédé’áá Yesue ábel bon bóbəəó békál.

⁴⁷ Hê dōó mod nhóg álāngéé Yesue aá nyaá ne baányan bépédé, bésine mó ebwóg-te, ákalen mó.‡

⁴⁸ Hée átímténé ane mod aá, “Nzéé adé echēm nyan, benzéé-’ε bédé bānned?”

⁴⁹ Hê dōó Yesue ányíitanné ábē bembapee ekáá bon áhəbē aá, “Echēm nyan ne bānned bōó bēn!

⁵⁰ Kénzée awě abele mam nime awēm Titée awě adé ámín áhedéé adii mwānned abé-’ε echēm nyan.”

13

Ngan e mbál-e-bū

(Mak 4.1-9; Luk 8.4-8)

¹ Mmē mbwē mēn ámbíd e nê, Yesue ámbíd á ndáb-te wée ámbēē, áke ádyēē ásē á nkin mé edib-é-nzab é Galilia, áyáged bad.

² Bad ábe bēmpě áhed béntōmtēn abuu áte. Nê dēnkǵŋ ansól á bǵle-tē, ádyēē ásē áyáged bó. Abē bad bésyāēl bétyéem á nkin bēwōglān mó.

³ Aběnládtáá ngan áyáged bó mekan híin. Ankalé bó ngan aá, “Nkwel-é-nzag nhóg ankě mbál asob á nzag-tē.

⁴ Ade ásobéé mó nê, donge dénhūn á nzii-tē, menən mēmpě, mémad mó asōmted.

⁵ Donge dénhūn á meláá-tē wée ndəəb énkēmbuú’ε áte. Enwāmsēn abíd ásē ngáne ndəəb énkēnchabpé ásē áhed.

⁶ Bon née enyēn é ngíne épédé, énhyāād ábē bwēm é’wé-’ε, áyāle nkan ménkēnsónlé bó á ndəəb-tē bwām.

⁷ Mbál mēmpēe ménhūn wée mekōd médíí. Née mekōd mē mékwógé, mékán akwog áde ábē bwēm.

⁸ Bon donge dé mbál démpēe dénhūn á ndəəb e bwām. Mmēn mbál mémbídté ásē bwām, íchyáá-’ε bwāmbwam. Donge dé e’sóg dénwālē mbwókel é mbum, donge móom ntóób, ábiníí-’ε móom meláán.”

⁹ Ade Yesue ámadé nê, ambád áte aá, “Kénzée awě awóó metúu áwóge’.”

Nzəm echě ekáá bon Yesue

ábenláád ngan áyáged bad

(Mak 4.10-12; Luk 8.9-10)

¹⁰ Ámbíd e nê, bembapee ábe Yesue bēmpě mó benben bon bésédté mó bánken, “Cheé ekáá bon ébenláád ngan áyáged bad?”

‡ 12:47 Donge á kálag dé e’só déewóó’ε nímén nchoo.

11 Yesue ankwentén bó aá, “Dyöb ábágé nyé kunze ábíi kun é nkamlen mí mín, boŋ ene kunze eébagnedéé ne bad bémpēe.

12 Kénzée awě awóó nsòŋten ní kun é nkamlen mí mín, Dyöb débād mó mímé nsòŋten abe, ábel nén átòmten awóŋ. Boŋ kénzée awě eewóo, Dyöb dékobén mó ké mwá nsòŋten awě áwóó.

13 Nzom echě ekáá boŋ níkanlé bad ngan edíi áyāle bényíne’, boŋ béecheméé, béwóge’, boŋ béēsòŋtānnē.

14 Nén álònte e’yale ábe Dyöb dénlòmēnnē nkal é’dáádəŋ Yesayaa aá, ‘Nyéewōg awóg-ne-awóg boŋ nyéesòŋtēnnē, nyéēnyín, anyín ne anyín boŋ nyéechemmé.

15 Nhóbe nén áyāle ábén bad béehelée dyam ayáge ámpē.

Békólé metúu, béléádé-’ε mīd. Béewógké, béenyín-naá dyamdyam.

Nzé énkēmbé nē, né bényín, béchēm-’ε.

Né béwōgēn metúu, nlém mímāb-pe ísòŋten.

Nzé bélélé-’ε nē, né bétimén mε, né mēchoód-te bó.’ ”

16 Héε Yesue ábádéé ábē bembapεε aláa aá, “Nsimé rídé ne nyé áyāle nyényíne’ mam míme nyényínεé, nyéwōgē-’ε mam míme nyéwógeé.

17 Ne mbále, nlāŋge nyé nén mēé, bekal-bé-e’dáádəŋ ne bad bé Dyöb híin bēnwanén ānyín mekan míme nyényíné ne áwóg mekan míme nyéwóge boŋ bēnkēnyínné, bēnkēnwóg-kaá.

*Yesue atógké ngan e nwén-é-mbál
(Mak 4.13-20; Luk 8.11-15)*

18 “Bəəb-pəó nyésòŋten ngáne enén ngan e nwén-é-mbál edíi.

19 Nzé mod awóge eyale tāŋgene nkamlen mí mín, boŋ eesòŋtene chó, Satane abelé áhye, ahúd mó chó á nlém-tē. Echén ndín é bad edíi nēŋgáne mbál míme ríhúné á nzii-tē.

20 Mbál míme ménhūn á meláá-te rílúmte bad ábe békobe’ eyale é Dyöb ne menyinge ábwōg-ábwōg áde béwóge chó.

21 Boŋ échē eyale éewēnnāadtē bó á nlém-tē. Bédúbpe chó á esóŋ é pónde boŋ nzé ndutul ne metake bépédé áyāle échē eyale, bédol yāl ámbíd.

22 Mbál míme ríhúné á mekōd-te rílúmte bad ábe béwóge eyale é Dyöb, boŋ kááŋ ne á asóg, mpúlé mé nkōŋsε ne adəŋ dé abud á bwēm awóŋ ákán bó nlém áte. Nē ábele’, béehelée ahəŋlen ábel mam mé bwām.

23 Mbál míme mó-’ε méntān kase e ndəəb rílúmte bad ábe béwóge eyale é Dyöb boŋ bésòŋtán-ne chó. Ábén bad bébele kase é mekan nēŋgáne e’sóg é’ ngun ábe é’wánlé mesoŋgé mé mbum é ngun mbwókel móom ntóób, ne móom meláán.”

Ngan e mesisoŋ

24 Yesue ankalé ene ndun e mod ngan empée aá, “Nkamlen mí mín rídé nēŋgáne mod awě awéné kunze é mbál áwē nzag-tē,

25 boŋ ámbíd e nē, nkuu nhóg áde bad bémáá akún, mod a ekoyí awě ane mod nhóg, ankě á nzag e ngun-tē wē, awén mbál mé mesisoŋ

26 Ade ngun chē ébóótédé akwog, dáo bad bényíné bán mesisoŋ mómpē mékwoge’ áwēd-te.

27 Bembəlede ábe ane nwóó-nzag bēmpě áwē, bésedtē mó bánken, ‘A-Sán, éesaá mbále bán, mbál ní ngun mí bwām móó wénwēnnē á nzag-tē-ye? Chán ébénlédé boŋ mesisoŋ mékwōg áwēd-te?’

28 Dáo ákwentānné bó aá, ‘Mod a ekoyí awēm nhóg mó awéné mímé mesisoŋ.’ Ábē bembəlede bēnsədéd mó bánken, ‘Séke séhub mesisoŋ mē ásē-ye?’

29 Ankwentén bó ámpē aá, ‘Aáy. Nyéēhūbē’, áyāle nzé nyéhóbé bán nyéhube’, nyéēhubén bóəbe ngun.

³⁰ Nyémwε ngun bóabe mesison békwoge' kóon ne áde pónde épeé eche bepádtē chó. Ene pónde dóo mēlā'ē bepád mēé, bésébe béhúd mesison, belad mó áte bon béhyaád mó. Ambíd e nê, dóo bepádtē ngun, bebānē chó áwem etág-te.' ”

Ngan e mbál-e-bũ

(Mak 4.30-32; Luk 13.18-19)

³¹ Yesuε ankalé ene ndun e mod ngan empée aá, “Nkamlen mí mín rídé nēngáne mbál-e-bũ echē mod átédé bon awén áwē nzag-tē.

³² Mbál-e-bũ edé mwämpin bwámbwam nzé béhagténé chó ne mbál mémpēe. Bon nzé ekwogé, ekále' tómaa mēl mēsad mēsyāāl. Menon méhyag-ke mũm alón á ngen-tē.”

Ngan e esulten

(Luk 13.20-21)

³³ Yesuε ambé ákālē bó ngan empée aá, “Nkamlen mí mín rídé nēngáne esulten eche mmwaád ámuúnédé asii á pân é mbumé rí ngun éláán kóon ésule.”

Nzom echē ekáá bon Yesuε abenláád ngan

(Mak 4.33-34)

³⁴ Yesuε abēnládtáá ngan áyáged bad. Eeyágte'aá dyaandyam ésebán abēnlédé ngan.

³⁵ Ambel nén álóned e'yale ábe nkal e'dáédon ánhōbpē nén aá, “Mēbenléd ngan nzé nhábe wēe bad. Mēyāgēd bó mam ríme bēnkēmbí'ē bootya á mbooted mé nkōnsé.”

Yesuε atógké ngan e mesison

³⁶ Yesuε antédé ene ndun e mod, áke asól á ndáb-te. Ahed dóo ábē bembapeε bétané mó, bon belāngē mó bán, “Tógnéd sé ngan e mesison.”

³⁷ Yesuε antimtén bó aá, “Mod awē anwén míme mbál mí bwám adii Mwān-a-Moonyon.

³⁸ Nzag edii nkōnsé. Mbál mí bwám rídii bad ábe bédé ásē e nkamlen rí Dyōb. Mesison médii bad ábe Satanε.

³⁹ Mod a ekoyí awē ane nwóo-nzag-ke, awē anwén mesison áwē nzag-tē mó adé Satanε. Pónde eche bepádeé ngun chó edé asóg dé nkōnsé. Bepád bé ngun-ne bédii ángel.

⁴⁰ Ngáne beladéé mesison áte bon béhyaád mó, melemlen nê dóo ébēē ne bad ábe Satanε, nzé nkōnsé rípedé á asóg.

⁴¹ Mwān-a-Moonyon álōm éche ángel áhúd bad ábe bébelte bad bémpēe mbéb, ne bad bēsyāāl ábe bébele mbéb.

⁴² Bébwēm bó á dù-á-muú, áhed-taá béchye'ē, bēdyāg-ke meson á nsal.

⁴³ Ene pónde bad ábe bēmbēl-le ngáne Dyōb áhedéé, bēpené' nēe enyen á nkamlen wēe echab Sán. Mod ké ahéé awē awóo metúu, áwoge'.”

Ngan tēngene Nkamlen mí mín

Ngan e nhon ríme mēnkonéd

⁴⁴ Yesuε ambád ngan empée aá, “Nkamlen mí mín rídé nēngáne nhon ríme mēnkonéd á nzag-tē, bon nēe mod nhóg adíbté mó, akútén mó. Menyinge ríme ámbēē mēnkōn anke bwēm é'syāāl ábe ánwōngē asóm, ábel nén áke áchan ene nzag.

Ngan e alád dé etógnén

⁴⁵ “Nkamlɛn mí mín rídé nhəgtɛn ámpɛ nɛŋgáne mod a nyongé awě ahɛdɛ’áá meláá mé etógnɛn níme rídé nkun bwámbwam níme áchanɛé.

⁴⁶ Anyín áde ányíné aláá áde átómtɛné abon bwámbwam, áde bésómɛé, ankɛ ábɛ bwɛm é’syā́l asóm, áchān-ne dó.”

Ngan e mbínzé

⁴⁷ Yesuɛ ankəl ngan empée aá, “Nkamlɛn mí mín rídé nɛŋgáne mbínzé eche bekób-bé-súu bébwémé á edíb-te bon bekób nyaa é súu ésyā́l.

⁴⁸ Ade mbínzé émáá alón, bɛndɔ́l chɔ́ á nkin, bédyɛɛ áse ábon súu áte. Eche ɛmboŋ adyɛ́ bɛnhɛ́ chɔ́ á melonǵé-te. Eche chɔ́-’ɛ́ ɛnkɛmboŋ adyɛ́, bɛmpím.

⁴⁹ Né-ɔ́ ɛnɛn ngan elúmte ngáne asóg dé nkɔŋsé débɛɛ. Dyɔ́b délóm éche ángɛl áhúd bad bé mbéb áfintɛ́ e bad ábe bésáá.

⁵⁰ Bébɛwɛm ábɛ bad á dũ-á-muú. Ahed-taá béchyɛé’ɛ́ bédyāg-ke meson á nsəl.”

Ayáge dékǎ́lɛ ne dé nchun

⁵¹ Yesuɛ ansɛdéd ábɛ bembapɛɛ ké bésɔŋtɛné nímɛn mam. Bɛnkɛntɛn mɔ́ bán bésɔŋtɛné.

⁵² Né-ɔ́ Yesuɛ anláá bó aá, “Meléede a mbéndé ké ahée awě ayáǵké tɛŋgene nkamlɛn mí mín adii nɛŋgáne nwóó-ndáb awě abídte bwɛm bé ekóólé ne bé nchun wɛɛ ákonǵéé bwɛm.”

Bad bé Nazarɛt béekobéé Yesuɛ (Mak 6.1-6; Luk 4.16-30)

⁵³ Ade Yesuɛ áamá ayáged ne ngan, anhidé ádɛ abwǔg á hɔ́m,

⁵⁴ asú ámbíd áwe dyad wɛɛ ámbídtɛ. Awed ayáǵtɛ’áá bad á ndáb e mekáne. Bad ábe bɛnwǔg ngáne ayáǵtɛé, yəl enkóm bó áte bwámbwam. Bésɛdtɛ bánken, “Hée múmó ákúdé ɛnɛn ndín e debyéé? Chán múmó ámwagké-’ɛ́ nímɛn menyáké mésyā́l abɛl?”

⁵⁵ Kíné saá mwǎn a kápɛntaa ádíi-yɛ? Saá Maria achyáá mɔ́-yɛ? Kíné saá Jemse, Josebe, Simɔ́ne ne Judase bóó bédé baányan-ɛ?

⁵⁶ Baányan bé bebaád bésyā́l-le ámpɛ béedyɛé’ɛ́ á dyad-tɛ hɛn ne syánɛ-yɛ? Hée ákúdé ɛnɛn ndín e debyéé? Hée ákúdé ɛnɛn nyaa e ngíne éché ábenléé nímɛ menyáké?”

⁵⁷ Né-ɔ́, bɛnkɔ́ Yesuɛ. Anláá bó aá, “Nkal e’daádɛŋ awóó’ edúbé hɔ́m ásyā́l étómɛé áwɛ dyad ne áwe túmbé.”

⁵⁸ Ngáne bɛnkɛndúbéé Yesuɛ, ɛnkɛmbɛnlé menyáké híin áhed.

14

Kwééd echɛ́ Jɔ́ne Ndusɛne (Mak 6.14-29; Luk 9.7-9)

¹ Ene pón dé Herɔ́de awě akamlánnáá alon á Galilia anwóg mam níme Yesuɛ ábélé’áá.

² Dóó álǎŋǵéé ábɛ bembaledɛ aá, “Anɛn mod, Yesuɛ, adii Jɔ́ne, Ndusɛne awě ammad awé bon apuúdé. Néɛ ákǎá bon awóŋ ngíne ábɛl nímɛn menyáké mésyā́l.”

³ Herɔ́de anhób nɛ́ áyāle anlóm bad aá bekób Jɔ́ne, béhan mɔ́, bɛhé-’ɛ́ mɔ́ á mbwǔg. Ambɛl nɛn áyāle mwaád, Herodyase, awě mwǎnyan Filibe ánsɛbɛɛ awóŋ.

⁴ Herɔ́de anhé Jɔ́ne, Ndusɛne á mbwǔg áyāle Jɔ́ne anláá mɔ́ nɛn aá, “Weewóó’ɛ́ kunze áwóŋ Herodyase, mmwaád awě mwǎnyon.”

⁵ Kénɛɛ Herɔ́de áhédé’áá Jɔ́ne, Ndusɛne awúu, abédé mbwǔg ne bad bé Israel. Bad bé Israel bɛndúbɛ bán Jɔ́ne adii nkal é’daádɛŋ.

6 Boŋ Herode antim Jone awúu. Nén dēmbenléd epun-ée Herode ábélé'áá ngande áwēmtēn epun-ée áchyāādtē. Echē epun mwān-a-mmwaád awē Herodyase anság esáke á'sō é' bad bésyāāl. Nén dénwōgēd Herode menyinje bwāmbwam.

7 Nén dēmbēl ambē mó akag. Anhób nén aá, “Mmwāg melē nén, mēbē we kéchéé éche éhedeé.”

8 Nyaa anláá mó chōm éche átāngéné sáá ahēden. Né-óó anláá Herode aá, “Bāg me nló míme Jone, Ndusene á taplēt-te hén bōob.”

9 Nén dénwōgēd kēh Herode ndutul boŋ ngáne ámmadté melē amwé á'sō wée ábē beken, ambēé kunze aá béhyene nló míme Jone ábe ane mwān-a-mmwaád.

10 Né-óó anlóm bad á ndáb e mbwōg ásél Jone nló.

11 Bēmpēn nló mímed á taplēt-te, bēbē ane mwān-a-mmwaád, mó-'e ábe nyaa.

12 Ambid e nē bembapēe ábe Jone bēnkē á ndáb e mbwōg bétéd mó ndim béke bélime, boŋ béke bēlāngē Yesue dyam áde ábēnlédé.

*Yesue adidtē ndun e mod
(Mak 6.30-44; Luk 9.10-17; Jōn 6.1-14)*

13 Ade Yesue áwógé dyam áde ábēnlédé ne Jone, ansól á bōle-tē áke á abwóg á hōm wée ábédé mwēmpēn. Boŋ áde bad bēwógé bán Yesue amaá ake á bōle-tē, bēnchené mímāb myad bēkēēn mekuu áhíd mó ámbid.

14 Ade Yesue ábidé á bōle-tē, boŋ anyín ndun e mod, antómtén bó ngol abé, amād-te bó nkole.

15 Ade bin é'bóótédé ahín, ábē bembapēe bēmpē áwē, bēhōbē nén bán, “Hén áde á etūn-tē, pónde emaá-'e atóm bwāmbwam. Láá ábén bad bétime' á myad-tē míme méde bēnben, ábel béchan ndyééd eche bēdyēē.”

16 Dóó Yesue átímtanné bó aá, “Bēētāngeneé ake. Nyébó nyébe bó chōm éche bēdyēē.”

17 Dóó bēhōbēé bán, “Sēwóó e'wēle é'táan ne súu ébe chēmpēn.” 18 Yesue aá, “Nyéhyene'.”

19 Ade ábē bembapēe bépēnédé mó chó, anláá ene ndun e mod aá bēdyēē ásē á nkāókāo mín. Hē dóó Yesue awánlé ábē e'wēle é'táan ne échē súu ébe á mekáá boŋ ánóné ámín ásāgnān Dyōb. Ankabtéd bó áte, boŋ ábagé ábe bembapēe aá békabe ene ndun e mod.

20 Bad bésyāāl bēndyē ene ndyééd békód, élyāg-ke ásē. Néé bēládé echē elyāgé ásē, enlón e'lón dyōm ne é'be.

21 Mesōngé mé bad míme méndyē ene ndyééd mémbē ké e'kálé é'táan. Mmē mesōngé mé bad mébédé-ε baachóm. Bēnkētōngé bebaád ne bēndem.

*Yesue akii á mendib-mín
(Mak 6.45-52; Jōn 6.15-21)*

22 Ambid e nē, Yesue anláá ábē bembapēe aá, bésól á bōle-tē, békag á'sō á múde mé edib-é-nzab míminíí, boŋ álāngē-'e ene ndun e mod aá bésūē' áwab mendáb.

23 Ade moosyāál amáá ake, Yesue anchágé á ekone mín ákáne. Ade ehintén émáá akwē, ambé abé áhed mwēmpēn.

24 Enén pónde Yesue ábē bembapēe bēnchab bōle abēen áfintē e edib-é-nzab. Bōle étágé'áá, bēhele'áá ake á'sō áyāle epub é ngine émbid bó á'sō-te.

25 Epōg é mbwēmbwē Yesue anké á mendib mín atán bó.

26 Ade bembapēe bényiné mod akag á mendib mín, bēnāgnéd, bēlébé-'e esaád ne mbwóg ní ngine, bēhōbē-'e nén bán, “Nwú móó rídé.”

27 Abwōg-ábwōg Yesue anláá bó aá, “Nlém mééhūnē nyé, me-éé ndé. Nyéebáá'.”

²⁸ Dóo Petro álángeé mó aá, “A-Sán, nzé édé bán mmõn-éé edé, láá me ríke á mendib mîn nípe wéé edíí nê.”

²⁹ Yesue anláá mó aá, “Hyäg.” Dóo Petro ábidé á bõle-tê ábootéd-te ake á mendib-mîn âpe wéé Yesue.

³⁰ Bon áde anyíne ngáne epub é ngíne étóméé, mbwóg ménkõb mó, ábootéd-te asú ásē á mendib-te. Dóo álébpé esaád aá, “A-Sán sôn, wóngén me!”

³¹ Melemlem mé pónde Yesue ansäd ekáá, acháá-’ε mó, áhõbē aá, “Chán adúbe adíí we mwämpin nén, chee ékáá bon nlém rihünē we?”

³² Née Yesue bó Petro bésólé á bõle-tê, epub énsõg atóm.

³³ Ade nén ábenlédé, ábiníí bembapεε ábe bém̄bē á bõle-tê bēmbéé Yesue edúbé, béhõbē-’ε nén bán, “Ne mbále, edii Mwän a Dyõb.”

³⁴ Née béchápé edib-é-nzab, bēmp̄ē á múde míminíí, á mbwóg e Genesaret.

³⁵ Ade bad ábe bém̄bē áde abwóg á hõm béchémeé Yesue, benlõm bad bán bεpεen bad bé nkole bésyāäl ábe bēbédé ene ped e alon.

³⁶ Bad ábe bēmp̄ēn bad bé nkole wéé Yesue béchān mó bán ámwε bad bé nkole bésiten ké mesó mé mbóté nímē. Né-ó bad bé nkole bésyāäl ábe bēnsitén míme mesó mé mbóté bēndyéé bwám.

15

Ayáged á bad bé’ bõd (Mak 7.1-13)

¹ Ambid e nê Befarisia ne bemeléede bé mbéndé bém̄bid á Jerusalem, bétān Yesue, bésēdté mó bánken,

² “Chee ékáá bon ábõn bembapεε béēhidē’ ayáge áde ábēd betaa bétédnédé sé? Béewobpéé mekáá nyaa echē éhednéé bon bēdyē ndyééd.”

³ Yesue ankwentén bó aá, “Chee ekáá bon nyēmpē nyēehidē’ ngáne mbéndé e Dyõb éhõbēé aá débēl, á etútú éche nyéhídeé ayáge ádēn dēn?”

⁴ Dyõb áhõbē aá, ‘Béé sóó ne nyon edúbé.’ Ahõb-pe ámpē aá, ‘Kéznéé awē ahõbē sáá ké’ε nyaa dyam dé mbéb áyāl bétāngéné bēwúú mó.’

⁵ Bon nyé, nyéyágte nén bán, nzé mod awóó chõm éche ántāngēnē sáá ké’ε nyaa awõngēn bon alángeé bó aá móõbe Dyõb chõ,

⁶ né éesaá nén bán atāngéné sáá bó nyan* chõ edúbé abεen. Abel áde mod ábélé nê, né nyétedéé eyale é Dyõb née dyam á etútú éche nyéhídeé ayáge ádēn.

⁷ Nyé bedog-badé! Nkal é’dáedān Yesayaa antāngén áde ánhõbpē ne e’yale ábe Dyõb dénlõmēnnē mó tāngene nyé aá,

⁸ ‘Abēn bad bēbage me edúbé é nsal ngên, bon nítab nlém méesaá áwēm.

⁹ Edúbé éche bēbageé me éesaá dyamdyam, áyāle bēyágte bad áhíd mbéndé é baányon byánán edíi mbéndé é Dyõb.’ ”

Mam míme mébele bon *mod eesáá’ á’sõ é’ Dyõb* (Mak 7.14-23)

¹⁰ Héé Yesue áchēnléé ene ndun e mod bon álāngē bó aá, “Nyéwóglēn, nyésõntēn-ne me!

¹¹ Saké chõm éche ékag mod á nsal ébele bon mod eesáá’ á’sõ é’ Dyõb, bon chõm éche ébide mó á nsal chõó ébele’ bon eesáá.”

¹² Ade áhõbē nê, dóo ábē bembapεε bēpédé mó benben bon bésēdté mó bánken, “Ebíi nén wéé dyam áde móhõbē ábébté Befarisia nlém á abum-ε?”

¹³ Yesue ankwentén bó aá, “Bwēl téé ábe awēm Titée awē adé ámín éewénéé, béhüb bó ásē.”

* **15:6** *Sáá bó nyan*; donge á kálag dé e’só déewóó’é bó nyan.

14 Nyéchene bó. Bédii bad bé ndím ábe bélúmte bad bé ndím bémpēe nzii. Nzé mod awě akwedé ndím atómne mod a ndím ampée, búmō béhūn á echóg-te.

15 Petro anláá mó aá, “Tógnéd sé enén ngan.”

16 Hée Yesue álāngēé bó aá, “Kááj ne’ bōōb, ké nyémpē nyéesónténéé-yε?”

17 Nyéenyínéé nén bán, chōm ké ehéé éche mod ádyédé, ésóléé mó á nsal, étim á abum-tē, bonj ébídte mó á yāl-ε?

18 Bonj mam níme mod áhóbéé núbide mó se á nlém-tē. Mmén mam mó-’aá mébele mod bonj eesáá’ á’sō é’ Dyōb.

19 Ayāle á nlém-tē dōo mewēmtēn mé mbéb méhúé’é níme mékəə bonj ábélé mam mé mbéb nēngáne, ewúen, akáb dé mesón á ndáb e e’wóngé, echíb, abíd á mbónj é metóm, ne mehóben á mbíd.

20 Mmén mam móo mébele bonj mod eesáá’ á’sō Dyōb. Bonj saké adyé á ndyééd áde éewobpéé mekáá ngáne béhédéé, déběl bonj eesáá.”

Adúbe áde mmwaád a Kanahan (Mak 7.24-30)

21 Ambíd e pónde, Yesue anhidé áde abwóg á hōm átīm á pēd e mbwóg echē enchiitén myad mé Tirε ne Sidōn.

22 Hē dōo mmwaád a Kana nhóg awě adyéé’áá áde abwóg á hōm ápééné awé áwē bonj áhōbē nén aá “A-Sáj, Mwān a mbyaa níme Dabidε, sōn wóg me ngol! Awem mwān a mmwaád atage bwāmbwam, áyāle edāádəj é mbéb édé mó áte.”

23 Bonj Yesue ekēntimténné mó dyamdyam. Hē dōo ábē bembapεε bétánéé mó, bonj béchāā mó nén bán “Láá anén mmwaád wεé ákag áyāle ahídne syánē ntəgag ámbíd.”

24 Dōo Yesue ákwentanné bó aá, “Bad bé Israel ábe bédé néε rdyəj ní mbód níme mbóó bóo Dyōb álómé me awōngεn.”

25 Néε ane mmwaád áwógé nē, ankwě Yesue á mekuu, bonj áchāā mó aá, “A-Sáj, wóngén me.”

26 Dōo Yesue ákwentanné aá, “Eesáá bwām átéd ndyééd e bānbān bonj ebwémé mbwé.”

27 Dōo ane mmwaád átimtanné mó aá, “Nē dēn A-Sáj, bonj káájne mbwé édyág púuted é medyé éche ábab bésáá béhúnté.”

28 Hē dōo Yesue ákwentanné mó aá, “A-mwān-a-mmwaád, ewóó adúbe ámbáá. Ebenled ngáne éhédéé.” Melemlem mé pónde, ane mmwaád awe mwān-a-mmwaád andyéé bwām.

Yesue achōjté ndun e mod

29 Yesue anhidé áde abwóg á hōm, ápōj á nkəg mé edib-é-nzab é Galilia. Ankě adyéε ásē á ekone mīn.

30 Ndun e mod empě áwē. Bépééné’áá bad ábe bésyágté’áá, ábe bēnkwe ndím, ábe mekuu ménwēē, e’bóbé ne ekud é bad bé nkole bémpēe. Bébánné’áá ábē bad bésyāāl á’sō wée Yesue, áchōōd-te bó.

31 Menyáké ménkōb ene ndun e mod áde bényíné néε bad ábe béēhōbē’áá akan néε béhóbéé akan. Abe mekuu ménwēē bentyēēm bwām, ábe bésyágté’áá békag bwām. Abe bēnkwe ndím bényinne’. Békéné Dyōb á bad bé Israel.

Yesue adídté ndun e mod (Mak 8.1-10)

32 Yesue anchélé ábē bembapεε, álāngē bó nén aá, “Ndé enén ndun e mod ngol áyāle békébē ne me e’pun é’láán, béēwóo-’áa chōm éche bédyákē bōōb. Meéhādēē méé béhide hén ne nzaa, áyāle béhele se béhún ásē á nzii.”

³³ Dóo ábē bembapεε bē bésedteé mó nén bán, “Héé syánē dékudté ndyééd á ehyánge-tê hén echě ěkwōg enén ndun e mod?”

³⁴ Yesue ansedéd bó aáken, “E’wεle é’táj nyéwóó?” Bēnkwentén bán, “E’wεle saámbé ne nguse é súu ésad.”

³⁵ Dóo Yesue álánge ene ndun e mod aá bédyεε ásē á ndoob-tê.

³⁶ Héé átédé ábē e’wεle saámbé ne échē súu, ásāgnān Dyōb, ákabtáád bó áte, ábagé ábē bembapεε, bó-’ε békabpé ene ndun e mod.

³⁷ Bad bésyāāl béndyē ene ndyééd, békód-te, kááj élyāg-ke ásē. Echě enlyāg ásē enlón e’lón saámbé.

³⁸ Mesonjé mé bad míme méndyē ene ndyééd mébédé e’kálé é’niin. Mmē mesonjé mé bad mébédéε baachóm, bēnkētónjé bebaád ne bēndem.

³⁹ Héé Yesue álángeé ene ndun e mod aá bésūē’ áwab mendáb. Ade ámáá bó aláa nê, ansól á bōle-tê, áke á mbwóg e Magadan.

16

Béhédné Yesue e’chemléd é’ menyáké

(Mak 8.11-13; Luk 12.54-56)

¹ Ambíd e nê, Befarisia ne Besadusia bēnkě wéε Yesue ákag mó. Bēnlāā mó bán álúmed bó e’chemléd ábe é’huú ádyōb.

² Dóo Yesue álángeé bó aá, “Nzé ngukél epedé, nyéhóbe bán, ‘Abobe áyāge ámín, nê álúmte bán bñn béboj chán.’

³ Nzé bñn é’sánge-’ε, nyéhóbe bán, ‘Abobe áyāge ámín, bñn-ne é’wábpé, nê álúmte bán mbúú échā.’ Nyēbíε’ bñn alánj ámín, ngáne bēbēε, boj nyéēhēlēε mam míme mébenlad chii achem.*

⁴ Echén ebébtéd é nyonjεl, nyéēhēdēε Dyōb awógen, nyéhede-’ε e’chemléd bé menyáké! Boj nyéekudté nzése e’chemléd bé menyáké ábe nkal é’daádaj Jonaa bēnpεn.” Dóo átédte bó, boj ákag.

Esultεn éche Befarisia ne Besadusia

(Mak 8.14-21)

⁵ Yesue ne ábē bembapεε bēnchabé edib é nzab ámín, boj bembapεε bēnchatén e’wεle awáale áyāl.

⁶ Yesue anláá bó aá, “Nyétéd pónké ne esultεn éche Befarisia ne Besadusia.”

⁷ Héé ábē bembapεε bēn ne bēn bēbóótédé ahób bán, “Ahóbé nê áyāle syáá deewánléε e’wεle áyāl.”

⁸ Yesue ambíí chōm-εε békálé. Dóo ásedteé bó aáken, “Cheé nyé bēn ne bēn nyéhóbeε áyāle e’wεle ábe nyéēwōó’é? Chán adúbe ádíí nyé mwāmpín nén?”

⁹ Kááj ne’ bōob, nyéesónjénε-ε? Nyēmaá achatεn ngáne méndidēε e’kálé e’ bad é’táan ne e’wεle é’táan. Ambíd echě bémáá ene ndyééd adyé, e’lón é’táj echě enlyāg ásē énlōnnē?

¹⁰ Nyéchāténé kááj ne adide áde méndidēε e’kálé é’ bad é’niin ne e’wεle saámbé. Ambíd echě bómpē bémáá adyé, echě enlyāg ásē chó-’ε enlón e’lón é’táj?

¹¹ Ade rílánjé nyé méé nyétédεn esultεn pónké, saké ewεle chēn chóo ríhóbé’áá. Nyétéd pónké ne esultεn é Befarisia ne Besadusia.”

¹² Dóo bembapεε bétímé asónjεn bán saké esultεn éche bēbenléε ewεle chóo Yesue ahóbé’áá aá bétédεn pónké boj ayáged áde Befarisia ne Besadusia báyágté’áá dóo ákónjé’áá ahób.

* **16:3** Donje á kálag dééwóó’ε e’yale ábē Yesue ngáne é’ténlédé á nchoo 2 ne 3.

*Petro ad Yesue mó
adé Ane-awě-Béwógté*

(Mak 8.27-30; Luk 9.18-21)

¹³ Yesue ankě á mbwóg e Kaisaria Filipi. Ade ápedé áwed, dóo ásedtéé ábē bembapεε aáken, “Nzé-módé bad bó béhóbεé bán Mwän-a-Moonyon adé?”

¹⁴ Bēntimtén mó bán, “Donge á bad béhóbe bán edii Jonε Ndusenε, bémpēe bán Elaijaa, ábíní-’ε bán Jeremayaa ké’ε nkal é’dáodəŋ nhóg ampée.”

¹⁵ Héε Yesue ásedtéé bó aáken, “Bon nyébēn-nε, nzé-módé nyéhóbεé bán ndé?”

¹⁶ Simōn Petro ankwentén aá, “Wε-εé edé Ane-awě-Béwógté, Mwän a Dyōb áde adé á alongé.”

¹⁷ Yesue antimtén aá, “Nnam ndé ne wε, a-Simōn, mwän awě Jonaa. Saké moonyon álánge wε nê, bon echem Sán awě adé ámīn móo ahóbté wε.

¹⁸ Né-óó a-Petro nlánge wε,† wεé edé ndim-e-aláá. Amīn e ene ndim e aláá dóo mélonḡē nímēm mwembé. Ké ngine e kwééd éhēnlé nímē mwembé ahóbed ásē.

¹⁹ Awōŋ dóo mébéé mekii mé nkamlēn mí mín. Kéchéé éche ébéné á nkōŋsé, né ébennédé ámīn. Kéchéé-’ε éche ébágé kunze a nkōŋsé, né ébágnédé kunze ámīn.”

*Yesue ahóbé t̄ŋgene
nímē metake ne echě kwééd*

(Mak 8.31-9.1; Luk 9.22-27)

²⁰ Héε Yesue ásiméé ábē bembapεε etúu áte nén béēhōbē bán móo módē Ane-awě-Béwógté.

²¹ Bootya ene pón dé, Yesue ambootéd ábē bembapεε alúmed áte aá mó t̄ŋgēnē akε á Jerusalem. Awed-taá mókudté metake híin á mekáá mé bad bémbáá, beprisε bémbáá ne bemeléede bé mbéndé. Aá béwū mó, bon e’pun ábe é’lonténé é’láán móŋpuú.

²² Dóo Petro átímné Yesue á nkəg bon ákəgé átimed mó áte, áhōbē nén aá, “A-Sán, Dyōb déekwenténné mbéd aá nén ábenled ne wε.”

²³ Héε Yesue ákúnnédé bon áhōbē wéε Petro aá “Hidé me á’sō-te, a-Satan! Cheé ékáə’é me ábel mewēmtēn mé Dyōb? Ehóbe nê ne mewēmtēn mé moonyon saké mé Dyōb.”

²⁴ Dóo Yesue álángeé ábē bembapεε aá, “Kéznéé awě awémténé me ahíd, atánḡéné ásob yál mendíb, ápēm adē awog, bon áhíde me.

²⁵ Ayāle kéznéé awě ahεde adē alongé ason, ábōd dó. Kéznéé-’ε awě ábōd adē alongé ayāl echēm, ákud dó.

²⁶ Nsyāŋ nhéé mod ákudté nzé akudé nkōŋsé n̄syāal bon abóde adē alongé? Ké-’ε, cheé mod áhεεε ábe ákōde adē alongé?

²⁷ Nlánge nyé nímēn mekan ayāle Mwän-a-Moonyon āpě ne ehúmé éche eche Sán nchoo ne éche ángel. Ene pón dé dóo ákōgsēnnē ké’ε ánamédté kéznéé t̄ŋgene chōm éche ámbēnlé.

²⁸ Ne mbále nlánge nyé nén meé donge á bad átíntē echēn béenyínénné kwééd díđ ésebán bényíne néε Mwän-a-Moonyon ápééné nímē nkamlēn á nkōŋsé.”

17

*Yál ehōŋléné Yesue
(Mak 9.2-13; Luk 9.28-36)*

¹ Ambíd e epun ntóób Yesue ankeén Petro ne Jemε bó mwānyan Jonε á mbōod echě echabé ámīn. Bēnpen-εé bémbē áhed.

† **16:18 Petro:** á ehób é Grikia adii ndim e aláá.

² Dóo ábê bembapεε bénýíné née áhánléné, e'só é'pené mó á nló nêngáne enyεn. Mbóté chό-'ε épūbē mó féréd émwaá-'ε áte.

³ Abwōg-ábwōg, ábê bembapεε bénýīn née Mosεε ne Elaijaa bébídé táléd, bóóbe Yesuε békale'.

⁴ Dóo Petro álāngεé Yesuε aá, "A-Sán, ébóó ngáne syáá dédíí hén. Nzé edáá, mēlōn e'bem é'láán, échōn, éche Mosεε ne éche Elaijaa."

⁵ Éepedεé ké amad á nsəl bon mbag echē ekine áte ékūtān bó. Héε béwógεé ehób ébide á mbag-tē nén, "Awem Mwān a nlém nén, awógte me menyīnge. Nyéwógne mó."

⁶ Ade ábē bembapεε béwógé échē ehób, bēmbwōg mebóbōn, bésōn-'ε e'só ásē ne mbwóg ní ngíne.

⁷ Dóo Yesuε ápédé wée bēmbēε bon ábānē bó ekáá á yāl, áhōbē aá, "Nyéhíde ásē, nyéebáá'."

⁸ Ade bénýéné nló ámīn, bénýīn Yesuε mwēnpεn.

⁹ Ade bóbbō bésudεé á mbōod mín nē, dóo Yesuε ásíméé bó etúu áte áhóbe' aá, "Nyéelāngé modmod dyamdyam áde nyényíné káān ne á pón dé echē Dyōb dépuúdté Mwān-a-Moonyon á kwééd."

¹⁰ Héε ábē bembapεε bésedteé mó bánken, "Cheé ekáá bon bemeléede bé mbéndé béhóbé nén bán Elaijaa atāngéné asébe dé ape bon Ane-awē-Béwógte āpě?"

¹¹ Yesuε antimtén bó aá, "Ne mbále, Elaijaa atāngéné asébe dé ape, atí-'ε mam mésyāāl.

¹² Bon nlānge nyé nén méε Elaijaa ammād ape, bon bad bēnkēnchemmé mó, bēmbēl-le mó ngáne bēndāngé. Melemlem né-'aá Mwān-a-Moonyon átagké áwab mekáá."

¹³ Enén pón dé dóo ábē bembapεε bésōntēnnē nén bán Jōne, Ndusεne móo áhóbeé.

*Yesuε achōnté mwān a mwēnchóm
awē edáádān é mbéb émbēε áte
(Mak 9.14-29; Luk 9.37-43a)*

¹⁴ Ade Yesuε ne ábē bembapεε bétímé ámbíd ámpē bon bétān ndun e mod, mod nhóg ampě áwē, akóg mebóbōn, bon áhōbē nén aá,

¹⁵ "A-Sán sōn, wóg awem mwān ngól. Awem mwān a mwēnchóm akonle nkole mé ekikíd, atage bwāmbwam. Ayōgké ahún káān ne á muú-te ne á mendīb-te.

¹⁶ Mēmpεén mó wée ábōn bembapεε, bon béehεléé mó ahood."

¹⁷ Dóo Yesuε átímtanné aá, "Wáā! Nyé bad bé' chii, mbéltéd mīmēn méētyéeméé, nyéewóo-'áa adúbe. Chán mépεé nyé adyεn hén-ēē? Chán mépεé nyé awεεn-ē? Hyεnáád me mwān awed hén."

¹⁸ Dóo Yesuε ákamlanné edáádān é mbéb éche étágté'áá ane mwān aá ébíd, bon ébíd-te. Abwōg-ábwōg ane mwān áchōn-'ε.

¹⁹ Ámbíd e pón dé bembapεε ábe Yesuε bēntān mó, bon bésedteé mó á kun-tē nén bánken, "Cheé énkān bon sēnkēnhēl échē edáádān é mbéb abided?"

²⁰ Dóo Yesuε átímtanné bó aá, "Ayāle adúbe áde nyé mwāmpīn. Ne mbále nlānge nyé nén méé, nzé nyéwóo adúbe áde áde mwāmpīn nēngáne mbál-e-bū, né nyéékamlén échén ekone bán éhíde hén, étim híníí, étim-me nē dēn. Dyam ké ahóg déetómmé nyé áte.

²¹ Nyéhéle-se nyébidéd enén ndín e edáádān é mbéb nzé nyékāne, nyédidé-'ε yāl nzaa á mekáne-tē."*

* 17:21 Donje á kálag dé e'só déewóo'ε nímén nchoo.

*Yesue ahóbé ámpē
ngáne bad béwūū'é mó*

(Mak 9.30-32; Luk 9.43b-45)

²² Yesue ne ábē bembapεε bénladén áte hōm ahóg á mbwóg e Galilia. Héε álángeé bó aá, “Bébéé Mwǎn-a-Moonyon á mekáá mé baányon. Bó-'aá béwūū mó.

²³ Bon Dyōb dépuúd mó ámbīd e e'pun é'láán.” Ade bembapεε béwógé nê, bénwōg ndutul bwâmbwam.

Yesue asǎngé tááε e Ndáb-e-Dyōb

²⁴ Yesue ne ábē bembapεε bēmpě á dyad á Kapenahum. Ahed dōo bad ábe básǎnté'áá tááε e Ndáb-e-Dyōb bétáné Petro bon básēdté mó bánken, “Kíné awen meléede eésǎngéé tááε e Ndáb-e-Dyōb-e?”

²⁵ Petro antimtén bó aá, “Asange'.” Ade Petro ásólé á ndáb sólén, eépedéé dyam ahób bon Yesue ásēdté mó aá, “A-Simōn, chán ényíné ádén akan? Benzébadé kǎn é nkōhsé éǎntéé e'sǎngé ké'ε tááε? Bán bé alon-ε, ngé beken?”†

²⁶ Petro ákwentén aá, “Beken.” Yesue aá, “Nê álúmte nén bán, bán bé alon béetǎngεεé asaa.

²⁷ Bon ké nê, ábel nén deéliné ábē bad ábe básǎnté tááε, ké ébwēm e'chōb á edib-é-nzab-tê. Súu eche wésēbēē akób, éne de chó nsal áte, wētān mōné míme mékwog sóo tááε asǎned áwēd-te. Téd mó, éǎned sóo.”

18

*Nzéé atómténé mod ambáá
abé á'sō é' Dyōb?*

(Mak 9.33-37; Luk 9.46-48)

¹ Eebeméé áte ámbīd e nê, bembapεε ábe Yesue bēmpě áwē, básēdēd mó bánken, “Nzé-módé-'ε atómténé mod ambáá abé á nkamlen mí mín?”

² Hê dōo Yesue áchénlé mwēndem nhóg, áttīdē mó áwab tínté,

³ bon áhōb aá, “Ne mbále nlǎnge nyé nén mēé ésebán mod ahǎnléné ádē aloné bon abé nēngáne anén mwǎn, eéhēlēē-se asól á nkamlen mí mín.

⁴ Né-ōó, kénzéé awě asūdté yǎl nēngáne anén mwǎn né móo atómténé mod ambáá abé áttínté e bad ábe bédé ásē e nkamlen mí mín.

⁵ Kénzéé awě akobé enén ndín e mwǎn á dín ádēm, né akobé mε.

⁶ Bon kénzéé awě abělté enén ndín e mwēndem awě adúbpé mε mbéb, émbē mbon né bēntǎó ene ndín e mod sǎnkala a aláá á nkǎn, bon béhúnéd-te mó wéε edib é nkwe étómténé achab ásē.

⁷ E'beb é' yǎl áte ne nkōhsé áyāle mekǎgsen míme mébelte bad mbéb. Mekǎgsen métǎngéné aε, bon e'beb é' yǎl áte ne mod awě abělté mod ampée mbéb.

⁸ Nzé échon ekáá ké'ε ekuu ébelte wε mbéb, esél chó, épim. Edé mbon wε ákud aloné ne eped é yǎl tómaa wε áwón mekáá mébe ké'ε mekuu mébe bon bébwém wε á muú míme méēdīm'.

⁹ Melemlem nzé ádon dīd ábelte wε mbéb, ehúd dó, épim. Edé mbon wε ákud aloné ne dīd ahóg tómaa wε áwón mīd mébe bon bébwém wε á dù-á-muú.

*Ngan e rídyon ní mbód míme mémbōo
(Luk 15.3-7)*

† 17:25 Ene pónde beken bōo básǎngé'áá tááε é kǎn.

10 “Nyényin nén bán nyéetédéé nímén mpín mí bán ké nhóg nkòntéd, bán méesaá etógnén. Nlânge nyé nén meé ángel éche éne’ bó ébâg á’sô ábe echem Sâj awě adé ámín áhóbe bó.*

12 Chán nyényiné ádén dya? Nzé mod awóó mbwókél é rídyɔj ní mbód, boj nhóg mbóó, ngómē átédé nímíní móom mé rídyɔj ní mbód abog ne abog wée bédyákē medyé á ekone mín áke dé ahed nímé nhóg níme mbóó?

13 Ne mbále nlânge nyé nén meé, nzé adĩbté-’é mó abelé awógén mó menyinje tómaa nímíní móom abog ne abog níme ménkēmbóó.

14 Melemlem nê dóo echén† Sâj awě adé ámín éehédéé aá ké mpín mí mwéndem née nímén mbóó.

Mwǎnyon awě aběnlé wε awusé

15 “Nzé mwǎnyon aběnlé wε awusé, tán mó wée nyúmō bad bébe bēnpen nyédíí, échu mó dó aláa. Nzé achemé adē awusé, né nyé mwǎnyon nyétimé ásē.‡

16 Boj nzé eékwentene aá mópǎnné wε, etéd mod ampée nhóg ké’ε bébe ékēēn áwē, ábel nén, ‘Mbéb ké nhéé níme éhóbé wée abelé wε mbyēn ne mbój ébe ké’ε éláán.’§

17 Nzé eékobe káájne chōm-ée échē mboj éhóbé, épēēn mó á mwembé. Nzé eékwentene ké bó awóglēn, etéd mó née mod awě eedúbpe áyāl e níme nsòjten káa nēngáne nsaad-a-tááε.*

Yesuε aá bembapεε béwóó ngine ákâj ne ábe dya kunze

18 “Ne mbále, nlânge nyé nén meé, kéchéé éche nyébéné á nkòjsé ébennédé ámín. Kéchéé-’ε éche nyébágé kunze á nkòjsé, ébágnédé kunze ámín.

19 Nlânge nyé ámpē nén meé, nzé nyé bad bébe nyéchēmténé áyāle kéchéé boj nyéhédé chó á mekáne-tē, echem Sâj awě adé ámín ábě nyé chó.

20 Áyāle wée bad bébe ké’ε béláán beláádné áwēm dīn, mémpē ndé áwab tíntē.”

Ngan e mod-a-nsón a kâj awě enkēnlagsén waáb

21 Hē dóo Petro ápédé wée Yesuε, boj ásedtē mó aá “A-Sâj, nzé mwǎnned abenle me awusé pón dé téé, ngen étáj rítájgné mó alagsen? Káájse ngen saámbé-ye?”

22 Dóo Yesuε átímtanné mó aá, “Nlânge nyé nén meé, saké ngen saámbé, boj móom mé ngen saámbé ne saámbé.†

23 Nê dóo édíí á nkamlēn mí mín. Dyōb ákamlanné nēngáne kâj póg echē echénlé bad ábe bébele nsón ásē echē, ânōn mōné níme bó ké ahéé bēwánlé mō.

24 Abooted áde ábóótédé ânōn mōné níme ábē bad bēwánlé mó, dóo bad bépéénédé mó mod nhóg awě anwálé mó nkúú mí mōné.

25 Ane mod enkēnhēnlé adē alúm atwε, né-óó kâj enhób aá bésóm mó nchoo ne mwaád ne bán nēngáne betâj, bésóm-me bwēm é’syāāl ábe áwóó. Mmē mōné mébē ásábe áde alúm.

26 Ane mod ankwě kâj á mekuu, áchāā mó aá, ‘Béé me pón dé, mětwwě ádon alúm ásyāāl.’

* **18:10** Donje á kálag dé’sô ábáde nchoo 11: *Nyēbii nén bán Mwǎn-a-Moonyon apédé áson bad ábe bēbóó.* † **18:14** *Echén:* donje á kálag dé’sô áwóó echem. ‡ **18:15** *Aběnlé we awusé:* donje á kálag dé e’sô áwóó abelé awusé. § **18:16** Nén áténlédé á kálag e Dyōb, Diateronomi: 19.15. * **18:17** Bad bé Israel bēndūbē nén bán besaad bé tááε bóó bétómténé bad bé mbéb abé, bán béesól-laá á nkamlēn mí mín. † **18:22** *Móom mé ngen saámbé ne saámbé:* donje á kálag dé e’sô áwóó móom mé ngen saámbé ngen saámbé.

²⁷ Kêh enwóg móg ngol, anchené móg aá ákag, álagsén-ne ádé alúm.

²⁸ Néé ane mod áhídté hê, ambomén waáb awě mómpe abel'éáá nsón ásē e kên. Waáb ne anwálé móg mwă mənē awě énkēmbuú áte. Dóo átólé waáb á mengogíd, aá ásábe móg nímē mənē.

²⁹ Waáb ankwē móg á mekuu, áchāā móg aá, ábe móg pónde aá, móssābē móg ádé alúm.

³⁰ Ane mod enkēnlagšenné waáb, anhé móg á mbwog aá káoh né asábpé áde alúm boŋ bēbídēd móg.

³¹ Ade bad ábe bēbédé áhed ábe bómpe bēbél'éáá nsón ásē e kên bényíné dyam áde ábēnlédé, bēnlīŋ bwāmbwam. Bēnkě kên dyam ásyāal áde ábēnlédé aláa.

³² Né-óó, kên enchélé ane mod, álāngē móg aá, 'Ekúkú é læ nēn! Menlagšēn wē alúm áde wēnwālēē mē áyāle wēnchāŋ mē.

³³ Cheé ékáo boŋ weewóge wēn ngol melemlem nēngāne mē-ε ménwōgkē wē ngol?"

³⁴ Kên ênlīŋ bwāmbwam, né-óó anlóm ane mod á mbwog aá bēwóged móg ndutul. Aá ábé-ε á mbwog káoh né asábpé áde alúm ásyāal."

³⁵ Né-óó, Yesue ansógtēn nēn aá, "Nê dóo Titēe Dyōbe awě adé ámīn ábēnlé. Nzé weélagšēne mwānyoŋ ne nímōŋ nlém rīsyāal, né Dyōb dékōgšēn wē ngāne ene kên énkōgšēnnē ane mod."

19

Ayáged tâŋgene anan de mmwaád á e'wōŋgé (Mak 10.1-12)

¹ Ade Yesue áamáá nímén mekan ahób, anhidé á Galilia áke á mbwóg e Judeya, áchābē á pēd e edīb é Jodan eníní.

² Ndun e mod enhíd móg áwed, áchōōd-te bad bé nkole.

³ Doŋge á Befarisia bēmpě awē ákag móg. Bēnsēdéd móg bánken, "Mbéndé echēd ebagé kunze nēn bán, mod ánan awě mwaád áyāle nyaa e nzom ké ehéé-ye?"

⁴ Yesue ankwentén bó aáken, "Nyéeláá'é á kálag e Dyōb nēn bán á mbooted, Dyōb dēnhag bó mmwaád ne mwēnchóm-ε?"

⁵ Dyōb á hóbpe aá, "Ayāle né-óó, mwēnchóm átedé sáá ne nyan abé ne mwaád, boŋ búmō bad bēbe bētīm mod nhóg.

⁶ Né-óó, búmō béesaá ámpē bad bēbe, boŋ bédii mod nhóg. Né-óó, échě Dyōb aládé, modmod eepáá'."

⁷ Hê dóo ábē Befarisia bēsedtéé móg bánken, "Nzé édé nê, cheé-ō ênkāŋ boŋ Mosēe ábagé bad kunze aá, mod ábe mwaád kálag échě elūmte nēn bán, e'wōŋgé é'máá boŋ ánan móg."

⁸ Dóo Yesue álāngēé bó aá, "Mosēe ambāg nyé enén kunze áyāle nyélelé nlém á abum. Enkēmbáá nê á mbooted mé nkōšé.

⁹ Né-óó, nlānge nyé nēn mēé, mod ké ahéé awě anané mwaád ésebán ane mmwaád akábé asón, nzé ene ndín e mod awóó mmwaád ampée, né akábé asón."

¹⁰ Hê dóo ábē bembapēe bēlāngēé móg bán, "Nzé nēn dóo mekan mé mmwaád ne nchóm médíí, né éesaá nsyōŋ áwōŋ mmwaád."

¹¹ Yesue antimtén bó aá, "Saké mod asyāal ahele ákob ádén ayáged. Boŋ dékobnéd ne bad ábe Dyōb ábágé dó.

¹² Nyébíí nēn bán, nzom édé híin échě ékáo boŋ bad bēwōō bebaád. Behóg bédé ábe béchyááténé nê. Bēmpēe-ε bédé nê áyāle bad bēbélé bó nê. Abíníí-ε,

bébéle yǎl nê ábel boŋ bébel nsón mé nkamlɛn ní Dyöb. Kénzée awě ahelé áden ayáge akob, ákob dó.”

*Yesue anámté bëndem
(Mak 10.13-16; Luk 18.15-17)*

¹³ Bad bẽmpɛɛn bẽndem wê Yesue nén bán ábán bó ekáá á nló, ákânned-te bó. Abẽ bembapɛɛ bénkânẽ ábe bad áte.

¹⁴ Boŋ Yesue anláá bó aá, “Nyéte bẽndem béhyag áwẽm, nyéekáá bó, áyãle nén, nyaa é bad nẽe bó chõó éwóó nkamlɛn ní mín.”

¹⁵ Né-õó, Yesue ambán ábẽ bán ekáá á nló. Ambíd e nê, anhidé áhed.

*Nhõn mí bad
ne nkamlɛn ní Dyöb
(Mak 10.17-31; Luk 18.18-30)*

¹⁶ Póndé póg mod nhóg ampě wéé Yesue, ásedté mó aáken, “A-meléed, dyam á bwâm áhéé nítãngéné abel, ábel nén níkud alongé áde déemaá?”

¹⁷ Héé Yesue ákwɛntanné mó aá, “Chán éhééé ésedté me dyam áde áde dyam á bwâm? Mod nhóg mwẽnpɛn mó adé awě adé mod a bwâm. Kõngé’ mbéndé é Dyöb nzé ehede we mókud alongé áde déemaá’.”

¹⁸ Dõó ane mod ásedtéé mó aáken, “Mbéndé éhéé?” Yesue ankwentén mó aá, “Weewúé’ mod, weekábé asón á ndáb e’wõngé, weechíbé’, weebídé mbõŋ e metóm,

¹⁹ bẽé sóó ne nyõŋ edúbé, édãŋ-’ɛ mwãnyõŋ nẽngáne echõŋ yǎl.”

²⁰ Héé ene kódemod élanngéé Yesue aá, “Nhídé échén mbéndé ésyããl; cheé émpẽe éhedne me abel.”

²¹ Yesue antimtéén mó aá, “Nzé ehede wéé móõwóó awusé á yǎl ké ahóg, kãg ésóm bwẽm é’syããl ábe éwóó, étêd mímê mõné ébe betóótõkẽ bé bad. Nzé ebelé nê, wẽkũd nhõn ádyõb. Ene póndé éhye éhíde me.

²² Ade ene kódemod áwógé nê, anwóg mbéb áte bwãmbwam áhídẽ-’ɛ áyãle ambé nhõn bwãmbwam.”

²³ Héé Yesue álanngéé ábẽ bembapɛɛ aá, “Ne mbále nlãnge nyé nén meé élẽl áte nhõn mí mod ásól á nkamlɛn ní Dyöb.

²⁴ Nlãa nyé ampẽ nén meé édé mwãn a akan sãŋkalaa a nyam nẽe Kamêl ápon á epõn é ndõnde tómaa nhõn mí mod ásól á nkamlɛn ní Dyöb.”

²⁵ Ade bembapɛɛ béwógé nén, yǎl enkóm bó áte bwãmbwam. Bẽnsedéd bánken, “Nzée-’õ ahẽle ákud e’soóõŋ?”

²⁶ Héé Yesue ánóné bó chõõŋ boŋ áhõbẽ aá, “Ne baányõŋ nén déehééé se ábenléd boŋ ne Dyöb dyamdyam déeleléé áte.”

²⁷ Héé Petro áhõbẽé aá, “Nõné’, sêtdé chõm ésyããl áhíd we, cheé-õ ébẽ nímed nsyãŋ.”

²⁸ Héé Yesue álanngéé bó aá, “Ne mbále, nlãnge nyé nén meé, póndé echẽ Mwãn-a-Moonyõŋ ádyéé’é á atii dé nkamlɛn ne éche ehúmé ésyããl á nkõŋsé níme níhúé’, nyé bad dyõm ne bébe ábe behíde me nyémpẽ nyéedyéé á metii mé nkamlɛn, nyékããdtẽ metúmbé mé Israel dyõm ne mébe.

²⁹ Kénzée-’ɛ awě atẽdté éche ndáb, baányãŋ, sáá, nyaá, bán, ne eche mbwóg áyãl echẽm, ákud chõ mbwókel e ngen, ákũd-te alongé áde déemaá’.

³⁰ Boŋ bad híin ábe bédé á’sõ bõõb belyãg mbíd, híin-ne ábe bẽnyãg mbíd bẽbẽ á’sõ.”

20

Ngan e bad bé nsón

¹ Hê dǎo Yesue ákaléé ngan aá, “Nhóbe nê áyāle nkamlen mí mín rídé nhəgtén nêngáne nwóó-nzag nhóg awě ambíd á ndáb epəg é mbwembwε áke dé ahed bad ábe ásābēē, ábel nsón áwē nzag-tê.

² Bóǎbǎo bēmpě á nchemten áyāle nsábe mé epun é bīn bonj álómé bó áwē nzag-tê.

³ Ane nwóó-nzag antīm ámbíd ámpē á dyad-tê á ngəj abog. Antán bad bé nsón bēmpēe áhed. Bentyēem ngēn, bébele’áá chǒmchǒm.

⁴ Hēe álāngéé bó aá, ‘Nyémpē nyéke nyébel nsón áwēm nzag-tê, mēsābē nyé nsábe míme níkwógnédé.’

⁵ Né-ǎǎ, bēnkě. Amběl melelem mé dyam á kəd, ne á ngəj éláán.

⁶ Dyam ngəj étáan née ane mod átímé á dyad-tê ámpē, antán bad bé nsón ábe bómpē bentyēem, bébele’áá dyamdyam. Hēe ásedtēé bó aá, ‘Chee nyébébtēé epun é bīn ésyāāl hén ngēn áde nyébeléé dyamdyam.’

⁷ Bēnkwentén mó nén bán, ‘Modmod eetédéé sé á nsón.’ Hēe ane mod álāngéé bó aá, ‘Nyémpē nyékag-kǎǎ nyébel nsón áwēm nzag-tê.’

⁸ “Ade ngukél épédé, ane nwóó-nzag anláá awě mod awě anəne ábē bad bé nsón aá, álad bad bé nsón áte, ásábe bó. Aá, ábooted ne bad ábe bédímténé apε, ásǒg-kε ne ábe bésébpé apε.

⁹ Ambéé bad ábe bēmbootéd nsón á ngəj étáan nsábe mé epun é bīn

¹⁰ Ade bad ábe bēnsēbē nsón ábooted bépédé ákob nsábe, bēnwēmtēn bán, békud nsábe míme rítómé mí bad ábe bēmbootéd nsón á ngəj étáan. Bonj bómpē bēnkūd melelem mé nsábe.

¹¹ Ade békóbé mǎné míme bēmbéé bó, bēmbootéd anyoo áte.

¹² Béhǎbē bán, ‘Ábén bad bēbélé nsón háwa póg chěmpen, ké nê, esábpé bó melelem née sé ábe sēbelé nsón epun é bīn ésyāāl ne enyen é ngíne.’

¹³ Nwóó-nzag antímtén ábē bad nhóg aá, ‘Amúē, meédogéé nyé. Eesaá mbále bán dentíi bán mēbe nyé nsábe mé nsón mé epun é bīn-ε?

¹⁴ Nyékob-pǎǎ mímēn mǎné, nyékag. Mmēn-εé ntíídé méé mēsābē anén mod awě adímténé apε melelem ngáne rísábpé’áá wémpē.

¹⁵ Meewóó’é kunze ábenled mímēm mǎné ngáne rídáá-yε? Chee ékáá bonj nyébébtē nlém á abum áyāle ábēm e’bonj bé nlém?”

¹⁶ Yesue ansógtén ene ngan aá, “Né-ǎǎ, bé’sǎ bétīm bé mbíd, bé mbíd-tε bétīm bé e’sǎ.”

*Yesue ahóbé ngen echě elónténé
éláán ngáne bēwūū’é mó*

(Mak 10.32-34; Luk 18.31-34)

¹⁷ Yesue ne ábē bembapεε békágé’áá á akuu á Jerusalem. Ade békagké nê dǎo áchágé bó á nkəg, bonj álāngē bó á kun-tê aá,

¹⁸ “Pón nyébii bán dekag á Jerusalem, áwed-taá bēbéé Mwǎn-a-Moonyonj á mekáá mé beprise bēmbáá ne bemeléede bé mbéndé. Bó-ε bēbéé mbakú bán atəngéné awé.

¹⁹ Bébe mó á mekáá mé bad ábe béesě bad bé Israel. Bó-ε bēwǎǎdé mó, béswǎdtǎād mó e’tanjú, bēbōmē-ε mó á awəg. Bonj ámbíd e epun é’láán Dyǒb dépuúd mó.”

Nyě-mwǎn ahedte bán metii

(Mak 10.35-45)

²⁰ Ámbíd e pǎndé dǎo Zεbedie mwaád ápédé wéε Yesue ne ábē bán bé baachóm bébe, abwóg mebóbónj, áchāā-ε Yesue aá ábele mó dyam.

²¹ Yesue ansédéd mó aáken, “Chee éhédeé?” Dǎo ákwentanné mó aá, “Bǎg me akag nén wéé, pǎndé eche wébēē á nkamlen, ábēm bán bēn bébe bédyεé wε á nkəg, nhóg ekáá émbáá, aníní-ε á ekáá é emwεd.”

²² Hée Yesue ákwentanné bó aá, “Nyéebii’ é chöm éche nyésedté. Nyéēhēl metuné míme mépēm̄mē apém-ε?” Bēnkwentén bán béhēl.

²³ Dóo Yesue álāngéé bó aá, “Ne mbáale, nyéēpēm bon meewóo’ é kunze ápwed mod awě ádyéé me á ekáá é mbáá ké’ é á ekáá é emwed. Abē e’tál é’dii e’tál ábe é’bágnédé ne bad ábe echem Sáj ánábnédé bó.”

²⁴ Ade ábíníí bembapεε dyóm béwógé nê, bēnliín ábē baányan bébe.

²⁵ Né-óó Yesue anlad bó áte, bon álāngē bó aá, “Nyébíí nén bán, benkamlεε ne bad bémháá bé nkōnsé bébenlad ngine ákamlεε bad ábe bédé ásē echáb.

²⁶ Bon éetāngεε abé nê átínté echēn. Kénzée awě ahede aá móbē mod ambáá átínté echēn, atāngéne abé mbaledε awēn.

²⁷ Kénzée-’ε awě ábē mod a’só átínté echēn, atāngéne abé awεn ntān.

²⁸ Melemlem née Mwān-a-Moonyon eépedéé aá bad bébenle mó, bon apedé ábele bad, ábe-’ε áde alongé ákade bad híin.”

*Yesue achōjté bad bébe
ábe bēnkwe ndim*

(Mak 10.46-52; Luk 18.35-43)

²⁹ Ade Yesue ne ábē bembapεε béhidtéé á Dyad á Jeriko, ndun e mod ehidé’áá mó.

³⁰ Ene pónde-’óó bad bébe ábe bēnkwe ndim bēndyéé á nkæg rí nzii. Ade béwógé bán, Yesue atóme’, bēmbootéd abón bán, “A-Mwān a mbyaa míme Dabide, wóg sé ngol!”

³¹ Ndun e mod echē embé áhed enkáné bó áte bán bédib nsal. Bon bó-’ε bémādñen abón ne ngine bán, “A-Mwān a mbyaa míme Dabide, a-Sáj, wóg sé ngol!”

³² Yesue antyéem, achélé bó bon ásedté bó aáken, “Cheé nyéhedeé bán, míbele nyé?”

³³ Bēnkwentén bán, “A-Sáj, sēhede bán, ébel sényínen.”

³⁴ Yesue anwóg bó ngol, né-óó ambán bó mekáá á mīd. Abwōg-ábwōg bēmbootéd anyínen, béhíde-’ε mó.

21

Yesue asólé á Jerusalem née kân

(Mak 11.1-11; Luk 19.28-40; Jōn 12.12-19)

¹ Ade Yesue ne ábē bembapεε békwógé ape á Jerusalem, née bépédé á dyad á Betpeg á ekone é menzab Yesue anlóm bembapεε bébe á’sō.

² Anláá bó nén aá, “Nyékag á dyad áde áde nyé á’sō nê. Nzé nyésólé sólén, nyéētán née bétāngé ésel ne mwān ánkæg. Nyéhune bó nyéhyiinad me.

³ Nzé mod asēdté nyé aáken, cheé ékáá bon nyéhunne’, nyéláá mó bán Sāngwée* atógnéne bó. Nzé nyéhóbé nê, ábwōg-ábwōg ane mod áchennéd nyé.”

⁴ Nén dēmbenléd álóned e’yale ábe Dyōb dénlōmēnnē nkal é’daádaj aá,

⁵ “Aláa dyad á Zayon aá, Nyénōne’, echen kân ehyag awēn, asūdté yāl, adiidé ésel, etum é nchóm a ésel.”

⁶ Né-óó ábē bembapεε bēnkē bébēl-le ngáne Yesue ánlyāgtēnnē bó.

⁷ Bēmpεén échē ésel ne mwān, bétéd échab mbóté, bétal chó ámín, bon Yesue ádiide’.

⁸ Ekud é bad bēntál échab mbóté á nzii-tē, ábíníí-’ε bésēlē’ e’kikag é’ mīí, bétalé’ á nzii-tē.

* **21:3** Sāngwée: káa nwóh.

⁹ Ndun e mod echě ekágé'áá mó á'sō ne echě ehídé'áá mó ámbid bêmbootéd abón bán,

“Hosána, mekenag mébê ne mwän a mbya míme Dabide.

Nnam míbê ne ane awě apedé á dñn áde Sángrwéé.

Hosána, mekenag ne Dyöb áde ádé se ámín!”

¹⁰ Néé Yesue ásólé á Jerusalem nén sólén, bad bésyāāl bépuutéđ, bésēdté-’ε bánken, “Nzée ne?”

¹¹ Dóó ene ndun e mod ékwentanné bán, “Yesue mó adé, nkal é'dáédəŋ a dyad á Nazaret á mbwōg e Galilia.”

*Yesue anané bekáb bé nyongé
á Ndáb-e-Dyöb*

(Mak 11.15-19; Luk 19.45-48; Jøn 2.13-22)

¹² Ambid e nê, Yesue anke asól á Ndáb-e-Dyöb. Annän bad bésyāāl ábe békábé'áá dyon áwēd-te. Ankuné betébelε ábe bad bépénlé'áá mōné ámín mekuu ámín, ákūnē-’ε metii mímé bad ábe bésómmé'áá mbəŋgé mekuu ámín.

¹³ Anláá-’ε bó aá, “Eténlédé nén bán, Dyöb áhóbé aá, ‘Echem ndáb etəŋgéné achəgned bán ndáb e mekáne.’ Boŋ nyétimté chó, ‘mbwōg mé bechíb!’ ”

¹⁴ Bad ábe bēnkwx̄ ndím ne bad ábe mekuu ménwēē ábe bēmbē áhed bēmpé áwē, ádíđ-te bó bwám.

¹⁵ Boŋ áde beprise bēmbáá ne bemeléede bé mbéndé bényíné menyáké míme Yesue ábélé, boŋ bēwōg-ke e’saad ábe bēndem bēbónéé á Ndáb-e-Dyöb bán, “Mekenag mébê ne mwän a mbyaa míme Dabide,” bēnliŋ bwámbwam.

¹⁶ Bēnsēdéd Yesue bánken, “Ewóge chōm-εε ábē bán bēhóbéé-yε?” Yesue ankwentén bó aá, “Eε, nwóge’. Nyéelāā’ε mbéd á kálag e Dyöb nén bán, Dyöb ábónséné e’ched é’ bēndem ne é’ bán bé nkáál ábe mó mekenag mé bwám-ε?”

¹⁷ Ambid e nê Yesue antedé bó á Jerusalem áke ánāá á dyad á Betani.

Yesue ne alín á ngəl
(Mak 11.12-14, 20-24)

¹⁸ Epōg é mbwēmbwε áde átimeéé ámbid á Jerusalem nzaa enkób mó.

¹⁹ Ade ákagké nê annyín alín á ngəl. Anké áhed, boŋ enkényínné epum ké ehóg áwedé-mín étóméé byaá. Héé Yesue áləŋgeé ábē bwel aá, “Wéechyáá’é epum ámpē mbéd.” Abwōg-ábwōg bwel bēnhyéle.

²⁰ Ade ábē bembapεε bényíné nê, yāl enkóm bó áte bwámbwam. Héé bésēdtéé bánken, “Chán áđēn alín á ngəl ámwédé ayéle á mehélé-te nēn-ē?”

²¹ Yesue ankwentén aá, “Ne mbále nləŋge nyé nén meé, nzé nyédúbpé ne nlém nsyāāl, né saké dyam áde míbélé ábēn bwel áyāl dėmpen nyébenlé. Boŋ né nyéhele-se nyélláá káəŋne enén mbōod nén bán, ‘Hidé hén, éke ébwēm yāl á edíb é nkwx̄-te,’ ébenléd-te nē dēn.

²² Nzé nyēwóó adúbe bán, kéchéé éche nyéhédné Dyöb á mekáne-té nyéékūd, né nzé nyéhedé nyéékūd.”

Nsēdtéd təŋgene kunze eche Yesue
(Mak 11.27-33; Luk 20.1-8)

²³ Yesue ansól á Ndáb-e-Dyöb, áyāgtē bad. Ade áyāgtéé nê, dóó beprise bēmbáá ne bad bēmbáá bé Israel bépédé áwē, bésēdté mó bánken, “Kunze ehéé éwóó ábel nímén mekan? Nzé-módé abagé-’ε wε ene kunze?”

²⁴ Yesue antimtén bó aá, “Me ámpē mēsēdéd nyé dyam ahóg. Nzé nyékwěnténé dó né me-’ε mēllāā nyé kunze echě níwóó ábel nímén mekan.

²⁵ Edusen éche Jōne adúsánnáá bad héé émbídtē? Embid ne Dyöb-ε ngé ne baányon?” Bēn ne bēn bēmbbootéd apentēn bán, “Nzé dehóbé nén bán,

‘Jɔŋe echě kunze enhúú ne Dyöb,’ né äsedéd syánē aáken, ‘Cheé-ō enkǎŋ boŋ nyénkëndúbé mós?’

²⁶Boŋ nzé dehóbé bán, ‘Echě kunze ehúú ne baányoŋ,’ né échén ekud é mod ébel syánē mbéb áyāle bad bésyāāl béndübē bán Jɔŋe abédéε nkal é’daádəŋ.”

²⁷Né-ōó bēnkweŋtén Yesue bán, “Séebii’é.” Mós-ε antimtén bó aá, “Né ké me-’ε ámpē méeláá’é nyé kunze echě nŵóó ábel nímén mekan.”

Ngan e bán bé baachóm bébe

²⁸Yesue ambé äsēdēd beprise bémbáá ne bad bémbáá bé dyad aáken, “Chán nyényíné ádén akan tǎŋgene enén ngan? Mod nhóg abédé awě anchyáá bán bé baachóm bébe. Héε ákíí mwǎn ambáá aláa aá, ‘A-mwǎn, kě ébel nsón á nzag-té chii.’

²⁹Mwǎn antimtén mós aá móókaá. Boŋ ámbíd e pónDé anhəŋlén mewēmtɛn, áke.

³⁰Dóó ane mod ákíí wéε mwǎn asad, aláa-’ε mómpē melemlem mé dyam. Anén mwǎn antimtén sáá aá, ‘A-Sǎŋ, mǎkǎ’ boŋ eékii.”

³¹Héε Yesue äsedtée beprise bémbáá aáken, “Átíntē ábén bán bébe, ahéé amběl ngáne sáá áhédé’áá?” Bēnkweŋtén mós bán, “Ambáá.” Né-ōó, Yesue anláá bó aá, “Ne mbále, nlanŋe nyé nén meé, besaad-bé-tááε ne bekwalεε bédé asól á nkamlɛn ní Dyöb tómaa nyé.†

³²Nhóbe nén, áyāle Jɔŋe, Ndusɛne ampě, alúmed nyé nzii echě etyéémé, nyénkëndúbéé mós, boŋ besaad-bé-tááε ne bekwalεε béndübē. Ké néε nyénnyín-naá nê, nyénkēnhəŋlénné, nyénkëndúbé-’aá mós.”

Ngan e bebel bé nsón ntéd

(Mak 12.1-12; Luk 20.9-19)

³³Yesue anláá bó aá, “Nyéwóglɛn ngan empée. Nwóó-nzag nhóg abédé awě ankwěl nzag e e’pum é’ mɛl ábe bébenléε mím. Ankág chó, ábel bwǎl wéε béminéé ábê e’pum é’ mɛl ábel mím, alón-’ε ebem áwēd-te wéε bédyεε’é áŋəŋ nzag áte. Ambéé ene nzag wéε bad ábe bóóbbōó békǎb mbote áte, ákē á alon démpēe.

³⁴Adě pónDé épédé eche bépádéé e’pum, ane nwóó-nzag anlóm ábē bembəledε wéε ábē bebel-bé-nsón ákobe mós ádē asii dé e’pum.

³⁵Héε ábē bebel-bé-nsón békóbé ábē bembəledε, bəwanné’ nhóg, bəwūε’ ampée, aníníí-’ε bəwūɛnē meláá.

³⁶Ambíd é pónDé ane nwóó-nzag anlóm bembəledε bémpēe ábe bēmbuú áte tómaa ábíníí. Ábē bebel-bé-nsón bēmběl ábē bembəledε melemlem ngáne bēmbɛnlé bé’sō.

³⁷Ambíd e pónDé anlóm awe mwǎn áwāb, ne mewēmtɛn nén bébéé mós edúbé.

³⁸Boŋ áde bebel-bé-nsón bényíné ane mwǎn néε áhúé’é, dóó bó bēn ne bēn bēhóbéé nén bán, ‘Ndyé-a-mbwóg nén, nyéhyag! Déwúu mós, ábel nén, eche mbwóg ésuuned syánē.’

³⁹Hê dóó békóbé mós, bēbídɛn mós á nzag-té, boŋ bəwúú-’ε mós.”

⁴⁰Héε Yesue äsedtée ábē bad bémbáá bé dyad ne beprise bémbáá aá, “Bóób-póó, nzé nwóó-nzag ne apedé, cheé ábɛnlé ábē bebel-bé-nsón?”

⁴¹Hê dóó békweŋtanné bán, “Awūú ábē e’bébtéd é’ bad e’bébtéd é kwééd, ábē-’ε ene nzag wéε bebel-bé-nsón bémpēe ábe bébe mós ádē asii á mbote nzé pónDé epedé eche bépádéé e’pum.”

⁴²Yesue anláá bó ámpē aá, “Nyéélāā-’é mbéd wéε eyale é Dyöb éhóbé nén bán, ‘Aláá ádē belón-bé-ndáb bēnchenéé dóó átímé aláá dé etógnén abé.

† 21:31 Baá mbáá bé Israel béndübē nén bán bekwalεε ne besaad-bé-tááε béésónlé á nkamlɛn ní mín.

Sáŋgwéé mō ambel nén, édé-'ε syánē menyáké.'

⁴³ Né-ṵ nl̄nge nyé nén mēé, békobén nyé etál éche nyéwóó née bad bé nkamlen ní Dyōb, bébē wée bad ábe bébele' ngáne Dyōb áhedéé."‡

⁴⁵ Ade beprise bémbáá ne Befarisia béwógé échén ngan éche Yesue ákálé, bēnchem bán, bóó ákanléé chó.

⁴⁶ Né-ṵ béhéde'áá mó akób, boŋ bémbāŋ abel nē, áyāle bényin bán, ene ndun e mod enyíné'áá Yesue née nkal é'dáádāŋ.

22

Ngan e ngande e e'wóngé

(Luk 14.15-24)

¹ Yesue ambé ábenléd ngan ámpē ákalen ábē bad. Anhób áá,

² "Nkamlen mí mín níde nēngáne k̄ŋ póg echē enláá ábē bambaledé aá béboŋsen ngande e e'wóngé ábe awé mwān a mwēnchóm.

³ Ene k̄ŋ-'ε anlóm ábē bambaledé aá béke béchag bad ábe álébpé áyāle ene ngande, boŋ ábē bad bēnkēnkwenténné aŋe.

⁴ Héé álóméé bambaledé bēmpēe aá béláa bad ábe mólébpé nén bán, 'Nyēbíí nén bán, mmaá nyag ne e'lem ábe é'bóó yāl awúu. Chōm ésyāāl-le édé mboŋsén, nyéhyag-kóó á ngande.'

⁵ Boŋ ké nē ábē bad ábe bēnlēbēē bēnkētédte mímē nlébtéd née dyam. Mod téé ahídé'áá mímē ntii ámbíd. Behóg bēnkē áwāb nzag-tē, ábíníí béhídē mímab nsón mémpēe ámbíd.

⁶ Abíníí-'ε bēnkōb ábē bambaledé, bébōm bó, béwúú-'ε bó.

⁷ Ene k̄ŋ enl̄ŋ bwāmbwam. Né-ṵ, anlóm éche sánze. Née épédé, éwūū bad ábe bēnwūū ábē bambaledé, éhyāād-te ábē bad dyad.

⁸ Dóó álāngéé ábē bambaledé bēmpēe aá, 'Ngande e e'wóngé emaa mboŋsén abé, boŋ bad ábe rílébpé béekwognedéé chó abé ásē.

⁹ Bóob-póó, nyékag á mbom ní nzii á dyad-tē, nyéchéle bad bésyāāl ábe bényíné bán, béhyag á ngande.'

¹⁰ Né-ṵ ábē bambaledé bēnkē á dyad-tē, bélād bad bésyāāl ábe bényinnē, ken mod a bwām ké'ε mod a mbéb, kásŋ ndáb e ngande enlóg áte.

¹¹ "K̄ŋ empē á ndáb-te ānōn bad ábe bēpédé á ngande. Ade ápédé anyin mod awē enkēnhé asan áde ántāŋgēnnē ahé á ngande e e'wóngé.

¹² Héé ásedtéé mó aá, 'Amúē, chán émwédé aŋe hén áde wēēhēdeé asan á ngande e e'wóngé.' Boŋ ane mod enkēnhóbpé dyamdyam.

¹³ Dóó k̄ŋ élāngéé ábē bambaledé ábe béchágté'áá beken aá, 'Nyéhan mó mekáá ne mekuu, nyébwēm mó á ebwóg, á ehintén-tē. Ahed-taá béchyéé'ε, bēdyāg-ke meson á nsal.' "

¹⁴ Héé Yesue ásogtéé enén ngan ne e'yale nén aá, "Dyōb áchēnle' bad híin ábē ásē e nkamlen mímē, boŋ nguse chóó épwēdnéd."

Yesue ne asaa á táásé

(Mak 12.13-17; Luk 20.20-26)

¹⁵ Ebédé pónde póg echē Befarisia bēnkéé mbom, áhage Yesue, ábel békóben mó awusé tēngene e'yale ábe bébid mó á nsal.

¹⁶ Bēnlōm ábāb bambapēe nchoo ne bad bé epepé éche Herōde wée Yesue. Née bēpédé áwē, bēlāngē mó nén bán, "A-meléed, sébíí nén bán, ekale mbále. Sébíí-'ε ámpē nén bán, ayáge ádōŋ tēngene mbéndé e Dyōb áde mbále. Mewēmtēn mé bad ne e'só é' mbōm é' bad béehāŋlānné ádōŋ ayáged.

‡ **21:43** Donje á kálag dé'sō ábáde nchoo 44: *Mod ké ahéé awē alimé áde aláá am̄n abōgtéd áte. Boŋ ane awē déhüntédte am̄n, anyogtéd áte.*

¹⁷ Láá-'ε sé ngáne ényíné ádén akan. Mbéndé eche syánē ehóbe nén bán désan̄ge' tááse wéε Kaisεε, k̄η e Roma-yε?"

¹⁸ Bon̄ Yesuε ambíí m̄mab mew̄m̄t̄en mé mbé̄b. Né-ɔ́ ans̄edéd bó aáken, "Nyé bedog-badé, cheé nyéh̄agk̄éé mε?"

¹⁹ Nyélúmed mε m̄oné míme bás̄an̄nadté tááse eched." B̄m̄piinéd mó m̄oné mé ekii.

²⁰ D̄óó áséd̄t̄é bó aáken, "Ediidingε éche nzéé chén? D̄in áde nzéé-'ε d̄én?"

²¹ B̄enk̄w̄ent̄én mó bán, "Abe Kaisεε." D̄óó ál̄an̄geé bó aá, "Nyébag-k̄óó Kaisεε éche édé éche Kaisεε, nyébag-kε Dyöb éche édé é Dyöb."

²² Ade béwógé n̄ē, ȳl̄ enk̄óm bó áte. Né-ɔ́ b̄ēnhidé áhed, békē-'ε.

Ayáged áde Yesuε

t̄an̄gēne m̄puu ámb̄id e kwééd

(Mak 12.18-27; Luk 20.27-40)

²³ Ech̄e epun ch̄ēn don̄ge á Besadusia b̄ēmp̄ε wéε Yesuε. Besadusia b̄ēndūbē bán m̄puu méesaá ámb̄id e kwééd.

²⁴ D̄óó béhób̄éé bán, "A-meléed, mbéndé e Mosεε ehóbe nén bán, 'Nzé mod awóó mmwaád bon̄ awédé áde bó ane mmwaád béepedεé mw̄an̄ awále, mw̄anyan̄ a abum ahóg at̄an̄géné ane nkú̄d awón̄, ábel bon̄ d̄in áde mw̄anyan̄ déēb̄ōō'."

²⁵ B̄ōōb-p̄óó, bad bébédé h̄ēn mod saámbé ábe b̄ēmb̄id abum ahóg. Mod a'só anwón̄ mmwaád, bon̄ awé áde bó mmwaád ne béepedεé bán awále, né-ɔ́ mw̄anyan̄ aw̄ē anhíd mó anlȳagnéd ane nkú̄d a mmwaád.

²⁶ Ane mómp̄ē anwé áde bó ane mmwaád béepedεé bán awále. Melemlem mé dyam m̄ēmb̄ēnléd ne aw̄ē alónt̄éné b̄eláán, k̄ó̄an̄ b̄ébōm bó mod saámbé.

²⁷ K̄ó̄an̄ne á asóg ane mmwaád mómp̄ē anwé.

²⁸ B̄ōōb-p̄óó á p̄óndé e m̄puu, mmwaád aw̄ē nzéé ane mmwaád ách̄agnéd̄t̄é áȳāle bó moosȳā̄l saámbé b̄ēnwōn̄ mó?"

²⁹ Yesuε antim̄t̄én bó aá, "Nyépane' áȳāle nyées̄ō̄n̄t̄enεé ch̄ōm éche eyale é Dyöb éhób̄éé, nyées̄ō̄n̄t̄enεé-'ε ngáne ngíne e Dyöb ésógé abé.

³⁰ Aȳāle p̄óndé ech̄ē bad b̄épuú'ε ámb̄id e kwééd mewón̄gé méebáá ámp̄ē. Bad b̄éb̄ē n̄ēngáne ángel éche édé ám̄in, béewón̄n̄éé.

³¹ Nyéēl̄áá'ε mb̄ēd dyam áde Dyöb ahób̄é áw̄ēn t̄an̄gēne m̄puu-yε? Dyöb áhób̄é t̄an̄gēne áb̄ēd betaa aá,

³² 'Mε-εé ndé Dyöb áde Abrahamε, Aisige ne Jakōbe.' Dyöb ádíi Dyöb á bad ábe b̄édé á alongé, saké Dyöb á bad ábe béwédé."

³³ Ade ene ndun e mod ech̄ē embé áhed éwógé n̄ē, b̄ēmb̄ē menyáké bw̄āmbwam t̄an̄gēne ayáged áde Yesuε.

Mbéndé ébe éche étómt̄éné

etógn̄én abé

(Mak 12.28-34; Luk 10.25-28)

³⁴ Ade Befarisia béwógé bán nk̄w̄ent̄en míme Yesuε ámb̄éé Besadusia m̄ēmb̄ēl b̄ēhele dyamdyam ahób̄, b̄ēnlad̄én áte.

³⁵ H̄ē d̄óó bó mod nhóg aw̄ē abédé meléede a mbéndé, áhyédé Yesuε ak̄ag, áséd̄t̄é mó aá,

³⁶ "A-meléed, át̄int̄ē mbéndé ésȳā̄l, ehéé etómt̄éné etógn̄én abé?"

³⁷ Yesuε ank̄w̄ent̄én bó aá, "Et̄an̄géné éd̄an̄ S̄an̄gwéé ádon̄ Dyöb ne nímon̄ n̄lém n̄sȳā̄l, ne échon̄ ed̄á̄d̄an̄ ésȳā̄l, éd̄an̄-'ε mó ne nímon̄ mew̄m̄t̄en m̄esȳā̄l.

³⁸ Enén mbéndé ch̄ō etómt̄éné etógn̄én abé, ebé-'ε mbéndé e'só.

³⁹ Mbéndé ech̄ē elónt̄éné ébe ech̄ē ch̄ómp̄ē edé etógn̄én melemlem n̄ēngáne e'só edii nén 'Ed̄an̄ mw̄anyon̄ ngáne éd̄á̄̄ echon̄ ȳl̄.'

⁴⁰ Echén mbéndé ébe chóó éwánlé mbéndé éche Mosεε ésyāāl ne mekan míme bekal-bé-e'dəádəη béyágté.”

Nsɛdtéd t̄əŋgene
Ane-awě-Béwógté

(Mak 12.35-37; Luk 20.41-44)

⁴¹ Hê dóó Yesuε áseɛtɛé ábê Befarisia ábe bēnladén áte aá,

⁴² “Chán nyéwēmtanné t̄əŋgene Ane-awě-Béwógté? A mbyaa míme nzéé áhúú?” Héε békwénténé mó bán, “Abidé á mbyaa míme k̄əŋ Dabidε.”

⁴³ Yesuε ansɛdéd bó aá, “Cheé-ō enk̄əŋ boŋ Dabidε áde Edəádəη é Dyōb élyágté mó ānchəgk̄é mó aá, ‘A-Sán,’ áde ahóbé aá,

⁴⁴ ‘Sán Dyōbe anláá awēm Sánwéé aá,

Dyεé áwēm ekáá émbáá,

káəŋ ne á pónɛdɛ echē mébenlé boŋ ékəgtéd ábōŋ bad bé ekoyí ámīn ne mekuu.’

⁴⁵ Néε Dabidε mwēn ásébpé mó achəg aá, Sánwéé, chán-nō Ane-awě-Béwógté áhɛléé abé awe mwǎn?”

⁴⁶ Bó modmod bēnkēnhɛnlé mó dyamdyam akwɛntɛn. Bootya échē epun bēnkēnchu’ é mó dyamdyam asɛded ámpē.

23

Elébé t̄əŋgene bemeléede
bé mbéndé ne Befarisia

(Mak 12.38-39; Luk 11.43, 46, 20.45-46)

¹ Ambíd e nê, dóó Yesuε álāŋgɛé ene ndun e mod ne ábē bembapεε aá,

² “Bemeléede bé mbéndé ne Befarisia bóó bétédé etál éche Mosεε bōob áyáged bad.

³ Né-ōó, nyétāŋgéné bó awóglɛn nyébelé-’ε mekan mésyāāl míme bélāŋgɛé nyé, boŋ nyéēbāl’ mekan míme bébeléé, áyāle bébeléé mekan míme béhóbéé.

⁴ Békaa’ e’ dɛtéd bé nted, bépēmtad bad, boŋ béesaá mboŋsén ábán ké ekáá áwóngɛn bó ápém mó.

⁵ Kéchéé éche bébeléé, bébele chó ábel boŋ bad bényín bó. Békálte’ bán bé ntyág ábe béhágk̄é nchoo mé e’yale e’ Dyōb áte, boŋ bétāā á mbōm ne á mekáá, béchabte e’túd* ábe béwáá’ é mengombe mín bwāmbwam. ⁶ Bédəə e’tál bé edúbé adyεε á hōm á ngande, bédəŋ-’ε metii mé edúbé adyεε á ndáb é mekáne.

⁷ Bédəə bán, bad bélente bó ne edúbé ésyāāl á dyōn-té, bédəŋ-’ε bán, bad béchəge bó bán, ‘A-meléed.’

⁸ Boŋ nyé, nyéēmwāg-sɛ béchəgé nyé bán, ‘Meléede.’ Ayāle meléede nhóg móó nyéwóó, baányan bó-’aá nyédíí.

⁹ Nyééchāgē-’ε mod ké nhóg á nkōŋsé wén bán Titée áyāle nyéwóó-’ε Titée nhóg, awên Titée awě adé ámīn.

¹⁰ Nyéēmwāg-ke sɛ béchəgé nyé bán, ‘Sánwéé’ áyāle nyéwóó Sánwéé nhóg, Ane-awě-Béwógté.

¹¹ Mod awě adé ambáá átínté e echên atāŋgéné abé mbələde awên.

¹² Kénzée awě achágté yāl, Dyōb dəsudéd mó, kénzée-’ε awě asúdté yāl, Dyōb dáchāgéd mó.”

Yesuε asɛlé bad bé medogké

(Mak 12.40; Luk 11.39-42, 44, 52, 20.47)

¹³ Dóó Yesuε áhóbéé aá, “Ebēēn nyé bemeléede bé mbéndé ne Befarisia ebébtéd, nyé bad bé medogké! Nyédibe’ ekob é nkamlɛn ní mín ábel boŋ bad

* **23:5 Etúd:** Béwáá’áá e’túd álúmed bán bébenle Dyōb.

béēsōlē'. Nyé bēn nyéesóléé, nyéēmwāg-kaá bán bad bémpēe ábe béhede asól bésōl.†

15 Ebēēn nyé bemeléede bé mbéndé ne Befarisia ebébtéd, nyé bad bé medogké. Nyékag meloŋ ne meloŋ ábel boŋ mod nhóg átímen nyé. Boŋ nzé amaá nyé átímen, nyébelé nyébébed mó nyaa eché ákwógnédé ákud nkógsen á dū-á-muú míme ítómé mímen ngen ébe.

16 “Ebēēn nyé ebébtéd nyé bad ábe békwédé ndím, boŋ bélyāgtē bad bémpēe. Nyéyágte bán, ‘Nzé mod amwédé melě á dīn á Ndáb-e-Dyöb, né nê déesaá dyam, boŋ nzé mod amwédé melě á dīn á bwēm é’ gól ábe é’dé áwēd-te, átāngéné ábel dyam áde ámwééné melě.’

17 E’yókél é’ bad bēn, nyékwedé ndím! Cheé étómténé etógnén abé, gól-le, ngé Ndáb-e-Dyöb eché ebélé boŋ gól ebé chōm éche ésáá á’sō é’ Dyöb?

18 Nyéyágte’ ámpē bán, ‘Nzé mod amwédé melě á dīn dé menyán mé mendε, né nê déesaá dyam. Boŋ nzé mod amwédé melě á dīn dé mendε míme médé á menyán mín, átāngéné ábel dyam áde ámwééné melě.’

19 Bad bé ndím bēn! Cheé étómténé etógnén abé, mendε ngé menyán míme mébéle boŋ míme mendε mébé chōm éche ésáá á’sō é’ Dyöb?

20 Né-óó kénzée awě amwédé melě á dīn dé menyán mé mendε, né amwédé míme melě á dīn dé menyán ne mendε ké méhéé míme médé áwedé-mín.

21 Kénzée-ε awě amwédé melě á dīn á Ndáb-e-Dyöb, né amwédé míme melě á dīn á Ndáb-e-Dyöb ne á dīn á Dyöb áde ádyεε’ áwēd-te.

22 Kénzée-ε ámpē awě amwédé melě á dīn dé nkoŋ mí mín né amwédé melě á dīn dé atii dé nkamlen ní Dyöb ne á dīn á Dyöb áde ádíídé áde atii.

23 “Ebēēn nyé bemeléede bé mbéndé ne Befarisia ebébtéd, nyé bad bé medogké! Nyébage Dyöb akab ahóg átínté e mekab dyôm, ké dé mekúle míme béchāmnεé ndyééd néε mínt, díl ne kúmin.‡ Boŋ nyéehédeé nló áte ábel ndín é mekan éche mbéndé éhóbé aá nyébele’. Nyéēsaá mbále ne Dyöb, nyéewóó’ é nlém ní ngól, nyéedúbpe-’áa Dyöb. Nyéntāngén mímén mésyāāl ábel, ésebán nyéchōbte’ míminí.

24 Nyé bad ábe békwédé ndím boŋ bélyāgtē bad bémpēe. Nyébude’ mekan míme méesě etógnén ahíd ámbíd. Nyéhúde’ púuted á mendíb míme nyémwāgkē-te, boŋ nyétēdte mbinde émbáá éche éde áwēd-te.

25 “Ebēēn nyé bemeléede bé mbéndé ne Befarisia ebébtéd, nyé bad bé medogké! Nyéwobpe mbwendé ne díse ámbíd e ebwóg, boŋ medyé míme médé áwēd-te médíi medyé míme nyékúdné ndumbán ne ngoód.

26 Nyé Befarisia, bad bé ndím bēn! Nyésébe nyéwobe mbwendé ne díse áte, káōŋne mbíd e ebwóg chōmpē ésāŋ.

27 “Medim ne nyé bemeléede bé mbéndé ne Befarisia, nyé bad bé medogké! Nyédíi néε soŋ éche bépúbté. Ekine’ áte ámbíd e ebwóg boŋ e’hid ne e’bóó bé ndím mí bad bóó é’lóné áwēd-te.

28 Melemlem nê dōó nyényínnadté á’sō é’ bad néε bad ábe bésáá boŋ áte nyélóné ne edogké ne mbéb.

*Dyöb dékōgsēn bemeléede
bé mbéndé ne Befarisia
(Luk 11.47-51)*

29 “Medim ne nyé bemeléede bé mbéndé ne Befarisia, nyé bad bé medogké! Nyélóó’ soŋ é bekal-bé-e’dáédāŋ bwām, nyélonjté-ε mebón míme bad ábe bésáá.

† 23:13 Donje á kálag dé’só ábádé nchoo 14: Ebēēn nyé bemeléede bé mbéndé ne Befarisia ebébtéd, nyé bad bé medogké. Nyélúmtan yāl ne ntōŋ-ntōŋ mé mekáne, nyédumé-ε mbwóg é bekúd. Né-óó, nyéēkud nkógsen míme íchábé ámtín. ‡ 23:23 *Mínt, díl ne kúmin*: bédii byaá ábe bēbnládtáá áchám ndyééd.

³⁰ Nyékag, nyéhóbe-'ε bán, 'Nzé sêmbé á pónké echě ábēd betaa, né sênkênlaténné bó áde bēnwū'έ bekal-bé-e'dáádəŋ áte.'

³¹ Nê dēn álúmte nēn bán nyēnkwentén nēn bán nyēbídé á mbyaa míme bad ábe bēwúε' bekal-bé-e'dáádəŋ.

³² Nyékag-kóó á'sō nyémad nsón míme ábēn betaa bēmbootédte.

³³ Nyă chén! Etəd é píí ngēn. Chán nyémwεé nkógsen ní dū-á-muú abame?

³⁴ Né-óó, mēlōmē nyé bekal-bé-e'dáádəŋ ne bad bé debyéé ne bemeléede. Nyéewū donge, nyébōmē-'ε bó á awəg. Nyéswādtəd donge e'tangú á ndáb é mekáne. Abíní-'ε nyénané myad ne myad.

³⁵ Awúu áde nyéwúε'έ bó dēbēl Dyōb ákógsén nyé áyāle mekiú mé bad ábe bésáá bésyāāl ábe nyéwúú eben á nkōŋsé, bootya kwééd eche Abεε awě bēwúú ngēn, ápe kwééd echě Zakariyaa, mwān awě Bεεkayaa. Zakariyaa awě nyéwúú áfínté e Ndáb-e-Dyōb ne hōm áde bēbagεé mendε.

³⁶ Ne mbále nlānge nyé nēn mεé, enén nyonɣel chóó ékūd nkógsen áyāle échén kwééd ésyāāl.

*Yesuε adé ngol
ne bad bé Jerusalem
(Luk 13.34-35)*

³⁷ "Wóowó! A-bad bé Jerusalem, nyéwúε bekal-bé-e'dáádəŋ, nyéwúēnē-'ε bad meláá ábe Dyōb álómé! Nkénwān áte ngen ne ngen álad nyé áte nēngáne nyaá-kúb ákútanné bán, boŋ nyéehédeé etál!

³⁸ Nyénəne', Dyōb détedé echen ndáb, modmod éebáá-'aá áwēd-te.

³⁹ A mbále, nlānge nyé nēn mεé, nyéenyínénné mε díd ámpē káəŋ ne á pónké eche nyéəhəbpē bán, 'Nnam ne ane awě apedé á dīn á Sāŋgú.' "

24

*Mbooted mé metake
(Mak 13.1-2; Luk 21.5-6)*

¹ Ambíd e nē, Yesuε anhidé á Ndáb-e-Dyōb. Ade ákagké nē, dóó ábē bembapεε bétáné mó, boŋ bēlāngē mó bán ánəne nyaa eche bélóó Ndáb-e-Dyōb.

² Héε Yesuε ákwentanné bó aá, "Ngáne nyényíneé ábē bwēm é'syāāl nē, ne mbále, nlānge nyé nēn mεé pónké əpě echě aláá ké ahóg déelyəgké ámīn e waáb. Bépāŋtəd mésyāāl áte."

³ Anké á Ekone é Menzab ádyēē ásē. Héε ábē bembapεε bétáné mó wéε bēbédé bēnpēn boŋ bésēdté mó bán, "Láá sé pónké echě nímén mekan mésyāāl mébēnlédté. E'chemléd é'héé bēlūmēd epe échōŋ ne asóg dé nkōŋsé?"

⁴ Yesuε antimtén bó nēn aá, "Nyétəd pónké nēn modmod eédōgē nyé.

⁵ Bad híin bépě bán bóó bédé Ane-awě-Béwógté. Bédōg-ke bad híin.

⁶ Nyéewōgē ngáne nzum éwantéé, nyéewōgē-'ε nzunze é nzum. Boŋ nyé modmod nyéénāə'. Mmén mekan mésyāāl métəŋgéné abēnled, boŋ saké móó mēlūmēd bán asóg áamáá ape.

⁷ Alon ahóg détyēēmēn ádíní nzum. Nkamlēn nhóg-ke rítyēēmēn nímíní. Nzaa ébē, ndəəb-pe eənəŋnéd ásē mebwóg ne mebwóg.

⁸ Echén ndutul ésyāāl ébē nēngáne mewε mé'sō míme mmwáád áwógεé nzé ahéde achyáa.

⁹ Ene pónké békōb nyé, bēbε nyé á mekáá mé bad ábe békōgsēn nyé, bēwúú-'ε nyé. Melon mésyāāl mékóó nyé áyāle dīn ádēm.

¹⁰ "Bad híin bēewōŋgé adúbe ámpē. Bēbεé nhóg ne aníní á mekáá mé bad ábe békóó bó. Bó bēn-ne békóón.

¹¹ Bekal bé'dáádəŋ bé metóm híin bēbíd, bédōg-ke ekud é bad áhíd bó.

12 E'béb bé nlém á abum béchāgē, né-ᵛó edānge é bad híin ésūd.

13 Boᵛ kenzéé awě ákaán mímē metake nlém káāᵛ ne á asóg, ákūd e'soóson.

14 Mmén nkalaᵛ mí bwām tāᵛgene nkamlēn ní Dyōb mékanléd nkōᵛsé áte n̄syāā́l ábel boᵛ meloᵛ meᵛsyāā́l méwōg. Ene pōndé dōo asóg dépēé.

E'bébtéd é' mekan ábe bēpě

(Mak 13.14-23; Luk 21.20-24)

15 “Nyēnyīn nēe ekúkú é akan éche épēene e'sōn á'sō é Dyōb ébēnlédé á Ndáb-e-Dyōb á hōm áde ásáá * ngáne nkal é'dāádāᵛ Daniēle ánhōbpē aá ébēnléd. (Nyé ábe nyēláá' mímēn mekan nyésōᵛtēn mō bwām.)

16 Nzé nyēnyīné nē, bad ábe bédé á Judeya bētōm mehélé, béke bésōm á e'kone mīn.

17 Mod awě adé á nnoᵛ ní ndáb mīn eētōgné asud áke détéđ chōm éche édé mō á ndáb-te.

18 Mod awě mō-ε ámpē adé á nzag-tē, eētīmē ámbīd á ndáb áke détéđ sōte.

19 Ebē ebébtéd ne bebaád ábe bēbē nkoᵛ ne ábe bēmwāᵛtē mímē mesú.

20 Nyékānne nēn bán áđē abāᵛgé détanē nyé á pōndé e nkóg áde ahéb ádí ngīne bwāmbwam, ké'ε á mbwε-mé-nkóme-áte.

21 Ayāle ndānge echě ēbē ene pōndé ēbē ndīn echě eébnlédé mbēd bootya nkōᵛsé mībootede káāᵛ ne epun é'chii. Dyamdyam nēe áđē déebēnléd-taá ámpē mbēd.

22 Dyōb ámáá ábē e'pun é' metake asél áte. Nzé énkēmbé nē, né modmod éechōᵛgé. Boᵛ á etútú é bad ábe ápwédé, ásel ábē e'pun áte.

23 Ene pōndé nzé mod alāᵛgé nyé aá, 'Nyénōne', Ane-awě-Béwōgté mō nēn' káa aá, 'Mōníní,' nyéedúbpé'.

24 Ayāle bad híin bēbīdē' ábe bēkalé metóm nēn bán, bōo bédé Ane awě Dyōb Awōgté. Bekal bé'dāádāᵛ bé metóm ámpē bēbīd. Bēbelé menyáké mé ngīne, bēlūmtē-ε e'chemléd híin. Bēbel nēn ábel boᵛ bédog káāᵛne bad ábe Dyōb ápwédé, nzé nzii edé ádog bō.

25 Nyénōne', nlanᵛge nyé mímēn mekan á'sō é' pōndé.

26 Né-ᵛó nzé bad bēlāᵛgé nyé nēn bán, 'Nyénōne' adé á ehyāᵛge,' nyéēkāg áwed. Káa nzé bēlāᵛgé nyé bán, 'Nyénōne', adé á toᵛ-tē hēn,' nyéedúbpé'.

27 Epε éche Mwān-a-Moonyoᵛ ébē melemlēn nēᵛgáne emwεdmwεd étómēé á akuu ne á mbāᵛ.

28 Ké héé wēe ndim mībāᵛkē dōo benhōgnōné bēladnēé.

Epε é Mwān-a-Moonyoᵛ

ne asóg dé nkōᵛsé

(Mak 13.24-27; Luk 21.25-28)

29 “Áde pōndé e ndānge ne étōmmē tómēn, etondεε ákwε ehíntēn, ngōn-ne esóg apēn. Betintine bēbīd ámīn, bēhūn ásē, ngīne-ε éche édé ámīn énéᵛnéd á e'dii.

30 Ene pōndé dōo nyēnyīnnē nēe e'chemléd é' Mwān-a-Moonyoᵛ é'bīdē ámīn. Hē dōo metúmbé mé nkōᵛsé méᵛsyāā́l mébootédté achii ne mbwōg. Bad bēnyīn nēe Mwān-a-Moonyoᵛ áhúé'ε á mbag mīn, ne ngum, ne ehúmé ésyāā́l.

31 Esaád é eloᵛ émbáá éwōgnēd. Ene pōndé ālōm éche ángel á metōᵛgé mé nkōᵛsé méᵛsyāā́l ménīin, ālad ábē bad áte ábe Dyōb ápwédé, bootya atōᵛgé dé nkōᵛsé ahóg ápε ádínní.

32 “Nyétéd elāᵛsēn wēe alín á ngal. Nzé ngen ébóótédé byaá bēkōā́lē abided, nyēbele nyēbīí bán nchoᵛ níde benben.

* **24:15 Hōm áđē asáa:** ádíi hōm áđē bēbageé Dyōb edúbé ne wēe bad bēndübēē bán, Edāádāᵛ éche Esáá édé.

³³ Melemlem nzé nyênyíne nímén mekan mésyāal mébenlad, nyébii nén bán, Mwän-a-Moonyon akwogé ape,† adé-ε benben.

³⁴ Ne mbále, nlânge nyé nén meé, enén nyonjel e bad éemaá'έ kááj né nímén mekan mésyāal mébenléde.

³⁵ Nkon mí mín ne nkōnsé bémaá, bon ábēm e'yale bébē abé ne abé.

*Modmod eebii'έ epun
éche Mwän-a-Moonyon áπεέ*

(Mak 13.32-37; Luk 17.26-30, 34-36)

³⁶ “Modmod eebii'έ epun pen ké'ε pónde eché nímén mam mébenlédté. Ké ángel éche édé amín éebii'έ, ké mwän ámpē eebii'έ.‡ Titée mwēmpen mó abii pónde eche nímén mekan mébenlédté.

³⁷ Melemlem ngáne émbēē á pónde eche Noa, nê dōó ébēē pónde eché Mwän-a-Moonyon áπεέ.

³⁸ Ayāle á pónde eched, byánán mendíb mé mbúú mélōn á nkōnsé-te bad bédyágé'áá bwēm, bémwāg-ke, bebaád ne baachóm bēwōne, kááj ne mbwe nime Noa ásólé á bōle é'mbáá-te.

³⁹ Bénkēmbii'έ dyam áde ábenlad, kááj ne pónde eche mendíb mé mbúú mélōnné, méhóod-te bó. Melemlem nê dōó ébenlédté á pónde eché Mwän-a-Moonyon áπεέ.

⁴⁰ Bad bébe bébelé nsón á nzag-tê, Dyōb átéd nhóg, átēdē aníníí.

⁴¹ Bebaád bébe békogé medyé, Dyōb átéd nhóg, áchēnē aníníí.

⁴² Né-óó nyétéd pónde áyāle nyéebii'έ epun éche awen Sāngwéé áπεέ ámpē.

⁴³ Bon nyébii nén bán, nzé nwóó-ndáb abyéé'áá pónde eche nchíb áπεé nkūu, né ádyéé epin ánon ndáb. Né enkēmmwáá áá nchíb ábóo mó ndáb.

⁴⁴ Né-óó nyémpē nyétāngéné mbonjén abé, áyāle Mwän-a-Moonyon áπεέ á pónde eché nyéekamtēné.

Mbāledε a bwām ne mbāledε a mbéb
(Luk 12.41-48)

⁴⁵ “Né-óó, nyé mod té ábê née mbāledε awē awóó debyéé, awē abele-ε mam nime eche sāj álāngé mó áá ábel. Mó adé mbāledε awē eche sāj ábānné áá ákamlēn bembāledε ábiníí, anyín-ne nén áá békúde echab ndyééd pónde eché etāngéné.

⁴⁶ Nnam mébē ne ane mbāledε awē eche sāj áhūū'έ, bon atán nēngáne ábeléé mam nime ánlyāgtēnnē mó.

⁴⁷ Ne mbále nlânge nyé nén meé, ane mbāledε eche sāj ábané bwēm é'syāal ábe áwóó áwe mekáá áá ákamlan.

⁴⁸ Bon nzé ane mbāledε adé mbāledε a mbéb, bon ahóbé áwe nlém-tē áá, 'Ebēm áte bon echem sāj áhūū.'

⁴⁹ Né-óó aboótédé ábiníí bembāledε ábe bédé ásē echē awanēn, ádyāg bwēm, ámwāg-ke mīm ne be-mmwé-mīmε.

⁵⁰ Bon ane mbāledε eche sāj áhūū epun éche éewēmtēné ne á pónde eché énkēmbii'έ áá áhūū.

⁵¹ Ane mbāledε eche sāj ákōgsēn mó hēén. Akōgsēn mó melemlem ngáne ánkōgsēnnē bedog-badé, áhed dō-'áá áchyéé'έ bon ádyāg-ke meson á nsāl.”

25

Ngan e ngāndéréε dyōm

† 24:33 Mwän-a-Moonyon akwogé ape káa pónde ekwogé ape. ‡ 24:36 Ké mwän-ne ámpē eebii'έ: donje á kálag déewóó'έ ábén e'yale.

¹ Yesue ambenléd ngan empée, áhōbē nén aá, “Póndé eche Mwän-a-Moonyonj ápéé, nkamlēn ní mín mébēē nēngáne ngōndére dyōm éche éntēd ábab e’trúkánj áke dé asin mod awě akude sōmbé áke délyáged mó.

² Atíntē échē ngōndére dyōm, étáan émbē eyókél, étáan-ne énwōnj debyéé.

³ Abe bémbē eyókél bēnwālē e’trúkánj bonj bēnkēnwáléé dyōg dé etrúkánj áde ákwōgnédé.

⁴ Bonj ábe bēnwōnj debyéé bēnwalé ábab e’trúkánj ne dyōg démpēe á e’píd te.

⁵ Mod awě akudé’áá sōmbé enkēnkobéé apε, né-óó e’chá é’tágté’áá bó, békún-ne.

⁶ Melúde mé nkuu dōó esaád ébídé bán, ‘Mod awě akude sōmbé mó ahúe’ nén! Nyéhyag-kóó nyétán mó.’

⁷ Dōó échē ngōndére dyōm ésyāngé ásē, échágéd ábab e’trúkánj.

⁸ Héε éche ébédé eyókél élanjéé éche énwōnj debyéé bán, ‘Nyéwōnjgen se ádēn dyōg dé etrúkánj áyāle e’trúkánj ábēd é’dímme.’

⁹ Ngōndére éche énwōnj debyéé entímtén bó nén bán, ‘Aáy! Dyōg áde séwóó déekwogké syánē moosyáál. Nyéke nyéchan ádēn wéε bésóméé.’

¹⁰ Né-óó, ngōndére chē énkě dyōg dé etrúkánj achan. Ade békíí nē, dōó mod awě akude sōmbé ápédé. Echē ngōndére é debyéé étáan éche émbē mbonjén bóóbbōó bēnkě bésól á ndáb e ngande e e’wōnjgé bédīb-pe ekob.

¹¹ Ambíd e póndé dōó échíníí ngōndére épédé bonj bélébpe bán, ‘A-Sánj dibnéd sé ekob!’

¹² Dōó mod awě akude sōmbé átímtanné bó aá, ‘Ne mbále, nlānje nyé nén méé meebíí’ é nyé.’ ”

¹³ Héε Yesue ásógtéé ene ngan nén aá, “Nyétēd póndé áyāle nyéebíí’ é póndé eche Mwän-a-Moonyonj ápéé.”

*Ngan e bembaledε béléán
ábe bēnlyāgnēdtē ngáb
(Luk 19.11-27)*

¹⁴ Yesue ambád ámpē aá, “Ene póndé nkamlēn ní mín mébē nēngáne mod nhóg awě anlédé ekε akε, bonj achélé ábē bembaledε alyóg eche ngáb áwāb mekáá.

¹⁵ Ambε bó mod té tēngene echē ngude. Ambε nhóg e’kálé é’ kábpe é’táan, ábe aníníí e’kálé é’be, ábe-’ε aníníí ekálé ehóg. Amaá-’aá bó abε bonj ákag.

¹⁶ Mbaledε awě ankūd e’kálé é’táan antéd nímmē melemlēm mé póndé áke akábén nyonjé, ákudé’ e’kálé é’táan bēmpēe nēε nsyānj.

¹⁷ Awě mómpē ankūd e’kálé é’be ambēl melemlēm ákūd-te e’kálé bēmpēe é’be nēε nsyānj.

¹⁸ Bonj mbaledε awě ankūd ekálé ehóg ankě echóg alím, atéd nímmē mōné nímmē awě sánjwéé ámbéé mó, ákóó mó áwēd-te.

¹⁹ “Etūn é póndé ámbíd enē, sánjwéé awě ábē bembaledε anhúu, bóóbbōó bélúmtén áte ngáne bó mod téé ábénlédé nímmē mōné.

²⁰ Mbaledε awě ámbéé e’kálé é’ kábpe é’táan ampě wéε eche sánj, áhōbē nén aá, ‘A-Sánj, wembě mε e’kálé é’táan ábe ménkábēnnē nyonjé bonj níkud e’kálé é’táan bēmpēe nēε nsyānj, móómén.’

²¹ Dōó eche sánj élanjéé mó aá, ‘Nē ábóó, edíí mbaledε a bwām, edé mod a mbále, ebélé bwām. Ngáne éhélé nsonjé rísad alyáged, mēbě wε nsonjé níbáá ályáged. Hyāg-kó, déwóg menyínje.’

²² “Mbaledε awě bēmbéé e’kálé é’ kábpe é’be mó-’ε ampě, áhōbē nén aá, ‘A-Sánj, wembě mε e’kálé é’be ábē ménkábēnnē nyonjé bonj níkud e’kálé é’be bēmpēe nēε nsyānj, móómén.’

²³ Dóo echab sán álângeé mómpē aá, ‘Ebelé dyam áde ábóó, edii mbàledε a bwâm. Ngáne éhélé nsongé ísad alyáged, mēbǝ wε nsongé mbáá ályáged. Hyäg-kó, déwóg menyinǝ.’

²⁴ Dóo ane-’ε awě bēmbεé ekálé é kábpe ehóg ápédé bonj áhōbē nén aá, ‘A-Sán, mbíi méé edii mod awě alélé áte. Ehúde’ wée wéewénεé, épādē-’ε wée wéesobεé.

²⁵ Menwóg mbwóg, né-ǝǝ, menkǝ nímmōj mōné alíme á ndǝǝb-tē. Mmōj mōné móo ídē, mǝ-’ε wε mén.’

²⁶ “Hée echab sán álângeé mó aá ‘A-ebébtéd ne ewōmwōm é mbàledε! Wembíi wée ndii mod awě ahúde’ wée éewénεé, wée mpáde-’ε wée méesobεé.

²⁷ Chee-ǝ ênkǝj bonj weehéde nímmēm mōné á ndáb eche békongεé mōné ábel nén á ehúu échēm nítan née ríchyáá mōné mémpēe ámín?’

²⁸ Dóo ane mod álângeé bembàledε bémpēe aá, ‘Nyékoben mó nímmē mōné nyébe wée mod awě awóó e’kálé é’ kábpe dyóm.

²⁹ Kénzée awě awóó, Dyōb débād mó abε, äbüd-te awónj bwâmbwam. Bonj ane awě mó-’ε eewóo, Dyōb dékobén mó káǝjne mwämpín awě awóó.

³⁰ Né-ǝǝ anén mbàledε awě eésǝ dyam dé abenled, bébwēm mó á ebwóg-te, á ehíntén-tē. Ahed-taá áchyé’é, ádyāg-ke mesonj á nsəl.’ ”

Mbakú e asóg

³¹ Yesue ambád ahób ámpē aá, “A pónde echē Mwän-a-Moonyonj ápéé née kǝj ne ángel é Dyōb ésyāǝl ädyéé á atii dé nkamlen ákáad bad.

³² Bad bésyāǝl a nkōjsé bēladén áte áwē e’só. Ene pónde äkab bó áte monǝge mébe melemlen nēngáne nnōn-a-mbód ákabεé éche mbód áte, ábānē nídyōj ní mbód pēd póg, ábānē-’ε tón é mbód échíníi epēd.

³³ Nē dóo ene kǝj ébanéé bad ábe bésáá á ekáá émbáá, ábānē-’ε bad ábe béesaá á ekáá é emwēd.

³⁴ Ade nén débēnlédté, äläā bad ábe bédé mó á ekáá émbáá aá, ‘Nyéhyag, nyé bad ábe echem Sán ánámté! Nyéhyε nyékob nnam mé nkamlen ní Dyōb níme ábōjséné nyé bootya pónde eche áhágé nkōjsé.

³⁵ Nyééküđ nímmén nnam áyāle áde nzaa ékóbé me, nyēmbεé me chōm éche méndyēē. Ade píd ékóbé me nyēnhé me mendíb mémwē. Ade mpédé-’ε nken, nyēnkōb me bwâm.

³⁶ Ade ménkēnwōj’é chōm éche níwáá’é, nyēmbǝ me mbóté. Ade ménkēndyē’é bwâm, nyēntōgén me. Ade mbédé-’ε á mbwōg, nyēnhyǝ me anōn.’

³⁷ Hée bad ábe bésáá békwenénné mó bán, ‘A-Sán pónde ehéé sennyinnē wε ne nzaa bonj sébē wε ndyééd, káa áde píd ékóbé wε bonj sébē wε mendíb?’

³⁸ Pónde ehéé-’aá sennyinnē wε bonj sékōb wε nken áwēd mendáb, ké’ε sébē wε mbóté ádē wéewóo’é chōm éche éhāgkē?

³⁹ Pónde ehéé wēnkēndyε’é bwâm, bonj sétōgēn wε, ké-’ε séhyē sēnōn wε ádē édíi á mbwōg?’

⁴⁰ Hée ene kǝj étimtanné bó aá, ‘Ne mbále, nlânge nyé meé, pónde ké ehéé echē nyēmbēnlé nē ne mwānned ké ahéé, ké awě eésǝ etógnén, né méé nyēmbelée.’

⁴¹ “Hé-’aá äläā’é bad ábe bédé mó á ekáá é emwēd aá, ‘Nyésyāǝ me á díđ-te, nyé ábe nyékudé nkógsen ní Dyōb. Nyékag á dü-á-muú níme méédímē’, níme Dyōb ábōjséné áyāl e Devøle ne éche ángel.

⁴² Nzaa ewagé’áá me bonj nyēnkēmbaá me chōm éche nídyāgkē. Ade píd énkōbpē me, nyēnkēháá me mendíb.

⁴³ Mbédé nken, boŋ nyênkênkobpé me áwen mendáb. Ade ménkênwóngé chòm éche níwáa'é, nyênkêmbaá me mbóté. Ade ménkêndyε'ε bwâm, mbé'ε á mbwɔg nyéētɔgne'aá me.'

⁴⁴ Hê dɔɔ békwenténné mó bán, 'A-Sán, pónde ehéé sennyínnē nées nzaa, ké'ε píd ékóbé wε, ké'ε nées édíí nken, ké'ε áde wéewóó'ε chòm éche éwáa'é, ké'ε áde ékonléé, ké'ε édíí á mbwɔg boŋ séewóŋgene wε?'

⁴⁵ Héε ene kâŋ étimtanné bó aá, 'Ne mbále, nlânge nyé meé, pónde ké ehéé eché nyênkênwóngénné ábén bad ké ahéé awě eebéde etógnén, me-éé nyénkênwóngénné.'

⁴⁶ Abén bó-aá békě ákud nkógsen míme méemaá'. Bad ábe bésáá'ε békě á alongé áde déemaá'."

26

*Bad bémbáá bé Israel
béhɔgke Yesue áwúú mó*

(Mak 14.1-2; Luk 22.1-2; Jɔn 11.45-53)

¹ Ade Yesue ámáá mímé mam mésyā́l ayáged, dɔɔ álângeé ábē bembapεε aá,

² "Nyébíí nén bán, ámbíd e e'pun é'βε Ngande e Nnyíme-ámin ébē. Eché epun dɔɔ bébéé Mwán-a-Moonyon á mekáá mé bad ábe bēbomé mó á awɔg."

³ Beprise bémbáá ne bad bémbáá bé dyad bēmbōm á ndáb wée Kaifase, prise ambáambáa.

⁴ Ahed dɔɔ bébélé'áá ntii ákób Yesue á mesɔm-té, áwúú mó.

⁵ Boŋ bénhōb bán, "Deébēlē nê á mbwε ní ngande, ayāle nén bad bépéén epuutéd."

*Mmwaád nhóg awógté
Yesue á dyad á Betani*

(Mak 14.3-9; Jɔn 12.1-8)

⁶ Yesue ambé á Betani á ndáb wée Simone awě akékolé nkole mé meləŋ.

⁷ Ade ádyáɡkē ndyééd nê, dɔɔ mmwaád nhóg ápédé áwē ne apom á dyǔg dé elod é bwám áde dēnlél nkun, ásyɔg mó dɔ á nló.

⁸ Nées ábē bembapεε bényíne nê, bēnlīŋ, bésēdté'ε bánken, "Cheé ékáá boŋ anén mmwaád ábēbtē, enén nyaa e dyǔg?

⁹ Béhélé'áá se bésóm ádén dyǔg nkun mbáá, bēwóngén betóótókē bé bad."

¹⁰ Yesue ambíí mam míme ábē bembapεε béhóbé'áá. Né-ɔ́ anláá bó aá, "Cheé nyétagtεé anén mmwaád? Dyam áde ábēnlé me átómténé abon.

¹¹ Betóótókē bé bad bēbē ne nyé pónde ésyā́l, boŋ me pen méebáá ne nyé pónde ésyā́l.

¹² Asyǔg me ádén dyǔg á nló ábonsen me ayāle nlíme mímém.

¹³ Ne mbále, nlânge nyé nén meé kéhéé áde nímén nkalan mí bwám mékanlédté nkōŋsé áte nísyā́l, béhōb dyam áde anén mmwaád ábélé, ákamten mó."

*Judasε akwěnténe Yesue asóm
(Mak 14.10-11; Luk 22.3-6)*

¹⁴ Ámbíd e nê, mbapεε nhóg átínté e dyóm ne bébe ábe Yesue, awě béchágé'áá bán, Judas Iskariode ankě beprise bémbáá atán.

¹⁵ Héε ásedtéé bó aá, "Cheé nyébéé me nzé mbagé Yesue áwen mekáá ábel nyékób mó?" Dɔɔ bétóó móom mé kábpe meláán boŋ bébagé mó.

¹⁶ Bootya ene pónde dɔɔ ábóótédé nzii ahed ásóm mó áwāb.

*Yesue ne ábē bembapεε bétómté
Ngande e Nnyíme ámín*

(Mak 14.12-21; Luk 22.7-13, 21-23; Jǝn 13.21-30)

¹⁷ Bǝǝb-pǝǝ, pǝndé e Ngande e Ewεle-é-Ngên empǝ. A epun é'sǝ é ngande, bembapεε ábē Yesue béntān mó, bésedté mó bánken, "Héé wédǝngé wεé sébǝnsen wε ndyééd e Nnyíme-ámín?"

¹⁸ Dǝǝ Yesue álóméé bó á dyad-té wéε mod nhóg aá, béléaa mó bán meléede ahóbé nén aá, "Echem pǝndé emaa ape. Awǝn ndáb dǝǝ syáābe ábēm bembapεε sédyēē ndyééd e ngande e Nnyíme-ámín."

¹⁹ Né-ǝǝ bembapεε bēmbǝl ngáne Yesue ánlaā' é bó, bēmbǝnsen-ne ndyééd e Ngande e Nnyíme-ámín.

²⁰ Ene ngukél Yesue ne ábē bembapεε bēndyεé ásē, bédyāg ene ndyééd.

²¹ A ndyééd mǝn wē, dǝǝ Yesue álāngεé bó aá, "Ne mbále, nlānge nyé nén mεé nyé mod nhóg ábǝ mε á mekáá mé bad bé ekǝyí."

²² Nén dénwǝgēd bembapεε ndutul bwāmbwam. Bēmbootéd mó aseded nhóg ámbíd aníníí, bán, "A-Sáj, ndúbpé mεé saké mε."

²³ Dǝǝ Yesue átimtanné bó aá, "Mod awǝ sǝmǝ séētǝdé ewεle á dǝse-té atǝde ahóg móǝsǝm mε.

²⁴ Mwān-a-Moonyon āwē ngáne éténlédé, bǝn medim ne ane mod awǝ áǝm mó. Ebágé'aá bwām ne ane mod nzé bénkētǝgen mó achyáa."

²⁵ Héε Judase awǝ ankwentén Yesue asóm ásedtεé mó aá, "A-meléed, mε-yε?" Héε Yesue átimtanné mó aá, "Ngáne éhóbé."

Ndyééd e Sájǝ

(Mak 14.22-26; Luk 22.14-20; 1 Kǝr 11.23-25)

²⁶ Ade bédyákē ndyééd nē, dǝǝ Yesue átédé ewεle, ásāgnān Dyǝb, bǝn ákabtaád áte, ábagé ábē bembapεε áhǝbē nén aá, "Nyékob, nyédyē, echem yǝl nén."

²⁷ Ambíd e nē, antéd mbwendé mǝ mǝm, ásāgnān Dyǝb, ábagé bó, bǝn áhǝbē nén aá, "Nyé moosyǝál nyémwē.

²⁸ Mmēm mekií mǝmén. Mmén mekií médii melǝ mékǝǝlē. Mmén mekií mésyǝgké á nló mǝ bad híin, ábel nén Dyǝb álagsen bó mbéb.

²⁹ Nlānge nyé nén mεé, méemwáá mǝmén mǝm ámpē kǝǝn ne epun éche mémwēē mó ekǝlé ne nyé á nkamlen rǝmē echem Sáj."

³⁰ Bénkǝn nkǝngé mé nsāgnen. Néε bémáá akǝn, bēnkǝ á Ekone é menzab.

Yesue ahóbé ngáne

Petro ábāngē mó áyāl

(Mak 14.27-31; Luk 22.31-34; Jǝn 13.36-38)

³¹ Ade bépédé á ekone mǝn, dǝǝ Yesue álāngεé ábē bembapεε aá, "Nkuu nén dēn, nyé baásyǝāl nyéēnyǝgéd, nyétēdē mε. Nyéēnyǝgéd, áyāle dyam áde débēnléd ne mε. Eténlédé nén bán, 'Mǝwūū nnǝn-a-mbód, éche mbód ésyǝāl épǝntéd áte.

³² Bǝn ádē echem Sáj ápuúdté mε, mǝkǝ á'sǝ á Galilia, áwed-taá nyétānnē mε.' "

³³ Ade Yesue ámáá ahób nē, dǝǝ Petro áhóbéé aá, "Ké moosyǝál ambán wε áyāl, mε pēn méetēdēé wε mbéd."

³⁴ Dǝǝ Yesue átimtanné mó aá, "A-Petro, rǝlāa wε mεé, nchóm-a-kúb adēhób aá móto' nkuu nén, wǝbān mε áyāl ngen éláán."

³⁵ Dǝǝ Petro ábádtéé mó áte aá, "Ké nkǝn móǝ bésēlēē mε, méebāngé wε áyāl mbéd." Abíníí bembapεε bésyǝāl bǝmpē bēnhǝb melemlem.

Yesue akánné á Getsemani

(Mak 14.32-42; Luk 22.39-46)

³⁶ Ambid e nê, Yesue ne ábê bembapεε bēnkě á abwóg á hōm áde béchógé'áá bán Getsemani. Ade bépédé, Yesue anláá bó aá bédyεε áhed, aá m-’ε mósídte’ á’sō, ákáne.

³⁷ Ade ákagké, ankeén Petro ne bán ábe Zεbedie bébe. Ndənge ne metake híin bēbédé m-’ó á nlém-tê.

³⁸ D-’ó álāngεé bó aá, “Ndənge echě edé me á nlém ehεle-se ewúú me. Nyélyəg hén, nyédyεεn me epin.”

³⁹ D-’ó Yesue ásídté á’sō ámpē bonj ábwēmē yəl ásē. Ankúdén ásē, ákännē aá, “A-Tê, nzé ébónnéde wε, ékóbén me nímén metuné. Bonj ké nê, bəl ngáne ébónnéde wε, saké ngáne ébónnéde me.”

⁴⁰ Ade áamáá akáne, antīm ámbid wée ábê bembapεε béléáán. Antán née békúnéé, bonj álāngē Petro aá, “Cheé ék-’óá bonj nyéehεle awεsen ádyεεn me epin ké háwa póg?”

⁴¹ Nyédyεε epin, nyékánne ábel nén Dyōb déemwäg-se mekəgsen mépiinéd nyé. Nlém ríd-’óá, bonj ekob é yəl édé mbwóg.”

⁴² Yesue anke akáne ámpē, áhōbē nén, aá, “A-Tê, nzé édé nén bán, weéhεlεε-se ékōbēn me nímén nted mé metuné, ésebán mpémé m-’ó, ébel ngáne ébónnéde wε.”

⁴³ Née átímé ámbid ámpē, antán née ábê bembapεε bédii békúnéé áyāle e’chá bém̄bē bó á díd bwāmbwam.

⁴⁴ Yesue antīm ámbid á mekáne ámpē ngen éche élónténe éláán, áhōbē melem me e’yale.

⁴⁵ Hê d-’ó Yesue átímé ámbid ámpē wée ábê bembapεε, bonj álāngē bó aá, “Nyélyəgé nyékúne’, nyékómme-’ε nyé áte-yε? Nyénəne’, p-’óndé-’aá epedé nén eche bēbεé Mwān-a-Moonyonj á mekáá mé bad bé mbéb.

⁴⁶ Nyépáde ásē dékag. Nyénəne’, mod awě akii me ntúré m-’ó ahúe’ nén.”

Békóbé Yesue

(Mak 14.43-50; Luk 22.47-53; J-’on 18.3-12)

⁴⁷ Ehób éepedéé Yesue amaa á nsəl bonj Judase ápag. Judase, mbapεε nhóg átínté e bembapεε dyōm-ne-bébe ábe Yesue, ampě ne amute áde dénwālē nk-wáté ne mbid. Beprisε bém̄báá ne bad bém̄báá bé Israel bóo bēnlōm ábē bad.

⁴⁸ Ntúré awě Yesue amad bó e’chemléd abε aá, “Kénzée awě méhēē tál, né mod awě nyéhεdεé m̄hne, nyékōb m-’ó.”

⁴⁹ Née Judase ápedé pεén, atóm-me wée Yesue, áléléd m-’ó aá, “A-meléed, nsanj mb̄bē ne wε.” Ahé-’ε m-’ó tál.

⁵⁰ Yesue antímtén m-’ó aá, “Amūē, wébelée chōm éche éhyédé abel-ε?”* Hê d-’ó ábē bad bésídté á’sō, bonj békōbē’ Yesue, bēwéd-te m-’ó acháə.

⁵¹ Hê d-’ó mod nhóg átínté e bad ábe bém̄bē ne Yesue ádólé nk-wáté á abám, née átómté m-’ó bonj asél-le ntān awě prisε ambáámbáa etúu.

⁵² D-’ó Yesue álāngεé ane mod aá, “Timéd nímonj nk-wáté á abám. Kénzée awě awanne nk-wáté, nk-wáté m-’ó bēwūēnnē m-’ó.

⁵³ Weebii’ε nén wεé nzé nhědné echem Sāj nwōnɣen, wεé né ábwōg-áb-wōg, álōmē me e’chonj ne e’chonj é ángel áwōnɣen me-yε?

⁵⁴ Bonj nzé mbelé nê, né chán-nō kálag e Dyōb echě ehóbé nén aá, nén átāngéné abenled élōnnē?”

⁵⁵ Hée Yesue álāngεé áde amute aá, “Nchīb m-’ó rídii awě nyéhyédé akób ne mbid ne nk-wáté-yε? Epun tée mbédé á Ndáb-e-Dyōb, rí’yāgtē bad, bonj nyéékóbe me.

* **26:50** Amūē, wébelée chōm éche éhyédé abel-ε? Káa, Amūē, cheé éhyédé abel hén?

⁵⁶ Bonj nímén méšyāāl mébénlédé álóned mam níme bekal bé'dəəðəŋ bétélé á kálag e Dyöb." Hê dōo bembapεε béšyāāl bétédte mó, bonj bétómé mehélé.

Bépééné Yesue á kóte

(Mak 14.53-65; Luk 22.54-55, 63-71; Jón 18.13-14, 19-24)

⁵⁷ Hê dōo bad ábe bénkōb Yesue békééné mó á ndáb wée Kaifase awě ambé Prisε Ambáámbáa. Ahed dōo bemeléede bé mbéndé ne bad bémháá bé Israél bémpēe bēnladénné áte.

⁵⁸ Ade békεεnέé Yesue nê, Petro ahidé'áá mó ámbīd mwă etūn kááŋ bépe nchiitεn ne eyáde éche Kaifase. Néε ápédé áhed ansól á eyáde-tê, ádyē ásē ne benon bé Ndáb-e-Dyöb, ábel nén ányīn ngáne nkáásé níme Yesue méšōgkē.

⁵⁹ Bəəb-pəó, beprise bémháá ne bad bé káánsel béšyāāl bēhédé'áá bad ábe bēbīd mbónj é metóm á nló wée Yesue ábel nén bēwúu mó.

⁶⁰ Ké nēngáne ekud é bad ênhyě mbónj é metóm abíd áwe nló, bénkēnkóbénné mó awusé ké ahóg. Kááŋ ne á asóg, dōo mbónj ébe ébídé, éhōbē nén bán,

⁶¹ "Anén mod anhób áá, móhεle móbōōtēd Ndáb-e-Dyöb áá mólōŋ-'ε chó ámbīd ámpē áfīnté e e'pun é'láán."

⁶² Ade Prisε Ambáámbáa éwógé nê, dōo átyéémé ámīn bonj ásedte Yesue aáken, "Weewóó'ε dyamdyam áhób tâŋεne dyam áde ábén bad bēhóbé wε á yāl-ε?"

⁶³ Bonj Yesue enkēnkádénné mó. Hê dōo Prisε Ambáámbáa álāŋgεé mó ámpē áá, "Ne melě á dīn á Dyöb áde áde á alonjé, láá sé mbále, wε-εé edé Ane-awě-Béwógté, Mwăn a Dyöb-ε?"

⁶⁴ Hê dōo Yesue ákwentanné mó áá, "Ngáne éhóbé." Yesue ambád-te ámpē áá, "A mbále, nlāŋge nyé nén mée bootya enén pónde, nyéēnyīn néε Mwăn-a-Moonyonj ádyéé á ekáá émbáá é Dyöb a Ngum. Nyéēnyīn-ne néε ádyéé á mbag mīn, ásudéé á nkōŋsé."

⁶⁵ Dōo Prisε Ambáámbáa ányábé mbóté álúmed nén áá mólíi, bonj álāŋgē bad bé kóte áá, "Asyáó Dyöb! Mbónj éhéé émpēe déhedeé? Nyé baásyāāl nyēwógé bəəb ngáne ásyáó Dyöb!"

⁶⁶ Dōo ásedteé bó aáken, "Chán nyéwémténé?" Héε békweénténé bán, "Ak-wedé nkáá, atāŋgéné-'ε awé."

⁶⁷ Dōo donje á bad bēbóótédé mó meléed asobted á'sō, bēbōmé-'ε mó. Abíníi-'ε bēbōmé mó mebén,

⁶⁸ bēhóbé-'ε bán, "A-mod awě ahóbé áá móo módē Krīstəə, láá-'ε sé mod awě abōmé wε."

Petro abáá Yesue áyāl

(Mak 14.66-72; Luk 22.56-62; Jón 18.15-18, 25-27)

⁶⁹ Ene pónde Petro andyεé ásē á eyáde é kóte-tê. Hê dōo ngōndéε e mbəlede póg épédé áwē, bonj éhōbē áá, "Wε nén, edé nhóg awě awōŋné'áá Yesue, ane mod awě abídé á mbwóg e Galilia."

⁷⁰ Bonj Petro antánj á'sō wée ábē bad béšyāāl, ákwentén áá, "Meebíi'ε dyam áde éhóbéé."

⁷¹ Ade ámáá ahób nê, antīm á mmwε mé eyáde é kóte. Ahed dōo mbəlede a ngōndéε ampée ányiné mó, bonj álāŋgē bad ábe bēbédé áhed áá, "Anén mod abédé ne Yesue, mod a dyad á Nazaret."

⁷² Bonj Petro antánj ámpē, áhōbē nén áá, "Mmwāg melě nén mée meebíi'ε me ane mod."

⁷³ Eebeméé áte, bad ábe bentyēēm áhed bēmpě wée Petro, bonj bēhōbē nén bán, "Etáa ngēn, edé nhóg awě ahidé'áá ane mod. Mbwéd e ehób echōŋ epanle wε áte, nén ebídé á mbwóg e Galilia."

⁷⁴Dóo Petro ámwākē melš aá, “Dyöb ákógsen me nzé nkale metóm! Meebíí’ é ane mod!” Ade amáá ahób nê hóbén, nchóm-a-kúb antón.

⁷⁵Dóo Petro ákámtné ehób éche Yesue ánlāá’ é mó aá, “Nchóm-a-kúb adéhób aá móto’, wěbān me áyāl ngen éláán.” Dóo Petro ábíde á ebwóg-te, bon abānlē awé. Anchií bwāmbwam.

27

Békééné Yesue wée Payledē

(Mak 15.1; Luk 23.1-2; Jōn 18.28-32)

¹Née bīn é’sánge sánge, beprise bémháá ne bad bémháá bé Israel bésyāal bēmbootéd Yesue ahage ngáne bēwū’ é mó.

²Bēnhan mó, bēbāg-ke mó á mekáá wée Payledē awě kē e alon á Roma ēmbanéé á ákamlan bad bé mbwóg e Judeya á pónde eched.

Kwééd eche Judasē

(Mbe1 1.18-19)

³Ade Judasē, ntúré awě Yesue ányiné nén aá kóte ebage mbakú nén bán bēwū Yesue, ambé ngol ne awusé áde ábélé. Nê dēnkōn, antéd móom mé kábpe méláán nime beprise bémháá ne bad bémháá bé Israel bēmbéé mó, áke átíntéd bó ámbíd.

⁴Anhób aá, “Mbelé mbéb áke mod ntúré awě eébele dyamdyam, awě bēwū-’aá bōb ngēn.” Dóo bétíntanné mó bán, “Cheé séwóó abel ne nê? Nê ánoone wē.”

⁵Née Judasē áwógé nê, ambwémé bó nímé móom mé kábpe méláán ásē wée bēmbēé á Ndáb-e-Dyöb. Née amáá abwém, ambíd áke ápan yāl.

⁶Beprise bémháá bēnlād nímé mōné áte, bēhōbē nén bán, “Mmén mōné nídi mōné mé eben. Né-óó, mbéndé eébageé kunze nén bán déladten nímén mōné ne mōné ní Ndáb-e-Dyöb.”

⁷Ade bémháá ahəgten tēngene nímé mōné, bēntéd mó, bēchānēn etúú éche ébédé etúú é mod nhóg awě atumé’áá mbeé. Bēnchan chó, álime beken.

⁸Nê dóo ákás bon káon ne’ chii, bēchagé échē etúú bán, Etúú é Mekíí.

⁹Nén, dēmbēnléd álóned e’yale ábe nkal é’dāsdān Jeremayaa ánhōbpē aá, “Bétéd móom mé kábpe méláán nime níde nsongé ní mōné nime donge á bad bé Israel bēnkwenénné asábe áwe nló,

¹⁰bēbēnléd áchanen etúú éche ntumé-mbeé. Nén dóo Dyöb dénlāá’ é me aá, ríbel.”

Payledē akáádté Yesue

(Mak 15.2-5; Luk 23.3-5; Jōn 18.33-38)

¹¹Enén pónde-óó Yesue antyéém á nkáásé á’sō wée Payledē awě akámlánnáá mbwóg e Juda. Payledē ansedéd mó aá, “Wée edé kē e bad bé Israel-ε?” Yesue antímtén mó aá, “Ngáne éhóbé.”

¹²Bon áde beprise bémháá ne bad bémháá bé Israel bēnhōbpē mó mam áyāl, enkēnhōbpē dyamdyam.

¹³Né-óó Payledē ansedéd mó aáken, “Weewógéé nímén mam mésyāal nime ábén bad bēhóbéé wē áyāl-ε?”

¹⁴Bon ké nê, Yesue enkēnhōbpé ké eyale, nê-ε dénkōmēd Payledē yāl áte bwāmbwam.

Mbakú e kwééd eche Yesue

(Mak 15.6-15; Luk 23.13-25; Jōn 18.39-19.16)

¹⁵Bōb-póó, mwě téé nzé Ngande e Nnyíme-ámin empě, Payledē ammentén mod a mbwóg nhóg abíde á mbwóg. Ane mod abágé’áá mod ké ahéé awě bad bé dyad bēmpwedté.

¹⁶ Ene pón dé mod a mbwɔg nhóg ambé awě béchágé'áá bán Barabase. Ane mod ambyéén bwâmbwam áyāle e'bébtéd é' mekan ábe ábélé'áá.

¹⁷ Né-ɔ́ áde ndun e mod éládné áte á ndáb wée Paylede, ansedéd bó aá, “Nzé-módé nyéhedeé bán mbíded, Barabase ké'ε Yesue awě béchágéé bán Krístá?”

¹⁸ Ambel nén áyāle ambíi bwám aá prise ambáá ne baámbáá bébágé Yesue áwe mekáá áyāle kónjí embé bó áte.

¹⁹ Ade Paylede ádyéé á atii wée ákáádté'áá bad, mwaád anlómé mó nsəl aá, “Weewóó dyamdyam ábel ne mbakú eche ane mod awě eébele dyamdyam, áyāle nnāngé mó nló nkuu níme rítómé nén níme rítágté me bwâmbwam.”

²⁰ Beprise bémbáá ne bad bémbáá bé Israel bénsəl ábê bad áte nén bán beláa Paylede ábíded dásō Barabase boŋ ábe mbakú nén béwúu Yesue.

²¹ Né-ɔ́, áde Paylede ásédté ábê bad aá, “Áyāle ábén bad bébe, ahéé nyéhedeé bán, mbíded?” Bó moosyáál bēnkwentén bán, “Barabase!”

²² Dóo Paylede ásedtéé bó ámpē aá, “Chán-nō nyéhedeé bɔɔb bán mbel ne Yesue awě béchágéé bán Krístá?” Dóo békwentanné bán, “Bébome mó á awɔg!”

²³ Héε Paylede ásedtéé bó ámpē aá, “Áyāle chán? Ebébtéd éhéé ábélé?” Boŋ bēnnabé abón bán, “Bomé mó á awɔg.”

²⁴ Ade Paylede ányíné aá móshēlēē se móshēlén ábê bad mewēmtēn tāngene mbakú eche Yesue, ábán nén aá, ábê bad béepεene' mpuuté, dóo átédé mendib boŋ áwobpé mekáá áwab e'só, áhōbē-'ε aá, “Mekáá mésáá me áyāle kwééd eche anén mod. Nê ánɔne nyé bēn.”

²⁵ Héε ene ndun e mod ékwentanné bán, “Sēkwěnténé. Mmē mekií mébê áwéd nló, nchoo ne nímēd nchyaátén!”

²⁶ Né-ɔ́, Paylede ambídtéd bó Barabase. Ambě kunze aá, sánze ébɔm Yesue, boŋ béke bébome-'ε mó á awɔg.

*Sánze éwélé Yesue
(Mak 15.16-20; Jón 19.2-3)*

²⁷ Sánze éche Paylede éntéd Yesue, ékéēn mó á eyáde é nkamlene, belād-te baáb ábíníi bésyāāl áte áhed.

²⁸ Bēnhūd mó mbóté áyāl, béhé mó mengombe níme rí'yáge' níme ríwágné mengombe mé kâŋ.

²⁹ Béntéd ngen é mechă, belóó mó ekóté éche émbē néε ekóté é kâŋ, béhé mó chó á nló. Bēnhē mó ntón á ekáá é mbáá te, bébwɔgkē-'ε mó mebóbón áwél mó. Béhóbé'áá nén bán, “Edúbé ébê ne wε, a-kâŋ e bad bé Israel!”

³⁰ Dóo bébóótédé mó meléed asob á yəl, boŋ bétédē nímē ntón, bébɔmé mó á nló.

³¹ Ade bémáá mó awel, bēnhūd mó nímē mengombe á yəl, bétímēd éche mbóté. Néε bémádé nê, bēnkéén mó áke dé ábome mó á awɔg.

*Bébómmé Yesue á awɔg
(Mak 15.21-32; Luk 23.26-43; Jón 19.17-27)*

³² Ade békagké nê, néε échē sánze ébídnē Yesue á dyad-tê, dóo bébómmé mod awě ambíd á dyad á Sirine awě béchágé'áá bán Simɔne. Héε békóbé mó, boŋ bepēmtē mó awɔg áde Yesue bán áhídne mó dó ambíd.

³³ Dóo bepédé hōm áde béchágé'áá bán, Golgota, awě adé nén bán, “Hōm dé Ebóngél é Nló.”

³⁴ Áhed, bēmbě Yesue mīm nímē béhéde achəchə áte. Boŋ áde áwógléné mó á nsəl, enkēnkwenténné amwé.

³⁵ Ade bémáá mó abome á awɔg bēnsíd mbambú ákab éche mbóté.

³⁶ Néε bémáá mó mbóté akab, bēndyéé áhed ánɔn mó.

³⁷ Bêntël echë nzòm e kwééd á abámbé nén bán, “Yesue móo nén, kâh e bad bé Israel.” Bêntéd ádé abámbé, bébōmē áwe nló-mín.

³⁸ Bêmbomé bechíb bébe á awəg nchoo ne Yesue, nhóg á pəd e ekáá émbáá, aníní-’ε á pəd e ekáá é emwəd.

³⁹ Bad ábe bétómé’áá nzii benben ne áhed bébómé’áá nló bébwēmme-’ε mó nzyāh

⁴⁰ bán, “Wenhób wεé móōbōōtéd Ndáb-e-Dyōb, wεé málōh-’ε chó ámpē átínté e e’pun é’láán. Nzé wε-εé edé Mwān a Dyōb, sōh echoh yāl, ésud ásē á awəg hê.”

⁴¹ Beprise bémbáá, bemeléede bé mbéndé ne bad bémbáá bé Israel bómpē béwélé’áá mó, béhōbē bán,

⁴² “Achōhté’áá bad, bōob eéheléé yāl awōhgen. Nzé ne mbále môdé kâh e alon á Israel, ásud-tóó á awəg hê bōob. Hê dōó sédūbēē bán môdé Ane-awē-Béwógté.

⁴³ Adúbpé áá Dyōb ádé ne mó, áá módē-’ε Mwān a Dyōb. Ahá! Dyōb áwōhgen-nóó mó bōob dényín.”

⁴⁴ Kááh ne bechíb ábe bêmboméé á awəg nchoo ne Yesue bómpē bésyáá’áá Yesue.

Yesue awéde

(Mak 15.33-41; Luk 23.44-49; Jōn 19.28-30)

⁴⁵ Ade bin é’pédé kəd, ehíntén ênkwě hōm ásyāal kááh ne ngāh éláán.

⁴⁶ Dōó Yesue álébpé esaád áá, “Elí, Elí, lámá sábatāni,” awě adé nén bán, “A-Dyōb ádēm, a-Dyōb ádēm, chee ékáá bon étédte me?”

⁴⁷ Néé donge á bad ábe bémbē benben béwógté nê, bénhōb bán, “Achênle Elaijaa áá áhye áwōhgen mó.”

⁴⁸ Abwəg-ábwəg bó mod nhóg annyəgéd, antéd kuchá, ásōm á ntón, átōdē á ebéntéd é mīm tē, bon áhāg mó á nsəl áá ámwê.

⁴⁹ Abíní-’ε béhōbē nén bán, “Nyémwε, dényín nzé Elaijaa áhye mó awōhgen.”

⁵⁰ Hê dōó Yesue álébpé esaád ámpē bon ámyě-’ε nlém.

⁵¹ Ene pónde chēn abad ádé dēnkāb Ndáb-e-Dyōb áte, dēnsalé áte e’pəd é’be bootya ámín kááh ne ásē. Ndōob ennəhned, meláá mésanlé áte,

⁵² son énednad. Ekud é bad bé Dyōb ábe bēmmad awé bēmpuú,

⁵³ bébíd á son-tē. Ambíd e pónde áde Yesue ámáá apuu, bēnkě á dyad tē á Jerusalem. A dyad tē wê, ekud é bad ényín bó.

⁵⁴ Néé mod ambáá a sánze ne sánze éche énoné’áá Yesue bényíné néé ndōob énáhnedé, bényín-ne mekan mésyāal níme mébénlédé, mbwóg ménkōb bó bwámbwam, béhōbē-’ε nén bán, “Ne mbále, anén mod abédéé Mwān a Dyōb.”

⁵⁵ Ekud é bebaád éche êmbootéd Yesue ahíd ambíd se á Galilia, béwōhgan-ne mó, béntyēm etūn, bēnōné mekan mésyāal níme mébenlad.

⁵⁶ Atínté e ábē bebaád, Maria Magdalene, Maria awé abédé nyaá awě Jemse bó Joseb, ne nyaá awě bán ábe Zεbediε bémbē áhed.

Níme níme Yesue

(Mak 15.42-47; Luk 23.50-56; Jōn 19.38-42)

⁵⁷ Néé ngukél épédé, nhōn ní mod nhóg níme béchógé’áá bán Josebe mēmpě. Ane mod abédéé mod a dyad á Arimatia. Mómpē abédé nhóg awě ahídé-’áá Yesue.

⁵⁸ Ankě wεε Payledε áá ábe mó kunze átéd ndim níme Yesue. Payledε ambě kunze nén áá bébe mó ndim níme Yesue.

⁵⁹ Josebe antéd ndim níme Yesue, ákān mó mbóm e ekóólé,

⁶⁰ alímé mó á son eche bépwógé á eláá-tē. Ene son ebédé-’ε son e ekóólé eché Josebe mwēn ánwōhgē. Ambíd e nê, antínéd aláá ámbáá akólen nsəl ní son, ákē-’ε mó.

⁶¹ Maria Magdalene ne Maria awě anchyáá Jemse bó Joseb, bēnlyǎg bēdyēē á nkæg ní soŋ.

*Payledε alomé sǎnze
ânɔn soŋ eche Yesue*

⁶² Née bīn é'sǎngé, nê démbē á Mbwe-mé-nkóme-áte, beprise bēmbáá ne Befarisia bēnladén, béke bényín Payledε,

⁶³ bēlāngē mó nén bán, “A-sǎŋ, sékamtan nén bán ádě nkal a metóme ne ábédé ámīn, anhób aá móṣpuú ámbíd e e'pun é'láán.

⁶⁴ Né-ǎǎ tóméd akale nén, wéé bēnɔne' echē soŋ bwām, kǎŋ ne e'pun é'láán ábel nén boŋ ábē bembapεε béehélé mímē ndim achíb se bēlāngē bad bán apuúdé. Né nén débē metóm míme ríchábé ámīn tómaa míme ásébpé akal.”

⁶⁵ Dóo Payledε álāngéé bó aá, “Nyétéd sǎnze ânɔn soŋ bwām, ábel nén dyamdyam débenlád.”

⁶⁶ Héé békíí, boŋ bēhāg e'chem á aláá ádě démbē á nsəl ní soŋ, ábel nén bēbíi nzé mod anědté, bētédē-ε sǎnze áhed ábel boŋ bēéchībē' Yesue ndim.

28

*Yesue apuúdé
(Mak 16.1-10; Luk 24.1-12; Jɔn 20.1-10)*

¹ Ámbíd e mbwe-mé-nkóme-áte, á epun é'sǎ é sǎndé,* epǎg é mbwεmbwe, Maria Magdalene ne Maria awě anchyáá Jemse bó Joseb, bēnkě soŋ eche Yesue anɔn.

² Esám-éēkōmtēnē, ndɔɔb ennəŋnéd, ángel e Dyöb ebíd ámīn épe. Entínéd áde aláá ádě démbē á nsəl ní soŋ, édíí-ε dó ámīn.

³ E'sǎ é'péné'áá ene ángel áte née emwεdmwεd, mbóté-ε épübē mó féréd.

⁴ Mbwóg ménkōb sǎnze éche énoné'áá ene soŋ. Nê dēnkǎŋ bēnnəŋnéd, békwe ásē, bēbé née ndim mí bad.

⁵ Héé ángel élāngéé ábē bebaád aá, “Nyéebáá'. Mbíí méé Yesue awě bēmboméé á awǎg móo nyéhyédé anɔn.

⁶ Eésáá hén. Apuúdé ngáne ánlāá' é nyé aá ébenléd. Nyéhye nyénɔn wéé bēnnaádté mó.

⁷ Nyékag-kǎǎ mehélé bɔɔb, nyéláa ábē bembapεε bán, apuúdé, amaá-ε ake á'sǎ á Galilia, áwed-taá bényīnē mó. Nyéēchatán dyam áde rílāngé nyé.”

⁸ Né-ǎǎ, bēnhidnéd mehélé áhed, ké née bēbédé mbwóg, menyīŋge mémbe bó áte. Bēnnyǎgéd áke déláa bembapεε ábe Yesue dyam áde ábenlédé.

⁹ Ade ábē bebaád békagké nê, dóo Yesue átáné bó taléd, boŋ áhōbē aá, “Nlěnté nyé.” Bēmpě áwē, békóbén mó á mekuu ábe mó edúbé.

¹⁰ Héé Yesue álāngéé bó aá, “Nyéebáá'. Nyéke nyéláa ábēm bembapεε ábe bédé née ábēm baányan nén bán, békag á Galilia. Awed dóo bényīnē me.”

Sǎnze éhóbé dyam áde ábenlédé

¹¹ Ngáne ábē bebaád békagké aláa bembapεε ábe Yesue dyam áde ábenlédé, donge á sǎnze áde ánoné'áá soŋ eche Yesue dēnkě á dyad-té áke dé aláa beprise bēmbáá chǎm ésyāāl éche ébenlédé áde ángel épédé.

¹² Beprise bēmbáá ne bad bēmbáá bé Israel bēmbǎm átii ngáne bēbenlé. Née bémáá atii, bēmbě échē sǎnze nsoŋgé mí mǎné míme ríchábé ámīn.

¹³ Běláá-ε bó bán bēhōb bán, “Yesue ábē bembapεε bēnhye mó ndim achíb nkúu áde nyékúnéé.

¹⁴ Nzé Payledε awógé, né séēbēl adúbé nén aá awusé déesaá ádēn. Nê débēl nyéesónlé á ndutul-té.”

* 28:1 Nédé á Sǎndé.

¹⁵ Né-ᵛó éche sánze ênkõb mímê mᵛoné, bébēl-le ngáne bénlāā'é bó. Kááᵛ ne' chii, bad bé Israel bédii békale nímê nkalan.

Yesuε apidé ábē bembapεε

(Mak 16.14-18; Luk 24.36-49; Jon 20.19-23; Mbēl 1.6-8)

¹⁶ Bᵛᵛb-pᵛᵛ, bembapεε dyõm-ne-nhóg ábe Yesuε bēnkě á ekone-mín á Galilia wéε ánlēbēē aá békε.

¹⁷ Anyín ádě bényíné mó, bēmbε mó edúbé, kénée bó donge á bad bēnkēnkongé adúbe nén bán Yesuε mwēn-εé akõᵛté abé.

¹⁸ Héε Yesuε ásidté bó benben, bon álāᵛgē bó aá, “Kunze esyᵛál ebāgnédé me, ádyõb ne á nkõᵛ nísé.

¹⁹ Nyékag melon mé nkõᵛsé mésyāāl, nyébele bad ábēm bembapεε. Nyédusan-ne bó á ᵛᵛn ádě Titée, á ᵛᵛn á Mwān ne á ᵛᵛn dé Edᵛᵛdᵛᵛn éche Esáá.

²⁰ Nyéyágte-'ε bó áhíd mekan mésyāāl níme nísógténé nyé. Nyébii nén bán mēbē-'ε ne nyé kááᵛ ne á asóg dé nkõᵛsé.”

Nkalanŋ mí bwâm míme Yesuε ngáne

Makose átélé

Ndibned ní kálag

Nkalanŋ mí bwâm ngáne Makose átélé ríhóbe t̄ngene Yesu Kr̄stəə, Mwǎn a Dyöb. Nlúmté Yesuε ngáne mod awě abele mekan, awón-’ε kunze ábel míme mekan. Ene kunze enyínnédé áyāl e mekan míme áyágté’áá ne míme ábélé’áá. Yesuε ahóbé aá móḡ módē Mwǎn-a-Moonyon awě ampě, ábe ádē alongé, ábel bon bad békud alagsen dé mbéb.

Á kálag tē wén, Makose ábídté mekan áwed míme Yesuε ábélé’áá tómaa míme áhóbé’áá ne míme áyágté’áá. Ahóbe ngáne Jone áhángé epe éche Yesuε, ahób t̄ngene edusen éche Yesuε, ahób-pe mekagsen míme Yesuε ánkudté. Asóged, alúmté áte ngáne bēmboméé Yesuε á awog ne ngáne ámpuú’é. Nyaa édé ébe éche enén kálag ésógé, élúmté-’ε nén bán saké Makose atelé chó.

Nkabtéd ní kálag

Mbooted mé nkalanŋ mí bwâm 1.1-13

Nsón míme Yesuε á Galilia 1.14-9.50

Nsón míme Yesuε áde áhídté a Galilia ápe á Jerusalem 10.1-52

E’pun bé asóg ábe Yesuε á Jerusalem ne benben ne Jerusalem 11-13

Akáad áde békáádté Yesuε ne kwééd eche áwédé 14-15

Mpuu míme Yesuε 16.1-8

Alúmed áde Sǎngwéé álúmté yǎl ámbíd e mpuu ne mpume míme 16.9-20

Ehángé éche Jone, Ndusenε

(Mat 3.1-12; Luk 3.1-18; Jon 1.19-28)

¹ Nkalanŋ mí bwâm míme Yesu Kr̄stəə Mwǎn a Dyöb mômén.

² Mbóótédé ngáne nkal é’dəádəŋ Yesayaa ántenlé aá,

“Dyöb ahóbé aá,

‘Nóné’, nlóme mímem mésénze míme mésēbē we á’sō,
ábonŋsen we nzii.’

³ Móbelé’ ehángé á ehyánge nén,

‘Nyébonŋsen epe éche Sǎngwéé. Nyétii echě nzii.’ ”

⁴ Né-óḡ Jone ampě á ehyánge, ádusén bad, ákalé-’ε eyale é Dyöb aá, “Nyétede ábel dé mbéb, nyékud edusen ábel bon Dyöb álagsen nyé mbéb.”

⁵ Bad bēbídé’áá á mbwóg e Judeya esyáál ne á dyad á Jerusalem, békag áwē áwóglen mó. Néε bēmpaléé mímb mbéb áte Jone ádusén bó á edíb é Jodan.

⁶ Jone ahágé’áá mbóté éche bēbénlé nyon éche ébídé á yǎl e kamêl.* Awáá’áá ngáá a ngob e nyam. E’chuu ne bengóméé bóó ádyágé’áá.

⁷ Ahánté’áá aá, “Mod ápě ámbíd echēm awě atómé me. Meékwognedéé ké ábwaam ásē áhune míme nkəod mé metámbe.

⁸ Ndusan nyé ne mendíb, bon ádusén nyé ne Edəádəŋ éche Esáá.”

Yesuε akudé edusen ne mekagsen

(Mat 3.13-4.11; Luk 3.21-22, 4.1-13)

⁹ Mmē mesú Yesuε ámbíd á dyad á Nazaret á mbwóg e Galilia ápe wée Jone. Jone andusén mó a edíb é Jodan.

¹⁰ Ade Yesuε ábídeé á edíb-te dōó ányíné néε ngob e dyöb énednadté. Edəádəŋ é Dyöb émbíd ádyöb, ésud mó á nló mín néε élāā.

* **1:6** Bēbénládtáá nyon é nyam eche bēchəgéé bán Kamêl ábel mbóté. Mbóté éched éébáge’áá kunze é mbóté.

11 Hée ehób ébídée ádyōb nén, “Edíi awem mwän a nlém awě rídáá bwámbwam. Ndé menyinge ne we.”

12 Abwōg-ábwōg échē Edáádəŋ ênkid Yesue á ehyánge.

13 Andyée áwed móom mé e’pun méniin, Satanε ákəgé mó. Nyam échē ékaa’ ébédé áwed, ángel-le éwōŋgān mó.

Yesue apwədə bembapεε bé’sō

(Mat 4.12-22; Luk 4.14-15, 5.1-11)

14 Ambíd e pónde bénhē Jōne á mbwōg. Ade bémáá mó ahé á mbwōg, Yesue ampě á mbwōg e Galilia ákalé nkalaŋ ní bwām ní Dyōb, áhōbē nén,

15 “Pónde epedé, nkamlen ní Dyōb rídé benben. Nyé mod téé áhəŋlən ádē abé dé mbéb, nyédúbe-’ε nkalaŋ ní bwām.”

16 Ade Yesue ábamméé nkin mé edib-é-nzab é Galilia annyín Simōne bó mwānyan Andreya, née bébwéméé mbínzé. Bébédéε bekób-bé-súu.

17 Hée Yesue álāŋgeé bó aá, “Nyéhíde me. Ngáne nyékóbeé súu bəəb, meéyāgēd nyé ngáne nyétēdtē bad nlém á abum áhíd me.”

18 Abwōg-ábwōg bēntédé échab mbínzé, béhídē-’ε mó.

19 Née ákíí mwá etún, annyín bán ábe Zebediε, Jemse bó mwānyan Jōne á bǎle-tē née bébwéméé mbínzé.

20 Anyín ádē ányíneé bó, anchélé bó. Bēntédé echab sán Zebediε ne bad bé nsón á bǎle-tē béhídē Yesue.

Yesue abídté mod edáádəŋ é mbéb áte

(Luk 4.31-37)

21 Yesue ne ábē bembapεε béniin bēnkě á dyad á Kapenahum. Adě mbwε-mé-nkóme-áte nípedé, Yesue ankě asól á ndáb e mekáne, ábootéd bad ayáged.

22 Nyaa eche áyágté’áá enkóméd bad yǎl áte bwámbwam áyāle ayágté’áá née mod awě nzé ahóbé né émáá. Eeyágté’áá nēŋgáne bemeléede bé mbéndé.

23 Hée mod nhóg awě edáádəŋ é mbéb émbēε áte ápédé tǎléd, ábōnē aá,

24 “A-Yesu, mod a Nazaret, cheé syánē déwōŋné? Ehyedé sé awúu-yε? Mbíi we bwām. Edíi mod awě Dyōb álómé, awě asáá.”

25 Hée Yesue ákānnéé échē edáádəŋ é mbéb áte aá, “Lám, bíd ane mod áte!”

26 Dóó échē edáádəŋ é mbéb éságté ane mod áte ngíne-ngíne, éhé-’ε esaád é ngíne, boŋ ébíd-tε mó áte.

27 Menyáké ménkōb ábē bad bwámbwam. Bésēdté nhóg ne aníníí bánken, “Nzé-dyámé dén! Ayáged dékǎǎlē dén-ε? Anén mod awóó ngíne ákamlen e’dáádəŋ bé mbéb, é’wōgnē-’ε mó!”

28 Nén dēmbēl nkalaŋ míme Yesue mēnkanléd mbwōg e Galilia esyáál.

Yesue achōŋtē ekud é bad

(Mat 8.14-17; Luk 4.38-41)

29 Née béhídté á ndáb e mekáne hidtén, Yesue nchoo ne Jemse bó Jōn bēnkě á ndáb eche Simōne bó Andreya.

30 Simōne mwaád nyaá ambé á anəŋ dé nkole, ahéb dēnsog mó. Ade Yesue ápédé pēén, bēnlāá mó tēŋgene nkole míme ane mmwaád.

31 Dóó ákíí wée ane mmwaád ábédé, boŋ áchəŋgē mó á ekáá, awōŋgén mó ásyā áse. Ahéb dēmmaá mó, ákōb-pε bó nken.

32 Ene ngukél áde enyεn émáá asud, bad bēmpεén bad bé nkole bésyāál ne bad bésyāál ábe e’dáádəŋ bé mbéb bēmbēε áte wée Yesue.

33 Bad bé dyad bésyāál bēnkaŋnén mmwε ndáb míme Simōne.

34 Yesue anchoód bad híin ábe békónlé’áá nkole nyaa ne nyaa, abíded-tε bad e’dáádəŋ bé mbéb híin áte. Eémwage’áá pεn aá ábē e’dáádəŋ bé mbéb é’hōb dyamdyam áyāle bēmbíi mod awě ádíí.

*Yesue akalé nkalanj mí bwâm á Galilia
(Luk 4.42-44)*

³⁵ Epəg é mbwembwε áde b̄in béēkēnlēē, Yesue anhidé ásē, áhīdē á dyad-tē, áke á ahāngé á hōm, ákāne’.

³⁶ Simōne ne bad ábe bóbō bēmbē, bēmbootéd Yesue ahead.

³⁷ Bédíbté-’aá mós, dós bēlāngéé mós bán, “Moosyáál aheade wε!”

³⁸ Yesue anláá bós aá, “Dékag hōm démpēe. Dékag á myad míme rídé benben ábel bonj ríkal nkalanj mí bwâm áwed ámpē, áyāle míme nkalanj mós ríkáá bonj n̄pē á nkōnsé.”

³⁹ Né-ós, ankē mbwóg e Galilia esyáál, akalé nkalanj mí bwâm á ndáb é mekáne, ábīdtē-’ε bad e’dáádənj bé mbéb áte.

*Yesue achōjté mod awē melənj mékóbé
(Mat 8.1-4; Luk 5.12-16)*

⁴⁰ Mod nhóg awē melənj mékóbé ampē wēε Yesue, abwóg mebóbónj, áchāā mós aá áwōngən mós. Anhób aá, “Nzé edáá ehēle ébēl me nsánj.”

⁴¹ Ngəl enkonned Yesue. Dós ábīdté ekáá, ábānē mós á yāl, bonj álāngē mós aá, “Ndáá, sánj!”

⁴² Abwōg-ábwōg míme melənj mēmmaá ane mod á yāl, áchōnj-’ε.

⁴³ Yesue anláá mós aá ákag, asím-me mós etúu áte aá,

⁴⁴ “Nōné’, weelāngé modmod dyam áde ábēnlédé, bonj kē élúmed yāl wēε prise, ásimen wε. Ebag-ke mende ngáne mbéndé e Mosεε éhedeé, álúmed bad wēé mósāā.”

⁴⁵ Bonj ké nē, áde ane mod abídé, ankē, áke akalé mós míme nkalanj hōm ásyāāl. Ankal mós bwāmbwam nyaa eche Yesue éhēle’áá dyad ké ahóg asól ámpē á ntálé. Antím ádyéé’ á mehāngé wēε bad béesaá. Ké nē, bad bēbīdē’ mebwóg mésyāāl béhyāg áwē.

2

*Yesue achōjté mod awē awédé eped
(Mat 9.1-8; Luk 5.17-26)*

¹ Néε nguse é e’pun étómé, Yesue ansú ámbid á Kapenahum. Bad bēnwōg bán ahúú.

² Ekud é bad énkūmēn áwe ndáb nyaa echē etál éēbēdeé á ndáb-te, ké á mmwε. Yesue akānlé’áá bós eyale é Dyōb.

³ Héε dós bad bēniin bēpééné mod awē awédé eped.

⁴ Bonj ngáne ndun e mod émbēē áhed, bēnkēnhēnlé mós apεen wēε Yesue ábédé. Né-ós, bēnchāgē á ndáb mín, bēnēdē nnənj ní ndáb á nló mín wēε Yesue ántyēmmē. Áde bémáá nnənj anede, bēnsudtén ane mod ebúm éche ánaá’ é ámín wēε Yesue ámbēē.

⁵ Áde Yesue ányíne adúbe áde ábe bad bēwóó áte anláá ane mod awē awédé eped aá, “A-mwān, nlāgséné wε mbéb.” ⁶ Donje dé bemeléde bé mbéndé ábe bēndyéé ásē áhed bēmbootéd anyoo áte á nlēm-té bán,

⁷ “Chán anén mod áhēlé se áhōbē’ enén ndín e akan? Asyáá Dyōb. Nzéé ahēlese álagsén mbéb ésebán Dyōb démpen?”

⁸ Abwōg-ábwōg Yesue anchēm bós mewēmten. Héε ásedtéé bós aáken, “Cheé ékáá bonj nyéwōō’ enén ndín e mewēmten?”

⁹ Ahéé áde dyam ásad, naa áhób wεé ‘Nlagséné wε mbéb,’ káa áhób wεé, ‘Syáá ásē, étéd échōnj ebúm ébootéd áke?’

¹⁰ Bonj, mēlūmēd nyé nén mēé Mwān-a-Moonyonj awóó kunze á nkōnsé álagsen mbéb.” Dós álāngéé ane mod awē awédé eped aá,

¹¹ “Nlānge wε nén, syáá ásē, étéd échōnj ebúm, ésúé’ á ndáb.”

¹² Hê dën wée moosyáál ánənée mó nê, ane mod anhidé ásē, atéd éche ebúm ábootéd-te akε. Yál enkóm bó áte bwámbwam, békēnē Dyōb, béhōbē bán, “Séēnyīnēē sé enén ndín e dyam mbéd!”

Yesue achénlé Leviε
(Mat 9.9-13; Luk 5.27-32)

¹³ Ambíd e nê, Yesue antīm ámbíd ámpē á nkin mé edib-é-nzab é Galilia. Ndun e mod empě áwē, ábootéd-te bó ayáged.

¹⁴ Ade átóméé á nzii, annyín nlad-é-tááε nhóg awě béchágé’áá bán Leviε, mwān awě Alpasεε. Leviε andyεé ásē á ndáb echě ákóbé’áá tááε áte. Héε Yesue álângeé mó aá, “Hídé με.” Dóo Leviε átyéémé ámīn boŋ áhīdē-’ε mó.

¹⁵ Ambíd e pónde Yesue adyágé’áá ndyééd á ndáb wée Leviε. Ekud é besaad bé tááε ne bad bé mbéb bémpeε béhídé’áá mó. Bóbōō bēndyεé á tébele ne ábē bembapεε.

¹⁶ Ade donge dé bemeléede bé mbéndé ábe bébédé Befarisia bényíné Yesue ádyāg ndyééd ne ábē bad bé mbéb, ne besaad bé tááε, dóo bésεdteé ábē bembapεε bánken, “Cheé ékásá boŋ ádyāg ndyééd ne échē ndín é bad?”

¹⁷ Ade Yesue áwógé nê, anláá bó aá, “Bad ábe bédyéé bwām béētógnεnεé mod-a-bwεl. Bad ábe békōnle’ bóō bétógnénε mod-a-bwεl. Meépedεé á nkōŋsé áchéle bad ábe békóbnédé á’sō é’ Dyōb, boŋ mpedé áyāle bad bé mbéb.”

Nsεdtéd tâŋgene adid á yāl
nzaa á mekáne-tê
(Mat 9.14-17; Luk 5.33-39)

¹⁸ Pónde póg ebédé, bembapεε ábe Jōne, Ndusεne ne Befarisia bēndīd yāl nzaa á mekáne-tê. Dóo bad behóg bépédé wée Yesue boŋ bésεdte mó bánken, “Cheé ékásá boŋ bembapεε ábe Jōne, Ndusεne ne ábe Befarisia bédidé yāl nzaa á mekáne-tê boŋ ábōŋ pen béedidé?”

¹⁹ Yesue ankwentén bó ne ngan aá, “Chán bad ábe belébpé á ngande e’wóngé, béhele bédidé yāl nzaa á mekáne-tê áde mod awě akude sómbé ádíi adé ne bó? Béedidéé, béētâŋgenεé yāl nzaa adid á mekáne-tê pónde echě mod awě akude sómbé ádíi ne bó.

²⁰ Boŋ epun épě éche békobénné bó mod awě akude sómbé. Echē epun dóo bédidté yāl nzaa á mekáne-tê.

²¹ Nyébíí nén bán nzé mod anabpe’ mbóté, eetédéé epεd é abad ékōōlē se ábnéd nchun mí mbóté. Ayāle nzé échē epεd é abad ébóótédé abób áte ébelé éhabnéd abad dé nchun. Nê ábele’, échē epōn ékale’ áte tómaa ngáne énsēbēē abé.

²² Melemlem nēŋgáne mod éētédēē mīm mékōōlē se ahé mó á nchun mé ntyág,* se ápen. Ayāle nzé abelé nê, né mīm méhōd kóŋ ntyág rýéd, mīm mémād asyoge ntyág-ke ámpē mbéb. Boŋ bétédεé mīm mékōōlē, béhé á ntyág mékōōlē-te.”

Nsεdtéd tâŋgene
Mbwε-mé-nkóme-áte
(Mat 12.1-8; Luk 6.1-5)

²³ Mbwε-mé-nkóme-áte nhóg Yesue atómé’áá á nzag e ngun-tê. Ambé ne ábē bembapεε. Ade békagké nê, dóo ábē bembapεε bébóótédé e’sóg é’ ngun apád.

²⁴ Héε Befarisia bélângeé Yesue bán, “Nōné’, cheé ékásá boŋ ábōŋ bembapεε bébele dyam áde mbéndé éebagéé kunze ábel á mbwε-mé-nkóme-áte?”

²⁵ Yesue antimtén bó aá, “Nédē nyéelāā’ é mbéd á kálag e Dyōb dyam ádē kōŋ Dabidε ámbenlé ádē bétógé chōm éche bédyágkē ne ádē nzaa ékóbé mó ne ábē bad-ε?”

* 2:22 Ntyág mīm bébénlé ngob e nyam móó bébénládtáá pónde eched.

²⁶ Ansól á Ndáb-e-Dyöb á pónδέ echë Abyataa ábédé prisε ambáámbáa. Andyé e'wεle ábe é'bédé ndε e Dyöb. Bon echεd mbéndé eébagεé mod ké nhóg kunze ádyε ábê e'wεle étōmεé Prisε. Mwën andyé ábē-'ε kááηne bad ábe bēnwoón mó donge."

²⁷ Dóo Yesuε ásógtεé aá, "Dyöb dénsēbē moonyon ahag, bon átīdē epun éche békōmmēé áte. Enkēnsébéé epun atīi bon áhagé moonyon aá ákōmme áte éché epun.

²⁸ Né-ᵛó, Mwān-a-Moonyon awóó nkamlen kááηne ámīn e mbwε-mé-nkóme-áte."

3

Yesuε achōjté mod awě ekáá éwédé

(Mat 12.9-14; Luk 6.6-11)

¹ Héε Yesuε átīmé ámbīd á ndáb e mekáne. Mod abédé áhed awě ekáá éwédé.

² Bad behóg ábe bēbédé áhed bēhédé'áá Yesuε awusé akóben. Né-ᵛó bēnóné'áá Yesuε chodchod, ányīn nzé áđīd ane mod bwām á mbwε-mé-nkóme-áte.

³ Héε Yesuε álāngεé ane mod aá, "Hyě étyéem á'sō hén!"

⁴ Dóo Yesuε áseđtεé ábê bad aáken, "Nyéláa me ké édé mbéndé ábel mbon á mbwε-mé-nkóme-áte, káa ábel mbéb. Edé mbéndé áson alongé á mod, káa áwúu mó?" Bon bēnkēnhóbpε dyamyam.

⁵ Anwóg ndutul á nlém-tē bwāmbwam áyāle ábāb e'lεl bé nlém á abum. Héε ánóné bó ne melīngá, bon álāngē ane mod aá, "Sálé ekáá áte." Asále áde ane mod ásánlé ekáá áte, ekáá éndyεé mó bwām ámpē.

⁶ Héε Befarisia bēbídé á ndáb e mekáne, bon békē bētānē bad bé epepé éche Herōde, ábwōg-ábwōg bóbōó bēhəgké Yesuε áwúu mó.

Ndun e mod ehídé Yesuε á edīb é Galilia

⁷ Yesuε ne ábē bembapεε bēnhidé békē á edīb é Galilia. Ndun e mod enhíd mó áwed. Abē bad bēmbīd á mbwóg e Galilia, á Judeya,

⁸ á Jerusalem, á mbwóg e Idumeya, á mbwóg echë edé échíníí epεd é Jodan, ne á myad míme médé bēnbēn ne myad mémháá mé Tirε ne Sidōn. Abén bad bépágé'áá wéε Yesuε áyāle bēnwōg mam míme ábélé'áá.

⁹ Bad bēmbuú áte nyaa echë echabé ámīn. Né-ᵛó, Yesuε anláá ábē bembapεε aá bébonjεn bōle ábel bon bad béekāηnán mó.

¹⁰ Ammād ekud é bad ahood, né-ᵛó bad bésyāēl bēmpēe ábe békónlé'áá bēbuné apε wéε ádíí, ásitεn mó ábel bon bédyεε bwām.

¹¹ Pónδέ téé echë e'dáédəη bé mbéb ábe é'bédé bad áte bényīnnē mó, é'bélé'áá bad ábe é'díí áte bēhūnē ásē, é'bōnē-'ε bán, "Wε-εé edé Mwān a Dyöb!"

¹² Yesuε ansím bó etúu áte aá bēlāngē bad nyaa e mod eche módíí.

Yesuε apwédé bembapεε dyōm ne bébe

(Mat 10.1-4; Luk 6.12-16)

¹³ Héε Yesuε áchágké á ekone mín, áchēnlē bad ábe áhédé'áá, bon bépäg áwē.

¹⁴ Dóo ápwédé bad dyōm ne bébe ábē ne mó, áchagé bó aá bembapεε bé nlómag ábe álōmmē-'ε ákal eyale é Dyöb.

¹⁵ Ambäg-ke bó ngīne ábided bad e'dáédəη bé mbéb áte.

16 Abê bad dyôm ne bébe bébedé: Simone awe Yesue ânchuu'ê mbəŋ aá Petro;

17 Jemse bó mwănyan Jone, bân ábe Zebedie, (ábe Yesue ânchuu'ê mbəŋ aá Bwanegese, awě adé bân, Bân bé ngin.)

18 Andreya bó Filibe, Batolomyo, Matyo, Tomase, Jemse mwăn awě Alfose, Tadiose, Simone awě ambé á epepé é kán e alon,

19 ne Judas Iskariode awě antim Yesue asóm.

Béchagé Yesue bân Belzebule

(Mat 12.22-32; Luk 11.14-23, 12.10)

20 Héé Yesue átíme á dyad. Ekud é bad ênkaán ámpē nyaa echě Yesue ne ábē bembapē bēnkēnwóngé pōndé ádyé ndyééd.

21 Ade Yesue baányan béwógé nê, bēnkě mó ahed, átéd mó áswên mó á ndáb áyāle bad béhóbé'áá nén bân, “Nló méésáa'ê mó áte.”

22 Donge dé bemeléede bé mbéndé ábe bēmbīd á Jerusalem béhóbé'áá bân, “Belzebule adé mó áte. Ene kâŋ e e'dəádəŋ bé mbéb chō ebagé mó ngine ábíded bad e'dəádəŋ bé mbéb áte.”

23 Héé Yesue áchénlé bó boŋ akanlé bó ngan aáken, “Chán Satane áhēle se abíded Satane?”

24 Nzé bad bé alon ahóg békábné áte, boŋ nchemtén méesě, áde alon déehelé atyéem.

25 Nzé abum á ndáb-pe ákábné áte, boŋ nchemtén méesě, áde abum á ndáb déehelé atyéem.

26 Né-óó, nzé nkamlen ní Satan níkábné áte, boŋ bēn ne bēn bēwane, míme nkamlen méebemmé, mékwě, mīpē-’ε ásōg.

27 Né dōo mod eéhēlē se asól á ndáb e ngine-e-mod se ádūm ábē bwēm ésebán asébpé mó ahan. Amaa-’áa mó ahan, boŋ atéd ábē bwēm é’syāāl.

28 Ne mbále nlāŋge nyé nén mēé Dyōb délagsén bân bé baányon mbéb nisyāāl míme bébéle káŋne nzyāŋ ké ehéé echě bēbídté á nsəl.

29 Boŋ kénzée awě ahóbé e'bébtéd é' mekan tāŋgene Edəádəŋ éche Esáá, éekudté alagsen mbéd. Abelé mbéb míme méewóo alagsen.”

30 Yesue anhób nén áyāle bad béhóbé'áá bân, “Edəádəŋ é mbéb éde mó áte.”

Yesue nyaá ne baányan

(Mat 12.46-50; Luk 8.19-21)

31 Héé Yesue nyaá ne Yesue baányan bēpédé, bētyéém é ebwóg-te, boŋ bēlōmē mó achəg.

32 Ndun e mod enlāŋned Yesue. Bēndyεé ásē. Dōo bēlāŋgé mó bân, “Echōŋ nyon ne baányon bédé á ebwóg-te béhede wε.”

33 Héé Yesue ásedtéé bó aáken, “Nzée adé echēm nyan, benzée-’ε bédé bānned?”

34 Dōo Yesue ánōnéé bad ábe bēlāŋnedé mó nê, boŋ áhōbē' áá, “Echēm nyan ne bānned bóo bēn!

35 Kénzée awě abele mam míme Dyōb áhedéé adii mwānned, abé-’ε echēm nyan.”

4

Ngan e mbál-e-bū

(Mat 13.1-9; Luk 8.4-8)

1 Yesue ambootéd bad ayáged ámpē á nkəg mé edib é Galilia. Bad ábe bēnlāŋned mó bēntōmtēn abuu áte, nê dēmbēl asól á bōle-tē ádyēē áwēd-te. Abē bōle bēmbē á edib-tē. Ene ndun e mod chō-’ε enlyəg á nkin mé edib.

2 Abēnládtáá ngan ayáged bó mekan híin. Ankalé bó ngan aá,

³ “Nyéwóglɛn! Nkwɛl-é-nzag nhóg ankě mbál asob á nzag-tê.

⁴ Ade ásobɛé mó nê, donje dénhūn á nzii-tê, menɔn mêmpeě mémad mó asômted.

⁵ Donje dénhūn á meláá-tê wée ndɔɔb énkêmbuú'é áte. Enwāmsɛn abíd ásē ngāne ndɔɔb énkênchabpé ásē.

⁶ Bon née enyɛn é ngine épédé ényhāād ábê bwēm é'wé-'ɛ, áyāle nkan ménkênsónlé bó á ndɔɔb-tê bwām.

⁷ Mbál mêmpee ménhūn wée mekôd médíí. Née mekôd mē mékwógé, mékán akwog áde ábê bwēm, nê ábel bénkênchyáá'é.

⁸ Bon donje dé mbál dénhūn á ndɔɔb e bwām. Mmén mbál mémbid ásē bwām, ríkwōg, ríchyáá-'ɛ. Donje dé e'sóg dénwālē móom mé mbum meláán, donje móom ntóób, ábíníí-'ɛ, mbwókɛl.”

⁹ Yesue ansógéd enén ngan aá, “Kéńzée awě awóó metúu, áwóge'.”

Nzəm echě ekáá bon Yesue ákalé ngan

(Mat 13.10-17; Luk 8.9-10)

¹⁰ Ade Yesue ályágé mwěmpɛn, ábē bembapɛɛ dyóm ne bébe ne bad ábe bémbē ne mó, bēnlāá mó bán átógned bó échē ngan.

¹¹ Hée Yesue álángeé bó aá, “Dyōb ábágé nyé kunze ábii kun e nkamlɛn nímē, bon ne bad bémpee abele aá béwóge' nímén mekan mésyāāl dásō á ngan-tê.

¹² Abelé nê, ábel bon, ké bényínē ké nyínén, béechemé, ké béwōgē ké wógen béēsōntān áyāle nzé bésónténé né bétimén Dyōb, békūd-tɛ alagsɛn dé mbéb.”

Yesue atóké ngan e nsob a mbál-e-bū

(Mat 13.18-23; Luk 8.11-15)

¹³ Dóo Yesue ásedtée bó aáken, “Nédē nyéesōntɛnɛé enén ngan-ɛ? Nzé nyéesōntɛne chó chán-nō nyémwɛé échíníí ngan asōntɛn?

¹⁴ Nsob-a-mbál awéne eyale é Dyōb.

¹⁵ Donje á bad bédé nēngáne mbál nímé ríhúné á nzii-tê. Nzé béwóge eyale é Dyōb ábwōg-ábwōg Satanɛ abelé áhyɛ ahúd bó chó á nlém-tê.

¹⁶ Abíníí bédé nēngáne mbál nímé ríhúné á meláá-tê. Béwóge' eyale é Dyōb, ábwōg-ábwōg békōb-pɛ chó ne menyinge.

¹⁷ Bon échē eyale éewēnnāadtē bó á nlém-tê, bédúbpe-'ɛ chó dásō á esón é pónde. Né-ɔó, nzé ndutul ne metake bépédé áyāle échē eyale bédol yāl ámbíd ábwōg-ábwōg.

¹⁸ Abíníí-'ɛ bédíí née mbál nímé ríhúné á mekôd-te. Bédíí bad ábe béwóge eyale é Dyōb,

¹⁹ bon mpúlé mé nkōnsé ne adəɲ dé abud á bwēm awón, ne ahed á bwēm bémpee akán bó nlém áte nyaa echě béehelée e'pum achyáa.

²⁰ Bon bad ábe bédé nēngáne mbál nímé ríhúné á ndɔɔb echě eboó yāl, bédíí bad ábe béwóge' eyale é Dyōb, békōb-pɛ chó, béchyāā-'ɛ e'sóg ábe é'wánlé mesongé mé mbum móom meláán, móom ntóób ne mbwókɛl.”

Nzé béchódé etrukán béekongéé chó

(Luk 8.16-18)

²¹ Hée Yesue ásedtée ene ndun e mod aáken, “Mod asónléé etrukán échē ámáá achod á ndáb-te, ábānē chó á ebwōg-sé ké'ɛ á anonj sé-yɛ? Saá á atii dé etrukán mín dóo ábelé ábānē chó?

²² Chóm ké éhéé éche ékōnédé ébid á enyɛn. Ké éhéé-'ɛ éche békúténé bédibé chó.

²³ Kéńzée awě awóó metúu, áwóge'.

24 “Nyétōn chōm-ée nyéwógéé anən áte bwâm! Melemlem mé nhəgtéd míme ébēnlédé wée wən móo Dyōb dōmpē débēnlédte, ābēnléd-te mó tómaa ngáne wēmbēnlédte wée wən.

25 Kénzée awē awóó nsōhten ní kun é nkamlen mí mín, Dyōb débād mó míme nsōhten abe. Ane awē mó-’e eewóo, Dyōb dékobén mó káəne mwāmpin awē awóó.”

Ngan e mbál-e-bū

26 Yesue ambé áhóbe aá, “Nkamlen ní Dyōb nídi nēngáne mod awē akií mbál-e-bū asob á nzag-té,

27 átīm ámbíd á ndáb, nkuu ákūne’, mūte ábelé míme nsón. Ene pónde esyāál, mbál ébide ásē, ékwogé’ ésebán abíe’ ngáne nē ábēnladté.

28 Ndəəb chēn-ée ebele bon bwēm é’kwogé’, é’chyāā-’e e’pum. Nlóm mí byaá móo nsēbpe abíd, ámbíd e pónde mbwéem káəne ásōg, e’sóg bómpē é’bíd.

29 Bon nzé e’sóg é’máá awúu, ábwōg-ábwōg ane mod abelé atéd páá áke dé apád áyāle pónde echē bēpadéé epedé.”

Ngan e mbál míme ríchine

(Mat 13.31-32, 34; Luk 13.18-19)

30 Héé Yesue áhóbeé ámpē aáken, “Cheé déhéleé-se déhəgtén nkamlen ní Dyōb-ē? Ngan ehéé débēnlédte echē élūméd ngáne míme nkamlen nídí-ye?

31 Nídi nēngáne mbwé e mbál-e-bū echē mod átédé bon asob á nzag-té. Mbál-e-bū edé mwāmpin bwāmbwam nzé bēhəgténé chó ne mbál mémpēe míme níde á nkōnsé.

32 Bon nzé ékwogé, ékale’ tómaa e’sum* é’syāál, éwóo-’e ngen éche menən méhyagké mūm alón áte.”

33 Yesue akānlé’áá bad eyale é Dyōb, ábēnláád ekud é ngan émpēe nēngáne échēn. Akānlé’áá bó nyaa echē bēsōhtēnnē.

34 Eékanle’áá bó áde ébēnlédéé ngan, bon nzé anlyəg mwēmpen ne ábe bembapēe aláá bó mam mésyāál míme échē ngan éhóbeé.

Yesue ahóódté ekukud

(Mat 8.23-27; Luk 8.22-25)

35 Echē epun dēn ngukél, dōo Yesue álāngéé ábē bembapēe aá, “Syāā déchabe ped e edib eníní.”

36 Héé ábē bembapēe béchénne ene ndun e mod bon bēsōlē á bōle-té wée Yesue ámbēē bon békēné mó. Myšle mémpēe mémbe áhed.

37 Abwōg-ábwōg dōo ekukud é ngine ébóótédé atóm, bon mendíb mēsōlē á bōle-té nyaa echē bōle bēmpōnné asú á mendíb sé.

38 Yesue ambé á bōle-té á ped e mbíd. Annaá ásē ábānē nló á mbóngé mín, ákūne’. Héé bényeméé mó ásē, bon bēlāngē mó bánken, “A meléed, weewóo’é we pónde ée syānē dédí á kwéed-te-ye?”

39 Héé Yesue átyéémé ámín bon akānnē échē ekukud áte aá éhóo, aláá-’e mendíb aá mēsud. Ekukud énsōg awan, ekide-’e éhóótéd áte.

40 Héé Yesue ásedtéé bó aáken, “Cheé ékáá bon nyéwōgē mbwōg? Nyéewóo’é adúbe káəne ne bəəb-’e?”

41 Bon mbwōg ménkōb bó bwāmbwam, bēsedté nhóg ne aníní bánken, “Ebál e mod éhéé chēn éche káəne ekukud ne mendíb bēwōgnéé?”

* 4:32 Bán bé mel nēe ndón.

5

*Yesue achõhté mod awe
awóó e'dáádàḡ bé mbéb*

(Mat 8.28-34; Luk 8.26-39)

- ¹ Yesue ne ábē bembapεε bêmpě á pεd e edib eníní, á mbwóg e Gerasin.
- ² Ade Yesue ábídé á bǎle-tê bídén, ambomén mod awě abídé á soóbadε. Edáádàḡ é mbéb émbē ane mod áte.
- ³ A soóbadε dóo ádyéé'áá. Modmod enkênhenlé mó abane á mehaḡ ámpē, ké ne bengóbéngōbē.
- ⁴ Ayāle ngen ne ngen, béháá'áá mó ne e'pwog ne bengóbéngōbē boḡ ké nê aselé'áá bengóbéngōbē áhentéd-te e'pwog bē áte. Antómtén ngine awóḡ nyaa echē modmod éehēle'áá mó abwōge.
- ⁵ Atamnádtáá á soóbadε ne á e'kone-tê nkúu ne mǔte, ábōnē e'saad ákweltáád-te yāl ne meláá.
- ⁶ Ane mod abédé mwǎ etún áde anyíné Yesue. Héε anyágté mehélé, boḡ ábwōgē mebóbóḡ áwē e'só-te,
- ⁷ ábōnē esaád é ngine, áhōbē aá, “A-Yesu, Mwǎn a Dyōb á Ngum, cheé sóo déwóḡnē? Ncháa wε á dīn á Dyōb meé weekógsán me.”
- ⁸ Ane mod anhób nê ayāle Yesue anláá edáádàḡ é mbéb aá, “A-edáádàḡ é mbéb, bíd ane mod áte!”
- ⁹ Dóo Yesue ásedtée mó aáken, “Chán dīn adíi wε?” Ankwentén aá, “Dīn adíi me bán Amudtεε, ayāle sēbuú áte.”
- ¹⁰ Ambé ácháā Yesue aá eénānē' ábē e'dáádàḡ bé mbéb ene mbwóg.
- ¹¹ Bōob-póó, sǎḡkalaa a esog é nguu chó-'ε ébédé benben ne áhed, édyāḡ medyé á mbám mé ekone.
- ¹² Héε ábē e'dáádàḡ bé mbéb é'cháa'ε Yesue bán, “Lóm sé á nguu-tê wē, émwe sésōl chó áte.”
- ¹³ Héε Yesue ábágé bó kunze boḡ é'bidē ane mod áte. Abíd áde é'bidé ane mod áte é'sālē échē nguu áte. Echē esog ébédé dyam e'kálé é' nguu é'be. Abwōg-ábwōg échē esog émpādē ásē, ényágté' á eláá é nkin mé edib-é-nzab, éhún á edib-tê, éhó-'ε.
- ¹⁴ Benon bé nguu béntōm mehélé á dyad-tê ne á mebwóg míme médé benben, ákale bad dyam áde ábénlédé. Abē bad bémbid áke dényīn.
- ¹⁵ Ade bépédé wēε Yesue boḡ bényīn ane mod awě ndun e e'dáádàḡ bé mbéb émbēé áte, née ádyéé'ásē, ahédé-'ε bwēm á yāl bwām, adyéé-'ε sen, mbwóg ménkōb bó.
- ¹⁶ Bad ábe bényīn áde dyam bénlāā ábē bad ngáne émbenlédté ne ane mod awě e'dáádàḡ bé mbéb bémbeé áte. Bénlāā-'ε bó dyam áde ábénlédé ne échē esog é nguu.
- ¹⁷ Héε ábē bad bébóótédé Yesue achán bán ásyəə áwab mbwóg.
- ¹⁸ Ade Yesue ásóléé á bǎle-tê, ane mod awě e'dáádàḡ bé mbéb bémbeé áte nê anchán mó aá búmō békag.
- ¹⁹ Boḡ Yesue enkênkwenténne. Anláá mó aá, “Súé' áwōḡ dyad, éke éláa áboḡ bad ndale e dyam eche Sǎḡgwéé ábénlé wε ne ngáne ápédé wε ngol awóḡ.”
- ²⁰ Hē dóo ane mod áhídté boḡ ákag á mbwóg e Dekapolis.* Akanlé mod té dyam áde Yesue ábénlé mó. Bad bésyāal ábe bēnwōḡ, yāl enkóm bé áte bwāmbwam.

*Yesue achõhté mmwaád nhóg,
ápūūd-te Jairuse mwǎn
(Mat 9.18-26; Luk 8.40-56)*

* **5:20 Dekapolis:** adíi mbwóg e myad dyóm.

²¹ Yesue antim ámbid á ped e edib eníní ne bölé. Ade ápédé á nkin nímíní, ndun e mod enkanén áhed.

²² Dóo mod nhóg awě akamlan ndáb e mekáne awě béchagé'áá bán Jairuse ápédé áhed. Anyin áde anyiné Yesue, ankwě ásē áwe mekuu.

²³ Ne mechángé mé ngíne áhōbē aá, “Awem mwān a mmwaád awág. Sōn, hyě ébān mós ekáá á yāl, ábel nén ádyεε bwām, ábé-'ε á alongé.”

²⁴ Héε Yesue áhídé mós. Ekud é bad éhídé'áá Yesue nyaa echě bēnkanénné mós.

²⁵ Mmwaád nhóg-ke ambé áhed awě anwōn nkole níme mekií mébídé'áá mós á yāl pónde ésyā́l. Mmē nkole mbédé mós á yāl á etūn é dyōm-a-mwé ne mbε.

²⁶ Atagé híin á mekáá mé bad bé e'ból, abébéd-te ngáb esyā́l echě ánwōngē, bon ké nē enkēndy'έ bwām, nkole mbādē bádén.

²⁷ Anén mmwaád anwóg mam níme Yesue ábélé'áá, dóo ábídé mós ámbid áfinté ene ndun e mod bon ásitán mós nkobe.

²⁸ Ayāle anhób áwe nlém-tē aá nzé mósiténé ké nímē nkobe, né móodyéε bwām.

²⁹ Asiten áde ane mmwaád ásiténé Yesue nkobe, mekií níme mébídé'áá mós á yāl ménsēlē, awóg-ke á yāl aá móchoó.

³⁰ Abwōg-ábwōg Yesue ámbii aá ngíne ebídé mós á yāl. Hē dóo ákúnnédé áfinté ene ndun e mod, bon ásedtē aáken, “Nzée asiténé me nkobe?”

³¹ Dóo ábē bambapεε békwentanné mós bánken, “Née ényinéε bad békáñné wε á yāl nén ésedtē' wεé ken nzée asiténé wε-yε?”

³² Ké nē, Yesue ambé ánōné' ekíde ányin mod awě asiténé mós.

³³ Héε ane mmwaád ábóótédé anəñ ne mbwóg áde ányiné chōm-éε ébēnlédé mós. Dóo ápédé wée Yesue bon ákwag mós á mekuu, álāngē mós mbále esyā́l.

³⁴ Héε Yesue álāngéε mós aá, “A mwān-a-mmwaád, adúbe ádōñ ádíde wε bwām. Kāg ne nsəñ. Ndutul echōñ chó-'ε émaa.”

³⁵ Ade Yesue áhóbéé nē, dóo bad behóg ábe bēbídé á ndáb wée Jairuse bēlāngéε Jairuse bán, “Awōñ mwān amaá mós awé. Cheé étəgnéε Meléede ataged?”

³⁶ Bon Yesue enkētédte dyam áde bēhóbé née dyam. Héε álāngéε ane mod a nkamlen aá, “Weewógé mbwóg! Dúbé dúbpén.”

³⁷ Yesue enkēmmwéε aá mod ampée áhíd mós étōméε Petro ne Jemse bó mwānyəñ Jōne.

³⁸ Ade bépédé á ndáb wée Jairuse dóo ányiné mpuutéđ, awóg-ke mewé mé ngíne níme bad béchyε'ε.

³⁹ Héε ásólé á ndáb-te bon ásedtē bó aáken, “Cheé ékás bon nyébelé' nímén mpuutéđ, nyéchyε-'ε mewé? Ane mwān eewédeε, akúne kúnén.”

⁴⁰ Bon bēmbóótéd mós awōo. Ámbídéd bó mod asyā́l á ebwóg-te. Antéd ane mwān sáá bó nyəñ ne ábē bambapεε bēláán, bésōl á toñ echě ane mwān ámbēε áte.

⁴¹ Héε Yesue áchəngé ane mwān á ekáá, bon álāngē mós aá, “Talíta kúm,” (awě adé bán, “A-mwān a ngōndéε, nlāngε wε meé, híde ásē.”)

⁴² Ane mwān anhidé ásē ábwōg-ábwōg, ábootéd-te akε. (Abédé dyōm á mwě ne mbε.) Yāl enkóm bó áte híin áde nén ábēnlédé.

⁴³ Héε Yesue ásíméε bó etúu áte aá bēlāngē modmod dyam áde ábēnlédé, aláá-'ε bó aá bēbε ane mwān ndyééd.

6

*Bad bé Nazarət béekobéε Yesue
(Mat 13.53-58; Luk 4.16-30)*

¹ Yesue anhidé ádé hõm, asú áwē dyad nchoo ne ábē bembapεε.

² Néε mbwε-mé-nkóme-áte nípedé, ambootéd ayáged á ndáb e mekáne. Bad híin bémbē áhed. Ade béwógé áde ayáge yǎl enkóm bó áte. Bésεdté bánken, “Héé mó ábídné nímén mésyāāl-ē? Ndín e debyéé éhéé bébágé mó nén? Chán ámwagké nímén menyáké abel-é?”

³ Kíné saá kápéntaa adíi-yε? Saá mwǎn awě Maria nén-ε? Kíné saá Jemsε, Josεβε, Judasε ne Simōne bóó bédé baányan-ε? Baányan bé bebaád bésyāāl-le ámpē béedyéé’ é ádyad-tē hén ne syánē-yε?” Né-óó, bēnkóó Yesue.

⁴ Dóó álángeé bó aá, “Nkal e’daádəŋ awóó’ edúbé hõm ásyāāl étóméé áwē dyad, áwē túmbé-te ne áwē abum á ndáb.”

⁵ Eéhεléé menyáké ké mehóg abel áhed, étóméé nguse é bad bé nkole ábe ábáné mekáá á yǎl, bédyēē-’ε bwám.

⁶ Yǎl enkóm mó áte bwámbwam ne adúbe ádé bad bénkēnwóŋgé.

*Yesue alómé bembapεε dyòm ne bébe
(Mat 10.5-15; Luk 9.1-6)*

Dóó Yesue ákíi á myad mésad níme médé benben, áyāgtē bad.

⁷ Anchélé ábē bembapεε dyòm ne bébe. Anlād bó áte, alóm bó bébe ne bébe. Ambě-’ε bó kunze ábíded bad e’daádəŋ bé mbéb áte.

⁸ Anlyāgtén bó aá, “Nyéewánlé chõmchõm á eke étóméé ntõŋ. Nyéewánlé ndyééd ké’ε ekwε, mod eesóó-’ε mōné á mesó mé abad.

⁹ Nyéhē metámbé boŋ nyéewánlé mbóté ébe.”

¹⁰ Ambád aá, “Ndáb ké ehéé eché ekobé nyé nyédyēē áhed káəŋ ne póné eché nyéhídtéé ádé dyad.

¹¹ Nzé nyépedé dyad áde béekobéé nyé, káa béekwentεnéé nyé awóglɛn, nyétēdē dó, nyékūd-te ebumbú á mekuu, álúmed nén bán échab ebébtéd éŋəne bēn.”

¹² Né-óó, bēnkě békale’ eyale é Dyõb bán bad bétεde ádab abé dé mbéb.

¹³ Bémbíded bad e’daádəŋ bé mbéb híin áte, béwāgtē bad bé nkole híin ne dyǒg dé menzab, béchõõd bó.

*Kwééd eché Jõne, Ndusεne
(Mat 14.1-12; Luk 9.7-9)*

¹⁴ Bóob-póó, Herõde anwóg mam mésyāāl níme Yesue ábélé’áá. Ayāle mam mé bwám níme Yesue ábélé’áá mēmbēl ambyéεn hõm ásyāāl. Donje á bad béhóbé’áá bán, “Jõne, Ndusεne apuúdé. Néε ákáká boŋ awóŋ ngíne ábel nímén menyáké mésyāāl.”

¹⁵ Bémpeε béhõbē bán, “Elaijaa móódé.” Abíníi-’ε bán, “Adíi nkal e’daádəŋ nēŋgáne nhóg átínté e bekal bé’daádəŋ ábe bémbē se’ bóód.”

¹⁶ Ade Herõde áwógé nē anhób aá, “Jõne, Ndusεne awě mēmbenlé boŋ bésēl nló móódé. Atimé ámbíd á alongé.”

¹⁷ Herõde anhób nē áyāle anlóm bad aá békõb Jõne, béhan mó, béhé-’ε mó á mbwōg. Ambel nén áyāle Herodyasε, mwaád awě mwǎnyan, Filibe ánsēbēε awóŋ, anwóŋ mó.

¹⁸ Jõne alánge’áá Herõde pónéé téé aá, “Weewóó’ε kunze áwóŋ Herodyasε, mmwaád awě mwǎnyon.”

¹⁹ Né-óó, Herodyasε anhíi Jõne pél á nlém-tē, áhedé-’ε aá mówúu mó. Boŋ Herõde ambēl enkēnhenlé.

²⁰ Herõde ambé mbwóg áte tēŋεne Jõne áyāle ambíi aá adíi mod a bwám awě asáá. Né-óó akəŋgé mó bwám, ábel boŋ dyam dé mbéb déebenlād mó. Adáá’áá mó awóglɛn kénéé edíi bán pónéé téé nzé anwóglɛn mó, atage’áá áte á mewēmtɛn-tē bwámbwam.

21 Kóōηne á asóg, Herodyase ankũd nzii echě áhédé'áá. Nén ábédé epun-ée Herode ábélé'áá ngande áwêmtēn epun-ée ánychāādtē. A ngande wê, Herode anlébé ábē bad bémháá bé ngómenaa, bad bémháá bé sánze, ne kase é bad é mbwōg á Galilia.

22 Echē epun mwān a mmwāád awē Herodyase anhyě aság esáke. Nê dénwōgēd Herode ne ábē beken menyinje. Né-óó, Kōη Herode ansedéd ane mwān a mmwāád aáken, “Cheé édáá wée míbe we? Měbě we kéchéé échě éhédéé.”

23 Nén dēmbēl ammwé melě, álāngē mó aá, “Mmwāg melě meé, měbēé we kéchéé éche éhédéé. Ké eped é mbwōg échēm échě nkamlanné.”

24 Né-óó ane mwān ankě nyaá aseded aáken, “Cheé méhédénné mó?” Dóo nyaá átímténé mó aá, “Hédén mó nló míme Jōne, Ndusenē.”

25 Héé ane mwān átímé ámbíd ábwōg-ábwōg wée kōη, boη álāngē mó aá, “Bāg me nló míme Jōne, Ndusenē á taplēt-te hén bōob.”

26 Nén dénwōgēd kōη Herode ndutul bwāmbwam, boη ngáne ámmadté melě amwé á'sō wée ábē beken, enkēnhēnlé mó nló míme Jōne abáan.

27 Héé álómé sánze póg aá épēen nló míme Jōne. Ene sánze enkě á ndáb e mbwōg, esél Jōne nló,

28 épēēn mímé nló á taplēt-te, ábē ane mwān a mmwāád. Ane mwān a mmwāád mó-'é ábe nyaá.

29 Ade Jōne ábe bembapēe béwógé nê, bēmpě, bétéd mó ndim, béke bélime.

Yesue adidte e'kálé é' bad é'táan
(Mat 14.13-21; Luk 9.10-17; Jōn 6.1-14)

30 Bembapēe bé nlómag ábe Yesue ánlōmmē bēnhūu bétán mó béléá-'é mó mekan mésyāāl míme bēbélé ne míme báyógté.

31 Ekud é bad épágé'áá wée Yesue ne ábē bembapēe bétímé-'é ámbíd nyaá echě Yesue ne ábē bembapēe benkēnwōngé etál ádyé ké ndyééd. Dóo Yesue álāngēé ábē bembapēe aá, “Syāā détim á ahāngé á hōm. Boη nyékóme áte mwāmpin.”

32 Hê dóo bésólé á bōle-tē, boη bétímé' á ahāngé á hōm.

33 Ekud é bad ényīn áde békagké, bēnhēm-me bó ábwōg-ábwōg. Abē bad bēmbíd myad ne myad, békēēn mekuu, bēnyāgēd á'sō ne mekuu, bésébé ape wée Yesue ne ábē bembapēe békágé'áá.

34 Ade Yesue ábídé á bōle-tē boη anyīn ene ndun e mod, antómtén bó ngól abé áyāle bēbédé nēe ndyōη mí mbód míme méēwōo nnōn. Né-óó ambootéd bó ekud é mekan ayóged.

35 Ade bīn é'bóótédé ahín, ábē bembapēe bēmpě áwē, bēhōbē nén bán, “Hén ádé á etūn-tē, póndé emaa-'é atóm bwāmbwam.

36 Láá ábén bad bétímé' á myad-tē míme médé benben, ábel bēn béchan medyé míme bēdyēē.”

37 Boη Yesue antímtén bó aá, “Nyé bó nyébe bó chōm éche bēdyēē.” Héé bésēdtéé mó bánken, “Ehede wée séke séchan e'wēle é' mbwókel é kábpe ébe,* sébe bó, bēdyē-yē?”

38 Héé ásedtēé bó aáken, “E'wēle é'tāη nyéwóó? Nyéke nyénōn.” Ade bémáá anōn dóo bēlāngēé mó bán, “E'wēle é'dé é'táan ne súu ébe.”

39 Héé Yesue álāngēé ábē bembapēe aá bēbel bad, békaben áte moηge ne moηge bēdyēe á nkāókāe mín.

40 Né-óó ábe bad bēndyēé ásé, donje á moηge, mbwókel é bad, donje-'é móom mé bad métáan.

* 6:37 *Mbwókel é kabpe ébe*: ébédé nsábe mí mod nhóg áyāle ngōn waam.

41 Hê dōo Yesue átédé ábê e'wεle é'táan ne échê súu ébε, áñóné ámín, ásāgnān Dyōb, ákabtáád bó áte, bon ábagé ábē bembapεε aá békabpe ene ndun e mod. Ankabé-'ε ábê bad kááñne échê súu ébε.

42 Moosyāál andyé, akód-tε.

43 Bembapεε bēnlād e'wεle ne súu éche ênlyǎg ásē, enlón e'lón dyōm ne é'bε.

44 Mesonǎg mé baachóm ábe bēndyē ene ndyééd mémbē e'kálé é'táan.

Yesue akii á mendib mīn
(Mat 14.22-33; Jōn 6.15-21)

45 Melemlem mé pōndé Yesue anláá ábē bembapεε aá bésól á bǎle-tê, békag á'sō á Betsaida, á múde mé edib-é-nzab nímíní. Ade békagké nê, anláá ene ndun e mod aá bésūē' áwab mendáb.

46 Ade Yesue amáá bó alyǎgtεn, anchǎgέ á ekone mīn, ákáne.

47 Néε ngukél épédé, Yesue ábē bembapεε bēmbēēn bǎle áfinté e edib, Yesue-'ε abé á nkin mwēnpεn.

48 Annyín aá ábē bembapεε bétage ákεεn bǎle áyāle epub é ngine émbíd bó á'sō-te. Né-ǎǎ, dyam-éε ádé epǎg-ne-ngwa ankǎ bó atán, ákag á mendib mīn. Ahédé'áá aá mótóm bó ámín.

49 Bon anyín áde bényíné akag á mendib mīn, bēnwēmtēn bán nwú mósó rídé. Héε bēbóótédé abón.

50 Bébóné'áá áyāle áde bényíné mós, mbwǎg ménkōb bó moosyāál bwāmbwam. Abwǎg-ábwǎg Yesue anláá bó aá, "Nlém méēhūnē nyé, mēé ndé. Nyéebáá'."

51 Héε ásólé á bǎle-tê wéε bēmbēē, epub-pε énsōg atóm. Yǎl enkóm ábe bembapεε áte bwāmbwam.

52 Yǎl enkóm bó áte áyāle bēnkēnsónǎtēnné chōm-éε menyáké nime ámbenlé ádíde e'kálé é' bad é'táan nílúmtéé. Bēnkēnhεnlé-'ε achem.

Yesue achōǎté bad
bé nkole á Genesaret
(Mat 14.34-36)

53 Néε béchǎbpé edib-é-nzab, bēmpǎ á múde nímíní, á mbwǎg e Genesaret. Ahed-taá bēntǎǎ-'é bǎle.

54 Bébídé-'áá á bǎle-tê bídén bad béchēm-mε Yesue.

55 Héε bényǎgté mbwǎg áte esyāál bépēmē bad bé nkole á mekále mīn, békεεné' hōm téé áde bēnwōgkē bán Yesue adé.

56 Hōm téé-'ε áde Yesue ánkéé, á myad mémbáá ne mēsad, ne wéε bad bélóó á nzag-té, bad bépééné'áá bad bé nkole wéε bad bēbúdé aladεn á dyad-té ákáb nyonǎg. Néε bēmpεénné bó, béchāā mós bán ámwε bad bé nkole bésitεn ké mesó mé mbóté nímē. Né-ǎǎ bad bé nkole bésyāál ábe bēnsitén nime mesó mé mbóté bēndyéé bwām.

7

Ayǎged dé betaa
(Mat 15.1-9)

1 Befarisia ne donǎge dé bemeléede bé mbéndé ábe bēmbíd á Jerusalem bēnlǎñnéd Yesue áwóglεn mós.

2 Bēnyín bán donǎge dé bembapεε ábe Yesue bēdyǎg medyé ne mekáá mé mbinde, nédē béewobpe'aá mekáá nyaa echē Befarisia bēhóbéé bán bétǎñgéné awobe.

3 Befarisia ne bad bé Israel ábe bēlyǎgέ ásē bésyāál bēhídē ayǎge áde bēnkudté wéε ábāb betaa. Bēedyǎgkē ndyééd ésebán bēwóbpé mekáá nyaa echē etǎñgéné.

⁴ Póndé echě mod ábídeé á dyɔn-tê, eedyágkě chõmchõm ésebán asébpé yāl awobe. Mbéndé édé-’ε ámpē híin échě béhídeé, nêngáne awobe á bwēm bwâm. Bwēm nêngáne kâb, mbeé, kúmbe é e’kii, ne bwēm née mebendé.

⁵ Hée Befarisia ne bemeléede bé mbéndé bésedteé Yesue bánken, “Cheé ékáá bonj ábõnj bembapεε béehíde’ ayáge áde ábēd betaa bétédnédé sé? Bedyāg ndyééd áde béewopεε mekáá nyaa echě éhednadté.”

⁶ Yesue antimtén bó aá, “Nkal é’daádənj Yesayaa antəngén áde ánhõbpē ne e’yale ábe Dyõb dénlõmēnnē mó təngene nyé bedog-badé, ngáne éténlédé nén, ‘Abēn bad bébage me edúbé é nsəl ngēn, bonj nímab nlém méesaá áwēm.

⁷ Edúbé éche bébageé me éesaá dyamdyam, áyāle béyágte bad áhíd mbéndé é baányonj byánán édii mbéndé é Dyõb.’

⁸ Nyétédte mbéndé é Dyõb bonj pen nyéhíde ayáge á baányonj.”

⁹ Hée Yesue ábádeé aá, “Nyēbenlad mwane áte de mbéndé é Dyõb ábel nén nyéhíde ayáge ádēn dēn.

¹⁰ Mosεε ahóbé aá, ‘Béé sóo ne nyonj edúbé.’ Ahób-pe ámpē aá, ‘Kénzée awě ahóbé sáá ké’ε nyaá dyam dé mbéb áyāl bétəngéné béwúú mó.’

¹¹ Bonj nyéyágte nén bán nzé mod awóó chõm éche ántəngēnnē sáá ké’ε nyaá awõngonj bonj ahóbé aá, ‘Echén chõm édé Kóban,’ (Nê adé bán édii chõm é Dyõb),

¹² né eewóó’ε nzom áwõngonj sáá ké’ε nyaá.

¹³ Né-ɔó, áde ayáge áde nyébageé bad ábélé nyéetédéé eyale é Dyõb née dyam. Mam médé-’ε ámpē híin née nímén níme nyébeléé.”

*Mam níme mébele bonj
mod eesáá’ á’sõ é Dyõb
(Mat 15.10-20)*

¹⁴ Hée Yesue áchēnléé ene ndun e mod bonj álāngē bó aá, “Nyéwóglen, nyésõnten-ne me.

¹⁵ Chõmchõm éesaá éche ébide á ebwóg bonj née ésólé mod áte ébel mó abé mbinde á’sõ é Dyõb. Bonj chõm échě ébide mod áte chõó ébele bonj abé mbinde á’sõ é Dyõb.”*

¹⁷ Yesue anchené ene ndun e mod, asól á ndáb-te. Dóó ábē bembapεε bépédé bonj bélāngē mó bán átānled bó ene ngan.

¹⁸ Hée Yesue ákwentanné bó aáken, “Nyémpē nyéesõntánné-ye? Nyéenyínéé nén bán kéchéé éche ésólé mod áte, éche ébide á mbid e ebwóg, éebeléé-se mod abé mbinde á’sõ é Dyõb-ε?

¹⁹ Ngáne ésóléé mod áte, éepagké mó á nlém-tê. Ebelé ésud mó dásõ á abum-tê ébid-te.” (Yesue anhób nê álúmed nén aá ndyééd ké ehéé eboó adyé.)

²⁰ Ambád aá, “Chõm échě ébide mod áte chõó ébele bonj eesáá’ á’sõ é Dyõb.

²¹ Ayāle, á nlém mí mod-tê dóó mewēmten mé mbéb nêngáne akáb dé mesón, echíb, ne ewúen bébidéé. Mmē mewēmten móó mébelte mod mbéb.

²² Akáb dé mesón á ndáb e’wõngé, abé dé metog, ne abel á mam mé mbéb mémpē nêngáne edogké, ábel mbinde é mekan, akón á bad, akal á bad metóm áyāl, abé á kúmbe ne abel dé e’yókél é’ mekan.

²³ Mmén mam mé mbéb mésyāal mébide mod á nlém-tê mébelé-’ε mod eesáá’ á’sõ é Dyõb.”

*Adúbe dé nken-a-mmwaád
(Mat 15.21-28)*

* **7:15** Donge á kálag dé’só ábádé nchoo 16: “Kénzée awě awóó metúu áwóg.”

²⁴ Dóo Yesue ásyángé bon akäg á eped é mbwóg echë enchiitén myad mé Tire ne Sidon. Héé ásólé ndáb póg, eéhe'de'aá-'ε aá modmod ábíi aá módē áwēd-te. Ké nê bémbē bébíi.

²⁵ Néé mmwaád nhóg awě edǎǎdǎǎ é mbéb ébédé awe mwän a mmwaád áte áwógé bán Yesue adé áhed, ampě ákwē-'ε mó á mekuu.

²⁶ Ane mmwaád abédéε mmwaád a alon á Grikia awě béchyáá á ped e mbwóg e Siria echë béchágεé bán Fonisia. Héé ácháa'ε Yesue aá ábíded mwän echë edǎǎdǎǎ é mbéb áte.

²⁷ Bon Yesue ankwentén mó aá, "Sé sébe sédide bëndem. Eesaá bwâm átéd ndyééd e bǎnbǎn ábwēme mbwé."

²⁸ Ane mmwaád ankwentén aá, "Nê dën a-Sán, bon kǎǎǎne mbwé echë edyéé á tébele-sé ebelé edyéé píuted é medyé éche bëndem béhúnté."

²⁹ Dóo Yesue álǎǎǎεé mó aá, "Ayǎle échéen ehób éche éhóbé nén, ehele ésūē we á ndáb. Edǎǎdǎǎ é mbéb éche ébédé awon mwän áte étédte mó."

³⁰ Né-ǎǎ, ane mmwaád ansú á ndáb, atán nēǎǎne mwän ánǎǎǎé á anon mǎn. Echë edǎǎdǎǎ é mbéb émmǎd mó atede.

Yesue achǎǎté mod awě eewógne'aá, eehóbé'aá-'ε dyam bwâm

³¹ Héé Yesue áhídté á mbwóg e Tire, átimé á Sidon á ped e edib é Galilia, átimnád á ped e mbwóg e Myad Dyóm.

³² Bad behóg bêmpεén mod áwē awě eewógne'aá, eehóbe'aá-'ε dyam bwâm. Abê bad bēnchǎǎ Yesue bán ábân ane mod ekáá á yǎl.

³³ Héé Yesue áhídnédé mó wée ene ndun e mod édíi bon átimēn mó á ahǎǎǎé á hǎm. Ansóléd memii á metúu nǎme ane mod, ásob meléed bon ásitén mó echém.

³⁴ Héé Yesue ánóné ámǎn, áheeméd áte, bon áhǎbē aá, "Efáta," nê adé nén bán, "Dibnéd."

³⁵ Abwǎǎg-ábwǎǎg, ane mod ábootéd-te awógεn, echém étyéém mó á nsǎl, ábootéd-te dyam ahób bwâm.

³⁶ Héé Yesue ásímεé bó etúu áte aá béētúbpé modmod ádén akan dǎn. Bon pónde téé echë áhóbé aá béehóbé', bó-'ε bēnabpé bó ahób hóbén.

³⁷ Bad bésyǎǎl ábe bēnwǎǎg, yǎl enkóm bó áte nyaa echë echabé ámǎn bwámbwam. Béhóbé'áá bán, "Abele' mam mésyǎǎl bwâm. Abele kǎǎǎne bad bé ndóg béwógne', ábele-'ε e'bóbé é'hǎbē dyam."

8

Yesue adídté e'kǎlé é' bad é'niin (Mat 15.32-39)

¹ Mmē mesú mēn ndun e mod empée empě wée Yesue. Ngáne bēnkēnwǎǎǎǎé chǎm-ée bédyágkē, Yesue anchélé ábē bembapεε, álǎǎǎǎé bó aá,

² "Ndé enén ndun e mod ngǎl áyǎle békébē ne me e'pun é'láán, béēwóo-'áa chǎm éche bédyákē bǎǎb.

³ Nzé nsúúténé bó nzaa bǎǎb, né bēhūn ásē á nzii áyǎle bó donge á bad béchábé abíd."

⁴ Héé ábē bembapεε bétimtanné mó bánken, "Héé mod áhele ákud ndyééd á ehýǎǎǎge-tê hén echë ékwǎǎǎg ábēn bad adyé-yε?"

⁵ Yesue ansédéd bó aáken, "E'wεle é'tǎǎ nyéwóó?" Bēnkwentén bán, "E'wεle saámbé."

⁶ Dóo álǎǎǎǎεé ene ndun e mod aá bédyεε ásē á ndǎǎb-tê. Héé átédé ábē e'wεle saámbé, ásǎǎǎn Dyǎǎb, ákabtád bó áte, ábagé ábē bembapεε, bó-'ε békabpé ene ndun e mod.

⁷ Bénwōḡ-’ε baá nguse bé súu ésad. Yesue annaméd chómpē. Amaá-’aá chó anamed, ábagé bembapεε aá békabe bad.

⁸ Bad béndyē ene ndyééd, békód-τε, káḡḡ élyāg-κε ásē. Echē enlyəg ásē enlón e’lón saámbé.

⁹ Mesongé mé bad níme méndyē ene ndyééd mébédé dyam e’kálé é’niin. Yesue ansúúd ábē bad áwab mendáb.

¹⁰ Asúúté-’aá bó súútén, asól-λε mó á bǎle-tê ne ábē bembapεε, békē-’ε á mbwóg e Dalmanuta.

Befarisia béhede’ e’chemléd
(Mat 12.38-42; 16.1-4)

¹¹ Befarisia bēmpǎ wēε Yesue bébootéd mó apentén, béhédné mó e’chemléd ábe é’húú ádyōb. Bébélé’áá nê ákag mó.

¹² Héε Yesue áhéémédé áte, bon áhōbē aáken, “Cheé ékáá bon nyongel e’chii éhédé e’chemléd? Ne mbále, nlānge nyé nén meé, nyongel e’chii éekudté e’chemléd ké’ ehóg.”

¹³ Héε áchénné bó, bon ásālē á bǎle-tê, átimé á pēd e edib eníní.

Esulten é Befarisia
(Mat 16.5-12)

¹⁴ Bōob-pōó, áde bembapεε ábe Yesue bésólé á bǎle-tê, bēnchatén e’wεle awále áyāl. Ewεle ehóg chēmpen chóō bēnlyəgnédte á bǎle-tê.

¹⁵ Héε Yesue álāngεé bó aá, “Nyétéd pónde ne esulten é Befarisia ne éche Herōde.”

¹⁶ Dōó békaleé bēn ne bēn bán, “Ahóbé nê áyāle deewánléε e’wεle áyāl.”

¹⁷ Yesue ambii chōm éche béhóbεé, héε ásedteé bó aáken, “Cheé nyéhóbεé áyāle e’wεle ábe nyéewōó’ε? Káḡḡ ne’ bōob nyéebíí’ε ké’ε nyéesōḡtenεé-ye? Chán nyélélé nlém á abum nén?

¹⁸ Nyēwóó mīd, nyéenyínnéε-ye? Nyēwóó-’ε metúu nyéewógnéε-ye? Káḡḡ ne bōob nyéekamtánnéε-ye?

¹⁹ Ade ménkabpé e’wεle é’táan ádíde e’kálé é’ bad é’táan, e’lón é’tāḡ e’wεle ábe bēnlyəg ásē ábe nyēnladté bēnlōnnē?” Bēnkwen-tén mó bán, “Dyōm ne é’bε.”

²⁰ Ambád bó asēded ámpē aá, “Ade ménkabpé-’ε ewεle saámbé ádíde e’kálé é’ bad é’niin, e’lón é’tāḡ e’wεle ábe bēnlyəg ásē ábe nyēnladté bēnlōnnē?” Bēnkwen-tén mó bán, “E’lón saámbé.”

²¹ Ambád bó asēded aáken, “Bon ké nê nyéesōḡtenεé-ye?”

Yesue achōḡté mod awē akwedé ndim

²² Yesue ne ábē bembapεε bēmpǎ á Betsaida. Ahed dōó bad behóg bépééné mod awē akwedé ndim áwē, bon béchāā mó bán ábān mó ekáá á yāl.

²³ Yesue ancháá ane mod á ekáá, áhidnéd mó á dyad-tê wē. Ansob mó meléed á mīd, abán mó mekáá á yāl, bon ásedteé mó aáken, “Enyíne chōmchōm-ε?” ²⁴ Héε ane mod ánóné ámīn bon áhōbē aá, “Nnyíne bad bon bényínnad nēḡgáne mēl níme mékag.”

²⁵ Héε Yesue ábáné mó mekáá á mīd ámpē. Dōó ane mod ákídté anōn, mīd mēndibnéd mó, ábootéd-τε anyínen bwām.

²⁶ Yesue ansúúd mó á ndáb, áhōbē aá, “Wētōgné-’ε asól ádyad-tê ámpē.”

Yesue mó adé Ane-awē-Béwógté
(Mat 16.13-20; Luk 9.18-21)

²⁷ Yesue ne ábē bembapεε békágé’áá á myad níme médé á mbwóg e Kaisaria Filipi. Bépédé-’aá á nzii wē, dōó ásedteé bó aáken, “Nzé-módé bad bó béhóbεé bán ndé?”

28 Héε békwentanné bán, “Donge á bad béhóbe bán edii Jone Ndusene, bémpēe bán Elaijaa, ábíńí-’ε bán nkal é’dáádəŋ nhóg.”

29 Dóo áseɗteé bó ámpē aaken, “Bon nyébēn-ne nzé-módé nyéhóbeé bán ndé?” Héε Petro ákwentanné mó aá, “Wéé edé Ane-awě-Béwógte.”

30 Ade Petro amaá-’aá ahób nê, Yesue ansím bó etúu áte aá béelāngē modmod nyaa e mod echě módíí.

*Yesue ahóbe t̄ngene metake n̄mē
ákuɗte ne kwééd echě áwēē
(Mat 16.21-28; Luk 9.22-27)*

31 Yesue ambootéd ábē bembapeε ayáged, áhōbē aá, “Mwān-a-Moonyon atāngéné ákūd metake híin. Bad bémbáá bé dyad, beprise bémbáá ne bemeléede bé mbéndé bébāŋ-’ε mó á yǎl. Béwūū mó, bon e’pun ábe é’lonténé é’láán, āpuú.”

32 Yesue anhób ádén dyam nyaa echě énkēnkoŋnédté bó mbále ké póg. Héε Petro átímné Yesue á nkəg, bon ákəgé átimed mó áte.

33 Bon Yesue ankuné, ánōn ábē bembapeε. Dóo ákánne Petro áte aá, “Hidé me á’sō-te, a-Satan! Mmon mewēmtēn méesaá mewēmtēn mé Dyōb, méđi mewēmtēn mé moonyon.”

34 Dóo Yesue áchénlé ene ndun e mod ne ábē bembapeε, bon álāngē bó aá, “Kéńzéé awě adəá me ahíd, ásob yǎl mendíb, ápēm-me áde awəg ahíde me.

35 Ayāle kéńzéé awě ahede áde alongé ason ābəd dó. Kéńzéé-’ε awě abóde áde alongé ayāle echēm ne ayāle nímén nkalan mí bwām né ákud alongé áde déemaá’.

36 Nsyáŋ r̄héé mod ákuɗte nzé akudé nkōŋsé nsyāāl bon abóde áde alongé.

37 Cheé mod áhēleεε ábe ákəde áde alongé?

38 Kéńzéé awě ákwāgēn me ne ábēm e’yale á nyongel e’chii echě ehídne Dyōb nlém n̄be, abé-’ε ebébtéd, Mwān-a-Moonyon mó ámpē ákwāgēn mó á pónde echě ápeé ne ángel échě éśáá ne ehúmé éche Sáá.”

9

1 Héε álāngéé bó aá, “Ne mbále, nlānge nyé nén meé, donge á bad átínté echēn béenyínénné kwééd đíd áde bényínéé nēε nkamlēn ní Dyōb n̄pédé ne ngíne.”

*Yǎl ehāŋléné Yesue
(Mat 17.1-13; Luk 9.28-36)*

2 Ambíd e epun ntóób Yesue ankeén Petro, Jemse ne Jone á mbəəd echě echabé ámin. Bēmpēn-εé bémbē áhed. Awāb e’só-te hē dóo ábē bembapeε bényíné nēε Yesue áhāŋléné.

3 Mbóté éche ánhēē épené áte, épūbē-’ε féréd. Epúbé’áá nyaa echě modmod á nkōŋsé éhēléé-se apúbed.

4 Héε bényíné Mosεε ne Elaijaa bébíde taléd, bóobe Yesue békale’.

5 Dóo Petro álāngéé Yesue aá, “A meléed, ébóó ngáne syāā déđií hén. Délōŋ e’bem é’láán, échōŋ, éche Mosεε ne éche Elaijaa.”

6 Petro enkēmbíí’é chōm éche áhóbeé ayāle mbwóg ní ngíne n̄me mémbe bóobe baáb á yǎl.

7 Hē dóo mbag ékúténé bó bon ehób-pe ébíde’ á mbag-tē wē nén, “Awem Mwān a nlém nén, nyéwógne mó.”

8 Abwōg-ábwōg dóo bénóné ekíde bon béenyíne modmod ampée nzése Yesue.

9 Ade bésudeé á mbəəd m̄n nê, Yesue ansím bó etúu áte, álāngē bó aá, “Nyéelāngé modmod dyam áde nyényíné káŋ ne á pónde echě Mwān-a-Moonyon ápuú’é.”

10 Né-ṵ, ábê bembapεε bēnkoó áde dyam ne bēn, bésēdté yǎl chǒm-éε mpuu ndíí.

11 Héε bésēdtéε Yesuε bánken, “Cheé ékáá bon bemeléede bé mbéndé béhóbé nén bán Elaijaa atǎngéné asébe dé ape bon Ane-awě-Béwógté ǎpě?”

12 Dóo átímtanné bó aá, “Ne mbále Elaijaa atǎngéné asébe dé ape atíí-’ε mam mésyāal. Cheé-ṵ ékáá bon étenléd á kálag e Dyób nén bán Mwǎn-a-Moonyon ǎkǔd metake híin, bad bébán-’ε mó á yǎl?”

13 Bon nǎnge nyé nén méε Elaijaa ammǎd ape, bēmbēl-ε mó ngáne bēndǎngé. Nê dénlōnēd mam níme mēntenléd áyāl e echē.”

*Yesuε achǒnté mwǎn
awě edǎdǎn é mbéb étagtéε
(Mat 17.14-21; Luk 9.37-43a)*

14 Ade bépédé wéε ábíníi bembapεε bēbédé, bēntān néε ndun e mod élǎngéné bó. Bemeléede bé mbéndé bépéntannáá ne bó.

15 Anyín áde ábê bad bényíné Yesuε, menyáké ménkōb bó bwǎmbwam. Bēnnyǎgéd áwē áleled mó.

16 Héε Yesuε ásedtεé ábē bembapεε aáken, “Cheé nyáábṵo nyépentanné?”

17 Dóo mod nhóg átíntê e ene ndun e mod ákwentanné aá, “A-meléed, mpééné awēm mwǎn a mwēnchóm áwōn áyāle edǎdǎn é mbéb édé mó áte, ébélé eehóbéε-’ε dyam.

18 Nzé ékóbé mó, ébelé éhūnēd mó ásē, mehod-te mébídé mó á nsal. Ene pónde ádyāg meson á nsal, anámén-ne. Nǎngé-’ε ábōn bembapεε méε bēbided mó chó áte bon béehelεé.”

19 Dóo Yesuε ákwentanné aá, “Wáá, nyé bad bé’ chii, nyéewóó’é adúbé. Chán mépéé nyé adyen hén-ēē? Chán mépéé nyé awesén-é? Hyenáád me mwǎn awed.”

20 Dóo bépíinédé mó ane mwǎn. Anyín áde échē edǎdǎn é mbéb ényíné Yesuε, énsóg ane mwǎn, éhūnēd mó ásē, áhǎnǎd á ndṵob, mehod-te mébídé mó á nsal.

21 Héε Yesuε ásedtεé sáá aáken, “A etún é pónde éhéé ákétagké nén?” Dóo sáá ákwentanné aá, “Bootya se á mwēndemé.

22 Eyógké mó ahúnéd á muú-te ne á mendíb-te áwúu mó. Bon nzé dyam áde éheléε-se ébel, ewóg sé ngol, ewóngén sé.”

23 Héε Yesuε átímténé mó aá, “Wéé nzé dyam áde áde níheléε se mbel-ε? Chǒm ésyāal éhele ébenled ne mod awě awóó adúbe.”

24 Abwōg-ábwōg dóo ane mwǎn sáá ákánté ehób ámín aá, “Ndúbpé, wóngén adúbe ádēm áde déekwognede.”

25 Ndun e mod enyǎgté’áá áladen áte áhed. Ade Yesuε ányíné nê, ankáné échē edǎdǎn é mbéb áte aá, “A-edǎdǎn é ndóg ne é ebóbé, nkamlan wε méε ébíd mó áte, weesólé-’ε mó áte ámpē.”

26 Echē edǎdǎn élébpé-’aá esaád, éságéd ane mwǎn ne ngíne, ébíd-te. Ane mwǎn antím néε ndim ní mod káon donge á bad béhōbē bán, “Awédé.”

27 Bon néε Yesuε áchǎngé mó á ekáá, átíidē mó ámín, ane mwǎn atyéém-me.

28 Yesuε ansól á ndáb-te. Héε ábē bembapεε bésēdtéε mó á kun-tê, bánken, “Cheé ênkǎn bon sēnkēnhēl échē edǎdǎn é mbéb abided?”

29 Ankwentén bó aá, “Mekáne mwēmpen móo méhele mébided enén ndín e edǎdǎn.”

*Yesuε ahóbé ámpē tǎngene eche kwéed
(Mat 17.22-23; Luk 9.43b-45)*

30 Yesuε ne ábē bembapεε béhídté-’aá hê, bépōn á mbwóg é Galilia. Enkēnmwáá aá modmod ábii wéε módíí,

³¹ áyāle ayágté'áá ábē bembapεε aá, “Bébé Mwän-a-Moonyon á mekáá mé baányon. Bó-'aá béwūū mó. Nzé bémáá-'ε mó awúu ápuú ámbíd e epun é'láán.”

³² Bon ábē bembapεε béenkēnsónténné chōm éche ánhōbpē, bébáá'áá-'ε mó aseded.

Nzé atómténé mod ambáá abé?
(Mat 18.1-5; Luk 9.46-48)

³³ Yesuε ne ábē bembapεε bēmpě á Kapenahum. Ade bépédé, bénsāl á ndáb-te. Dóo Yesuε áseɗteé bó aáken, “Cheé nyéswántánnáá á nzii bwéed?”

³⁴ Bon bēnkēnhōbpé dyamdyam áyāle bēn ne bēn bépéntánnáá t̄ngene mod awě atómténé mod ambáá abé átínté echáb.

³⁵ Héε Yesuε ádyéé ásē, áchogé ábē bembapεε dyōm ne bébe bon álāngē bó aá, “Kéznéé awě ahede mod a mbáá abé, at̄ngéné abé ndimtene, abé-'ε mbaledε a moosyáál.”

³⁶ Hē dóo átédé mwēndem bon átíidē mó áwab tínté. Dóo abwáádé ane mwän, bon áhōbē aá,

³⁷ “Kéznéé awě akobé enén ndín e mwän á d̄in ádēm, né akobé me. Kéznéé-'ε awě akobé me, eékobéé mmēn-pen. Akobé kóhne ane awě alómé me.”

*Kéznéé awě eet̄ngán syánē,
né adé ne syánē*
(Luk 9.49-50)

³⁸ Jonε anláá Yesuε aá, “A meléed sēnnyín mod abídte bad e'dáádəŋ bé mbéb áte á d̄in ádōŋ, sēnláá-'ε mó bán ásōg abel nē, áyāle eésáá mod a echoŋ éche syánē.”

³⁹ Bon Yesuε anláá bó aá, “Nyéelāngé mó bán ásōg abel nē. Mod ké nhóg eésáá awě āmad menyáké abel á d̄in ádēm, bon ámbíd e pónDé áhōbē me mam mé mbéb á yāl.

⁴⁰ Ayāle, kéznéé awě eet̄ngán syánē né adé ne syánē.

⁴¹ Ne mbále, nl̄nge nyé nén meé, kéznéé awě abagé nyé ké kōb e mendíb ámwé á d̄in ádēm, áyāle nyédíí bad bé Kr̄sto, at̄ngéné míme nsábe akud.

Mek̄agsen míme mébelte bad mbéb
(Mat 18.6-9; Luk 17.1-2)

⁴² “Kéznéé awě abělté enén ndín e mwēndem echě edúbpé me mbéb, ébē mbon átəə mó s̄nkalaa aláá á nk̄n, béhúnéd-te mó á edíb é nkwě.

⁴³ Nzé echoŋ ekáá ébelte we mbéb, esél chó, épim. Edé mbon we ákud alongé áde déemaá' ne eped é yāl tómaa we áwón mekáá mébe bon bébwém we á d̄ū-á-muú.*

⁴⁵ Nzé echoŋ ekuu ébelte we mbéb, esél chó, épim. Edé we mbon ákud alongé áde déemaá' ne eped é yāl tómaa we áwón mekuu mébe, bon bébwém we á d̄ū-á-muú.†

⁴⁷ Nzé ádon d̄id ábelte we mbéb, ehúd dó, épim. Edé mbon we ásól á nkaml̄n ní Dyōb ne d̄id ahóg tómaa we áwón m̄id mébe bon bébwém we á d̄ū-á-muú.

⁴⁸ Ahed, 'e'kuu ábē é'dyāg bad béewāgkē, muú mímed-te méédímēē.'

⁴⁹ “Muú ményāā mod ké ahéé á yāl ngáne nkwě r̄nyāngéé á ndyéed-te.

⁵⁰ Nkwě míbóó, bon nzé míbóDé alan, chán béhele-se bényínéd mó ámpē? Nyényine' née nkwě, nyédyε-'ε ne nsan ne nhóg ne aníníí.”

* **9:43** Donje á kálag dé'só ábádé nchoo 44: *Ahed, e'kuu abē é'dyāg bad béewāgkē, muú mímed-te méédímēē.* † **9:45** Donje á kálag dé'só ábádé nchoo 46: *Ahed, e'kuu abē é'dyāg bad béewāgkē, muú mímed-te méédímēē.*

10

*Ayáged tângene anan
de mmwaád á e'wóngé
(Mat 19.1-12; Luk 16.18)*

¹ Yesue anhidé ádê abwóg á hõm, ampõŋ á mbwóg e Judeya, áchābē á pɛd e edib é Jodan eníní. Ndun e mod epagé'áá áwē, áyāgtē-ε bó ngáne ámenténné bó ayáged.

² Befarisia bémpě áwē ákæg mó. Bēnsedéd mó bánken, “Eched mbéndé chóchó ebagé kunze nén mod ánan mwaád á e'wóngé-ye?”

³ Hée Yesue átímtanné bó aáken, “Chán mbéndé eche Mosee ékaléé?”

⁴ Bēnkwenntén bán, “Mbéndé echě Mosee ebagé kunze nén, mod ábe mwaád kálag echě elúmte nén bán, e'wóngé é'máá bon ānan mó.”

⁵ Hée Yesue álāngéé bó aá, “E'lel bé nlém á abum ábēn bóo bēmběl bon Mosee ábe nyé échén mbéndé.

⁶ Bon se á mbooted, áde Dyõb áhágé bad, anhög mmwaád bó mwenchóm.

⁷ 'Né-ɔó, mwenchóm átedé sáá ne nyan, abé ne mwaád.

⁸ Búmō bad bébe bétim mod nhóg. 'Né-ɔó, béesaá ámpē bad bébe, bon bédii mod nhóg.

⁹ 'Né-ɔó, échě Dyõb áládé, modmod eepáá'.”

¹⁰ Ade bétimé ámbid á ndáb-te, Yesue ábē bembapεε bēnsedéd mó tângene dyan áde áhóbé.

¹¹ Hée Yesue álāngéé bó aá, “Kéznéé awě anané mwaád bon awón mmwaád ampée né akábé asón.

¹² Nzé mmwaád-te atědté nchóm bon awóó mod ampée, né akábé asón.”

*Yesue anāmté bēndem
(Mat 19.13-15; Luk 18.15-17)*

¹³ Bad bépééné'áá bēndem wée Yesue bán ábān bó ekáá á yǎl ānamed bó. Bon ábē bembapεε bēnkānē ábē bad áte.

¹⁴ Ade Yesue ányíné nê, anlīŋ, aláá-ε ábē bembapεε aá, “Nyétede bēndem béhyag áwēm. Nyéekáá bó áyāle nén nyaa e bad née bó chóó éwóó nkamlɛn ní Dyõb.

¹⁵ Ne mbále nlānge nyé nén mée, kéznéé awě eékobe nkamlɛn ní Dyõb nēngáne mwēndem, éesónlé áwēd-te.”

¹⁶ Hée Yesue áládé ábē bán áte, ábānē bó mekáá á nló nhógē-nhógē, ánamtē-ε bó.

*Nhōn mí bad ne nkamlɛn ní Dyõb
(Mat 19.16-30; Luk 18.18-30)*

¹⁷ Ade Yesue ábwógké eke ámpē, dóo mod nhóg ányágté áwē, abwóg mebóbón áwē e'só-te, bon ásedté mó aá, “A-meléed a bwām, dyan áhéé ntāngééné abel, ábel nén ríkud alongé áde déemaá?”

¹⁸ Hée Yesue ásedtéé mó aáken, “Cheé ékáá bon échagé me meléede a bwām? Mod ké nhóg eesaá mod a bwām étōmεé Dyõb dēmpɛn.

¹⁹ Ebíi mbéndé eche éhóbé bán, 'Weewúé' mod, weekábé asón á ndáb e'wóngé, weechíbé', weebídé mbón e metóm, weédōgē bad, béé sóó ne nyon edúbé.' ”

²⁰ Hée ane mod áhóbéé aá, “A meléed, nhídé échén mbéndé ésyāal bootya se á mwēndemé.”

²¹ Hée Yesue ánōnéé mó chóón ne nlém mé edānge, bon álāngē mó aá, “Dyam ahóg áhedne wε. Käg, ésóm bwēm é'syāal ábe éwóó, étéd rímé mōné, ébe betóótókē bé bad. Nzé ebelé nê, wěkūd nhōn ádyõb. Ene pónDé éhye éhíde mε.”

22 Ade ane mod áwógé nê ansudén, asú-ε ne ndutul á nlém-tê áyāle ambé nhon bwāmbwam.

23 Héε Yesuε ákúnné mǐd wéε ábē bembapεε bonj álāngē bó aá, “Elēl áte bwāmbwam behon bé bad ásol á nkamlen ní Dyōb.”

24 E’yale áβε Yesuε bénkōmēd ábē bembapεε yāl áte. Ambád ahób ámpē aá, “A-baányanj élélé áte bwāmbwam ásol á nkamlen ní Dyōb!”

25 Edé mwān e akan sánkalaa a nyam néε Kamēl áponj á epōn é ndōnde tómaa nhon mí mod ásol á nkamlen ní Dyōb.”

26 Ade bembapεε béwógé nê yāl enkóm bó áte bwāmbwam. Héε bēn ne bēn béhóbεé bánken, “Nzée-’ō ahele ákud e’soosoj?”

27 Héε Yesuε ánōnéé bó chóoj, bonj áhōbē aá, “Ne baányonj nēn déehelée se abenled, bonj ne Dyōb dyamdyam déelēléé áte.”

28 Héε Petro áhóbεé aá, “Nōné’, sētēdté chōm ésyāal áhíd wε.”

29 Dóo Yesuε áhóbεé aá, “Ne mbále, nlānge nyé nēn meé, kēnzée awē atēdté eche ndáb, baányan, nyaá, sáá, bán ne eche mbwóg áyāl echēm, ne áyāl e nkalanj mí bwām,

30 ákūd tómaa ne nê á alongé dé’ chii. Akūd ndáb, baányan, bán, ne mbwóg mbwókēl é ngen. Akūd-te kōōne metake á đin ádem. Akud-te alongé áde déemaá’ á pōndé échē ehúε’

31 Bonj bad híin ábe bédé á’sō bōob bélyæg mbíd, híin-ne ábe bēnlyæg mbíd bébē á’sō.”

*Yesuε ahóbé ngen éche elónténé
éláán ngáne béwū’ε mó*

(Mat 20.17-19; Luk 18.31-34)

32 Yesuε ne ábē bembapεε békágé’áá á akuu á Jerusalem, mó-’aá antómén bó. Yāl enkóm ábē bembapεε áte bwāmbwam, mbwóg-ke níkób bad ábe béhídé’áá bó. Ade békagké nê, dóo Yesuε átímné ábē bembapεε á nkæg ámpē bonj álāngē bó mam níme mébenléd ne mó.

33 Héε áhóbεé aá, “Pón nyébíi bán dekağ á Jerusalem, áwed-taá bébεé Mwān-a-Moonyonj á mekáá mé beprise bémbáá ne bemeléede bé mbéndé. Bó-’ε bébē mbakú bán atāngéné awé, bébē-’ε mó á mekáá mé bad ábe béesē bad bé alonj á Israel.

34 Béwelé mó, bésobtád mó meléed á yāl, béswādtāād mó e’tangú, béwúú-’ε mó. Bonj ámbíd e e’pun é’láán āpuú.”

*Jemse bó Jonε béhede’ e’tál
(Mat 20.20-28)*

35 Ambíd e nê Jemse bó Jon, bán áβε Zεbediε bēmpē wéε Yesuε. Ade bépédé, bēnlāā mó bán, “A meléed, dyam áde áde séhedeé bán ébele sé.”

36 Héε Yesuε ásedtεé bó aáken, “Cheé nyéhedeé bán níbele nyé.”

37 Dóo béhóbεé bán, “Séhede bán áde wédyé’ε ádōj atii dé nkamlen, émwe sédyεε wε á nkæg, nhóg á ekáá émbáá aníní-’ε á ekáá é emwεd.”

38 Héε Yesuε ákwentanné bó aá, “Nyéebíi’ε chōm éche nyésedteé. Nyéēhēl metuné níme mépēmē apēm-ε? Nyéēhēl edusen é metuné éche mékudté akud-ε?”

39 Dóo békwentanné mó bán béhēl. Héε Yesuε álāngéé bó aá, “Nyéēpēm metuné níme mépēmē, nyéekūd edusen é metuné échē mékudté,

40 bonj meewóó’ε kunze āpwεd mod awē ádyéé me á ekáá é mbáá ké’ε á ekáá é emwεd. Dyōb dóo débē nímmē metii wéε bad ábe ánábndé mó.”

41 Ade ábíníi bembapεε dyōm béwógé dyam áde Jemse bó Jon bésédte, bēnlíin bó bwāmbwam.

⁴² Hée Yesue áchəgée bó moosyáál benben bon ălāngē bó aá, “Nyêbíí nén bán bad ábe bébyééné née benkamlene bé nkōjsé ne bad bémháá bé dyad, bébenlad ngíne ákamlen bad ábe bédé ásē echáb.

⁴³ Bon éetāngeneé abé nê átíntē echên. Kénzée awě ahede aá móbê mod ambáá átíntē echên, atāngéné abé mbəlede awên.

⁴⁴ Kénzée-’ε awě ábē mod a’só átíntē echên, atāngéné abé ntān a moosyáál.

⁴⁵ Ayāle ké Mwān-a-Moonyon eepedeé aá bad bébenle mó, bon apedé ábele bad, ábe-’ε ádē alongé ákəde bad híin.”

Yesue achōjté mod

awě ankwε ndím

(Mat 20.29-34; Luk 18.35-43)

⁴⁶ Yesue ne ábē bembapεε bēmpě á dyad á Jeriko. Ndun e mod ehídé’áá bó. Ade bémadté dyad áte nê, dōó bétáné mod nhóg awě béchágé’áá bán Batimuse. Batimuse abédé-’εé mwān awě Timause. Ankwε ndím. Andyéé á nkəg ní nzii, áchōmē bwēm.

⁴⁷ Ade áwógé bán Yesue a dyad á Nazaret móó atóme’ nê, ambootéd abón, áhōbē aá, “A-Yesu, Mwān a mbyaa míme Dabide, wóg me ngól!”

⁴⁸ Bad híin békánné’áá mó áte, bēlāngē-’ε mó bán ádíib nsəl. Bon mó-’ε ambé ábōnē aá, “A-Mwān a Dabid, wóg me ngól!”

⁴⁹ Hée Yesue átyéémé bon áhōbē aá, “Nyéchéle mó.” Dōó béchénlé, bēlāngē mó bán, “Weétāgē áte. Tyéém ámín achênle wε.”

⁵⁰ Hée ane mod ábwémé kóte wíníí, apádé ásē, ápəg-ke wée Yesue.

⁵¹ Hée Yesue ásedtéé mó aáken, “Cheé ehedeé wée mbéle wε?” Ane mod anhób aá, “A-meléed, nhede mée rínyínen ámpē.”

⁵² Hée Yesue álāngéé mó aá, “Kăg, adúbe ádōn ádíidé wε bwām.” Abwōg-ábwōg ambootéd anyínen, áhídē-’ε Yesue.

11

Yesue asólé á Jerusalem née kōn

(Mat 21.1-11; Luk 19.28-40; Jōn 12.12-19)

¹ Ade Yesue ne ábē bembapεε békwogé apε á Jerusalem, benben ne myad mé Betpeg ne Betani á Ekone é Menzab, anlóm ábē bembapεε bébe á’sō,

² ălāngē bó aá, “Nyékag á dyad áde áde nyé á’sō nê. Nzé nyésólé sólén nyéētán née bétāngé etum é nchóm a ésel awě mod éedfidēē mbéd. Nyéhune mó, nyéhylene’.

³ Nzé mod asēdté nyé aáken, ‘Cheé ékás bon nyébelé nén?’ Nyéláa mó bán, ‘Sāngwée atógnéné chó, ălōm-me chó ámbíd ábwōg-ábwōg.’ ”

⁴ Hée békíí bon bétānē’ etum é nchóm a ésel éche bétāngé á mmwε-rí-nzii bon béhunné’.

⁵ Hée bad ábe bentyēēm benben ne áhed bésedtéé bó bánken, “Cheé nyébelé nê, nyéhunne éché ésel-ε?”

⁶ Bembapεε bēntimtén bó ngáne Yesue ánhōbpē aá béhōb. Dōó ábē bad-te bétédté bó bán békag.

⁷ Bēmpεén échē ésel wée Yesue, bétal chó échab mbóté ámín bon mó-’ε ádiidé’.

⁸ Bad híin bēntāl échab mbóté á nzii-tē ábe mó edúbé, ábíníí-’ε bésēlé’ e’kikag é’ míí, bétalé’ á nzii-tē.

⁹ Bad ábe békágé’áá mó á’sō ne ábe béhídé’áá mó ámbíd béhágé’áá e’saád bán,

“Hosána, Mekenag!

Nnam mbê ne ane awě apedé á dīn áde Sāngwée’.

10 Nnam mbê ne nkamlen míme eched sán Dabide, míme níhúé'. Hosána, Mekenag ne Dyöb áde ádé se ámín!"

11 Yesue apedé-'aá á Jerusalem, asól á Ndáb-e-Dyöb. Ansimén ekíde esyāāl. Ngáne pónde émmadté atóm, antím ámbíd á Betani ne ábē bembapεε dyôm ne bébε.

*Yesue abagé alín á ngəl ebómán
(Mat 21.18-19)*

12 Chän é'bíníí áde béhúé'é á Betani, nzaa enkób Yesue.

13 Annyín alín á ngəl nchabnede ne byaá ámín. Dóó akíí áhed ányín nzé móhεle se mókud e'pum áwedé-mín. Ade ápédé áhed enkéntánné epum ké ehóg étóméé byaá áyāle enén pónde eebédeé pónde eché ngəl échyáá' é e'pum.

14 Héε álāngεé ábē bwel aá, "Wéechyáá' é epum ámpē mbéd." Abē bembapεε bēnwōg áde Yesue áhóbé nê.

*Yesue anané bekáb bé nyongé
á Ndáb-e-Dyöb*

(Mat 21.12-17; Luk 19.45-48; Jón 2.13-22)

15 Yesue ne ábē bembapεε bēmpě á Jerusalem. Ade bépédé, ansól á Ndáb-e-Dyöb, ábootéd-te bad ábē békábé'áá dyön áwēd-te ananted. Ankuné betébelε ábē bad bépénlé'áá mōné ámín mekuu ámín, ákūnē-'ε metii míme bad ábē bésómmé'áá mbəngé mekuu ámín.

16 Enkēmmwaá-'ε aá modmod átómēn chōm é nyongé ké ehóg á eyáde é Ndáb-e-Dyöb-te.

17 Héε áyágtéé bó, áhōbē aá, "Eesaá mbále bán éténlédé nén bán, 'Echem ndáb échəgnéd bán ndáb e mekáne e melon mēsýāāl-ε?' Bon nyétimté chό mbwōg mé bechíb!"

18 Bepriε bémbáá ne bemeléde bé mbéndé bēnwōg áde Yesue áhóbé nê, bébootéd-te nzii ahead áwúu mó. Bon bémbē mbwōg áyāle ndun e mod esyāāl eché embé áhed émbē menyáké ne mekan míme áyágté'áá.

19 Ade ngukél épédé Yesue ne ábē bembapεε bēnhidé á dyad-té wê.

*Ayáged tângene alín á ngəl áde dénwē
(Mat 21.20-22)*

20 Mbweembwε, áde bétiméé ámbíd, bényín áde alín á ngəl ngáne áwédé kóáñne á nkan.

21 Héε Petro ákámtné dýam áde Yesue ámbenlé, bon álāngē mó aá, "A-Sán, nōné', alín á ngəl áde wēmbéé ebómán áwédé."

22 Héε Yesue ákwentanné aá, "Nyédúbe Dyöb ne nlém nýsyāāl.

23 Ne mbále, nlānge nyé nén mεé, kénzée awě álāā enén mbōod aá, 'Hidé ásē, éhūn á edíb é nkwe-te' bon adúbé ne nlém nýsyāāl aá dýam áde móhóbεé débēnléd ésebán apide', né débēnléd.

24 Né-óó, nlānge nyé mεé kéchéé éche mod ásédté Dyöb á mekáne-té, bon adúbe nén aá mókud chό, ákūd-te chό.

25 Pónde ké ehéé éché étyéémé wεé mókannε', nzé ewánléné mod melingá, élagsen mó, ábel nén awōñ Titée awě adé ámín mó-'ε ámpē alagsen wε mímon mbéb."*

*Héε kunze eche Yesue ébidé?
(Mat 21.23-27; Luk 20.1-8)*

* 11:25 Donje á kálag dé'só ábádé nchoo 26: "Nzé nyéelagsán bad bēmpēe mbéb, ké awēn Titée awě adé ámín éelagsénné nyé nímēn mbéb."

²⁷ Yesue ne ábē bembapεε bēmpě á Jerusalem ámpē. Ahyómmé'áá á Ndáb-e-Dyöb-te. Hê dōo beprise bémbáá, bemeléede bé mbéndé ne bad bémbáá bé dyad bépédé áwē.

²⁸ Dōo bésedteé mó bánken, “Kunze ehéé éwóó ábel nímén mekan? Nzé-módé abagé-'ε we ene kunze?”

²⁹ Yesue ankwentén bó aá, “Méesedéd nyé dyam ahóg. Nzé nyêkwěnténé dó, né me-'ε mēlāā nyé kunze echě n'wóó ábel nímén mekan.

³⁰ Nzéé ambě Jone kunze ádusen bad? Dyöb-ε ngé baányon?”

³¹ Bēn ne bēn bēmbootéd apenten bánken, “Nzé dehóbé nén bán 'Jone echě kunze enhúú ne Dyöb,' né ásedéd syánē aáken, ‘Cheé-ō enkān bon nyénkëndúbé mó?”

³² Bon nzé dehóbé bán, ‘Echě kunze ehúú ne baányon?’ ” (Béwógé'áá bad mbwóg áyāle bad bésyāāl bēndúbé bán Jone abédée nkal é'dáódan.)

³³ Né-óó, bēnkwentén Yesue bán, “Séebii'é.” Yesue mó-'ε antimtén bó aá, “Né ké me-'ε ámpē méeláá'é nyé kunze echě n'wóó ábel nímén mekan.”

12

Ngan e bebel-bé-nsón ábe bebébé nlém á abum (Mat 21.33-46; Luk 20.9-19)

¹ Hée Yesue ábóótédé ngan abenled ákalen bó. Anhób aá, “Mod nhóg ankwěł nzag e e'pum é' mel ábe bébenléé mím. Ankág chó, ábel bwāl wée bémineé ábē e'pum é' mel ábel mím, alón-'ε ebem wée bedyεε'é áwēd-te ánan menon. Ambě ene nzag wée bad ábe bóbóó békāb mbote áte, ákē á alon dēmpēe. ² Née pónde épédé echě bépádeé e'pum, ane nwóó-nzag anlóm awě mbaledε wée ábē bebel-bé-nsón ákobe mó áde asii dé e'pum.

³ Hée ábē bebel-bé-nsón békóbé ane mbaledε, bēwānēn mó, bésúúd-te mó ámbíd ne mekáá mé ngēn.

⁴ Dōo ane nwóó-nzag álómé mbaledε ampée. Bēnlōgēn mó á nló, bēwógéd-te mó e'són.

⁵ Nwóó-nzag ambé alóm mbaledε ampée, ábē bad bēnwūū ane ámpē. Bēmběł melemlen ne ekud émpēe, bēbōmé donge, bēwūē-'ε ábíníí.

⁶ Mod awě anlyog mó alóm abédée awe mwān-a-mwēnchóm awě ándanǵé bwāmbwam. Kááñne á asóg, dōo álóméé ane mwān ne mewēmtēn nén aá, ‘Ngáne ádíí awem mwān, bēbē mó edúbé.’

⁷ Bon áde ábē bebel-bé-nsón bényíné nées ane mwān áhúé'é, dōo bēn ne bēn bēhóbéé bán, ‘Ndyé-a-mbwóg nén, nyéhyag déwúu mó ábel nén eche mbwóg ésuuned syánē.’

⁸ Hée békóbé mó, bēwūē' mó, bēbwém-me mó ndim ámbíd e e'ké.”

⁹ Hée Yesue ásedteé aáken, “Bōob-póó, cheé nwóó-nzag ábenlé ábē bebel-bé-nsón? Apě awúú bó, ábē-'ε ene nzag wée bebel-bé-nsón bēmpēe.

¹⁰ Eyale é Dyöb éhóbe nén aá,

‘Aláá áde belón-bé-ndáb bēnchenéé, dōo átímé aláá dé etógnén abé.

¹¹ Sánǵwéé mó abelé nén, éde-'ε syánē menyáké á díd-te. Nyéēláá'é nē-ye?’ ”

¹² Né-óó, bad bémbáá bé Israel bēhédé'áá Yesue akób áyāle bēmbii bán áyāle echāb dōo ákálé enén ngan. Bon bēmbē mbwóg áyāl e ene ndun e mod embé áhed. Né-óó bēntédé mó béke.

Nsedtéd tñǵene asaa á tádsε (Mat 22.15-22; Luk 20.20-26)

¹³ Bēnlōm Befarisia ne bad bé epepé éche Herōde áke dé aseded Yesue dyam ábel nén békóben mó awusé.

14 Hée bépédé awē boŋ bēlāngē mó nén bán, “A meléed, sēbíi nén bán ekale mbále. Weekwognádté modmod. Weebáá-’ε bad mesó mé mbòm. Boŋ ekonte bad mam mé Dyöb ayáged. Mbéndé eche syánē ehóbe nén bán désanġe’ tááse wée Kaisεε, kâŋ e Roma-ye?”

15 Boŋ Yesue anchēm nímāb medogké, hée ásedtéé aá, “Cheé nyékagεé me. Nyéhyiined me mōné mé ekii n̄n̄n̄n̄ mó.”

16 Hée bépééné mōné mímed boŋ ásedté aáken, “Ediidinge éche nzéé chén, d̄in áde nzéé-’ε d̄én?” Bēnkwentén mó bán, “Abe Kaisεε.”

17 Dóo álāngεé bó aá, “Nyébag-kóo Kaisεε éche édé éche Kaisεε, nyébag-ke Dyöb éche édé é Dyöb.” Ade bēwógé n̄, yāl enkóm bó áte.

Nsedtéed tâŋgene mpuu

(Mat 22.23-33; Luk 20.27-40)

18 Besadusia bēmp̄e wée Yesue. Béndūbē bán mpuu méesaá ámbīd e kwéed. Dóo bēhóbeé bán,

19 “A-meléed, mbéndé e Mosεε ehóbe nén bán, ‘Nzé mod awóo mmwaád boŋ awéde áde bó ane mmwaád bépedéé mwān awále, mwānyan a abum ahóg atāngéné ane nkúd awóŋ ábel boŋ d̄in áde mwānyan déēbō.’”

20 Bōōb-pōó, bad bēbédé mod saámbé ábe bēmbīd abum ahóg. Mod a’só anwóŋ mmwaád boŋ awé áde bó mmwaád ne bépedéé bán awále.

21 Mwānyan awē anhíd mó anwóŋ ane nkúd a mmwaád. Móm̄pē awé áde bó ane mmwaád bépedéé bán awále. Melemlem mé dyam mēmbenléd ne awē alónténé bēláán.

22 Kááŋ bó mod saámbé asyāál bēnwōŋ ane mmwaád bēwé-’ε, áde bépedéé mwān awále. Kááŋne á asóg ane mmwaád móm̄pē anwé.

23 Bōōb-pōó á pōndé e mpuu, mmwaád awē nzéé ane mmwaád áchagnédté áyāle bó moosyāál saámbé bēnwōŋ mó?”

24 Hée Yesue átímtanné bó aá, “Nyépane’ áyāle nyéesōŋtεnεé chōm éche eyale é Dyöb ehóbeé, nyéesōŋtεnεé-’ε ngáne ngíne e Dyöb ésógé abé.

25 Pōndé echē bad bēpuú’ε ámbīd e kwéed, mewóŋgé méebáá ámpē. Bad bēbē nēŋgáne ángel éche édé ám̄in, bēewóŋnéé.

26 Bōōb-pōó, tâŋgene mpuu, kíné nyéeláá’ε á kálag e Mosεε á epeđ echē ehóbe áyāle mwā bwel awē ahyáá’áá-ye? Ahed, éténlédé bán áde Dyöb álāngεé Mosεε tâŋgene Abrahamε, Aisigε ne Jakōbe ábe bēmmad awé, Dyöb dénhōb aá, ‘Méé ndé Dyöb áde Abrahamε, Aisigε ne Jakōbe.’

27 Nē álúmté nén bán bédé á alongé. Dyöb ádíi Dyöb á bad ábe bédé á alongé, saké Dyöb á bad ábe bēwédé. Nyépane’ bwāmbwam.”

Mbéndé ébe éche étómténé etógnén abé

(Mat 22.34-40; Luk 10.25-28)

28 Meléede a mbéndé nhóg awē ambé áhed anwóg chōm éche bēhóbeé. Adē ányíné aá Yesue abagé Besadusia nkwenten mí bwām, ansédéd Yesue aá, “A meléed, átínté e mbéndé ésyāál, mbéndé eché étómténé etógnén abé?”

29 Yesue ankwentén mó aá, “Mbéndé echē étómténé etógnén abé edii mbéndé echē ehóbe nén aá, ‘A-bad bé Israel nyéwóglen: Sāŋgwéé ádeđ Dyöb, mwēmpen-εé adé Sāŋgwéé.’”

30 Edāŋ Sāŋgwéé ádon Dyöb ne nímōŋ nlém r̄syāál, ne échon edáədāŋ ésyāál, ne nímōŋ mewēmtεn mésyāál, édāŋ-’ε mó ne échon ngíne ésyāál.’

31 Echē elonténé ébe echē chóm̄pē edé etógnén, edii echē ehóbe nén aá, ‘Edāŋ mwānyon nēŋgáne édáá échon yāl.’ Mbéndé empée eesaá echē étómténé etógnén abé nēŋgáne échén ébe.”

32 Hée ane meléede a mbéndé álāngεé Yesue aá, “A-meléed etāngéné. Ekale mbále wée Dyöb ádíi ahóg, Dyöb démpēe déesaá-’ε étóméé mwēmpen.

³³ Mod áðəŋ-’ε μό ne nímē nlém rísyāāl, ne nímē mewēmten mésyāāl, ne eche ngíne esyāāl, áðəŋ-’ε mwānyəŋ ngáne ádáá eche yāl, atómténé etógnén abe tómaa ábe Dyöb mende níme béhyāntéé ne mende mémpēe.”

³⁴ Ade Yesue ányíné aá ane meléede a mbéndé ahóbné debyéé, anláá mó aá, “Nkamlen ní Dyöb méechabnedéé wε yāl.” Ambíd enê modmod enkēnchū’é Yesue dyamdyam aseded ámpē.

Nsedtéd t̄əŋene Ane-awě-Béwógté
(Mat 22.41-46; Luk 20.41-44)

³⁵ Yesue ayágté’áá á Ndáb-e-Dyöb. Ahead dóo ahóbéé aáken, “Chán be-meléede bé mbéndé béhele béhōbē bán Ane-awě-Béwógté abidé á mbyaa níme k̄əŋ Dabidε?”

³⁶ Dabidε mwēn anhób áde Edáəðəŋ éche Esáá émbēē mó áte aá, ‘Sáŋ Dyöbe anláá awēm Sáŋgwéé aá, Dyéé áwēm ekáá émbáá káəŋ ne á pónde échē mébenlé boŋ ékəgtéd ábōŋ bad bé ekəyí ámīn ne mekuu.’

³⁷ Néε Dabidε mwēn ásébpé mó achəg aá Sáŋgwéé, chán-nō Ane-awě-Béwógté áheleé abé awe mwān?”

Elébé t̄əŋene bemeléede bé mbéndé
(Mat 23.1-36; Luk 20.45-47)

Ndun e mod ewóglánnáá Yesue áhed ne menyīŋge bwāmbwam.

³⁸ Ade áyágtéé bó anhób aá, “Nyétéd pónde ne bemeléede bé mbéndé, bédəə’ mengombe níme ríchábé ahyómēn áte. Bédəə-’ε bán bad bélente bó ne edúbé ésyāāl á mebwóg néε á dyəŋ-tē nē.

³⁹ Bédəə-’ε metii mé edúbé adyεε á ndáb é mekáne, bédəŋ-’ε e’tál bé edúbé á hōm á ngande.

⁴⁰ Bédume’ mbwóg é bekúd, bédogné-’ε bad ntóŋ-ntóŋ mé mekáne. Békūd nkógsen níme ríchábé ámīn.”

Mende mé nkúd a mmwadd
(Luk 21.1-4)

⁴¹ Yesue andyεé benben ne ntyág níme béhágé’áá mənέ mé mende áte á Ndáb-e-Dyöb, ánəné’ ngáne bad béhāgkē mənέ áwēd-te. Ekuđ é behəŋ bé bad béhágé’áá ekud é mənέ.

⁴² Dóo ntógétōke a nkúd a mmwadd ápedé, boŋ áhāg mənέ mé ekii níme ndé ké bedáλεε bébe.

⁴³ Héε Yesue áchágé ábē bembapεε benben boŋ álāŋgē bó aá, “Ne mbále, nlāŋge nyé mεé, nímén ntógétōke mé mmwadd ríhédé mənέ tómaa ábén behəŋ bé bad bésyāāl.

⁴⁴ Mənέ níme ábē bad béhédé, ndii mənέ níme ríchóbé bó ásē, boŋ anén mmwadd ne atóg áde ádíí, ahédé mənέ rísyāāl níme áwóó, rísyāāl níme ámbēē atəgnan yāl.”

13

Yesue ahóbé aá
bépāŋtéd Ndáb-e-Dyöb
(Mat 24.1-2; Luk 21.5-6)

¹ Yesue ambíd á Ndáb-e-Dyöb. Ade ábídeé nē dóo awě mbapεε nhóg álāŋgεé mó aá, “A-meléed nənέ’, meláá ne nlóŋtéd ní Ndáb-e-Dyöb mén nóbóo bwāmbwam.”

² Yesue ankwentén mó aá, “Enyíne’ échén ngíne é nlóŋtéd-ε? Aláá ké ahóg déelyəgkē ámīn e waáb, bépāŋtéd mó áte mésyāāl.”

E'bébtéd é' mekan ábe bébenléd
(Mat 24.3-14; Luk 21.7-19)

³ Yesue ankě adyεε á ekone é Menzab mín. Echê Ekone ébédé á müde ní Ndáb-e-Dyöb. Ahed dóo Petro, Jemse, Jonε ne Andreyá bépédé bonj béléngē mó wée bóbbō bēnpεn bēbédé bán,

⁴ “Láá sé pónde echē nímén mam mébenlédte, éláa-’ε sé e’chemléd ábe bēlūmēd bán pónde echē mébenlédte epedé.”

⁵ Yesue anláá bó aá, “Nyétéd pónde nyéemwāg-ke se modmod ádog nyé.

⁶ Bad híin bépě á dīn ádēm bēhōbē bán, ‘Mε-εé ndé Ane-awě-Béwógté.’ Bédög-ke bad híin.

⁷ Nzé nyéwógé bán nzum éwante’ ké’ε nyéwógé nzunze é nzum, nyéētāgē áte. Nén átāngéné abenled, bonj nē déēlūmtēē nén bán asóg amáá aεε.

⁸ Alonj ahóg détyēmēn ádíníi nzum. Nkamlεn nhóg-ke ntyēmēn nímíníi. Ndōob eénāgnéd mebwóg ne mebwóg, nzaa-’ε ēbē. Nén débē nēngáne mewε mé’sō nímε mmwáád áwógεé nzé ahede achyáa.

⁹ Nzé nímén mam mébóótédé-’ε abenled, nyétédεn yāl pónde áyāle békōb nyé, bébe nyé á mekáá mé bad bé kóte. Béwanén nyé á ndáb é mekáne, nyétyém-με á nkáásé á’sō é’ benkamlεne ne kēn é bad á yāl echēm. Nén débēnléd ábel nyékale bó nkalanj ní bwám.

¹⁰ Bétāngéné née bésébpé nkalanj ní bwám akal melonj mé nkōjsé áte mésyāāl, bonj asóg dépě.

¹¹ Nzé békóbé-’ε nyé bonj bépééné nyé á kóte, nyéētāgē áte, áyāle dyam áde nyéhōbpē. Nzé ene pónde epedé, nyéhōb kéchéé echē ébagnéd nyé, áyāle dyam áde nyéhōbpē débīd ne Edāádān éche Esáá saké ne nyé.

¹² Bad bēbagé baányān á mekáá mé bad bēmpēe áwúu bó. Besáá-bé-bān bēbēl melemlεn ne ábab bán. Bán-ne ámpē békunnén besáá bóobe benyáá yāl ábel bēwúu bó.

¹³ Moosyāāl ākōó nyé áyāl e dīn ádēm. Bonj kēnzéé awě ākaán nímē metake nlém káán ne á asóg, ākūd e’soósonj.”

Dyam dé ébébtéd

(Mat 24.15-28; Luk 21.20-24)

¹⁴ “Nyéenyīn née ekúkú é akan éche épεene e’sōn á’sō é’ Dyöb édíi wée énkéntāngénne abé.” (Nyé ábe nyéláa’ nímén mekan nyésōnεn mó bwám.) “Nzé nyényíné nē, bad ábē bédé á Judeya bétōm mehélé, béke bésōm á e’kone mín.

¹⁵ Mod awě adé á nnonj ní ndáb mín eētāgné akε á ndáb-te átéd chōmchōm.

¹⁶ Mod awě mó-’ε adé á nzag-tē, eétīmē ámbīd átéd eche sōte.

¹⁷ Ebē ebébtéd ne bebaád ábe bēbē nkog ne ábe bēmwāntē nímē mesú.

¹⁸ Nyékānne nén bán, nén déebenlād ne nyé á pónde e nkóg áde ahéb ádíi ngīne bwāmbwam,

¹⁹ áyāle ndānge echē ēbē ábē e’pun, ēbē ndīn echē eébéde mbéd bootya Dyöb áhāge nkōjsé aεε epun é’chiī. Dyamdyam née áde débēnléd-tāá ámpē mbéd.

²⁰ Bonj Sāngwéé amáá ábē e’pun é’ metake asél áte. Nzé énkēmbé nē, né modmod éechōngé. Bonj á etútú é bad ábe ápwédé, asélé ábē e’pun áte.

²¹ Ene pónde nzé mod alāngé nyé aá, ‘Nyénōne’, Ane-awě-Béwógté mōnén’ káa, ‘Nōné’ mōníníi,’ nyéedúbpé’.

²² Bad híin bēbīd, bó mod té ákalé metóm aá móo módē Ane-awě-Béwógté. Bekal bé’dāádān bé metóm ámpē bēbīd. Bēbelé menyáké, bēlūmtē-’ε e’chemléd híin. Bēbel nén ábel bonj bédog bad ábe Dyöb ápwédé, nzé nzii edé ádog bó.

²³ Nyétéd pónde. Nlāngé nyé nímén mam mésyāāl á’sō é’ pónde.

*Epe é Mwän-a-Moonyon
ne asóg dé nkõjsé*

(Mat 24.29-31; Luk 21.25-28)

²⁴ “Abê e’pun-ne, áde pónde e ndange ne étómmé tómmén
‘etondεε ákwε ehintén,
ngõn-ne esóg apen,

²⁵ betintine bébíd ámín béhūn ásē,
ngine-’ε éche éde ámín énəñnéd á e’dii.’

²⁶ Ene pónde dǒó bényinnē née Mwän-a-Moonyon áhúé’é á mbag-té ne ngum
ne ehúmé é ngine.

²⁷ Alōm éche ángel á metóngé mé nkõjsé mésyāāl méniin, álad bad ábe Dyõb
ápweédé áte, bootya atóngé dé nkõjsé ahóg ápe ádíńí.

*Yesuε áá bad bétéd
eláñsén ne alín á ngəl*

²⁸ “Nyétéd eláñsén ne alín á ngəl. Nzé ngen ébóótédé byaá békāālē abided,
nyébele nyébíí bán nchon rídé benben.

²⁹ Melemlem nzé nyényíné nímén mekan mésyāāl mébenlad, nyébíí nén
bán, Mwän-a-Moonyon akwogé ape, adé-’ε benben.

³⁰ Ne mbále, nlānge nyé nén mée, enén nyongel e bad éđii ebé ámín bon
nímén mekan mésyāāl mébenlád.

³¹ Nkon ní mín ne nkõjsé bémaá bon ábēm e’yale bébē abé ne abé.

*Modmod eebii’ε epun
éche Mwän-a-Moonyon ápeé*

(Mat 24.36-44)

³² “Modmod eebii’ε epun pen ké’ε pónde echē nímén mam mébenlédté. Ké
ángel éche éde ámín éebíí’ε, ké Mwän ámpē eebíí’ε. Titée mwempen mó abíí
pónde eche nímén mekan mébenlédté.

³³ Nyétéd pónde, nyébonɛn, áyāle nyéebíí’ε áde ene pónde épeé.

³⁴ Ebē nēngáne mod awē anlédé eke ake, bon alyágnéd ábē bambaledε ndáb,
ábe nhóg-téé míme nsón, aláá-’ε mod awē anone’ mmwε mé e’ké áá ábele nsón
bwâm.

³⁵ Né-ǒó, nyétéd pónde áyāle nyéebíí’ε pónde echē Sāngwéé a ndáb ápeé.
Ahele ápē ngukél, ké’ε melúde, ké’ε epog é mbwεmbwε, ké’ε mbwεmbwε.

³⁶ Nzé apedé táléd eetāngeneé née átáné née nyékúneé.

³⁷ Né-ǒó, saké nyé bēnɛn rílangéé ádén dyam bon nlānge moosyāāl mée,
‘Nyétéd pónde.’ ”

14

Béhagke Yesuε

(Mat 26.1-5; Luk 22.1-2; Jõn 11.45-53)

¹ Enlyǒg e’pun é’be, Ngande e Nnyíme-ámín ne e Ewεle-é-Ngēn ápe áte.
Beprise bémbáá ne bemeléede bé mbéndé béhágé’áá mwane ákób Yesuε á
mesǒm-té, áwúu mó.

² Bon bénhōb bán, “Deébēlē nē á mbwε ní ngande áyāle né bad bēpēén
epuutéd.”

Béwógté Yesuε á Betani

(Mat 26.6-13; Jõn 12.1-8)

³ Yesuε ambé á Betani á ndáb wéε Simōne awē ankwě nkole mé meləñ. Ade
ádyákgē ndyééd nē, dǒó mmwaád nhóg ápedé ne apom á dyǒg dé elod é bwâm
áde dēnlēl nkun bwāmbwam. Adé dyǒg bébénlé dǒ náđ. Hē dǒó ákógté nló mé
epom bon ásyógé Yesuε áde dyǒg á nló.

⁴ Boŋ donge á bad ábe bébedé áhed bēnliŋ bwāmbwam, bésēdté nhóg ne aníníí bánken, “Cheé ékáá boŋ anén mmwaád ábēbtē’ enén ndín e dyǒg?”

⁵ Béhéle’áá-se bésóm adén dyǒg nkun míme ríchábé ámín, bétéd mímé mōnē bébē betóótōkē bé bad.” Né-ǒó, bēnhōbēn ane mmwaád bwāmbwam.

⁶ Boŋ Yesue anláá bó aá, “Nyéchene mó. Cheé nyétagtēé mó? Abēnlé me kase e dyam echē eboó bwāmbwam.

⁷ Betóótōkē bé bad bébē ne nyé pón dé ésyāāl, pón dé ké ehéé echē nyédáá-’e bó awōngēn nyēhele nyēwóngén bó, me pen méebáá ne nyé pón dé ésyāāl.

⁸ Abélé wēe mekáá mēpédé mó. Asyǒgé me dyǒg á nló áboŋsen nlíme mímem á’sō é’ pón dé.

⁹ Ne mbále, nlānge nyé nén mēé, kéhéé áde nkalan mí bwām mékanlédte nkōŋsé áte rísyāāl, bēhōb dyam áde anén mmwaád ábélé ákamten mó.”

Judase akwēnténé Yesue asóm

(Mat 26.14-16; Luk 22.3-6)

¹⁰ Ambíd e nē, mbapēe nhóg átíntē e bembapēe dyôm ne bébe awē béchágé’áá bán Judas Iskariōde ankē beprise bēmbáá atán ábel boŋ ásóm Yesue áwāb.

¹¹ Beprise bēmbáá bēmbē menyinje ne dyam áde Judase ánlāá’é bó, bēhōb-pe bán bébē mó mōné. Né-ǒó, Judase ambootéd nzii áhed ásóm Yesue.

Yesue ne ábē bembapēe bédyéde

Ndyéed e Nnyíme-ámín

(Mat 26.17-25; Luk 22.7-14, 21-23; Jōn 13.21-30)

¹² Bǒǒb-pǒó pón dé e ngande e Ewēle-é-Ŋgēn empě. Mbwe mé’sō áde béwúé’áá bán bé rídyōŋ mí mbód áboŋsen ndyéed e Nnyíme-ámín, bembapēe ábe Yesue bēntān Yesue, bésēdté mó bánken, “Héé wédǎŋgé wēé séboŋsen we ndyéed e Nnyíme-ámín?”

¹³ Dǒó Yesue álóméé bembapēe bébe ne nlyǒgtén nén aá, “Nyékag á dyad-tē, mod ábomén nyé awē apémé apom dé mendíb, nyéhíde mó.

¹⁴ Nzé nyēpedé, nyéláa nwóó-ndáb bán, ‘Meléede ahóbé aáken, Héé toŋ e beken édíí echē módyēē ndyéed e Nnyíme-ámín áte ne ábē bembapēe?’

¹⁵ Alūmēd nyé toŋ echē ekalé áte echē bémáá aboŋsen, bēnábpe-’e áte. Ene toŋ edé ámín á ndáb-te. Nyéboŋsen syāā ndyéed áhed.”

¹⁶ Héé ábē bembapēe bēhídté boŋ békǎg á dyad-tē. Bēntān mekan mésyāāl ngáne Yesue ánlāá’é bó, bēmbōŋsén-ne ndyéed e ngande e Nnyíme-ámín.

¹⁷ Néé ngukél épédé Yesue ne ábē bembapēe dyôm ne bébe bēmpě áhed.

¹⁸ Bédyágé’áá ndyéed á tébele. Pón dé echē bédyákē ndyéed nē, dǒó Yesue áhóbéé aá, “Nlānge nyé nén mēé, nyé mod nhóg ábē me á mekáá mé bad bé ekǒyí, nyé nhóg awē adyág ndyéed ne me.”

¹⁹ Nén dēmbēl bembapēe bēnsudén bwāmbwam. Bēmbootéd mó aseded nhóg ámbíd e aníníí bán, “Ndúbpe mēé saké me.”

²⁰ Dǒó átímtanné bó aá, “Mod nhóg átíntē nyé bad dyôm-ne-bébe, mod awē sūmǒ séētǒdé ewēle á dīse-tē atǒde ahóg.

²¹ Mwān-a-Moonyōŋ áwē ngáne éténlédé boŋ medim ne ane mod awē ásóm mó. Ebágáá bwām ne ane mod nzé bēnkēntǒgen mó achyáa.”

Ndyéed echē Sáŋgwéé

(Mat 26.26-30; Luk 22.14-20; 1 Kǒr 11.23-25)

²² Ade Yesue ne ábē bembapēe bédyákē ndyéed nē, dǒó átédé ewēle, ásāgnān Dyōb, boŋ ákabtáád áte, ábagé ábē bembapēe áhōbē aá, “Nyékob nén, yǎl echēm nén.”

²³ Ambíd e nē, antéd mbwendé mí míim, ásāgnān Dyōb, ábagé bó. Bó moosyāāl-le bēmwāg.

²⁴ Dóo Yesue álângeé bó aá, “Mmēm mekií mômén níme nisyógké á nló mí bad híin. Mmém mekií médií mekií mé melġ mékōlġ.

²⁵ Ne mbále, nlânge nyé nén meé, méemwáá nímén mġm ámpē kááj ne epun éche mémwēē mó ekóólé á nkamlen ní Dyöb.”

²⁶ Bénkōn nkāngé mé nságnen. Néε bémáá akón, bēnkġ á Ekone é Menzab.

Yesue ahóbé ngáne

Petro ábāngē mó á yāl

(Mat 26.31-35; Luk 22.31-34; Jōn 13.36-38)

²⁷ Yesue anláá ábē bembapεε aá, “Nyé baásyāāl nyéēnyāgéd, nyétēdē me. Ayāle éténlédé á kálag e Dyöb nén bán,

‘Měwūū nnōn-a-mbód, mbód ésyāāl épāntéd áte.’ ”

²⁸ Dóo Yesue áhóbéé aá, “Boŋ áde ápuúdté me, mġkġ á’sō á Galilia áwed-taá nyétānnē me.”

²⁹ Dóo Petro áhóbéé aá, “Ké moosyāāl annyāgéd átēdē wε, me pen méetēdēé wε.”

³⁰ Dóo Yesue álângeé Petro aá, “Ne mbále, nlânge wε meé, nkuu nén dēn, nchóm-a-kúb adēhób aá mótdō’ ngen ébe wēbāŋ me á yāl ngen éláán.”

³¹ Héε Petro ábádtēé mó áte aá, “Ké nkāŋ móó bésēlēē me, méebāngé wε áyāl mbéd.” Bembapεε ábíníí bésyāāl bómpē bēnhōb melemlen.

Yesue akánné á Getsemani

(Mat 26.36-46; Luk 22.39-46)

³² Ambíd e nē Yesue ne ábē bembapεε bēnkġ á abwóg á hōm áde béchágé’áá bán Getsemani. Ade bépédé Yesue anláá bó aá, “Nyédyεε hén, me-’ε níke nkáne.”

³³ Ankéén Petro, Jemse ne Jōne ákáne. Ndāngε ne metake híin bēmpií mó á nlém-tē.

³⁴ Dóo álângeé bó aá, “Ndāngε echġ edé me á nlém, ehεle-se ewúú me. Nyélyāg hén, nyédyεεn me epin.”

³⁵ Ansídé á’sō, abwém yāl ásē, boŋ ákānne’ aá nzé nzii edé echġ ene pōndé e metake éhεlé se ébāmē mó, ébame.

³⁶ Anhób aá, “A-Tē, Titée, ehεle ébel kéchéé. Kobén me nímén metuné. Boŋ ké nē, bġl ngáne ébōŋnédē wε, saké ngáne ébōŋnédē me.”

³⁷ Ade áamáá akáne, antġm ámbíd wéε ábē bembapεε béléáán. Antán néε békúneé. Dóo álângeé Petro aá, “A-Simōn, ekúne’-ε? Cheé ékáá boŋ weéhεle awεsen ádyεεn me epin ké háwa póg?

³⁸ Nyédyεε epin, nyékānne-’ε ábel nén Dyöb déemwāg-se mekágsen mépiinéd nyé. Nlém nídáá ábel boŋ ekob é yāl edé mbwóg.”

³⁹ Antġm ámbíd ámpē, áke akáne melemlen ngáne ánsēbēē akáne.

⁴⁰ Ade átímé ámbíd ámpē, antán néε békúneé áyāle e’chó bēmbē bó á dġd bwāmbwam. Né-óó bēnkēmbíí’ε chōm éche bēlāngéé mó.

⁴¹ Ade átímé ámbíd ngen éche élónténé éláán dóo álângeé bó aá, “Nyélyāgé nyékúne’ nyékómme-’ε nyé áte-yε? Nē ákwógé! Pōndé epedé echġ bēbéé Mwān-a-Moonyōŋ á mekáá mé bad bé mbéb.

⁴² Nyépáde ásē dékag. Nyénōne’, mod awġ akií me ntúré mó ahúe’ nén.”

Békóbé Yesue

(Mat 26.47-56; Luk 22.47-53; Jōn 18.3-12)

⁴³ Ehób éepedéé Yesue amaa á nsal boŋ Judase ápag. Judase abédéε mbapεε nhóg átínté e bembapεε dyōm-ne-bébe ábe Yesue. Ampġ ne ndun e mod. Ábē bad bēnwālē nkwaté ne mbid. Beprisε bēmbáá, bemeléde bé mbéndé ne bad bēmbáá bé Israel bóó bēnlōm bó.

⁴⁴ Bɔɔb-pɔɔ, ntúré awe Yesue ammad bó e'chemléd abe aá, “Kéznéé awě méhē tál, né mod awě nyéhedeé mōne. Nyékòb mó, nyécháa-’e mó bwâm boŋ nyékeene mó.”

⁴⁵ Judase apedé-’aá pēén, átōmē-’e wée Yesue. Anhób aá, “A-meléed.” Ahé-’e mó tál.

⁴⁶ Héé ábē bad békóbé Yesue, bēwéd-te mó acháa.

⁴⁷ Dóo mod nhóg átíntē e bad ábe bém̄bē ne Yesue ádólé nkwáté á abám, née átómté mó, asél-le ntân awě prise ambáambáa etúu.

⁴⁸ Héé Yesue áseɗtēé bó aá, “Nchíb móo rídii awě nyépééné nkwáté ne mbid ahye dé akób-e?”

⁴⁹ Epun tée mbédé á Ndáb-e-Dyöb ne nyé, rí'yāgtē bad, nyéekóbe me. Boŋ e'yale é' kálag e Dyöb é'tāngéné alón.”

⁵⁰ Hē dóo bembapēe bésyāal bétédte mó, boŋ bétómé mehélé.

⁵¹ Kódemod póg ebédé áhed, ehídē Yesue ámbid. Anwáá dásō esóŋ é abad chēmpen. Abē bad bēnkǎg bán békób mó,

⁵² boŋ antóm mehélé ne nsòb, áchennéd-te bó échē esóŋ é abad.

Békáádté Yesue

(Mat 26.57-68; Luk 22.54-55, 63-71; Jón 18.13-14, 19-24)

⁵³ Bad ábe bēnkòb Yesue bēnkeén mó wée Prise Ambáambáa. Beprise bém̄báá, bad bém̄báá bé Israel ne bemeléede bé mbéndé bēmpǎ bēlāden áhed.

⁵⁴ Ade békēneé Yesue nē, Petro ahidé’áá mó ámbid mwǎ etūn káŋŋ asól á eyáde éche prise ambáambáa. Andyéé áhed ne benon bé Ndáb-e-Dyöb, áwālē muú.

⁵⁵ Bɔɔb-pɔɔ, beprise bém̄báá ne bad bé káánsel bésyāal bēhédé’áá bad ábe bēbíd mbóŋ é metóm á nló wée Yesue ábel nēn bēwúu mó, boŋ bēnkēnkudté ké nhóg.

⁵⁶ Ekud é bad émbid mó mbóŋ é metóm á yǎl, boŋ béēbédéé nsal nhóg.

⁵⁷ Héé donge á bad bétyéémé ámín, boŋ bēbídē mó mbóŋ é metóm bán,

⁵⁸ “Sēnwóg née áhóbé aá, ‘Mēbootéd enén Ndáb-e-Dyöb echē baányon bélóo, nlón empée, átíntē e e’pun é’láán echē bēlōŋneé mekáá.’ ” ⁵⁹ Boŋ ké nē, échab mbóŋ é metóm énkēmbáá nsal nhóg.

⁶⁰ Dóo prise ambáambáa átyéémé ámín átíntē e bad bé káánsel, boŋ áseɗté Yesue aáken, “Weewóo’ é dyamdyam ahób tñgēne dyam ádē ábén bad bēhóbé wē á yǎl-e?”

⁶¹ Boŋ Yesue andyéé mó ngēn, enkēnkobéé dyamdyam. Dóo ene prise ambáambáa éseɗtēé mó ámpē aá, “Wē-eé edé Ane-awě-Béwógté, Mwǎn awě Dyöb áde bad bēbagēé edúbé-yē?”

⁶² Héé Yesue ákwentanné aá, “Méé ndé, nyéenyīn-ne ngáne Mwǎn-a-Moonyon ádyéé á ekáá émbáá é Dyöb a Ngum. Nyéenyīn-ne née áhúé’ é á mbag-tē ámín.”

⁶³ Héé prise ambáambáa ányábé mbóté álúmed nēn aá mólii, boŋ áhōbē aá, “Mbóŋ ehéé émpēe déhedeé?”

⁶⁴ Nyēwógé née ásyáá’ é Dyöb. Cheé nyéhóbé á yǎl eché?” Héé bó moosyāal bēhóbéé bán atāngéné awé.

⁶⁵ Donge á bad bēmbootéd mó meléed asob á yǎl, békūtān mó mīd, bēbómé mó, bēlāngē-’e mó bán, “Láá-’e sé mod awě abómé wē.” Dóo bembaledé bétédé mó, boŋ bébootéd-te mó abómteɗ.

Petro abáá Yesue á yǎl

(Mat 26.69-75; Luk 22.56-62; Jón 18.15-18, 25-27)

⁶⁶ Wée Petro ádyéé ásē nê á eyáde-tê, dóo mbaledε nhóg a mmwaád awě prise ambáambáa ápédé.

⁶⁷ Annyín Petro awále muú. Dóo ásímné mó bonj álāngē mó aá, “Wémpē wembé ne Yesue awě abidé á Nazaret.”

⁶⁸ Bonj Petro ambánj éché ehób á yǎl, aá, “Meebíí’é, meesónján-naá chǒm éche éhóbéé.” Amaá-aá ahób nê abíd-te á mmwε. Ene póndé chēn nchóm-a-kúb antónj. *

⁶⁹ Dóo ane mbaledε ányíné mó ámpē bonj ábootéd bad ábe bēbédé benben aláa aá, “Anén mod adé nhóg awě mómpē ahídé’áá Yesue.”

⁷⁰ Bonj Petro ambánj á yǎl ámpē. Eebeméé áte ámpē dóo bad ábe bentyēēm áhed bēlāngéé Petro bán, “Mbále chó edé. Edé nhóg awě ahídé’áá Yesue, áyāle ebídé á Galilia.”

⁷¹ Bonj Petro ambootéd yǎl ebómán abε ámwāg-ke melě aá, “Meebíí’é anén mod awě nyétúbéé dīn nê.”

⁷² Melemlem mé póndé nchóm-a-kúb antónj ngen éché élónténé ébe. Hée Petro ákamténé chǒm éche Yesue ánlāā’é mó aá, “Nchóm-a-kúb adéhób aá mótōo’ ngen ébe wěbān me á yǎl ngen éláán.” Hée Petro ábánlé awé, ábooted-te achii.

15

Payledε akáádté Yesue

(Mat 27.1-2, 11-14; Luk 23.1-5; Jǒn 18.28-38)

¹ Bīn é’sánjé-’aá sánjén, beprise bēmbáá, bad bēmbáá bé Israel, bemeléede bé mbéndé ne bad bé káánsel embáá e bad bé Israel békób mbom. Bēnhǎnj Yesue, bēbāg-ke mó á mekáá wée Payledε.

² Hée Payledε ásedtéé mó aáken, “Wε-εé edé kǎn e bad bé Israel-ε?” Yesue ankwentén mó aá, “Ngáne éhóbé.”

³ Beprise bēmbáá bēmbān mó ekud é mekan á yǎl.

⁴ Hée Payledε ásedtéé mó ámpē aá, “Weewóó’é dyamdyam áhób-ε? Mmǒn wógé’ ekud é mekan éché bēhóbéé wε á yǎl.”

⁵ Bonj Yesue enkēnhóbpe dyamdyam. Nê dénkōmēd Payledε yǎl áte.

Bán Yesue atǎngéné awé

(Mat 27.15-26; Luk 23.13-25; Jǒn 18.39-19.16)

⁶ Bǒǒb-pǒǒ, émbē nén bán á Ngande e Nnyíme-ámīn, Payledε ammentén mod a mbwǒg nhóg abíded á mbwǒg. Ane mod abágé’áá mod ké ahéé awě bad bēnhédénné mó.

⁷ Ene póndé mod nhóg ambé á mbwǒg awě béchágé’áá bán Barabase. Abédé ne bad ábe bentyēēmēn nkamlēn ní Roma.

⁸ Dóo ndun e mod épédé wée Payledε, bonj bēlāngē mó bán ábel ngáne ámenténé bó abele.

⁹ Hée ásedtéé bó aáken, “Nyéhede’ bán, mbídted nyé kǎn e bad bé Israel-ε?”

¹⁰ Abíí áde ámbīí’é aá kónjí edé beprise bēmbáá áte á yǎl wée Yesue, dóo dēnkǎnj bonj ásedéd bó nê.

¹¹ Bonj beprise bēmbáá békóné’áá ábē bad bán bēláa Payledε bán ábídted bó dásō Barabase.

¹² Payledε ansédéd bó ámpē aá, “Chán-nō nyéhedeé bán mbel ne mod awě nyéchǎgēé bán kǎn e bad bé Israel?”

¹³ Dóo bēlébpeé e’saád bán, “Bomé mó á awǒg.”

¹⁴ Hée Payledε ásedtéé bó aáken, “Áyāle chán? Ebébtéd éhéé ábélé?” Bonj bēnnabé abón bán, “Bomé mó á awǒg.”

* **14:68** Donje á kálag dé’só déewóó’é Ene póndé chēn nchóm-a-kúb antónj.

15 Né-ǎǎ, ngáne Payledε áhéde'áá aá mókóded ábê bad mewemten, ambídtéd bó Barabase. Ambě kunze aá, sánze ébǎm Yesue, bonj béke bebome-ε mó á awǎg.

*Sánze éwélé Yesue
(Mat 27.27-31; Jǎn 19.2-3)*

16 Sánze éntéd Yesue, békēen mó á eyáde é nkamlεε, bélād-te baáb abíníí áte áhed.

17 Bénwāād mó mengombe nime méyǎge' nime méwǎgné mengombe mé kǎn, bélǎn-ε ekóté é mechǎ, béhé mó á nló. 18 Dǎǎ bebóótédé mó awel, bélenté mó bán, "A-kǎn e bad bé Israel, edúbé ébê ne we!"

19 Bébómé'áá mó ntónj á nló, bésobtád mó meléed á yǎl, bébwǎgkē-ε mó mebóbónj áwel mó.

20 Ade bémáá mó awel, bénhūd mó nímê mengombe á yǎl, bétiméd mó éche mbóté chēn á yǎl. Néε bémádé nê, bēnkēén mó áke dēbome mó á awǎg.

*Bébómmé Yesue á awǎg
(Mat 27.32-44; Luk 23.26-43; Jǎn 19.17-27)*

21 Ade békagké nê, dǎǎ bebómmé mod awě ambíd á dyad á Sirinε. Dín démbē mó bán Simǎne. Simǎne abédéε sáá awě Alesandaa bó Refuse. Simǎne atómé'áá ásól á dyad-tê. Dǎǎ békóbé mó bonj bényǎgtē mó bán ápēm awǎg áde Yesue.

22 Dǎǎ bépédé hǎm áde béchágé'áá bán, Golgota, awě adé nēn bán, "Hǎm dé Ebónjél é Nló."

23 Áhed bēmbě Yesue mǎm nime béládténé ne bwel ábe béchǎgeé bán mǎa* bán ámwê, bonj enkēnkwenténné amwé.

24 Bēmbomé Yesue á awǎg. Bēnsíd mbambú ákab éche mbóté.

25 Mbwεmbwε á ngǎn abog dǎǎ bebómmé mó á awǎg.

26 Chǎm éche bēntenlé á awǎg áwe nló mǎn álúmed nzǎm echě bebómmédé mó á awǎg émbē nēn bán, "Kǎn e bad bé Israel."

27 Bēmbomé-ε bechǎb bébe bómpē á awǎg, nhóg á pεd e ekáá émbáá eche Yesue, aníníí-ε á pεd e ekáá é emwεd.†

29 Bad ábe bétómé'áá nzii benben ne áhed bebómé'áá nló, bébwēmmē-ε mó nzyǎn bán, "Ahá! Wenhób wεé mǎǎbǎǎótéd Ndáb-e-Dyǎb, wεé mǎǎǎn-ε chǎ ámpē áfintē e e'pun é'láán.

30 Sǎn-ǎ echonj yǎl bǎǎb, ésud ásē á awǎg."

31 Melemem nê dǎǎ beprise bēmbáá ne bemeléede bé mbéndé bēwélé'áá mó. Bēn ne bēn béhóbé'áá bán, "Achǎnté'áá bad, bǎǎb eéheleé eche yǎl awǎngεn.

32 Mǎ awě ahóbé aá mǎǎ módē Ane-awě-Béwǎgté, aá mǎǎ módē-ε kǎn e bad bé Israel ásud-tǎǎ ásē á awǎg hē bǎǎb, dényín ábεl dédúbe." Abē bechǎb ábe bēmboméé á awǎg nchoo ne Yesue bómpē bésyǎá'áá mó.

*Kwééd eche Yesue
(Mat 27.45-56; Luk 23.44-49; Jǎn 19.28-30)*

33 Ade kǎd épédé, ehíntén énkwě hǎm ásyǎǎl, kǎǎn ne á ngǎn éláán.

34 Ade ngǎn éláán épédé, Yesue anlébé esaád aá, "Elí, Elí, lámá sábatāni." Nēn adé nēn bán, "A-Dyǎb ádēm, a-Dyǎb ádēm, cheé ékǎá bonj étεdté mε?"

35 Néε donje á bad ábe bēmbē benben bēwógé nê, bénhǎb bán, "Nyéwóge', achēnle Elaijaa aá áhyε áwǎngεn mó."

* **15:23 Mia:** mébédéε bwel ábē bad bebénládtáá ásuded mewε. † **15:27** Donje á kǎlag dé'só ábádé nchoo 28: *Áde nēn ábénléde, e'yale ábē é'ténléde á kǎlag é Dyǎb bēnlǎn. Eténléde nēn bán, 'Béntónj mǎmpē á nchoo mé bebel bé mbéb.'*

³⁶ Hée mod nhóg anyógté bonj átédé kuchá, átódté' á ebéntéd é mím-tê, ásómé' á ntón bonj áhāg mó á nsəl aá ámwê. Anhób aá, “Nyémwε dényín nzé Elaijaa áhyε mó asuded á awog.”

³⁷ Hée Yesuε álébpé esaád bonj ámiē-'ε nlém.

³⁸ Ene póndé chēn abad áde dēnkāb Ndáb é Dyōb áte, dēnsalé áte e'ped é'be bootya ámīn káān apē-'ε ásē.

³⁹ Adē mod ambáá a sánze awē antyéém Yesuε á'sō-te ānōn mó anyíne ngáne Yesuε áwédé,‡ anhób aá, “Ne mbále, anén mod abédéε Mwān a Dyōb.”

⁴⁰ Bebaád behóg bómpē bēmbē nchabnede bēnōne' mekan mésyāāl míme mébenlad. Atíntē e ábē bebaád, Maria Magdalene, Salome ne Maria awē achyáá Jemse asad bó Joseb, bēmbē áhed.

⁴¹ Abén bebaád behídé'áá Yesuε áde ámbēē á Galilia, bēwōngān-ne mó. Ekud é bebaád émpēe éche bóbōō bēmpē á Jerusalem chómpē émpē áhed.

Níme míme Yesuε

(Mat 27.57-61; Luk 23.50-56; Jōn 19.38-42)

⁴²⁻⁴³ Mod nhóg abédé awē béchógé'áá bán Josebe. Ambíd á dyad á Arimatia. Anén mod abédéε mod e edúbé a káānsel embáá e bad bé Israel. Mómpē asiné'áá póndé echē nkamlēn í Dyōb mépēé. Ngáne émbēē mbwε mé mbonjén (nédē áde mbwε-mé-nkóme-áte nlyógé néε chān), hée ákáá nlém, bonj ápag wée Payledε benben ne ngukél, álāngē mó aá ábe mó ndim míme Yesuε.

⁴⁴ Ade Payledε áwógé bán Yesuε amaá awé, yāl enkóm mó áte. Hée álómé ane mod a mbáá a sánze achog bonj ásedté mó ké Yesuε amaá awé.

⁴⁵ Ade ene sánze élāngē mó aá Yesuε awédé, dōō ákwénténé aá Josebe átēd míme ndím.

⁴⁶ Josebe anchān mbóm. Antéd Yesuε ndim, ákāān mó ene mbóm, alímé-'ε mó á soj-tē echē bēpwógé aláá áte. Ambíd ene, antínéd aláá á mbáá ákōlēn nsəl í soj.

⁴⁷ Maria Magdalene ne Maria awē anchyáá Joseε bēnóné'áá wée béliimméé Yesuε.

16

Yesuε apuúdé

(Mat 28.1-8; Luk 24.1-12; Jōn 20.1-10)

¹ Ambíd e mbwε-mé-nkóme-áte Maria Magdalene, Maria awē achyáá Jemse ne Salome, bēnchān dyōg dé elod é bwām áke dé awóged ndim míme Yesuε.

² Mbwεmbwε mé epun é'sō é Sōndé áde enyēn étúbéé dōō békíí á soj.

³ Ade békagké, dōō bésēdtéé nhóg ne aníníí bánken, “Nzée áhūdē syāné aláá á nsəl í soj?”

⁴ Dōō bésádé dīd, bonj bényīnē bán bémáá áde aláá ahúd. Aláá áded dēnkāl bwāmbwam.

⁵ Hée bésólé á soj-tē, bonj bényīnē kódemod edyēé á nkag á ped e ekáá émbáá. Anhé megombe míme mépúbe'. Nén dēnkōbēd bó mbwóg bwāmbwam.

⁶ Hée ene kódemod élāngēé bó aá, “Nyéebáá', mbíí mēé nyēhede' Yesuε, mod a Nazaret awē bēmboméé á awog. Apuúdé, eésáá hén. Nyénōne wée bēnnaádté mó.

⁷ Nyékag-kōō bōōb nyéláá ábē bembapεε, tanje Petro, bán Yesuε apuúdé, 'Akag-ke á'sō á Galilia. Awed-taá nyényīnnē mó ngáne ánlaā' é nyé.' ”

‡ 15:39 Awédé: Donge á kálag dé'só áwóó álébpé esaád, awé-'ε.

8 Hée bébootédé anəŋ ne menyáké níme bényíné. Bémbíd á soŋ-té bébootéd-tɛ anyəged. Béélânge-'áa modmod dyamdyam áyāle mbwóg ménkōb bó.

Nyaa póg echě Kálag e Makɔse ésógé*

16.9-20

*Yesue alúmté Maria Magdalene yǎl
(Mat 28.9-10; Jɔn 20.11-18)*

⁹ Ade Yesue áamá apuu, epog é mbwembwe é epun é'sō é Sôndé, Maria Magdalene mós ansēbēē yǎl alúmed. Anén mmwaád mós Yesue ámbídēdtē e'dəádəŋ bé mbéb saámbé áte.

¹⁰ Hée ane mmwaád ákíí boŋ álāŋgē bad ábe bóobɛ Yesue bébágé'áá. Antán née béchye'é kwééd eche Yesue.

¹¹ Boŋ áde béwógé bán Yesue adé á alongé, bán ane mmwaád anyíné-'ɛ mós, bénkēndúbéé.

*Yesue alúmté ábē bad bébɛ yǎl
(Luk 24.13-35)*

¹² Ámbíd e pónde Yesue anlúmed yǎl wée ábē bad bémpēe bébɛ áde bébídéé á dyad-té. Boŋ enén ngen anlúmed yǎl nyaa émpēe.

¹³ Hée ábē bad bétímé ámbíd, békɛ béléáá baáb ábíníí. Boŋ ké nê, baáb bē bénkēndúbéé.

*Yesue alúmté ábē bembapɛɛ
dyôm ne nhóg yǎl*

(Mat 28.16-20; Luk 24.36-49; Jɔn 20.19-23; Mbɛl 1.6-8)

¹⁴ Ámbíd e pónde Yesue anlúmed yǎl wée ábē bembapɛɛ dyôm-ne-nhóg áde bédyáŋkē ndyééd. Bénkēndúbéé bad ábe bēnhōb bán bényíné mós áde áamá apuu. Né-ɔó, ankáné bó áte áá béewóó'é adúbe, áá bélélé-'ɛ nlém á abum.

¹⁵ Anláá bó áá, “Nyékag nkōŋsé áte rísyā́l, nyékanle bad bésyā́l nkalan mí bwâm.

¹⁶ Kénzée awě adúbpe boŋ bédusén-ne mós ákūd e'choóchoŋ, boŋ kénzée awě eedúbpe ákūd nkóŋsɛn.

¹⁷ Bad ábe bédúbpe béwōŋ ngíne ábɛl mam mé menyáké: bēbídte bad e'dəádəŋ bé mbéb áte á dín ádēm; bēhōbɛ-'ɛ mehób mékṓlɛ.

¹⁸ Békōbɛn nyǎ mekáá, éebenlé bó dyamdyam. Ké bémmwɛ-'ɛ ké e'wɛ, ábē e'wɛ béebenlé bó dyamdyam. Bébān bad bé nkole mekáá á yǎl, bad bé nkole bē bédyēɛ-'ɛ bwâm.”

*Yesue apūmmé
(Luk 24.50-53; Mbɛl 1.9-11)*

¹⁹ Ade Sāŋgú Yesue áamá bó nímén mekan aláa, dós Dyōb ábélé boŋ ápūmē ámín. Andyéé Dyōb á ekáá émbáá.

²⁰ Hée bembapɛɛ bēbídé, boŋ békɛ békalé Eyale é Dyōb hōm tée. Sāŋgwée ambé ne bó, ábē-'ɛ bó ngíne ábɛl mekan mé menyáké, álúmed nén áá chōm eche bēhōbɛé édé mbále.

Nyaa empée echě kálag e Makɔse ésógé†

16.9-10

[(9) Hée ábē bebaád békíí, boŋ bēlāŋgē Petro ne bad ábe bémbɛ ne mós mekan mésyā́l níme bēnlyāgtɛnné bó, bésɛ́lɛ mós esóŋ-esóŋ. (10) Née nê átómé, Yesue mwěn anlóm bad nkōŋsé áte rísyā́l ákal nkalan mí bwâm. Mmê nkalan

* **16:8** Donje á kálag dé'só déewóó'ɛ nchoo 9-20. † **16:20** Donje á kálag dé'só ábádé ádén asóg á kálag ámbíd e nchoo 8.

ní bwâm níme ísáá, méehə̀lǎnné. Mmê nkalan ńdíi nkalan t̄hɛne alongé áde d̄éb̄ á ngíndé ne á ngíndé.]

Nkalan̄ mí bwâm míme Yesuε ngáne

Lukasε

átélé

Ndibned n̄ kálag

Nkalan̄ mí bwâm míme Yesuε ngáne Lukasε átélé rílúmte Yesuε ngáne Nsoode awě Dyöb dénhābpē aá mós̄lōmē bad bé Israel. Lukasε ahóbé aá Edāádəŋ é Dyöb chós̄ épwédé Yesuε āpεεn nkalan̄ mí bwâm wée betóótōkē bé bad. Mmén nkalan̄ míbude ahób t̄ŋgene e'boŋ bé nlém ábe Yesuε álúmteé bad. A mbooted menȳŋge ményinnédé áde ehāŋgé ébídé t̄ŋgene epε éche Yesuε, ményinnéd-
te á asóg áde Yesuε ápúmmé ádyōb. Mekan míme Lukasε ákóó awéd áte médií: mekáne, Edāádəŋ éche Esáá, mekan míme bebaád bébélé átíntē e nsón míme Yesuε ne alagsen áde Dyöb álagsanné bad mbéb.

Lukasε abádé mekan áte wén míme médé áyāl e nímén nkalan̄ mí bwâm dēmpen (Nōn e'pεd é'be ne ntóób á nkabtéd).

Nkabtéd n̄ kálag

Ndibned 1.1-4

Echyáa éche Jōne, Ndusenε ne éche Yesuε 1.5-2.52

Nsón míme Jōne, Ndusenε 3.1-20

Edusen ne mekəgsen míme Yesuε 3.21-4.13

Nsón míme Yesuε á Galilia 4.14-9.50

Nsón míme Yesuε áde áhídté á Galilia āpe á Jerusalem 9.51-19.27

E'pun bé asóg ábe Yesuε á Jerusalem ne benben ne á Jerusalem 19.28-21.38

Akáad áde békáádté Yesuε ne eche kwééd 22-23

Mpuu míme Sāŋgwéé, alúmed áde ánlūmēdtē bad yāl ne míme mpume 24.1-53

¹ A-Tiofilos, mod a edúbé, ekud é bad ékétēd póndé átel mekan ásē, míme mébénlédé átíntē e' syánē.

² Bétélé melemlen ngáne dénwōgkē wée bad ábe bényinēn mó d̄id se á mbooted, békalé-'ε Eyale é Dyöb.

³ Né-ṣó, ntóó nímén mekan ahead áte se á mbooted, nnyiné-'ε nén meé ébóó mémpē n̄tēd póndé, rítele wε mekan ásē ahóg-ahógē.

⁴ Nén débēl wééchem mbále t̄ŋgene mekan míme émáá abíi.

Angel epíidé Sakaria

⁵ A póndé eche Herōde abédé k̄ŋ e Judeya, mod nhóg ambé bán Sakaria. Sakaria abédéε prisε á nchoo míme Abiyaa. Mwaád ambé d̄in bán Elisabete. Mó ámpē abédéε nḡon e túmbé eche Arōne.

⁶ Alongé áde bó mwaád dēmbē bwâm á'sō é' Dyöb. Béhíde'áá mbéndé éche Sāŋgwéé ésyāāl.

⁷ Boŋ bēnkēnwáléé mwān ké nhóg áyāle Elisabete abédé ekōm. Bó bad bébe bēmmād-te achun.

⁸ Bōb-pōó, áde póndé e nsón e nchoo míme beprisε míme Sakaria bó épédé áte, ankē nsón míme prisε abel á Ndáb-e-Dyöb epun ehóg.

⁹ Mó-'áá bēmpwεdté ás̄l á Ndáb-e-Dyöb ábele Sāŋgwéé, áhyáad e'twé, ngáne nsón míme prisε nhédnādtáá.

¹⁰ Ade áhyāŋtε e'twé, ndun e mod embé ámbíd e ebwóg, békāne'.

¹¹ Hē dós̄ ángel e Sāŋgú epíidé mó, etyéém mó á pεd e ekáá émbáá benben ne menyán mé e'twé.

¹² Anyín áde Sakaria ányiné ángel, yāl enkóm mó áte, mbwóg ménkōb-pe mó bwāmbwam.

¹³ Dóo ángel élângeé mó aá, “A-Sakaria, weebáá’. Dyöb áwógé we mekáne. Né-óó, awöŋ mwaád Elisabete, ächyāā mwän. Echuu ane mwän ðin weé Jone.

¹⁴ Anén mwän äwögéd we menyinge. Ndun e mod ámpē ðwög menyinge é echyāa éche.

¹⁵ Ebē nē áyāle ane mwän äbē ndāle a mod á’sō é’ Sāngú. Eetāŋgenēé nēe ámwágkē mīm míme méwag, káa chöm ké échē éwúú áte. Edāédāŋ éche Esáá élōn mó áte se á ncháátén.

¹⁶ Atiméd bad bé Israel nlém ámbid wée Sāngwéeé awē adé ádab Dyöb.

¹⁷ Abē á’sō boŋ Sāngwéeé ápag. Awōŋ-’e edāédāŋ ne ngíne melemlem ngáne nkal é’dāédāŋ Elaijaa a’bóóð ánwōŋgē. Achēd bad nlém á abum, ábel bad bóobe bán bétim ásē. Abēl bad ábe béwúéné Dyöb nló áte, béhāŋlén, béwōŋ debyéé nēe bad ábe bétyéeme á’sō é’ Dyöb. Né-’aá áboŋsénne epe éche Sāngwéeé.”

¹⁸ Sakaria ansedéd ángel aá, “Cheé élúmte me nén bán ádén akan áde éhóbé dēbenléd? Mmēn mmaá achun. Awēm mwaád-te ámpē amaá kād atóm.”

¹⁹ Dóo ángel étimtanné mó aá, “Ndíí Gabriēle, mésénze míme mébenle Dyöb nsón. Dyöb álómé me áwōŋ, álāa we mímén nlébtéd mí bwām.

²⁰ Bóob-’póó, ngáne wēédūbpeé dyam áde níhóbé, wēkwē ebóbé káŋŋ ne pónde échē mam mésyāal míme nílánge we mélōnnē. Mekan mésyāal mébenléd-te á pónde échē métāŋgéné abenled.”

²¹ Ene pónde esyāal bad bésíné-’aá Sakaria ámbid ebwóg, bényāgē’ chöm éche ékóá boŋ ápē abem á Ndáb-e-Dyöb-te nē.

²² Ade ábidé áwed, eéhele-’aá dyamdyam ahób áwāb. Dóo béchéme nén bán, anyíné ndóg á Ndáb-e-Dyöb. Mekáá móó álúmtánnáá bó, ésebán ahele dyam ahób.

²³ Pónde e nsón échē Sakaria emaa-’aá áte, asú á ndáb.

²⁴ Ámbid e pónde mwaád ambé nkog. Ankoó yāl á ndáb-te á etūn é ngān étāan.

²⁵ Anhób aá “Káŋŋ ne á asóg Sāngwéeé abēnlé me ádén. Awógé me ngōl, ahúdē-’e me e’sōn áyāl áfintē e ábēm bad.”

Ángel epítidē Maria

²⁶⁻²⁷ Adé dyēm áde Elisabete ádíí ngān ntóób, Dyöb dénlōm ángel Gabriēle á dyad á Nazaret, á aloŋ á Galilia, wēe ngāndéere póg bán Maria. Maria enkēmbíí-’e mwēnchóm. Mod ankií mó awe béchágé-’aá bán Josebe. Josebe ámbid á túmbé échē Kāŋ Dabide.

²⁸ Ade ángel étáné Maria enhób aá, “A-Maria, nsāŋ níbē ne we! Edíí mmwaád awē akudé mendē ne Dyöb. Titēe Dyöbe adé ne we.”

²⁹ Nén dēntagéd Maria á mewēmtēn-tē bwāmbwam. Akōgláádtáá á nlém-tē ábíí chöm éche ene nyaa e melentēn éhele élúmte’.

³⁰ Dóo ene ángel élângeé mó aá, “A-Maria! Weebáá’, nsimé ní Dyöb níde ne we.

³¹ Ebíí wēé, móóbē nkog. Wēchyāā mwän a mwēnchóm. Echuu mó ðin wēé Yesue.

³² Ane mwän äbē ndāle a mod. Béchāg mó bán, Mwän a Dyöb á Ngum. Titēe Dyöbe mwēn äbē mó atii dé nkamlēn áde sáá ambáá Dabide.

³³ Mó ákamlén abum á ndáb áde Jakōbe á ngíndé ne á ngíndé. Nkamlēn míme méewōŋgé asóg.”

³⁴ Hée Maria ásedtēé ángel ne aáken, “Chán níhele nchyáá mwän áde méēbíí-’e mwēnchóm?”

³⁵ Ene ángel enkwentén mó aá, “Edāédāŋ éche Esáá epíí we. Ngum e Dyöb ékūdtēn we. Né-óó, mwän awē asáá, awē wēchyāā-’é, áchāgnéd bán Mwän a Dyöb.

36 Bii wεé, Elisabete, mwānyon a túmbé póg, mómpē adé nkog á e'chun-tê. Mós awě bēnhōbpē bán adé ekom, adé dyēm bōob ngon ntóob.

37 Edé nê áyāle dyamdyam déesaá áde átómé Dyōb áte."

38 Héε Maria áhóbéé aá, "Ndīi mbōlede awe Sāngwéé. Ebê ne me ngáne éhóbé." Dóo ene ángel étédte mó bon ékag.

Maria akii wεε Elisabete

39 Mmê mesú mēn, Maria anlād yāl ne mehél mésyāāl, ákē á dyad á Juda ahóg áde adé á e'kone-tê.

40 Ade ápédé áwed, ansól á ndáb echē Sakaria, álēlēd Elisabete.

41 Awóg áde Elisabete áwógé Maria níme melenten, mwān anhóbnéd Elisabete á abum-tê. Edāádəŋ éche Esáá êmpii mó.

42 Dó-'aá álāngéé Maria ne esaád é ngíne nén aá, "Nnam míbê ne wε átínté bebaád bésyāāl. Nnam míbê ne mwān awe wéchyāā'é.

43 Chán ébēnlédé éche memε nkúdé échén edúbé? Chán nyaá awe Sāngwéé áhele áhye áwēm-é?

44 Awóg áde íwógé mímōŋ melenten, mwān ahóbté me yāl á abum-tê ne menyinge.

45 Dyōb ánámte wε áyāle edúbpé nén wεé, dyam áde Sāngwéé álāngé wε dēbenléd."

Ngase echē Maria

46 Héε Maria áhóbéé aá, "Nkēmtε Sāngwéé ne nlém mímēm ísyāāl,

47 edāádəŋ échēm ámpē éwógne Dyōb menyinge. Mós adé awēm mod a e'sooson.

48 Ayāle achemé me awě ndé awe mwā mbōlede ngēn. Bootya bōob, áke á'sō, nyongel e bad téé éhōb bán, ídé mmwaád awě Dyōb ánámte.

49 Dyōb á Ngum abēnlé me ndāle a akan. Mós adé ane awě asáá.

50 Ngol echē ébē nyongel ne nyongel e bad téé, ámīn e kénzée awě abage mó edúbé.

51 Abelé ndāle a akan ne éche ekáá chēn. Apuúdtédé bad ábe bédé kúmbe mewēmtēn áte.

52 Ahúdé benkamlēnε áwāb metii mé nkamlēn, bon achágté bad ábe bésúdté yāl.

53 Akódté bad ábe bétagne nzaa ne kase é bwēm, bon anané bad ábe bébúdé awōŋ aá bésūε' ne mekáá mé ngēn.

54-55 Akāmténé álóned akag áde ámbéé ábēd betaa, bootya Abrahamε ne mímē mbyaa ísyāāl káon ne á ngíndé. Né-óó, awōŋgéné ábē bembōlede, bad bé Israel."

56 Ambíd e nê, Maria andyēén Elisabete ngon éláán, bon ásūε' ámbíd.

Echyáa éche Jōne Ndusene

57 Ambíd e pónde, e'wε é' mwān bēnkōb Elisabete. Anchyáá mwān a mwēnchóm.

58 Túmbé echē ne bad ábe bóbōo bēdyéé'áá abwóg ahóg, bēnsōŋtēn nén bán Sāngwéé ábagé mó sánkalaa a nsimé, bómpē bēwóg menyinge.

59 Mbwε mé asōŋ-á-yāl (ámbíd e e'pun waam) áde béhyédé mwān ayag, bēhédé'áá mó dīn áde sáá achuu bán Sakaria.

60 Dóo nyaá áhóbéé aá, "Aáy! Dīn dēbēē mó bán Jōne."

61 Héε bétimtanné mó bán, "Modmod eesaá áwōŋ túmbé-te awě awóó adé dīn."

62 Né-óó bēnhəgtén Sakaria á mekáá mīn áhed áte ngáne ádáó mwān dīn achuu.

⁶³ Hée áhagténé ne mekáá aá bépiined mó abámbé. Antël áhed aá, “Din ádí mó bán Jone.” Anyín áde bad bényiné nê, menyáké mékōb bó.

⁶⁴ Abwōg-ábwōg, ehób énsālē mó á nsal, ábootéd-te dyam ahób ámpē, ákēmtē-’ε Dyōb.

⁶⁵ Nén dénkōbēd bad bésyāal ábe bébéde áhed mbwōg, békεεné nkalan ħōm ásyāal á myad mé e’kone á alon á Judeya.

⁶⁶ Mod téé awē anwōg ádén akan, ankoó dó á nlém-tê. Bésēdté bánken, “Ebál é mod éhéé anén mwān ábēε-yēε?” Bésēdté’áá nê áyāle bémfī nén bán Dyōb áde ne ane mwān.

Ngase echē Sakaria

⁶⁷ Bōob-pōó, Edāádān éche Esáá émpīi sée mwān, Sakaria. Hée ábóótédé mam ahóbted, ahóbé aá,

⁶⁸ “Mekεnag mébē ne Sāngwéé, Dyōb á bad bé Israel.

Békεn Dyōb áyāle ahyedé ábē bad anyen ásē, akōdté-’ε bó.

⁶⁹ Akwōgté ngum a mod á abum á ndáb áde awē mbaledε Dabidε, móchoód syánē.

⁷⁰ Se’ bōód ansón bekal bé’dāádān, alóm bó aá béhób bán,

⁷¹ Mōsōn syánē á mekáá mé bad bé ekōyí ábe syánē, ne bad ábe békōó syánē.

⁷² Nê dóo Dyōb álúmtéé ngol eche ánhī’ε ábēd betaa akag. Né-’aá ákámtené nímē melē,

⁷³ nédē melē nímē ámmwēε ne awēd sáá ambáá Abrahamε.

⁷⁴ Anhób aá mósmadté syánē ason á mekáá mé bad bé ekōyí ábe syánē, bon déhel mó abele ésebán debáa’.

⁷⁵ Dēébenlé mó pónde eched ne nlém nímē nísáá ne mbeltéd nímē rídé ngáne Dyōb áhedéé,

á alongé ádēd ásyāal.

⁷⁶ Wε-óó, a-mwān, béchǎg wε bán nkal é’dāádān awē Dyōb á Ngum.

Wε-’aá wēsēbē Sāngwéé á’sō, ábonεen mó nzii echē ábwεé áte.

⁷⁷ Wēbēl ábē bad bébíi nén bán, Dyōb áchōnté bó áyāle álágséné bó nímab mbéb.

⁷⁸ Nén débenléd áyāle ngol e Dyōb ne ábē e’bon bé nlém.

Ene ngol chō-’aá ékǎn e’nyínen bé ekíde ábē é’bídé ámín é’piined syánē e’soóson.

⁷⁹ Né-óó bad ábe bédé á ehintén-tê, ne á nsal ní son, békūd e’nyínen bé e’kíde. Syánē-’ε dēékūd debyéé áde álúmte syánē nzii echē epeεne alongé dé nsañ.”

⁸⁰ Jone ankwōg, edāádān é Dyōb ébē-’ε mó ngíne. Andyé é ehyánge káñ ne á pónde eche ábóódtédé eyale é Dyōb akal á ntálé wεε bad bé Israel.

2

Yesuε achyáádté á Betelhεm

(Mat 1.18-25)

¹ Mmē mesú-óó Agōstuse, Kaisεε a Roma antóméd mbéndé aá, moosyāal awē adé ásē e nímē nkamlen, áke átelén dīn.

² Nén démbē tóngé e bad e’só. A pónde eched Kirinuse mó ambé nló mé alon á Siria.

³ Mod téé ankē áwē dyad ábel bon bétel mó dīn ásē.

⁴ Né-óó Joseβε mómpē anhidé á dyad á Nazaret á Galilia, achágé á Betelhεm, dyad áde Kñ Dabidε á Judeya, áyāle ambíd á mbyaa nímē Dabidε.

⁵ Ankē nê ábel bétōñ bó Maria, ngōndéε eche ánkí’ε. Maria mó-’ε ambé nkog.

⁶ Á Betelhεm wê dó-’aá achád ákóbé Maria.

7 Anchyáá mwän a mwenchóm awě átúbné abum. Ankaán mó e'ped bé mebad, ánāād-te mó á ebwɔg éche bédídtéé e'lém áte, ngáne etál éebédeé á ndáb e beken.

Angel építidé benɔn bé mbód

8 Aped eched, benɔn bé mbód bénóné'áá échāb echoŋ é' mbód á hōm dé medyé nkuu.

9 Angel e Sāngú empií bó táléd, ehúmé é Sāngú élāŋned bó. Mbwóg ménkōb bó.

10 Héé ángel élāŋgeé bó aá, “Nyéebáá', mpiínédé nyé kase e nkalaŋ eché ɛwōgēd bad bésyāāl menyinŋe bwāmbwam.

11 Nyébíi bán, epun é'chii, Nsoode awēn achyáádté á dyad áde Kāŋ Dabidē. Mó adé Ane awě Dyōb Awógté. Mó adé Sāngwéé.

12 E'chemléd ábe mbageé nyé é'dii bán, nyéētān mwän awe békāŋné e'ped bé mebad ngáne ánāngé á ebwɔg éche bédídtéé e'lém áte.”

13 Melemem mé pónde echoŋ é ángel émbíd eníní ángel á nkag táléd, ékené Dyōb bán,

14 “Ehúmé ébê ne Dyōb áde áde se ámīn, nsan-'e mbê ne baányon ábe ábágé nsimé á nkōŋsé!”

15 Ambíd e nê, éché ángel énsū ámīn. Héé benɔn bé mbód bélāŋgeé nhóg ne aníní bán, “Syāā dékag á Betelhem, déke dényín adê akan áde Dyōb á Ngum álúmté syānē áte aá ábénlédé.”

16 Dó-'aá békíi á mehélé-te, boŋ bédíbté Maria bó Joseb ne nkáál ní mwän néé rínāngé á ebwɔg éche bédídtéé e'lém áte.

17 Bémáá-'aá anyín nê, dōo bébóótédé nkalaŋ akal ngáne ángel énlāā' é bó tāŋgene ane mwän.

18 Bad bésyāāl ábe bēnwōg nê, menyáké ménkōb bó.

19 Maria ankoó nímén mam mésyāāl á nlém-tê, ádolé mó áte.

20 Héé benɔn bé mbód bétímé ámbíd, békēmtē Dyōb, békēné-'e mó áyāle mam mésyāāl níme bēwógé, boŋ bényínén-ne dīd nēŋgáne bēnlāā' é bó.

21 Ambíd e e'pun waam, mbwε níme bēyagēé mwän, bēnchuu mó dīn bán Yesue. Adé dīn dōo ángel émmadté mó achag boŋ nyaá ābē dyēm.

Bépééné Yesue á Ndáb-e-Dyōb

22 Bōob-pōó, mbéndé e Mosee ehedáá bán, ámbíd e echyáa bébe mende áwobe nyě mwän bó sée mwän. Ade bémádé nê, Maria bó Joseb bēnkeén mwän á Jerusalem álúmed mó á'sō é' Sāngú.

23 Bēnkē nê nchoo ne ngáne éténlédé á mbéndé e Sāngú bán, Mwän a mwenchóm téé awě bétúbné abum, bébe mó á mekáá mé Dyōb.

24 Bēnkē nê kóōŋne ábe mende ne álóned mbéndé e Sāngú eché ehóbé bán mod ábe bé élāā bébe káa mbāŋgé ésad ébe.

25 A Jerusalem wê, mod ambé bán Simione. Ane mod anwōŋ abé áde atāŋgéné á'sō é' Dyōb, ákoŋgé-'e mbéndé é Dyōb. Edāádāŋ éche Esáá émbē ne mó. Asiné'áá pónde eché Dyōb désoŋgé alonŋé á bad bé Israel.

26 Edāádāŋ éche Esáá émmād-te mó alúmed nén aá, éewáá ésebán anyíné Ane awě Sāngwéé Awógté.

27 Edāádāŋ éche Esáá émbēl Simione ankē á Ndáb-e-Dyōb. Dōo Maria ne Joseb bépééné awab mwän Yesue áhed, ngáne mbéndé éhédé'áá.

28 Simione ankobén bó mwän, abwáá mó, boŋ ákēmtē Dyōb nén aá,

29 “A-Sāngú, ngáne élónté ádōŋ akag, téd-tō me, ríkag ne nsan.

30-31 Ayāle mīd nímēm rínyíné awōŋ mod a e'soósoŋ awe ébōŋséné wēé moosyāāl anyín.

32 Abē e'nyínen bé ekíde ábe bēbēl bad ábe béesē bad bé Israel ábíi wε, áρείν-νε edúbé wée ábōη bad bé Israel.”

33 Josebε ne Maria bém̄bē menyáké áwóg mam níme bēhóbé t̄ηgene awab mwän.

34 Héε Simionε ánámte bó, bon̄ álāngē Maria aá, “N̄oné’, anén mwän awē nyényínεé n̄én, Dyōb d̄oo álómé mó. Abēl bad behóg békud ebébtéd, ábiníí-ε békūd e’soósoū á aloū á Israel. Abē n̄ηgane e’chemléd é’ Dyōb, bon̄ ekud é bad ét̄i mó ám̄in, bēt̄ηgān mó.

35 A pónde eched mod téé níme mbeltéd m̄en m̄ébidēd níme mewēmten áwed. Héε ndutul ésongé wε á nlém n̄ε nkwáté.”

36-37 Nkal é’d̄aéd̄aη a mmwaád nhóg abédé, d̄in démbē mó bán Anaa, mwän awe Panuεε awē abíde á túmbé e Aσεε. Anaa anch̄un bwāmbwam. Bó nchóm bēndyéé mwē saámbé á e’wóngé, bon̄ ályāgē mó akúd k̄áη ne á móom mé mwé waam ne mwē n̄iin. Eésȳηge’aá á Ndáb-e-Dyōb. Akánne’aá nkuu ne m̄ute, ádidé-’ε ȳl nzaa á mekáne-tē.

38 Ade Maria bó Joseb bépééné Yesuε á Ndáb-e-Dyōb p̄εnén, Anaa ambé áhed. Héε ábóótédé Dyōb ak̄en, ákanlé-’ε bad nkalan̄ t̄ηgene ane mwän. Abē bad bēbédéε bad ábe bésíné’aá pónde eche Dyōb déw̄obéé dyad á Jerusalem. Anláá bó nyaa e mod echē ane mwän ábē.

Josebε bó Maria bét̄imné mwän ámbid á Nazaret

39 Ade Maria bó Joseb bémádné mam mésyāāl ngáne mbéndé e S̄āηgú éhéde’aá, bēnt̄im áwāb dyad á Nazaret á aloū á Galilia.

40 Ene pónde mwän mó-’ε ákwogé’, áwūē’ áte, debyéé ákwogé mó, nsimé n̄ Dyōb mó-’ε n̄hídē mó.

Yesuε akii á Ndáb-e-Dyōb

41 B̄oob-p̄oó, émbē bán, mwē téé Yesuε sáá bó nyan̄ békágé’aá á Jerusalem áyāle Ngande e Nnyime-ám̄in.

42 Ade Yesuε ápédé dyōm á mwé ne n̄bε, b̄ób̄oo bēnkē á ngande ngáne émm̄enténné abé.

43 Ngande emaa’aá bon̄ nyaá bó s̄āη bésūē’ á dyad. Yesuε anlyāg ámbid á Jerusalem ésebán bēbíí.

44 Mewēmten mēmbē bó n̄én bán, adé á echon̄ éche ésúé’aá. Bon̄ áde békékeé bootya mbwεmbwε k̄áη ne ngukél, d̄oo bēbóótédé mó áhed, bésēdtē mó wée bad bé túmbé ne bad ábe b̄ób̄oo bébyééné.

45 Anyín áde béenyínεé mó, bēnt̄im ámbid á Jerusalem áhed mó áwed.

46 Alónten e’pun é’láán d̄oo bét̄imé mó adibed á Ndáb-e-Dyōb. Andyεé áf̄intē e bemeléede, áwōglān bó, ásedtē-’ε bó mam.

47 Mod téé awē anwóg mam níme Yesuε áhóbé’aá, ambé menyáké áyāle nsōηten níme ánwōngē ne nyaa echē ákwéntánnáá bó.

48 Ade nyaá bó s̄āη bényíné mó, ȳl enkóm bó áte. D̄oo nyaá ásedtēé mó aá, “A-mwän, chán-n̄o ébélé sé n̄én? Sé s̄ōη s̄ékómé wε áhed, sétage-’ε áte.”

49 Bon̄ Yesuε ankwentén bó aá, “Cheé ék̄áá bon̄ nyéhédé mε? Nyénkēmbíí’é bán, nt̄āηgéné abé á ndáb echē echem S̄āη-ε?”

50 Bēnkēnh̄enlé dyam áde áhóbé asōηten.

51 Ámbid e n̄é, d̄oo Yesuε áhídé nyaá bó s̄āη, bon̄ b̄ób̄oo bésūē’ á Nazaret. Enkēnwúénné bó nló áte. Nyaa-’ε ankoó n̄m̄én mekan mésyāāl á nlém-tē.

52 Ngáne Yesuε ákwogé’aá, debyéé d̄ompē ákwogé’aá mó. Nsimé n̄ Dyōb ne n̄ baányoū n̄hídē mó.

3

Jone, Ndusene aboŋsan nzii

(Mat 3.1-12; Mak 1.1-8; Jon 1.19-28)

¹⁻² A pónde echē nkamlene Tiberiose, ákēbēē Kaisere a Roma áyāle dyóm á mwě ne rítáan, Dyöb dénlōm Jone mwān awe Sakaria ne nlébtéd á ehyānge wée ábédé. Ene pónde-’ε dōo Pontus Payledε mó-’ε ábédé Nkamlene á Judeya, Herode ákamlán alon á Galilia, mwānyan Filibe-’ε ákamlán alon á Ituria ne alon á Trakoniti. Bon Lisania mó-’ε akamlánnáá alon á Abilene. Mmē mesú mēn-naá Anase bó Kaifase bébédé beprise bémbáámbáa.

³ Jone abwágé’áá mebwóg mésyāal míme meláñnéde edib é Jodan. Akag ákalé eyale é Dyöb nén aá, “Nyétede abel dé mbéb, nyékud edusen ábel bon Dyöb álagsen nyé mbéb.”

⁴ Nén dénlōnēd chōm-ée éténlédé á kálag echē nkal é’daádəŋ Yesayaa bán, “Ehāngé ébídé á ehyānge bán, nyéboŋsen epe éche Sāŋgwéé. Nyétii echē nzii.

⁵ Nyélōned nhog té.

Nyésuded mbōad ne ekone té.

Nyétii mebwóg míme méhyómé.

Nyétaled mebwóg míme médé pwāgléd pwāgled.

⁶ Abel bon moonyon asyāal ányín ngáne Dyöb ásoo’é alongé á bad.”

⁷ Ndun e mod empě wée Jone béhedé bán, ádusen bó. Mó-’ε ásédte bó aáken, “Píí é nyě chén! Nzéé múmó alángé nyé aá nkáásé ní Dyöb níhúé’ bon aléb-pe nyé aá nyékúme abāngé?”

⁸ Nyéchyáa e’pum ábe é’lūmte bán nyétedte abel dé mbéb, tómaa áhób áwen nlém-tē bán, ‘nyédé bán ábe Abrahamε, nyéekudte nkógsen ní Dyöb.’ Bon nílaa nyé nén meé, Dyöb áhele ábenléd mímén meláá átimēd mó bán ábe Abrahamε.

⁹ Bōab-pōó, ehón émáá anaa á nkanj mí mel. Né-ōó, bwel ké é’héé ábe béechyāā’ e’pum é’ bwām, békwel bó, bébwém-me bó á muú-te.”

¹⁰ Hē dōo, bad bésedteé mó bánken, “Chán-nō sébenlé bōab?”

¹¹ Jone antimtén bó aá, “Mod awě awóó mbóté ébe, ábe póg wée ane awě eewóo chōmchōm. Ane awě mó-’ε awóó ndyéed, ákabe bad ábe béewóo.”

¹² Belad bé tááse ábe bómpē bēnhyě edusen akud bēnsedéd mó bán, “A-meléed, cheé sébenlé?”

¹³ Antimtén bó aá, “Nyéēsanjé tááse tómaa ngáne bétífidé.”

¹⁴ Nguse é sánze chó-’ε énsedéd mó bánken, “Chán-náa sé, sébel chán?” Jone ankwentén aá, “Nyéékobné bad mōné. Nyéebáné-’ε bad mekan áyāl ngēn, bon nyébē menyīnge ne chōm-ée nyékudéé nēe nsábe.”

¹⁵ Bōab-pōó, bad ábe bébédé áhed, mítab mewēmtēn mēmbootéd acháge ne e’lyóg bé nlém, békōglád á nlém-tē nzé édé bán Jone mó adé Ane-awě-Béwógté.

¹⁶ Hēe Jone átimtanné bó moosyāal aá, “Ndusan nyé bōab ne mendíb, bon mod ahúe’ awě atómé me. Meékwognedéé áhune ké míme nkōod mé metámbé. Adusén nyé ne Edāádəŋ éche Esáá, ádusén-ne nyé ne muú.

¹⁷ Awánlé échē epeben á ekáá, ábel nén, ápeb míme menyán ámīn. Nzé amadé, állād mbum é bwām áte, ákōō chó. Bon állād e’pōó, ahyáád bó á ebonde é muú éche éédīmē’.”

¹⁸ Né-ōó Jone alébé’áá bad ne ekud é pōle émpēe, ákanlé-’ε bó nkalanj mí bwām.

¹⁹ Jone anhób káəŋne wée nkamlene Herode aá, ábelé mbéb ngáne áwóo Herodyase, mwaád awě mwānyan, nchoo ne e’bébtéd bé mekan bémpēe ábe ámbenlé.

²⁰ Abád-te áyāle nímê mbé́b n̄syā́l Hērōde anhé Jōne á mbwōg.

*Bédúséné Yesue
(Mat 3.13-17; Mak 1.9-11)*

²¹ Bōōb-pṓ, áde Jōne áamáá ekud é bad adusen, Yesue mó ámpē ampě áá adusen mó. Ade áamáá mó adusen, ábwōg-ábwōg ankáné. Ade ákânneé nê dōo ngob e dyōb énédnédé.

²² Hé-'áá Edā́dān éche Esáá ébídé ngáne élā́, bonj ésudé mó á nló m̄n. Ehōb chōmpē émbíd ádyōb n̄n, “Edii awem mwān a nlém awě n̄dā́á bwāmbwam. Ndé menyinje ne wε.”

*Abum á ndáb áde Yesue
(Mat 1.1-17)*

²³ Yesue ambé dyam móom mé mwě méláán bonj ábootád n̄me nsón. Bad bényiné'áá mó n̄é mwān awě Josebe. Josebe ambé mwān awe Eliε. Eliε ambé

²⁴ mwān awe Matate. Matate ambé mwān awe Leviε. Leviε abédé mwān awe Melekyε. Melekyε ambé mwān awe Janne. Janne ambé mwān awe Josebe.

²⁵ Josebe abédé mwān awe Matatya. Matatya ambé mwān awe Amōse. Amōse abédé mwān awe Nahumε. Nahumε ambé mwān awe Esilyε. Esilyε ambé mwān awe Nagaya.

²⁶ Nagaya abédé mwān awe Maate. Maate ambé mwān awe Matatya. Matatya ambé mwān awe Simene. Simene ambé mwān awe Joseke. Joseke ambé mwān awe Jodaa.

²⁷ Jodaa abédé mwān awe Joanane. Joanane ambé mwān awe Resa. Resa ambé mwān awe Serubabele. Serubabele ambé mwān awe Salatyε. Salatyε ambé mwān awe Neriε.

²⁸ Neriε ambé mwān awe Melki. Melki ambé mwān awe Adie. Adie ambé mwān awe Kosame. Kosame ambé mwān awe Elamadame. Elamadame ambé mwān awe Ere.

²⁹ Ere ambé mwān awe Josua. Josua ambé mwān awe Elesaa. Elesaa ambé mwān awe Jorime. Jorime ambé mwān awe Matate. Matate ambé mwān awe Leviε.

³⁰ Leviε ambé mwān awe Simione. Simione ambé mwān awe Judaa. Judaa ambé mwān awe Josebe. Josebe ambé mwān awe Joname. Joname ambé mwān awe Elyakime.

³¹ Elyakime ambé mwān awe Meleya. Meleya ambé mwān awe Mena. Mena ambé mwān awe Matate. Matate ambé mwān awe Natanε. Natanε ambé mwān awe Dabide. Dabide

³² mwān awe Jese. Jese mwān awe Obede. Obede ambé mwān awe Boase. Boase ambé mwān awe Salmonε. Salmonε ambé mwān awe Nasonε. Nasonε

³³ ambé mwān awe Aminadabe. Aminadabe ambé mwān awe Ademinε. Ademinε ambé mwān awe Arenie. Arenie ambé mwān awe Heseṛone. Heseṛone ambé mwān awe Perese. Perese ambé mwān awe Judaa.

³⁴ Judaa ambé mwān awe Jakōbe. Jakōbe ambé mwān awe Aisige. Aisige ambé mwān awe Abrahamε. Abrahamε ambé mwān awe Tera. Tera ambé mwān awe Nahō. Nahō

³⁵ ambé mwān awe Seruge. Seruge ambé mwān awe Rewee. Rewee ambé mwān awe Pelege. Pelege ambé mwān awe Ebee. Ebee ambé mwān awe Sela. Sela

³⁶ ambé mwān awe Kananε. Kananε ambé mwān awe Apasade. Apasade ambé mwān awe Semε. Semε ambé mwān awe Noa. Noa ambé mwān awe Lamεke.

³⁷ Lamεke ambé mwān awe Metusela. Metusela ambé mwān awe Henōke. Henōke ambé mwān awe Jaredε. Jaredε ambé mwān awe Mehalεle. Mehalεle ambé mwān awe Kenanε. Kenanε

³⁸ ambé mwän awe Enose. Enose ambé mwän awe Seta. Seta abédé mwän awe Adamε. Adamε-ε abédé mwän a Dyöb.

4

Satanε akəgé Yesue

(Mat 4.1-11; Mak 1.12-13)

¹ Βοοb-ποό, áde Yesue abidé á edíb é Jodan, anlón ne Edəádəη éche Esáá. Entimén mó á ehyánge.

² Andyéé áwed móom mé e'pun méniin, Devəle ákəgé mó. Mmé mesú mésyāāl enkəndyáá chōmchōm. Ambīd e né-óó nzaa ewagáá mó.

³ Dóo Devəle álāngeé mó aá, “Nzé wε-εé edé Mwän a Dyöb, kamlén ádén aláá wεé, átim ewele.”

⁴ Yesue antimtén mó aá, “Eténlédé á kálag e Dyöb nén bán, ‘Saké ndyééd chəmpen edide moonyon á alongé.’ ”

⁵ Héε Devəle ákééné mó á ekone mín, álūmtē mó meloné mé nkōnsé mésyāāl áyāle mwä esón é pónδέ.

⁶ Dóo álāngeé mó aá, “Nóné’, bébáge me nkamlen ámīn e ábén bwēm é’syāāl. Nwóó-ε kunze ábe mod ké ahéé awe ndáá abε. Měbě wε mó.

⁷ Né-óó nzé ebage me edúbé, né wéε ewóó ábén bwēm é’syāāl.”

⁸ Yesue antimtén mó aá “Eténlédé nén bán, ‘Ebwógke’ Sāngwéé ádon Dyöb mebóbón, ébage-ε mó edúbé. Mwənpən-naá étāngéné abele.’ ”

⁹ Héε Satanε ákééné Yesue á Jerusalem. Atyēēmān mó á nzongε e Ndáb-e-Dyöb mín, boné álāngē mó aá, “Nzé wε-εé edé mwän a Dyöb, éheb á bwεle-mīn hén, éhūn á ndoob.

¹⁰ Eténlédé á kálag e Dyöb nén bán, ‘Dyöb dékamlén éche ángel ásáb wε,’

¹¹ ‘épēm-me wε ámīn, ábel nén weébōmē ekuu á aláá.’ ”

¹² Yesue-ε antimtén mó aá, “Kálag e Dyöb ehóbe nén aá, ‘Weékāgē Sāngwéé, ádon Dyöb áte.’ ”

¹³ Devəle amaá-aá mó akəg áte menzii mésyāāl, boné áhidte’, áhāg mó mwä etál.

Yesue aboótédé nsón á Galilia

(Mat 4.12-17; Mak 1.14-15)

¹⁴ Yesue antīm ámbīd á Galilia. Edəádəη éche Esáá émbē ne mó, dīn dó-ε ákanlád mó mbwóg áte ésyāāl.

¹⁵ Ayágté’áá bad áwab ndáb é mekáne, moosyāāl ákēmtē mó.

Bad bé Nazaret béekobéé Yesue

(Mat 13.53-58; Mak 6.1-6)

¹⁶ Ade ápédé á Nazaret wéε ákwógé, ansól á ndáb e mekáne á Mbwe-mé-nkóme-áte, ngáne ámmenténné abel. Dóo átyéémé ámīn, álān eped.

¹⁷ Bėmbě mó nhıbe nı kálag é metelag nıme nkal é’dəádəη Yesayaa. Anhuné chó áte, ákūnē eped éche ehóbe nén bán,

¹⁸ “Edəádəη éche Sāngwéé édé ne me, áyāle Dyöb ápwédé me aá, mıbel ehāngé é nkalanı mí bwām wéε betóótōkē bé bad.

Alómné me ehāngé aá, bad ábe bédé á mehané, béhide á mehané, aá, bad ábe békwédé ndım, bényınēn

aá, bad ábē békude metuné á mekáá mé baáb, nhúd bó á metuné-te

¹⁹ aá mıbel-le ehāngé nén meé pónδέ epedé eché Dyöb álūmtéé bad ngól.”

²⁰ Amaá-aá alān, ádíb kálag áte, ábag chó ámbīd wéε mod awě anone ndáb e mekáne. Ankě ádyēē ásē, mıd mésyāāl ménoné mó.

21 Dóo álângeé bó aá, “Echén eped éche nyéwógé, élóné epun é’chii.”

22 Moosyáál ankéméd mó, menyáké mékób bó áyāle kase e pōle echē ebídáá mó á nsal, bésēdté’ bánken, “Kíné saá mwān awē Joseβε mó nēn-ε?”

23 Yesuε ambád bó aláa aá, “Mbíí μεέ, nyéēkalé με ngan bán, ‘A mod a bwel, choód yāl.’ Nyéēlāā-’ε με bán, mekan míme nyéwógé bán mbelé á dyad á Kapenahum bán, mbel-láa mó áwēm dyad-tē hén.”

24 “Nlāa nyé nēn μεέ, nkal é’dāádāη eewóo’ē edúbé áwē dyad.

25 Nyébíi-ῶs nēn bán, á póndé eche Elaijaa, mbúú eechódεé áyāle mwē níláán ne eped. Nē dēmbēl sánkalaa a nzaa ambé alonj áte ásyāāl. Bekúd híin bēmbē á mbwóg e Israel hén ene póndé.

26 Bonj Dyōb dénkēnlómmé Elaijaa áwāb. Anlóm mó dāsō á alonj á Sidon á dyad á Sarefa wēε nkúd a mmwāád ampée.

27 A póndé echē nkal é’dāádāη Elisha ámpē ndun e mod e melonj embé á Israel. Bonj Elisha enkēnsáádté mod a melonj ké nhóg awē ambíd á alonj á Israel. Namanε, mod awē ambíd á alonj á Siria móo ánsāádtē.”

28 Ade bad ábe bēmbē á ndáb e mekáne bēwógé-’ε nē, ekanj énkōb bó áte.

29 Héε bépádté ásē, bēhé mó abum ámīn, békēēn mó á asóg á dyad. Ngáne bēnlōngē á ekone mīn, bēntimén mó á mbám mé ekone ábel bétíned mó á ekone sé.

30 Bonj ansam bó átíntē, ákē-’ε mó.

Mod awē edāádāη é mbéb émbēē áte

(Mak 1.21-28)

31 Yesuε ansyógé á dyad á Kapenahum á mbwóg e Galilia, ábootéd ayáged á mbwε-mé-nkóme-áte.

32 Nyaa eche áyágté’áá enkóméd bad yāl áte bwāmbwam áyāle ábē e’yale bēmbē ngíne.

33 A ndáb e mekáne wēε áyágté’áá, mod ambé awē edāádāη é mbéb ékámínnáá. Héε ábóótédé abón aá,

34 “Bób! A-Yesu, mod a Nazaret, cheé syánē déwónné? Ehyedé sé awúu-ye? Mbíí wε bwām. Edíi mod awē Dyōb álómé, awē asáá.”

35 Dóo Yesuε ákánné échē edāádāη é mbéb áte aá, “Lám, bíd ane mod áte!” Héε ébómé ane mod ásē átíntē bad, bonj ébídē mó á yāl, ésebán élógné mó.

36 Menyáké ménkōb moosyáál, bésēdtē nhóg ne aníníí bánken, “Nyaa e nhóbtéd ehéé nēn-ē? Chán mod ákámínné e’dāádāη bé mbéb ne kúmbe esyáál, é’wōgnē-’ε mó?”

37 Dín dēnkē mó mbwóg áte esyáál áyāle mekan míme ábélé’áá.

Yesuε achōjté ekud é bad

(Mat 8.14-17; Mak 1.29-34)

38 Ade Yesuε áhídté á ndáb e mekáne, ankē á ndáb wēε Simōne. Antán nēε Simōne mwaád nyaá ákonléε, ahéb ámbáá dēnsog mó. Bēnchāη Yesuε bán, ádid mó bwām.

39 Dóo Yesuε ásídté mó á nkæg, awúlén ásē, aláá ahéb áded aá, áte de mó. Abwōg-ábwōg ahéb dēmmaá mó á yāl, ásyāā ásē, ákōb-pε bó nken.

40 Bōōb-pōó, áde enyεn ébóótédé asud, bad bésyāāl ábe bēnwōη bad bé nkole ábe békónlé’áá nkole nyaa ne nyaa bēmpεén bó áwē. Ambán nhóg téé ekáá ámīn, ádidé bó bwām.

41 E’dāádāη bé mbéb bómpē é’bídē ekud é bad á yāl, é’bōnē’ bán, “Edíi mwān a Dyōb!” Ankáné bó áte, eémwage’áá-’ε aá bēhōb akan, áyāle bēmbíi bán, adíi Ane awē Dyōb Áwógté.

Yesue akalé nkalanj ní bwâm á ndáb é mekáne é bad bé Israel (Mak 1.35-39)

⁴² Mbwembweme pírib, Yesue ansyáá á dyad-tê, ákē á ahánjé á hóm. Bad bêmbootéd mó ahéd. Ade bédíbté mó, bénkênháá mó etál ákē hóm.

⁴³ Dóó álánjéé bó aá, “Ntánjéné aké á myad mémpēe, ábel nén rílaa bómpē nkalanj ní bwâm tñjēne nkamlēn ní Dyöb. Mmēn nkalanj móó ríkáá bonj Dyöb álómē me.”

⁴⁴ Né-óó akalé’áá nkalanj ní bwâm á ndáb é mekáne é mbwóg é Judeya.

5

Yesue apwēdé bembapēe (Mat 4.18-22; Mak 1.16-20)

¹ Mbwe nhóg Yesue antyém á nkin mé edib é Genesaret. Bad bēnləñnéd mó áwóg eyale é Dyöb.

² Héé anyíné bétánjé myöle mébe á nkin. Bekób-bé-súu bénkēmbáá áwēd-te. Bépépé’áá échab mbínzé.

³ Dóó ásólé á bōle ábe Simōne, aláá mó aá, ásyəñned mó á nkin. Adyē-’áá á bōle-tê, bonj ábootéd bad ayáged.

⁴ Ade amádé nê, anláá Simōne aá, “Kēén bōle wēe ndib édíí, bonj nyébwēm mbínzé.”

⁵ Simōne antimtén mó aá, “A-Sán, sēkébwēm mbínzé nkuu rísyāāl, séekōbēē chōmchōm! Bonj mēbēl ngáne éhóbé.”

⁶ Dóó bébwémé mbínzé. Bénkōb ndun e súu kóəñ mbínzé éhape’.

⁷ Bēnlēbē baáb ábe bēbédé á bōle ábiníí bán béhye bēwōñgen bó. Ade baáb bépédé, myöle mésyāāl mébe ménlōn ne súu kóəñ mébootéd asú ásē.

⁸ Ade Simōne Petro anyíné nê, ankwē Yesue á mekuu, áhōbē aá, “A Sánjú, sōn! Syáá wēe rídíí áyāle ndíí mbelé-mbéb.”

⁹ Simōne anhób nê áyāle émbē bóobe baáb menyáké bwāmbwam ányín ndun e súu eche békóbé.

¹⁰ Menyáké ménkōb kóəñne Jemse bó Jōn, bán ábe Zebēdiē, ábe bēmbē á ehoñ é akób á súu. Héé Yesue álánjéé Simōne aá, “Weebáá’. Bootya chíi nyéētédē bad nlém á abum áhíd me.” ¹¹ Ade bépééné nímab myöle á nkin, bēntédé chōm ésyāāl áhed, bébootéd-te Yesue ahíd.

Yesue achōñté mod awē meləñ mékóbé (Mat 8.1-4; Mak 1.40-45)

¹² Mbwe nhóg Yesue abédé dyad ahóg. Mod awē meləñ mékóbé yāl esyāāl ampē áwē. Anyín áde anyíné Yesue, ankwē mó á mekuu, áchāá mó aá, “A-Sán, nzé edáá ehēle ébēl me nsán.”

¹³ Dóó Yesue ábidté ekáá, ábānē mó á yāl bonj álāñgē mó aá, “Ndəá, sánj!” Abwōg-ábwōg nímē meləñ mēmmaá ane mod á yāl.

¹⁴ Yesue anláá mó aá, eelánjé modmod, aláá-’e mó aá, “Kāg élúmed yāl wēe prise, ásimen we. Ebag-ke mende ngáne mbéndé e Mosēe éhédeé álúmed bad wēé mósaā.”

¹⁵ Ké nēñgáne Yesue ánkāñgē mó aá eelánjé mod, dīn démbē ákag mó mbwóg áte esyāāl áyāle nímē mbeltéd. Nê dēmbēl ndun e mod éladné mó á nkəg, áwóg chōm éche áhóbéé, ne ábel ádid bó bwām.

¹⁶ Bonj nzé pónDé empē mó, ayōgké’áá atim á ahánjé, ákáne.

Yesue achōñté mod awē awédé eped (Mat 9.1-8; Mak 2.1-12)

17 Mbwe nhóg ámpē Yesue ayógté'áá bad. Befarisia ne bemeléede bé mbéndé bémbē áhed. Bémbíd dyad ne dyad tée á mbwóg é Galilia ne Judeya, kááñne á Jerusalem. Ngum e Dyöb empií mó, ádid bad bé nkole bwâm.

18 Dó-'áá bad behóg bépeeneé mod á mekále mîn awě awédé eped. Béhédé'áá nzii echě bésônleé mó á ndáb-te, ánaad mó á'sō-te wée Yesue.

19 Bénkēnkudté etál áyāle ndun e mod enlón áhed. Dóo béchágké á ndáb mîn. Dóo bēnédté nnō, bésudéd ane mod bóobe mekále á etále-té á'sō-te wée Yesue.

20 Ade Yesue ányíne adúbe ádě ábe bad béwóó áte anláá ane mod awě awédé eped áá, "Amúē, nlagséne wē mbéb."

21 Dóo bemeléede bé mbéndé ne Befarisia bébóótédé anyoo áte bánken, "Ebál é mod éhéé ésyáa Dyöb nēn? Nzéé ahele se álagsén mbéb ésebán Dyöb dēmpēn?"

22 Yesue anchem bó mewēmtēn áte. Héé ásedtēé bó aáken, "Cheé ékáá bon nyéwōō' enén ndín e mewēmtēn?"

23 Ahéé adé dyam ásad, áhób wēé, 'Nlagséne wē mbéb,' káa áhób wēé, 'Syáá ásé, ébooted aké?"

24 Bon mēlūmēd nyé mēé, Mwān-a-Moonyon awóó kunze álagsēn mbéb á nkōñsé." Héé álāngéé ane mod awě awédé eped áá, "Nlāñge wē nēn mēé, syáá ásé, étéd mímōn mekále, ésúé' á ndáb."

25 Abwōg-ábwōg ane mod anhidé ásé áfintē e bad, atéd mímē mekále, ásūē-'e mó á ndáb, ákag ákēmtē Dyöb.

26 Menyáké ménkōb moosyáal awě ambé áhed. Héé bébóótédé Dyöb akēn ne mbwóg áte bán, "Sēnyíne akan dé menyáké chii nēn."

*Yesue achénlé Levi
(Mat 9.9-13; Mak 2.13-17)*

27 Ambíd e nē Yesue ansyáá áhed. Ade ákagké nē, annyín nsaad-a-tááse nhóg bán Levié. Levié andyéé ásé á ndáb echě ákóbáá tááse áte. Héé Yesue álāngéé mó nēn áá, "Hídé mē."

28 Dóo Levié átyéémé ámīn, áchēnē chōm ésyāal áhīdē-'e mó.

29 Bōob-pōó, Levié anchāg sánkalaa a ngande áwe ndáb á dīn áde Yesue. Besaad bé tááse hīin ne bad bémpēe bémbē áhed.

30 Héé Befarisia ne ábāb bemeléede bé mbéndé bényongéé áte wée Yesue ábē bambapee, bésēdtē bó bánken, "Cheé ékáá bon nyáābe besaad bé tááse ne bebel bé mbéb bémpēe nyédyāg ndyééd, nyé mwāg-ke mīm hōm ahóg?"

31 Yesue antimtén bó ne ngan áá, "Bad ábe bedyéé bwām béetógnēné mod a-bwel. Bad ábe bēkonle' bóo bétógnēné mod a bwel.

32 Nyébīi nēn bán, meépedéé áchéle bad ábe békóbnédé á'sō é' Dyöb, bon mpedé áchéle bebel bé mbéb mēé bésōg mbéb abel."

*Nsedtéd tñgene
adid á yāl nzaa á mekáne-tē
(Mat 9.14-17; Mak 2.18-22)*

33 Befarisia bémbād ahób bán, "Bembapee ábe Jōne béménténé yāl nzaa adid á mekáne-tē. Melemlem né-'áá Befarisia ábāb bambapee bómpē bébeleé. Cheé ékáá bon ábōñ bedyāg ndyééd, bēmwāg-ke mīm?"

34 Yesue ankwentén bó ne ngan áá, "Chán bad ábe belébpé á ngande e e'wóngé béhele bēdidé yāl nzaa á mekáne-tē áde mod awě akude sómbé ádíi adé ne bó?"

35 Bon epun épě éche békobénné bó mod awě akude sómbé. Echē epun dóo bēdidtē yāl nzaa á mekáne-tē."

³⁶ Yesue anláá bó ngan aá, nzé mod ahóbe aá, mónabpe' mbóté, eeséléé eped é abad áyāle mbóté ekóólé bonj ánabnáád mbóté e nchun. Nzé abelé nê, né asalé mbóté ekóólé. Ké eped ekōōlē-ε éetāngánné ne mbóté e nchun.

³⁷ Melemlem nêngáne mod éētēdēē mīm mékōōlē se ahé mó á nchun mé ntyág, se ápen. Ayāle nzé abelé nê, né mīm méhōd kóōj ntyág rýéd, mīm mémād asyoge, ntyág-ke ámpē níbéb.

³⁸ Bétāngéné béhé mīm mékōōlē á apom dékōōlē.

³⁹ Bad ábe bó-ε bémwāg mīm, béemaá'ε mīm mé nchun amwé se béhéde mékōōlē. Bébele béhób bán, "Saá mé nchun mōō mébóó-ye?"

6

*Nsedtéd t̄ngene abel dé nsón
á mbwε-mé-nkóme-áte
(Mat 12.1-8; Mak 2.23-28)*

¹ Mbwε nhóg Yesue ne ábē bembapεε bétómé'áá á nzag e ngun-tê. Nén démbē á mbwε-mé-nkóme-áte. Abē bembapεε bēbootéd e'sóg é' ngun apád, bépāgke', bedyág.

² Nguse é Befarisia bényíné-'aá nê, bonj bésedté bó bánken, "Cheé ekáá bonj nyébelé akan áde mbéndé éebagεé kunze ábel á mbwε-mé-nkóme-áte?"

³ Héε Yesue mó-ε ásedtεé bó aáken, "Nédē nyéēláá'ε á kálag e Dyōb dyam áde kōj Dabide ámbenlé áde nzaa ekóbé mó ne ábē bad-ε?"

⁴ Ansól á Ndáb-e-Dyōb mó ne bad ábe bēnwōón mó, atéd e'wεle ábe é'bédé nde e Dyōb, adyé. Bonj echéd mbéndé éebagεé mod ké nhóg kunze ádyē ábē e'wεle étōmεé prisε. Mwēn andyé, ábē-ε kóōjne bad ábe bēnwōón mó donje."

⁵ Yesue ambádé bó áte aá, "Mwān-a-Moonyon awóó nkamlen kóōjne ámīn e mbwε-mé-nkóme-áte."

*Yesue achōjté mod awē ekáá éwédé
(Mat 12.9-14; Mak 3.1-6)*

⁶ Epun émpēe Yesue ankē á ndáb e mekáne. Ambootéd bad ayáged. Nén ámpē démbē á mbwε-mé-nkóme-áte. Mod nhóg-ke ambé áhed awē ekáá émbáá éwédé.

⁷ Bemeléede bé mbéndé ne Befarisia bēnóné'áá mó chodchod, ányín nzé áđíd ane mod bwām á mbwε-mé-nkóme-áte, ábel nén békóben mó awusé.

⁸ Yesue mó-ε anchēm bó mewēmten áte. Héε Yesue álāngεé ane mod aá, "Hyē étyéem áfintē hén." Ane mod anwógén mó.

⁹ Dóó Yesue ásedtεé bad aá, "Nyélaa me ké édé mbéndé ábel mbonj á mbwε-mé-nkóme-áte, káa ábel mbéb. Edé mbéndé áson alongé á mod, káa áwúu mó?"

¹⁰ Ahóbe nê, anone-ε bad á mesó. Dóó álāngεé ane mod aá, "Sále ekáá áte." Asále áde ane mod ásánlé ekáá áte, ekáá éndyεé mó bwām ámpē.

¹¹ Nén dénkōbēd Befarisia ne bemeléede bé mbéndé ekanj áte, béhāgkē mó ápid mó mekáá.

*Yesue apwεdé bembapεε bé
nlómag dyóm ne bébe
(Mat 10.1-4; Mak 3.13-19)*

¹² Ambíd e pónde Yesue ankē á ekone mīn ákáne. Ankáné nkuu rísyāāl kóōj ne mbwεmbwε.

¹³ Bonj áde bīn é'kénlé, anchélé ábē bembapεε, ápwεdé dyóm ne bébe áwab tíntē, áchāgé bó aá, bembapεε bé nlómag. Abē bembapεε bé nlómag bēbédéε,

¹⁴ Simōne awe ámbāgkē đīn aá, Petro, bó mwānyanj Andreyā, Simōne, Jakōbe, Jōne, Filibe, Batolomyo,

15 Matyo, Tɔmasε, Jemσε mwăn awě Alfɔσε, Simɔνε mod a kán,

16 Judase, mwăn awě Jemσε ne Judas Iskariɔδε awě antīm Yesuε asóm.

Yesuε ayágté, achõhté-'ε ndun e mod

(Mat 4.23-25)

17 Dɔɔ bɔɔβε bembapεε bésyógké á ekone sé, bépag á hõm áde átánlé. Béntān bembapεε bémpēe híin ne ndun e mod áhed. Ene ndun e mod embíd á mbwóg e Judeya-té esyáál, á Jerusalem, kήne á myad mé Tirε ne Sidɔn á nkin mé edíb é nkwe.

18 Bēmpē nē áwóg Yesuε eche póle, ne ábel nén ádid bad ábe békonle bwām. Adidé'áá bad ábe edáádəŋ bé mbéb é'tágté'áá bómpē bwām.

19 Mod téé ahedáá áá mó nsidtén mó ngáne émbēē bán, ngíne ebídé'áá mó á yál eché edidé'áá bad bwām.

Mekan mé nnam ne mé medim

(Mat 5.1-12)

20 Hée ábóótédé ábē bembapεε akalɛn áá, “Nnam mbê ne nyé betóótōkē bé bad áyāle nyédé ásē e nkamlɛn ní Dyõb.

21 Nnam mbê ne nyé ábe nyédé nzaa bɔɔb, áyāle Dyõb dékōdéd nyé.

Nnam mbê ne nyé ábe nyélebe bɔɔb áyāle nyéēwɔó.

22 Nnam mbê ne nyé nzé édé bán ngáne nyéhídeé Mwăn-a-Moonyon, bad békóó nyé, bábáa nyé á yál, bésyáá nyé, béchəge-'ε nyé mīn mé mbéb.

23 Nyéwóge bwām, nyébwεεn ámīn nímé mbwε, áyāle nsábe míme nyékudté ádyõb ríchábé ámīn. Melemlem nē dɔɔ besáá bē' bɔɔd bómpē bésyáá'áá bekal bé'dáádəŋ.

24 Bonj édé ngɔl ne nyé ábe nyédé nhɔn, áyāle nyēmaá echên ndε akud.

25 Edé ngɔl ne nyé ábe nyékódé bɔɔb, áyāle pónde épě eché nyétaké nzaa.

Edé ngɔl ne nyé ábe nyéwɔɔ bɔɔb, áyāle nyéēlēb, nyéchīi-'ε.

26 Edé ngɔl ne nyé nzé moosyáál ákémte nyé. Nē dɔɔ ábāb besáá békémtáá bekal bé'dáádəŋ bé metóm.

Nyédəŋ bad ábe békóó nyé

(Mat 5.38-48, 7.12a)

27 “Bonj nlánge nyé ábe nyéwóglan mε hén bɔɔb mεé, nyédəŋ bad ábe béhede nyé kɔkɔɔ, nyébenle-'ε bad ábe békóó nyé mbonj.

28 Nyénamed bad ábe bésyāntad nyé, nyékānnad-te bad ábe bébele nyé nhel mé mekan.

29 Nzé mod abɔmé wε abén á akəg, ékunnéd mó ádíníí ámpē. Nzé mod akõbné wε mímõŋ nkobe, weebāŋné mó ké echonj sóte.

30 Kénzée awě achómé wε chõm, beé mó. Mod ké ahée-'ε awě adumné wε bwēm, weéhedné mó bó ámbíd.

31 Kéchée éche édáá wεé bad bébel áwõŋ, ébel chó áwāb.

32 “Nzé nyédəá bad ábe bédáá nyé bēnpɛn, né mekenag méhéé nyékudté ne nē? Kááŋne bebel bé mbéb bómpē bédəə bad ábe bédáá bó.

33 Nzé nyébele mbonj dásɔ wεε bad ábe bébenle nyé mbonj bēnpɛn, né nsyáŋ nhée nyékudté ne nē? Kááŋne bebel bé mbéb bómpē bébele nē.

34 Nzé édé nén bán bad ábe nyélyágé nlém bán bómpē bēbāl nyé bwēm bēnpɛn bó nyébáleeé bwēm, né nsyááŋ nhée nyékudté ne nē. Ké bebel bé mbéb bēbále baáb ngáne bēbí bán bómpē bēbāl bó melemlem.

35 Bonj nyédəŋ bad ábe béhede nyé kɔkɔɔ, nyébenle-'ε bó mbonj. Nyébálee-'ε bad bwēm ésebán nyésine dyamdyam ámbíd e nē. Nē débēl Dyõb ábe nyé nsábe míme ríchábé á mīn, nyéchəgnéd-te bán, bán bé Dyõb á Ngum. Nyébíi-'ε bán, Dyõb áde ngɔl ne bad ábe béēsāgnān Dyõb, ne ábe bēbéé nlém.

36 Nyéwõŋ nlém ní ngɔl melemlem ngáne awên Titée áwóó nlém ní ngɔl.

Nyaa echē bad bébidtēé mbakú
(Mat 7.1-5)

³⁷ “Nyéekáádté bad, bon Dyöb dómpē déekāādtē nyé. Nyéehóbé bad, bon Dyöb dómpē dééhōbē nyé. Nyélagsan bad bon Dyöb dómpē álagsan nyé.

³⁸ Nyébage bad, bon Dyöb dómpē ábage nyé. Akab áde nyékudté, békín dós, bépuméd-te dós ámín, kááñ ásyogke, bon bépémtéd nyé. Melemlem mé nhəgtéd míme ébénlédé mós Dyöb dómpē débénlédte.”

³⁹ Yesuε ankalé bós ngan aáken, “Mod awě akwedé ndím ahele alyágéd waáb mod a ndím-ε? Bós bad bébε béehúnné ebíi-ye?”

⁴⁰ Mwän-a-ayáge eetóméé mod awě ayágte mós, bon kénzée awě amadé ayáge áte, abelé abé ndágke eche awe meléede.

⁴¹ “Cheé ékáá bon éwāmsān mwă púuted anyín á díd á wěn, ésebán ehele nkog míme ndé emōñ á díd anyín?”

⁴² Chán éhele-se eláá mwānyon wéé, ‘Amúē, mwě, rihūd wε mwă púuted á díd’, áde wéenyīnēē nkog míme ndé mmōñ á díd? A-bedog-bad! Sébé éhūd nkog míme ndé mmōñ á díd, dós wétōñ’ε púuted echē edé mwānyon á díd anyín, bon ehúd-te chós.

A epum dós bécheméé bwel
(Mat 7.16-20, 12.33-35)

⁴³ “Alín á bwel á bwām déebeléé-se áchyáá e’pum bé mbéb. Alín á bwel dé mbéb-pe déechyāā’ε e’pum é’ bwām.

⁴⁴ A epum é bwel dós bécheméé alín á bwel. Ebyééné bwām bán, béēpādēē ngun á yāl e mbísan káa besabé á yāl e mewán.

⁴⁵ Mod a bwām abele bwām áyāle é’bide mós á nlém-té wéé bwām ékōñnéde. Mod a mbéb-pe abele mbéb áyāle mbíde mós á nlém-té wéé mbéb nkōñnéde. Edé nē áyāle, mam míme ríloné mod á nlém-té, mós-’aá mébide mós á nsəl.

Belón bé ndáb bébε
(Mat 7.24-27)

⁴⁶ “Chán nyéchəgéé mε pónde téé bán, ‘A-Sán, A-Sán,’ bon nyéēbēlē dyam áde nlanğéé nyé?”

⁴⁷ Mod téé awě apedé áwem, awě awóge ábēm e’yale, bon ábelé-’ε ngáne rihóbéé, mēhəgtén nyé nyaa e mod echē ákóó abé.

⁴⁸ Adé nēē nlón-a-ndáb, awě anlíme mekon mé ndáb se ásē, ásūmē ene ndáb eláá mín. Edíb énlōnē, éból mós á ndáb-te ne ngine, bon énkēnhēnlé chós apán, áyāle ambíi chós alón.

⁴⁹ Bon kénzée awě awóge ábēm e’yale bon eébele ngáne é’hóbéé adíi nēngáne mod awě anlón ndáb ésebán asumme chós. Ade edíb ébólé mós á ndáb-te, ene ndáb enkwě melemlem mé pónde, epáá-’ε nyaa eche ekamé ahəgtēn.”

7

Yesuε achōñté mbəledε
awě mod ambáá a sánze
(Mat 8.5-13)

¹ Bad bésyāāl bēnwōg rímén mekan míme Yesuε áhóbé’áá. Ade amáá mós ahób, ankě á dyad á Kapenahum.

² A dyad-té wē, mod ambáá a sánze é Roma ambé awě akamlan mbwókel e sánze. Awě mbəledε nhóg awě ándəngé ákónlé’áá kááñ áhéde awé.

³ Nēē ane mod ambáá a sánze áwóge Yesuε dúu, anlóm belyáged bé dyad áá béchēnléd mós Yesuε, áhye áhood awě mbəledε.

⁴ Bépédé-'aá wée Yesue, boŋ béchāā mós ne nlém nhóg bán, “Hyě éhébe ane mod. Adii mod awě atəŋgéné nímonə nhébe akud.

⁵ Adəə adēd alon ə bad, aləŋgé-'e syānē ndáb e mékáne.”

⁶ Yesue anwoón bós. Boŋ áde ákwógé ape á ndáb wée ane mod ambáá a sánze, dós mod ambáá a sánze ne álómé baáb wée Yesue ámpē aá, béléa mós bán, “A-Sán, weétagté we yəl, mmēn meékwognedé ákob we nken áwēm ndáb.

⁷ Nén ábélé menkēnhenlé ké ape áwon e'só. Boŋ ké eyale chós wénhōbpē, awēm mbəledé ədyéé bwām.

⁸ Mmēn ndii mod awě adé ásē e nkamlən, mmēn-ne nwóó sánze éche nkamlané. Nlāŋge póg méé, 'Käg', ékäg-ke nē dēn. Nlāŋge empée méé 'Hyăg', éhyăg-ke nē dēn. Nzé nlāŋge awēm mbəledé méé, 'Běl échén', ábélé-'e nē dēn.”

⁹ Ade Yesue áwógé nē, yəl enkóm mós áte. Héé ákúnné e'só wée echon é bad éche éhídé'áá mós, álāŋgé bós aá, “Ne mbále, nlāŋge nyé méé, meényinēē mod á alon ə Israel ké nhóg awě awóó nyaa e adúbe eché anén nken-e-mod áwóó.”

¹⁰ Atim áde bad ábe bēnlōmmē bétímé ámbíd ə ndáb, bēntān nēŋgáne ane mbəledé ámáá bwām adyēē.

Yesue apuúdté nkúd a mmwaád mwān

¹¹ Eebeméé áte* Yesue ankě á dyad áde béchəgēé bán Nain. Abē bembapēé bēmbē ne mós ne echon é bad.

¹² Ade ápédé benben ne mmwe ní dyad, bad bēmbídēn ndim ní mod níme mémbē mpəm ní mwān níme nyaá. Nyaá abédé nkúd a mmwaád. Ndun e mod eché embíd ə dyad-tē, embé ne mós.

¹³ Ade Sāŋgú Yesue ányíné ane mmwaád, ankóbtén mós etyăg. Dós álāŋgéé mós aá, “Lénéé awé!”

¹⁴ Ansidé á'sō, ásitén mekále níme bēmpēmē ndim ní mod ámīn. Bepém bēntyéem. Héé áhóbéé aá, “A-kódemod, nlāŋge we nēn méé, syəá ásē.”

¹⁵ Dós ane kódemod eché anwé ésyāŋgé ásē, boŋ ébootáád dyam ahób. Héé Yesue ábágé mós wée nyaá.

¹⁶ Mbwóg ménkōb moosyəál, békēmtē Dyōb bán, “Nkal é'dəádəŋ ambáá abídé áwəd tīntē,” bēhōbē-'e bán “Dyōb ápíídé ábē bad!”

¹⁷ Mmēn nkaləŋ təŋgene Yesue ménwōgnēd mbwóg e Judeya áte esyəál ne melon níme médé benben.

Jōne, Ndusene alómé ábē bembapēé wée Yesue (Mat 11.2-19)

¹⁸ Bembapēé ábe Jōne bómpē bēnwōg nímmén mam. Héé békíí mós aláa.

¹⁹ Dós átédé bēbē, alómé bós wée Yesue, aá bésēded mós nēn bán, “Wē-éé edé ane awě Dyōb áhóbé aá mólōm-ē, ngé sébē sésine' mod ampée?”

²⁰ Abē bad bépédé-'aá wée Yesue, bēlāŋgē mós bán, “Jōne, Ndusene alómé sé áwōŋ aáken, 'Wē-éé edé ane awě Dyōb áhóbé aá mólōm-ē, ngé sébē sésine' mod ampée?’ ”

²¹ Póndé eche bépédé áhed nē, adidé'áá ekud é bad bwām ábe bétágnáá nkole nyaa ne nyaa, ábe bēnkúd medim ne bad ábe e'dəádəŋ bé mbéb é'bédé áte. Amběl bad híin ábe bēnkwě ndim bényinne'.

²² Héé átímtanné Jōne ábē bembapēé aá, “Nyétime' ámbíd, nyéke nyéláa Jōne mekan níme nyényinné dīd ne níme nyéwógé. Nyéláa mós bán, bad ábe bēnkwě ndim bényinne', ábe bésyágté'áá békag bwām, ábe meləŋ ménkōbpē

* **7:11** Eebeméé áte: Donje á kálag dé'só éwóó: *Nēē bīn é'sāŋgé.*

bésáá.† Abe bēnkwe' ndóg bēwógne', ábe bēnwē, bēpuude', nkalan' mí bwám-me ámpē níkalte' wée betóótōkē bé bad.

²³ Nnam mbê-'ε ne kénzée' awě eéhəŋlene nlém á abum t̄əŋgene me."

Yesue aláŋgé bad nyaa e mod echě Jəne ádíí

²⁴ Ade mésénze míme Jəne mímáá atim ámbíd, Yesue ambootéd ndun e mod echě embé áhed akale t̄əŋgene Jəne. Ansédéd bó aáken "Póndé echě nyémbídtē áke dé atán Jəne á ehyáŋge, cheé nyéwēmtēnnē bán nyéēnyín? Apab á chyaá áde epub éságtée-yε?"

²⁵ Cheé nyēnkée anən? Mod awě ahédé kase é mesan-ε? Nyébíi nén bán, bad ábe bēwáa' kase é mesan, bon' bétógné-'ε yəl, bédyεe dásō á ndáb é k̄əŋ.

²⁶ Cheé-ō nyēnkée anyín? Nkal é'dáádəŋ mós nyēnkée anyín-ε? Nê dēn! Ne mbále, nláŋge nyé mée, nyēnyíné mod awě atómé nkal é'dáádəŋ.

²⁷ Jəne mós adé ane awě bēhóbé'áá áde bétélé e'yale ábe Dyōb áhóbé áá, 'Nəné', nlóme mímēm mésénze míme mésēbē wε á'sō, ábonŋsen wε nzii.'

²⁸ A mbále mod ké nhóg awě abídé á abum dé mmwaád eetóméé Jəne. Bon' ké nê, mod awě adé ndimtən átíntē e bad ábe bédé á nkamlen ní Dyōb, adé etógnén tómaa Jəne."

²⁹ (Bad bésyāal ábe bēnwōg chōm éche Yesue áhóbé, k̄əŋne besaad bé tááse bēnkwentén bán ntíi ní Dyōb rítáŋgéné, áyāle bēnkūd edusen éche Jəne.

³⁰ Bon' Befarisia ne bemeléede bé mbéndé bēnchím yəl k̄əŋne ntíi ní Dyōb áyāle bēmbāŋ edusen éche Jəne akob.)

³¹ Yesue ambád ahób aáken, "Cheé méhəgténné nyonŋel é bad e'chii? Chán bēn békóó abé?"

³² Bédíi nēŋgáne bēndem ábe bédyée' á dyad-tê, bon' bēlēbpē nhóg ne aníníi bán, 'Sétóŋgé nyé e'lon, bon' nyéeságée.

Sékónné nyé nkáŋgé ní kwééd, bon' ké nê nyéēchyē' é awé.'

³³ Ade Jəne, Ndusenε ápédé, eéyake'áá ndyééd ádyé, eemwáge'áá-'ε mím. Nyébootéd ahób bán, 'Edáádəŋ é mbéb édé mós áte!'

³⁴ Mwān-a-Moonyon apedé, ádyāg ndyééd, á mwāg-ke mím, nyéhōbē bán, 'Nyénóne mós, adáó ndyééd bwámbwam. Mmwé mímε ngēn, awonŋne belad bé tááse ne bebel' bé mbéb.'

³⁵ Bon' káəŋ ne á asóg, mod tée' awě abíi dyam abelé ahób áá, nzii e Dyōb etáŋgéné."

Mmwaád awě bēlágséné mbéb

³⁶ Farisia nhóg anlébé Yesue áá ahyε ádyē ndyééd áwe ndáb. Ade ápédé áwed, andyεé áse, ádyé ndyééd.

³⁷ Mmwaád nhóg mós-'ε abédé á dyad-tê wē, awě abédé mbelé-mbéb. Awóg áde áwógé bán Yesue ádyāg ndyééd á ndáb e Farisia, ampéén apom á dyōg dé elod é bwám áhed.

³⁸ Anyogén áse bēnben ne mekuu míme Yesue, ábootéd achii, ásobté' mós mekuu ne mésəd. Ampíné mós mekuu ne échē esid é nló, ámwāā mós mekuu álúmed edúbé, anyōnlé-'ε mós mekuu ne ádé dyōg dé elod é bwám.

³⁹ Anyín áde ane Farisia anyíné nê, anhób áwe nlém-tê áá, "Nzé nkal é'dáádəŋ mós anén mod ánkəŋgé abé, né abágé'áá abíe' nyaa e mmwaád eche anén mmwaád awě akidtan mós ádíí ne abé áde áwóó, né abíi-'ε nén áá anén mmwaád ádíi mbelé-mbéb."

† **7:22 Asaad á yəl:** Nzé meləŋ ménkōb mod bétédé'áá mós nēε mod awě eesáa. Bébéné'áá mós bán eesíté wée bad bédíi.

⁴⁰ Hée Yesue álānggēé mó nén aá, “A-Simōn ndəə wε mwǎ pólé aláa.” Farisia ne ankwentén aá, “A-meléed, cheé édé? Kǎg á’sō, éláa mε.”

⁴¹ Dóo Yesue áhóbéé aá, “Mod nhóg abédé awě abalé’áá bad ngáb. Ane mod akalé’áá bad bébe melúm. Akalé’áá nhóg móom mé e’kálé métáan, aníní’-ε e’kálé étáan.

⁴² Bó modmod bénkēnhēnlé atuε. Né-əó anlagsén bó mod téé áde alúm. Bəəb-póó, áyāle bó bad bébe, nzé-módé édúbpé wεé átōmtēn mó adəŋ?”

⁴³ Simōne antimtén mó aá, “Ndúbpé mée, ane awě alúm déntōmtēnnē achab ámīn.” Dóo Yesue áhóbéé aá, “Etāngéné.”

⁴⁴ Dóo ákunneé wée ane mmwaád, boŋ álāngē Simōne aá, “Enyíne anén mmwaád-ε? Ade nísólé áwōŋ ndáb, wenkēmbaá mε mendīb wεé n̄wobned mekuu. Boŋ anén mmwaád asánté mε mekuu ne n̄mē mėsəd, apíné’-ε mó ne échē esid.‡

⁴⁵ Wenkēnháá mε tâl, boŋ taa mensól hén, eésóggēé mε mekuu anyəle.

⁴⁶ Wenkēnwógédté mε dyǒg á nló ákob mε nken, boŋ awógté mε dyǒg dé elod é bwām á mekuu.

⁴⁷ Edəŋge é ngíne éche anén mmwaád alúmté, édé nhəgtén ne alagsen áde ákúde áyāle ekud é mekan mé mbéb éche ábélé. Mod-te awě béebudéé mbéb alagsen, eébūdēē edəŋge alúmed.”

⁴⁸ Hée Yesue álānggēé mmwaád ne aá, “Ekudé alagsen dé mbéb áyāle mbéb n̄mōŋ n̄syāēl.”

⁴⁹ Bad ábe bóbəə bedyágé’áá ndyéed bēnsədéd yǎl bánken, “Ebál é mod éhéé chén éche éwóó kəŋne kunze álagsen mbéb?”

⁵⁰ Yesue anláá mmwaád ne aá, “Adúbe áde éwóó áchóŋté wε, kǎg ne nsəŋ.”

8

Nguse é bebaád éhide Yesue

¹ Ambíd e n̄e Yesue ambootéd ake myad ne myad, mémháá ne mėsəd. Akagé’áá, ákalé’ nkalaŋ ní bwām mé nkamlēn ní Dyəb. Akééné’áá ábe bembapεε dyōm-ne-bébe.

² Bebaád ábe e’dəədəŋ bé mbéb bēmbēē áte ne ábe békónlé’áá nkole mémpēe, boŋ áchōōd bó, bómpē bēmbē á echoŋ. Abē bebaád bēbédéε, Maria mmwaád a dyad á Matala awě ánhūdtē e’dəədəŋ bé mbéb saámbé á yǎl,

³ Joanaa, mmwaád awe Kusa, mod awě abédé nló áyāle bembəlede ábe Herəde, Susanaa ne ekud é bebaád bēmpēe. Abē bebaád bēbénládtáá ábab bwēm bēn, bétəgnán Yesue ne ábē bembapεε.

Ngan e mbál-e-bū

(Mat 13.1-9; Mak 4.1-9)

⁴ Ekud é bad émbíd dyad ne dyad téé áhyε dé anyín Yesue. Ade béléádné áte n̄e bəəb, ankalé bó ngan nén aá,

⁵ “Nkwel-é-nzag nhóg anké mbál asob á nzag-tē. Ade ásobéé mó n̄e, donge dénhūn á nzii-tē, betóm bé nzii bémad mó akəgted ámīn, menōn mómpē mémad mó asōmted. ⁶ Donge dé mbál dénhūn á eláá mín. Mmē ménkōb, boŋ ménhyēlē áde méepedéé akwog, ngáne édí bán ndəəb e eláá mín eékoŋgēé mendīb.

⁷ Donge ámpē dénhūn wée mekōd médíí. Néε bóbəə bēkwōgē, mekōd ménkəŋ ábē bwēm.

‡ **7:44** A mbwóg e bad bé Israel, nzé mod akobé’áá mod nken, antāngén mó mendīb abε áwobe mekuu, ahé mó tâl, awógéd-te mó dyǒg á nló.

⁸ Mbál mémpēe méntān ndɔɔb e bwām. Mēnkwōg, ríchyáá-’ε bwāmbwam. Donge dé e’sóg dénwālē mbwókél é mbum.” Ade Yesue ámadé nê, ambád áte aá, “Kéznéé awě awóó metúu áwóge’.”

Chōm éche ékǎá boŋ Yesue ákalé’ ngan
(Mat 13.10-17; Mak 4.10-12)

⁹ Ambíd e pónde, Yesue ábē bembapεε bēnlāā mó bán, átógnd bó ene ngan.

¹⁰ Héε álāŋgεé bó nén aá, “Dyōb ábágé nyé kunze ábíi kun é nkamlεn ní Dyōb. Boŋ bad ábe bélyágé ásē, bēwōg chó nēε ngan ábel nén, bényíne’, boŋ béecheméé, bēwóge’, boŋ béēsōŋtānnē.

Yesue atógké ngan e nwén-é-mbál
(Mat 13.18-23; Mak 4.13-20)

¹¹ “Bɔɔb-pɔɔ, rítógnd nyé ene ngan. Mbál rídii Eyale é Dyōb.

¹² Mbál míme ménhūn á nzii-tê rílúmte bad ábe bēwóge eyale é Dyōb, boŋ ámbíd e pónde Devεε áhyε ahúd bó chó á nlém-tê, ábel nén béedūbpē Dyōb se békūd e’sóson.

¹³ Mbál míme ríhúné á meláá-tê rílúmte bad ábe, nzé bēwóge Eyale é Dyōb, békobe chó ne menyíŋge, boŋ éché eyale éwēnnādtē bó á nlém-tê. Bédúbpe Dyōb á esóŋ é pónde boŋ á pónde e mekεgsen bédol yǎl ámbíd.

¹⁴ Mbál míme ríhúné á mekōd-te, rílúmte bad ábe bēwóge Eyale é Dyōb, boŋ kǎŋ ne á asóg, mpúlé mé nkōŋsé, abud á bwēm awóŋ, ne menyíŋge mé nkōŋsé ríkǎŋ bó nlém áte. Nê ákǎá’, bēheléé kǎse é e’pum achyáa.

¹⁵ Mbál míme mó-’ε méntān kǎse e ndɔɔb, rílúmte bad ábe bēwóge Eyale é Dyōb ne nlém rísyāāl, békōō-’ε chó á nlém-tê. Nê ábele’ bēwesān kǎŋ béchyáá e’pum.

Nzé béchódé etrukǎŋ, béekōŋgéé chó
(Mat 4.21-25)

¹⁶ “Modmod eémāá’ε etrukǎŋ achod se ákōō chó á ebwɔg-sé, káa atibéd chó á anŋ sé. Abelé ákēlé chó dásō ámín, ábel boŋ kéznéé awě asóle á ndáb, ányíne ekíde.

¹⁷ Dyam téé áde áde á e’kōŋnd-te débid á nhéné. Kéchéé-’ε éche énsóóm á e’kōŋnd ébyēen, ébid-te á enyen.

¹⁸ Né-ɔɔ, nyétéd pónde ngáne nyéwóglanné. Kéznéé awě awóó nsōŋten ní kun é nkamlεn mí mín, Dyōb débād mó mímē nsōŋten abε. Ane awě mó-’ε eewóó, ábōd ké éche áwémtnéé aá mówōō.”

Túmbé eche Yesue
(Mat 12.46-50; Mak 3.31-35)

¹⁹ Bɔɔb-pɔɔ, áde Yesue nyaá ne baányan béhyédé mó anyín, bēnkēnhεnlé mó apε benben, áyāle etál éébēdeé ngáne ndun e mod énlāŋndté mó.

²⁰ Dóó bad bēlāŋgεé mó bán, “Pón nyoó bóɔbe baányon bétyémé á ebwóg, béhede-’ε wε anyín.”

²¹ Héε Yesue átimtanné bó nén aá, “Bad ábe bēwóge eyale é Dyōb, bēbelé-’ε ngáne éché eyale éhóbeé, bóō bédé awem nyaá ne ábēm baányan.”

Yesue ahóódté ekudkud
(Mat 8.23-27; Mak 4.35-41)

²² Mbwε nhóg Yesue ansól á bǎle-tê ne ábē bembapεε, aláá bó aá, “Syáá déchabe pεd e edib eníní.” Dóó bēbwógké ekε.

²³ A ekε-tê wê, e’chó bēnkōb Yesue. Hê dóó ekukud étané bó átínté e edib. Mendíb ménsāl bó á bǎle-tê kǎŋ, mam mébéén bó ebébtéd.

24 Hée békíí Yesue anyem ásē bonj bēlāngē mós bán, “A-Sán, a-Sán, pón syánē dewág-ōō!” Dóo anyémme ásē, ákännē ekukud éched áte, éhóó-’ε. Edib éche éhódé’áá áte chómpē énsōg ahod.

25 Dóo ásedtéé bós aáken, “Nédē nyéedúbpéé me-yε?” Nén dénkōbēd bós mbwóg, yál-le enkóm bós áte bwāmbwam bésēdté nhóg ne aníní bánken, “Ebál é mod éhéé chén, éche ékamlan kóáñe ekukud ne mendíb, kóáñ bēwōgnē-’ε mós?”

*Yesue achōjté mod a Gerasin
awě e’daádəñ bé mbéb bém̄bēē áte
(Mat 8.28-34; Mak 5.1-20)*

26 Yesue ne ábē bembapεε bēnchabé edib, bootya á Galilia, bépε á múde nímíní, á mbwóg e Gerasin.*

27 Ade ábidé á nkin ambomén mod a dyad nhóg awě e’daádəñ bé mbéb bém̄bēē áte. Ebédé etún é pónde áde ane mod ééháge’aá mbóté. Eedyεε’aá ké á ndáb-te, nzése á soóbaε.

28 Anyín áde anyíné Yesue, ankwě mós á mekuu ne esaád á nsəl, ábōnē aá, “A-Yesu, Mwān a Dyōb á Ngum, cheé sóo déwónné? Sōn, weekógsán me.”

29 Nê démbē áde Yesue amáá e’daádəñ bé mbéb akamlən aá, é’bíd mós áte. Ngen ne ngen, nzé e’daádəñ bé mbéb bēnsəl mós áte, ké á mehangé dóo ámbēē, apádtádtáá bengōbēngōbē ábe bēhédé mós á mekuu ne mekáá, bonj edáádəñ é mbéb ékεεné mós á ehyánge.

30 Yesue ansédéd mós aáken, “Chán dĩn ádíí wε?” Ankwentén aá, “Amutεε.” Anhób nēngáne e’daádəñ bé mbéb híin bēnsōnlē mós áte.

31 E’daádəñ bé mbéb ábed é’cháá’áá Yesue bán, eehúnté bós á echóg éché éewóo asóg,†

32 Esog é nguu ébédé áhed édyāg medyé á mbám mé ekone. Dóo ábē e’daádəñ é’cháá’ε Yesue bán áte bésəl ké á esog é nguu-tē. Dóo Yesue ábágé bós kunze.

33 Abíd áde e’daádəñ bé mbéb bē é’bidé ane mod áte, bēnsəl éché nguu áte. Dóo nguu éwúbpé ásē, ényəgté’ á e’láá bé nkin mé edib, éhún á edib-tē, éhó-’ε.

34 Ade benən bé nguu bényíné nê, bēntōm mehélé, békag bēkanlé bad nkalan á dyad-tē ne á mebwóg níme médé benben.

35 Awóg áde bad bēwógé-aá nê, bēbwógé-’ε ásē áke dényín dyam áde ábénléde. Bépédé-aá wée Yesue ámbēē, bényín ane mod awě ánhūdtē e’daádəñ bé mbéb áte ngáne ádyéé mós á akéb, ahédé mbóté á yál, ádyēē-’ε bwām. Dóo mbwóg níkóbé bós.

36 Bad ábe bēnyínən dĩd bēnkale bós ngáne Yesue áchójté ane mod.

37 Hée bad bé mbwóg e Gerasin bēlāngé Yesue bán ásyəə áwāb ndəəb, áyāle mbwóg ní ngine ménkōb bós. Dóo ásólé mós á bōle-tē, bonj ásuē’.

38 Mod awě bēnhūdtē e’daádəñ bé mbéb áte anchánj mós aá búmō békag, bonj Yesue antiméd mós ámbíd aá,

39 “Timé’ áwōñ dyad, éke ékanle bad ndəle a dyam échē Dyōb ábénlé wε.” Ane mod ansú á dyad, ákag, ákanle mod téé dyam áde Yesue ábénlé mós.

*Yesue apuúdté ngəndéε póg
áchōōd-tε mmwaád ampée
(Mat 1.18-25)*

40 Ade Yesue áhúú, ndun e mod enhyě mós aságnen ne menyiñge ngáne émbēē bán bésíné’áá mós.

* **8:26 Gerasin:** Donje á kálag dé’só áwóo *Gadara*, émpēe-’ε éwóo *Gεεsa*. † **8:31 Ebii:** Mewēmten mém̄bē bad bán e’daádəñ bé mbéb bēbē á mbwog á ndib e ebíí kóáñ né echab pónde e nkógsen epedé.

41 Hée mod nhóg awě béchágé'áá bán Jairuse ápédé áwē. Jairuse abédé nhóg átíntē benkamlen e ndáb e mekáne. Ankwē Yesue á mekuu, áchāá mó aá, áhye áwe ndáb. Aá

42 míme mpəm mí mwän a mmwaád ríhede awé.

Ade Yesue ákagké áwed, bad bēnləhned mó.

43 Mmwaád nhóg ambé áhed awě akönlé'áá nkole míme mekií mébídé'áá mó á yäl pónde ésyāäl. Mmē nkole mbédé mó á yäl á etūn é dyōm-a-mwē ne ríbe ésebán modmod ahēle mó bwām adid.‡

44 Hée ábídé Yesue ámbíd, bon ásitén Yesue mesó mé nkobe míme ánwāá'ē. Abwōg-ábwōg mekií ménsōg mó abíd á yäl.

45 Dóo Yesue ásedtéé aáken, “Nzé-módé asidténe me?” Modmod enkēnkwenténne. Dóo Petro áhóbéé aá, “A-Sán, ngómē ndun e mod eləhnedé wē, káəh békəhnené-'e wē.”

46 Bon ké nē Yesue anhób aá, “Mod akidténe me, áyāle nwógé ngáne ngíne ebídé me á yäl.”

47 Ade ane mmwaád ányíne nē bəəb aá móshelēé yäl akoo, ambíd Yesue á'sō. Anəá'áá ne mbwóg. Ankwē mó á mekuu. Hée áhóbéé á'sō wēē bad bésyāäl chōm éche ékáá bon ásitén mó, ne ngáne módyéé bwām melemlem mé pónde.

48 Dóo Yesue áhóbéé aá, “A-mwän-a-mmwaád, adúbe ádōh ádíde wē bwām. Käg ne nsaŋ.”

49 A pónde eche Yesue áhóbéé nē, dóo mod awě bélómé wēē Jairuse ápédé bon áhəbē nēn aá, “Weétəgné wē Meléede ataged. Awoŋ mwän amaá mó awé.”

50 Yesue awógé-'áá nē, bon álāngē Jairuse aá, “Weewógé mbwóg! Dúbé dúbpén, né mwän ádyéé wē bwām.”

51 Ade Yesue ápédé wēē Jairuse áwe ndáb, enkēnháá etál aá, mod ampée áhíd mó á ndáb-te éetóméé Petro, Jone ne Jemse, nchoo ne ane mwän sáá bó nyan.

52 Bad béchyé'áá, bélebé-'e. Yesue anláá bó nēn aá, “Nyéēchyēē'. Ane mwän eewédéé, akúne kúnén.”

53 Bad bēmbootéd mó awəə, ngáne bēmbī'ē bán amaá awé.

54 Hée Yesue áchəngé mó ekáá, bon áchəgé mó aá, “A-mwän, páde áse.”

55 Dóo edəádəh étímé mó á yäl, apáde-'e áse ábwōg-ábwōg. Yesue anláá bó aá, bébe mó ndyééd, ádyē.

56 Yäl enkóm nyaá bó sán áte bwāmbwam, bon Yesue anláá bó aá, béekanlé modmod dyam áde ábénléde.

9

Yesue alómé bembapēē dyōm-ne-bébe (Mat 10.5-15; Mak 6.7-13)

1 Yesue anchélé ábē bembapēē dyōm ne bébe abwóg ahóg. Ambag bó ngíne ne kunze áhúd bad e'dəádəh bé mbéb áte, ne ámad nkole nya ne nya.

2 Anlóm bó aá, béke békale nkalaŋ mé nkamlen rí Dyəb, béchoŋte-'e bad.

3 Dóo álāngéé bó nēn aá, “Nyéewánlé chōmchōm á eke, ké ntón, ké ekwē, ké ndyééd káa ngáb, modmod eewánlé-'e mbóté ébe.

4 Ndáb ké ehéé echē nyésólé áte, nyédyēē áwēd-te káəh ne mbwē míme nyésyəngéé.

5 Dyad ké áhéé-'e áde béekobéé nyé nken, nyétēdē dó, nyékūd-te ebumbú á mekuu álúmed nēn bán échab ebébtéd éəne bēn.”

6 Hée bembapēē bébwógké áse, békäg dyad ne dyad téé, békalé nkalaŋ mí bwām, bédidé-'e bad bwām hōm ne hōm téé.

‡ 8:43 Donje á kálag dé'só ébádé bán: *Ammád chōm ésyāäl éche anwōhə abébed wēē bad bé me.*

*Herode atage áte**(Mat 14.1-12; Mak 6.14-29)*

⁷ Βααβ-πός Ηερóδε awě akamlánnáá alonj á Galilia anwóg mam mésyāāl níme mēmbenléd. Mewēmtēn métágé'áá mó áte áyāle bad behóg behóbé'áá bán, Jone apuúdé,

⁸ ábíníí bán, Elaijaa atimé ámbíd á nkōñsé, bémpēe-'ε bán, nkal é'dáádəŋ nhóg a'βóód mó atimé ámbíd á alongé.

⁹ Ηερóδε anhób aá, “Mēmbel básēl Jone nló. Nzéé ampée níwógéé bán abele nímén mekan?” Nē dēmbēl ádəŋ aá mónyín ane Yesue.

*Yesue adítte ndun e mod**(Mat 14.13-21; Mak 6.30-44; Jón 6.1-14)*

¹⁰ Ade bembapēe bé nlómag béhuú ámbíd, bénlāā Yesue mam níme bébélé. Héε átédé bó bonj átimné bó á ahəŋgé á hōm á dyad á Betsaida.

¹¹ Ade amute á bad áwógé nē, dénhid mó áwed, káŋj bétán mó. Ankob bó bwām, ákanlé bó póle e nkamlēn ní Dyōb, áchoŋté-'ε bad ábe behédé'áá bwām adyēe.

¹² Ade ngukél épédé dōo bembapēe bélāŋge Yesue bán, “Chené ábén bad, bétimé' á myad-tē níme médé benben, ábel béhed ndyééd ne hōm áde bénaá'ε. Ndyééd eésaa hén, e'noŋ-'ε béesaá wēe dédíí nén.”

¹³ Héε Yesue álāŋgéé bembapēe aá, “Nyé bó nyébe bó chōm éche bádyēē.” Dōo behóbéé bán, “Sēwóó e'wēle é'taan ne sūu ébe. Ene ndyééd eéhēlēē bad bésyāāl akwog.”

¹⁴ Mesonjé mé bad ábe bébédé áhed mémbe e'kálé é'taan. Bonj Yesue anláá ábē bembapēe aá, “Nyélad bad áte, nyékab bó bonj akab tēé ábē móom mé bad métaan.”

¹⁵ Bēnkāb bad áte ngáne ánhōbpē.

¹⁶ Héε Yesue átédé ábē e'wēle é'taan ne échē sūu ébe, ákabé áte, ásāgnān Dyōb bonj ábagé bembapēe aá békabpe bad.

¹⁷ Bad bésyāāl bēndyē, békód-te káŋj ene ndyééd élyāg ásē, eche beláde áte e'lónj dyōm ne é'be.

*Nzé-módé Yesue mwēn ákóó abé?**(Mat 16.13-28; Mak 8.27-9.1)*

¹⁸ Mbwe nhóg Yesue anchíb yāl áke dé akáne. Bembapēe bēnpen bóo bémbē áhed. Ansédéd bó aáken, “Nzé-módé bad bó behóbéé bán ndé?”

¹⁹ Bēntimtén mó bán, “Donje á bad behóbe bán, edíi Jone Ndusenē. Donje áhōbē bán, Elaijaa, bémpēe bán, nkal é'dáádəŋ a'βóód atimé ámbíd á alongé.”

²⁰ Dōo Yesue áhóbéé aá, “Bonj nyébēn-ne, nzé-módé nyéhóbéé bán ndé?” Dōo Petro áhóbéé aá, “Edíi Ane Awě Dyōb Awógté.”

²¹ Héε ásíméé bó etúu áte, álāŋgē-'ε bó aá béepanlé áte.

²² Ambád aá, “Mwän-a-Moonyonj atəŋgéné ákūd metake híin, bad bémbáá bóobe beprise bémbáá ne bemeléede bé mbéndé bébāŋ-'ε mó á yāl. Béwū mó, bonj e'pun ábe é'lónténé é'láán, āpuú.”

²³ Anláá moosyāál áhed aá, “Kénzée awě adəə me ahíd ásob yāl mendíb, ápēm adē awəg mbwe tēé, bonj áhíde me.

²⁴ Áyāle kénzée awě ahede adē alongé asonj, ábōd dó. Kénzée-'ε awě abóde adē alongé áyāl echēm, ákūd alongé áde déemaá'.

²⁵ Nsyáŋj ríhée mod ákudté nzé akudé nkōñsé rísyāāl bonj abóó, ké'ε abóde échē edáádəŋ.

²⁶ Kénzée awě ákwāgēn me ne ábēm e'yale, Mwän-a-Moonyonj mómpē ákwāgēn mó á pónde échē ápéé ne ehúmé échē, nédē ehúmé é Sáŋj ne ángel éche ésáá.

27 Bon á mbále, baahóg bédé nló ámín bəəb, béenyínénné kwééd díd, áde béēsēbpéé nkamlén ní Dyöb anyín.”

*Yäl ehǎjléné Yesue
(Mat 17.1-8; Mak 9.2-8)*

28 Néé émádé ké e’pun waam, áde Yesue amáá ahób nê, ankeén Petro bó Jon ne Jemse á ekone mín ákáne.

29 Ade ákânneé nê, e’só bēnhǎjlén mó á nló, nkobe nímē mó-’e nípúbé féréd, nímwaá-’e áte.

30-31 Abwōg-ábwōg bad bébe, Mosεε ne Elaijaa, bémbīdēn ehúmé é ngum, bébootéd mó akalēn. Békálé’áá ngáne álonēdtē ntíi ní Dyöb tǎngene kwééd eche áwēē á Jerusalem.

32 E’chó bēnlōn Petro ne baáb á díd. Ade békábnédé bényín ehúmé éché ne bad bébe áhed.

33 Ade ábē bad bébe bétēdtéé Yesue, dōo Petro álanǎgēé mó aá, “A-Sǎn, ébóó ngáne syáā dédíí hén. Délōn e’bem é’láán, échōn, éche Mosεε ne éche Elaijaa.” Anhób nê ésebán abíi chōm éche áhóbéé.

34 Eépedéé ké amad á nsəl, bon mbag ébíd, ékúdtén bó. Nén dénkōbed bó mbwóg.

35 Héé bēwógé ehób ébide á mbag-tē nén, “Mwǎn awēm mó nén. Mōo nípwédé. Nyéwógne mó.”

36 Emáá-’aá ahób nê dōo bényíné Yesue mwēnpēn. Bénkoó ádén akan ésebán bēkanle modmod dó.

*Yesue achōjté kádemod
echē edǎǎdǎn é mbéb émbēē áte
(Mat 17.14-18; Mak 9.14-27)*

37 Ade bīn é’sǎngé, Yesue bóəbe bembapεε bēnsūd á ekone-sé. Ndun e mod ehye mó abomen.

38 Héé mod nhóg á echon é bad-tē wē álébpéé mó aá, “A-meléed, sōn, ncháa’ wε meé, énon awem mwǎn á díd. Adíi me mpōm ní mwǎn.

39 Edǎǎdǎn é mbéb étagte mó. Nzé échǎngé-’e mó, abelé abón esaád, ahún ásē, ánúadé kǎǎn mehod mébīdē mó á nsəl. Elédte mó achene, né émáá mó yǎl ached áte.

40 Mempéén mó wéε ábōn bembapεε, nchǎn bó meé, bēbīded mó edǎǎdǎn é mbéb chē áte, bon béeheléé.”

41 Dōo Yesue átimtanné aá, “Wáā, nyé bad bé’ chii, mbéltéd nímēn méētyéeméé, nyéewōo-’áa adúbe. Chán mápéé nyé adyεεn bon nyédúbé me? Hyεεné awon mwǎn hén.”

42 Ade ane mwǎn áhúé-’e nê, edǎǎdǎn é mbéb éched émpií ane mwǎn, ébōm mó ásē, ánúadé. Dōo Yesue ákánneé éché edǎǎdǎn é mbéb áte, ádíid ane mwǎn bwám, ábāg-ke mó wéε sáá.

43 Menyáké ménkōb moosyǎl, ányín ndǎle a akan awē Dyöb ábélé.

*Yesue akǎnlé eche kwééd ngan ámpē
(Mat 17.22-23; Mak 9.30-32)*

Ade bad bélyǎgé bényágéé nê, áyāle chōm éche ébēnlédé, Yesue anláá bembapεε nén aá,

44 “Nyésōngtēn dyam áde níhedeé nyé aláa bwám. Bébē Mwǎn-a-Moonyon á mekáá mé baányon.”

45 Bon ábē bembapεε béenkēnsōnténné chōm éche ánhōbpē. Embē néε ngan echē elélé bó atóge, bēbáá-’áá-’e mó aseded.

*Nzée atómténé mod
ambáá abé á'sō é' Dyöb?*

(Mat 18.1-5; Mak 9.33-37)

⁴⁶ Bembapεε bêmbootéd aswan̄ten tâηgene mod awě atómténé mod ambáá abé áwab tîntê.

⁴⁷ Yesuε anchēm bó mewêmten áte. Antéd mwämpîn mí mwëndem, ápēēn mó áwe akéb.

⁴⁸ Dóó álângeé bó nén aá, “Kéńzée awě akobé anén mwän á d̄in ádêm, né akobé mε. Kéńzée-’ε awě akobé mε, né akobé ane awě alómé mε. Né-óó, ane awě adé mwämpîn áwen tîntê, né mó atómé mod ambáá abé.”

Mod awě adé awōη

(Mak 9.38-40)

⁴⁹ J̄one anhób aá, “A-Sán, sēnyín mod abídte bad e'dáád̄an bé mbéb áte á d̄in ádōη, sēnláá-’ε mó bán ásōg abel nê, áyāle eésáá ne syánē.”

⁵⁰ Dóó Yesuε álângeé bó aá, “Nyéelángeé mó bán ásōg abel nê. Kéńzée awě eetāηgán syánē né adé ne syánē.”

Bébáá Yesuε nken akob

⁵¹ Bóob-póó, pónde eche Yesuε ántāηgēnnē ake ádyōb embootéd apε. Né-óó, ammad̄ atii aá, mótāηgēnnē ake á Jerusalem.

⁵² Hé-’aá alómé mésēnzε á'sō. Mēnkě á mwă dyad a Samaria nhóg, ábele mó mboηsén.

⁵³ Boη áde ápédé áwed bad bé dyad bēnkēnkobpé mó nken áyāle á Jerusalem dóó ákágé’áá.*

⁵⁴ Ade bembapεε, Jemse bó J̄on bényíné nê, dóó bésédté Yesuε bánken, “A-Sán, edáá wεé séchéle muú ádyōb, r̄hye r̄hyáad bó-yε?”†

⁵⁵ Boη Yesuε ankuné áwāb, ákännē bó áte.‡

⁵⁶ Héε bó b̄ōó békíí á dyad démpēe.

Bad ábe bēmp̄on Yesuε ahid

(Mat 8.19-22)

⁵⁷ Ade békagké nê, mod nhóg anláá Yesuε aá, “Mēhíd wε kéhéé áde ékagké.”

⁵⁸ Dóó Yesuε átímtanné mó aá, “E’bubwóg é’wóó ábab e’lóm wεé bésóléé, men̄n-ne ámpē méwóó r̄ímab m̄m, boη Mwän-a-Moonyoη eewóó’é h̄m áde ábannéé nló.”

⁵⁹ Yesuε anláá mod ampée aá, “Hyăg, éhíde mε.” Boη ane mod antímtén mó aá, “A-Sán, mwě, r̄sébe r̄ke r̄líme echem sán.”

⁶⁰ Yesuε anláá mó aá, “Mwě ndim r̄límmē r̄ímāb ndim mí bad. Boη wε, éhedne bán, éke ékanle bad nkalan̄ mé nkaml̄en r̄í Dyöb.”

⁶¹ Mod ampée anláá Yesuε aá, “A Sán̄gú, mēhíd wε, boη mwě, r̄sébe r̄ke r̄lyágt̄en echem ndáb.”

⁶² Boη Yesuε anláá mó aá, “Kéńzée awě aboótédé h̄m alíi, boη ánōné’ ámbid, eékwogndéé ábel nsón ásē e nkaml̄en r̄í Dyöb.”

10

Yesuε alómé bembapεε móom saámbé ne bébe

* **9:53** Alon̄ á Samaria démbē áfintê meloη mé Galilia ne Judeya. Boη bad bé Israel bēnkēnkobpé bad bé Samaria née baányan̄. Né-óó bad bé Samaria béekwēntannaá bad bé Israel ábe bēbídé’áá á Galilia nken akob nzé békágé’áá ngande achog á Jerusalem. † **9:54** Donje á kálag é’só ébáde bán: *nēηgáne Elaijaa ámbēnlé.* ‡ **9:55** Donje á kálag dé’só ébáde bán: *anhób-pe aá, “Nyéebt̄i’ε edáád̄an éche ékamlan̄ nyé. Mwän-a-Moonyoη eépedéé áwúu bad, apédé dásō ásoη bó.”*

¹ Ambíd e nê, Sánḡwéé ampwěd bembapεε bémpēe móom saámbé ne béβε.* Anlóm bó á'sō béβε béβε dyad téé ne hōm téé áde ámbíí'é aá móōpě.

² Anláá bó aá, “Nzag echyáá bwámbwam, bwēm é'hednad apád, boḡ bepád béebuu'é áte. Né-óó, nyékānne nén bán, nwóó-nzag álóm bepád.

³ Nyékag-kóó, boḡ nyébíi bán nlóme nyé néε rídyōḡ ní mbód átínté e ngā.

⁴ Nyéewánlé ekwε é ngáb á yǎl, ké ekwε empée, káa metámbé. Nyéēbwāg-ke mod aleled á nzii.

⁵ Ndáb ké ehéé eche nyésōnlē, nyéleled bó nén bán, ‘Nsaḡ míbē ne nyé.’

⁶ Nzé mod a nsaḡ adé áhed, né mímēn nsaḡ mébē ne mó. Nzé eésě, né métimén nyé bēn.

⁷ Ndáb ké ehéé eche nyésólé, nyédyēē áhed. Nyéēpenlád ndáb áte. Nyékob-pe kéchéé eche bébagεé nyé ádyé káa ámwé, áyāle mod a nsón atāḡḡéné néε ákudεé míme nsábe.

⁸ Dyad ké ahéé áde nyépédé áte, boḡ békob nyé nken, nyédyē kéchéé eche bébágé nyé.

⁹ Nyédide bad bé nkole bwām, nyélaa-'ε bó nén bán, ‘Nkamlen ní Dyōb nípédé nyé benben.’

¹⁰ Boḡ dyad ké ahéé áde béekobεé nyé nken, nyéke á ntém nzii, nyéhōb nén bán,

¹¹ ‘Ké échén ebumbú eche émbē sé á mekuu, sēkudté nyé chó, boḡ ké nê nyébíi bán nkamlen ní Dyōb rídé benben.’

¹² Nlāḡge nyé mεé, á epun é nkáásé, nkóḡsēn míme dyad á Sodom dényínnē mébē mwāmpín tómaa míme bad ábe bédé áde dyad áte békudté.

Edé ngəl ne bad ábe béekunne mbid

(Mat 11.20-24)

¹³ “A-bad bé Korazin, ébēēn nyé ebébtéd! Ebēēn nyémpē ebébtéd á-bad bé Betsaida! Ayāle nzé émbē bán, ndāle é mekan eche Dyōb ábélé áwēn myad, émbenléd nê á dyad á Tirε ne dyad á Sidōn, né bēnwāā melebe se etún, bémwagtéd-te mbúmbú áyāl álúmed nén bán, béhāḡléné ádab abé dé mbéb.

¹⁴ Boḡ mbwε mé nkáásé, nkáá míme bad bé Tirε ne bé Sidōn mébē mwāmpín tómaa mímēn.

¹⁵ Nyé bad bé Kapenahum ámpē, nyéwēmtan bán, nyēmaá ape ádyōb, boḡ bésudéd nyé kāḡ se ásē á dū-á-muú.”

¹⁶ Héε álāḡḡéé bembapεε nén aá, “Kénzée awě awóḡné nyé, né awóḡné mε, boḡ kénzée awě abáá nyé á yǎl, né abáá kāḡne mε. Kénzée-'ε awě abáá mε á yǎl, né abáá kāḡne ane awě alómé mε á yǎl.”

Bembapεε Móom saámbé ne béβε béhúú ámbíd

¹⁷ Ade bembapεε móom saámbé ne béβε ábe Yesuε ánłōmmē béhúú ámbíd, bēnlāā mó ne menyḡḡe mésyāāl bán, “A-Sāḡ, kāḡne e'dáédāḡ bé mbéb bēnsudéd yǎl áwεd e'só, atúb áde sétúbé wε đín.”

¹⁸ Dóó Yesuε áhóbéé aá, “Nnyíné Satanε ahúné ádyōb nēḡḡáne emwεdmwεd.

¹⁹ Mbagé nyé kunze ádyaa nyě bóóbe bengaabobe bé mpwēn ámin, ne átóm ngíne esyāāl eche Satanε áte, Satanε ne ane awě akóó syánē. Dyamdyam déebenlé nyé.

²⁰ Boḡ ké nê ámpē, menyḡḡe míme nyéwóḡεé méēbāḡ nén bán, áyāle e'dáédāḡ éwóḡné nyé, boḡ pen nyéwóḡ menyḡḡe dásō nén bán, mīn méténlédé nyé ádyōb.”

* **10:1** *Móom saámbé ne béβε*: Doḡḡe á kálag dé'só áwóó: *móom saámbé*.

*Yesue awógé menyinge
(Mat 11.25-27, 13.16-17)*

²¹ Abwōg-ábwōg Edáádəŋ éche Esáá† énwōgēd mó menyinge bwâmbwam, ahób aá, “A-Tê, Sāngwéé a nkoŋ ní sé ne ní mín, nságnen mbê ne we áyāle elúmté mpín ní bēndem mam níme ébāŋné bad bé debyéé ne bad bé nsōŋten. Ee, a-Tê, nê dēn dōo édóó wéé, ébenled.

²² Nlāa nyé mēé, Echem Sāŋ ebagé mekan mésyāāl áwēm mekáá. Mod ké nhóg eékoŋtéé mwān abii ésebé Dyōb Titéé. Mod ké nhóg-ke ámpē eebíí'é ngáne Titéé ákōŋté abé ésebé mwān, ne kēnzéé awē mwān ádáá aá mólúmed mó.”

²³ Héé ákúnné wéé bembapēē, boŋ álāŋgē bó á kun-tê nēn aá, “Nsimé ne bad ábe bényíne' mekan níme nyényíneé nēn!

²⁴ A mbále nlāŋge nyé nēn mēé, bekal-bé-e'dáádəŋ híin ne kāŋ é bad híin bēnwānén ānyín mekan níme nyényíneé ne áwóg mekan níme nyéwógé boŋ bēnkēnyínné, bēnkēnwóg-kaá.”

Ngan e mod a Samaria awē aboó nlém

²⁵ Bōob-pōó meléede a mbéndé anhyē Yesue akəg áte aá, “A-meléed, cheé mébenlé boŋ níkūd alonjé áde déemaá?”

²⁶ Yesue antimtén mó aá, “Chán éténlédé á kálag e mbéndé. Cheé éláá áwēd-te?”

²⁷ Meléede a mbéndé ankwentén aá, “'Etāŋgéné bán édəŋ Sāngwéé ádōŋ Dyōb ne nlém nísyāāl, ne edáádəŋ ésyāāl, ne ngíne esyāál, ne mewēmten mésyāāl.' 'Édəŋ-'e mwānyoŋ nēŋgáne echoŋ yāl.' ”

²⁸ Yesue anláá mó aá, “Ebíí akwenten. Nzé ebelé áned, né wēkūd alonjé áde déemaá”

²⁹ Ngáne ane mod áhéde'áá aá mósuud yāl nzəm, ansédéd aáken, “Nzé béchəgéé wēn nê?”

³⁰ Atimtén mó, Yesue ankāl ngan aá, “Mod a Israel nhóg akagé'áá eke, ambíd á Jerusalem, átimé á Jeriko. Ade ápédé á etūn-tê, bechíb bēnkōb mó, bēkōbēn mó chōm ésyāāl éche ánwālēē. Bēmbəmtéd mó kóŋ áhéde awé. Dōo béchénné mó á nkəg ní nzii.

³¹ Prisē póg chómpē esyōgké'áá melelem mé nzii. Dōo átáné ane mod. Ambamé nkəg ní nzii níminí.

³² Mod a túmbé e Levi awé abelé'áá nsón á Ndáb-e-Dyōb‡ awē mómpē ampě áhed, boŋ anyín mó, ambamé melelem.

³³ Boŋ mod a Samaria nhóg awe atómé'áá ene nzii, ampě áhed. (Bad bé Samaria bōobe bad bé Israel béechemtannaá.) Ade ányíneé mó, anwóg mó ngəl,

³⁴ ákē áhed, ahé mó mel á sii-tê, ákaŋ chó, boŋ ápēmē mó á ésl mín. Apēéné-'áá mó á dyad-tê, boŋ ásōnlē mó á ndáb e beken, ábōŋgē mó. ³⁵ Néé bīn é'sāŋgé ahúd e'kálé é'táan, ábag nwóó ndáb aá, “Téd nēn, étəgnan anén mod, kéchéé émpēé éche wēbēbēdtē, mētímtéd we ámbíd á ehúu.' ”

³⁶ Héé Yesue ásedtēé ane meléede a mbéndé aáken, “Atíntē e ábê bad béléán ábe bēntān ane mod awē bechíb bēnlōgēnnē, ahéé anlúmed aá módē waáb?”

³⁷ Meléede a mbéndé ankwentén aá, “Ane awē anwóg mó ngəl.” Héé Yesue álāŋgēé mó aá, “Kāg-kā, wēmpē ébele' melelem.”

Mataa bó Maria békóbe Yesue nken

³⁸ Yesue ne ábē bembapēē bēmpē mwā dyad nhóg. Mmwaád nhóg awe béchəgé'áá bán Mataa ankōb bó nken.

† 10:21 Donje á kálag dé'só áwóó Edáádəŋ éche Esáá; émpēé bán, échē edáádəŋ. ‡ 10:32 Mod a túmbé e Levi: Dyōb dēmpwēd enén túmbé ábel nsón á Ndáb-e-Dyōb. Bēwōŋgánnáá prisē ánabe Ndáb-e-Dyōb áte ne áboŋsen ntíi ní mende.

³⁹ Ane mmwaád mwǎnyan abédé dīn bán Maria. Maria anhyě Yesue adyεε á nkεg, áwóg mekan míme áyágté'áá.

⁴⁰ Boη Mataa anhágén áte ne nsón ní ndáb-te. Dóo áhyédé Yesue aláa aá, “A-Sánjú, weenyínéé nén wεé, awem mwǎnyan atědnédé mměmpεn nsón nisyāāl-ε? Láá mó wεé, áhyε áwōηgen με.”

⁴¹ Boη Yesue antimtén mó aá “A-Mata, nlém ítage wε áte áyāle ekud é mekan.

⁴² Boη dyam ádé ahóg áde ákóó etógnén abé. Maria apwεdé dó, ádé-'ε bwám. Meéhēlē-'áá se mbel se békōbēn mó dó.”

11

Ayáged dé mekáne

(Mat 6.9-13, 7.7-11)

¹ Mbwe nhóg Yesue ambé hōm, ákánne'. Ade áamá akáne awě mbapεε nhóg anláá mó aá, “A-Sán, yágéd sé ngáne békánneé ngáne Jonε án'yāgēdtē ábē bembapεε.”

² Yesue anláá bó aá, “Nzé nyēhede akáne, nyéhōb bán, 'A-Tē, edúbé ébē ne ádoη dīn. Mmoη nkamlεn níhyε ítéd etál.

³ Bǎg sé echεd ndyééd e epun é bīn* mbwe tée.

⁴ Lagsén sé mímed mbéb, áyāle sémpē sēlagsan mod tée awě apǎnné sé, weémwāg se sēhún á mekágsen-té.' ”

⁵ Dóo áhóbéé aá, “Nzé ewóó wěn, boη ekií áwē melúde wεé, 'Amúē, bál me e'wεle é'láán hē,

⁶ sōn, nkúdé nken awě achabé abíd, awem nsón-a-echon apedé áwēm. Meewóo-'áa chōm-éε íchágtanné mó.’

⁷ Boη ane wěn mó-'ε atímténé wε á ndáb-te aá, 'Weétagté με. Mmaá me ekob adib, syáābe ábēm bán sēmaá anaa ásē. Méehεnlé apáde ásē ábe wε chōmchōm.’

⁸ Nláa nyé á mbále meé, saké ké echon éche nyédíí, chóg épād mó ásē. Boη abádnεn áde wébādnēnē wěn, dóo dékǎη boη apádé ásē, ábē wε kéchéé éche éhεdéé.

⁹ Nlǎnge nyé nén meé, hεdén Dyōb, ábē wε. Héd, Dyōb débēl enyín, kūm ekob, Dyōb dédíbnéd wε.

¹⁰ Ayāle kénzée awě ahēdné Dyōb, ákūd, awě ahεdé-'ε, ányín. Kénzée-'ε awě akumé ekob, Dyōb dédíbnéd mó.

¹¹ Nyé besáá bé bán, nyé ahée mwǎn áhεdénne súu, boη mó-'ε átimé ébage mó nyǎ?

¹² Káa nzé ahēdné wε akii á kúb, boη wε-'ε étimé ébage mó ngabobe a mpwεn?

¹³ Nzé e'bébtéd é' bad née nyé nyébage áben bán kase é bwēm, tógtén-naa echεn Sán awě adé ámīn? Chán-nō éebaá bad Edáádεη éche Esáá ábe béhédné mó chó.”

Yesue eésáá nlatén ne kǎη e e'dáádεη bé mbéb

(Mat 12.22-30; Mak 3.20-27)

¹⁴ Epun ehóg, Yesue abídté'áá mod edáádεη é mbéb áte éche énkwid ane mod ebóbé. Ade émaá mó abíd áte, ane mod ambootéd dyam ahób. Nén, dénkōbēd ndun e mod echē ebédé áhed menyáké bwámbwam.

* **11:3** Ndyééd e epun é bīn; káa ndyééd e epun éche éhúé'.

¹⁵ Boŋ nguse é bad énhōb bán “Belzebule, k̄h̄ e e'daád̄aŋ bé mbéb mós abage mós ngine ábided bad e'daád̄aŋ bé mbéb áte.”

¹⁶ Bemp̄ee ábe béhéde'áá mós ak̄ag áte bēnhōb bán, álúmed bós e'chemléd ábe é'húú ádyōb.

¹⁷ Mós-ε ambíí nímāb mewēm̄ten, né-ós, anláá bós aá, “Alon ké ahéé áde ákábne áte, boŋ nchem̄ten mées̄, débēb. Abum á ndáb áde nchem̄tēn-ne mées̄, dóm̄pē dépāŋtēd áte.

¹⁸ Nzé édé bán, nkaml̄en míme Satan̄e ríkábne áte, chán-nō méhenlé atyéem? Nhóbe nē áyāle nyéhóbé bán, mbídt̄e' bad e'daád̄aŋ bé mbéb áte ne ngine ech̄e Belzebule.

¹⁹ Nzé ngine eche Belzebule chós mb̄enladté ábided bad e'daád̄aŋ bé mbéb áte, né ngine eche nzéé-ʼs̄ ábēn bad ábe bébídte e'daád̄aŋ bé mbéb bébenladté? Bēn bós békwid nyé nkáá.

²⁰ Boŋ ngáne édíí nēn bán ngine e Dyōb chós mb̄enladté ábided bad e'daád̄aŋ bé mbéb áte, nē álúmte nēn bán nkaml̄en ní Dyōb n̄pédé átínté ech̄ēn.

²¹ Nzé ngine e mod ebōŋs̄ené yāl, enone adē dyad, échē chōm ké ehóg éekagké hōm.

²² Boŋ nzé mod awē atómé mós ngine, abulé mós áte, abwōgk̄é-ε mós, abelé ákōbēn bwēm ábe áwann̄éé nzum, ákabtéd-te bwēm ábe ákóbne mós.

²³ Né-ós, kenzéé awē ees̄ ne me, né at̄h̄ngan me. Ane awē eewōŋgán me álad, apáa páán.

*Nzé edaád̄aŋ é mbéb étimé mod á yāl ámp̄e
(Mat 12.43-45)*

²⁴ “Nzé edaád̄aŋ é mbéb ébídé mod áte, ébelé ébwāgē á ehyāŋge áhed abwóg áde ákōmm̄éé áte. Nzé éekude, ébelé éhób aá, ‘M̄t̄im̄ ámbíd á ndáb eche mém̄bídte áte.’

²⁵ Ape áde épagk̄é-ε, ébelé étán néé ndáb ésáá áte, bénábp̄é-ε chós áte.

²⁶ Héé ékagké bōōb, éke ép̄ēn e'daád̄aŋ bé mbéb bemp̄ee saámbé ábe é'dé ebébtéd tómaa mwēn, boŋ é'hye é'sól ane mod áte, é'bwóg-ke e'dii áhed. Akēn eched, ane mod abág ebébtéd tómaa ngáne ánsēb̄ēē abé.”

Menyīŋge mé mbále

²⁷ Bōōb-pós áde Yesue áhóbé nē, mmwaád nhóg átínté e bad, ankánéd ehób ám̄in aá, “Nnam mb̄ē ne abum áde áchyáá wε, ne abíi áde ámwāŋté wε.”

²⁸ Yesue anhób aá, “Nnam mébē dásō né bad ábe bēwóge' Eyale é Dyōb, bébelé-ε ngáne éhóbéé.”

*Bad bé' chii béh̄t̄id̄ēē e'chemléd d̄id
(Mat 12.38-42)*

²⁹ Amute á bad dēmbootéd ak̄al. Héé Yesue áhóbéé nēn aá, “Nyongel e'chii edii nyongel e e'bébtéd é' bad. Béh̄ede e'chemléd bé menyáké anyín, boŋ béekudt̄é, nzése e'chemléd bé menyáké ábē Jonaa.

³⁰ Nyaa eche Jonaa ámb̄ēé néé e'chemléd w̄éé bad bé Ninive, chós Mwān-a-Moonyon áb̄ēé w̄éé enén nyongel e bad.

³¹ A Mbwe mé Nkáásé, mmwaád awē akamlánáá alon á Seba, ānyemé á son-tē, nchoo ne nyongel e bad bé e'chii. Abíd mbón ech̄e ékwid bós nkáá. Bék̄w̄é nkáá áyāle ambíd se nchabnede w̄éé nkōŋsé r̄sógé, áhye déwógl̄en mam mé debyéé míme Solomon̄e áyágté'áá. Boŋ chii nēn mod adé hén awē atómé Solomon̄e.

³² A Mbwe mé Nkáásé bad bé Ninive bényemé á son-tē nchoo ne enén nyongel e bad. Bébíd mbón ech̄e ékwid enén nyongel e bad nkáá, áyāle bad

bé Ninivε bēntεδé nímab mbéb áde Jonaa ânkaléé bó Eyale é Dyöb. Boη chii nén mod adé hén awě atómé Jonaa.

*E'nyínεn bé ekíde é' yǎl e mod
(Mat 5.15, 6.22-23)*

³³ “Modmod eémāā' é etrukánj achod se ákōō chó káa akúdtén chó † á ebwog-sé. Boη abelé ákēlē chó dásō ámīn, ábel boη kénzée awě asóle á ndáb, ányínne ekíde.

³⁴ Díd dōó adé ngáne etrukánj é yǎl e mod. Nzé díd ákénlé wε áte, echoη yǎl esyāál chómpē ebélé ekélé. Boη nzé déékēnle, yǎl chómpē ebélé elón wε ne ehíntén.

³⁵ Né-óó, nyétóo, ábel chōm éche ényínte nyé ekíde, éetimé abé chōm éche étimte' nyé á ehíntén-té.

³⁶ Nzé édé bán echoη yǎl esyāál elóné ne e'nyínεn bé ekíde, ésebán ehíntén édé abwóg ké ahóg, né yǎl ěmwaá áte, melemlen ngáne etrukánj épentéé ekíde.”

*Yesuε asélé Befarisia ne bemeléede bé mbéndé
(Mat 23.1-36; Mak 12.38-40)*

³⁷ A pónde eche Yesuε áhóbεé nê, Farisia nhóg, anchélé mó aá, áhyε búmō bédyē ndyééd áwe ndáb.

³⁸ Né-óó ankě, asól á ndáb-te, búmō bédyēē á tébele. Ane Farisia ambé menyáké ányín bán Yesuε eéwopεé mekáá ngáne éhédnádtaá, boη ábootéd ndyééd adyé.

³⁹ Dōó Sánḡwéeé álāḡεé mó aá, “Nōnέ', nyé Befarisia, nyēwobpe mbwendé ne dīse ámbíd e ebwóg, boη adum á bwēm ne ebébtéd bóó bélóné áwen nlém-té.

⁴⁰ E'dimdim é' bad ngēn! Mod awě ahəgé ámbíd e ebwóg, saá mó ahəgé kááηne áte-ye?

⁴¹ Boη nyétéd bwēm ábe é'dé áwēd-te, nyébage' betóótōkē bé bad. Né chōm ésyāál áyāl echēn ésāη.

⁴² “Medim ne nyé, Befarisia! Nyétéde ké meseb ne nduu ne byaá ábíníí é'syāál bémpēe, nyébage Dyöb donḡe nhóg áfínté e monḡe dyōm. Boη nyééhēdēē e'boη bé nlém ne edəḡe é Dyöb alúmed. Nyētəḡéné nímén mésyāál abel, ésebán nyéchəbte' nímíníí.

⁴³ “Medim ne nyé Befarisia! Nyédəə metii mémbáá adyεε á ndáb é mekáne, nyédəə-ε melεnten mé edúbé akud á dyən-té.

⁴⁴ Medim ne nyé! Nyédíi née soη éche ésóómé, éche bad bétóméé ámīn, ésebán bébíí.”

⁴⁵ Dōó meléede a mbéndé nhóg álāḡεé mó aá, “A-meléed, nzé ehóbe nê néde né esyāá' sémpē.”

⁴⁶ Yesuε ankwεntén mó aá, “Medim ne nyémpē bemeléede bé mbéndé! Nyépēmtad bad nted níme nílélé apém, boη nyébēn nyéebanéé ké ekáá ápémed bó mó.

⁴⁷ Medim ne nyé! Ayāle nén, bekal bé'dəədəη ábe besóó bēnwū'é, nyélōḡgé bó soη.

⁴⁸ Né-óó nyébíde' mbón, nyélúmte-ε bán, besóó bēmbel bwám ngáne bēnwū'é bekal bé'dəədəη. Nyé-'aá nyélōḡgé bó soη.

⁴⁹ Ayāle nê, Dyöb ne áde debyéé anhób nén aá, ‘Mēlōmē bó ábēm bekal bé'dəədəη ne bembapεε bé nlomag, bēwū behóg, bēhəḡké-ε ábíníí.’

⁵⁰ Né-óó, enén nyonḡel e bad chóó ěkūd nkōḡsen áyāle bekal bé'dəədəη bésyāál ábe nímāb mekií mésyóḡké se á mbooted mé nkōḡsé,

† 11:33 Donḡe á kálag dé'só eéwóó'é káa akúdtén chó.

⁵¹ mbooted ne mekií níme Abεε átímé' wεε Sakaria, awě bénwūū'έ átínté e menyán mé mendε ne hóm áde ásáá. A mbále, enén nyonηel e bad ékūd nkógsen áyāle níme mekan mésyāāl.

⁵² “Medim ne nyé bemeléede bé mbéndé! Nyékáá e'kii bé ekob é debyéé. Nyébën nyéesaá asól, nyékáá-ε bad bémpēe ábe béhede asól.”

⁵³ Ade Yesuε ásyāηεέ áhed áke, bemeléede bé mbéndé ne Befarisia bēmbotéd mó ahób bwāmbwam, bésedté-ε ekud e mekan.

⁵⁴ Bébélé'áá nímén mésyāāl áhíined mó melám ábel békóben mó awusé.

12

Elébé tâηgene bad bé elanηé

(Mat 10.26-27)

¹ Ambíd e pónde ndun e mod enladén áte, káāη etál éebédeé. Dóo Yesuε ábótédé bó akalēn, mbooted ne bembapεε álāηgē bó nēn áá, “Nyétéd pónde ne elanηé éche Befarisia, édé nēηgāne esultēn.

² Dyamdyam déesaá á e'konéd-te áde déebíd áwed. Ké ahóg-ke déesaá, áde ásóomé bon bán déebyéénné.

³ Dyam ké áhéé-ε áde nyéhóbé á ehíntēn-tē, déwōgnēd á e'nyínen bé ekide. Dyam áde nyékálé-áá á kun-tē ámbíd e ekob, dékanléd á nhéné.

Ane awě bétāηéné abāη

(Mat 10.28-31)

⁴ “Amúē, á mbále, nyéewógé mbwóg ne moonyon awě ahεle awúu ekob é yāl ésebán ahεle dyam démpēe abel. Awāb eetóméé nē.

⁵ Nlāa nyé meé, mod awe nyétāηéné abāη, adíi ane awě née ámáá wε pemε e alonηé akoben, awón-ε ngíne echē ábwéméé wε á dū-á-muú. Ne mbále ane móo nyétāηéné abāη.

⁶ Eesaá mbále nēn bán, kábpe ébe ngēn, chíó béchannéé ndun étāan-ne? Bon ké nē Dyōb déechatānné ké póg.

⁷ Dyōb ábíi káāηne mesonηé mé e'sid ábe é'dé nyé á nló. Né-ó, nyéewógé mbwóg, nyédé etōgnēn tómaa ndun, ké émbuú ké áte.

Akob Yesuε káa ábāη mó á yāl

(Mat 10.32-33, 12.32, 10.19-20)

⁸ “A mbále, kénzée awě ábíid me mbón á'sō é' baányon, Mwān-a-Moonyon mómpē ábíid mó mbón á'sō é' ángel é Dyōb.

⁹ Bon mod awě abáá me áyāl á'sō é' baányon, me-ε mēbāη mó áyāl á'sō é' ángel é Dyōb.

¹⁰ Kénzée-ε awě ahóbé eyale é mbéb tâηgene Mwān-a-Moonyon, ákūd alagsen, bon kénzée awě ahóbé e'bébtéd é' mekan tâηgene Edāádāη éche Esáá éekudté alagsen.

¹¹ Nzé édé bán bésómné nyé wεε belyáged bé dyad ne benkamlεε, nyéētāgē áte, ngāne nyékāā'έ káa dyam áde nyéhōbpē,

¹² áyāle nzé pónde epedé, Edāádāη éche Esáá éyāgēd nyé chíom éche nyétāηéné ahób.”

Ngan e eyókél é nhon ní mod

¹³ Atínté e ene ndun e mod, nhóg anlāá Yesuε áá, “A-meléed, láá mwānned wεé ákabe sūmō mbwóg áte.”

¹⁴ Bon Yesuε antímtén mó nēn áá, “Nzé-móde abānné me née mod awě akáadte' bad, ákabe nyé mbwóg áte?”

¹⁵ Dóo álāηεé bó moosyāāl áá, “Nyétóo, nyéēbanné nlém áyāle awón á bwēm, áyāle saké nhon móo nídide moonyon á alonηé.”

16 Ankalé-'ε bó ngan aá, “Nhon mí mod nhóg mémbē. Anwón nzag. Ade ene nzag échyáá, embídéd medyé nkute ne nkute.

17 Nhon mí mod mé ménhob áwe nlém tê aá, ‘Chán mébenlé bəob áde etál éelyəgέέ wέε ríkonγεέ medyé?’

18 Dóo ádólé áte chóon bon áhōbē aá, ‘Nén dóo mébenlé. Měpān échem ndáb é e'konéd, nlón émpēe éche ékálé áte, bon nkúm medyé áwēd-te, ne nhon nímēm rísyāāl.

19 A pónde eched-taá mélāā'έ échēm edəádəŋ mée, nlādté yāl nhon míme médyéé mwé ne mwé. Bəob-pəó mēched yāl, rídyāg, nímwāg, ríchogé-'ε alongé.'

20 Bon Dyōb dénlāā mó nén, aá ‘Edimdim é chōm chén. Nkuu nén dēn mēkobén wε pemε e alongé. Abē bwēm é'syāāl ábe émáá-'aá alad áte, nzé-módé wélyəgnēdtē bó?’

21 Nê dóo édíí ne ké nzé-módé awē akúmmé yāl nhon, bon eesē nhon á'sō é' Dyōb.”

Weétāgē áte á alongé

(Mat 6.25-34)

22 Dóo Yesue álāngeé ábē bembapεε nén aá, “Né-óó nyéētāgē áte á alongé se nyéhōbē nén bán cheé nyédyēē, ké'ε cheé nyéwāā'ε á yāl.

23 Alongé átómé ndyééd, échen yāl-le ámpē edé etógnén tómaa mbóté.

24 Nyénəne', nkənékən. Méewēnēē bwēm, méepādēē, méewóo-'áa hōm áde békongεé medyé. Kénê, Dyōb adídte mó! Nyéebíí'έ bán nyédé etógnén bwāmbwam tómaa menən-ε?

25 Nzé-módé áwen títé ahele átāg áte káon, abád ké epun ehóg áwē alongé áyāle átagéé áte?*

26 Née nyé modmod nyéehelée mpín mé akan née nímé abel, cheé ékáá bon nyétagé áte áyāle mam míme mélyágé áse?

27 “Nyénəne' mbonja ngáne ékwogεé. Eebelée ntū, éebanγéé mesan. Nlānge nyé nén mée, ké kān Solomonε ne nímē nhon rísyāāl eewáa'aá mbóté éche épédé échén mbonja ké póg e'bon.

28 Nzé Dyōb áheleεε áwāādtē e'sum ábē é'bāg chii bon chān béhé bó á dù, né étómmé nyé awáad né-yε? Chán adúbe ádíí nyé mwāmpín nén?

29 “Nyéebanné nlém bán, cheé nyédyēē káa cheé nyémwēē. Nê déetagté nyé.

30 Echē nyaa é bwēm chóo bad bé nkōnsé béchyεε'έ akud. Awēn Titée mwēn abíí aá nyétógnéné ábén bwēm.

31 Né-óó, nyésébe nyéhed mam mé nkamlen rí Dyōb, dóo Dyōb débéé nyé abíníí bwēm.

Nhon míme rídé ádyōb

(Mat 6.19-21)

32 “A-bānbān, nyéewógé mbwəg. Echen Sān awóo mewēmten míme mésáá ábe nyé gíne e nkamlen.

33 Nyésóm áben bwēm, nyébag betóótōkē bé bad mənέ. Nyéhed ekwε é ngáb éche éhelé amaa áse. Nyéhē nhon nímēn á e'konéd ábe é'dé ádyōb, wέε dyamdyam déebenlé mó, wέε bechíb béehenlé mó achíb, síi-'ε éehenlé mó adyé.

34 Nyéebíí bán wέε nhon nóbápkē mod, áhed dóo nlém-mε nóbápkē mó.

Mod-téeé ábē mbonjén

35 “Nyépūd abad, nyéchod-te etrukán,

* 12:25 Abád ké epun ehóg áwē alongé káa áchab tómaa ngáne ádtí.

³⁶ n̄ngáne bad ábe bésine' echab sán awě akií á ngande e e'wóngé ábel bon nze ahúú húén, bon akumé ekob, bēnednéd mó ábwōg-ábwōg.

³⁷ E'bon é' yāl áte ne bembaledε ábe echab sán épeé, bon atán ngáne bēdyéé epin, bésineé mó. A mbále ābonšén, ádíđ bó ásē, atómtéd-te bó ndyééd.

³⁸ Ké melúde dōo āmpéé, káa epog é mbwembwε, bon atán bó melemem, e'bon é' yāl áte bēlyāg é'tán bó.

³⁹ Nyébii-'ε bán, nze nwóó-ndáb abyéé'áá pónde eche nchíb ápeé, né ādyéé epin, ésebán atēdte aá, bésal mó ndáb.

⁴⁰ Nyémpē nyētāngéné mbonšén abé, áyāle Mwān-a-Moonyon āpě á pónde eche nyéēwēmtεneé bán āpě.”

*Mbaledε awě abele n̄mē nsón
ne nlém nhóg ne awě eébēlē'*

(Mat 24.45-51)

⁴¹ Petro ansédéd aáken, “A-Sán, sé bēn pen-εé ékanléé enén ngan-ε, káa bad bésyāāl?”

⁴² Sāngwéé ankwentén aá, “Né-óó, nyé mod té ábē nēe mbaledε awě awóó debyéé, awě abele-'ε mam n̄me eche sán álāngé mó aá ábel. Mó adé mbaledε awě eche sán ábānné aá ákamlεn bembaledε ábíníí, ányín-ne nén aá békúde ádāb akab á ndyééd pónde echē etāngéné.

⁴³ Nnam mébē ne ane mbaledε awě eche sán áhūū'é, bon atán n̄ngáne ábeléé mam n̄me ánlyāgtēnnē mó.

⁴⁴ Ne mbále, nlānge nyé nén mēé, ane mbaledε eche sán ābané bwēm é'syāāl ábe áwóó áwe mekáá aá ákamlan.

⁴⁵ “Bon nze ane mbaledε adé mbaledε a mbéb, bon ahóbé áwe nlém-tē aá, ‘Ebēm áte bon echem sán áhūū á eke-tē.’ Né-óó aboótédé ábíníí bembaledε bé bebaád ne bé baachóm ábe bédé ásē echē awanεn, ádyāg bwēm, ámwāg-ke m̄m mékóbe mó,

⁴⁶ ane mbaledε eche sán áhūū epun éche éēwēmtεneé ne á pónde echē énkēmbíí'ε aá áhūū. Né bēbwēm mó á ebwóg,† békógsén-ne mó ne nhel melemem ne bad ábe bēwúú nló áte.

⁴⁷ Ane mbaledε awě abíí ntíí mé nsón n̄me sáá-a-ndáb, bon eébonšene, káa eehíde n̄mē ntíí ámbíd, ákud mbéte e ngíne.

⁴⁸ Bon ane awě énkēmbíí ntíí, bon ábelé epandé, békúde mó kúdtén. Mod ké ahéé awě bēbúde abε, né-'aá bēbudté mó ahεden. Ane-'ε awe bétómténé abud dé abε, né-'aá bétōmēnnē mó abud dé ahεden.

Yesuε aá mōpééne nkabén

(Mat 10.34-36)

⁴⁹ “Muú móo n̄hyédé akwéd á nkōšé. Mendān-'ε mēé, né mēmmad akóben.

⁵⁰ Bon ntāngéné nsébé nkud edusen é metuné, mēmād-te chó akud bon nlém mépwíitéd mε.

⁵¹ Nyéwēmtan bán, nsan móo n̄hyédé apεen á nkōšé-yε? Aáy, saké nsan, nkabén móo n̄pééne.

⁵² Bootya bōob áke á'sō, ndáb echē ewóó bad bétáan ékabén áte, béléán bétāngén bébe, bébe-'ε bétāngén béléán.

⁵³ Kōkōo ēbē.

Sáá ātāngēn mwān a mwεnchóm,
mwān a mwεnchóm ātāngēn sáá.

Nyaá ātāngēn mwān a mmwaád,
mwān a mmwaád ātāngēn nyaá.

Nyānkálé ātāngēn mwān a mmwaád,

† 12:46 Bēbwēm mó á ebwóg káa bésēl mó áte e'són é'be.

mod mwān a mmwaád ātāngēn nyāṅkálé.”

E'chemléd é' bīn
(Mat 16.2-3, 5.25-26)

⁵⁴ Yesuε anláá amute aá, “Nzé nyēnyíné mbag ébide á mbəṅ, nyēbelé nyēhób bán, ‘Mbúú échā bəṅb’, ébenléd-te áned.

⁵⁵ Nyēnyíne-’áa epub éhúé’ á pəd e mbəṅ, nyēhəbē’ bán, ‘Enyεn ébēnēd mod bəṅb,’ ébé-’ε áned.

⁵⁶ A-bad bé elangé. Née nyépédé abíi ngáne béléá’é bīn nén, cheé ékóá bon nyēēhēlē mam míme mébenlad nyé á’sō-te chii nén achem?

⁵⁷ “Cheé ékóá bon nyébēn nyēēhēlē adol áte nén bán, kəse e akan nén echē ehēdnad abel?

⁵⁸ Nzé mod ahóbé aá, mókεεne wε á kóte, hēd nzii kóáṅ nyúmō bétim ásē á nzii. Esebé nē, nzé ahédé wε á kóte, kóte chó-’ε ēbéé wε á mekáá mé plúse, plúse chó-’ε ehε wε á mbwəg.

⁵⁹ A mbále, nlāṅge wε mεé, weéhēlēē-se ebíd á ndáb e mbwəg-tē wē kóáṅ né etwedé ádōṅ alúm ásyāāl.”

13

Nyétεde abel dé mbéb, nyétimεn Dyōb

¹ Ade Yesuε ádíi ahóbéé nē, dōo nguse é bad éche émbē áhed élanṅεé mó ngáne Payledε ánwūū’é bad bé Galilia áde bébágé’áá Dyōb mendε mé e’lém.

² Yesuε antimtén bó aá, “Nédē mewēmtεn médé nyé bán, ábē bad bé Galilia ábe bēnkūd échē eben, bétómé ábíníi bésyāāl ebébtéd abé áyāle bēnwēē ene ndín e kwééd-ε?

³ Aáy! A mbále, nzé nyéētεdte mímεn mbéb se nyétimεn Dyōb, né nyé moosyāāl nyéēwé, nyébóó-’ε.

⁴ Chán-náa ábíníi dyōm á mod ne waam ábe ntóṅ-ntóṅ ní ndáb ménkūmtēdtē ámín á dyad é Silom, bon bēwé? Nédē mewēmtεn médé nyé bán, bēntōmtεn ebébtéd abé tómaa bad bésyāāl ábe bēnlōṅ á Jerusalem-ε?

⁵ Aáy! A mbále, nzé nyéētεdte mímεn mbéb se nyétimεn Dyōb, né nyé moosyāāl nyéēwē, nyébóó-’ε.”

Ngan e bwel ábe béēchyāā

⁶ Héε Yesuε ákálé ngan aá, “Mod anwóṅ alín á bwel á nzag-tē. Ankē epum é bwel ahēd áwedé-mín ngen ne ngen, bon enkēnyínné ké ehóg.

⁷ Héε alāṅṅεé nnən-a-nzag aá, ‘Edé bəṅb mwě rílán áde rípagké á bwel-sé hén mwě téé, bon meenyínéé epum ké ehóg. Kwel bó. Chán é’hεle é’madé ahóṅ á ndəb-tē ngēn?’

⁸ Héε nnən-a-nzag átimtanné mó aá ‘A-sāṅ, tēdε bó ké mwě nhóg ámpē. Mēnabé bó ásē, nhíí-’ε bó nkúmbág.

⁹ Nzé é’chyáá e’pum mwě míme ríhúé’, né édé bwām. Nzé-’ε béēchyāā, né békwl bó.’ ”

*Yesuε adidé mmwaád nhóg
bwām á Mbwε-mé-nkóme-áte*

¹⁰ Mbwε-mé-nkóme-áte nhóg, Yesuε ayágté’áá bad á ndáb e mekáne póg.

¹¹ Mmwaád ambé áhed awē edəádəṅ é mbéb émbēē áte á etūn é dyōm á mwě ne waam. Embēl mbíd enwúmén mó nyaa echē éehélaá yāl asále áte bwām.

¹² Ade Yesuε ányíné mó, anchélé mó, aláá mó aá, “A-nyan, nkole míme ékonléé rímáá.”

¹³ Ade ábáné mó mekáá á nló, ane mmwaád ansálé yāl áte ábwəg-ábwəg, ábootéd-te Dyōb akεn.

¹⁴ Hée mod awě abédé nló á ndáb e mekáne, álíí áyāle adid áde Yesue ádíde ane mmwaád bwám á mbwε-mé-nkóme-áte. Alāngē bad aá, “E’pun é’de ntóob ábe mod átāngéné nsón abel. Nzé nyêdāá bwám adyεε nyépē ábē e’pun, saké á mbwε-mé-nkóme-áte.”

¹⁵ Hée Sāngwée ákwentanné aá, “Nyêdoge bad. Nyé ahée eéhunné nyag káa ésel á ebem-tē se ákēēn chó á edíb á mbwε-mé-nkóme-áte?”

¹⁶ Anén mmwaád adíi mwān awe Abrahamε. Satanε anhan mó ne nkole á etūn é dyôm á mwě ne waam. Nyé láa me ké mbéb móó rídé, áhúd mó á mehangé á mbwε-mé-nkóme-áte?”

¹⁷ Chōm éche ánhōbpē énwōgēd bad ábe bétāngánnáá mó e’són. Moosyāál anwóg menyinje áyāle mam mé ményáké míme Yesue ámbenlé.

Ngan ébe é nkamlen ní Dyōb:

Ngan e mbál míme ríchíné

(Mat 13.31-32; Mak 4.30-32)

¹⁸ Yesue anhób aá, “Chán nkamlen ní Dyōb ríkóó abé? Cheé ríhεle ríhāgtén mó-yēē?”

¹⁹ Ndíi nēngáne mbwé e mbál-e-bū echē mod átédé bon ásob á nzag-tē. Ade ékwógé, étim bwel bēn, menon méhyě mélōn á ngen-tē.”

Ngan e esulten

(Mat 13.33)

²⁰ Yesue ansédéd aáken, “Cheé ríhεle ríhāgtén nkamlen ní Dyōb-é?”

²¹ Ndíi nēngáne esulten éche mmwaád ámúúnédé asii á pān é mbumé ní ngun éláán kóōn ésule.”

Asól á ekob éche échíné áte

(Mat 7.13-14, 21-23)

²² Yesue andíi ambé á eke-tē éche ákágé’áá á Jerusalem. Dyad téé áde átómé’áá, ámbáá ne ásad, ayágté’áá bad.

²³ Mod nhóg ansédéd mó aáken, “A-Sāngú, mesonjé mé bad míme Dyōb désonjé alonjé, mébuú áte káa méebuú’é?” Yesue anláá bad áhed aá,

²⁴ “Nyéwanen káōn nyésól á ekob éche échíné áte, áyāle, á mbále, ekud á bad éwanén asól, bon béehenlé.

²⁵ Póndé epě echē nwóó-ndáb áhidée ásē, bon ápēn ekob. Ene póndé dōó nyébootédte atyéem á ebwóg, bon nyékumé’ ekob nyéhōbē bán, ‘A-Sān, dibnéd sé ekob.’ Mó-’ε átimtén nyé aá, ‘Meebíi’ é wée nyébídé.’

²⁶ Nyé-’ε nyéēhōb bán, ‘Syánē dendyé ndyééd, demmwé-’ε mīm hōm ahóg, eyágté’áá-’ε áwēd myad.’

²⁷ Átimtén nyé aá, ‘Syánē deewōnneé dyamdyam. Nyésyāē me á dīd-te. E’bébtéd é’ bad ngēn!’

²⁸ Ade nyényinnē Abrahamε, Aisige ne Jakōbe bóōbe bekal bé’dāádān bédé á nkamlen ní Dyōb-te, bon nyé pen nyéchág á ebwóg, achii dé awé ne adyé dé meson á nsāl, dōó détdē etál póndé eched.

²⁹ Bad bēbíd á akuu ne á mbān, á mekonekone ne á mehúléhúlé, bétéd medii á ngande e nkamlen ní Dyōb.

³⁰ A póndé eched, bad ábe bēnlyāg mbíd bóó bétim á’sō, bé’sō-’ε bélyāg mbíd.”

Yesue alebe áyāle bad bé Jerusalem

(Mat 23.37-39)

³¹ Melemlem mé póndé nguse é Befarisia êmpě wée Yesue, bélāngē mó bán, “Syāó hén, ékag hōm démpēe, áyāle kōn Herōde ahede we awúu.”

³² Yesue ankwentén bó aá, “Nyéke nyéláa échê esob bán, ‘Chii ne chän mēhūd bad e’dǎádǎn bé mbéb áte, ríchōōd-te bad, boŋ súú ébe mēmād nímēm nsón.’

³³ Boŋ ké chän ébēē, ntánǵéné abé á nzii chii, chän, ne sú ébe, áyāle éeboó’ é bán, nkal é’dǎádǎn áwê hōm démpēe ésebán á Jerusalem.

³⁴ Wóowó! A-bad bé Jerusalem, nyéwúe bekal-bé-e’dǎádǎn nyéwúēnnē-’ε bad meláá ábe Dyōb álómé! Nkénwǎn áte ngen ne ngen álad nyé áte nēŋgáne nyaá-kúb ákútanné bán, boŋ nyééhédéé etál!

³⁵ Nyénǎne’, Dyōb détedé echen ndáb. A mbále, nlānge nyé nén mēé, nyéenyínénné mē díd ámpē kǎn ne á pónde eche nyéēhōbpē bán, ‘Nnam ne ane awē apedé á dīn á Sǎŋgú.’ ”

14

Yesue achōŋté mod awē melóg mékóbé

¹ Mbwe nhóg Yesue ankē ndyééd adyé wēe ndale a Farisia póg. Nén démbē a mbwe-mé-nkóme-áte. Ade apedé áwed, bénóné’áá mó chodchod.

² Mod mó-’ε ambē áhed awē melóg mémbídtē á yǎl.

³ Héε Yesue ásedtéé bemeléede bé mbéndé ne Befarisia aáken, “Edé kunze ádid mod bwām á mbwe-mé-nkóme-áte, ngé éesaá?”

⁴ Boŋ bénkēnhóbpé dyaŋdyam. Dóo ákóbé ane mod awe melóg mébíde á yǎl á ekáá, ádidé mó bwām, asúúd-te mó á ndáb.

⁵ Ambíd e nē dóo ásedtéé bó aáken, “Nyé ahéé adé awē mwǎn káa nyag éhūnnē echóg, boŋ eékag chó abided ábwōg-ábwōg, ké émbē bán á mbwe-mé-nkóme-áte?”

⁶ Boŋ bénkēnwóŋgé dyaŋdyam áhób.

Aké dé e’ken ne akob dé nken

⁷ Ade Yesue anyíne bad ábe bēnlēbēē ádyé ndyééd bésyāāl ábe bēpédé bēbóótédé medii mémbáá apwed, ankalé bó enén ngan aá,

⁸ “Nzé mod alébpé we ngande, weépāg-se éhedé e’dii é’mbáá, áyāle éhele ébé né bélébpé mod ampée awē adelé áte tómaa we.

⁹ Nzé ene nyaa e mod epedé-’ε, mod awē alébpé nyé moosyāál ālāā we aá, ‘Béé anén mod atii.’ A pónde eched dóo étiméé atii asad atéd ne akwáké.

¹⁰ Boŋ nzé epedé ene ndín e hōm, etédéé e’dii ábe é’dé á ahǎŋgé, ábel nén nzé nwóo-ngande anyíne we, móō ālāā we aá, ‘Amúē, ké édyεε á atii ámbáá híní.’ A pónde eched dóo ékudéé edúbé átíntē e bad ábe nyáābōō nyétédé tébele.

¹¹ Né-óó, nyébíi bán, kénzée awē achǎgté yǎl, Dyōb désudéd mó. Kénzée-’ε awē asúdté yǎl Dyōb déchǎgēd mó.”

¹² Hé-’áá álāŋgéé mod awē anlébé mó nén aá, “Nzé ehóbé wēé, móchagé’ ngande, weehóbé wēé mólébpé áboŋ bēn, káa áboŋ baányan, káa echoŋ túmbé, káa bewóŋ bé ngáb ábe nyáābōō nyébyééné. Nzé ehíde nē, né bómpē bēlēbē we. Nē ábele átim ehéen ne metuuten.

¹³ Boŋ nzé echagé ngande, elébé dásō betóótōkē bé bad, ne bad ábe bēhúné eped, bóobe bad ábe bēkwédé ndím.

¹⁴ Nzé ebélé nē, né wēkūd nsimé áyāle béehenlé we asábe ámbíd. Dyōb désābē we áde bad bé bwām bēpuú’ε.”

Ngan e sǎŋkalaa a ngande

(Mat 22.1-10)

¹⁵ Ade mod nhóg awē bóobe Yesue bēntēd tébele áwógé nē, dóo álāŋgéé Yesue aá, “Nsimé ne bad ábe bēdyē ndyééd á ngande e nkamlēn ní Dyōb!”

¹⁶ Dóo Yesue álāŋgéé bó aá, “Mod nhóg anchǎg sǎŋkalaa a ngande, ábūd-te bad alébe.

17 Ade pónde e ngande épédé, anlóm awe mbøledε wée beken ábe ánlēbēē aá, ‘Nyéhyag, mboṣén rísyāāl níimáá abé.’

18 Boṅ bó moosyāál, bēmbbootéd mechánge abε nhógē-nhógē. Nhóg anhób aá, ‘Nchané etúú, ntángeéné chó akε dé anyín. Ncháa wε, méehenlé ahyε.’

19 Ampée anhób aá, ‘Bøøb nēn dēn, dōo ncháné nlád ní nyag nítaan éche élíε’ nzag. Chóo níkagké ahəgten nēn. Sōn, méehenlé ape!’

20 Ampée-’ε anhób aá, ‘Nkudé sómbé ekóólé-ekóólé. Né-ōó, méehenlé ape!’

21 Ane mbøledε antīm ámbíd, áke aláá eche sán mam mésyāāl. Dōo ekan ékóbé eche sán áte, boṅ álōmē ane mbøledε. Anhób aá, ‘Kǎg mehélé, ékag á ntém ní nzii, kóəne á mēte mé nzii mé dyad-tē, éhúen betóótōkē bé bad, ne ábe bēhúné epεd, ne ábe békwdé ndím, ne ábe bēhelé akε.’

22 Eebeméé áte ane mbøledε anhúú ámbíd, aláá sáá-a-ndáb aá, ‘A-sán, mbélé ngáne wénhōbpē, boṅ ké nē, etál élyágé édé.’

23 Dōo Sáá-a-ndáb áhóbéé aá, ‘Kǎg á nzii émbáá ne nzii é mehín, échéle kénzée wée áhyag ábel boṅ ndáb élōn.

24 A mbále, mod ké nhóg awē ménsēbēē alébe, éewógké chōm ké ehóg á nsəl á ngande-tē hén!’ ”

Abé mbapεε

(Mat 10.37-38)

25 Mbwε nhóg ndun e mod éhídé’áá Yesuε ámbíd. Héε ábóótédé bó aláa nēn aá,

26 “Nzé mod ahóbé aá, mōhíde mε, ésebán achədténé nyaá, sáá, mwaád, bān, baányan, kóəne ádē alonjé dēn, ene ndín e mod eékwognedεé ábε awēm mbapεε.

27 Kénzée awē eepéme ádē awōg, boṅ áhídnē mε, eékwognedεé ábē awēm mbapεε.

28 “Nzé-módé ábē awē áwōn mewēmten álōn sánkalaa a ndáb, boṅ eesébpé adyεε ásē, áhəgten nkun níme ene ndáb étēdté mó, ábíi ké móšhēl chó amad, káa móchēnlé?

29 Nzé amaá-’ε ndáb asume, boṅ eéhele chó amad, moosyāál awē anyíne abelé ábootéd mó awel, bēhōbē

30 bán, ‘Mod nhóg ansáá ndáb, boṅ eéheléé chó amad.’

31 “Nzé kəṅ póg ewémtné waáb kəṅ bel akum, abélé asébé yəl ahəg á ekáá ké mesonjé mé sánze níme áwóó dyam dyōm dé ekálé, bēhēl ábe waáb awē awóó sánze dyam móom mé ekálé mébe.

32 Nzé anyíne aá móōkwognedεé, abelé alóm belyágged bé dyad á’sō wée waáb, waáb adépe mó benben, ábel nēn békōm nsan.

33 Melemlem nē dōo édíi né ké nzée awē eehúde chōm ásyāāl nlém. Ene ndín e mod eékwognedεé awēm mbapεε ábε.

Nkwε níme mbódé e’nyin

(Mat 5.13; Mak 9.50)

34 “Nyébíi bán nkwxé níde chōm é bwām. Boṅ nzé mbódé alan, chán bēhele-sε bényīnēd mó ámpē?

35 Méesaá dyam dé abelen ámpē. Apim dōo bépiméé mó. Bad ábe bēwóó metúu, bésōnten bwām.”

15

Ngan e ndyən ní mbód níme mémboō

(Mat 18.12-14)

1 Mbwε nhóg belad bé tááε ne bebel bé mbéb bēmpēε, bēmpē wée Yesuε.

² Dóo Befarisia ne bemeléede bé mbéndé bényongεé áte bán, “Nédē anén mod awonεe bebel bé mbéb, bóbōo bédyag-ke ndyééd hōm ahóg.”

³ Hée Yesue ákánlé bó ngan nén aá,

⁴ “Nzé-módé adé awē āwōη mbwókεl é rídyōη mí mbód, boη nhóg níbōo, boη eétedté níminíi móom mé rídyōη mí mbód abog ne abog á etún-tē, áke dé ahed nímmē nhóg níme níbōo káōη né adībté mós?”

⁵ Adibed áde adibte-’áa mós, áhāg mós á abol ne menyīnge mésyāāl.

⁶ Boη née ápédé á dyad-tē álad besón bé echon ne baányan áte, aláá bó aá, ‘Syánē déwōg menyīnge áyāle ndībté nímmē rídyōη mí mbód níme mémbōo?’

” ⁷ Yesue ambád ámpē aá, “melemlem-’aá rílāηgεé nyé meé, menyīnge métōm abé nē ádyōb ámīn e mbelé-mbéb nhóg awē atédé abel dé mbéb boη atīmne Dyōb tómaa ámīn e móom mé bad abog ne abog ábe bésáá, ábe béehednád ahēηlen.

Ngan e kábpe echē embóo

⁸ “Káa, mmwáád ahée adé awē āwōη kábpe dyōm, boη née póg ébōo, échōdē’ ekag, boη áhedé ndáb áte, atōη ahed káōη né adībté chós?”

⁹ Adibed áde adibte-’áa chós, alade baáb ne baányan áte, aláá bó aá, ‘Nyéwōgen me menyīnge áyāle ndībté ene kábpe echē embóo me.’

¹⁰ Melemlem-’aá rílāηgεé nyé nén meé, menyīnge métōm abé nē ádyōb ámīn e mbelé-mbéb nhóg awē atédé abel dé mbéb boη átīmēn Dyōb.”

Ngan e mwān awē ambóo

¹¹ Yesue ambád ahób aá, “Mod nhóg ambé, anchyáá bán bé baachóm bébe.

¹² Dóo epun ehóg, mwān asad álāηgē sáá nén aá, ‘A-sāη, beé me ádēm akab á mbwóg áde rítāηgéné akud.’ Hée sáá átédé chōm ésyāāl éche ánwōηgē, boη ákabpé bó áte.

¹³ Nguse é e’pun étómé-’aá, boη mwān asad áladé nímmē nted rísyāāl, ákāg á alonη démpēe áde áchábndéde. Awed-taá ápédé boη ábootéd alonηgē á mbaambaa achog, ábēbtē ngáb esyāāl echē ánwōηgē.

¹⁴ Ade chōm ésyāāl émáá mós áyāl né bōob, sāηkalaa a nzaa anhún á alonη-tē wē. Atóg dós-’ε ábóótédé mós asól áyāl ngīne-ngīne.

¹⁵ Hée ákíi kunze e mod póg atán á dyad-tē wē, áchóm mwā nsón. Ane mod mós-’ε alóm mós aá, áke adídtd mós esog é ngu.

¹⁶ Anwōη á mewēmtēn aá, mósōlōntē abum ké ne medyé mé ngu, boη modmod enkēmbaá mós chōmchōm éche áhēlese adyé.

¹⁷ Dóo ádyéé chósōη, boη ákwānlád, áhōbē aá, ‘Nōné’ ngāne bembālede bélóné echem sāη á ndáb-te, boη ké nē bédyāg medyé méchōbe ásē, boη me-’ε ríwāg nzaa hén!

¹⁸ Mēsyaó, ríke ntán echem sāη, nláá mós meé, A-sāη, mbelé mbéb á’sō é’ Dyōb ne á’sō é’bōη.

¹⁹ Mmēn meékwōgnedεé áchāgned née awonη mwān ámpē. Téd me ké nēηgāne awōη mbālede nhóg.’

²⁰ “Hē dóo ápádté ásē, boη ásūē’ á dyad wēe sáá. Boη áde ákwógé ape á ndáb nē, sáá annyīn mós mwā etún. Ankóbtēn sáá ngol. Sáá annyāgéd, alúm mwān ámīn, ahé mós tál.

²¹ Dóo mwān álāηgē mós nén aá, ‘A-sāη, mbelé mbéb á’sō é’ Dyōb ne á’sō é’bōη. Meékwōgnedεé áchāgned née mwān awōη ámpē.’

²² Hée sáá mós-’ε áchénlé ábē bembālede, álāηgē bó nén aá, ‘Nyéhyiinad me nsob níme rítómténé adēη nē, á mehélé-te. Nyéwáad mós mós á yāl. Nyéhē-’ε mós ebōη á ekáá, nyéhē-’ε mós metámbe a ékuu.

²³ Nyétéd nchóm-é-nyag awě dékálté nê, nyékwel mó, ábel nén, syánē moosyáál dédyê débél-le apaté.

²⁴ Nyébíí bán, awem mwän nén ammad awé, bon atimé ámbíd á alongé. Ambóó, bon abidé áwed.’ Hé-’aá bébóótédé ngande achog.

²⁵ “Mmén mésyāāl mēmbenléd áde mwānyan ambáá adíí á nzag-tê. Ade áhúú, dóó áwógéé bad békóne, béságe-’ε bwēm á ndáb-te.

²⁶ Dóó áchénlé mbaledε nhóg, bon ásedté mó dyam áde ábenlaad.

²⁷ Dóó mbaledε ne álúmtéé mó áte nén aá, ‘Pón mwānyon ahúú ámbíd-óó. Sóó akwēnlé mó nchóm-é-nyag ne, áyāle anyínen áde anyínné mó díd ámpē, ésebán dyamdyam ábélé mó.’

²⁸⁻²⁹ “Awóg áde áwógé nê, anlīn, eékwentene asól á ndáb-te. Héε sáá abidé á ebwóg, bon áhyε achán mó. Dóó mó-’ε átimtanné sáá nén aá, ‘Nóné’, meé nkéndyεén wε hén mwě ne mwě áde mbenléε wε ntū mé nsón, ésebán nwúene wε nló áte. Bon ké echεd é mbód weébāgēε me wεé, mbél apaté ne ábēm bēd.

³⁰ Bon ngáne awon mwän a nlém ápédé ámbíd, mó awé amaá echon ngáb esyāál abébed ne bekwalεε, ewúúdé mó nyag eché etómténé akəl.’

³¹ Héε sáá álāngéé mó nén, ‘A-mwän, wε-εé edé ne me hén póndé ésyāāl. Kéchéé éche níwóó-’ε édíi échōn.

³² Embē bwām syánē áchog ngande, áwóg menyīnge. Nén, mwānyon ammad awé, bon atimé ámbíd á alongé. Ambóó, bon abidé áwed.’ ”

16

Ngan e mbaledε awě abédé mwane

¹ Yesuε anláá ábē bembapεε ámpē aá, “Nhōn ní mod nhóg mémbe. Bad bēnhyε mó aláa bán awě mbaledε ambáá abéhte mó ngáb.

² Héε nímē nhōn ní mod nílóomé mbaledε awed achəg, bon ásedté mó aá, ‘Ebál é póle éhéé níwógéé áyāl echōn nén? Lúmed me áte ngáne mesongé mé bwēm níme mēmbanée áse echōn médíi, áyāle éché etál é nsón émááné wε áte.’

³ Dóó mbaledε ádólé áte chóon bon áhōbē aá, ‘Chán-nō mébenlé bōob áde echem sāj áhedéε me ahúd á nsón? Ngíne eesaá me eché níkwenléε nzag. Nzé ntimé-’ε á nchómbé, né nê dépiinéd me akwágké á ngíne.

⁴ Ahá, nkudé debyéé áde méhəgké, ábel bon ké á nsón dóó bēnhūdtē me, bad bélyəg békōb me nken áwab mendáb.’

⁵ “Héε áchénlé mod téé awě anwálé sáá alúm, áchəgé bó nhógē-nhógē. Ade mod e’só ápédé, ansédéd mó aáken, ‘Mesongé métən echem sāj ékáléε wε?’

⁶ Ane mod aá, ‘Mbwókεl é e’kwém é’ mōl waam.’ Ane mbaledε anláá mó aá, ‘Nóné’, echon kálag e melúm chó nén. Dyéé áse, étel á mehélé-te wεé, mbwókεl é e’kwém é’niin.’

⁷ Ansédéd mod awě alónténé bébe aá, ‘Alúm áde wε mesongé métən?’ Ane anhób aá, ‘Mbwókεl é nkute ní ngun éláán.’ Ane mbaledε anláá mó aá, ‘Kōb echon kálag, étel wεé, mbwókεl é nkute ébe.’

⁸ Ade nímē nhōn ní mod níwógé nê, ménkēméd éché ekúkú é mbaledε aá, ‘Abēnlédé debyéé á bwām.’ ” Yesuε ambád áte nén aá, “Nê dóó bad ábe behíde mekan mé nkōjsé bédíi. Bédé mehél áhəgen échāb nyaa é bad debyéé, tómaa bad ábe behíde e’nyínen bé ekíde é’ Dyōb.”

⁹ Yesuε ambád aá, “Nláa-’ε nyé meé, nyébenled nhōn mé nkōjsé, ákōb e’chon, áyāle á póndé eche mémaa’ε áte, békob nyé nken wεε bad bédyεε’ε á ngíndé ne á ngíndé.

¹⁰ Ké nzé-módé awě awánlé mpín mé akan bwām, né áwālē ámbáá bwām. Kénzée-’ε awě eéhele mpín mé akan awále, né éehenlé ké ámbáá awále.

11 Nzé édé-'ε bán, weewánlɛé ngáb e nkõhsé ngáne étɛ̀ngéné awále, nzé-módé ǎbɛ̀ wɛ nhɔ̀n mí mbále.

12 Née wéewánlɛé nhɔ̀n míme méesɛ̀ mímõ̀n bwám, nzé-módé ǎbǎg wɛ nhɔ̀n mímõ̀n mwɛ̀n?

13 “Modmod eéhɛ̀lɛ̀-ɛ abé mbàledɛ a bewõ̀n bébe. Alũmɛ̀d nhóg edɛ̀nge tómaa aníní, ké'ε átĩmɛ̀n nhóg, abáɛ̀nge aníní áyǎl. Weéhɛ̀lɛ̀-ɛ ebé mbàledɛ a bad bébe abé ahóg. Weéhɛ̀lɛ̀-ɛ ebé mbàledɛ a Dyõ̀b se ebé-'ε mbàledɛ a mɔ̀né.”

Nguse é ngan éche Yesue

(Mat 11.12-13, 5.31-32; Mak 10.11-12)

14 Befarisia bénwõ̀g mímén mésyǎ̀l, bon̄ ngáne bémbɛ̀ɛ̀ bedɔ̀n bé ngáb, bénswèdɛ̀ mɔ̀ swédɛ̀tɛ̀n.

15 Yesue anláá bó aá, “Nyédii bad ábe bélũmte bán bésáá á'sõ é' bad, bon̄ Dyõ̀b ábíi nyé nlém áte. Kéchéé éche baányon̄ békẽ̀mteé, édíi abúú ngên á'sõ é' Dyõ̀b.”

16 Yesue ambád bó aláa aá, “Mam míme mɛ̀ntenléd á kálag é mbéndé é Dyõ̀b, bekal bé'dáádɔ̀n bómpɛ̀ bénhõ̀b mɔ̀ káõ̀ne á pónde eche Jõ̀ne. Taase nê, nkalan̄ mí bwám mé nkamlɛ̀n ní Dyõ̀b níkanlad, mod téé-'ε abune míme nkamlɛ̀n abé áte.

17 “Ké nɛ̀ngáne nkon̄ rísé ne mí mín béhele bémaa, atɔ̀te ké ahóg á mbéndé e Dyõ̀b déekwaá.

18 “Kéznéé awɛ̀ anané mwaád, bon̄ awõ̀n mmwaád ampée, né akábé asón. Ké nzé-móde-'ε awɛ̀ awóó mmwaád awɛ̀ bénané á ndáb e'wõ̀ngé, né akábé asón.

Ngan e nhɔ̀n mí mod ne Lazarõ̀se

19 “Nhɔ̀n mí mod nhóg mémbɛ̀, kase é mebad chõ̀ áwáá'áá á yǎl. Mwɛ̀nze ne mwɛ̀nze mõ̀ ádyágáá mbwe téé.

20 Ntógétõ̀ke mí mod nhóg mɔ̀-'ε rínánge'áá áwɛ̀ mmwe mé e'ké bán Lazarõ̀se. E'kwɛ̀se bénlõ̀n mɔ̀ á yǎl.

21 Mewẽ̀mtɛ̀n mémbɛ̀ mɔ̀ aá, bébe mɔ̀ púuted é medyé éche éhúné'áá á tébele a nhɔ̀n mí mod. Mbwe chõ̀ épágé'áá áhed, bon̄ ényã̀ngɛ̀ mɔ̀ e'kwɛ̀se áte.

22 “Ade ntógétõ̀ke mí mod mé níwédé, ángel éntɛ̀d mɔ̀, ékɛ̀ɛ̀n mɔ̀ á akéb áde Abrahamɛ̀. Mmê nhɔ̀n mí mod mɔ̀mpɛ̀ ménwɛ̀, béliɛ̀me-'ε mɔ̀.

23 A mbwóg e kwééd wê, nhɔ̀n mí mod mbédé á metuné-te. Héɛ ányéné nló ámĩn bon̄ anyĩn Abrahamɛ̀ se wĩnĩ, ne Lazarõ̀se áwe akéb.

24 Dõ̀ álébpeé nɛ̀n aá, ‘A-Tê Abraham, sõn, wóg me ngõl, élõ̀m Lazarõ̀se átɔ̀de dúu dé e'mii á mendíb-te, áhyɛ áhóded me echém, áyǎle meewógéé bu á dũ-á-muú hén.’

25 Abrahamɛ̀ anláá mɔ̀ aá, ‘A-mwǎn, ewẽ̀mtan á pónde eche wémbɛ̀ɛ̀ á nkõ̀hsé ngáne wɛ̀nkudtɛ̀ bwẽ̀m é' bwám, bon̄ Lazarõ̀se mɔ̀-'ε ákũd bwẽ̀m bé mbébe-ε? Bõ̀b-põ̀ awóge míme menyĩnge hén, wémpɛ̀ edé á metuné-te.

26 Née éhúdé nê áte, wéɛ sɛ̀díi ne wéɛ édíi, sã̀nkala a mbõ̀n akabé syánɛ̀ áte, ábel nɛ̀n mod eéhɛ̀lɛ̀ asyã̀ wɛ̀n se ápe wê. Modmod eéhɛ̀lɛ̀-'aá ásyã̀ wê, se ápe áwɛ̀d.’

27 Nhɔ̀n mí mod ménhõ̀b aá, ‘Ncháa-õ̀, a-Tê mɛ̀é, élõ̀m Lazarõ̀se á ndáb eché echem sã̀n.

28 Nlyógé bã̀nɛ̀d bɛ̀táan. Akɛ̀ áléb bó ábel nɛ̀n, bómpɛ̀ béepǎg á hõ̀m dé metuné hén.’

29 Abrahamɛ̀ anhõ̀b aá, ‘Béwóó metelag míme Mosɛ̀ ne míme bekal bé'dáádɔ̀n. Béwógen chõ̀m-éé bɛ̀télé áse.’

30 Nhɔ̀n mí mod ménhõ̀b aá, ‘Aáy, a-Tê Abraham. Nzé mod akií bó atán awɛ̀ abídé á mbwóg é kwééd, né bɛ̀tɛ̀dé ábel dé mbébe bɛ̀tĩmɛ̀n Dyõ̀b.’

³¹ Hée Abrahamε áhóbεé aá, ‘Nzé béekwεntene Mosεε ne bekal bé’dáádəŋ awógεn, né béewógénné ké mod awě apuúdé á mbwóg e kwééd boŋ aláá bó.’”

17

Abeled mod mbéb

(Mat 18.6-7, 21-22; Mak 9.42)

¹ Yesue anláá ábē bembapεε aá, “Nyébii bán mekágsen míme mébelte bad mbéb métəŋgéné nyé apii. Boŋ édé ngəl ne kənzéé awě ápεén mó!

² Embē mboŋ né bēntəá ene ndín e mod sánkalaa a aláá á nkəŋ, bébwém mó á edíb-te, tómaa mó ábeled ábén bēndem mbéb.

³ Nyétédεn yəl pón dé.

“Nzé mwənyoŋ abelé wε dyam dé mbéb, échu mó aláa wεé nê dééboo’é. Nzé achemé-’ε ádē awusé boŋ ahəŋléné, élagsén mó.

⁴ Nzé apənné wε ngen saámbe áyāle epun é bín, boŋ apedé-’ε áwōŋ ngen saámbe áchóm alagsen aá, ‘Nhəŋléné’, etəŋgéné mó alagsen.”

Adúbe déechínéé

⁵ Bembapεε bé nlómag bēnlāá Səŋgwéé bán, “Wéd sé adúbe áte.”

⁶ Səŋgwéé anhób aá, “Nzé nyēnwōŋ adúbe áde ádé mwəmpín nēŋgáne mbál-e-bū, né nyéékamlén ádén alín dé e’sáá bán, ‘A-bwεl, wubé ásē, éke ésumen á edíb é nkwě-te’, é’wógén-ne nyé.

Abel dé nsón

⁷ “Détéd bán, nyé mod nhóg nyēwóó mbəledε awě akii nzag alii, káa akii ánon rídyoŋ mí mbód. Nzé ahúú á nsón, chán wélāā’é mó? Wélāā mó wεé, ‘Hyé édyεε ásē hén, édyē ndyééd,’

⁸ káa wεé, ‘Bélé me ndyééd étómte dε, étyéem-me á nkəg, káəŋ mímad adyé, boŋ ámbíd é pón dé, wε-’ε édyāg?’

⁹ Nyéláa mε ké wēsāgnēn ane mbəledε áyāle ábélé míme nsón?

¹⁰ Né-óó nyémpē, nzé nyēmaá chóm ésyāāl éche bétíínédé nyé abel, nyéhōb bán, ‘Sédii bembəledε ngəŋ, mímed nsón-naá sébélé sé ngáne.’”

Yesue asəŋtε bad bé meləŋ dyôm

¹¹ Ade Yesue ákagké á Jerusalem, atómé’áá á nchii rí nzii mé aloŋ á Samaria ne aloŋ á Galilia.

¹² Asól áde ásólé mwə dyad nhóg, antán bad dyôm ábe meləŋ mékóbé. Bentyēem nchabnede,

¹³ bélébpē mó ne esaád bán, “A-Yesu, a-Səŋ, sōn, wóg sé ngəl!”

¹⁴ Ade ányíné bó, anláá bó aá, “Nyékag wεé beprise, nyélúmed bó yəl.” Ade békagké nē, yəl é nsəŋ bó.*

¹⁵ Bó mod nhóg, annyín nén aá módyéé bwām. Hée átíme ámbíd, ákené Dyōb ne ehób éche échágké.

¹⁶ Ankwε Yesue á mekuu, ásāgnān mó. Anén mod abédéε mod a Samaria.

¹⁷ Yesue ansédéd mó aáken, “Eesaá mbále bán nsəŋtε nyé bad dyôm-ε? Héé ábíní abog bédíí?

¹⁸ Nédē mod ké nhóg ampée eétimeé ámbíd áhyε dé abε Dyōb mekenag, éetóméé anén mod a nken-ε?”†

¹⁹ Hée áləŋgεé mó aá, “Tyéem ámín, ékag. Adōŋ adúbe ádíde wε bwām.”

* **17:14 Asaad a yəl:** Nzé meləŋ ménkōb mod bétédé’áá mó née mod awě eesáa. Bébéné’áá mó bán, eesíté wεé bad bédíí. Prise chōó énwōŋ kunze ásimen mod meləŋ boŋ ébided mbakú nén bán asáá, boŋ ábootéd apε wεé bad bédíí. † **17:18** Bad bé Israel béntéd bad bé Samaria née benzínéé. Bóbóo béekagé’áá ké mwəmpín áyāle nyaa e mekan mé mbwóg ne mekan mé aloŋ. Ké nyaa e abele á Dyōb ne hōm dé mekáne bēmbē bó nhəŋlén.

*Epe é nkamlen ní Dyõb
(Mat 24.23-28, 37-41)*

²⁰ Befarisia bẽ̀sẽ̀déd Yesuẽ bánken, “Póndé ehéé nkamlen ní Dyõb mépẽé?” Yesuẽ anláá bó aá, “Nkamlen ní Dyõb méesaá dyaam áde mod ányĩnnẽé díd,

²¹ káa dyaam áde mod áhõbpẽ aá, ‘Nõné,’ mômén,’ káa ‘mômíníí.’ Aáy, nkamlen ní Dyõb ní máá abé átínté echên.”

²² Hẽé álã̀ngẽé bembapẽẽ nèn aá, “E’pun é’ bìn é’ hũe á’sõ ábe nyédã̀ngé bán né nyenyín ké mbwẽ nhóg níme Mwã̀n-a-Moonyõn alũmẽdtẽ nyé yã̀l, boŋ nyéenyinné.

²³ Bělã̀ nyé á póndé echẽd bán, ‘Mõnén,’ káa ‘Mõníníí,’ boŋ nyéehã̀ntán bó.

²⁴ Ayã̀le, ngáne emwẽdmwẽd étómẽé, boŋ épenté ngob e Dyõb pẽd póg ne eníníí, nê dõo epun éche Mwã̀n-a-Moonyõn ápẽé ébẽẽ.

²⁵ Boŋ éđẽbé nê, atã̀ngéné metuné híin akud. Kã̀ne enén nyõngel e bad eéban mó ayã̀l.

²⁶ Ngáne émbẽẽ á póndé eche Noa, nê dõo ébẽẽ á póndé echẽ Mwã̀n-a-Moonyõn.

²⁷ Bad bedyágé’áá medyé, bẽmwã̀g mĩm, baachóm bẽwóó’áá bebaád, bebaád-te békã̀g á mewõngé kã̀õn ne mbwẽ níme Noa ásólé á bõle é’mbáá-te boŋ mbúú echó, mesén melõne, méhõõd ábẽ bad bẽsyã̀l.

²⁸ Melemlem nê dõo émbẽẽ á póndé eche Lõte. Bad bedyágé’áá medyé, bẽmwã̀g mĩm, békã̀bẽ dyõn, bẽwẽnẽ bwẽm, bẽlõõ-’ẽ mendáb.

²⁹ Boŋ mbwẽ níme Lõte ásyã̀ngé á dyad á Sodom, níme mbwẽ dèn muú ne meláá níme méhyã̀ntan, mémbĩd ádyõb nẽe mbúú, níwúú ábẽ bad bẽsyã̀l.

³⁰ Melemlem nê dõo ébẽẽ níme mbwẽ níme Mwã̀n-a-Moonyõn ányĩnnẽdtẽ.

³¹ “Echẽ epun, mod awẽ adé á nnon ní ndáb mĩn áde nhõn nídíí mó á ndãb-te, eétoḡné asud áse áhye dé atéd mó. Melemlem-’áá mod awẽ adé á nzag-tẽ, eétoḡné atim ámbĩd á ndáb.

³² Nyéwẽmtẽn dyaam áde dẽmbenléd ne Lõte mwaád.

³³ Kẽnzéé awẽ awóó mewẽmtẽn áson ádẽ alõngé, ábõd dõ. Kẽnzéé-’ẽ awẽ abóde ádẽ alõngé, né asó dõ.

³⁴ A mbáale, bad bẽbe bẽnaá anõn ahóg nkuu, bétéd nhóg, bẽtẽdẽ aníníí.

³⁵ Bebaád bẽbe bẽkõgẽ medyé, bétéd nhóg, bẽtẽdẽ aníníí.”‡

³⁷ Dõo bembapẽẽ bẽsẽdtẽé mó bán “A-Sã̀n, hẽé nê dẽbenlédte?” Yesuẽ antimtén bó aá, “Wẽe ndim níbã̀gkẽ, áhed dõo benhõḡnẽ bẽladnẽé.”

18

Ngan e ngwẽe e mod bó nkúd é mmwaád

¹ Yesuẽ ankalé ábẽ bembapẽẽ ngan álũmed bó áte nèn aá, bẽtã̀ngéné békã̀nnẽ póndé tẽé ésebã̀n bẽhũnte nlém á abum.

² Anhób aá, “Mod abéde dyad ahóg, awẽ akáadte’ bad. Ane mod eebáa’áa Dyõb, eébage’áa-’ẽ modmod edúbé.

³ Nkúd é mmwaád-te abéde melemlem mé dyad, eémaa’áa’ wẽe ane mod. Póndé tẽé álã̀ngẽ mó aá, ‘Sé mod sẽwõnẽ mehób. Káád sé ẽsuud me nzõm.’

⁴ A mbooted ane mod enkẽnháá mó dúu. Boŋ ámbĩd é póndé anláá yã̀l aá, ‘Ké nẽngáne méebagẽé Dyõb edúbé, méẽbã̀-’áa modmod,

⁵ ngáne édíí bán anén nkúd a mmwaád ahéde me nló, mẽkã̀ níme nkáá ábel nĩsud mó nzõm. Esebẽ nê, né kã̀õn ne á asóg ẽemwaá aá níkũn ne epe éche ápagkẽ nèn póndé ẽsyã̀l.’ ”

‡ 17:35 Donḡe á kã̀lag dé’só ábãde nchoo 36: Bad bẽbe bẽbe á nzag-tẽ. Bétéd nhóg, bẽtẽdẽ aníníí.

⁶ Hée Sánḡwéé áhóbéé aá, “Nyêwógé chöm-ée ekúkú é mod awě akáadte’ bad awě eebíi Dyöb éhóbé-yé?”

⁷ Nédē Dyöb déekunné ábē bad ábe ápwédé-yé? Béchyene’ mó nwōngēn nkūu ne mūte, nédē äkōlēn bó metúu pōndé té-yé?”

⁸ Nlāa nyé mēé äkun bó mehélé mehélé. Boḡ nyēdúbpé bán Mwān-a-Moonyoḡ ätān adúbe á nkōḡsē-te á pōndé echē ápēé-yé?”

Ngan e bad bébe ábe bēnkē akāne

⁹ Yesue ankāl ngan empée tñḡene bad ábe bényíné’áá yāl nēe bad ábe bésáá, bényīnē-’ε bad bēmpēe nkōḡtéd.

¹⁰ Anlāá bó aá, “Bad bébe bēnkē á Ndáb-e-Dyöb ákāne. Nhóg abédé Farisia, aníní-’ε abé nlad-é-tááε.

¹¹ “Ane Farisia antyéém á ámīn, ákāne’, áhōbē á nlém-tē* aá ‘A-Dyöb, nságnéné wε. Ayāle nēn, meésaa nēḡgāne bad bēmpēe, ábe bédume bwēm é’ bad, ábe bēbébé nlém ábum, ábe békābe mesón á ndáb e e’wōḡgé. Nságnéné wε áyāle meésaa nēḡgāne anén nlad-é-tááε hén.

¹² Ndé nēn, ndide’ yāl nzaa á mekáne-tē ngen ébe sōndé téé. Chöm téé éche nkudεé-’ε nkabe chó áte moḡge dyōm, mībagé wε akab nhóg.’

¹³ “Nlad-é-tááε pēn antyéém nchabnede, eéhele ké mīd anyen ádyöb. Ambán ekáá á nlém, ákāne aá, ‘A Dyöb, wóg me ngōl. Ndíi mbélé-mbéb.’”

¹⁴ Hée Yesue ábádé aá, “Nlāa nyé nēn mēé, anén mod awě ndímténé nyé alāa, ansú áwe ndáb nēe mod awě asáá á’sō é’ Dyöb. Ayāle mod ké ahéé awě achóḡté yāl, bésudéd mó. Boḡ ane awě asūdté eche yāl, bēchāḡēd mó.”

Yesue ne bānbān

(Mat 19.13-15; Mak 10.13-16)

¹⁵ Bōōb-pōō bad bēpééné’áá bēndem wée Yesue nēn bán ábān bó ekáá á yāl ānamed bó. Ade bembapεε bényíné nē, bēnkānē ábē bad áte.

¹⁶ Boḡ Yesue anchélé ábē bān, áhōbē aá “Nyétεde bānbān béhyag áwēm. Nyéekáá bó áyāle nēn, nyaa e bad nēe bó chōō éwōó nkamlēn ní Dyöb.

¹⁷ Ne mbále, nlāḡge nyé nēn mēé, kēnzéé awě eékobe nkamlēn ní Dyöb nēḡgāne mwēndem, éesónlé áwēd-te.”

Mod a nkamlēn

(Mat 19.16-30; Mak 10.17-31)

¹⁸ Nkamlēnε nhóg ansédéd Yesue aá, “A-meléed a bwām, cheé mébenlé ábel nēn nkud alongé áde déemaá?”

¹⁹ Dōō Yesue ásedtεé mó aáken, “Cheé ékáá boḡ échḡgé mε meléede a bwām? Mod ké nhóg eésaa mod a bwām étóméé Dyöb dēmpēn.

²⁰ Ebíi mbéndé éche éhóbe bán, weekábé asón á ndáb e e’wōḡgé, weewúé mod, weechíbé’, weebídé mbōḡ e metóm, bεé sóó ne nyoḡ edúbé.”

²¹ Ane mod a nkamlēn antímtén aá, “A meléed, nhídé échén mbéndé ésyāāl bootya se á mwēndemé.”

²² Yesue awógé-’áá nē, boḡ álāḡgē mó aá, “Dyam ahóg éhedne wε. Sóm bwēm é’syāāl ábe éwōó, étéd nímē mōné, ékabe betóótōkē bé bad. Nzé ebélé nē, wēkūd nhōn ádyöb. Ene pōndé éhye éhíde mε.”

²³ Awóg áde ane mod a nkamlēn áwógé nē, anwóg ndutul bwāmbwam, áyāle ambé nhōn bwāmbwam.

²⁴ Yesue anyíné-’áá ngāne ásúdné boḡ áhōbē aá, “Elēl áte bwāmbwam behōn bé bad ásol á nkamlēn ní Dyöb.

* **18:11** *Antyéém amīn, ákānē, áhōbē á nlém-tē:* doḡge á kálag áwōó *atyéém á nkḡg, ákānād yāl.*

25 Edé mwän e akan sänkalaa a nyam née kamêl âponj á epän é ndonde, tómaa nhon mí mod ásól á nkamlen ní Dyöb.

26 Bad ábe bënwög chöm echë Yesue ánhöbpē, bēnhöb bán nze née édíí, né nzéé-’ō ahēle ákud e’soósonj?”

27 Dóo Yesue áhóbēé aá, “Dyam áde baányonj bényínēé bán álélé áte, déelenledéé Dyöb áte.”

28 Héé Petro áhóbēé aá, “Nōné’, sētēdté ábed bwēm é’syāā́l áhíd wē.”

29 Dóo Yesue álāngēé bó aá, “A mbále, nlānge nyé mēé, kēnzéé awé atēdté eche ndáb káa mwaád, káa baányan, káa sáá ne nyanj káa bán, áyāle nkamlen ní Dyöb,

30 ákūd nsyōj ámbíd mbád ne mbád enén pōndé. Akud-te alongé áde déemaá’ á pōndé échē ehúé’.”

*Yesue akänlé eche
kwééd ne mpuu
ngan ámpē*

(Mat 20.17-19; Mak 10.32-34)

31 Héé Yesue átímné ábē bembapēē dyōm ne bébe kun bonj, álāngē bó aá, “Pón nyébíí bán dekağ á Jerusalem. Mam mésyāā́l-le níme bekal bé’dāóðāñ bétélé áse tāngene Mwän-a-Moonyonj mébenléd áned.

32 Eténlédé nēn bán bébē mó á mekáá mé bad ábe béesē bad bé Israel. Bó-’ē béwelé mó, bésyāā́ mó, bésobé-’ē mó meléed á yāl. Bébm̄téd mó, béwúú-’ē mó.

33 Bonj ámbíd e e’pun é’láán āpuú.”

34 Bonj bembapēē bó-’ē bēnkēnsōñtēnné dyamdyam áyāle nímén mam mésyāā́l. Enén ngan entóm bó debyéé áte. Bēnkēnchemmé chöm éche Yesue áhóbē’áá.

Yesue achōñte mod a ndim

(Mat 20.20-34; Mak 10.46-52)

35 Bōb-pōó áde Yesue ákwógé apē á dyad á Jeriko, mod a ndím nhóg andyēé á nkag ní nzii, áchōmē bwēm.

36 Awógé-’áá ndun e mod etóme, bonj ásedté bad dyam áde ádé.

37 Dóo bēlāngē mó bán, “Yesue, mod a Nazaret mó atóme nē.”

38 Héé ábóné aá, “A-Yesu, Mwän a mbyaa níme Dabide, wóg me ngól!”

39 Bad ábe bēmbē á’sō bēnkānē mó áte, bēlāā́ mó bán ádib nsäl. Bonj mó-’ē ambé ábōnē aá, “A-Mwän a Dabid, wóg me ngól!”

40 Dóo Yesue átyéémé, bonj áhōbē aá béhyēene ane mod. Ane mod apedé-’áá mó benben, Yesue ásedté mó aá,

41 “Cheé éhēdeé wēé, níbele wē?” Mó-’ē anhób aá, “A-Sāj, bēl nínyínen ámpē.”

42 Dóo Yesue-’ē álāngē mó aá, “Nyínén-nō! Adúbe ádōñ ádíde wē bwām.”

43 Abwōg-ábwōg ambootéd anyínen, áhídē-’ē mó, ábagé Dyöb mekenag. Ade ene ndun e mod ényíné nē, bōmpē bēmbootéd Dyöb akémed.

19

*Yesue atáné nlad a
tááse bán Sakio*

1 Yesue ampōñj á dyad á Jeriko, bonj atómé’áá tómén.

2 Mod nhóg-ke abédé áwed bán Sakio, abédé-éé nlad-é-tááse ambáá, abé-’ē nhon mí mod.

3 Ahēdé’áá aá mōnyín ane mod awe béchāgēé Yesue, bonj nzii enkēmbagnédte mó, ngáne amute démbēē áhed, mó-’ē ambé esōñ.

4 Héé ányágté á’sō bonj áchāgkē bwel é’ sikamō ábel bonj ányín Yesue. Yesue ahúé’áá ene pēd.

⁵ Apedé-'aá áhed, bon aá mósad did ámín, ányīnē Sakiosε. Dóo álāngεé mó aá, "Á-Sakios, súd ásē á mehélé-te. Ntāngéné nken abé áwōn ndáb chii."

⁶ Hē dóo Sakiosε ásúdé ásē ésebán abé bte pón dé, bon ákobé Yesuε nken ne menyīngε mé syāāl.

⁷ Bad bé syāāl ábe bényīn nē, bényōngé'áá áte bán, "Aki nken abe á ndáb wéε mod awe adé mbélé-mbéb."

⁸ Sakiosε antyéém ámín, álāngē Sāngwéé aá, "Nōné', a-Sān, mētēd nhon nīmēm, níkab mó áte e'ped é'be, mbé eped ehóg wéε betóótōkē bé bad. Nzé édé-'ε bán nkōbné mod kéchéé á edoké-te, mētímtéd mó chó ámbīd ngen éniin."

⁹ Bon Yesuε mó-'ε anláá mó nén aá "A epun é bīn é' chii, e'soosōn é' bāgnédé ne enén ndáb. Anén mod mómpē adī mwān a Abraham.

¹⁰ Mwān-a-Moonyon apedé ábel bon áhed bad ábe bēbós, áhood-te bó."

*Ngan eche bényāgnēdtē bembāledε ngáb
(Mat 25.14-30)*

¹¹ Bad bēwóglánáá chōm-éε Yesuε áhóbé'áá. Yesuε ammad ape benben ne dyad á Jerusalem. Né-óó bēwēmtān bán nkamlēn ní Dyōb mépē ábwōg-ábwōg.

¹² Hé-'aá áhóbéé aá, "Kunze e mod póg eladé'áá yāl áke eke á alon áde áchābnédé ábel nén bēwóged mó kān, bon ásūε'.

¹³ Ade ákagké, anchélé ábē bembāledε dyōm, ábagé nhóg téé ekálé é kábpe dyōm aá, 'Nyétēd nén, nyékábe nyongé káān ne á pón dé echē méhūū'ε.'

¹⁴ Bon áde alon á bad dénkēndāngé mó. Bēnlōm mēsénze áhíd mó áláa ngómenaa bán, 'Séēkobéé bán anén mod ábē echēd kān.'

¹⁵ "Ké nē bēmbel mó kān, átīm-me ámbīd áwē dyad. Ade áhúú, ábwōg-ábwōg anlóm ábē bembāledε ábe ámbagké ngáb achāg ábel bon ábīi nsyān níme békúdé á nyongé-te.

¹⁶ A'só ampē ahób aá, 'A-Sān, échon ekálé dyōm échyáá nsyān níme níde ngen dyōm.'

¹⁷ Ane mod anláá mó aá, 'Nē ábóó, edī mbāledε a bwām! Ngáne éhéle mekan mēsad alyāged ngáne éhēdnadté, mbage wε ngíne ákamlēn myad dyōm.'

¹⁸ Mbāledε awē alónténé bébe mómpē ampē ahób aá, 'A-Sān, échon ekálé dyōm échyáá nsyān níme níde ngen é'tāan.'

¹⁹ Ane mod anláá ane ámpē aá, 'Wēkamlēn myad métāan.'

²⁰ "Dóo mbāledε ampēé ápédé bon áhōbē aá, 'A-Sān, ábon e'kálé dyōm wε bēn. Menkan bó á wāngese-tē, níko.

²¹ Mbāá'áá me ngé, ngáne mbīi bwām méé, échon chōm éhūnēē á ndōob. Weébēlēē bon edyāg, ehúde-'ε wéε wēwēnēé.'

²² Héε ane mod átímtanné ane mbāledε aá, 'Mmōn nsal mēn mós méwūū wε. Ebébtéd é mbāledε née wε. Néε emōn é máá abīi wéé, échēm chōm éhūnēē á ndōob, ebīi-'ε wéé, meébēlēē bon nídyāg. Néε ebīi wéé nhúde-'ε wéε méwēnēē,

²³ cheé-ō ēnkān bon weehéde echēm ngáb á ndáb echē bad bēkongéé ngáb, ábel bon nzé níhúú níkob chó ne nsyān ámín?'

²⁴ "Héε álāngεé bad ábe bēntyēm á nkāg áhed aá, 'Nyékoβen mó ábē e'kálé dyōm, nyébag bó wéε mod awē awóó mbwókel e ekálé.'

²⁵ Ábē bad bó-'ε bēnlāā mó bán, 'A-Sān, ane mod amaá mbwókel e ekálé awóñ!'

²⁶ Héε ane mod átímtanné bó aá 'Nlāa nyé méé, kēnzéé awē awóó, Dyōb débād mó abe. Bon ane awē mó-'ε eewóó, Dyōb dékobén mó káānne mwāmpīn awē awóó.

²⁷ Bon bad ábe békóó me, ábe béehede'aá bán mbē echāb kān, nyéhyεene bó hén. Bēwūú bó áwem e'só hén.' "

Yesuε asólé á Jerusalem née kâη
(*Mat 21.1-11; Mak 11.1-11; Jôn 12.12-19*)

²⁸ Yesuε amaá-'aá enén póle akal, abwógé ásē ámpē, âke á Jerusalem.

²⁹ Ade ákwógé ape á myad mé Betpeg ne Betani á Ekone é Menzab, anlóm bembapεε bébe aá,

³⁰ “Nyéke á dyad áde ádé á müde nímníí. Nzé nyêpedé á nló ní dyad nyéenyín ngáne bétâηgé mwän a ésel awě mod éédīdēē mbéd. Nyéhune mó, nyéhyεεne hén.

³¹ Nzé mod asēdté nyé aáken, cheé ékás bon nyéhunné chó, nyéláa mó nén bán, ‘Sâηgwéé* atógnéné chó.’ ”

³² Bad ábe ánlōmmē békíí-'aá, bétān-εe chó melemlem ngáne ánlāā'é bó.

³³ Ade béhunnεé ésel, bewōη bēnsedéd bó bánken, “Cheé ékás bon nyéhunné échē ésel?”

³⁴ Bó-'ε bénhōb bán, “Sâηgwéé atógnéné chó.”

³⁵ Héε bépééné chó wéε Yesuε. Bētāl échab mbóté áwedé-mín, bon béchāgtē Yesuε áwedé-mín.

³⁶ Ade ábóótédé akε, bad bétānlé'áá mó échab mbóté á nzii-tē.

³⁷ Ade ábóótédé Ekone é Menzab asyōge ásól á Jerusalem, ndun e bembapεε embootéd abwεεn ámīn ne menyīηge, békεné Dyōb ne esaád áyāle ndale é mekan ésyāāl éche bényíné,

³⁸ Béhōbē bán,

“Nnam ne kâη echē epag á ðīn áde Sâηgwéé!

Nsaη mbê ádyōb,

Ehúmé ébê-'ε ne Dyōb áde ádé se ámīn!”

³⁹ Nguse é Befarisia éche énsōblēn amute á bad áte bēnlāā Yesuε bán, “Ameléed, láá ábōη bembapεε bélām!”

⁴⁰ Mó-'ε antimtén bó aá, “Ne mbále, nzé ábén bad bédíbé nsal, né meláá múmó mébootéd abón.”

Yesuε alebe dyad á Jerusalem

⁴¹ Ade Yesuε ápedé á nkæg ní dyad á Jerusalem, annyín dyad á'sō. Dóo mēsod mébóótédé mó abíd á mīd, áchyé' Jerusalem

⁴² aá, “Embōη bán nyébīi mekan níme mépεεne nsaη. Bon bōob, nyéēhēlēē mó anyín.

⁴³ E'pun é' bīn é'húε nyé á'sō á pónde échē bad ábe békós nyé bélāηnédté nyé nkúmbág née e'ké, bēbentén-εe nyé ped ésyāāl,

⁴⁴ bon bēmad nyé, nyāābe áben bán moosyāál. Aláá ké ahóg déelyagké ásē áyāle nyēnkēnchemmé pónde échē Dyōb ápedé áson áden alongé.”

Yesuε apedé á Ndáb-e-Dyōb

(*Mat 21.12-17; Mak 11.15-19; Jôn 2.13-22*)

⁴⁵ Yesuε ansól á Ndáb-e-Dyōb, ábootéd bad ábe bésómé'áá bwēm áwēd-te ananted,

⁴⁶ álāηgē bó aá, “Eténlédé á kálag e Dyōb nén bán Dyōb áhóbé aá ‘Echem ndáb ébē ndáb e mekáne.’ Bon nyétimté chó mbwōg mé bechīb.”

⁴⁷ Bootya nē, Yesuε ayágté'áá bad á Ndáb-e-Dyōb. Beprise bēmbáá ne bemeléede bé mbéndé bōobe belyáged bé dyad, bó-'ε béhéde nzii eche bēwúé'é mó.

⁴⁸ Nzii-'ε eebédeé bó ábel dyam ádíi dyam, áyāle moosyāál andāη e'yale ábe Yesuε awóg ne kán esyāál.

* **19:31** Sâηgwéé káa nwōη.

20

*Nsɛdtéd tâḡene kunze eche Yesue
(Mat 21.23-27; Mak 11.27-33)*

¹ Mbwe nhóg Yesue ambé á Ndáb-e-Dyöb áyāgtē bad, ákanlé-’ε bó nkalaḡ mí bwám. Héε beprise bémbáá, bemeléede bé mbéndé ne bad bémbáá bé dyad, bépédé áwē,

² boḡ bésedté mó bánken, “Láá sé, kunze ehéé éwóó ábel nímén mekan? Nzé-módé abagé-’ε we enén kunze?”

³ Dóó Yesue átimtanné bó aá, “Mémpē meésédéd nyé dyam ahóg; nyéláa me

⁴ wée kunze echē Jone ádúsánnáá bad émbídtē, wée Dyöb, káa wée moonyon?”

⁵ Bēn ne bēn bēmbootéd atāḡten bán, “Nzé dehóbé bán, ‘Jone echē kunze enhúú ne Dyöb,’ né ásedéd syánē aáken, ‘Cheé-ḡ enkāḡ boḡ nyénkēndúbé mó?’

⁶ Boḡ nzé dehóbé bán, ‘Echē kunze ehúú ne baányon,’ né ábén bad bésyāḗl bēlūm syánē meláá, áyāle bēndūbē bán, Jone abédéε nkal é’dáádāḡ.”

⁷ Hē dóó bétímténé mó bán, “Séebíi’ε wée ene kunze émbídtē.”

⁸ Dóó Yesue álāḡgeé bó aá, “Né ké me-’ε ámpē méeláá’ε nyé kunze echē níwóó ábel nímén mekan.”

*Ngan e bebel bé nzag ntéd
(Mat 21.33-46; Mak 12.1-12)*

⁹ Héε Yesue ákanléε bad ngan nén aá, “Mod nhóg ambé, ankwēl nzag e e’pum é mel ábe bébenléε mím. Ambē ene nzag wée bad ábe bóbōó békāb mboté áte, ákē eke á alon démpēε, ábēm-me áwed.

¹⁰ Póndé epedé-’aá eche bépádéε e’pum, boḡ álōmē mbālede wée bebel-bé-nsón, ákobe mó áde asii dé e’pum. Héε ábē bebel-bé-nsón bēwānnē ane mbālede, bésúúd-te mó ámbíd ne mekáá mé ngēn.

¹¹ Anlóm mbālede ampée, boḡ bēmbōm ane mómpē, bēwōgēd mó e’són bwāmbwam, bésúúd-te mómpē ámbíd ne mekáá mé ngēn.

¹² Ambé alóm awē alónténé beláán. Awed bēnlōgēn, bēbwém-me mó ámbíd e e’ké.

¹³ Héε nwóó-nzag ádolé áte chóón, boḡ áhōbē aá, ‘Chán-nō mébenlé bōob? Mēlōm awem mwān awē nídáá bwāmbwam. Kapóg bébe mó edúbé.’

¹⁴ Boḡ áde bebel-bé-nsón bényíné mó, bēnnōnén á mesó, bēhób bán, ‘Ndyé-a-mbwóg mwēn nén. Déwúú mó, ábel eche mbwóg ésuuned syánē?’

¹⁵ Dóó bēbídne mó á nzag-tē, boḡ bēwūē-’ε mó.” Héε Yesue ásedtéε aáken, “Bōob-pōó, cheé nwóó-nzag ábenlé bó?

¹⁶ Apē awúú bó, ábē-’ε ene nzag wée bebel-bé-nsón bēmpēε.” Awóg áde bad bēwógé nē, bēnhōb bán, “Ene ndín e dyam eébenlād mbéb!”

¹⁷ Yesue annōn bó á mesó, ásedté bó aáken, “Chán nyésóḡténé eyale é Dyöb éche éténlédé bán,

‘Aláá áde belōḡ-bé-ndáb bēnchenéε dóó átimé aláá dé etógnén abé.’

¹⁸ Mod ké ahéé awē álūm áde aláá ámín ābōgtéd áte. Boḡ mod awē déhūntēdtē ámín, ānyogtéd áte átim mbúbú.”

¹⁹ Bemeléede bé mbéndé ne beprise bémbáá bēnhēd nzii eche békóbeé Yesue ábwōg-ábwōg, ngáne bēnchemmé bán áyāle echāb dóó ákálé enén ngan. Boḡ bēmbāḡ bad ábe bēbédé áhed.

*Nsɛdtéd tâḡene asaa á tádsε
(Mat 22.15-22; Mak 12.13-17)*

20 Né-ɔ́, bemeléede bé mbéndé ne beprise bémbáá béhédé'áá kàse e etál, ákób mó. Bêmpwěd bad, bésábé bó, bélóm bó áhíd mó. Abê bad béntāngēn ábāntēn nēn bán, béhíde mó ne nlém nhóg, ábel bon békób mó awusé á nsəl, bon ene pónde bēbé mó á mekáá mé ngómena a Roma awě adé á nkamlēn.

21 Héε bad ábe bēnlōmmē nē bēlāngēé Yesuε bán, “A-meléed, sēbíí bán ehóbe', eyágte-'ε mam nīme métāngēné. Weékwognádté modmod. Eyágte-'ε bad mekan mé Dyōb á nyaa echē étāngēné bwām.

22 Mbéndé eche syānē ehóbe nēn bán désāngē' tááse wéε Kaisεε, kōn e Roma-ye?"

23 Bon Yesuε anchem bó akwáb. Héε álāngēé bó aá,

24 “Nyélúmed mε mōné mé ekii. Ediidinge éche nzéé chēn, dīn áde nzéé-'ε dēn?” Bēntimtén mó bán, “Dīn ne e'só ábe Kaisεε.”

25 Dóo Yesuε áhóbeé aá, “Nyébag-kóo Kaisεε éche édé éche Kaisεε, nyébag-ke Dyōb éche édé é Dyōb.”

26 Bɔɔb-pɔɔ, nzii ké póg enkēmbáá eche békōbēnnē mó póle e awusé á nsəl. Né-ɔ́, bēndīb nīmāb nsəl ngáne dyam dēnkēmbonǵé bó ahób. Nyaa eche Yesuε ántimtēnné bó enkóméd bó yǎl áte.

Nsɛdtéd tângene mpuu

(Mat 22.23-33; Mak 12.18-27)

27 Donǵe á Besadusia bēmpě wéε Yesuε. Besadusia bēndūbē bán mpuu méesaá ámbīd e kwééd.

28 Dóo béhóbeé bán, “A-meléed, mbéndé e Mosεε ehóbe nēn bán, ‘Nzé mod awóo mmwáád, bon awédé áde bó ane mmwáád béepedéé mwān awále, mwānyān a abum ahóg atāngēné ane nkúd awón, ábel bon dīn áde mwānyān déēbɔɔ'’.

29 Bɔɔb-pɔɔ, bad bēbédé mod saámbé ábe bēmbīd abum ahóg. Mod a'só anwón mmwáád bon awé áde bó mmwáád ne béepedéé bán awále.

30 Mod awě anlóntén bēbe anwón ane mmwáád. Mómpē awé ésebán achyáá mwān.

31 Ámbīd é pónde awě anlóntén bēláán mómpē anwón mó, káón bó mod saámbé bēbom mó awón, nhóg ámbīd a aníní. Bon bó mod ké nhóg bēnkēnchyáá mwān ne ane mmwáád, káón bó moosyáál bēwé-'ε.

32 Káónne á asóg ane mmwáád mómpē anwé.

33 Bɔɔb-pɔɔ á pónde e mpuu, mmwáád awě nzéé ane mmwáád áchəgnédté áyāle bó moosyáál saámbé bēnwōn mó?”

34 Dóo Yesuε átimtanné bó aá “A pónde eche dédíí áte nēn chii, bebaád ne baachóm bēwōnne'.

35 Bon bad ábe bēkwógnédé ábē á mpuu á kwééd bon bésón-le á alonǵé dékɔɔlē bēwōnne.

36 Bēbēē néε ángel, bēwág-kaá ámpē. Apuu áde bēpuú'é, bán bé Dyōb bóo bēbēē.

37 Mosεε mwēn ámpē alúmté áte aá, bad bēpuude'. Wéε Mosεε átelé á Kálag e Dyōb aá, mwá bwel akóbé muú, achəgé Sāngwéé áhed aá, Dyōb áde Abrahamε, Dyōb áde Aisige ne Dyōb áde Jakəbe.

38 Dyōb ádíí Dyōb á bad ábe bédé á alonǵé, saké Dyōb á bad ábe bēwédé. Nē dēn álúmté bán ne Dyōb, bó moosyáál bédé á alonǵé.”

39 Donǵe dé bemeléede bé mbéndé bēnhōb bán, “A-meléed, chōm éche ehóbe étāngēné.”

40 Né-ɔ́ modmod enkēnchu'é mó dyamdyam asēded ámpē.

Nsɛdtéd tângene Ane-awě-Béwágté

(Mat 22.41-46; Mak 12.35-37)

⁴¹ Hée Yesue ásedteé bó aáken, “Cheé ékǎá bon bad béhōbē bán Ane-awě-Béwógté abidé á mbyaa míme kǎn Dabide?”

⁴² Ngómē Dabide mwēn ahóbé á Kálag e Ngase aá,
“Sǎn Dyōbē anlǎá awēm Sǎngwéé aá,
‘Dyēé áwēm ekǎá émbǎá,

⁴³ kǎn ne á pǎndé echē mébenlé bon ékǎgtéd ábōn bad bé ekǎyí ámín ne mekuu.’

⁴⁴ Née Dabide mwēn ásebpé mó achǎg aá Sǎngwéé, chǎn-nō Ane-awě-Béwógté áhélé abé awe mwǎn?”

*Yesue abage elébé aá,
bétédēn bemeléede bé mbéndé pǎndé
(Mat 23.1-36; Mak 12.38-40)*

⁴⁵ Bad bésyǎǎl béwógé’áá chǎm éche Yesue áhóbéé. Hée álǎngéé bembapēē, aá,

⁴⁶ “Nyétédēn bemeléede bé mbéndé pǎndé. Bédǎǎ mengombe ahyómēn áte, bédǎǎ-’ε bán bad bélente bó á dyǎn-tē ne edúbé. Bédǎǎ metii mé edúbé adyé á ndáb e mekáne ne á hǎm á ngande.

⁴⁷ Bon bǎǎ bédume’ mbwǎg é bekúd, bédogé-’ε bad ne ntǎn-ntǎn mé mekáne. Echē nyaa é bad ékǎd nkǎgsēn míme ríchábé ámín.”

21

*Mende míme nkúd a mmwaád
(Mak 12.41-44)*

¹ Ade Yesue ásádé dǎd, anyín née behǎn bé bad béhǎgkē mǎné á ntyǎg mé mende.

² Annýín-ne ntógétōke a nkúd a mmwaád nhóg ahág bedáleē bébe.

³ Hée áhóbéé aá, “A mbále, nlǎnge nyé meé, mímén ntógétōke mé mmwaád rǎhédé mende á ntyǎg-te tǎmaa bó moosyǎǎl.

⁴ Mǎné míme ábē bad béhédé, ndíi mǎné míme ríchóbé bó ásē, bon anén mmwaád ne atóg áde ádíí ahédé mǎné rísyǎǎl míme áwóó, rísyǎǎl míme ámbēē atǎgnan yǎl.”

*E’chemléd bé asóg dé nkǎrsé
(Mat 24.1-2; Mak 13.1-2)*

⁵ Bembapēē behóg békálé’áá ngáne Ndáb-e-Dyōb ébóó, ngáne bélǎnne chǎ kǎse é melǎá, bon bēnābē-’ε chǎ áte ne mende míme bad bésǎngé. Hée Yesue áhóbéé aá,

⁶ “Abén bwēm ábe nyényínéé nén, pǎndé ěpě echē aláá ké ahóg déelyǎgkē ámín e waáb. Bépǎntéd mó áte mésyǎǎl.”

⁷ Bēnsédéd mó bán, “A-meléed, súútǎn nén débēnlédte? E’chemléd é’héé bēlūméd bán nén áhede abēnled?”

⁸ Yesue antimtén bó aá, “Nyétéd pǎndé nén mod eépuutád nyé. Ekud é bad ěpě, á dǎn ádēm, bédogé nyé, mod téé aá móó módē Ane-awě-Béwógté, béhōbē bán e’pun bé asóg é’pédé áte. Bon nyéehídé bó.

⁹ Nzé nyēwógé-’ε bán bel é’wanté’, kǎa bán ekǎde épǎngé áte, modmod eebǎá’. Mmén mekan mésyǎǎl métǎngéné abēnled, bon saké mó mélūméd bán, asóg ámǎá apē.”

¹⁰ Hée álǎngéé bó aá, “Alon ahóg détyēēmēn ádíníí nzum. Nkamlēn nhóg-ke rítyēēmēn mímíníí.

¹¹ Ndǎǎb eēnǎnéd ásē ngíne-ngíne. Nzaa ne nkole bēbē hǎm ásyǎǎl. Mekan míme mébǎnte bad mébē. E’chemléd é’mbǎámbǎa bǎmpē bēbíd ádyōb.

¹² Mmén mésyā̄l médêbenléd, béhē nyé abum ámīn, bétagté nyé. Békeén nyé á ndáb é mekáne, békáád nyé áwed, béhé-'ε nyé á mbwǒg. Nyébíi-'ε bán, bépeén nyé á'sō é' kâñ é bad ne benkamlene áyāl e dīn ádêm.

¹³ Nê débε nyé etál pón dé eched, áláa bó mekan mésyā̄l nīme nyésónjténé á yāl echēm.

¹⁴ Né-ǒó, nyémad á nlém tē ngen póg bán nyéetāñgenéé atag áte ngáne nyékāā'ε.

¹⁵ Mmēñ mēbε nyé dyam áde nyéhōbpē ne debyéé áde nyéhōbēnnē dó, nyaa echē ábēn bad bé ekoyí béehēnlé nyé atyéemεn. Béehēl-laá ahób bán dyam áde nyéhóbεé déetāñgenéé.

¹⁶ Kāñne besóó ne benyoó, bóóβε áben baányan ne bēn, bēn bépalé nyé áte, béwúú-'ε nyé nguse é bad.

¹⁷ Bad bésyā̄l békǒó nyé áyāle dīn ádêm.

¹⁸ Ké nê, dyamdyam déebēnlé nyé, ké mbum e esid póg éebóó'ε nyé á nló.

¹⁹ Nyékan nlém ábel nyékud e'soóson."

*Yesuε ahóbé ngáne
dyad á Jerusalem dépāā'ε*

(Mat 24.15-21; Mak 13.14-19)

²⁰ Yesuε anláá bembapεε aá, "Á pón dé eche nyényinnē sánze élāñnéde dyad á Jerusalem, dǒo nyébíi'ε bán ekíde éhede apāñted áte.

²¹ Nzé nyényíné nê, bad ábē bédé á Judeya bétóm mehélé béke básǒm á e'kone mīn. Ane awē adé á dyad-tē wē, ából. Awē mó-'ε adé ámbíd e ebwǒg eétoñné mó asól á dyad á Jerusalem.

²² Ayāle nén, nīmē mesú nīme ríhóbεé nê, médíi e'pun bé nkógsen. Pón dé eched dǒo mekan nīme méténlédé ásē mélōnnē.

²³ Ebē ebébtéd ne bebaád ábe bēbē nkog ne ábe bémwāñtē nīmē mesú. Ayāle nén, metake híin mébē á nkōñsé-te, enén nyonñgel e bad ékūd-te metuné bwāmbwam.

²⁴ Adén alon á bad déwē á bel-tē. Békōb nguse é bad nēε betāñ, békēēn bó á melon mémpēε. Bad ábe béεš bad bé Israel békǒgtéd dyad á Jerusalem áte, kááñ né pón dé echē Dyōb átíínédé bó émaá áte.

Epe é Mwān-a-Moonyon

(Mat 24.29-31; Mak 13.24-27)

²⁵ "Etondeε bóóβε ngon ne betintine bélūméd e'chemléd. Edíb é nkwxé édūm áte, étog nēε ahóbpε dé edíb. Nén dékōbéd bad bé melon mé nkōñsé mbwǒg kááñ béébyē' nēε bébεléε.

²⁶ Bad bépimén ne mbwǒg rí ngine áyāle ebébtéd éche éhúε á nkōñsé, ngine-'ε éche édé ámīn éñāñnéde á e'dii.

²⁷ Ene pón dé dǒo bényinnē nēε Mwān-a-Moonyon áhúε'ε á mbag-tē ne ngum ne ehúmé é ngine.

²⁸ Á pón dé eche nyényinnē nēε nīmén mekan mébóótédé abēnléd, nyétyéem ámīn, nyésād díd, áyāle nén pón dé e e'soóson émaá nyé apε áte."

Mel méyágte syánē debyéé

(Mat 24.32-35; Mak 13.28-31)

²⁹ Héε Yesuε álāñgεé bó ene ngan, aá, "Nyēnōn alín á ngəl bwām, káa bwel ké é'héε bémpeε.

³⁰ Abíd áde byaa é'bootadté bó abíd, nyébēn nyébele nyébíi bán nchon nímáá abé benben.

³¹ Melemlem nzé nyényíné nīmén mekan mésyā̄l mébenlad, nyébíi nén bán, nkamlen rí Dyōb ríkwógé apε.

³² Ne mbáale, nlânge nyé nén meé, enén nyongel e bad éemaá' é káñne mímén mekan mésyā́l mémáá abenled.

³³ Nkoñ mí mín ne nkōñ nísé bémaá bonj ábēm e'yale bēbē abé ne abé.

Nyétéd pónde

³⁴ “Nyétóo nén nyéetómté echen pónde esyā́l ádyé ndyééd ne ámwé mím bwámbwam. Nyéébūdē-'é atag áte áyā́le mekan mé alongé. Nzé nyébele nē, né échē epun étān nyé taléd nēe melám.

³⁵ Epun échēd épií moonyon asyā́l awē adé á nkōñsé.

³⁶ Nyétéd pónde, pónde ésyā́l. Nyékā́nne bán nyéwōñ ngíne átóm mímén mekan míme mébenléd áte, ábel nén nyéhel atyéem á'sō wéé Mwān-a-Moonyon.”

³⁷ Mmē mesú mésyā́l Yesue ayágté'áá bad á Ndáb-e-Dyōb. Nzé ngukél empě, áke ánā́ á ekone é Menzab.

³⁸ Nzé bñn bēnsā́ sánjén, ekud é bad éhyágáá mó atán á Ndáb-e-Dyōb áwóglēn mó.

22

Békíi kun áwúu Yesue

(Mat 26.1-5; Mak 14.1-2; Jōn 11.45-53)

¹ Bōōb-pōó, Ngande e Ewele-é-Ngēn emmad abé benben. Enén ngande ebédéé dñn bán Nnyíme-ámín.

² Beprise bémáá ne bemeléede bé mbéndé bēhédé'áá nzii echē bēwúé'é Yesue á mesōm-tē. Bébáá'áá pen bán bad bēsōñtēn.

Judase akwenténé ásóm Yesue

(Mat 26.14-16; Mak 14.10-11)

³ Satane ansól mbapere awe Yesue nhóg áte, awē béchagēé bán Judase. Dñn démpēe démbē mó bán Iskariode. Ambé nhóg átínté bembapere dyōm ne bébe.

⁴ Héé ásyā́ngé bonj, áke atán beprise bémáá bōōbe bekamlēn bé Ndáb-e-Dyōb, ábel ntíi ásóm Yesue áwāb.

⁵ Nén dénwōgēd bó menyinge bwámbwam. Bóbōo bémpě á nchemtēn. Bénlā́ mó bán bēsā́bē mó mōné.

⁶ Mós-'é ankwentén. Dōó ábóótédé nzii ahed ásóm Yesue áwāb ésebán bad bēbíi.

Yesue aboñsan Ngande e Nnyíme-ámín

(Mat 26.17-25; Mak 14.12-21; Jōn 13.21-30)

⁷ Bōōb-pōó, epun é ngande e Ewele-é-Ngēn áde bēwúé'é ndyōñ mí mbód mé Nnyíme-ámín empě áte.

⁸ Dōó Yesue álóméé Petro bó Jōn aá, “Nyéke nyéboñsen syā́nē ndyééd e Ngande e Nnyíme-ámín.”

⁹ Bēnsēdéd mó bánken, “Héé wédā́ngé wéé séke séboñsen ádyé chí?”

¹⁰ Dōó ákwentanné aá, “Nyénōne'. Nzé nyépédé á dyad-tē, mod ábómén nyé awē apémé apom dé mendíb. Nyéhíd mó á ndáb ké ehéé eche ásōnlē.

¹¹ Nyélā́a nwóó-ndáb bán, ‘Awēd meléede aáken, héé toñ e beken édíi echē módyēē ndyééd e Nnyíme-ámín áte ne ábē bembapere?’

¹² Bélūmēd nyé toñ echē ekalé áte eche bēnā́bpé áte. Ene toñ edé ámín á ndáb-te. Nyébele syā́nē mboñsén ní ndyééd áhed.”

¹³ Dōó békíi, bétán-ne mekan melelem ngáne ánlēbēē bó, bēmbōñsén-ne ndyééd e Ngande e Nnyíme-ámín.

Ndyééd e Sā́ngú

(Mat 26.26-30; Mak 14.22-26; 1 Kōr 11.23-25)

14 Ade póndé e ndyééd épédé áte, Yesue andyéé á tébele ne bembapεε bé nlómag.

15 Héε álângeé bó aá, “Mendǎñ bwâmbwam meé ndyé enén ndyééd e Nnyíme-ámín ne nyé bon íkude metuné.

16 A mbále nlânge nyé meé méedyáá chό ámpē káñ ne á póndé echē Dyōb délonēdtē chό mbon á póndé echē mímē nkamlen mépεé áte.”

17 Dóo átédé mbwendé, bon ábagé Dyōb mekenag, álânge-’ε bó aá, “Nyékob nén, nyémwê, nyétōmted nhóg ne aníníí.

18 A mbále, nlânge nyé meé bootya bǎb áke á’sō, méemwáá mímén mím ámpē káñ né nkamlen í Dyōb mǐpédé áte.”

19 Antéd kǎñne ewele, ábe Dyōb mekenag, ákabtéd chό áte, ábē-’ε bó chό aá, “Echem yǎl nén, ebǎgnédé áyāl echên. Nyébele nén ákamten me.”

20 Ade bémáá ndyééd adyé ambǎl melemem ne mbwendé mím mím. Anhób aá, “Mmén mbwendé ndíí melǎ mékǎǎlē níme nsógténé ne mekií mímém, níme mésyǎgé áyāl echên.*

21 Bon nyénǎne’, mod awē akií me ntúré, adyág ndyééd ne me hén.”

22 Mwǎn-a-Moonyon áwē ngáne éténlédé, bon medim ne ane mod awē ášōm mó.

23 Héε bembapεε bēn ne bēn bébóótédé nhóg ne aníníí aséded, ábíi bó mod awē ábǎl enén ndín e dyam.

*Bembapεε béswanñtan tângene
mod awe adé ambáá*

24 Bembapεε bēn ne bēn bēmbootéd aselen, béhedé ábíi bó mod awē adé mod ambáá áwab tǐntē.

25 Dóo Yesue álângeé bó aá, “Kǎñ é melon élúmte nganñlen ámín e bad ábe békamlanné. Benkamlene béchǎge yǎl bán, ‘Ebon-nléme.’

26 Bon éetângeñé abé nê átǐntē echên. Embon bán ane awē adé mod ambáá átǐntē echên, átim néε ane awē atómténé mpín abé. Ane awē mó-’ε alyágte’, átim néε mbǎledε.

27 Nzé bad bédé bébe, nhóg adyéé á tébele, aníníí-’ε abenle mó, ahéé atóme waáb e’del áte? Saá ane awē adyéé á tébele-yε? Bon me, ndé áwen tǐntē néε ane awē abenle nyé.

28 Nyéē nyédé bad ábe bēwéséné me á póndé eche íkúdé metuné.

29 Ngáne Titéε ábágé me kunze ákamlen, né-’aá mémpē mébéé nyé.

30 Nén débǎl nyédyé ndyééd, nyémwé-’ε mím hóm ahóg ne me áwem nkamlen-tē. Nyé mod té ádyéé-’ε á atii dé nkamlen, nyékǎādtē metúmbé mé Israel dyôm ne mébe.

*Yesue ahóbé á’sō é’ póndé aá,
Petro ábāñ mó áyāl*

(Mat 26.31-35; Mak 14.27-31; Jñn 13.36-38)

31 “A-Simǎn, Nǎné! Satanε akudé kunze ákǎg nyé moosyǎál, ákab-pe nyé áte. Abane bé bwâm ne bé mbéb nēngáne mod apebe kón éche bésálté.

32 Bon nkánnédé we meé adúbe áde éwóó déesudé’. A póndé echē wétiménné me ámpē, éwéd baányon áte.”

33 Petro anhób aá, “A-Sán, ké á mbwǎg dóo bétimnéé we káa á kwééd, mbōñséné we ahíd.”

34 Dóo Yesue álângeé mó aá, “Nláa we, a-Petro, nchóm-a-kúb adēhób aá móto’ nkuu nén, wǎbāñ me áyāl ngen éláán.”

Póndé e metake ekwogé ape

* 22:20 Donje á kálag dé’só éewóó’ε e’yale ábe Yesue ámbíd e Echem yǎl nén; á nchoo 19 ne nchoo 20 nsyǎál.

³⁵ Dóo Yesue áse dtéé ábē bembapεε aá, “A pón dé eche ménlōmmē nyé ésebán nyéewánlé ekwε é ngáb, káa ekwε, káa metámbé, nzé-chómé nyéntōgkē?” Bembapεε bēnkwen tén bán, “Chómchóm.”

³⁶ Dóo Yesue álán gεé bó aá, “Bóob-póó, mod awě awóó ekwε é ngáb ké’ε ekwε, áwále áyāl. Ane awě mó-’ε eewóo nk wáté, ásóm nímē nkobe, áchan nk wáté.

³⁷ Nlânge nyé mεé kálag e Dyōb ehóbé aá, ‘Bébánné mó nchoo nhóg ne bechíb.’ Né-’aá ébenlédté áyāl echēm. Etân gēné ébenléd áned.”

³⁸ Bembapεε bēnlāā mó bán, “A-Sán, nōné’, sēwánlé nk wáté mβε hén.” Mó-’ε antimtén bó aá, “Désob nê bóob.”†

Yesue akii akáne á ekone é Menzab
(Mat 26.36-46; Mak 14.32-42)

³⁹ Hê dóo ábidé á ebwóg, áhídē á dyad-tê, ákē á ekone é Menzab ngáne ámmēnténné abel. Bembapεε bó-’ε bēnhíd mó ámbíd.

⁴⁰ Ade bépédé áwed anláá bó aá, “Nyékánne’ bán mekágsen méepiidé nyé.”

⁴¹ Ansyəó bó á nkəg, asídé mwă nchabnede, akóg mebóbóŋ, ákännē nén aá,

⁴² “A-Tê, nzé ébóŋnéde wε, ékōbēn me nímén metuné. Boŋ ké nê, saké ngáne ébóŋnéde me, boŋ bĕl ngáne ébóŋnéde wε.”

⁴³ Ade Yesue ákánneé nê, ángel embíd ádyōb, éhyε ewéd mó áte.

⁴⁴ Anwéd mekáne áte ngáne ámbēē á ndutul-tê. Ebábé éche ébidé mó á yăl émbē ngáne metóté mé mekií, étēnē’ á ndóob taáb, taáb.‡

⁴⁵ Ade áamáá akáne, antyéém ámin, áke wée bembapεε bébédé. Antán née békúnéé áyāle ndutul e ngine.

⁴⁶ Dóo áse dtéé bó aáken, “Cheé nyékúnéé? Nyépáde áse, nyékánne nén mekágsen méepiidé nyé.”

Békóbé Yesue
(Mat 26.47-56; Mak 14.43-50; Jón 18.3-11)

⁴⁷ Yesue eépedéé ké amad á nsəl dóo amute á bad ápédé. Mod awě antómén bó abédéé Judasε, mbapεε nhóg átintē e bembapεε dyōm ne bébe ábe Yesue. Apedé-’aá Yesue á nkəg ahé mó tál.

⁴⁸ Boŋ Yesue ansédéd mó aá, “A-Judas, nédē ahé áde éhédé Mwăn-a-Moonyon tál ádii ásóm mó-yε?”

⁴⁹ Ade bembapεε ábe bóobε Yesue bébédé áhed bényíné dyam áde áhede abenled, bēnsédéd mó bánken, “A-Sángú, sēhele séwān ne níméd nk wáté-yε?”

⁵⁰ Héε mbapεε nhóg átómté nk wáté, áselē ntāŋ awě prisε ambáá etúu é ekáá émbáá.

⁵¹ Boŋ Yesue anláá bó aá, “Nyésob nê bóob!” Ansídtén mó ene pəd e etúu, ádid mó bwám.

⁵² Héε álán gεé beprise bémháá bóobε benkamlεε bé mésénzε mé Ndáb-e-Dyōb ne belyáged bé dyad, bad ábe bēnhyε mó akób aá, “Nchíb móo nyéhyédé akób, boŋ nyéwále nk wáté ne mbid-ε?”

⁵³ Mbwε téé syánē debágáá á Ndáb-e-Dyōb, nyēnkēmbánné me ké ekáá á yăl. Boŋ echen pón dé epedé bóob. Ehíntén chóó édé á nkamlεn bóob.”

Petro abáá Yesue á yăl
(Mat 26.57-58, 69-75; Mak 14.53-54, 66-72; Jón 18.12-18, 25-27)

⁵⁴ Héε békóbé Yesue, boŋ békεené mó, bétīmēn mó á ndáb wée Prisε Ambáámbáá. Petro mó-’ε ahídé’áá bó ámbíd mwă etún.

⁵⁵ Bēnkonéd muú átintē e dyad, bad bēlādēn áhed. Petro mómpē anhyé adyεε áhed.

† 22:38 Désob nê bóob; káa Nê akwógé. ‡ 22:44 Donge á kálag dé’só déewóó’ε nchoo 43 ne nchoo 44.

⁵⁶ Mbàledε a mmwaád nhóg annyín nées Petro ádyéé á nkæg ní dü. Dóo ánóné mó chóón, boŋ áhōbē' aá, "Anén mod mómpe ambé ne Yesue."

⁵⁷ Boŋ Petro antán aá, "A-mwän-a-mmwaád, meebii'ε me mó."

⁵⁸ Eebeméé áte, mod ampée anchem mó. Anhób aá, "Wémpē edé nhóg áwāb echon." Boŋ Petro anhób aá, "Amúε, weéhyāg me ngáne áyāl."

⁵⁹ Ambíd e háwa póg mod ampée ambádnén aá, "Ntānten ké nhóg méesaá. Anén mod abédé ne Yesue, áyāle adii mod a Galilia."

⁶⁰ Boŋ Petro anhób aá, "Á-mod-e-ngé, meebii'ε chōm éche mmōŋ ékoo'ε ahób."

Abwōg-ábwōg áde ahóbé nê, nchóm a kúb antón.

⁶¹ Héε Sángrwéé ákúnné boŋ mīd mébomé bó Petro. Dóo Petro áwémténé e'yale ábe Sángrwéé ánlā'ε mó aá, "Nchóm-a-kúb adēhób aá móto' chii nén, wēbāŋ me á yāl ngen éláán."

⁶² Héε ábídé á ebwōg, abólé-'ε awé. Anchií bwāmbwam.

Bébómtédé Yesue, béwélé-'ε mó
(Mat 26.67-68; Mak 14.65)

⁶³ Bōb-pō, bad ábe bénóné'áá Yesue bēmbóótéd mó awel, bēbómtád mó,

⁶⁴ bēkanj mó mīd, bésēdtē mó bán, "Láá sé, nzé-módé abómé wε?"

⁶⁵ Bésyāá'áá mó nzyāŋ nyaa ne nyaa.

Bépééné Yesue wée belyáged bé dyad
(Mat 26.59-66; Mak 14.55-64; Jōn 18.19-24)

⁶⁶ Nées bīn é'sángré, bad bēmbáá bé Israel, beprise bēmbáá ne bemeléede bé mbéndé bēnkōb mbom, bēpēēn Yesue áwab káánsel.

⁶⁷ Héε bésēdtéé mó bán, "Láá sé nzé wε-εé edé Ane-awē-Béwógté?" Dóo Yesue ahóbéé aá, "Ké menláá nyé, nyéedúbéé me.

⁶⁸ Ké menséded-te nyé akan, nyéekwenténné me.

⁶⁹ Boŋ bootya bōb, Mwän-a-Moonyonj ádyéé á ekáá émbáá é Dyōb á Ngum."

⁷⁰ Bó moosyāál bēnsédéd bánken, "Nédē wε-εé edé Mwän a Dyōb-ε?" Ankwentén aá, "Nyé bēn-εé nyéhóbé bán nées édii."

⁷¹ Dóo bēhóbéé bán, "Nzōm ehéé empée déhedéé? Syánē bēn dewógé áwē nsəl."

23

Payledε akáádté Yesue
(Mat 27.1-2, 11-14; Mak 15.1-5; Jōn 18.28-38)

¹ Héε belyáged bé dyad bésyāál bétýéémé ámīn, boŋ békεené mó wée Payledε.

² Awed-taá bēbóótédé mó mekan abán áyāl bán, "Sékóbé anén mod ngáne ápuutadté sé alonj áte. Ahóbé nén aá, séesaŋnád Kaisεε tááse, áhōbē-'ε nén aá, mó mwēn móō módē Ane-awē-Béwógté, nédē ahóbe' aá módē kēŋ."

³ Dóo Payledε ásedtéé Yesue aáken, "Wε-εé edé kēŋ e bad bé Israel-le?" Yesue ankwentén mó aá, "Ngáne éhóbé."

⁴ Boŋ Payledε álāŋgē beprise bēmbáá ne amute á bad nén aá, "Meenyínéé atōte ké ahóg áde anén mod ákwééné."

⁵ Boŋ bēmbē békag á'sō, bēhōbē bán, "Anén mod akóne bad ne mam míme áyágtéé á mbwōg e Judeya esyāál. Ambootéd á Galilia, apedé-'ε hén bōb."

Herōde akáádté Yesue

⁶ Nées Payledε áwógé nê, ansédéd ké Yesue adii mod a Galilia.

⁷ Bēnlūmēd mó áte bán, nê dēn dóo édii. Ngáne alonj á Galilia abédé ásē e nkamlēn míme Herōde, Payledε anlóm Yesue áwē. Herōde mwēn ámpē ambé á Jerusalem ene pōndé.

⁸ Ayǒgkē mewēmten awón ãnyín Yesue áyāle awógé'áá mó dúu. Ahédé'áá áá mónyín menyáké níme ábeléé. Né-ǒó anwóg menyinje áde bépééné Yesue áwē.

⁹ Ansédéd Yesue ekud é mekan, bon Yesue enkëntimténné mó dyamdyam.

¹⁰ Beprise bémbáá ne bemeléede bé mbéndé bentyēm ámīn, bébāntād Yesue mekan áyāl.

¹¹ Héé Herode, bóobe éche sánze bébóótédé mó awǒǒ, béwélé-'é mó. Dóo béwāadtē mó kase é bwēm, bon álōmē mó ámbīd wée Payledé.

¹² Nén dēnkǎñ Herode bó Payledé bēntīm ásē échē epun; édé ape nē, búmō bénsēbē ekoyí awon.

Bébidté mbakú bán béwúu Yesue

(Mat 27.15-26; Mak 15.6-15; Jǎn 18.39-19.16)

¹³ Hē dóo Payledé áládé beprise bémbáá áte nchoo ne belyáged, ne bad bémpēe,

¹⁴ bon álāngē bó áá, “Nyēnsébé anén mod apεen áwēm. Nyé bán apuutad bad nló áte. Bǒǒb-pǒǒ nhédé áte áyāl échē wée nyébēn nyédíí, bon meekóbnéé mó dyam dé mbéb ké ahóg áde nyéhóbbé bán abelé.

¹⁵ Ké Herode ámpē eekóbnéé mó awusé ké ahóg, né-'áá ákǎá bon álōmē mó ámbīd. Bǒǒb-pǒǒ dyam dé mbéb ké ahóg déesaá áde ábélé áde álūmte bán atǎngéné kwééd.

¹⁶ Né-ǒó mǎhǒb békúdé mó, rítēdē mó, ákag.”*

¹⁸ Dóo amute ásyāal ábónéé bán, “Téd anén mod, éwúu mó! Bídtéd sé Barabase.”

¹⁹ (Barabase abédéé mod awě bēnhēē á mbwǒg áyāle bel ábe ámbootédté á dyad-tē ne awúu áde áwúé'áá bad.)

²⁰ Ngáne Payledé ánwōngē mewēmten átede Yesue, ambé aláá bó nē ámpē.

²¹ Bon bémbē bébōnē' bán, “Bomé mó á awǒg! Bomé mó á awǒg!”

²² Anláá bómpē ngen éche élónténé éláán áá, “Ayāle chán? Ebébtéd éché ábélé? Meekóbnéé mó awusé ké ahóg áde átǎngéné kwééd. Né-ǒó, mǎkúde mó, rítēdē-'é mó, ákag.”

²³ Ké nē bémbē bébōnē' bán ábome mó á awǒg. Kǎáñ ne á asóg, échab ehóbb énkobnéd.

²⁴ Payledé ambídéé mbakú áá, móǒbēl nēngáne béhóbbé.

²⁵ Antédé mod awě bēnhǒbpē, awě ambé á mbwǒg áyāle bel ne awúu áde áwúé'áá bad, bon ábagé bó Yesue áá, bétiméd mó ngáne bédáá.

Bébómmé Yesue á awǒg

(Mat 27.32-44; Mak 15.21-32; Jǎn 19.17-27)

²⁶ Ade sánze ékεεnéé Yesue á hǒm dé mpanag, émboméén Simone, mod a dyad á Sirine. Anén mod ambíé á mwǎ dyad awě adé á ahǎngé. Héé békóbbé mó, bépémtéd mó awǒg áde Yesue bán áhídne mó dó ámbīd.

²⁷ Atínté e ndun e mod echē enanáá Yesue ámbīd, bebaád bémbē áwed, béchyé'áá, bélebe-'é mó.

²⁸ Dóo Yesue ánóné ámbīd, álāngē bó nén áá, “A-bǎn bé bebaád bé Jerusalem, nyéechyēē' me, nyéchyε' échen yǎl ne áben bán.

²⁹ Nhóbe nē áyāle nén e'pun é' bīn é'húé, áde bad béhǒbpē bán, ‘Nnam ne ábē ábe bédé ekǎm, ne ábē ábe bééchyāá', ne ábē ábe béēmwanjtē mbéd!’

³⁰ A pónde eched dóo bad bēlāngēē mbǒǒd bán,

‘kúmtéd sé ámīn,’

káa e'kone bán,

* **23:16** Donje á kálag dé'só ábádé nchoo 17: Bǒǒb-pǒǒ, mwě tée, nzé Ngande e Nnyime-ámin embé, Payledé antǎngén bad bé dyad mod a mbwǒg nhóg achenned.

'kútén sé.'

³¹ Nzé bébele' mímén mésyāāl bɔɔb, áde bwel é'lyágé é'díí mendíb áte, chán-
náa bébenlé áde bwel békinnē-ye?"

³² Bɔɔb-pɔɔ bēnkēén e'bébtéd é' bad é'be, ápan bó nchoo ne Yesue.

³³ Ade bépédé hóm áde béchagēé bán Ebóngél é Nló, bēmbomé Yesue á awɔg,
ne ábê e'bébtéd é' bad é'be. Bēmbomé nhóg á ekáá é emwed, aníní-'é á ekáá
émbáá.

³⁴ Hée Yesue ákânneé nén aá, "A-Sán, lagsén bó áyāle béebíi' é chōm éche
bébeleé."† Sánze énsíd mbambú, ákab mbóté éche Yesue.

³⁵ Ndun e mod entyéém á nkəg, bēnəné' chōm éche ébenlad. Bɔɔ
benkamlɛn bé Israel bēwéláá mó, bēhōbē bán, "Achōnté'áá bad bémpeé,
áchood-tɔɔ eche yāl, nzé ne mbále mó adé Ane awě Dyōb Apwédé, bɔɔ
Awógéd-te."

³⁶ Sánze chōmpē éwéláá mó. Empiinéd mó ebéntéd é mīm,

³⁷ élāngē mó bán, "Nzé wée edé kəh e bad bé Israel, éson echon yāl!"

³⁸ Béntél áwe nló ámín nén bán, "Kəh e bad bé Israel chōo nén."

³⁹ Atínté e ábê e'bébtéd é' bad é'be ábe bēmboméé bɔɔbe Yesue á awɔg, nhóg
ansyāh mó aá, "Saá we edé Ane awě Dyōb Awógté-ye? Sōh-ɔ echon yāl, éson-'é
sēmpē!"

⁴⁰ Bɔɔ aníníí mod ankáné waáb áte aáken, "Weebáá' é Dyōb-ε? Sóo bad bébe
dekudé melemlen mé nkógsen míme mómpē ákúdé.

⁴¹ Bɔɔ pen, nkógsen míme dékúdé, rítāngéné ne míme sóo mbéb. Bɔɔ anén
mod eébeleé dyam dé mbéb ké ahóg."

⁴² Hée ane mod ábádeé ahób aá, "A-Yesu, sōn, weéchatán me á pónde eche
wésōnlē á nkamlɛn."

⁴³ Dóo Yesue álāngēé mó aá, "A mbále, nlānge we meé, chii nén dēn wēbē ne
me á Paradis."

Yesue awédé

(Mat 27.45-56; Mak 15.33-41; Jɔn 19.28-30)

⁴⁴⁻⁴⁵ Bɔɔb-pɔɔ bīn bēmbē dyam kəd. Etondeε andím, ehíntén ékwē-'é ekíde
áte ésyāāl káəh ne á ngəh éláán. Abad áde dēnkāb Ndáb-e-Dyōb áte dēnsalé
áte e'ped é'be.

⁴⁶ Hē dóo Yesue álébpé esaád aá, "A-Tē, áwōh mekáá dóo rilyágé échem
edəóđəh!" Amaá-'aá ahób nē, ámīi-'é nlém, awé-'ε.

⁴⁷ Ade mod ambáá a sánze ányíné nē, ankéméd Dyōb nén aá, "A mbále, anén
mod abédé-'ε mod a bwām."

⁴⁸ Néε ndun e mod echē enhyě anən, ényíné mekan mé ményáké míme
mébénlédé, mod téé ambán ekáá á nlém, ásūē' á ndáb.

⁴⁹ Yesue ábe besón bésyāāl ne bebaád ábe bēmbootéd mó anan ámbíd se á
Galilia, bentyēēm etūn, bēnəné mímén mekan mésyāāl.

Bélimmé Yesue

(Mat 27.57-61; Mak 15.42-47; Jɔn 19.38-42)

⁵⁰⁻⁵¹ Bɔɔb-pɔɔ mod ambé awě abédé dīn bán Josεbe. Anén mod ambíd á
dyad á bad bé Israel áde béchagēé bán Arimatia. Abédé mod a edúbé. Abédéε
mod a bwām, asāh-'ε. Kénéε abédé mod a káansel enkēnkwenténné mbakú
echē ábíníí belyágéd bé dyad bémbíđédtē áwúu Yesue. Abédé mod nhóg awě
anlyág nlém nén aá epun épě éche Dyōb dékōbpé nkamlɛn.

⁵² Ankě Payledε achán aá, ábe mó ndim míme Yesue.

⁵³ Néε ákúdé kunze, anhúd mó á awɔg, ákān mó kəse e mbóm, áke alímé
mó á son echē bēpwógé á eláá-tē, éche béēsēbpé mod alíme áte.

† 23:34 Donje á kálag dé'só déewóó'é: Hée Yesue ákânneé nén aá, "A-sán, lagsén bó áyāle béebíi' é chōm éche
bébeleé."

⁵⁴ Nén démbē á Mbwe mé mbonşén, áde mbwe-mé-nkóme-áte nhédé'áá abooted.

⁵⁵ Bebaád ábe bēmbbootéd Yesue anan ámbīd se á Galilia, bēnhīd Josebe, bényín soŋ, bényín-ne ngáne bēnánťé mó ndim á soŋ-tē.

⁵⁶ Dóo bétímé ámbīd á dyad-tē, bébonşán mōg ne mekún míme bēnabnadté ndim. Á mbwe-mé-nkóme-áte bēnkōmē áte ngáne mbéndé e bad bé Israel étíídé.

24

Yesue apuúdé

(Mat 28.1-10; Mak 16.1-8; Jōn 20.1-10)

¹ A epun é'sō, nédē á Sōndé mbwembwe pírib, ábē bebaád bēnkē á soŋ. Bēnwālē mekún mé ndim míme bēmbonşénné.

² Béntān nēe aláá áde bēnkōlēnnē nsəl ní soŋ ásyāŋgé á e'dii.

³ Bēnsāl á soŋ-tē, boŋ bēnkētānné ndim míme Yesue áwēd-te.

⁴ Nén dēmbbootéd bó ataged á mewēmtēn. Dóo bad bébe bēbídé táléd, bétyéém bó á nkəg ne mesāŋ míme mékine' áte.

⁵ Ne mbwōg bwāmbwam bēnsōŋ mīd ásē. Héε ábē bad bébe bēlāŋgeé bó bán, “Cheé ékásá boŋ nyéhédé mod awē adé á alongé áťinté e bad ábe bēwédé?”

⁶ Eésaá hén, apuúdé. Nyékamtēn ngáne ánlāā'é nyé, áde ábédé á Galilia,

⁷ áá bétāŋgéné Mwān-a-Moonyoŋ abe á mekáá mé bebel bé mbéb, bēbōmē mó á awōg. Boŋ āpuú á e'pun ábe é'lónténé é'láán.”

⁸ Hē dōo ábē bebaád bēkámťéné ábē e'yale.

⁹ Ade bēhúú á soŋ, bēnkálé bembapεε dyōm ne nhóg ne ábíní bēmpēe mam mésyāāl míme bényíné.

¹⁰ Bebaád ábe bēnkálé bembapεε bé nlomag mímén nkalaŋ, bēbédéε Maria Magdalene, Joanaa, ne Maria, nyaá awe Jemse, nchoo ne bebaád bēmpēe.

¹¹ Boŋ bembapεε bé nlomag bēnwēmtēn bán ene póle edíi ngwel. Bēnkēndúbéé chό.

¹² Hē dōo Petro ápádté ásē, boŋ ányāgté á soŋ. Ade ápédé áwed anwúlén ásē, ánōn soŋ áte. Anyín dásō mbóm chēmpen. Dóo ásúú á ndáb. Mewēmtēn mékógládtáá mó áte tāŋgene dyaŋ áde ábēnlédé.*

Yesue apíídé bad bébe á nzii e Emōs

(Mak 16.12-13)

¹³ Bōōb-pōó, éché epun dēn, bembapεε ábe Yesue bébe bēkágé'áá á dyad áde bēchāgeé bán Emōs. Abíd á Jerusalem āpe á Emōs ábédé etūn dyaŋ máyl saámbé.

¹⁴ Abē bembapεε bēkágé'áá bēkalé mímén mekan mésyāāl míme mékébenléd.

¹⁵ Ade bēkékanlé káōŋ, dōo Yesue mwēn áhyédé bó atán, boŋ áwoŋné bó.

¹⁶ Boŋ pen mīd mēnkēnnédnédťé bó, áchem mó.

¹⁷ Héε Yesue ásedťéé bó aáken, “Póle ehéé nyépagké akal á eke-tē nén?”

Hē dōo bétyéémé ne ngəl esyāál.

¹⁸ Dóo bó mod nhóg awe bēchāgeé bán Klopase, átimtanné mó aáken, “Emōŋ pen-éé edé nken a mod á Jerusalem, áde wēēbīi mekan míme nkébenléd mímén mesú-yε?”

¹⁹ Dóo Yesue ásedťéé bó aáken, “Mekan méhéé mē?” Boŋ bēlāŋgē mó bán, “Mekan míme mébēnlédé tāŋgene Yesue, mod a Nazaret. Ambé nkal é'dāádāŋ awē ahóbé'áá, ábelé-ε ndale é mekan á'sō é' Dyōb ne á'sō é' baányoŋ.

* 24:12 Donje á kálag dé'só déewóó'ε nchoo 12.

20 Abed beprise bémbáá ne belyáged bé dyad bēmbē mós á mekáá mé nkamlēne, ábíded mbakú bán béwúu mós. Dóo bébómmé mós á awōg.

21 Boŋ sēnlyág nlém bán, mós adé ane awē áwōbé bad bé Israel. Néē éhúde nê áte, chii dóo álóntan e'pun é'láán taa nê ábenlede.

22 Amín e nê ámpē, nguse é bebaád áfintē echēd bépéénédé sé menyáké mé póle. Bēnkē á soŋ epōg é mbwēmbwē,

23 boŋ béētānēé ndim ríme Yesue. Bēnhūū ámbíd, bēhōbē bán, ángel épíidé bós á ndóg-te, élāngē bós nēn bán, Yesue adé á alongé.

24 Nguse é bad áfintē echēd énkē á soŋ, bétán chó melemlem nēngáne bebaád bēnhōbpē, boŋ béēnyīnēé mwēn."

25 Dóo Yesue álángeé bós aá, "E'yókél é' bad bós nyédíí. Nyéewámsánné mam mésyāāl ríme bekal bé'dáádəŋ bēhóbé adúbe!

26 Ngómē éhédnádtáá bán, Ane-awē-Béwógté ákud rímén metake mésyāāl, boŋ ákud éche ehúmé."

27 Yesue antógnéd bós mam mésyāāl tēngene eche yāl, ngáne méténlédé á Kálag e Dyōb-te, mbooted ne kálag éche Mosē ne kálag éche bekal bé'dáádəŋ bésyāāl.

28 Ade bépédé benben ne dyad áde békágé'áá, Yesue anlúméd byánán eke élyágé édé mós á'sō.

29 Boŋ bēnkəŋ mós bán, "Hyē édyēé áwēd ngáne bīn é'máá ahín, pónde-'e emaá atóm." Dóo áhídé bós ádyēé áwāb.

30 Ade bóbōo bédyēé ásē á tébele ádyé ndyééd, antéd ewele, ánāméd chó, ásāl chó áte, boŋ ábagé bós.

31 Hē dóo mīd méténlédé bós, boŋ béchemé mós. Dóo ányóó bós á dīd-te.

32 Bēnlāā nhóg ne aníní bán, "Ngómē nlém ríhókgkáá syánē á abum áde ákánlé'áá syánē á nzii, boŋ átēnlād syánē Kálag e Dyōb?"

33 Abwōg-ábwōg dóo bésyāŋgé ásē, boŋ bétīm-me ámbíd á Jerusalem. Dóo bétáné bembapēe dyōm ne nhóg ngáne béládné áte hōm ahóg bósbe bembapēe bēmpēe.

34 Héē bembapēe ábe bétáné á ndáb-te bélāngé bós bán, "Sāngwēé apuúde ne mbáá, apiidé-'e Simōne!"

35 Dóo bós bad bébe bómpē bēhóbé dyam áde ábénlédé bós á nzii, bēhōbē-'e ngáne béchémé mós áde ásaléé ewele áte.

Yesue apiidé abē bembapēe

(Mat 28.16-20; Mak 16.14-18; Jōn 20.19-23; Mbēl 1.6-8)

36 A pónde eche békaleé nē, dóo Yesue mwēn ábíde bós áfintē, boŋ álenté bós aá, "Nsaŋ ríbbē ne nyé!"†

37 Mbwóg ménkōb bós bwāmbwam, bēwēmtān bán, bényíné nwú.

38 Dóo álángeé bós aá, "Cheé nyétagéé áte? Cheé nyényágéé á nlém-tē.

39 Nyénən me mekáá nyénən-ne me mekuu, boŋ nyébīi bán mmēn-éé ndé. Nyékiten me yāl, nyényīn nzé nwú ríwóó nson ne e'hid ngáne nyényīnēé nwóó nēn."

40 Ade ámáá ahób nē, anlúméd bós ríme mekáá ne mekuu.‡

41 Ade belyágé bényágéé nē ne menyīnge mésyāāl, békōglad-táa á nlém-tē, dóo ásedtēé bós aáken, "Nyēwóó chōm éche bédyágkē hén-ε?"

42 Dóo bēbágé mós esōŋ é súu echē bétúmé.

43 Boŋ ákobé', ádyāg-ke chó áwab e'só-te.

† 24:36 Donje á kálag dé'só déewóó'ε: álenté bós ad, "Nsaŋ ríbbē ne nyé!" ‡ 24:40 Donje á kálag dé'só déewóó'ε nchoo 40.

⁴⁴ Hée álāngéé bó aá, “Mmën mam móó rílangé’áá nyé áde rílyógé ndé ne nyé mée, dyam téé átəngéné alón ngáne éténléde áyāl echēm á kálag é mbéndé éche Mosée ne á kálag é bekal bé’daádaŋ, ne á Kálag e Ngəse-tê.”

⁴⁵ Dóó ánédte bó debyéé áte, ábel nén bésəŋten Kálag e Dyöb,

⁴⁶ boŋ álāngé-’ε bó aá, “Bétélé á Kálag e Dyöb nén bán, Ane-awě-Béwógté átəngéné metake akud, awé, boŋ e’pun ábe é’lonténé é’láán, ápuu.

⁴⁷ Bétélé bán, bad békalé meloŋ mé bad mésyāāl nén bán, bad bétéde abel dé mbéb á dīn á Yesu, ábel boŋ Dyöb álagsen bó mbéb. Bébootéd bad nímé nkalaŋ akale á Jerusalem.

⁴⁸ Nyé-’aá, nyédé bad ábe bényinné nímén mekan dīd.

⁴⁹ Mmën mēlōmē nyé chōm éche Titée anhōbpē aá móōlōmē nyé. Boŋ nyélyəg nyédyεε á dyad-tê káəŋ né nyékudé ene ngíne echě ebíde ámīn.”

Yesuε apūmmé

(Mak 16.19-20; Mbel 1.9-11)

⁵⁰ Dóó Yesuε ásyəŋnéde bó á dyad-tê, ápεεné bó benben ne dyad á Betani. Hée ányéné mekáá ámīn, boŋ ánámte bó.

⁵¹ Ade ánamtéé bó nē, dóó áchēnnē bó, boŋ apummé ádyöb. §

⁵² Abē bembapεε bémbwōgē mó mebóbōŋ. Bēntīm ámbīd á Jerusalem ne menyīŋge mésyāāl.

⁵³ Békäg-ke á Ndáb-e-Dyöb pónde ésyāāl, ákémed Dyöb.

§ 24:51 Donje á kálag dé’só déewóo’é boŋ apummé ádyöb.

Nkalanɲ mí bwâm míme Yesuɛ ngáne

Jɔnɛ

átélé

Ndibned ní kálag

Nkalanɲ mí bwâm ngáne Jɔnɛ átélé nílúmte aá Yesuɛ adíi Eyale é Dyöb éche édé á ngíndé ne á ngíndé. Echê Eyale êntim moonyonɲ édyɛɛ-’ε átíntê e bad. Mmɛn nkalanɲ, Jɔnɛ atelé mɔ́ âbel bad ábe béléa mɔ́ bédúbe nɛn bán Yesuɛ, Mwän a Dyöb mɔ́ adé Nsoode awě Dyöb dénhãbpē aá mɔ́lōm. Anlúméd-te aá nzé bad bédúbpé mɔ́ béküd e’soósonɲ.

A kálag tē wén á mbooted, Jɔnɛ alúmte ngáne baahóg béndübēē Yesuɛ békwentén-ne áhíd mɔ́, álúmtē-’ε ngáne bémpe-’ε bétãngánnáá mɔ́, békwentene-’ε mɔ́ adúbe. E’pɛd 13-17 é’hóbe tãngene abé áde Yesuɛ ne ábē bembapɛɛ bémbeē pónde esyáál kásonɲ ne epun éche békóbé mɔ́ ne mam míme ánláá’ é bɔ́ ene pónde esyáál. Jɔnɛ ahóbé ámpē aá nzé mod adúbpé Krístəə äküd alongé áde déemaá’.

Nkabtéd ní kálag

Ndibned 1.1-18

Jɔnɛ, Ndusɛɛ ne bembapɛɛ bé’sō ábe Yesuɛ 1.19-51

Nsón míme Yesuɛ 2.1-12.50

E’pun bé asóg ábe Yesuɛ á Jerusalem ne benben ne Jerusalem 13.1-19.42

Mpuu míme Sãngwéé ne alúmed áde álúmtáá bad yãl 20.1-31

Nsógten: Yesuɛ alúmté yãl ámpē á Galilia 21.1-25

Eyale êntim moonyonɲ

¹ A mbooted, byánán Dyöb déhãg nkõnsé Eyale êmmad abé. Eyale émbē ne Dyöb. Echê Eyale ébédéé Dyöb.

² Kásonɲe á mbooted Eyale émbē hõm ahóg ne Dyöb.

³ Dyöb dẽmbenléd échê Eyale áhãg bwẽm é’syáál. Chõm ké ehóg éesaá éche Dyöb dénhãgké ésebé ne Eyale.

⁴ Alongé ásyáál dénhũũ ne Eyale, áde alongé dɔ́-’aá ápíínédé baányonɲ e’nyínen bé ekíde.

⁵ Abê e’nyínen bé ekíde é’pɛne’ á ehíntén-tê, ehíntén éehēlēē bɔ́ abóded.*

⁶ Mod nhóg ampě awě Dyöb dénlōmmē. Dín démbē mɔ́ bán Jɔnɛ.

⁷ Jɔnɛ ampě áláa bad tãngene ábē e’nyínen bé ekíde, ábel nɛn bad bésyáál bėwóg, bédúbe-’ε.

⁸ Saké mwẽn abédé ábē e’nyínen bé ekíde. Ampě ábíd mbónɲ tãngene ábē e’nyínen bé ekíde.

⁹ Eyale chɔ́ó ébédé e’nyínen bé ekíde é’ mbále ábe é’nyínte’ moonyonɲ asyáál ekíde. Mɔ́-’aá apagé’áá á nkõnsé-te.

¹⁰ Abédé á nkõnsé-te, bonɲ kénéé Dyöb dénhãgké nkõnsé ne mɔ́, nkõnsé ménkẽchemmé mɔ́.

¹¹ Ampě áwē dyad bonɲ ábē bad bẽnkẽnkobpé mɔ́.

¹² Ké nê, ambě donge á bad kunze ábē bán bé Dyöb. Abé bad bėbédéé bad ábe bẽnkob mɔ́ ne adúbe áde béndübēē mɔ́.

¹³ Bėesaá bán bé Dyöb nyaa echê moonyonɲ áchyáa’ é mwän. Bẽnkẽmbáá bán bé Dyöb byánán moonyonɲ mɔ́ achyáá bɔ́. Dyöb dẽn dɔ́ó adé awáb Titéé.

* 1:5 Ehíntén-ne éehēlēē bɔ́ abóded káa ehíntén ẽnkẽchemmé bɔ́.

¹⁴ Eyale êntim moonyon, édyēē átintê echêd. Anlón ne nsimé, anlúméd-te syánē ngáne mbáale e Dyöb ékóó abé. Dennyín échē ehúmé, ehúmé éche sáá ábágé mó née nímē mpəm mí mwän.

¹⁵ Jone anhób mam áyāl echê, anhóád aá, “Anén mod móó nílángé’áá nyé meé, ‘Mod ahúé’ ámbíd echêm awë atómé me, áyāle bédêchyáá me, né adé ámín.’ ”

¹⁶ Alón áde álóné ne nsimé ábélé syáā moosyāál dekudé nnam ámbíd e nnam.

¹⁷ Wéε Mosεε dóó Dyöb dêmpoódté mbéndé. Bon nsimé ne mbáale béhúú ne Yesu Krístə.

¹⁸ Modmod eényinē Dyöb mbéd, éetóméé nímē mpəm mí mwän awë adé Dyöb abé-’ε mó á akéb. Mwēmpen mó akidényin mó. Mó abelé bon Titê Dyöbe abyéen.

*Jone, Ndusenε ahóbé ad
móosaá Ane-awë-Béwógté*

(Mat 3.1-12; Mak 1.1-8; Luk 3.1-18)

¹⁹ Baámháá bé Israel bé dyad á Jerusalem bénlöm beprise ne bad bémpē bé túmbé e Levi wéε Jone, bán béke béseded mó bánken nzé-módé ádíí.

²⁰ Enkēmbanjé ahób, bon ampanléd bó áte aá, “Saké me ndé Ane-awë-Béwógté.”

²¹ Héε bésedtéé mó bánken, “Nzé-ō edíí? Wε-εé edé Elaijaa?” Ankwentén aá, “Aáy, meésaá mó.” Bēnsedéd mó ámpē bánken, “Wε-εé edé nkal é’dəádəŋ awe bésinéé-yε?” Antimtén bó aá, “Aáy.”

²² Káəŋne á asog dóó bésedtéé mó bánken, “Nzé-ō edíí? Láá sé ábel sétim ámbíd áláa bad ábe bélómé sé. Nzé-módé wεwε ehóbé wεé módé?”

²³ Héε Jone átimtanné bó ne e’yale ábe nkal é’dəádəŋ Yesayaa ánhōbpē aá, “Méε ndé ehób éche mod awë ahəŋte’ á ehyánge aá, ‘Nyétii nzii eche Sáŋgwéé.’ ”

²⁴ Bəəb-pəə Befarisia bóó bénlöm ábê bad ábe bémpē wéε Jone.

²⁵ Bēnsedéd mó ámpē bánken, “Nzé weésĕ Ane-awë-Béwógté, weésĕ-’ε Elaijaa káa Nkal é’dəádəŋ awe bésinéé, cheé-ō édušanné bad?”

²⁶ Héε Jone átimtanné bó aá, “Ndusan ne mendíb, bon mod adé átintê echên awë nyéebíí’é.

²⁷ Mó adé ane awë əpē ámbíd echêm. Meékwognedéé áhune ké nímē nkəəd mé metámbé.”

²⁸ Mmén mésyāāl mēmbenléd á dyad á Betani á múde mé edíb é Jodan nímíníí wéε Jone ádúsánnáá bad.

Yesue, Mwän-a-Ndyəŋ mí mbód a Dyöb

²⁹ Néε bĭn é’sánge, Jone anyín née Yesue áhúé’é níníí. Héε áhóbéé aá, “Nyénəne’, Mwän-a-Ndyəŋ mí mbód a Dyöb mōne. Mó ahúde’ mbéb mí bad bé nkōŋsé.

³⁰ Anén mod móó nílángé’áá nyé áde ménhōbpē meé ‘Mod əpē ámbíd echêm awë atómé me, áyāle bédêchyáá me, né adé ámín.’

³¹ Ké mmén menkēmbíí’é mó, bon mempē nđusan bad ne mendíb ábel bad bé Israel bébíí mó.”

³² Héε Jone ábídeé mbón nén aá, “Menyín nēŋgáne Edəádəŋ é Dyöb ébíde ádyöb née élāā, ésud mó á nló mín, ébé-’ε ne mó.

³³ Ké nē, menkēnsóŋtēnné meé mó ne. Bon Dyöb áde dénlöm me aá nđusan bad ne mendíb dēmmād me aláa aá, ‘Mod awë wényinnē née edəádəŋ é Dyöb ésúde á nló mín, bon étyéém áhed, mósđusén bad ne Edəádəŋ éche Esáá.’

³⁴ Nnyíné nímén mekan mésyāāl, mbíde-’ε mbón nén meé mó adé Mwän a Dyöb.”

Bembapεε bé'sō ábe Yesue

³⁵ Née b̄in é'sángé ámpē, Jone ambé áhed ne ábē bembapεε bébe.

³⁶ Annyín née Yesue átómé. Adě ányiné mós, anhób aá, “Nyénone”, Mwän-a-Ndyon̄ mí mbód a Dyöb mô ne.”

³⁷ Adě ábē bembapεε bébe béwógé nê, bêmbootéd Yesue ahíd.

³⁸ Ade Yesue ánóné ámbíd bon̄ anyín nêngáne behídeé mós ansedéd bó aáken, “Cheé nyéhedeé?” Bêntimtén mós bán, “Rabai” (awě adé bán meléede) “Hée édye'é?”

³⁹ Anláá bó aá, “Nyéhyag, nyényín wée rídye'é.” Né-óó, bēnkě anyín wée ádye'é. Ade bépédé áhed ébedé dyam ngón̄ éniin é ngukél. Bēndye'ε áhed káón̄ b̄in é'híntén bó.

⁴⁰ Atínté e ábē bembapεε bébe ábe bēnwōg dyam áde Jone ánhōbpē bon̄ behíd-te Yesue, nhóg abédé d̄in bán Andreyā. Andreyā abédée Simōn Petro mwānyan̄.

⁴¹ Né-óó dyam dé'sō, ankě mwānyan̄ Simōne ahed. Anyiné-'aá mós bon̄ álāngē mós aá, “Sēnyiné Ane-awě-Béwógté” (néde Krístəə).

⁴² Dóó Andreyā ápééné Simōne wée Yesue. Yesue anóné-'aá Simōne chóón̄, bon̄ áhōbē aá, “Edii Simōne, mwän awě Jone. Béchəgé we bəəb bán Sepase.” (Adén d̄in ádii melemlen née Petro, nê adé ndim e aláá.)

Yesue achénlé Filibe bó Nataniēl

⁴³ Née b̄in é'sángé, Yesue ammad̄ aá mókag á mbwóg e Galilia. Dóó ákíí Filibe atán bon̄ álāngē mós aá, “Hídé me.”

⁴⁴ Filibe abédée mod a dyad á Betsaida, melemlen mé dyad áde Andreyā bó Petro bēmbídtē.

⁴⁵ Filibe anyín Nataniēle. Hée álāngéé mós nén aá, “Sēnyiné ane mod awě Mosεε ántenlé mam áyāl eché áwe mbéndé-te. Mós káón̄ne bekal-bé-e' d̄əódəon̄ bēntenlé mam á yāl. Adii Yesue mod a dyad á Nazaret, mwän awě Josebe.”

⁴⁶ Hée Nataniēle ásedteé mós aáken, “Dyam á bwám áhéé áhele ábíd á Nazaret?” Dóó Filibe álāngéé mós aá, “Hyě ényín.”

⁴⁷ Ade Yesue ányiné Nataniēle ahúe', dóó áhóbéé áyāl eché aá, “Nyénone, mwän a Israel nén sóm-sóm, awě mbeltéd rítyéémé!”

⁴⁸ Hée Nataniēle ásedteé mós aáken, “Chán émwédé me abii?” Hée Yesue ákwentanné aá, “Filibe adéhób aá móchəge we, nnyiné we á alín á ngəl sé.”

⁴⁹ Hée Nataniēle áhóbéé aá, “A meléed, edii Mwän a Dyöb. We-εé edé k̄n̄ e bad bé Israel.”

⁵⁰ Yesue antimtén mós aá, “Edúbpé áyāle rílangé we meé nnyiné we á alín á ngəl sé. Wéenyín mam rímé métómé nén.”

⁵¹ Hée ábádéé aá, “Ne mbále, nlānge nyé nén meé, nyēenyín née dyöb ánédnéde nyēnyín-ne née ángel é Dyöb échəgkéé ésudé-'ε Mwän-a-Moonyon̄ ám̄in.”

2*E'wóngé á dyad á Kana*

¹ Ámbíd e e'pun é'be, e'wóngé bēmbē á dyad á Kana á mbwóg e Galilia. Yesue nyaá ambé áhed.

² Bēnlēbē Yesue ne ábē bembapεε bómpē á e'wóngé wē.

³ M̄im mēmmaá áte. Hē dóó Yesue nyaá ápédé áwē bon̄ álāngē mós aá, “M̄im mémáá bó.”

⁴ Hée Yesue álāngéé mós aá, “A-nyan̄, weetāngeneé me dyam áde rítāngéné abel aláá. Echem pónde eépédéé.”

⁵ Hée nyaá ákíí bembəlede bé ngande bē aláá aá, “Nyébel kéchéé éche álāngé nyé aá nyébel.”

⁶ Bɔɔb-pɔɔ, mbeé é meláá ébedé benben ne áhed. Echê ndín é mbeé chɔɔ bad bé Israel bébenládtáá áhé mendíb áte á nwobe ní yəl á pónde e mekáne echáb. Ké ehéé etedé'áá dyam mbwókél e líta e mendíb.

⁷ Héé Yesue álángeé bembaledé bé ngande bê aá, “Nyélóned mbeé ché ne mendíb.” Né-ɔɔ, bénlóned échê mbeé hɔɔd ne mendíb. ⁸ Dɔɔ álángeé bó aá, “Nyékɔbe-ɔɔ mendíb bɔɔb, nyékεen wée mod awě alyágte' mekan mé ncháged.” Né-ɔɔ, bemběl áned.

⁹ Ade ane mod áwógléné nímé mendíb nímé mémáá mím atim, enkembíí'é wée mébidé, (bon bembaledé ábe bēnkě nímé mendíb akɔbe bēmbii). Dɔɔ áchágé mod awě akude sómbé,

¹⁰ bon álángeé mɔ aá, “Mod téé abelé asébe achágtén bad mím nímé mébóó. Bad bémaa-'áa mɔ amwé bwámbwam, bon ábagé bó nímé mééboo. Bon wε, etimé ekɔngé nímé mébóó kóáɔ ne bɔɔb.”

¹¹ Mmén menyáké nímé Yesue ábéle á Kana á mbwóg e Galilia mɔɔ mébedé ábē e'chemléd é'sō. Hē dɔ-'áá álúmté échē ehúmé, ábē bembapεε bēnsūm-me nímab nlém áwē.

¹² Néé nén ámáá atóm, Yesue ansyógé á dyad á Kapenahum nchoo ne nyaá, baányan ne ábē bembapεε. Bēndyεé-'ε áwed nguse é e'pun.

Yesue anané bekáb bé nyongé á Ndáb-e-Dyöb

(Mat 21.12-13; Mak 11.15-17; Luk 19.45-46)

¹³ Adě pónde e Ngande e Nnyíme-ámín ékwógé bad bé Israel apε, Yesue ankě á dyad á Jerusalem.

¹⁴ Adě ápédé áwed, ankě á Ndáb-e-Dyöb. Antán néé bad békábéé dyɔn. Bésómé-'áá nyag, mbód ne mbəngé, bepele-bé-mɔné-'ε bépēnlé mɔné.

¹⁵ Héé átédé nkɔɔd, ámané etanjú ánanné bó nchoo ne échab mbód ne nyag á Ndáb-e-Dyöb wē. Ampántéd mɔné nímé bad bépēnlé'áá áte, ákūnē-'ε betébele ábe bépēnlé'áá nímé mɔné ámín mekuu ámín.

¹⁶ Anláá bad ábe bésómé'áá mbəngé aá, “Nyébíden beləə bēn á ebwóg. Nyéētímté ndáb echě echem Sáj ndáb e dyɔn.”

¹⁷ Adě ábē bembapεε bényíné nē, dɔɔ békámténé epεd é kálag e Dyöb éche éhóbe nén bán “A-Sáj, kán echě níwóó áyāle echoɔ ndáb ewūū mε.”

¹⁸ Héé benkamlene bé bad bé Israel bétímé ámbíd, bésēdté mɔ bánken, “E'chemléd é'héé éhεle elúmed sé ábel sébii bán ewóó kunze ábel enén ndín e dyam?”

¹⁹ Yesue antímtén bó aá, “Nyépân enén Ndáb-e-Dyöb, mēlōɔn chɔ ámpē áyāle e'pun é'láán.”

²⁰ Dɔɔ ábē bad béhóbeé bánken, “Enén ndáb echě bétédé móom mé mwě méniin ne mwě ntóób chɔɔ éhóbeé wée móɔlōɔn áyāle e'pun é'láán-ε?”

²¹ Bon ndáb echě Yesue áhóbé'áá ebédéé dásō eche yəl.

²² Né-ɔɔ ámbíd eche Yesue áwédé bon Dyöb ápūūd mɔ, dɔɔ ábē bembapεε békámténé dyam adě ánlāá'é bó. Bēndūbē mam nímé méténlédé á kálag e Dyöb, bédúbé-'ε e'yale ábe Yesue ánhōbpē.

Yesue abii mod asyáál nlém áte

²³ A pónde e Ngande e Nnyíme-ámín, áde Yesue ámbēē á dyad á Jerusalem, bad híin bēndūbē mɔ ngáne bényínnē menyáké nímé ábeléé.

²⁴ Bon ké nē, Yesue enkēsummé nlém áwāb, áyāle ambíí moosyáál áte.

²⁵ Modmod enkētəngénné mɔ dyam aláa tənεene mod ampée áyāle mwēn ammād moonyon asyáál nlém abii áte.

3

Yesue bó Nikodemuse

1 Mod nhóg abédé bán Nikodemuse. Abédée nhóg awě alyágté'áá bad bé Israel abé-'ε epepé é bad bé Farisia.

2 Mbwe nhóg ampě wée Yesue nkuu, álāngē mó aá, “A-meléed, sêchemé nén bán, edii meléede awě Dyöb álómé. Ayāle nzé Dyöb déesě ne mod, eéhēlēē-se ábelé mekan mé menyáké nímě ébeleé.”

3 Yesue ankwentén mó aá, “Ne mbále, modmod eéhēlēē-se asól á nkamlen ní Dyöb ésebán achyáádté ámpē.”

4 Nikodemuse-'ε ansedéd mó aáken, “Chán mod awě amaá akwog áhele se achyáád ekóólé-ekóólé? Eesaá mbále nén bán eéhēlēē-se asól á abum ádē nyaá ngen éché élónténé ébe ábel béchyáa mó ámpē-ye?”

5 Dóo Yesue átímtanné mó aá, “Ne mbále, nlānge we meé, nzé béēchyáa mod ne mendíb ne Edəádəη eéhēlēē-se asól á nkamlen ní Dyöb.

6 Ane awě achyáádté ne moonyon a ekob, adíi moonyon. Awě mó-'ε achyáádté ne Edəádəη é Dyöb adíi Edəádəη.

7 Weebág menyáké ngáne níhóbé meé 'Mod atāngéné achyáád ekóólé.'

8 Nzé epub éhóbé bán chó étóme', ped echě édás ake chó ékagké. Ewóge' ntogag níme ébeleé bon weebí'ε wée ébídeé ké'ε wée ékagké. Melemlem nê dóo edíi ne mod ké ahée awě achyáádté ne Edəádəη é Dyöb.”

9 Héε Nikodemuse ásedtéé mó aáken, “Chán nén áheleεe ábenled?”

10 Yesue ankwentén mó aá, “Née edíi meléede ambáá a bad bé Israel weéhēlē' nímén mekan asōηten-ne?”

11 Ne mbále, nlānge we meé, dyam áde sébíi dóo séhóbéé. Sébíde-'ε mbón ne dyam ádē sényíné. Bon nyé modmod nyéēkwenteneé chōm éche séhóbéé adúbe.

12 Née nlāngéé nyé mekan níme médé mekan mé nkōnsé, nyéedúbpe, chán-nō nyémwée adúbe nzé nlāngé nyé mekan nímě médé mekan me nkon mí mín?

13 Modmod eékí'ε á nkon mí mín étóméé Mwān-a-Moonyon awě abíde áwed bon ápe á nkōnsé.”

14 Ngáne Mosεε ámboméé nyə á akon* bon atíi dóo ámín á ehyānge, melemlem nê dóo bétí'ε Mwān-a-Moonyon.

15 Nén débenléd ábel bon kénzée awě adúbpé mó ákud alongé áde déemaá'.

16 Dyöb átómténé bad bé nkōnsé adəη. Né-óo anlóm nímē mpəm ní Mwān ábel kénzée awě adúbpé mó eewág bon ákud alongé áde déemaá'.

17 Dyöb dénkēnlómmé awe Mwān á nkōnsé ákáad bad. Alongé á bad dóo ánlómmē mó áson.

18 Kénzée awě adúbpé mó eékwaá nkáásé, bon kénzée awě eedúbpe mó, amaá nkáásé akwe ayāle eedúbpeé mpəm ní Mwān ní Dyöb.

19 Nén dóo mbakú e Dyöb edíi: E'nyínen bé ekíde é'pédé á nkōnsé, bon baányon bédás ehíntén tómaa e'nyínen bé ekíde ayāle nímāb mbeltéd níde mbéb.

20 Kénzée awě abele mbéb, akáó ábē e'nyínen bé ekíde, éepaá-'áá á e'nyínen bé ekíde-tē ábán nén nímē mbeltéd mé mbéb méebíde áwed.

21 Bon kénzée awě abele mam mé mbále, abíde' á e'nyínen bé ekíde ábel nén bad bényín bán kéchéé éché ábeleé awógne Dyöb.

Mbón echě Jone tāngene Yesue

22 Ambíd e nê, Yesue ne ábē bembapeε bēnkě á mbwóg e Judeya. Bóbōo bēndyéé áwed nguse é e'pun, ádusán-ne bad.

23 Jone mómpē adusánáá bad á dyad á Anon benben ne á dyad á Salim ayāle mendíb mémbe áhed bwāmbwam. Bad békágé'áá áwē, ádusán-ne bó.

* **3:14** Nyə eche Mosεε ámboméé ebédée nyə echě ámbenlé. Nê dóo Dyöb démbenlé áhood bad ábe nyə énlédte á ehyānge. Nzé bad bēnnōn ene nyə, bédyéε bwām. Nəm 21.9.

²⁴ Nén ábédé byánán béhē Jone á mbwōg.

²⁵ Bōob-pōó, donge dé bembapere ábe Jone bépéntánnáá ne mod a Israel tñgene nwobe ní yǎl.

²⁶ Dóo bépédé wée Jone bonj bēlāngē mō bán, “A-meléed, ekantan mod awě nyúmō nyébédé á pēd e edib é Jodan eníníí? Mod awě éhóbé’áá mam á yǎl echē. Nōné’! Mōo adusan bad níníí! Bad híin békagke áwē.”

²⁷ Jone ankwentén aá, “Modmod eéhēlēē-se ákud chōm, ésebán Dyōb ábágé mō chō.

²⁸ Nyébēn nyédé me mbōn nén bán menhób mēé saké me ndé Ane-awě-Béwógté. Dyōb dénlōm me á’sō ábonšen bad áyāle epe éche Ane-awě-Béwógté.

²⁹ Mod awě akude sómbé mōo awóó sómbé. Bonj nsón-a-echoj a mod awě akude sómbé, awě atyéeme mō á nkəg áwōglān mō, abág menyinje nzé awóge mō ehób. Né-ōó, nén dóo ákás bonj nlón ne menyinje.

³⁰ Edúbé échē étāngéné nēe échágkēé, échēm-me ésude’.”

Ane awě abidé ádyōb atómé moosyáál

³¹ Ane awě abidé ádyōb atómé moosyáál. Ane awě mō-’e achyáádté á nkōjsé adii mod a nkōjsé, áhōbē-’e mam mé nkōjsé, bonj ane awě abidé ádyōb adé ámīn e moosyáál.

³² Chōm éche ányíné ne éche áwóge chōo áhóbéé bonj ké nē, modmod eedúbpéé mō.

³³ Bonj kenzéé awě akobé chōm échē áhóbé, né akwenténé ne nlém nisyāál aá Dyōb adé mbále.

³⁴ Póle e Dyōb chōo mod awě Dyōb álómé áhóbéé áyāle Dyōb déenōnéé ámbid nzé abage’ mod échē Edāádəj.

³⁵ Titée adāó awe Mwān, abagé-’e mekan mésyāál áwē mekáá.

³⁶ Kenzéé awě asumé nlém wée ane Mwān, akudé alongé áde déemaá’. Bonj kenzéé awě eébēlē’ ngáne áhóbé éekudté alongé áde déemaá’, ábē akud nkógsen ní Dyōb.

4

Yesue ne mmwaád a Samaria

¹ Yesue ambíí aá Befarisia béwóge nén bán mókude ekud é bembapere tómaa ne Jone, módusan-ne bó.

² (Kénéé Yesue mwēn éedusannaá bad, ábē bembapere bóo bédúsánnáá bad).

³ Awóg áde Befarisia bēnwōgkē nē dēmbēl Yesue anhidé á mbwóg e Judeya átīm ámbid á mbwóg e Galilia.

⁴ Byánán āpe á Galilia antāngén nēe ápóó a mbwóg e Samaria.

⁵ A mbwóg e Samaria wē ampě á dyad áde béchəgeé bán Sika. Adén dyad démbē benben ne ndōob echē Jakəbe ámbéé mwān Josəbe se e’bōód.

⁶ Ayāle ene ndōob echóg éche bēlímé éche bēbwéle’áá mendíb áte émbē áhed. Echén echóg é mendíb ébédéé éche Jakəbe. Ngáne eke énkōmēdtē Yesue andyēé á nkəg mé échē echóg é mendíb. Nén ábédé dyam-éé áde kəd.

⁷ Héé mmwaád a Samaria nhóg áhyédé mendíb abwēl. Yesue anláá mō aá, “Hé me mwā mendíb mé amwé.” ⁸ Enén pónde Yesue ábē bembapere bēnkě á dyad-tē áchan ndyééd.

⁹ Héé ane mmwaád átímtanné mō aá “Ebé mod a Israel, me-’e mbé mmwaád a Samaria, échōmē me mendíb-e?” (áyāle bad bé Israel ne bad bé Samaria béechemtannaá.)

¹⁰ Héé Yesue ákwentanné mō aá, “Nzé wembíí mende mé Dyōb, ebíí-’e mod awě ahedne wē mendíb, né ehēdné me mendíb. Né mbagé-’e wē mendíb níme mébage alongé.”

11 Ane mmwaád ankwentén mó aá, “A-Sán, ké chõm éche bébwenléé mendíb weewóó’é, echóg é mendíb-pe échábé ásē, hée wétēdtē nímē mendíb nímē mébage alongé.

12 Echēd sáá ambáá Jakabe mōnlyágnéd sé échén echóg é mendíb. Mwēn, ábē bán ne ábē e’lém é’syāāl, hén-éé bémwágé’áá mendíb. Nédē ehóbe bōob wēé mótōmē Jakabe-ye.”

13 Yesue ankwentén aá, “Kénzēé awē amwédé nímén mendíb, píd ēbē ekób mó.

14 Bon kénzēé awē āmwē mendíb níme mébéé mó píd éekóbpé mó mbéd. Mendíb níme mébéé mó, mébē mó áte nēe n’yélé níme méélēnē’. Mmē mendíb mébē mó alongé áde déemaá’.”

15 Hée ane mmwaád álângeé mó aá, “A-Sán, beé me nímē mendíb ábel nén píd eekóbé mémpē, meépāg-ke hén ábwel mendíb ámpē.”

16 Dóo Yesue álângeé mó aá, “Kāg, éke échag awon nchóm, bon étim ámbid hén.”

17 Ane mmwaád antimtén Yesue aá, “Mewóó’é nchóm.”

18 Dóo Yesue áhóbéé aá, “Ekalé mbále wēé móowóó’é nchóm. Ayāle ekéwōn bechóm bétáan, ké ane mod-te awē nyúmō nyédé bōob eésáá awon nchóm. Dyam áde éhóbé áde mbále.”

19 Awóg áde ane mmwaád áwógé nē dóo álângeé Yesue aá, “A-Sán, nnyíne nén méé edii nkal é’dáádān.

20 A mbōod-mín hén dóo ábēd besáá bébágé’áá Dyōb edúbé, bon nyé bad bé Israel nyéhóbe bán á Jerusalem dóo bétāngéné Dyōb edúbé abe.”

21 Hée Yesue álângeé mó aá, “A-mmwaád nén, sóntén chõm éche rílángeé we. Póndé ehúé’ echē nyéebaá Titée edúbé á mbōod-mín hén ké’ε á Jerusalem.

22 Nyé bad bé Samaria nyébage chõm éche nyéebii’é edúbé. Bon sé bad bé Israel sébage mó edúbé ngáne sébii mó áyāle nén e’soóson é’húú dásō ne bad bé Israel.

23 Bon póndé ehúé’, emaa’-ε ne ape, echē bad ábe bébage Titée edúbé ne nlém nhóg bébéé mó échē edúbé á Edáádān ne á mbále-tē. Echē ndín é bad chōo Titée áhedéé aá bébage mó edúbé.

24 Dyōb ádii Edáádān, bad-te ábe bébage mó edúbé bétāngéné mó chó abe á Edáádān ne á mbále-tē.”

25 Hée ane mmwaád álângeé Yesue aá, “Mbii méé Ane-awē-Béwógté āpē. Póndé echē ápéé, ātānlēd sé mekan mésyāāl áte.”

26 Hée Yesue álângeé mó aá, “Me awē sóo dekale’ me-éé ndé mó.”

27 Ene póndé chēn dóo ábē bembapee bépédé. Yāl enkóm bó áte ānyín nēe ákanléé mmwaád. Bon bó modmod eésedtéé mó aáken, “Cheé éhedéé?” Ké’ε “Cheé nyé ane mmwaád nyékaléé?”

28 Ane mmwaád antédé apom dé mendíb, átim ámbid á dyad-tē, áke aláá bad aá,

29 “Nyéhyag, nyényín mod awē álángeé me mam mésyāāl níme ríkembenlé. Nyé bán, saké Ane-awē-Béwógté awē bésinēé nén-ε?”

30 Dóo ábē bad behídté á dyad-tē áke dé atán Yesue.

31 Ene póndé, bembapee ábe Yesue bécháá’áá mó bán, “A-meléed dyé ndyééd.”

32 Bon Yesue ankwentén bó aá, “Nwóo ndyééd e adyé echē nyéebii’é.”

33 Hée ábē bembapee bésedtéé nhóg ne anínii bánken, “mod múmó apiínédé mó ndyééd-ε?”

34 Dóo Yesue álângeé bó aá, “Echem ndyééd edii ábel nsón níme mod awē alómé me, áhóbé aá mbel, ámad-te mó.

³⁵ Ngómē nyéyǝgké ahób bán ámbíd e ngan éniin, né pónké e mbote epedé? Nyénǝne', nlánge nyé nén mée nyékéled díd áte, nyényín ngáne mbote é máá mboṣén abé, ápád á nzag-té.

³⁶ Ké bɔɔb mod awě apáde adé míme nsábe akud, alade mbote é alongé áde déemaá', ábel nén mod awě awéne bó mod awě apáde bó moosyǝál bébê menyinge.

³⁷ Né-ɔ́ ngan echě békaleé nén bán, 'mod nhóg awéneé, aníní-'ε ahúd edé mbále.'

³⁸ Mε-εé nlómé nyé mbote áke dé apád éche nyéewénéé. Bad bémpée bébélé nsón, nyé-'ε nyétombwan bó nsón."

Bad bé Samaria híin bédúbé

³⁹ Bad bé Samaria híin ábe bémbíid adé dyad béndúbé Yesue áyǝle mam míme ane mmwaád anlāá' é bó. Ane mmwaád anlāá bó aá, "Alánge me mekan mésyǝál míme nkémbenlé."

⁴⁰ Né-ɔ́, áde bad bé Samaria bépédé áwē, bénchān mó bán ádyεε áwāb dyad. Né-ɔ́, andyεé áwed e'pun é'be.

⁴¹ Bad híin bémpée béndúbé mó áyǝle áde ayáge.

⁴² Bénlāá ane mmwaád bán, "Saké dyam áde élāngé sé dēmpεn dɔ́ akáá bon sédúbé Yesue, bon sébēn sēwógné etúu, sēbíí-'ε bán mwēn-εé akōhté Nsoode a nkōṣe abé."

Yesue achōhté mwǝn a mod ambáá a ngómenaa

⁴³ Ambíd e e'pun é'be Yesue anhidé á mbwóg e Samaria, áke á mbwog e Galilia.

⁴⁴ Yesue mwēn anhób aá, nkal é'dǝádǝn eewóó' é edúbé áwē dyad.

⁴⁵ Ade apédé á mbwóg e Galilia, bad bēnkob mó. Bēnkob mó áyǝle bémbe á Ngande e Nnyíme ámín á Jerusalem, bényín-ne mam mésyǝál míme ámbenlé.

⁴⁶ Héε Yesue átimé ámbíd á Kana, wéε ántimédté mendíb mím. Ahed-te dɔ́ mod ambáá a ngómenaa ábédé awě mwǝn akónlé'áá á dyad á Kapenahum.

⁴⁷ Ade ane mod áwógé bán Yesue ábíde á mbwóg e Judeya apedé á mbwóg e Galilia, ampě áwē, acháṅ mó aá áhood mwǝn, awě ambé benben ne kwééd.

⁴⁸ Yesue anlāá mó aá, "Nyé modmod nyéedúbépéé káṅ né nyényíné e'chemléd ne menyáké."

⁴⁹ Ane mod ambáá a ngómenaa anlāá mó aá, "A-Sáṅ, hyǝg, dékag kwééd edé ehób bán chó ekóbe awem mwǝn."

⁵⁰ Yesue antimtén mó aá, "Kǝg, awon mwǝn ábē á alongé." Ane mod andúbé e'yale ábe Yesue, ákē-'ε.

⁵¹ Ade ane mod ádíí adé á nzii e esú dɔ́ ábē bembǝledé bébómné mó, bon bélāngé mó bán, "awon mwǝn ábē á alongé."

⁵² Dɔ́ ásédté bó pónké echě ane mwǝn ámbootédté bwám abé. Bénlāá mó bán, "Ahéb dēntédé mó chǝn á ngóṅ póg."

⁵³ Dɔ́ ane mod ákámtné aá míme melelem mé pónké mó Yesue anlāá' é mó aá, "Awon mwǝn ábē á alongé." Né-ɔ́, bóbe eche ndáb béndúbé Yesue.

⁵⁴ Abén e'chemléd bó bémbe e'chemléd ábe é'lónténé é'be ábe Yesue ámbenlé áde ábíde á mbwóg e Judeya bon apē á mbwóg e Galilia.

5

Yesue achōhté eped é mod

¹ Ambíd e mímén mésyǝál, Yesue anké á Jerusalem á ngande e bad bé Israel.

² A Jerusalem wê, benben ne Nsəl mé E'ké mé Ndyəŋ ní mbód, eton ebédé áhed. Echén eton béchágé'áá chό á ehób é bad bé Israel bán Betzata. Enwōŋ mebepe métaan.

³ A mebepe-te wê, bad bé nkole bénkūmēn áhed, ábe békwédé ndím, ábe bédé e'ped é' bad ne ábe béwédé eped.*

⁵ Mod nhóg abédé áhed awě akékolé á etūn é móom mé mwě meláán ne mwě waam.

⁶ Ade Yesue ápédé áhed annyín ngáne ane mod ánánge ásē, abíi-ε aá nkole níbéme mó á yāl. Dóo ásédte mó aáken, “Edəə bwām adyεε-yε?”

⁷ Ane mod antimtén mó aá, “A-sán, meewóo'ε mod awe əsōlēd me á eton-tē nzé mendíb mépuútédé áte. Nlédte ahób meé rísól, né mod ampée amaá asól.”

⁸ Dóo Yesue álāngeé mó aá, “Syəə ásē, étéd échon ebúm, ékag.”

⁹ Abwōg-əbwōg ane mod andyě bwām, ányāg échē ebúm áte, ábootéd-te akε.

Epun éche nén dēmbenlédte ebédéε á mbwε-mé-nkóme-áte.

¹⁰ Né-óó, anyín áde bad bémbáá bé Israel bényíné ane mod awě Yesue ándidte bwām, bēnsédéd mó bánken, “Chii áde mbwε-mé-nkóme-áte, nzé dehídé-ε mbéndé echéd, weetəŋgené ebúm apém se ébwāgne'.”

¹¹ Bon ankwentén aá, “Mod awě adidé me bwām anláá me aá, “Téd échon ebúm, ékag?” ”

¹² Héε bésédteé mó bán, “Nzé adé ane mod awě álānge wε aá, étéd échon ebúm ékag?”

¹³ Bon ane mod mwēn enkēnkonjé Yesue abíi, ngáne Yesue ámmadté asól á amute-tē áde dēmbē áhed.

¹⁴ Ambíd enē Yesue annyín ane mod á Ndáb-e-Dyōb. Ade ányíné mó, anláá mó aá, “Nōné, emaá bwām adyεε. Weébēlē mbéb ámpē ésebé nē, né wētōm atag ngáne étágé'áá nē.”

¹⁵ Hē dóo ane mod áhídté, bon áke álāngē bad bémbáá bé Israel aá Yesue móo adidé mó bwām.

¹⁶ Né-óó, bad bémbáá bé Israel bēmbootéd Yesue mekuu ahíd áyāle achōŋté mod á mbwε-mé-nkóme-áte.

¹⁷ Yesue antimtén bó aá, “Echem Sán ayōgké nsón abel, me-ε ámpē ntāŋgéné nsón abel.”

¹⁸ Enén póle échē Yesue ánhōbpē, embēl yāl ennabé bad bé Israel atod áte áwúu mó, áyāle saké mbéndé e mbwε-mé-nkóme-áte, chēmpen ábóó bon achágé Dyōb aá Sáá, nédē alúmte' aá bó Dyōb bétáá.

Ngíne e Mwän a Dyōb ehúú ne Dyōb

¹⁹ Né-óó, Yesue antimtén ábē bad bémbáá bé Israel aá, “A mbále, nlānge nyé nén meé, Mwän a Dyōb eébēlēē dyam ké ahóg ne mó mwēn. Mekan míme ányínéé Sáá abele' móo mómpē ábeléé. Kéchéé éche Sáá ábeléé chό mómpē ábeléé.

²⁰ Ngáne édíi nén bán Sáá adəə Mwän, alúmte mó chōm téé éche ábeléé. Alūmēd-te mó ndəle é mekan éche étómé nímén, ábel ékómed nyé yāl áte.

²¹ Ngáne Sáá ápuudteé bad bon ábagé-ε bó alonjé, melemlem nē dóo Mwän mómpē ábagéé alonjé wée kénzéé awě ádáá alonjé abε.

²² Melemlem-'aá Sáá éékāādtēē modmod. Abagé Mwän ngíne esyəál ákáad bad.

²³ Abelé nē ábel bon bēbage Mwän edúbé melemlem ngáne bēbageé Sáá. Kénzéé awě eēbage Mwän edúbé, né eēbageé ké Sáá awě alómé Mwän edúbé.

* **5:3** Donje á kálag ábádé nchoo 3b-4: *Abē bad bé nkole bēmbē áhed ásin bán mendíb mépuuted áte. 4 Ebédé nén bán, pōndé-tē ángel eche Sāŋgwéé ehyagáá asud á eton-tē wē épuuted chό áte. Nzé émbenléd-te nē, mod á nkole ké ahéé awě ansébé asól áwēd-te nkole nímdá' dá mó.*

²⁴ Ne mbále, nlânge nyé nén mɛé, kénzée awě awógé ábêm e'yale bon adúbé mod awě alómé mɛ, akudé alongé áde déemaá', béekáád-taá mó. Amaá atóm á kwééd, asólé á alongé.

²⁵ Ne mbále, nlânge nyé mɛé, pónde ehúé', emaa-'ε apɛ, echě bad ábe béwédé béwōgkē ehób e Mwǎn a Dyōb, bad ábe béwōg-kɛ chό bébē á alongé.

²⁶ Ngáne alongé áhúú ne Sáá, melemlem nê dōó ábélé aá alongé áhúú ne Mwǎn ámpē.

²⁷ Abagé-'ε Mwǎn ngíne ákáad bad áyāle Mwǎn adii ane awě béchəgɛé bán Mwǎn-a-Moonyon.

²⁸ Nén déekāmtē nyé yǎl áte; pónde ehúé' echě bad bésyāal ábe béwédé béwōgkē échē ehób,

²⁹ bébíd-tɛ á son-tê: Bad ábe bébélé mbon, bépuú ábē á alongé, ábe bó-'ε bébélé mbéb bépuú békud nkógsɛn.

Mbón ayāl wée Yesue

³⁰ “Dyamdyam déesaá áde níhele mbél ne mmèn. Ngáne echem Sán alánge mɛ aá nkáad nê dōó nkáadtéé, né-óó mbakú echêm etyéémé. Etyéémé ayāle meekáádtéé ngáne mmèn nídóó, bon nkáadte' ngáne mod awě alómé mɛ áhedéé.

³¹ “Nzé mbídé echem yǎl mbón né ene mbón echě mbídeé eékobnedéé.

³² Bon mod ampée adé awě abíde mɛ mbón, mbí-'ε nén mɛé, mbón echě abídeé mɛ ekōbnédé.

³³ Nyēnlóm bad wée Jone, mó-aá abíde mbón tñgɛne mbále.

³⁴ Eesaá nén bán, moonyon atánge né mɛ mbón abíd. Bon nlánge nyé tñgɛne mbón eche Jone, ábel nyédúbe mɛ, nyékud e'soóson.

³⁵ Jone abédéé née etrukán échē échodne', épenté-'ε ekíde. Nyēmbé menyinge áhíd ábē e'nyínen bé ekíde ayāle esón é pónde.

³⁶ Bon nwóó mbón echě etómé ké mbón echě Jone ámbídtē. Nsón míme echem Sán ábágé mɛ aá mbél nímad, mmèn mbíde mbón nén bán echem Sán mōó alómé mɛ.

³⁷ Echem Sán awě alómé mɛ mwèn ámpē abíde mɛ mbón. Nyéewógéé mó ehób, nyéenyíne-'aá mó mbéd.

³⁸ Nyéedúbpɛé ane awě alómé, né-óó nyéēm wagkē bán échē eyale édyɛɛ nyé á nlém-tê.

³⁹ Nyékídte' Eyale é Dyōb ahed áte ayāle nyéwēmtan bán nyéékūd alongé áde déemaá' áwéd-te. Echén Eyale chěn-éé ehóbe ayāl echêm.

⁴⁰ Ké nê, nyééhédɛɛ apɛ áwém ábel bon nyékud alongé áde déemaá'.

⁴¹ “Saké edúbé é baányon níhedéé.

⁴² Bon mbíí nyaa é bad échē nyédíí, mbíí-'ε mɛé nyéewōnɛé Dyōb edənge á nlém-tê.

⁴³ Mpedé á dīn áde echem Sán, nyéékobɛé mɛ, bon nzé mod ampée apedé á dīn ádē dēn, nyéékob mó.

⁴⁴ Nzé nyékene' nhóg ne aníníí, nyéwōgē bwām, bon nyéēbēlɛɛ ngáne Dyōb dēn dékenné nyé. Chán-nō nyédūbɛɛ mɛ?

⁴⁵ Ké née nyéékobɛé mɛ, nyéewémtán bán, mɛ-éé mēlāā echem Sán mɛé nyéékobɛé mɛ. Mosɛɛ awě nyélyágé nlém áwē mwèn-nɛé akōnté ane abé awě áhób aá, nyébelé mbéb.

⁴⁶ Nzé nyēnkōn Mosɛɛ adúbe né nyédúbpé mɛ, ayāle nén, ayāl echêm dōó ántenlé mam míme átélé.

⁴⁷ Bon née nyéedúbpɛé mekan míme átélé, chán nyédūbɛɛ ábêm e'yale?”

6

*Yesue aditde ndun e mod**(Mat 14.13-21; Mak 6.30-44; Luk 9.10-17)*

¹ Ambid e nimen mesyāal, Yesue ne abe bembapere bēnchabé edib é Galilia éche béchagéé bán edib é Tiberia.

² Ndun e mod ehidé'áá mó áyāle bényiné'áá menyáké míme ábélé'áá ngáne áchóónté'áá bad bé nkole.

³ Héé Yesue ne abe bembapere békíí á ekone-mín bon bēdyēé ásē.

⁴ Póndé e Ngande e Nnyime-amin e bad bé Israel embé benben.

⁵ Asad áde Yesue ásádé did annyín ngáne ndun e mod ehúé'é mó benben. Dóo ásedtéé Filibe aaken, “Héé déchanné ndyééd eché débéé abén bad ádyé?”

⁶ Ansedéd mó nê akag mó áyāle mwēn ammad abii chōm éche ábenlé.

⁷ Filibe ankwentén aá, “Etēd tómaa ne mbwókél é kábpe ébe áchan ndyééd éche ékwognéd abén bad bésyāal adyé ábel bon mod téé ádyē mwātiíd.”

⁸ Dóo Yesue awē mbapere ampée, Andreyā, Simōn Petro mwānyān áhóbéé aá,

⁹ “Mwā kódemod adé hén awē awánlé e'wēle é'tāan ábe bēbénlé ngun é báli, awánlé'-e súu ébe, bon chán enén ndyééd éhéleé-se ékwōg enén ndun e mod?”

¹⁰ Dóo Yesue álāngéé ábe bembapere aá, “Nyéláa abé bad, bēdyēé ásē.” Nkōákā ambud abé á ped e adé abwōg a hōm. Né-óó, abé bad bésyāal bēndyēé ásē. A amute-tē wē, baachóm bēbédé dyam e'kálé é'tāan.

¹¹ Héé Yesue átédé abé e'wēle, ásāgnān Dyōb, bon abe bembapere békabpé bad. Ambēl melemem ne échē súu. Mod-téé andyé ngáne áhédé'áá.

¹² Ade bó moosyāal bémáá akód, Yesue anláá abe bembapere aá, “Nyelad ndyééd eché elyagé ásē. Ndyééd ké póg eebébé’.”

¹³ Né-óó, áde bémáá adyé bēnlād ndyééd eché enlyāg ásē, enlón e'lōn dyōm ne é'be.

¹⁴ Anyín áde abe bad bényiné nimen menyáké míme Yesue ábélé bēnhōb bán “Ne mbāle, nkal e'dāódān awē bēnhōbpē bán āpē á nkōhsé mó nén.”

¹⁵ Yesue ambíí aá bēhede mó akób ányāged mó ábé kān. Né-óó, antīm ambid á ekone-mín.

*Yesue akii á mendib mín**(Mat 14.22-33; Mak 6.45-52)*

¹⁶ Ngukél, bembapere ábe Yesue bēnkē á edib.

¹⁷ Bēnsól á bōle-tē, bēchabpé edib, bétimnád á Kapenahum. Ehíntén émmād ape áde Yesue éēpédéé wēé bédíí.

¹⁸ Enén póndé epub é ngíne étómé'áá, épuutád-te mendib áte.

¹⁹ Bōob-pōó bembapere bēmmād ake ké máyl méláán ké'ε méniiin, dóo bényiné Yesue akag á mendib mín, átimnád benben ne ábab bōle. Mbwōg ní ngíne ménkōb bó.

²⁰ Bon anláá bó aá, “Mε-εé ndé, nyéebáá'.”

²¹ Héé bétédé mó á bōle-tē ne menyīnge, ábwōg-ábwōg bēpēēn-ne bōle á nkin wēé békágé'áá.

Yesue mó adé ewele éche ébage' alongé

²² Néé bīn é'sāngé, ndun e mod eché enlyāg á múde mé edib mímíníí wēé Yesue ne abe bembapere bēmbīdtē, bēnchem bán, ngukél eché entóm, bōle e'hóg bēnpēn bōó bēmbē áhed. Bēmbīí'-ε bán Yesue enkēnsónlé áwēd-te ne abe bembapere. Bēmbīí bán abe bembapere bēnpēn bōó bēnkē.

²³ Myōle mémpēe míme mémbid á dyad á Tiberia mēmpē á nkin mé edib benben ne hōm áde ene ndun e mod éndyēé e'wēle ámbid eché Sāngwéé ámáá Dyōb asāgnēn.

24 Ade ene ndun e mod ényíné nén bán, Yesue ne ábē bembapεε béesaá áhed, bénsāl á myǎle-tê wê, békē á Kapenahum, áke dé ahed Yesue.

25 Ade ábē bad bépédé á pεd e edib eníní, bényin Yesue. Bēnsédéd mó bán, “A-meléed, pónde ehéé épédé hén?”

26 Yesue ankwentén bó aá, “Ne mbále, nlânge nyé nén mεé, saké menyáké nímē mbélé nkáá bon nyéhede me. Nyéhede me áyāle e’wεle ábe nyedyédé bon nyékód-te.

27 Nyéewág ntũ áyāle ndyééd echē ebōode’, bon nyéwág ntũ áyāle ndyééd echē ebág abé ne abé á alongé áde déemaá’, chó-’aá ebage alongé áde déemaá’. Ene ndyééd chó Mwän-a-Moonyon ábeé. Móo Dyōb Titée áhédé e’chem aá ábel nê.”

28 Dóo ábē bad bēnsédéd Yesue bánken, “Cheé sétángéné abel, ábel bon sébel mekan níme Dyōb áhedéé aá, sébel?”

29 Yesue ankwentén aá, “Dyam áde Dyōb áhedéé aá nyébel ádíi ádúbe me awē álómé.”

30 Béntimtén Yesue bán, “Menyáké méhéé wébenlé níme sényinnē bon sédúbé wε. Cheé mmōn wékongé abel?”

31 Abēd betaa béndyē mána á ehyânge ngáne éténlédé á kálag e Dyōb nén bán, ‘Ambag bó e’wεle ábe é’bídé ádyōb aá bédyê.’ ”

32 Yesue anhób aá, “Ne mbále, nlânge nyé nén mεé, saké Mosεε móombē nyé ewεle éche ehúú ádyōb, bon echem Sán móombē nyé ewεle éche ehúú ádyōb.

33 Ayāle mε-εé ndé échē ewεle éche Dyōb ábágé, échē ehúú ádyōb, echē ábageé baányon bé nkōnsé alongé áde déemaá’.”

34 Dóo bélângeé Yesue bán, “A-Sán, bagé sé échén ewεle pónde ésyāal.”

35 Yesue anláá bó aá, “Mε-εé ndé ewεle éche ébage alongé áde déemaá’. Kénzéé awē apedé áwēm, nzaa éékóbpé mó ámpē. Kénzéé awē adúbpé me, píd éékóbpé mó ámpē.

36 Nlânge nyé nén mεé nyényíné me bon nyéedúbpé me.

37 Bad bésyāal ábe echem Sán ábágé me, bépē áwēm. Kénzéé awē apedé áwēm, méebánge mó akob.

38 Ayāle meebidéé ádyōb ábel ngáne ébónnéde me. Mpedé ábel ngáne ébónnéde echem Sán awē álómé me.

39 Bon nén ádíi mewēmten níme ane awē álómé me, aá áfintē bad bésyāal ábe ábágé me, meebóde ké nhóg, bon aá nípuud bó moosyāal á epun é asóg.

40 Echem Sán ahede aá moosyāal awē anyíné mwän, adúbé-’ε mó, ákud alongé áde déemaá’. Měpuúd-te bó á epun é asóg.”

41 Abē bad bé Israel bēmbootéd anyoo áte tângene Yesue, ahób áde áhóbé aá, “Mεé ndé ewεle éche ébídé ádyōb.”

42 Hê dóo behóbéé bánken, “Saá Yesue, mwän awē Josεbe nén-ε? Ngómē debíi sáá ne nyan? Chán-nō áhελεε áhóbē aá móbidē ádyōb?”

43 Yesue anláá bó aá, “Nyésóg anyoo áte.

44 Modmod ééhēlē-se ápe áwēm, ésebán Titée awē álómé me apεéné mó áwēm. Měpuúd-te mó á epun é asóg.

45 Eténlédé ngáne bekal bé’dáádān behóbé nén bán ‘Dyōb déyāgēd bó moosyāal.’ Kénzéé awē awóge’, áyāgkē-’ε wée Titée, apag áwēm.

46 Eesaá nén bán, mod ké nhóg akényin Titée. Ane awē abídé wée Dyōb mwēmpen móo akényin Titée.

47 Ne mbále, nlânge nyé nén mεé, kénzéé awē adúbpé me ákūd alongé áde déemaá’.

48 Mε-εé ndé ewεle éche ébage alongé.

49 Abēn betaa béndyē mána á ehyânge, bon ké nê, bēnwē.

50 Boŋ ewele éche ébídé ádyōb édé nyaa echê kénzée awě adyédé ch́ ewwáá.

51 Mε-εé ndé ewele éche ébage alongé éche ébídé ádyōb. Kénzée awě adyédé échê ewele, ābē á alongé á ngíndé ne á ngíndé. Echén ewele éche mébéé nyé édíi echem yāl echê mébē ābel boŋ ríkade alongé dé nkōnsé.”

52 Ade ábê bad béwógé nê, bēnlīŋ, bēn ne bēn bébootéd-te mpentēn rí ngíne, bésedte bánken, “Chán anén mod áhēle atéd eche yāl, ábe syánē aá dédyág?”

53 Yesue anláá bó aá, “Ne mbáale, nlānge nyé nén méé, nzé nyéedyéde yāl e Mwān-a-Moonyon nyēm wé-’ε rímē mekií, nyéekudté alongé áde déemaá’.

54 Kénzée awě adyédé echem yāl, amwé-’ε rímēm mekií, ākūd alongé áde déemaá’, mēpuúd-te mó á epun é asóg.

55 Ayāle echem yāl ch́ ekōŋté ndyééd abé, rímēm mekií-’ε mékon mmítéd abé.

56 Kénzée awě adyédé echem yāl, amwé-’ε rímēm mekií, alyagé adé ne me, me-’ε nlyagé ndé ne mó.

57 Titée awě akəə boŋ bad bébé á alongé, mó alómé me, mó akəə-’ε boŋ mbé á alongé. Melemlem née kénzée awě adyédé echem yāl, mébenlé abé á alongé.

58 Né-ōó, me-εé ndé ewele éche ébídé ádyōb. Meésáá nēŋgáne ewele éche ábēn betaa bēndyēē, boŋ ké nê béwé. Boŋ kénzée awě ádyē echem yāl ābē á alongé á ngíndé ne ngíndé.”

59 Yesue anhób rímén mésyāāl áde áyágté’áá á ndáb e mekáne e bad bé Israel á Kapenahum.

E’yale ábe Yesue é’pene’ alongé áde déemaá’

60 Ade bad híin ábe béhídé’áá Yesue béwógé rímén mekan bēnhōb bán, “Adén ayáge álélé ahíd. Nzée áhēle ákob ene ndín e dyam?”

61 Yesue ambíí aá, bényonŋe áte áyāl echê, né-ōó anláá bó aá, “Nê áwag nyé á yāl-ε?”

62 Chán-nō nyéhōbpē áde nyényinnē Mwān-a-Moonyon apumme’ ámbíd ámīn wée ámbídtē!

63 Edəádəŋ é Dyōb ch́óó ébage’ alongé. Ekob é yāl éesaá dyamdyam. E’yale ábe rílánŋe nyé é’díi edəádəŋ ne alongé.

64 Boŋ ké nê, nyé donŋe á bad nyéedúbpeé.” (Bootya á pónde éche Yesue ábóótédé ayáged, ambíí bad ábe béedúbé, abíí-’ε mod awě ášōm mó.)

65 Ambád ahób aá, “Nén d́óó ákás boŋ nláá nyé méé modmod eéhēlē-sε ápe awēm kásŋ né echem Sán abelé boŋ ápē áwēm.”

66 Bootya ene pónde nê dēnkəŋ bad ábe béhídé’áá Yesue bésóg mó ahíd, bétim-me ámbíd.

67 Héé Yesue ásedtéé ábē bembapεε dyōm ne bébe aá, “Nyémpē nyéhede atim ámbíd-ε?”

68 Simōn Petro ankwentén mó aá, “A-Sán, wée nzée sékéé? Wε-εé ewóó e’yale ábe é’kəə’ boŋ mod ákūd alongé áde déemaá’.

69 Sédúbpé sébíí-’ε bán, wε-εé edé Ane-awě-Asáá awě abídé wée Dyōb.”

70 Héé Yesue ákwentanné bó aá, “Eesaá mbáale bán mpwedé nyé bad dyōm ne bébe-yε? Boŋ ké nê, nyé mod nhóg adíi mod a Satan.”

71 Judase, mwān a Simōn Iskariōde móó Yesue áhóbé’áá. Kénée ámbēē mbapεε nhóg áfíté e bembapεε dyōm ne bébe, mó ankě Yesue ntúré.

7

Yesue ne baányan

1 Ámbíd e rímén mésyāāl, Yesue akagé’áá mebwóg ne mebwóg á mebwóg e Galilia. Enkēndəŋgé akε á mebwóg e Judeya áyāle bad bé Israel béhédé’áá mó awúu.

2 Bɔɔb-pɔɔ, Ngande e E'bem * e bad bé Israel embé benben.

3 Héé Yesue baányan bɛlânɣéé mó bán, “Etânɣéné ádén abwóg á hõm ahide, éke á mbwóg e Judeya ábel bad ábe behíde wɛ bényín menyáké míme ébeléé.

4 Mod eébeléé nsón á e'konéd-te, nzé ahede aá móbyéen. Ngáne ébeléé nímén mekan mésyāā́l ébel nkõnsé rísyāā́l nábii wɛ.”

5 (Ké Yesue baányan bɛnkéndúbéé mó.)

6 Héé Yesue álânɣéé bó aá, “Echem pónde eépédéé. Bon ne nyé, echen pónde edé pónde ésyāā́l.

7 Nkõnsé méeheléé-se ríkōō nyé. Bon ríkōō me áyāle mpanlad bó nímāb mewusé áte.

8 Nyébó nyékag á ngande. Méekaá áwed áyāle echem pónde eépédéé.”

9 Yesue amaá-'aá ahób nê, abé abé á Galilia.

Yesue akii Ngande e E'bem á Jerusalem

10 Ambid e pónde áde Yesue baányan bémáá aké á Ngande e E'bem, mómpē anké áwed. Bon enkênlúmédte yāl. Anké nyaa eché bad bɛnkɛmbíí'é ndín e mod eché ádíí.

11 Benkamlɛɛ bé Israel behédé'áá mó á ngande-tê, bésɛdté bánken, “Héé mómó ádíí?”

12 Átintê e ndun e mod eché embé á ngande-tê wê, donɣe á bad behóbé'áá bán, “Ádíí mod a bwām,” ábíníí-'ɛ bán, “Aáy, adoge bad dogén.”

13 Bon bó modmod bɛnkɛmbídédte yāl áwed áyāle bebáá'áá bad bémáá bé Israel.

14 Ade ngande ékwógé apɛ átintê, Yesue anké asól á Ndáb-e-Dyõb, ábootéd ayáged.

15 Yāl enkóm benkamlɛɛ áte bwāmbwam tãɣene ádē ayáge. Né-ɔɔ, bɛnsɛdéd bánken, “Chán anén mod ámwédé nímén mam mésyāā́l abii áde éekii'é á esukéle é mbéndé?”

16 Héé Yesue ákwɛntanné bó aá, “Ayáged áde rí'yágtéé déesaá ádêm. Ádíí áde mod awé alómé me.

17 Kénzéé awé awémténé abel ngáne Dyõb áhɛdɛé, ábii ké ádêm ayáge ahúú ne Dyõb ké'ɛ ahúú ne mmèn.

18 Kénzéé awé ahóbne eché kunze, abele nê áhɛde eche yāl edúbé. Bon mod awé ahɛdté' mod awé alómé mó edúbé, asáá nlém á abum, eésáá mod a metóm.

19 Eesaá mbále nén bán, Mosɛɛ abagé nyé mbéndé-yɛ? Ké nê, nyé modmod eehidéé mbéndé éched. Cheé ékás bon nyéhɛdé me awúú?”

20 Dóo ene ndun e mod ékwɛntanné mó bán, “Edáádɛɛ é mbéb édé wɛ áte. Benzébádé behɛde wɛ awúú?”

21 Yesue ankwɛntén bó aá, “Nsón nhóg míme nábélé, ríkómté nyé moosyāā́l yāl áte.

22 Mosɛɛ ambé nyé mbéndé aá, nyéyage áben bán (kénéé édíí bán, saké Mosɛɛ móɔmbootéd. Abɛn betaa bóo bɛmbootéd). Né-ɔɔ, nyéyage bad á Mbwɛ-mé-nkóme-áte.

23 Nzé báyagé mod á mbwɛ-mé-nkóme-áte, ábel béebōō' mbéndé e Mosɛɛ, cheé ékás bon nyéliɣné me áyāle rídídé mod bwām á mbwɛ-mé-nkóme-áte.

24 Nyéekáádté dyam áde nábélé ngáne nyényíné, nyékáad ngáne éhɛdnadté.”

Bán Yesue môdé Ane awé bésinéé-yɛ?

25 Héé dóo donɣe á bad bé Jerusalem behóbéé bánken, “Saá mod awé behɛdɛé awúú mô nén-ɛ?”

* **7:2 Ngande e E'bem:** ebédɛɛ ngande eché bad bé Israel bebélé'áá ákamten pónde eché ábāb betaa bédyéé'áá á e'bem-tê áde bebédé á ehyanɣe, áde behídté á Egipto.

26 Nyénɔné', akanle bad á tâl e ékwéé, bad bémbáá béesaá-'aá mó dyamdyam aláa. Kapóg bébí bán ne mbále, môdé Ane-awě-Béwógté-yōō!

27 Bonj éehelée-se ébé nê, áyāle debí bán pónde echè Ane-awě-Béwógté ápeé, modmod éebí' é wée ábíde. Debí wée anén mod ábíde."

28 Yesue ambé áyāgté' á Ndáb-e-Dyōb. Ade áyāgtéé dōo áchāgté ehōb ámīn aá, "Ée, nyébí me bwām, nyébí-'e wée mbíde. Meépedéé hén ne mmēn. Ane awě alómé me adé mbále. Nyéebí' é mó,

29 bonj me pen mbíí mó áyāle áwē dōo mbíde, mó-'aá alómé me."

30 Ade áhóbé nê, béhédé'áá mó akób, bonj modmod enkēmbánné mó ké ekáá á yāl, áyāle eche pónde enkēmpaá.

31 Ké nê bad híin átínté ene ndun e mod béndūbē mó. Béhóbé'áá bánken, "Ade Ane-awě-Béwógté ápeé, ābēl e'chemléd bé menyáké, míme rítómé míme anén mod ábélé-ye?"

Befarisia bélómé bad ákób Yesue

32 Befarisia bēnwōg née bad bēnyōngéé áte, béhóbéé mímén mekan tângene Yesue. Né-ōó bóobe beprise bémbáá bēnlōm bembāledé ákób mó.

33 Héé Yesue áhóbéé aá, "Ndíi ndé ne nyé, bonj mwāmpīn mí pónde mēsū ámbíd wée ane awě alómé me.

34 Ámbíd enê, nyéhēd me, bonj nyéenyínné, wée mébēē-'e nyéehēnlé ape áhed."

35 Nê dēmbēl benkamlene bésēdté nhóg ne aníní bánken, "Héé anén mod múmó áhedéé ake, wée syánē déehēnlé mó anyín? Ahede ake á alonj á Grikia wée ábēd bad bédíí á ebwóg áyāged bad bé Grikia-ye?

36 Ahóbe' aá dééhēd mó bonj déenyínné mó. Aá déehēnlé-'e ape wée móbēē. Cheé nê álūmtéé?"

E'dīb bé mendīb mé alonjé áde déemad'

37 Epun é asóg é ngande éche éntōmtēn etógnén abé áyāle ene ngande émpē. Yesue antyéem ámīn, dōo áchāgté ehōb ámīn, áhōbē aá, "kénzée awě píd ékóbé áhyag áwēm áhye ámwē mendīb.

38 Kénzée awě adúbpé me, Kálag e Dyōb ehóbe aá, 'e'dīb bé mendīb mé alonjé bēbídē mó áte é'sobpe.' "

39 Edāádəŋ éche Esáá chíó Yesue áhóbé'áá. Chíó bad ábe béndūbē mó bēntāngēnné akud. Ene pónde né Edāádəŋ éche Esáá éēpēdēē wée ábē bad áyāle ene pónde ne Dyōb déēlūmtēē ehúmé éche Yesue.

Bad békábné áte á atón áde Yesue

40 Donje á bad átínté ene ndun e mod ábe bēnwōg née Yesue áhóbéé mímén mekan bēnhōb bán, "Ne mbále, anén mod adíi nkal é'dāádəŋ awě āpē."

41 Bad bēmpēe béhóbé'áá bán, "Môdé Ane-awě-Béwógté awě āpē." Ké nê, bēmpēe béhóbé'áá bán, "Ane-awě-Béwógté eéhēlēē-se abíd á Galilia.

42 Étēnlédé á Kálag e Dyōb nén bán, Ane-awě-Béwógté ābíd á túmbé e Dabíd á dyad á Betelhem wée Dabide ámbídtē."

43 Né-ōó, bad bēnkabén áte á atón áde Yesue.

44 Donje á bad béhédé'áá mó akób bonj modmod enkēmbánné mó ké ekáá á yāl.

Baámbáá bé Israel béekwēntēné Yesue adúbe

45 Kááŋne ásōg bembāledé bé Ndáb-e-Dyōb bēntīm wée beprise bémbáá ne Befarisia. Héé beprise bémbáá ne Befarisia bésēdtéé bó bánken, "Cheé ékáo bonj nyéepēene mó hén?"

46 Héé ábē bembāledé béhóbéé bán, "Modmod eéhóbéé ndín é mam éche anén mod áhóbéé."

47 Dóo Befarisia bésedteé bó bánken, “Nédē ane mod adogé káəne nyémpē-ye?”

48 Nyékényin née mod ambáá ké’ε Farisia nhóg áduǎpé mō? Ké nhóg eédúǎpéé mō.

49 Enén ndun e mod eebii’ε mbéndé e Mose. Né-ǎ ebómán édé ne bó.”

50 Farisia nhóg awě béchágé’áá bán Nikodemuse awě ansébé Yesue akε dé anyin, anláá bó áá,

51 “Eche syánē mbéndé eébagεε kunze nén dékógse mod áde déekáadtεε mō, áwóglεn dyam áde ábélé.”

52 Ade áhóbé nē, bēntimtén mō bánken, “We ámpē ebíde á Galilia-ye? Hěd áte á Kálag e Dyǎb, wěnyin nén wě nkal é’dáədəŋ eebídeé á Galilia.”

Mmwaád awě akábe asón

53 Ambíd enē moosyǎl ansú áwe ndáb.

8

1 Yesue pen ankě á Ekone é Menzab.

2 Née bñ é’sánge mbwεmbwε, antim ámbíd á Ndáb-e-Dyǎb. Ndun e mod empě áwē. Andyεé ásē ábootéd bó ayáged.

3 Bemeléde bé mbéndé ne Befarisia bēmpεén mmwaád nhóg áwē, awě békóbé née akábeé asón á ndáb e e’wóngé. Bénti ane mmwaád átinté echáb,

4 bon béléngē Yesue bán, “A-meléde, békóbé anén mmwaád née akábeé asón á ndáb e e’wóngé.

5 A mbéndé eche syánē, Moseε anhób áá, enén ndin e mmwaád bélum chó meláá káəŋ áwē, chán-nō wε-’ε éhóbé?”

6 Bēnsédéd mō nē áhi mō melám, ábel nén békóben mō awusé. Bon Yesue anwúlén ásē, ábootéd bwēm atel á ndǎb-tē ne ábē e’mii.

7 Ade bábádnéné mō aseded, antí yǎl ámin, aláá bó áá, “Nyé ké ahéé awě eébéle mbéb ábē mod a’só álum mō meláá.”

8 Anwúlén mō ásē ámpē átelé’ ábē bwēm á ndǎb-tē.

9 Ade ábē bad bėwógé nē bēmbootéd ahide nhógē-nhógē. Bad bėmbáá bóo bėnsēbē akε, bon bėsad bėhídē’. Káəŋ ne á asóg Yesue mwěmpen anlyǎg, ane mmwaád-te abé atyéem áhed.

10 Ade Yesue átíidé yǎl ámin, dóo ásedteé ane mmwaád áá, “A-mmwaád nén, héé bad ábe bėpééné wε hén bėdíí? Modmod eélyəgeé hén awě ahóbé áá bėwúu wε-ye?”

11 Ane mmwaád ankwentén áá, “A Sán modmod.” Héε Yesue álangeé mō áá, “Né mēmpē méehóǎpé méé bėwúu wε. Kǎg wε, bon weébēlē mbéb ámpē.”*

Yesue mǎde e’nyinen bé ekide bé nkǎsé

12 Yesue anláá ábē bad ámpē áá, “Méé ndé e’nyinen bé ekide é’ bad bé nkǎsé. Kénzée awě ahíde mε, éekaá á ehintén-tē, bon ákǎd e’nyinen bé ekide ábe é’bage’ alongé.”

13 Dóo Befarisia béléngεé mō bán, “Ebíde echon yǎl mbón, né-ǎ mbón echon eékobnedéé.”

14 Yesue ankwentén áá, “Kéneé mměn mbídéé echem yǎl mbón, echem mbón edé mbále, áyāle mbíí wée mbídé, mbíí-’ε wée nkagké, bon nyé, nyéebíí’ε wée mbídé, nyéebíí-’áa wée nkagké.

15 Nyékáadte bad á nyaa e moonyon. Meekáadtée modmod.

16 Ké menkáad-te ké káadtén, echēm mbakú edé mbále, áyāle meekáadtée ne mměn, bon nkáadte, ne ane awě alómé mε.

* 8:11 Ekud e kálag é’só éewóó’é échén eped (7.53-8.11).

17 Née behúde ké nê áte, á mbéndé echên, éténlédé nén bán nze bad bébe bébidé dyam mbón, bon behóbé melelem mé dyam, né ene mbón edé mbón e mbále.

18 Nyébíi-óó nén bán nwóó mbón ébe, mmèn ne mod awě alómé me, awě adé echem Sánj.”

19 Héé dóó Befarisia bésedteé mó bán, “Héé sóó adíí?” Ankwentén bó aá, “Nyébíi’ é me, nyébíi-’áa ké echem Sánj. Nzé nyémbíi me, né nyébíi kóónje echem Sánj.”

20 Yesue anhób ábén e’yale áde áyágtéé á Ndáb-e-Dyób-te, benben ne wée békongéé mōné. Bon modmod enkênkóbpé mó, áyāle eche pónde eché békóbeé mó enkēmpaá.

21 Yesue anláá ábē bad ámpē aá, “Měkě, nze mmaá-’ε ake, nyéehēd me, bon nyéenyinné, né-óó nyéewē áwen mbéb-te. Wée mébēē, nyéehēnlé ape áhed.”

22 Héé bad bembáá bé Israel bésedteé bán, “Ahóbe’ aá, wée mókéé aá syánē déehēnlé ape áhed, múmó ahede yāl awúu-yé?”

23 Anláá bó aá, “Nyédíi bad ábe bébidé ásē wén, bon me pen, mbíde ámín. Nyébíde á nkōnsé wén, me pen, meebídeé á nkōnsé wén.”

24 Nê dóó ákáká bon nlanjē nyé meé, “Nyéewē áwen mbéb-te. Nzé nyéedúbpe bán, ‘Ndíi Mod Awě Ndíi,’ né nyéewē-’ε áwen mbéb-te.”

25 Héé bésedteé mó bánken, “Nzé-módé édíí?” Dóó ákwentanné bó aá, “Nyaa e mod eché nlanjé nyé se á mbooted meé ndé chóó ndíi.

26 Nwóó mam híin ahób tñgene nyé, ne ákád nyé. Bon mod awě alómé me adíi mod a mbále, mekan nímē nlanjē-’áa nyé hén á nkōnsé médíi mekan nímē nówóge áwē.”

27 Ade Yesue áhóbé nê, bénkēnsónténné bán Sáá awě adé ámín móó áhóbeé.

28 Héé Yesue álánjéé bó aá, “Pónde eché nyémadté Mwän-a-Moonyon abane ámín, dóó nyébíi’ é bán, ‘Ndé mod awě nhóbé meé ndé.’ Nyébíi-’ε bán, meébēlē dyamdyam ne kunze echēm, bon dyam áde nhóbeé adíi dyam áde echem Sánj áyágté me.

29 Ane awě alómé me, adé-’ε ne me, eétedteé mmēmpen, áyāle mbele’ mekan nímē mbónnéde mó.”

30 Bad híin ábe bēnwōg née Yesue áhóbeé nímén mekan, bēndübē mó.

Nzée adé sáá awě bad bé Israel?

31 Héé Yesue álánjéé bad bé Israel ábe bēndübē mó aá, “Nzé nyédíi nyéhíde’ ádēm ayáge, né nyékōnté ábēm bembapē abé.

32 Né nyéēbīi mbále, né ene mbále ehūd-te nyé á mehan-tē.”

33 Bēnkwentén bán, “Sédíi nchyaátén níme Abrahamē. Séebédéé-’áa ntñj a mod mbéd. Chán-nō éhēle éhōbē wéé séebáá á mehan-tē?”

34 Yesue ankwentén bó aá, “Ne mbále, nlanjē nyé meé, kénzēé awě abele mbéb adíi ntñj a mbéb.

35 Ntñj eebákgé á túmbé-te abé ne abé, bon mwän a túmbé, adíi mwän a túmbé pónde ésyāā.

36 Né-óó, nze Mwän ahúde nyé á mehan-tē, né dyamdyam déetedté nyé ntñj ámpē.

37 Mbíi meé nyédíi nchyaátén níme Abrahamē, bon ké nê, nyéhede me awúu, áyāle nyéehēdēē ádēm ayáge ahíd.

38 Nlanjē nyé mekan níme echem Sánj álúmté me. Nyé-’ε nyébele mekan níme echen sánj álánjé nyé.”

39 Bēnkwentén mó bán, “Abrahamē adíi echēd sánj.” Yesue anláá bó aá, “Nzé nyēnkōj bán ábe Abrahamē abé, né nyébele’ mekan níme Abrahamē ábélé’áá.

40 Mekan mésyāāl míme níkémbeñlé rídii áláa nyé mbále echë níwógé wée Dyöb. Kénê, nyêhede me awúu. Abrahamε eébele'aá, enén ndín e dyam.

41 Nyébele mekan míme echen sánj ábeleé.” Bènkwentén mó bán, “Dyöb ðempen-εé séwóó née eched Sánj, béechyáa-'áa sé á asón.”

42 Dóo Yesue álângeé bó aá, “Nzé Dyöb ðenkõn echen Sánj abé, né nyédáá me, áyāle mbídé wée Dyöb ndé-'ε hén bōōb. Meépedéé ne mmën, boñ mó alómé me.

43 Nzom echë ekáá boñ nyéēhēdē' me ehób awóg, edii nyéēhēdēē ábēm e'yale awóg.

44 Nyédii bán ábe echen sánj, Satanε, míme mewēmten mó-'aá nyédáá ahíd. Se á mbooted, adii ane awë awúé' bad, eékwógnédéé mbále mbêd, áyāle mbále eésaá mó áte. Nzé akale metóm, né abele míme nsón áyāle adii nkal a metóm, abé-'ε sáá a metóm.

45 Nyéedúbpéé me, áyāle nkanle nyé mbále.

46 Nyé ahéé ahεle alúméd aá, mbelé mbéb? Nzé nkanle nyé mbále, cheé-õ ékáá boñ nyéedúbpé me?

47 Kénzée awë ahúú ne Dyöb, awóge eyale é Dyöb. Nzom echë ekáá boñ nyéewóglán edii, nyéesaá bán bé Dyöb.”

Bad bé Israel béekobéé ayáge áde Yesue

48 Héε ábê bad bé Israel bétimtanné Yesue bánken, “Eesaá mbále bán, sènkāl mbále áde séhóbé bán, edii mod a Samaria, edáádāñ é mbéb édé-'ε we áte-yε?”

49 Ankwentén bó aá, “Edáádāñ é mbéb eésaá me áte. Mbage echem Sánj edúbé, boñ nyépen nyéēbāgēē me edúbé.

50 Mmën meéhēdtēē yāl edúbé, boñ mod adé awë ahede' aá níkud edúbé, mó-'aá, abage mbakú echë etāngéné.

51 Ne mbále, nlānge nyé meé, kénzée awë abele' chōm-εε ní'yágtéé, éewáá mbêd.”

52 Dóo ábê bad bélāngeé mó bán, “Bōōb dóo sébíí bán, edáádāñ é mbéb édé we áte. Abrahamε anwé, bekal bé'ðáádāñ bómpē bēnwē. Boñ bōōb éhōbē wée mod awë adúbpé we, éewáá mbêd.

53 Eched sánj Abrahamε anwé. Ewémtné wée mótmē mó-yε? Bekal-bé-e'ðáádāñ bómpē bēnwē. Nzé-módé wεwε éwēmtanné wée módé?”

54 Héε Yesue ákwentanné bó aá, “Nzé nhēdte echem yāl edúbé, né échē edúbé eésaá dyamyam. Echem Sánj awë nyéhóbéé bán mó adé nyé sáá, mó abage me edúbé.

55 Nyéēbī' é mó mbêd, boñ mbíí mó. Nzé nhóbé meé meebíí' é mó, né ndé nkal a metóm née nyé. Boñ mbíí mó, mbele-'ε mam míme áhóbéé.

56 Echen sánj Abrahamε ambé menyinge aá, móñnyín epun éche mépeé, annyín-ne chó, abé-'ε menyinge bwāmbwam.”

57 Dóo bésēdtéé mó bán, “Ade wéēpēdēē móom mé mwé métāan, wée mónyīnē Abrahamε-yε?”

58 Yesue ankwentén bó aá, “Ne mbále, nlānge nyé nén meé, byánán béchyāā Abrahamε, 'Ndé.' ”

59 Ade ábê bad béwógé nê, dóo bébóótédé meláá ahed, álúm mó. Boñ Yesue ansōm, abíd-te á Ndáb-e-Dyöb.

9

Yesue achōjté mod awë béchyááné ndím

1 Ade Yesue átóméé, dóo ányiné mod awë béchyááné ndím.

² Dóo ábē bembapεε bésedteé mó bán, “A-meléed, mbéb míme nzéé nkáá bon béchyáá anén mod ne ndím? Mbéb míme mwën-ε, káa míme sáá bó nyan?”

³ Yesue ankwentén bó aá, “Saké míme mbéb nkáá, saá-kaá míme sáá bó nyan. Bon nén ábénlédé ábel ngíne e Dyöb ébid áwed áwē yäl.

⁴ Ngáne bin é’dii ényínnεé ámín, detāngéné débél nsón míme ane awē álómé me. Ehintén ékwógé ape áde mod éehenlé nsón ábel.

⁵ Bóob áde rídíí á nkōhsé, me-εé ndé e’nyínen bé ekíde bé nkōhsé.”

⁶ Ade Yesue áamáá ahób nê, ansob aléed á ndóob, atób dó bon áwōgtē ane mod a ndím á mīd,

⁷ álāngē mó aá, “Kāg, éwobe e’só á eton é Silom” (ádé dīn áde nén bán, “Bélómé”). Né-óó, ane mod ankē, áwōbē-’ε mīd. Antīm ámbīd, ányinne’.

⁸ Héε bad ábe bémbīí mó ne bad ábe bénýináá ngáne áchóméé bwēm, bésedteé bán, “Sáá anén mod ayōgké adyεε ásē, áchōmē bwēm-ε?”

⁹ Donje dénhōb bán, “Môdé,” ábíníí-’ε bán, “Aáy! Awágne mó wágnén.” Bon ane mod mwën anhób aá, “Mmën-εé ndé.”

¹⁰ Dóo bésedteé mó bán, “Chán-nō émwédé abootéd dé anyínen?”

¹¹ Ankwentén bó aá, “Mod awē béchagεé bán, Yesue, antób elóob, awógéd me chó á mīd, aláá-’ε me aá ríke á eton é Silom, ríke ríwobe mīd. Né-óó, menkē. Awobe áde ríwóbpé mīd, míbootéd-te anyínen.”

¹² Bēnsedéd mó bán, “Héé ane mod adíí?” Ankwentén bó aá, “Meebíí’ε.”

Befarisia béhéde áte ngáne Yesue áchōjté mod a ndím

¹³ Bēnkεén ane mod awē ankwē ndím wéε Befarisia.

¹⁴ Epun éche Yesue antōbpē elóob ánēdē-’ε ane mod mīd áte, ébédéε Mbwe-mé-nkóme-áte.

¹⁵ Befarisia bēnsedéd ane mod awē ankwē ndím ámpē bánken, “Chán émwédé abootéd dé anyínen.” Héε álāngεé bó aá, “Antób elóob awógéd me á mīd. Ade ríwóbpé e’só, míbootéd-te anyínen.”

¹⁶ Hê dóo donje á Befarisia béhóbéé nén bán, “Anén mod awē ábelé ádén dyam, éhēlēε-se abé mod awē Dyöb álómé, áyāle eékonεé mbéndé e Mbwe-mé-nkóme-áte.” Bon ábíníí-’ε béhóbé’áá bánken, “Chán mod a mbéb áheleεe ábelé’ échén ndín e menyáké?” Nén dēmpεén nkabén átíntē echáb.

¹⁷ Né-óó, Befarisia bēnsedéd ane mod ámpē bánken, “Ngáne éhóbé wéé mōbelé bon ényinne’, cheé éwóó ahób á yäl eché?” Héε ane mod ákwentanné bó aá, “Adíi nkal é’dáádəŋ.”

¹⁸ Ké nê, bad bé Israel bēnkēndúbéé bán, ane mod ansébé ndím akwε. Nê dēmbēl bēnchēlē sáá bó nyan.

¹⁹ Bēnsedéd bó bánken, “Nyéε nyēchyáá anén mod awē nyéhóbé bán, béchyáá ne ndím-ε? Chán-nō ébénlédé bon ányinnē bóob?”

²⁰ Dóo sáá bó nyan békwentanné bán, “Sébíí bán awéd mwān môdé, sébíí-’ε bán bēnchyāā mó ne ndím.

²¹ Bon séékoo’ε abíi ngáne ámwédé anyínen, sébíí-’áa mod awē ábelé bon ányinne’. Nyésedte mó, eésáá mwēndem, mwën áhōb.”

²² Bēnhōb nê áyāle bébáá’áá bad bé Israel. Bad bé Israel bēnhōb bán, kénzée awē adúbpé aá Yesue môdé Ane-awē-Béwógté, bēnan mó á ndáb e mekáne.

²³ Nê dóo dēnkēŋ bon sáá bó nyan béhób bán, “Nyésedte mó, eésáá mwēndem, mwën áhōb.”

²⁴ Héε ábē bad bé Israel béchēnléé ane mod awē Yesue ándídté bwām ngen échē élónténé ébe, bon bélāngē mó bán, “Kāl echon mbále á dīn á Dyöb. Sébíí bán anén mod awē achōjté wε adíi mod a mbéb.”

²⁵ Dóo ane mod átímtanné bó aá, “Meebíí’ε me ké adé mod a mbéb ké’ε eésáá. Dyam ahóg áde ríbíí, áde nén, menkwē ndím bon bóob nnyinne’.”

26 Hée bésedtée mó bánken, “Cheé âmbenlé bonj ébootéd anyínen?”

27 Ankwentén bó aá, “Mmaa nyé aláa bonj kéné, nyéedúbpéé me. Cheé nyéhedeé bán rílaa nyé ámpē? Nyémpē nyéhede’ ábē bembapēē abé-ye?”

28 Hée bésyáá’é mó, béhōbē bán, “Wē-éé edé mbapēē awē ane mod. Sēdii bembapēē ábe Mosēē.

29 Sēbii bán, Dyōb dénhōb wēē Mosēē, bonj séebii’é wēē anén mod pen ábídé.”

30 Ane mod ankwentén aá, “Nén adé nkōmtēn ní yǎl áte. Nyéebii’é wēē ábídé, bonj kéné abelé nnyínne’.

31 Debii bán, Dyōb déekwentánné mekáne mé bad bé mbéb, bonj akwentan mekáne míme bad ábe bébage mó edúbé, bébelé-’ε mam míme áhedéé.

32 Taase nkōnsé míbootad mod eéwōgēē mbéd, bán mod abelé mod awē béchyáané ndím anyínne’.

33 Nzé anén mod awē achōnté me enkēmbé mod a Dyōb, né eéhele’aá-se ábel enén ndín e dyam.”

34 Dóo ábē bad békwentánné mó bán, “Béchyáá wε á mbéb-te, ékwōg-ke á mbéb-te, bonj bōōb éhedé sé ayáged-ε?” Hée dóo bébídte mó á ndáb e mekáne.

Ndím e edáádā

35 Ade Yesue áwógé bán bébídte ane mod awē ânchoódté á ndáb e mekáne, anhed mó. Ade anyíné mó, ansedéd mó aáken, “Edúbpé Mwān-a-Moonyon-ε?”

36 Ane mod antimtén mó aá, “A-Sánj nzéé adé Mwān-a-Moonyon, láá mé ábel nén rídúbe mó?”

37 Yesue anláá mó aá, “Emaá mó anyín, nyúmō-’aá nyékale’ nén.”

38 Hée ane mod áhóbéé aá, “A-sánj, ndúbpé!” Abwóg-ke mebóbōnj ábe mó edúbé.

39 Yesue anhób aá, “Mpedé á nkōnsé wén, ákáad bad ábel nén bad ábe békwédé ndím bényínēn, ábe bó-’ε bényínne’, békwε ndím.”

40 Ade donje á Befarisia ábe bóōbe Yesue bémbē áhed béwógé nē, bēnsedéd mó bánken, “Sédúbpé bán, weehóbéé wēé sémpē sékwedé ndím?”

41 Yesue anláá bó aá, “Nzé nyénkwε ndím, né mbéb méesaá nyé á yǎl. Bonj bōōb áde nyéhóbéé bán nyényínne’, mbéb rídii rídé nyé á yǎl.”

10

Ngan e Nnōn a rídyōnj mí mbód ne éche mbód

1 Yesue anhób aá, “Ne mbále, nlānge nyé meé, kénzée awē eépoo á mmwε mé abem á mbód, bonj átīm achágé ped empée, adii nchíb, abé-’ε mod e ewúēn.

2 Mod awē apoo’ á mmwε mé abem mōdé Nnōn a rídyōnj mí mbód.

3 Mod awē anōne abem adibnad mó ekob. Achage mbód téé ne dīn, ábídne-’ε chó.

4 Abídné-’aá chó, atómén chó, chó-’ε éhídé mó, áyāle ébii éche ehób.

5 Bonj échē mbód éehídéé nken mbéd. Ebelé’ ébāā’ mó á yǎl báán, áyāle écheméé éche ehób.”

6 Yesue ankalé bó enén ngan bonj bénkēnsōnténné.

Yesue ad móo móde Nnōn a rídyōnj mí mbód a bwám

7 Né-ōó, Yesue ambád ámpē aá, “Ne mbále, nlānge nyé nén me-éé, méε ndé mmwε mé ekob wēē mbód époo’é.

8 Byánán mǎpč, bad bésyāāl ábe bésébpé ape bébédéé bechíb ne bad bé ewúēn, bonj mbód éekēnwógénné bó.

9 Mε-εέ ndé ekob. Kénzée awě apoó áwēm, äküđ e'soóson. Asōl, abíd-te ésebán mod atagte mó. Akud-te kéchéé éche áhedéé.

10 Nchíb apag dásō áchíb, áwúu ne ábébed. Mpedé ábel bonj békud alongé áde álóné mbon.

11 Mε-εέ ndé nn̄n-a-mbód a bwâm. Nn̄n-a-mbód a bwâm adé mbonjén áwé á nló míme éche mbód.

12 Mod awě bétéde á nsón tédén, áñn̄n mbód, áde mwěn éesaá nn̄n-a-mbód, áde éesaá-'áá nwóó-mbód, ányíneé nyínén néε ngə ehúé'é, áchēnē mbód, atóm mehélé. Ene pónde dōo ngə ésogεé mbód, échíníí-'ε épántéd áte.

13 Ane mod atóme mehélé áyāle adíi mod awě bétéde á nsón tédén, eewōñneé échē mbód pónde.

14 Mée ndé nn̄n-a-mbód a bwâm. Mbíi échem mbód, échem mbód-te ébíi mε.

15 Melemlem nê dōo Titée ábíi mε, mε-'ε mbíi mó. Mbōñséné-'ε áwé á nló míme échem mbód.

16 Nwóó-'ε mbód émpēé éche éesē á abem-tē wén, ntāñgéné chōmpē apεεn, chōmpē éwōg échem ehób, né-óó, abem débē ahóg, nn̄n-a-mbód-te nhóg.

17 Titée adáá mε, áyāle mbōñséné áwé ábel ríkud ádēm alongé ámbíd ámpē.

18 Modmod eékobnéé mε ádēm alongé, bonj mbage dó ne mměn. Nwóó ngíne ábe ádēm alongé, nwóó-'ε ngíne átéd dó ámpē. Nén dōo Titée álángé mε áá mbél."

19 Abén e'yale ábe Yesue bēmpēén nkabén átíntē e bad bé Israel ámpē.

20 Bó bad híin béhóbé'áá nén bán, "Edáádəñ é mbéb édé mó áte, apedé mñn. Chán nyéhεle nyéwōglān mó?"

21 Bonj bēmpēé béhóbé'áá bán, "Mod awě edáádəñ é mbéb edíi áte eehóbéé échén ndín e mekan. Edáádəñ é mbéb éhεle ébél mod awě akwedé ndím anyínen-ε?"

Bad bé Israel bébáá Yesue á yāl

22 Ngande e Nnamed ní Ndáb-e-Dyōb ékóbté'áá á Jerusalem. Nén ábédé á pondé éche ahéb ábágkē bwāmbwam.

23 Yesue ahyómmé'áá á abepé á Ndáb-e-Dyōb áde béchágé'áá bán Abepé áde Solomonε.

24 Bad bé Israel bēnləñnéd mó, bésεdté mó bán, "Pónde ehéé wεwε wésōgkē sé abane á edibelónéé-te? Nzé wε-εé edé Ane-awě-Béwógté, épanléd sé áte."

25 Yesue ankwεntén áá, "Mmaaá nyé aláa, bonj nyéedúbpeé. Nsón míme mbéleé á dñn áde awēm Titée, mēn mbíide mε mbóñ.

26 Bonj nyéedúbpeé áyāle nyéesaá échēm mbód.

27 Echem mbód éwóge échēm ehób. Mbíi chó, chó-'áá éhíde mε. 28 Mbage bó alongé áde déemaá', béewáá-'áá mbéd. Modmod eéhēlēε-se ásog bó áwēm mekáá.

29 Chōm echē awēm Titée ábágé mε étómé chōm ésyāāl, * modmod eéhēlēε-se ásog bó á mekáá míme Titée.

30 Sé Titê sēdii mod nhóg."

31 Bad bé Israel bēntéd meláá ámpē álúm Yesue.

32 Bonj anláá bó áá, "Nlúmté nyé ekud é nsón mí bwâm éche ébídé ne echem Sáj. Nyéhεde me meláá álúm, áwúu mε. Mmē nsón ríhée nyéhεdeé mε meláá álúmen."

33 Dōo békwεntanné bán, "Séehēdēε wε meláá álúm áyāle nsón mí bwâm míme ébélé. Bonj sélúme wε meláá áyāle esyáá Dyōb."

* 10:29 Chōm echē awēm Titée ábágé mε étómé chōm ésyāāl: donje á kálag dé'só áwóó Titée awě abage mε bó, atómé chōm ésyāāl.

³⁴ Yesue anláá bó aá, “Ngómē éténlédé áwen Kálag e Mbéndé nén bán, Dyöb ahóbé aá, ‘Nyêdíi myöb.’

³⁵ Debíi nén bán, eyale é Dyöb éekwagké. Dyöb dênchăg bad ábe ánlômēnnē échē eyale aá bédii myöb.

³⁶ Mε-εé Dyöb ánámté bon alóm-mε á nköŋsé, chán-nō nyéhēle nyéhōbē bán, nsyóá Dyöb áyāle rítúmé ahób mεé ndii Mwān a Dyöb?

³⁷ Nzé meébēlē nsón míme Titéε, nyéedúbpe mε.

³⁸ Bon nzé édé nén bán mbele mó, nyédúbé míme nsón ké nyéedúbpe mmēn, ábel nén nyébíi nyésōŋten-ne ngen póg ne ésyāal nén bán, Titéε adé mε áte, mε-’ε mbé mó áte ngen póg ne ngen ésyāal.”

³⁹ Mmēn mam míme ánhōbpē mēmbēl bēnwānén mó akób ámpē, bon ambíd bó á mekáá.

⁴⁰ Ambíd enē, Yesue antím ambíd á ped e edíb é Jodan eníní, á abwóg á hōm wée Jone, Nduseεe ádúsánnáá bad, ádyēē áhed.

⁴¹ Ndun e mod epagé’áá áwē. Abē bad behóbé’áá bán, “Jone, Nduseεe eébele’áá menyáké bon kéchéé éche ahóbé tâŋgene anén mod édé mbále.”

⁴² Né-óó, ndun e mod echē embé áhed, endúbé Yesue.

11

Kwéed eche Lazarose

¹ Mod nhóg ambé awē béchágé’áá bán Lazarose, akönlé’áá. Lazarose ne baányan bé bebaád, Maria ne Mataa bedyéé’áá á dyad á Betani.

² Anén Maria awē mwānyan Lazarose ákónlé’áá, mô anwógéd Yesue dyöğ dé elod é bwām á mekuu, bon apínnéd échē esid.

³ Né-óó, Maria bó Mataa bó bénlōm nsal wée Yesue bán, “A-Sán, awon nsón a nlém akonle’.”

⁴ Ade Yesue áwógé mímén nlébtéd anhób aá, “Mmēn nkole méesógké ne kwééd. Nén ábénlédé ábe Dyöb ehúmé, ábel bon Mwān a Dyöb ákud edúbé.”

⁵ Yesue andəŋ Mataa, Maria ne Lazarose.

⁶ Ké nē, áde áwógé bán, Lazarose akonle andii ambé wée ámbēē e’pun é’be.

⁷ Héε álāŋgeé ábē bembapεε aá, “Détim ambíd á Judeya.”

⁸ Dóó ábe bembapεε bélāŋgeé mó bán “A-meléed, kíné saá áwed dóó bad behédé’áá wε meláá awúen súútəŋ’ε?”

⁹ Yesue ankwentén bó aá, “Eesaá mbále bán müte ríwóó dyōm á háwa ne ébe-yε? Bad ábe békag müte béekwagké áyāle bédé ne ane awē adé e’nyínen bé ekíde bé nköŋsé.

¹⁰ Bon nzé békag nkuu, dóó békagké áyāle e’nyínen bé ekíde béesaá.”

¹¹ Ade Yesue amáá ahób nén ambád ámpē aá, “Awed nsón Lazarose akúne, bon nkag mó anyem ásē.”

¹² Abē bembapεε bénlāā mó bán, “A-Sán, nzé akúne né ádyéé bwām.”

¹³ Yesue ahóbé’áá nén áyāle ambíi aá, Lazarose awédé, bon abē bembapεε bēnwēmtēn bán, ahóbe aá, akúne kúnén.

¹⁴ Né-óó, Yesue ampanléd bó áte aá, “Lazarose awédé,

¹⁵ bon á yāl echēn, ndé menyīŋge nén mεé meebédeé áhed ábel bon nyédúbe. Syánē dékag-kóó áwed bōob.”

¹⁶ Hē dóó Tōmasε (awē bēnchuu’é bán, Nhéd) álāŋgeé baáb bembapεε aá, “Syánē ámpē dékag áwed ábel bon nzé kwééd chó edé déwē ne Meléede.”

Yesue mó adé mpuu ne alongé

¹⁷ Bōob-póó, áde Yesue ápédé á Betani, antán née bémáá Lazarose alíme. Ene pónké né míme ndim ríkēbē á soŋ-tē e’pun é’niin.

¹⁸ Bootya á Betani ápe á Jerusalem ábédé dyaam máyl mébe.

19 Ekud é bad bé Israel ênhyë wée Mataa bó Maria áwenned bó áyāle kwééd eche awab mwānyan.

20 Ade Mataa áwógé bán, Yesue ahúe', ankë mó abomen á nzii, bon Maria anlyǝg á ndáb.

21 Dóo Mataa álāngéé Yesue aá, "A-Sán, nzé wembé hén né mwānned eewédeé."

22 Bon ké nê, mbíi meé ké bōōb kéchéé éche ésédté Dyōb, Dyōb débë we."

23 Yesue anláá mó aá, "Mwānyon ābē á alongé ámpē."

24 Mataa antimtén mó aá, "Mbíi meé āpuu á pónde e mpuu mbwe mé asóg."

25 Dóo Yesue alāngé mó aá, "Me-éé ndé mpuu né alongé. Nzé mod adúbpé me, ké anwé, ābē abé á alongé."

26 Kénzéé awë adé á alongé bon adúbé-'e me, éewáá mbéd. Edúbpé né-ye?"

27 Héé Mataa ákwentanné aá, "Ee, A-Sán, ndúbpé meé we-éé edé Ane-awë-Béwógté, Mwān a Dyōb awë Dyōb áhóbé aá, āpē á nkōnsé."

Yesue achii

28 Ade Mataa áhóbé nê, antīm ámbíd, ákē áchag mwānyan Maria kun, aláá mó aá, "Meléede adé hén, asedte-'e we."

29 Ade Maria áwógé nê, anhidé ásē mehélé, áke atán Yesue.

30 Bōōb-pōō, Yesue enkēmpaá asól á dyad-tê, andíi ambé wée Mataa ántānnē mós.

31 Ade bad bé Israel ábe bēbédé á ndáb-te ne Maria áwenned mó, bényíné née ábídé á ndáb-te ne mehélé, anyagte á son, bēnwēmtēn bán, akag achii. Né-ōó, bēnhíd mó.

32 Ade Maria ápedé wée Yesue ámbēē bon anyín mó, ankwë mó á mekuu, ahób aá, "A-Sán, nzé wembé hén, né mwānned eewédeé."

33 Anyín áde Yesue ányíné née Maria áchyeé'é, anyín-ne née bad ábe bēnhíd mó béchyeé'é, ngol enkonned mó, átāg-ke áte á nlém-tê bwāmbwam.

34 Ansedéd aáken, "Héé nyélimmé mó?" Bēnkwentén bán, "A-Sán, hyë ényín."

35 Yesue anchii.

36 Héé bad bé Israel bēhóbéé bán, "Nédē ankōn mó adən-óó!"

37 Bon bó donge á bad bēnhōb bán, "Ngómē ambēl mod awë ankwē ndím anyinne. Eéhele'aá-se ábel Lazarose eewág-e?"

Yesue apuúdté Lazarose

38 Ngol enkonned Yesue á nlém ámpē. Né-ōó, ankë á son. Ene son ebédéé son echë bēpwógé aláá áte, bon békútén chó nsəl ne aláá.

39 Héé Yesue álāngéé ábē bad aá, "Nyéhūd adé aláá." Dóo Mataa, mod awë awédé mwānyan áhóbéé aá, "A-Sán, ndim mémād abooted dé achum bōōb áyāle nkídémbé á son-tê bōōb e'pun é'niin."

40 Dóo Yesue álāngéé mó aá "Meelāngéé we meé nzé edúbpé né wēnyín Ngum e Dyōb-e?"

41 Né-ōó, ábē bad bēnhūd adé aláá á nsəl ní son. Dóo Yesue ánóné ámín bon áhōbē aá, "A-Tê, nságnéné we áyāle éwógé me mekáne.

42 Mbíi meé eyōgké me mekáne awóg, bon nhóbe nén ábel bon ábén bad ábe bédé hén bédúbe bán, we-éé elómé me."

43 Ade amáá ahób nê dóo áchógté ehób ámín bon áchēnlē Lazarose aá, "A-Lazaros, bíd áwed!"

44 Ane mod awë ammād awé abíd-te áwed. Mbóm éche bēnkaánné mó mekuu ne mekáá ne tumbé echë bēnkaánné mó e'só, émbē ébē mó á yāl. Yesue anláá bó aá, "Nyéhune mó ábē bwēm á yāl, ákag."

*Béhagke Yesue**(Mat 26.1-5; Mak 14.1-2; Luk 22.1-2)*

⁴⁵ Bad bé Israel ábe bēnkĕ Maria á mewenned bényĭn mekan míme Yesue ámbenlé, bēndūbē-’ε Yesue.

⁴⁶ Bon bó donge á bad bēnkĕ Befarisia atán, bēláá bó mam míme Yesue ábélé.

⁴⁷ Héε beprise bēmbáá ne Befarisia béchénlé mbom ní káánsel. Bēnhōb bán, “Cheé débēnlé bōob? Detāngéné dyam abel áyāle anén mod abele menyáké bwāmbwam!

⁴⁸ Nzé detēdté bán, ákεεne mímén mekan á’sō né moosyāál ādūbē mó. Nzé moosyāál adūbpé-’ε mó, né bad bé Roma bépĕ, békōbēn-ne syānē eched Ndáb-e-Dyōb, békōbēn-ne syānē ādēd alon.”

⁴⁹ Dóo mod nhóg átínté echáb awĕ béchágé’áá bán Kaifase, awĕ abédé prise ambáámbáa mímé mwĕ, áhóbéé aá, “Nyéebí’ĕ dyamdyam.

⁵⁰ Nyéenyínéé nén bán ébóó bán, mod nhóg áwĕ á nló ní moosyāál tómaa alon ásyāál ábóó?”

⁵¹ Kénéé áhóbé’áá nĕ, saké mímé mewēmtēn mĕn móo áhóbné’áá nĕ. Ngáne abédé prise ambáámbáa mímé mwĕ, áhóbé’áá dyam áde débēnléd, á’sō é’ pón dé, aá Yesue āwĕ á nló ní bad bé Israel.

⁵² Saá-kaá á nló ní bad bé Israel bēnpēn, bon káŋne ālad bad bé Dyōb bésyāál ábe bémáá ahented áte hōm ahóg, ábel bēbĕ mod nhóg.

⁵³ Bootya échē epun bad bēmbáá bé Israel bēmbootéd Yesue ahāge, áwúu mó.

⁵⁴ Nén dēmbĕl Yesue eebíde’áá á nhéné ámpĕ átínté e bad bé Israel. Bóobe ábē bembapεε bēnhidé békĕ á dyad áde béchāgĕé bán Efrem, bēdyĕĕ-’ε áwed. Adé dyad ábédé benben ne ehýāŋge.

⁵⁵ Pón dé e ngande e Nnyíme-ámĭn embé benben. Né-óó, bad híin bēmbĭd myad ne myad, békĕ á akuu á Jerusalem áwobe échab yāl ngáne mbéndé e Mosεε éhédé’áá, ábonŋsen ngande e Nnyíme-ámĭn.

⁵⁶ Abĕ bad bé Israel bēmbĕ bēhedé Yesue. Ade bēládne á Ndáb-e-Dyōb bésédté’áá, nhóg ne aníní bánken, “Chán nyéwémtĕné, nyédúbpé bán, áhye ngande-yε?”

⁵⁷ Beprise bēmbáá ne Befarisia béntōmĕd ehāngé bán, kénzĕé awĕ anyíné Yesue áhye áláa bó, ábel bon békōb mó.

12*Béwógté Yesue á Betani**(Mat 26.6-13; Mak 14.3-9)*

¹ Ade ngande e Nnyíme-ámĭn élyágé e’pun ntóób, Yesue ankĕ á Betani wĕε Lazarεε awĕ ámpuúdté ádyéé’áá.

² Bēmbĕlé Yesue ndyééd áhed. Mataa mó antómĕd ene ndyééd. Lazarεε ambé nhóg átínté e bad ábe bóobe Yesue bēbédé á tébelε ádyéé ndyééd.

³ Héε Maria átédé epom é dyōg dé elod á bwám áde álélé nkun bwāmbwam. Adé dyōg bēbēnlé dó nād.* Anwógéd Yesue á mekuu, apíné-’ε mó mekuu ne échē esid é nló. Elod é bwám énlōg ndáb áte esyāál.

⁴ Dóo Judas Iskariōde, mbapεε nhóg awĕ émbĕĕ bán mó ášōm Yesue áhóbéé aá,

⁵ “Cheé bēnkĕnsómmé ádén dyōg, bétéd mímén mōné békĕ bēbĕ betóótōkĕ bé bad? Béhélé’áá-se bésóm ádé dyōg dyam-ĕε áde nsábe ní mwĕ nhóg.”

* **12:3 Nād:** Nād edii mbonja échē ewóó elod é bwám eche bēbenléé mōg mé elod é bwám.

⁶ Judase anhób nê, saké áyāle abédé betóótōkē bé bad ngol, bon áyāle abédé nchíb. Ngáne abédé mod awě awánládtáá bóbō ekwe é mōné, ayōgk'áá mōné atéd ámbíd.

⁷ Bon Yesue anhób aá, “Tēdé mō, ákoo áde ályágé ásē ábel bon ábenled dō mbwē míme bēlīmēē me.

⁸ Betóótōkē bé bad bédé ne nyé pōndé téé bon me pen méebáá ne nyé pōndé ésyāal.”

Béhagke Lazarose

⁹ Ene pōndé-ōó, bad bé Israel híin bēnwōg bán, Yesue adé á Betani. Né-ōó, bēnkē áwed. Saké Yesue mwēmpen mō ankəñ bon békē áwed, bon bēnkē Lazarose anyín awě Yesue ámpuúdté.

¹⁰ Né-ōó, Beprise bēmbáá bēhágk'áá káəñne Lazarose áwúu mō,

¹¹ áyāle bad bé Israel bétédté'áá bō, bédūbpē Yesue. Bēndūbē Yesue áyāle dyan áde dēmbenléd ne Lazarose.

Yesue asólé á Jerusalem née kəñ

(Mat 21.1-11; Mak 11.1-11; Luk 19.28-40)

¹² Née bīn é'sánjé, ndun e mod echě enhyě á Ngande e Nnyíme-ámīn bēnwōg bán Yesue apag á Jerusalem.

¹³ Hē dōó bésélé e'kikag é' mīi bon békəg mō abomen á nzii. Béhágé'áá e'saad bán, “Hosána! Nnam nībē ne ane awě apedé á dīn áde Sánjwéé. Nnam nībē ne kəñ e bad bé Israel!”

¹⁴ Yesue ankūd etum é ésel, ádīi-'e chó. Nēn dēmbenléd ngáne éténlédé á kálag e Dyōb nēn bán,

¹⁵ “A-bad bé Zayon, nyéebáá', nyénəne' echēn kəñ ehúé', edíídé-'e etum é ésel.”

¹⁶ A pōndé echě mímén mekan mébénlédé, bembapεe ábe Yesue bēnkənsónjénné. Bon áde Yesue ámpuú'ε ne ehúmé é Dyōb, dōó bēnchemmé bán mam míme mébénlédé təñgene Yesue mōó mēntenléd, á yāl echē.

¹⁷ Ndun e mod echě embé ne Yesue áde áchénlé Lazarose á son-tē bon ápuúdté mō, embé ékalé' mímē nkalan.

¹⁸ Né-ōó ndun e mod enkě Yesue abomen áyāle ábēn e'chemléd bé menyáké ábe ámbenlé.

¹⁹ Hēe Befarisia bēləngeé nhóg ne aníní bán, “Nyénəne! Kəñne bōob deéhléé dyan dyan ábel. Nkōñsé nsyāal níhide mō.”

Bad bé Grikia bēhede Yesue

²⁰ Donje á bad bé Grikia bēmbē áfíntē e bad ábe bēnkē ngande e Nnyíme-ámīn á Jerusalem, áke dé abe Dyōb edúbé.

²¹ Bēmpě wée Filibe. Filibe awě ámbíd á dyad á Betsaida á mbwóg e Galilia. Bēnlāá mō bán, “A-Sán, sēdāó Yesue anyín.”

²² Filibe ankě Andreyá aláa. Dōó bō bad bēbe békíi Yesue aláa.

²³ Yesue ankwen tén bō aá, “Pōndé epedé echě ehúmé e Mwān-a-Moonyon ényīnēdté.

²⁴ Ne mbále, nlənge nyé nēn mēé, mbum e ngun póg edii mbum e ngun póg, káəñ né bēwéné chó á ndōob-tē bon ewé. Ewāg-káa, bon echyáá mbum é ngun émpēe éche ébuú áte.

²⁵ Mod awě adāó ádē alongé, ábōd dō. Mod awě mō-'e akōó ádē alongé, á nkōñsé-te wén, ákəó dō á alongé áde déemaá'.

²⁶ Kénzéé awě ábenle me, atəñgéné awēm mbəledε abé. Ké hēé-'e wée nídíi, awēm mbəledε atəñgéné abé áhed. Echem Sánj ábē-'e kénzéé awě ábenle me edúbé.

Yesue ahóbbé tângene eche kwééd

27 “Bɔɔb-pɔɔ, nlém nítage me áte. Cheé-ɔ méhɔbpē? Nhôb meé, ‘A-Tê, weémwāg-se metake míme méhúe’ métán me-yε?’ Aáy, méehóbbé nê, áyāle enén pónde e metake chô ekáá bon nítage wén.

28 A-Tê, lúméd echôn ngum.” Héε ehóbbé á Dyôb nén bán, “Nlúmté echém ngum, mēlūmēd-te chó ámpē.”

29 Ene ndun e mod eché embé áhed enwóg échê ehóbbé. Bénhɔb bán dyôb dɔɔ ákúme áte. Bad bémpēe bénhɔb bán, ángel chó ehóbbé áwē.

30 Yesue anláá bó aá, “Áyāle echên dɔɔ échén ehóbbé áwē, saké áyāl echém.

31 Pónde epedé eché Dyôb dékāadtē nímén nkônsé. Nkamlɛn míme nkamlɛn á nkônsé mékwě bɔɔb.

32 Bon áde bémadté me anyen ámín, mēdól bad bésyāal áwēm.”

33 (Yesue anhóbbé nê álúmed ndín e kwééd eché áwē.)

34 Ndun e mod eché embé áhed enkwentén mó bán, “Séwógé á mbéndéte bán Ane-awě-Béwógté ábē á ngíndé ne á ngíndé. Chán-nɔ éhóbbé wéé ‘Bétāngéné bényen Mwān-a-Moonyon ámín.’ Nzéé adé anén ‘Mwān-a-Moonyon?’ ”

35 Dɔɔ Yesue álāngéé bó aá, “E’nyínen bé ekíde bébē ne nyé á esón e pónde ngên. Nyékag bɔɔb áde e’nyínen bé ekíde é’díi é’díi, ábel bon ehintén éékôbē nyé. Mod awě akag á ehintén-tê eebyéé’wéé ákagké.

36 Nyédúbe e’nyínen bé ekíde bɔɔb áde é’díi ne nyé, ábel nén nyébē bán bé e’nyínen bé ekíde.”

Bad bé Israel béedii béedúbbé Yesue

Ade Yesue áamáá nímén mekan mésyāal ahóbbé, antedé bó, áke ásōm wéé béenyínné mó.

37 Kénéε ene ndun e mod ényínné ábén e’chemléd bé menyáké é’syāal ábe Yesue ámbenlé, bénkéndúbbé mó.

38 Nén dēmbenléd álóned e’yale ábe nkal é’dáádəŋ Yesayaa ánhɔbpē aá, “A-Sáŋ, nzéé adúbbé eyale éche sékálé, nzé-módé akidényín ngum echôn áchēm-me chó?”

39 Né-ɔɔ, béehel’áá-se bédúbe. Yesayaa ahóbbé hóm démpēe aá,

40 “Dyôb ákwídé bó ndím, ábē-’ε bó nlém mé aláá, ábel nén mímbáb mīd méēnyínnē’,

béēsónŋtanne.

Nzé bébélé-’ε nê, né bétimén me, né mēchoód-te bó.”

41 Yesayaa anhóbbé nén áyāle annyín ehúme éche Yesue, anhóbbé-ε áyāl eché.

42 Ké nê, bad híin béndúbbé Yesue, káəŋne donge á bad bémbáá. Bon ngáne bébáá’áá Befarisia, bénkēnlúmedté yāl, ábán nén bán béébídté bó á ndáb é mekáne.

43 Bébélé’áá nê áyāle bēndəŋ mekenag mé baányon tómaa mé Dyôb.

E’yale ábe Yesue békāād bad

44 Héε Yesue áchágté ehóbbé ámín áhɔbbé aá, “Kénzéé awě adúbbé me, eedúbbé mmēmpɛn, adúbbé káəŋne ane awě alómé me.

45 Kénzéé-’ε awě anyíne me, anyíne ane awě alómé me.

46 Mpedé á nkônsé néε e’nyínen bé ekíde, ábel bon kénzéé awě adúbbé me, eélyāgē á ehintén-tê.

47 Kénzéé awě awógé ábēm e’yale, bon eékonje bó, saké me nkáadte mó. Meekáadtéé mó áyāle meépedéé ákaad nkônsé bon mpedé áson bad bé nkônsé.

48 Kénzéé awě abáá me á yāl bon eékobe-’ε ábēm e’yale, awóó mod awě ákāād mó. Ábēm e’yale bēn bó békāād mó á mbwε mé asóg.

⁴⁹ Ebê nê, áyāle mee hóbēé mímén mé syāāl ne echēm kunze. Bon Titée awē alómé me, álángé me chōm éche ntánjéné ahób.

⁵⁰ Mbíí meé kéchéé éché álángé me aá nhōb épeene alongé áde déemaá'. Né-óó, kéchéé éche nhóbēé, nhóbe' chó ngáne Titée álángé me."

13

Yesue awōbpé ábē bembapē mekuu

¹ Epun é ngande e Nnyíme-ámín ênlyǎg née chǎn. Yesue ambíí aá eche pónde emaá ape echē mótánjéné nkōnsé atede, áke wée eche Sán. Andǎn bad bé nkōnsé ábe béndūbē mó, alúmed-te échē edǎnge káǎne á asóg.

² Yesue ne ábē bembapē bédyágé'áá ndyééd ngukél, Satane-'e ammǎd Judas Iskariōde mwǎn awē Simōne mewēmtēn mé mbéb ásóled áte ásóm Yesue.

³ Yesue ambíí aá eche Sán abagé mekan mé syāāl áwe mekáá. Ambíí-'e aá mōhūū wée Dyōb mótíme-'e ámbíd wée Dyōb.

⁴ Ade bédyágkē ndyééd nê, Yesue anhidé ásē, ahúd nkob á yǎl, atád tábele á nkog.

⁵ Héé áhédé mendíb á kúmbe-tê, bon ábootéd ábē bembapē mekuu awobe, ápínnǎd tábele awē ánwāá' é á nkog.

⁶ Ade ápedé wée Simōn Petro dōó Simōne ásedtéé mó aá, "A-Sán, ehede me mekuu awobe-ye?"

⁷ Yesue ankwentén mó aá, "Weéhēlēē-se esóntén dyam áde mbeléé bōob, bon ámbíd e mímén mé syāāl dōó wésōntēnnē."

⁸ Héé Petro áhóbēé aá, "Aáy, weéwōbpéé me mekuu mbéd." Yesue antímtén mó aá, "Nzé meéwobpe we mekuu né wéewóngé dyamdyam abelen ne me."

⁹ Simōn Petro anláá mó aá, "A-Sán, né saké mekuu mēmpēn-éé wéwobéé me. Wéwobé me káǎne mekáá ne nló!"

¹⁰ Yesue ankwentén aá, "Mod awē amaá mendíb awōg, yǎl esyāál emaá mó asán, eetǎngeneé mendíb awóg ámpē, étōméé áwobe mekuu.* Nyēmaá asán, bon saké nyé moosyāál nyēsáá."

¹¹ Yesue ammǎd abíí mod awē ásóm mó. Née dēnkǎn bon ahób aá saké moosyāál asáá.

¹² Ade amáá bó mekuu awobe, anhé mímē nkob á yǎl, átim ámbíd áwē e'dii. Héé ásedtéé bó aáken, "Nyēsónténé dyam áde mbénlé nyé-ye?"

¹³ Nyēchǎge me Meléede, nyēchǎge-'e me Sǎngwéé. Nyētánjéné, áyāle nê dēn dōó ndíí.

¹⁴ Né-óó, nzé me awē ndé nyé Sǎngwéé mbé-'e nyé Meléede nwōbpé nyé mekuu, né nyēmpē nyētánjéné nhóg ne aníní mekuu awobe.

¹⁵ Nlúmté nyé elǎnsén éche nyētánjéné ahíd ábel nēn nyēmpē nyébel ngáne mbénlé nyé.

¹⁶ Ne mbále nlǎnge nyé nēn meé, mbǎlede eetóméé eche sán, mod awē bélómé-'e eetóméé mod awē alómé mó.

¹⁷ Bōob áde nyébíí mímén mam, nnam mébē ne nyé nzé nyébele mó.

¹⁸ "Meehóbēé nyé moosyāál. Mbíí bad ábe mǎpwédé. Bon e'yale ábe é'ténlédé á Kálag e Dyōb é'tánjéné alón. Eténlédé nēn bán, 'Mod awē sūmō sedyǎg ndyééd akūnnéné me yǎl.'

¹⁹ Nlǎnge nyé nēn bōob, áde éébēnlédēē ábel nēn nzé ébénlédé, nyédúbe nēn bán, 'Ndíí mó Awē Ndíí.'

²⁰ Ne mbále, nlǎnge nyé nēn meé, kénzéé awē akobé mod awē nlómé, akobé me. Kénzéé-'e awē akobé me né akobé ane awē alómé me."

* **13:10** Donje á kálag dé'só déewóó' é *éetóméé áwobe mekuu*.

Yesue ahóbé á'sō é' pónde áá bésōm mó
(*Mat 26.20-25; Mak 14.17-21; Luk 22.21-23*)

²¹ Ade Yesue áamáá nímén mekan ahób ndutul enlóg mó á nlém-tê, ápanléd-te ábē bembapεε áte aá, “Ne mbále, nlânge nyé nén meé, nyé mod nhóg ábē me á mekáá mé bad bé ekoyí.”

²² Héε ábē bembapεε bénónné á mesó, áyāle bénkēmbíí'ε mod awě ahóbéε.

²³ Mbapεε nhóg, awě Yesue ándəngé, andyě mó á akéb.

²⁴ Dóo Simōn Petro ápebtanné ane mbapεε mid, ahóbē aá, “Sedéd mó mod awě ahóbéε.”

²⁵ Dóo ane mbapεε ásídté Yesue á yāl-tê, ásedté mó aáken, “A-Sán, nzéé ehóbéε?”

²⁶ Yesue ankwentén mó aá, “Mod awě métədéé ewele á díse-tê bonj níbe mó, mó adé ane mod.” Héε átédé ewele, átədté á díse-tê, ábagé Judase, mwān awě Simōn Iskariəde.

²⁷ Akob áde Judase ákóbé échē ewele, Satanε ansól mó áte. Dóo Yesue álângeé mó aá, “Dyam áde ehedéé abel bēl dó á mehélé-te.”

²⁸ Bonj mod ké nhóg awě bóbəo bədyágé'áá ndyééd enkənsōnténné chōm-εε ékóá bonj Yesue aláá Judase nē.

²⁹ Ngáne édíí bán Judase mō akōngé'áá ekwe é mənέ, donje á bembapεε bənwēm-tēn bán Yesue álânge mó aá áke áchan bwēm ábe bēbenlédte á ngande, ké'ε chōm éche bēbεé betóótökē bé bad.

³⁰ Ade Judase ákóbé ewele éche Yesue ábágé mó kobén, ambíd ebwóg. Ehíntén énkwe.

Yesue abagé mbéndé e ekóólé

³¹ Ade Judase áamáá abíd dóo Yesue ahóbéε aá, “Bəəb-pəə ehúmé e Mwān-a-Moonyon ényínnédé. Ehúmé é Dyəb-pe ámpē ényínnēd mbwiined ne mwān.

³² Nzé Dyəb ákúde ehúmé ámbíd e Mwān, né Dyəb dēn ámpē débēl ehúmé é Mwān ényínned. Abēl-le nē ábwəg-ábwwg.

³³ A-baányan, echem pónde ábē ne nyé, edé esón. Nyéēhəd me, bonj ngáne ménlāā'ε bad bé Israel, melemlem nē dóo nlangeé nyé bəəb, meé, 'Wéε nkagké, nyéehēnlé ape áhed.'

³⁴ Mbage nyé mbéndé ekóólé bəəb, nén nyédəj nhóg ne aníníí. Ngáne rídáá nyé, nyémpē nyédəj nhóg ne aníníí.

³⁵ Nzé nyédəá nhóg ne aníníí, né mod téé ábīí aá nyédíi ábēm bembapεε.”

Yesue ahóbé ngáne Petro ábāngē mó á yāl
(*Mat 26.31-35; Mak 14.27-31; Luk 22.31-34*)

³⁶ Simōn Petro ansədéd Yesue aáken, “A-Sán, héé ehedéé ake?” Yesue antimtén mó aá, “Weéhēlē-sε ehíd me bəəb wéε nkagké, bonj ámbíd e pónde wēhíd me.”

³⁷ Petro ansədéd mó aá, “A-Sán, cheé ékóá bonj meéhēlē se nhíd we bəəb? Mbōjséné áwé á nló nímōj.”

³⁸ Héε Yesue ákwentanné mó aá, “Ekoó abonjsen dé awé á nló nímēm-ε? Ne mbále, nlânge we meé, nchóm-a-kúb adēhób aá mótō', wēbān me á yāl ngen éláán.”

14

Yesue mó adé Nzii e mbále
echē epεεne alongé

¹ Dóo Yesue ábádeé ábē bembapεε aláa aá, “Nyéētagté nlém á abum. Nyésum nlém wéε Dyəb, nyésum-me káəjne áwēm.

² Tonj ébúú áte á ndáb echē echem Sán. Nkag-ke áwed ábonjsen nyé hōm. Nzé énkēmbé nē, né menkēnláá'ε nyé meé nkag nyé hōm abonjsen.

³ Nzé nkii-'ε nyé hõm abonʒen, mǝtɪm ámbɪd, nhye ntéd nyé ábè ne me, ábel nyémpē nyébê hõm áde ńdíí.

⁴ Nyébíí nzii echè etime' wée nkagké.”

⁵ Héε Tomase álángeé mó aá, “A-Sán, séebíí'ε wée ékagké. Chán-nō sébwéé nzii abii echè etime áwed?”

⁶ Yesue ankwentén mó aá, “Mée ndé nzii eché ekag wée echem Sán, mbále ehúε' ne me, me-'aá mbage alongé. Modmod eéhēlēē-se ápe wée echem Sán, ésebán abwedé áwēm.”

⁷ Héε Yesue álángeé ábē bembapεε aá, “Bɔɔb áde nyébíí me, nyéebɪɪ kóǝne echem Sán.* Bootya bɔɔb nyényíné mó, nyébíí-'ε mó.”

⁸ Filibe anláá mó aá, “A-Sán, lúméd-te sé Titée. Chõm ésyāal éche séhedéé éetóméé nê.”

⁹ Yesue ankwentén aá, “A-Filib, nkémbē ne nyé á etún é póndé, chán-nō éheléé-se ehób wée móbíí'ε me? Kénzée awě anyíné me né anyíné Titée. Chán-nō éheléé-se ehób wée 'Lúméd sé Titée?”

¹⁰ Weedúbpεé wée echem Sán adii me áte, me-'ε mbé mó áte-yε?” Héε Yesue álángeé ábē bembapεε aá, “Mam nime ńlángeé nyé méebídeé áwēm dēn. Bon echem Sán awě adé me áte mō abele nímē nsón.

¹¹ Nyédúbe me ngáne ńhóbé meé echem Sán adii me áte, me-'ε mbé mó áte. Nzé nyéedúbpe nê, nyédúbé ké áyāle mam mé menyáké nime ńbéléé.

¹² Ne mbále, nlanje nyé nén meé, kénzée awě adúbpε me, ábēl mam nímē ńbéléé. Abēl-le kóǝne mekan nime métómé nímén áyāle nkag wée Titée.

¹³ Mēbēl-le kéchéé éche nyésédté á dɪn ádēm ábel nén ngum eché Titée ényinned ámbɪd e Mwān.

¹⁴ Nzé nyésédté me kéchéé á dɪn ádēm, mēbel chó.”

Yesue aá móālõm Edáádǝn éche Esáá

¹⁵ Yesue ambád ahób aá, “Nzé nyédáó me, né nyééhɪd échem mbéndé.

¹⁶ Mēlāá Titée, ábē-'ε nyé Nwõngene ampée, awě ábē ne nyé á ngíndé ne á ngíndé.

¹⁷ Ane Nwõngene mō adé Edáádǝn éché ébɪdte' mbále áwed tǝngene Dyõb. Bad bé nkõnsé béeheléé-se békob mó, áyāle béenyínē mó, béebii-'aá mó. Bon nyébíí mó áyāle adé ne nyé, ábē-'ε nyé áte.†

¹⁸ Nzé nkii, méetédéé nyé menyuu. Mǝtɪm ámbɪd áwēn.

¹⁹ Mwāmpɪn mí póndé, nkõnsé méenyínné me ampē. Bon nyépen nyéenyín me. Ngáne mēbēē á alongé, nyémpē nyéēbē.

²⁰ Nzé éché epun épédé, nyéebɪɪ bán ndé echem Sán áte, nyé-'ε nyébé me áte, melemlem ngáne me-'ε ńdíí nyé áte.

²¹ Kénzée awě akobé échem mbéndé, áhɪdē-'ε chó, mō adé mod awě adáó me. Kénzée awě adáó-'ε me, echem Sán mó-'ε ádǝn mó. Mémpē mēdǝn mó ńlúméd-te mó yǎl.”

²² Dóó Judase (saké Judas Iskariõde) áhóbéé aá, “Bon A-Sán, chán wélumēdté sé yǎl bon weelúmté nkõnsé pen?”

²³ Yesue ankwentén aá, “Nzé mod adáó me, áhɪd ábēm e'yale. Echem Sán ádǝn mó, sé echem Sán-'ε séēpě áwē, sédyēē-'ε ne mó.

²⁴ Nzé mod eédáó me, eehídéé ádēm ayáge. Adén ayáge áde nyéwógé déesaá ádēm. Adii áde Titée awě alómé me.

²⁵ “Nlángé nyé nímén mésyāal áde ńdíí ndé ne nyé.

²⁶ Nwõngene, Edáádǝn éche Esáá awě Titée álõmmē á dɪn ádēm, áyāgēd nyé mekan mésyāal ábēl-le nyékamtán mekan mésyāal nime ńlángé nyé.

* **14:7** Bɔɔb áde nyébii me, nyéebɪɪ kóǝne echem Sán; donje á kálag dé'só áwóó nzé nyénkõn me abii, né nyéebɪɪ kóǝne echem Sán. † **14:17** Abē-'ε nyé áte; donje á kálag dé'só áwóó adé-'ε nyé áte.

²⁷ Nsanj móo nlyágnédé nyé. Mmêm nsanj móo mbagεé nyé. Meébāgēē nyé mó ngáne nkõjsé mbagεé. Nyéētagté nlém á abum, nyéewógé mbwóg.

²⁸ Nyênwóg née nhóbé meé ‘Mětedé nyé bonj mětīm ámbīd áwēn.’ Nzé nyëndāñ me né nyéewóg menyinje bán nkag wée Titée áyāle Titée atómé me.

²⁹ Nlāngé nyé nēn bāab áde éēbēnlēdēē, ábel nēn nzé ébēnlédé, nyédúbe.

³⁰ Syánē déebudté pónde awónj ákal ámpē, áyāle nkamlenε a nkõjsé ahúε’. Eewóó’é ngine ké póg ámin echēm.

³¹ Bonj kēnē mēchennéd mó yāl mbēl ngáne echem Sāñ áhóbé aá mbēl, ábel bonj nkõjsé mbīi nēn bán, ndāó echem Sāñ. Né-’aá ákás bonj mbēlé kéchéé éche áhóbé aá mbēl.

“Nyéhyag syánē déhide hén.

15

Yesuε m̄ akoó alín dé epum á bwel abé

¹ “Mε-εé ndé alín dé epum é bwel, alín dé epum é bwel dēn dēn. Echem Sāñ-’ε abé mbēlé-nzag.

² Ahúde’ ngen ké ehéé echē edé me á yāl, echē eechyáá’ e’pum, ápagké-’ε ké ehéé echē echyáá’ e’pum, ábel bonj ébonj yāl ébude-’ε achyáa.

³ Ayáge áde n’yágté nyé ábélé nyēmaá asāñ.

⁴ Nyélyæg nyébē ne me, mémpē mēlyæg mbé ne nyé. Ngen chēn eéhēlēē-se echyáá e’pum áde éesaá á alín á bwel. Melemlem née nyémpē nyéehelée-se nyéchyáá e’pum ésebán nyédé ne me.

⁵ “Mε-εé ndé alín dé epum é bwel, nyé-’ε nyébé ngen. Nzé mod adíi adé ne me bonj mε-’ε ndé ne mó áchyāa e’pum bwāmbwam. Nyééhēlēē-se nyébēl dyamdyam ésebé ne me.

⁶ Nzé mod eésē ne me, béhūd mó née ngen. Ene ngen ebélé ekíntéd. Béladéé échē ndín é ngen áte, bébwém chó á muú-te, éhyāj-’ε.

⁷ Nzé nyédíi nyédé ne me, bonj ádēm ayáge-’ε adíi adé nyé áte, kéchéé éche nyésédté, nyéēkūd.

⁸ Edúbé éche echem Sāñ ényínnad nzé nyébudé e’pum achyáa, nē-’aá débēl nyébé ábēm bembapεε.

⁹ Ngáne echem Sāñ ádás me, melemlem née mémpē rídás nyé. Né-óo nyédíi nyébē ne me ábel bonj mbē rídāñ nyé.

¹⁰ Nzé nyéhídé échēm mbéndé, né mēbē rídāñ nyé. Melemlem nē dáo nhídéé mbéndé échē echem Sāñ, adíi adāó-’ε me.

¹¹ Nlānge nyé nímēn mēsýāāl ábel nēn nyémpē nyéwôg nyaa e menyinje echē ríwogεé, nímēn menyinje mélôn-ne mbon.

¹² Echem mbéndé edíi nēn, nyédāñ nhóg ne aníníi melemlem nēñgáne rídás nyé.

¹³ Nzé mod awédé á nló mí baáb, né alúmté edānge éche étómténé achab ámin.

¹⁴ Nzé nyébēle’ mekan níme nílāngé nyé meé nyébēl né nyédíi ábēm besón.

¹⁵ Meéchāgēē nyé bembaledε ámpē, áyāle bembaledε béēbyēē’ε mam níme echab sāj ábeléé. Bonj níchāgεé nyé meé ábēm besón áyāle nílāngé nyé mam mēsýāāl níme echem Sāñ álāngé me.

¹⁶ Nyéēpwεdεé me, bonj mε-εé mpwεdé nyé, nlóm-me nyé ábel mekan níme méchyáa e’pum é’ bwām. Nyaa é mekan échē ébē abé ne abé. Nzé nyébēlé-’ε nē, echem Sāñ ábē nyé kéchéé éche nyésédté á dīn ádēm.

¹⁷ Mmēn mam mēsýāāl níme nílāngεé nyé-óo, médíi nēn meé, nyédāñ nhóg ne aníníi.”

Bad bé nkõjsé békáo nyé

18 Yesue ambád ábē bembapεε aláa aá, “Nzé nkõjsé nkóó nyé, nyébíi nén bán mée bésébpé akóó.

19 Nzé nyémbe nêngáne bad bé nkõjsé, né nkõjsé métēd nyé nêngáne ábē bad. Bon mpwεdé nyé átíntē e bad bé nkõjsé. Nyéesaá bad bé nkõjsé. Né-’aá akóó bon nkõjsé nkóó nyé.

20 Nyéwēmtēn ehób éche ménlāā’ é nyé mée ‘Mbaledε eetómée eche sán.’ Nzé bēmbané mε á metake-tē né bēbané nyémpē á metake-tē. Nzé bēnhíd ádēm ayáge né bēhíd-tε ádēn ámpē.

21 Bēbel nyé nímén mekan mésyāāl á yāl á dīn ádēm, áyāle béebíi’ é ane awē alómé mε.

22 Nzé menkēmpē bon nláá bó nímén mam, né nímab mbéb méenyínnedεé. Bon bōob, béewóó’ é nzom ké póg ayāle nímab mbéb.

23 Kénzée awē akóó mε, akóó kóóne echem Sán.

24 Nzé menkēmbel ndín é mam átíntē echáb éche mod ampée éēbēlēē mbéd, né nímab mbéb méenyínnedεé. Bon bōob bényíné mekan mésyāāl níme nībélé, ké nē bédii békóó mε, békóó-’ε echem Sán.

25 Nén ádé álóned e’yale ábe é’ténlédé á mbéndé echáb bán, ‘Nzom ké póg enkēmbáá eche békóóné mε.’

26 Nwõngene ábíd wée Titée. Adii Edáádān éche ébele’ bon bad bésõhtēn mbále. Adē mébēē ne Titée mēlōmē nyé mó, mó-’aá álāā nyé mam tãngene mε.

27 Nyémpē nyéēhōb mam tãngene mε ayāle nyêdé ne mε se á mbooted.

16

1 “Nlãnge nyé nímén mésyāāl ábel bon nyéētínné mbíd.

2 Bēbídēd nyé á ndáb é mekáne. A mbále póndé ehúe’ eche kénzée awē áwūū nyé áwēmtēnnē aá móbēnle Dyõb.

3 Bēbēl nímén mam ayāle béebíi’ é echem Sán béebíi-’aá mε.

4 Nlãngé nyé nímén mam mésyāāl ábel bon nzé póndé epedé echē nímén mekan mébenladté, nyéekamtēn bán menláá’ nyé.

Nsón níme Edáádān ébenlé

“Menkēnláá’ é nyé nímén mekan á mbooted, ayāle membé ne nyé.

5 Bon bōob, nkag wée mod awē alómé mε. Ké nē, nyé modmod nyéesedté mε bánken ‘Hée ékagké?’

6 Aláa ádé nlãngé nyé nímén mekan ábélé ndutul elógé nyé á nlém-tē.

7 Ne mbále, nlãnge nyé nén mée, édé mbon nén bán nkε. Ayāle nzé meékii, né Nwõngene éepaá áwēn. Bon nzé nkií, mēlōmē nyé mó.

8 Ade ápée, álūmēd bad bé nkõjsé nén aá nímab nsõhtēn níme bēwánlé tãngene ábel dé mbéb ne ábel mekan níme mėsáá méetãngeneé. Béēsõhtēné-’ε nyaa echē Dyõb akáadté.

9 Mmab nsõhtēn méetãngeneé tãngene mbéb, ayāle béedúbpée mε.

10 Méetãngeneé tãngene ábel dé mekan níme mėsáá, ayāle nkag wée Titée, nyéenyín-naá mε ámpē.

11 Méetãngeneé tãngene nyaa echē Dyõb akáadté, ayāle amaá nkamlεε a nkõjsé akáad.

12 “Ndii nwóó ekud é mekan áláa nyé bon nímé mekan métom nyé áte.

13 Bon áde Edáádān é mbále épée, ábēl nyébíi mbále esyāól. Eehóbēnné echē kunze chēn. Dyam áde bēlāā’ é mó dóó áhōbpē, álāā-’ε nyé mam níme mébenléd póndé echē ehúe’ á’sō.

14 Achāgēd échēm edúbé ámīn ayāle kéchéé éche áwógé áwēm chóó mó-’ε álāā’ é nyé.

15 Kéchéé éche echem Sán áwóó édii échêm. Nê dóo ákóá bon ríhōbē meē Edāádān étēd kéchéé éche ríhōbé, éláá nyé.”

Ndutul ɛ̀tīm menyinḡe

16 Hée Yesue ábádeé aá, “Mwämpin mí pónde nyéenyinné me ámpē, mwämpin mí pónde-’ε ámbid enê nyéenyin me.”

17 Dóo donḡe dé bembapεε bésedteé nhóg ne aníní bánken, “Cheé áwémténé ahób, áláa syánē aá, ‘Mwämpin mí pónde nyéenyinné me ámpē, mwämpin mí pónde-’ε ámbid e nê nyéenyin me?’ Ahób-pe ámpē aá, ‘Áyāle nkag wée Titée.’ ”

18 Bémbe bésedte bánken, “Cheé áwémténé ahób, ahób aá, ‘Mwämpin mí pónde?’ Séesōhtεneé dyam áde ahóbé.”

19 Yesue ammād abii aá, béhede mó dyam aseded. Né-óó, anláá bó aá, “Dyam áde ríhōbé meé, ‘Mwämpin mí pónde nyéenyinné me ámpē, mwämpin mí pónde-’ε ámbid e nê, nyéenyin me,’ dóo nyésedteé nhóg ne aníní-ye?”

20 Ne mbále, nlánḡe nyé meé, nyéechii, nyéléb-pe, bon nkōnsé méwōḡ menyinḡe. Nyéēsudén, bon míme nsuden méttim menyinḡe.

21 Mmwaád awē ahede achyáá abelé ásuden áyāle eche pónde e metake epedé. Bon nzé amaá achyáá abelé awóg menyinḡe, áyāle moonyon achyáádté á nkōnsé.

22 Nê dóo édii ne nyé. Nyésūdne bōob, bon mēnyin nyémpē. Ene pónde mímen nlém mélōn ne menyinḡe, modmod éhēnlé-’aá nyé míme menyinḡe akoben.

23 Ade échē epun épeé, nyéesedédté me dyamdyam. Ne mbále, nlánḡe nyé nén meé Titée ābē nyé kéchéé échē nyésédté á dīn ádēm.*

24 Káāne bōob nyéēhēdnē mó chōmchōm á dīn ádēm. Nyéheden mó, nyéekūd ābel nén mímen menyinḡe mélōḡ mbon.”

Yesue atómé nkōnsé áte

25 Yesue ambád ábē bembapεε aláa aá, “Mbēnlédé ngan áláa nyé ekud é mekan. Pónde ehúε’ échē méebenlédte ngan. Mélāā-’ε nyé mekan tñḡene Titée, nyaa échē nyésōhtēnnē.

26 Echē epun, nyéēhedén mó kéchéé á dīn ádēm. Méetōḡén-naá mó aláa meé áwōḡen nyé,

27 áyāle Titée mwēn adāá nyé. Adāá nyé áyāle nyédāá me, nyédúbpe-’ε bán mbídé áwē.

28 Membíd wée Titée, mípe á nkōnsé-te, bōob-pe ntedte nkōnsé, ntime ámbid wée Titée.”

29 Hée ábē bembapεε béhóbéé bán, “Ehóbe bōob ngáne sésohtēnnē, weebenlédte ngan.

30 Sēbii bōob bán ebii mekan mésyāāl, éhēdnád-taá bán modmod áseded we dyamdyam. Nén ábéle sédúbpe bán ebídé wée Dyōb.”

31 Dóo Yesue ákwentanné bó aá, “Nyédúbpe bōob-ε?”

32 Nyénōne! Pónde ehúε’, emáá-’ε ape, áde nyépāhtēdté áte. Mod téé atóm mehélé wée ábídé, nyétēdē mmēmpen. Bon ké nê, meésaá mmēmpen, Titée adé ne me.

33 Nlánḡe nyé mímen mekan ābel nén nyébē nsan abé áde nyédii ne me. Nyéekūd metake á nkōnsé-te bon nyéwēd nlém á abum. Ntómé nkōnsé áte.”

17

Yesue akánnédé eche yāl

* 16:23 Titée ābē nyé kéchéé échē nyésédté á dīn ádēm: donḡe á kálag áwóó Nzé nyésédté Titée kéchéé, ābē nyé chó á dīn ádēm.

¹ Ade Yesue áamá nímén mekan mésyāāl ahób, dǒo ánóné amīn bonj áhōbē aá, “A-Tê, pǒndé emaa apε. Lúméd bad ehúmé échě awonj Mwǎn, ábel nén awonj Mwǎn mómpē álúmed ehúmé échōj.

² Ebágé mó kunze ákamlen moosyāál, ábel nén ábe bad bésyāāl ábe ébágé mó alongé áde déemaá’.

³ Alongé áde déemaá’ ádíi nén bēbii wε, mmōn awě edé Dyōb á mbále, ne ábii Yesu Krīstə, awě élómé.

⁴ Mbídté échōj ehúmé áwed á nkōjsé amad áde nímádé nsón níme ébágé mε.

⁵ Bǒǒb-pǒǒ a-Sánj, bídéđ échēm ehúmé áwed, wéε mmōj edíi. Melemlem mé edúbé níme ménwōngē ne wε, nkōjsé ndé ahób bán níbootad.

Yesue akánnédé abē bembapεε

⁶ “Mbélé bad bé nkōjsé ábe ébágé mε bēbii wε. Bébédéε ábōj, wembě mε bó, bēbélé-’ε ngáne ehóbé wéé bēbel.

⁷ Bēbii bǒǒb bán kéchéé éche ébágé mε, ébíde áwōj.

⁸ Nlángé bó mam mésyāāl níme élánjé mε wéé rílaa bó, bédúbpé-’ε nímé mam. Bēbii ne mbále bán áwōj dǒo níbíde, bédúbpé-’ε bán wε-εé élómé mε.

⁹ Nkánnad bó. Meekánnádté bad bé nkōjsé. Bonj nkánnad bad ábe ébágé mε, áyāle bēdii ábōj.

¹⁰ Bad bésyāāl ábe bédé ábēm bēdii ábōj, ábōj-’ε bésyāāl bēdii ábēm, bēbídté-’ε échēm ehúmé áwed.

¹¹ Bǒǒb-pǒǒ, mwǎmpīn ní pǒndé méebáá á nkōjsé-te ámpē. Bonj bēdii bédé á nkōjsé-te. Nhyag áwōj. Titée awě Asáá, kǎá bó á ngíne e dīn ádōj, dīn áde ébágé mé. Ngíne echě ébágé mε ábel nén bēbē mod nhóg, melemlem ngáne sóo-’ε ámpē dédíi mod nhóg.

¹² Ade nábédé ne bó, menkǎá bó á ngíne e dīn ádōj, dīn áde wēmbéε mε.* Nkǎngé bó, bó mod ké nhóg-ke eebǒǒ’é étōmεé mod awě émmadté abé bán ábǒǒ ábel bonj ébenled ngáne éténlédé á kálag e Dyōb.

¹³ Bǒǒb-pǒǒ, nhyag áwōj. Nhóbe-’ε nímén mekan ngáne ndii ndé á nkōjsé ábel bonj nímāb menyīnge mélōn mbon, melemlem ngáne nímēm-mε mélóné mbon.

¹⁴ Nlángé bó mam mésyāāl níme élánjé mε wéé rílaa bó. Bǒǒb-pǒǒ bad bé nkōjsé békǒǒ bó áyāle béesaá bad bé nkōjsé ámpē, melemlem ngáne mε ámpē méesaá mod a nkōjsé.

¹⁵ Meehóbéε méé éhúd bó á nkōjsé-te, bonj nhóbe’ méé ékǎá’ bó ábel bonj Mod e Ebébtéd eébēlē’ bó mbéb.

¹⁶ Béesaá bad bé nkōjsé melemlem nēngáne méesaá mod a nkōjsé.

¹⁷ Benléd échōj mbále ábel bonj bēhel wε abεle. Echōj eyale édé mbále.

¹⁸ Nlómé bó á nkōjsé-te melemlem nēngáne wémpē wénlōmmē mε á nkōjsé-te.

¹⁹ A etútú écháb membě echem yǎl ábele wε ábel bonj bómpē bébe échab yǎl ábel bonj békōj wε abεle.

Yesue akánnédé bad abē bédúbé mó bésyāāl

²⁰ “Meekánnádté ábēm bembapεε bēnpēn bonj nkánnad kǎǎjne bad ábe bédúbpé mε áyāle mam níme bēwógé áwāb.

²¹ Nkánne’ méé bó moosyāál bēbē mod nhóg. A-Tê, bó moosyāál bēbē mod nhóg ne sóo, melemlem nēngáne edíi ne mε, mε-’ε mbé ne wε. Bēbē mod nhóg ábel nén nkōjsé ndúbe bán wε-εé élómé mε.

* **17:12** Menkǎá bó á ngíne e dīn áde wēmbéε me: donje a kálag awóó á ngíne e dīn ádonj ménkǎá bad abē ébágé me.

²² Ehúmé éche ébágé me, me-’ε mbagé bó. Mbagé bó ábel bonj bébê mod nhóg melemlem nêngáne sóo dédíí mod nhóg.

²³ Ndé mod nhóg ne bó, we-’ε edé mod nhóg ne me. Nén débël békōη mod nhóg abé. Békōη mod nhóg abé ábel bonj nkōηsé mbíi bán we-εé elómé me, bébii-’ε bán edáá bó melemlem nêngáne édáá me.

²⁴ A-Tê, ebagé me bó, bébê wée ndíí, ábel bonj bényín echēm ehúmé. Wembě me ehúmé áyāle wendāη me se á mbooted mé nkōηsé.

²⁵ A-Tê, we-εé ebele mam nímě mesáá. Nkōηsé méebíí’ε we, bonj mbíí we, ábén-ne ámpē bébii bán we-εé elómé me.

²⁶ Mbélé bébii we, mēbēl-le ámpē ábel nén edāηge échě édáá me ébê bó áte, me-’ε ámpē mbê ne bó.”

18

Békóbé Yesue

(*Mat 26.47-56; Mak 14.43-50; Luk 22.47-53*)

¹ Ade Yesue amáá akáne, bóobe ábē bembapεε bēnhidé, béchābē mwā edíb a Kidrōn ámin. Nzag embé áhed, bénsāl áwēd-te.

² Judase, ntúré awě Yesue ambíí adē abwóg á hōm, áyāle Yesue ne ábē bembapεε bēmmētén aladen áhed.

³ Né-óó, Judase antómén echon é sánze ne bembaledε bé Ndáb-e-Dyōb ábe beprise bémbáá ne Befarisia bénlōmmē, békē wée Yesue ábédé. Abē bad bēnhōd e’kag, béwálé e’trúkāη ne bwēm é’ nzum.

⁴ Yesue ammad mam mésyāāl míme mébenléd ne mó abíi, ké nê, ambídéd yāl áwed, ásēdēd bó aáken, “Nzé nyéhedeé?”

⁵ Bēnkwentén mó bán, “sēhede Yesue, mod a dyad á Nazaret.” Yesue ankwentén bó aá, “Me-εé ndé mó.” Judase ntúré awě Yesue ambé áhed ne ábē bad.

⁶ Ade Yesue áhóbé aá, “Me-εé ndé mó,” bēntimén mbíd, bēkwē ásē.

⁷ Hē dōo Yesue ásedtēé bó ámpē aáken, “Nzé nyéhedeé?” Bēnkwentén bán, “Yesue a dyad á Nazaret.”

⁸ Hée Yesue ákwentanné bó aá, “Nlāngé nyé meé, me-εé ndé mó. Né-óó, nzé nyéhede me, nyētēdē ábén bad ábe bédé ne me, békag.”

⁹ Nén dēmbenléd álóned e’yale ábe ánhōbpē aá, “A-Sāη, átíntē e bad ábe wēmbéé me, meebódéé ké nhóg.”

¹⁰ Simōn Petro anwálé nkwáté. Hée ádólé míme nkwáté bonj átōmtē’, ásēlē etúu é ekáá é mbáá é mbaledε awě prise ambáámbáa. Ane mbaledε abédé dīn bán, Malkuse.

¹¹ Yesue anláá Petro aá, “Timéd nkwáté á abám. Nédē, meetēηgenéé metuné míme echem Sāη átíínédé me akud-ε?”

Békééné Yesue wée Anase

¹² Hée échē echon é sánze ne awāb mod ambáá nchoo ne bembaledε bé bad bé Israel békóbé Yesue béhanj mó.

¹³ Bénsēbē mó akεen wée Anase. Anase abédéé sāj-kálé awě Kaifase awě abédé prise ambáámbáa míme mwě.

¹⁴ Kaifase ne, mó ambě bad bémbáá bé Israel elébé aá ébóó bán mod nhóg áwê á nló mí bad bésyāāl.

Petro abáá Yesue á yāl

(*Mat 26.69-70; Mak 14.66-68; Luk 22.55-57*)

¹⁵ Simōn Petro ne mbapεε ampée behídé’áá Yesue. Prise ambáámbáa ambíi ane mbapεε, né-óó ane mbapεε ansól eyáde éche prise ambáámbáa wée bénsālennē Yesue.

¹⁶ Petro pen anlyǝg á mmwe mé e'ké. Dóo ane mbapεε awě prise ambáambáa ámbíí'é átímé ámbíd á mmwe, ákālēn ngǝndéε echě enǝné'áá mmwe bon ǝsǝltē Petro á eyáde-tē.

¹⁷ Ene ngǝndéε ansedéd Petro aáken “Kíné wémpē weésaá mbapεε nhóg awě ane mod-ε?” Petro ankwentén mó aá, “Aáy, meésaá.”

¹⁸ Bǝǝb-pǝǝ, ahéb démbē. Né-ǝǝ, bembǝledε ábe prise ambáambáa ne bembǝledε bé Ndáb-e-Dyǝb bēnkoned muú bétyéém áhed bēwāle'. Petro mómpē ambé áhed, atyéém áwālē muú.

*Prise ambáambáa akáadte Yesue
(Mat 26.59-66; Mak 14.55-64; Luk 22.66-71)*

¹⁹ Prise ambáambáa esǝdté'áá Yesue tǝngene ábē bembapεε ne ádē ayáge.

²⁰ Yesue ankwentén mó aá, “Mam mésyǝl níme rílánǝg'áá bad nhóbé'áá mó á nhéné. Ayǝged ádēm ǝsyǝǝl-'ε, ábédé á Ndáb é mekáne ne á Ndáb-e-Dyǝb wéε bad bé Israel bésyǝǝl bēladnéé. Meéhóbéé-'ε dyamdyam á kun-tē.

²¹ Cheé-ǝ ésedtéé me ámpē. Sedéd bad ábe bēnwǝg mam níme rílánǝg bǝ. Bébíí mam níme ríhóbé.”

²² Ade Yesue áhóbé nē, mbǝledε nhóg ambǝm mó abén ahób aá, “Chán éhele éhǝbē' nē wéε prise ambáambáa?”

²³ Yesue antimtén mó aá, “Nzé nhóbé dyam áde déetǝngene, ehób dó moosyǝǝl áwǝg. Bon nzé édé bán nhóbé dyam áde átǝngéné, cheé ékáá bon ébǝmé me?”

²⁴ Dóo Anase áhóbé aá, békεen Yesue wéε Kaifase, prise ambáambáa. Yesue ambé abé á mehan.

*Petro abáá Yesue á yǝl ámpē
(Mat 26.71-75; Mak 14.69-72; Luk 22.58-62)*

²⁵ Bǝǝb-pǝǝ, Simǝn Petro ambé atyéém áhed áwālē muú. Héε bad ábe bēmbē áhed bésǝdtéé mó bán, “Kíné wémpē weésaá mbapεε nhóg awě ane mod-ε?” Petro antán aá, “Aáy, meésaá.”

²⁶ Mbǝledε awě prise ambáambáa nhóg, mwǝnyan móo Petro ánsēnlē etúu, anchǝgéd ehób ámín, aláá Petro aá, “Kíné meenyínéé nyúmǝ á nzag-tē-yε?”

²⁷ Petro antán ámpē. Abwǝg-ábwǝg, nchóm a kúb antón.

*Payledε akáádté Yesue
(Mat 27.1-2, 11-14; Mak 15.1-5; Luk 23.1-5)*

²⁸ Bad bé Israel bēnhidnéd Yesue á ndáb wéε Kaifase békēēn mó á eyáde e nkamlεε ambáá. Nén ábédé epǝg é mbwεmbwε. Bēn bēnkēnsónlé á ndáb-te ábán nén béenyínnád mbinde á'sǝ é' Dyǝb * ábel bédyē Ngande e Nnyíme-ámín.

²⁹ Né-ǝǝ, Payledε nkamlεε ambáá a bad bé Roma, ambíd e ebwǝg áke atán bǝ, ǝsedtéé bǝ aáken, “Awusé áhéé nyéhóbé bán anén mod abelé?”

³⁰ Bēnkwentén mó bán, “Nzé anén mod enkēmbé ebébtéd é mod, né séēbagéé mó áwǝng mekáá.”

³¹ Payledε anláá bǝ aá, “Nyé bēn nyétéd mó, nyébenled mbéndé echēn nyékáád mó.” Héε bad bé Israel bēlánǝg'é mó bán, “Séewóó'é kunze áwúu mod.”

³² Nén démbēnléd áloned e'yale ábe Yesue ánhǝbpē álúmed nyaa e kwééd eche áwēē.

³³ Payledε ansól á ndáb-te ámpē, áchǝg Yesue, ǝsēdéd mó aá, “Wε-εé édé kǝn e bad bé Israel-lε?”

* **18:28** Bad bé Israel bēndūbē nén bán nzé mod ǝsólé á ndáb e mod awě eésé mod a Israel, né awǝgté yǝl mbinde. Ne bǝ, enén ndín e mod ebágáá mbinde á'sǝ é' Dyǝb epun saámbe. Enén pǝndé esyǝǝl éhele'aá-se adyé Ngande e Nnyíme-ámín.

³⁴ Yesue ankwentén aá, “Mmõn-εέ ehóbe nê ngé bad bémpēe bóó bélāngē we mam á yǎl echēm?”

³⁵ Paylede ankwentén aá, “Ndé mod a Israel-le? Abõñ bad ne beprise bémbáá bóó bébágé we áwēm mekáá. Cheé ébélé?”

³⁶ Yesue ankwentén aá, “Mmēm nkamlen méesaá á nkõñsé wén. Nzé nímēm nkamlen mémbē á nkõñsé wén, né ábēm bembælede béwǎn, ábel nén bad béebagé me á mekáá mé bad bé Israel. Boñ nímēm nkamlen méesaá mé nkõñsé.”

³⁷ Dóó Paylede ásedtéé mó aá, “Nédē edé kñ-ε?” Yesue ankwentén aá, “We-εé ehóbé wεé ndé kñ. Nzom echē ekáá boñ béchyáá me, nípē á nkõñsé wén, edii ábid mbõñ e mbále. Mod ké ahéé awē adé mod a mbále awóglan me.”

³⁸ Paylede ansedéd mó aá, “Cheé édé mbále?”

Bán Yesue atāngéné awé

(Mat 27.15-31; Mak 15.6-20; Luk 23.13-25)

Ade Paylede amáá mó aseded nén, ambíd á ebwóg ámpē ake atán bad bé Israel, anláá bó aá, “Meekóbnεé anén mod awusé ké ahóg áde méhõbpē méé béwúu mó.

³⁹ Boñ nyêwóó elem nén bán, ntāngéné nyé mod a mbwõg nhóg abídted á pónde e Ngande e Nnyíme-ámín. Nyêdóá bán mbídted nyé kñ e bad bé Israel-le?”

⁴⁰ Bēnkwentén mó ne e’saad bán, “Aáy! Sééhēdēē mó. Bídtéd sé Barabase.” (Barabase abédé-ε nchíb ambáá.)

19

¹ Dóó Paylede áhóbé aá béke bébõm Yesue.

² Sánze éntēd ngen é mechǎ bélõñ ekóté éche émbē néε ekóté é kñ, béhē mó chó á nló, béhé-ε mó mengombe níme méyage’ á yǎl, nímē méwágné mengombe mé kñ.

³ Bésídté’áá mó benben, béhõbē bán, “A kñ e bad bé Israel, edúbé ébē ne we.” Bébómé’áá mó káñne mebén.

⁴ Paylede ambíd á ebwóg ámpē, aláá ábē bad aá, “Nyénõne’, mbídtaad nyé mó á ebwóg, ábel nén nyébii bán, meekóbnεé mó awusé ké ahóg.”

⁵ Né-õó, Yesue ambíd á ebwóg ne ekóté e mechǎ á nló, megombe nímē méyage’ mó-ε mébé mó á yǎl. Héε Paylede álāngεé bó aá, “Nyénõne’ awedé mod-e nén!”

⁶ Ade beprise bémbáá ne bembælede bé Ndáb-e-Dyõb bényíné mó, bēmbóotéd abón bán, “Bomé mó á awõg! Bomé mó á awõg!” Paylede anláá bó aá, “Nyé bēn nyétéd mó, nyébome mó á awõg, áyāle meekóbnεé mó awusé ké ahóg.”

⁷ Abē bad bēntimtén Paylede bán, “Sēwóó mbéndé echē ehóbe nén bán atāngéné awé áyāle ahóbé aá módii Mwǎn a Dyõb.”

⁸ Ade Paylede áwógé nén, mbwóg mēnnabé mó akób.

⁹ Antīm ámbíd á eyáde-tē ámpē, ásedēd Yesue aá, “Héé ébidé?” Boñ Yesue enkēnkadénné mó.

¹⁰ Né-õó, Paylede anláá mó aá, “Weéhēdēē me akwenten-ε? Weebii’ é nén wεé nwóó kunze áhób méé béchene we, nwõñ-ε kunze áhób méé bébome we á awõg-ε?”

¹¹ Yesue ankwentén mó aá, “Weewóó’ é kunze ké póg ámín echēm ésebán Dyõb ábágé we ene kunze. Né-õó, mod awē abagé me áwõñ mekáá ábelé mbéb níme rítómténé achab ámín.”

12 Ade Payledε áwógé nê anhĕd nzii âtεde Yesuε, bon abê bad bénhē e'saad bán, "Nzé etĕdté anén mod né weésaá nsón awĕ Kaisεε. Kénzĕé awĕ ahóbé aá, módē kĕn né atĕngan Kaisεε."

13 Ade Payledε áwógé nĕn, ambídĕn Yesuε á ebwóg, ádyĕĕ atii dé nkamlĕn. Adĕ hĕm wĕε ándyĕĕ'ĕ béchágé'aá dó bán, Eyáde éche bénábnédé Meláá. A ehób é Hibru béchĕge bán, Gabata.

14 Bɔɔb-pɔɔ, nĕn ábédé á epun é mbonşĕn é Ngande e Nnyíme-ámĭn, dyam kĕd. Payledε anláá abê bad bé Israel aá, "Echĕn kĕn chĕ nĕn!"

15 Abê bad bénhē e'saad bán, "Wúú mó! Wúú mó! Bomé mó á awɔg!" Héε Payledε áseɔtĕé bó aá, "Mbome echĕn kĕn á awɔg-ε?" Beprise bémbáá bĕnkwentĕn mó bán, "Séewóó'ĕ kĕn empĕé étōmĕé Kaisεε."

16 Dɔɔ Payledε ábágé Yesuε áwab mekáá ábome mó á awɔg.

Bébómmé Yesuε á awɔg

(Mat 27.32-44; Mak 15.21-32; Luk 23.26-43)

Né-ɔɔ, bĕnhidnéd Yesuε.

17 Yesuε mwĕn ampém ádĕ awɔg bootya á dyad-tĕ ákĕĕn dó hĕm áde béchĕgeé bán, "Hĕm dé Ebónĕl é Nló," áde béchĕgeé á ehób é Hibru bán Golgota.

18 Ahed-taá bĕmbomĕé mó á awɔg. Bĕmbomé bad bébe bémpĕe á awɔg áhed, nhóg pĕd póg, aníní-'ε pĕd eníní, Yesuε abé átĭntĕ.

19 Payledε antĕl á abámbé aá, "Yesuε, mod a dyad á Nazaret, kĕn e bad bé Israel," abádé á awɔg á nló-mĭn wĕε Yesuε.

20 Wĕε bĕmbomĕé Yesuε á awɔg démbĕ benben ne Jerusalem. Né-ɔɔ, bad híin bĕnlān chĕm éche bĕntenlé. Chĕm éche ántenlé, antel chó á ehób é Hibru, átĕl é ehób é Latin, ne é ehób é Grikia.

21 Beprise bémbáá bĕnlān Payledε bán, "Wĕétĕlĕ wĕé 'Kĕn e bad bé Israel,' tĕl wĕé, 'Anén mod ahóbé aá, mε-εé ndé kĕn e bad bé Israel.' "

22 Payledε anláá bó aá, "Chĕm éche ítĕlé mmaá atel."

23 Ade sánze émáá Yesuε abome á awɔg, bĕntĕd éche mbóté, bĕkabtéd chó áte monĕge méniin, bó mod té atéd akab ahóg. Bĕntĕd káşĕne mbóté eche béhágkĕ áte. Ene mbóté bĕnkĕmbaá'ĕ chó hĕmhĕm. Embé bootya ámĭn ápe ásĕ enkĕnwóŕgé mbom.

24 Héε bĕlāŕgeé nhóg ne aníní bán, "Syánĕ deésālĕ chó. Désid mbambú ányín mod awĕ átĕd chó." Nĕn dĕmbĕnléd álóned e'yale ábe é'tĕnlédé á Kálag e Dyɔb nĕn bán,

"Bĕn ne bĕn bĕnkáb échĕm mbóté.

Bĕnsíd-tĕ mbambú ákab mĭmĕm nsob."

Né-ɔɔ, nĕ dɔɔ échĕ sánze ĕmbĕnlé.

25 Yesuε nyaá, nyaá mwānyan, Maria awĕ abédé Klopase mwaád ne Maria Magdalĕne béntyĕĕm benben ne á awɔg áde Yesuε.

26 Ade Yesuε ányíné nyaá ne mbapεε awĕ ádáá bétyéémé áhed, anláá nyaá aá, "A-nyan, mwān wε nε."

27 Héε álāŕgeé ane mbapεε mómpĕ aá, "Nyoó ne." Bootya ene pónéd ane mbapεε antéd Yesuε nyaá, átĭmĕn mó áwĕ ndáb.

Yesuε awédé

(Mat 27.45-56; Mak 15.33-41; Luk 23.44-49)

28 Ambíd e nĕ, Yesuε annyín aá mekan mésyāĕl mémáá. Alóned-tĕ ngáne étĕnlédé á Kálag e Dyɔb anhób aá "Píd ekóbé mε."

29 Kúmbe embé áhed, ebĕntéd é mĭm énlōg áwĕd-te. Né-ɔɔ bĕntɔdĕ kuchá á ebĕntéd é mĭm-tĕ wĕ, bĕsōm á ntóŕ nĕ nĕn e híşɔb, béhĕ mó á nsal.

³⁰ Ade Yesue ámwédé ebéntéd é mím chê, anhób aá, “Emáá.” Héé ámógé nló, awé-’ε.

Bésóó Yesue akon á aheb

³¹ Bɔɔb-pɔɔ, échê epun ébédé Mbwe mé mbonşén mé mbwe-mé-nkóme-áte. Bad bé Israel-le béehede’aá bán ndim míbé míbê á awɔg á mbwe-mé-nkóme-áte, tanje ngáne échê epun é nkóme áte étōmtēnnē edúbé abé. Né-ɔɔ béntān Paylede bán, ábe bó kunze ábóg bad ábe bébómmé á awɔg mekuu ne áhúd bó á awɔg.

³² Né-ɔɔ, échê sánze ênkě ébóg mekuu míme bad ábe bēmboméé bóɔbe Yesue á awɔg. Bénsēbē míme nhóg abóg, bébóg-ke míme aníníí.

³³ Bon áde bépédé wée Yesue béntān née amáá awé. Né-ɔɔ, bēnkētɔgēnné mó mekuu abóg.

³⁴ Ké nê, sánze póg enson mó akon á aheb. Abwɔg-ábwɔg mekií ne mendíb bémbíd.

³⁵ Mod awě annyín née mímén mekan mébénlédé, abídé mbón, eche mbón edé-’ε mbále. Abíí nén aá, mókale’ mbále, ahóbe-’ε mímén mam ábel nén nyémpē nyédúbe.

³⁶ Mmén mam mébénlédé álóned e’yale ábe é’ténlédé á Kálag e Dyɔb nén bán, “Béebógké ehid échē ké ehóg.”

³⁷ Eténlédé á kálag e Dyɔb ámpē nén bán, “Bénɔn ane awě básóó akon.”

Bélimmé Yesue

(*Mat 27.57-61; Mak 15.42-47; Luk 23.50-56*)

³⁸ Ambíd enê, Josebe awě ambíd á dyad á Arimatia, anláá Paylede aá, ábe mó kunze áted ndim míme Yesue. Josebe abédée mbapεε awě Yesue, bon énkēmbídédte yál áwed áyale abáá’áá bad bé Israel. Paylede ambě mó kunze áted ndim míme Yesue. Né-ɔɔ, ankě Yesue ndim atéd.

³⁹ Nikodemuse awě ansébé Yesue ake dé anyín nkúu, bó Joseb bēnkě. Bédêkě anwálé mekúle míme bēnabnadté ndim mímé bébénlé Mía ne Alɔs.* Adê dyɔg ábédé dyam móom mé kilo meláán ne kilo étáan.

⁴⁰ Béntéd ndim míme Yesue, békāān mó mbóm ne míme mekúle. Nén dɔɔ elem é bad bé Israel ábonşen ndim émbēē.

⁴¹ Bɔɔb-pɔɔ, nzag embé wée bēnwū’ε Yesue. Son e ekóólé ebédé á nzag-té wê, echê bēnkēmpaá ndim ké nhóg abane áte.

⁴² Né-ɔɔ, ngáne échê epun ebédé mbwe mé mbonşén mé mbwe-mé-nkóme áte, ene son-’ε ebé benben, bēmbané Yesue ndim áwēd-te.

20

Yesue apuúdé

(*Mat 28.1-8; Mak 16.1-8; Luk 24.1-12*)

¹ A Sôndé, epɔg é mbwεmbwe, áde ehíntén émbēē ébé, Maria Magdalene ankě á son wée bēnlīmēē Yesue. Ade ápédé áhed, antán née behúdé aláá áde bēnkōlēnnē nsəl ní son. ² Héé átómé mehélé, bon áke atán Simɔn Petro ne mbapεε ampée awě búmɔ bébédé. Ane mbapεε abédée mbapεε awě Yesue ándəngé. Dɔɔ Maria álāngéé bó aá, “Béhúdé Sāngwéé ndim á son-tê, séebíi-’áa wée bébánné mó.”

³ Dɔɔ Petro bó ane mbapεε behídté bon békág á son.

⁴ Bó moosyál bényágté’áá, bon mbapεε aníníí anyágté’áá tómaa Petro. Né-ɔɔ, ansébé ape á son.

⁵ Anwúlén ásē ásad díd á son-tê, anyín mbóm éche bēnkaánné Yesue, bon enkēnsónlé á son-tê.

* **19:39** Alɔs: Abédée mekúle míme bébénládtáá ánabned ndim.

⁶ Simōne ahúé'áá mó ámbíd, apedé-'áá pɛén asól-le á son-tê. Antán mbóm éche bēnkaánné Yesue áhed.

⁷ Antán-ne abad áde bēnkaánné Yesue nló. Adê abad déēbédéé hōm ahóg ne mbóm, déndān áte pɛd póg.

⁸ Héé aníní mbapɛɛ awě ansébé apɛ á son mómpe ásolé áwēd-te. Annyín ábê bwēm, adúbé-'ɛ.

⁹ Ké nê, bēnkēnsōnténné chōm éche éténlédé á Kálag e Dyōb nén bán Yesue atāngéné apuu.

¹⁰ Ámbíd é nê, ábê bembapɛɛ bēntīm ámbíd á ndáb.

Yesue alúmté Maria Magdalene yäl

(Mat 28.9-10; Mak 16.9-11)

¹¹ Βοῶβ-ρῶό Maria anlyōg á nsəl ní son, áchyeé'. Ade áchyeé' é nê dōó áwúnle ásē, bon ásadé díd á son-tê.

¹² Asad áde ásadé díd, annyín ángel ébe. Echê ángel énhē e'púpe é' mbóté, édyēé wée bēnnaádté ndim míme Yesue. Nhóg andyēé á pɛd e nló, aníní-'ɛ á pɛd e mekuu.

¹³ Echê ángel énsedéd Maria bán, "A-mmwaád, cheé échye'é?" Anláá bó aá, "Nchye' áyāle bétédé ndim míme awem Sāngwéé, meebíi-'áa wée bēbánné mó."

¹⁴ Ade ámáá ahób nê, ankunnéd, anyín née mod átyéémé áhed. Ane mod abédéé Yesue bon enkēmbíi' é aá Yesue mó adé.

¹⁵ Yesue asedéd mó aá, "A-mmwaád, cheé échye'é? Nzéé éhedéé?" Maria anwémtén aá mod awě abele nsón á nzag-tê wê mó adé. Né-ρῶό, anláá mó aá, "A-sān, nzé wɛ-ɛé etédé mó ndim, eláá me wée ébánné, ábel bon níke rítéd mó."

¹⁶ Héé Yesue áchəgəé mó aá, "A-Maria!" Dōó Maria ákúnné yäl áwē bon áhóbé á ehób é Hibru aá, "Rabóni!" (awě adé nén bán, "Meléede").

¹⁷ Yesue anláá mó aá, "Weésitán me, áyāle meétíméé ámbíd wée Titée. Bon kág wée ábēm bembapɛɛ, ábēm baányan, éláa bó wée, ntime' ámbíd wée echem Sān, awě adé kóōne echen Sān. Mó adé Dyōb ádēm, abé-'ɛ ádēn."

¹⁸ Né-ρῶό, Maria Magdalene ankě, aláá bembapɛɛ aá, mōnyīnē Sāngwéé. Anláá-'ɛ bó mam mésyāēl míme álāngé mó.

Yesue alúmté ábē bembapɛɛ yäl

(Mat 28.16-20; Mak 16.14-18; Luk 24.36-49)

¹⁹ Echê epun é Sōndé chēn, ngukél, bembapɛɛ ábe Yesue bēnladén áte á ndáb-te bēpēn-ne ekob áyāle bēbáá'áá bad bé Israel. Yesue ampě, atyéém átínté echáb, aláá bó aá, "Nsan ríbbê ne nyé."

²⁰ Ade ámáá ahób nê, anlúmed bó míme mekáá, alúmed-te bó aheb. Bembapɛɛ bēbédé menyīnge bwāmbwam ānyīn Sāngwéé.

²¹ Dōó Yesue álāngéé bó ámpē aá, "Nsan ríbbê ne nyé. Ngāne Titée álómé me, melemlem nê dōó mémpē rílómeé nyé."

²² Ade ámáá ahób nê, anhébé bó pemɛ, aláá-'ɛ bó aá, "Nyékob Edāóðan éche Esáá.

²³ Kénzée awě nyélágséné mbéb, né míme mbéb ríkúde alagsen. Kénzée-'ɛ awě nyéelágsénéé míme mbéb, né méekudéé alagsen."

Yesue alúmté Tōmase yäl

²⁴ Tōmase mbapɛɛ nhóg átínté e bembapɛɛ dyōm ne bébe ábe Yesue, awě béchágé'áá bán Nhéd, enkēmbáá ne baáb áde Yesue ápedé.

²⁵ Né-ρῶό, áde ahúú baáb bēnlāá mó bán, "Sēnyīné Sāngwéé." Bon anláá bó aá, "Esebán rínyīné meban míme bēmboméé mó tōne á mekáá bon rísōm-me e'mii á meban-tê áwed, ríbbíd-te ekáá áwē aheb, méedúbéé mbéd."

²⁶ Ambid e e'pun waam, bembapεε bēnladén áte á ndáb-te ámpē. Tōmase mómpē ambé áhed. Bēmpēn e'kob, boŋ Yesue ampě, atyéém átíntē echâb. Anláá bó aá, “Nsaŋ ríbê ne nyé.”

²⁷ Héε álângeé Tōmase aá, “Sōm e'mii á mebaŋ hén. Nōné' me mekáá, éhyene-’ε ekáá, ébid me chó á aheb. Sóg mod abé awě eedúbpé', dúbé!”

²⁸ Tōmase ankwentén mó aá, “A-Sáá awēm, a-Dyōb ádēm.”

²⁹ Yesue anláá mó aá, “Saá áyāle ényíne me dōó édúbpé-yε? Nnam ne bad ábe béenyíne boŋ kénê, bédúbe.”

Nzom echě ekáá boŋ bétéle' enén kálag

³⁰ Yesue amběl ekud é menyáké émpēe éche ábē bembapεε bémbēē ásē éche béetelēé á kálag-tē wén.

³¹ Boŋ rímén mésyāāl méténlédé ábel nén nyédúbe* bán, Yesue mó adé Anewě-Béwógte, Mwán a Dyōb. Nzé nyédúbpé-’ε mó, né nyékudé alongé áde déemaá' á đin áde.

21

Yesue alúmté ábē bembapεε yāl ámpē

¹ Ambid e rímén mésyāāl, anlúmed ábē bembapεε yāl ámpē á nkin mé edib é Tiberia. Nyaa echě ánlūmēdtē bó yāl ebédēe nén,

² epun ehóg Simōn Petro, Tōmase (awě béchágé'áá Nhéd), Nataniεε (awě ambid á dyad á Kana á mbwóg e Galilia), bán ábe Zεbediε, ne bembapεε ábe Yesue bémpēe bébe, bēnladén hōm ahóg.

³ Héε Simōn Petro álângeé bó aá, “Nkag súu akób.” Bēntimtén mó bán, “Sémpē séēhíd we.” Né-óó, bēnhidé béke bésól á bǎle-tē. Boŋ rímē nkūu rísyāāl bēnkēnkóbpé chōmchōm.

⁴ Ade bín é'bóótédé akéle, Yesue antyéém á nkin mé edib. Boŋ ábē bembapεε bēnkēmbíí'ε bán mó adé.

⁵ Dōó Yesue áse dtéé bó aá, “A-běd, nyéēkōbēē chōmchōm-ε?” Bēnkwentén mó bán, “Aáy, séēkōbēē.”

⁶ Anláá bó aá, “Nyébwēm mbínzé á pεd e ekáá é mbáá é bǎle, nyéēkōb.” Né-óó, bémbwēm mbínzé ene pεd. Bēnkēnhēnlé ene mbínzé adol áyāle súu émbē áwēd-te bwāmbwam.

⁷ Dōó mbapεε awě Yesue ándəŋgé áhóbéé aá, “Sán gwéé mó adé!” Awóg áde Simōn Petro áwógé bán, Sán gwéé mó adé, anhé megombe á yāl (áyāle anhūd bwēm á yāl). Dōó áhébé á edíb-te.

⁸ Boŋ ábíníí bembapεε bēmpě á nkin á bǎle-tē, bédolé mbínzé. Ene mbínzé enlōn ne súu. Wéε bémbídēnnē bǎle ápe á nkin dénkēnchabpé, ábédé dyam mbwókel e méta póg.

⁹ Ade bépédé á nkin béntān muú mé mekāŋled. Súu ebédé áwed ámin ne ewεle.

¹⁰ Yesue anláá bó aá, “Nyéhyεene' donge á súu áde nyékóbé bōob.”

¹¹ Né-óó, Simōn Petro ansól á bǎle-tē, ádol ene mbínzé á nkin. Súu émbáá énlōn ene mbínzé áte. Ebédé mbwókel móom métaan ne éláán. Kénéε eché súu émbuú'ε áte, ene mbínzé enkēnsaléé.

¹² Yesue anláá bó aá, “Nyéhyε nyédyê ndyééd.” Abē bembapεε bó modmod enkēnchu'ε mó asēded aáken, “Nzé-módé édíí?” Bémbíí bán, Sán gwéé mó adé.

¹³ Dōó Yesue átédé ewεle boŋ ábagé bó. Amběl melemem ne súu.

¹⁴ Nén ábédé ngen echě élónténé éláán, echě Yesue alúmté ábē bembapεε yāl á pónde echě amáá apuu.

Yesue asēdté Petro ké adáá mó

* **20:31** Nyédúbe; donge á Kálag dé e'só awóó nyébê nyédúbe.

¹⁵ Ade bémáá ndyééd adyé, Yesue asedéd Simōn Petro aá, “A-Simōn, mwān a Jōn, edəə me tómaa ábén bembapεε-ye?” Simōne ankwentén aá, “Eε, a-Sāj, ebíí wéé ndəə we.” Yesue anláá mó aá, “Təgén ábēm bán bé rídyəη mí mbód.”

¹⁶ Yesue ansedéd mó ngen éche élónténé éβε aá, “A-Simōn, mwān a Jōn, edəə me-ye?” Petro antimtén mó aá, “Eε, a-Sāj, ebíí wéé ndəə we.” Yesue anláá mó aá, “Təgén nímēm rídyəη mí mbód.”

¹⁷ Yesue asedéd mó ngen échě élónténé éláán aá, “A-Simōn, Mwān é Jōn edəə me-ye?” Yǎl enhóó Petro áte áde Yesue ásédte mó ngen échě élónténé éláán aaken, “Edəə me-ye?” Né-ǝó, anláá Yesue aá, “A-Sāj, ebíí mam mésyāəl. Ebíí wéé ndəə we.” Yesue anláá mó aá “Təgén nímēm rídyəη mí mbód.”

¹⁸ Ne mbále, nlānge we nén meé, áde ébedé etum, mmōn epúdé’áá abad, ékǎg-ke kéhéé wéé édǝó. Boη áde wéchunné wəsǎd mekáá, mod ampée awáád we abad, ákēēn-ne we wéé wéedəə’ é ake.”

¹⁹ (Yesue anhób nê álúmed nyaa e kwééd echě Petro áwēē, álúmed ehúmé é Dyōb.) Ambíd e nê dǝó Yesue álāngeé mó aá, “Hídé me.”

Yesue ne mbapεε awě ádǝó

²⁰ Dǝó Petro ánóné ámbíd boη ányīnē’ nées mbapεε ampée áhídeé bó. Ane mbapεε abédée mbapεε awě Yesue ándəngé. Móó andyéé Yesue á akéb á pónde éche bédyágé’áá ndyééd ngukél, boη ásédéd Yesue aá ken, nzé-módé əsōm mó.

²¹ Anyín áde Petro ányíne-’aá mó, anhób aá, “A-Sāj, chán-náa anén mod?”

²² Yesue ankwentén mó aá, “Nzé nhede meé ábê á alongé káəηne pónde echě mépeé, chán nê ánóné we? Hídé me.”

²³ Né-ǝó, énkānléd átíntē e bad ábe behíde’áá Yesue hōm ásyāəl nén bán ane mbapεε éewáá, kénéε Yesue énkēnhóbpé aá, éewáá. Anhób dásǝ aá, “Nzé nhede meé ábê á alongé káəηne pónde echě mépeé, chán nê ánóné we?”

²⁴ Ane mbapεε mó abíde mbóη áyāl e nímén mekan, mó-’aá atelé mó ásē. Debíí-’ε bán, kéchéé echě áhóbé édé mbále.

Asóg á kálag echě Jōne

²⁵ Ekud é mam émpēe édé éche Yesue ábélé. Nzé bēnhōb bán bétele’ mésyāəl ásē, ahóg ámbíd e ádíníí, nwēmtan meé né nkōηsé méekwogké échě kálag ahé áte.

Kálag e Mbɛltéd níme bembapɛɛ bé nlómag Ndibned ní kálag

Mod awe atelé kálag e Lukase mó atelé-’ε kálag e Mbɛltéd. Mekan níme enén kálag mékoo’é alúmed áte médii áláa bad ngáne Edəádəŋ éche Esáá énwōŋgēnē bad ábe behídé’áá Yesue ákal nkalanj ní bwâm tâŋgene Yesue á Jerusalem, á mbwóg é Judeya ne Samaria ne á mesóg mé nkōŋsé. Elúnte ngáne adúbe á bad bé Krīsto ábédé álóned chōm éche bad bé Israel béndūbē. Enén kálag elúnte ngáne adúbe á bad bé Krīsto ábóótédé á Jerusalem ámbíd e mpume níme Krīstəə ne ngáne ákíí mebwóg mémpēe. Atón áde ádé etógnēn áde enén kálag élúmtéé ámpē ádíi nsón níme Edəádəŋ éche Esáá ébɛɛé. Empē ne ngíne ámīn e bad ábe bédúbpé á mbwε ní Pentekəs.

Nkabtéd ní kálag

Aboŋsen bad ábe békale nkalanj ní bwâm 1.1-26

a. Póle e asóg eche Yesue ne ábē Bembapɛɛ 1.1-14

b. Mod awě atédé Judase échē etál nēŋgáne mbapɛɛ 1.15-26

Nkalanj níme Yesue níkálté á Jerusalem 2.1-8.3

Nkalanj níme Yesue níkálté á Judeya ne á Samaria 8.4-12.25

Nsón níme Paale 13.1-28.31

a. Eke é’só áke dé abel nsón 13.1-14.28

b. Mbom níme bembapɛɛ bé nlómag ne belyáged bé mwembé á Jerusalem 15.1-35

c. Meke níme mélónténé mébe áke dé abel nsón 15.36-18.22

d. Meke níme mélónténé méláán áke dé abel nsón 18.23-21.6

e. Paale adé á mbwóg á Jerusalem, á Kaisaria ne á Roma 21.17-28.31

Titée Dyöbε áá mósólōm

Edəádəŋ éche Esáá

¹ A-Tiofilos, mod a edúbé, á kálag echē nísébpé atel, mentél mekan ásē níme Yesue ámbenlé ne níme áyágté’áá bad. Ambél nímén mekan bootya á pónde echē ámbootédté níme nsón,

² káŋne, á pónde eche Dyöb dēmbenlé bonj ápūmē. Byánán apumé, ámbenléd ngíne e Edəádəŋ éche Esáá, áláa bad ábe ámpwēdté nēŋgáne ábē bembapɛɛ bé nlómag mekan níme bétəŋgéné abel.

³ Bootya áde Yesue áwédé, ápe móom mé e’pun méniin, anlúmed ábē bembapɛɛ bé nlómag yǎl ngen ne ngen, álúmed nén áá ne mbále módē á alongé. Bényínnáá mó díid ákanlé-’ε bó tâŋgene nkamlen ní Dyöb.

⁴ Pónde póg áde bóṣbṣṣ bédyágbkē ndyééd, ansím bó etúu áte aláá bó áá, “Nyééhídté á dyad á Jerusalem. Nyésine’ nde echē Titée awēm álángé nyé áá móhābē áá mósḃḃ nyé. Ene nde chṣṣ ménlāā’é nyé.

⁵ Jṣṣe adūsánnáá bad ne mendib, bonj ámbíd e nguse e e’pun bṣṣb, bédusén nyé ne Edəádəŋ éche Esáá.”

Yesue apūmmé

(Mak 16.19-20; Luk 24.50-53)

⁶ Pónde póg bembapɛɛ bé nlómag bóṣbe Yesue bēnladén hōm ahóg. Héε bésēdtéé mó bánken, “A-Sán, láá sé. Mmén mesú dṣṣ wēbenlé bonj bad bé Israel bēwōŋ ngíne ámpē ákamlen echab yǎl-ε?”

7 Hée Yesue átimtanné bó aá, “Titée mó abenlad eche ngíne átii pónde ne mekag míme kéchéé ébenlédté. Nyéewóó’è kunze ábíi pónde eche mímén mekan mébenlédté.

8 Bon áde Edəəðəŋ éche Esáá épií’è nyé nyééküð ngíne, hé-’aá nyékanléé bad mekan míme nyényíné t̄ŋgene me á dyad á Jerusalem, á mbwóg é Judeya, ne e Samaria ésyāāl káəŋ nyépē á metónge mé nkōŋsé mésyāāl.”

9 Yesue amaá-’aá bó aláa nê, dóo Dyöb ábélé bon ápūmē ámín. Ade bédii bənōnēé mó nê, mbag énkūtēn mó, bénkēnyín-naá mó ámpē.

10 Bembapēé bēmbē bētānē mīd áte bənōnē’ ngáne Yesue ákagké ámín, dóo bad bébe ábe bēhéde mbóté éche épúbe’ bēbíde təléd, betyéém bó á nkəg.

11 Hée ábē bad bébe bésēdtéé bó bánken “A-bad bé Galilia, cheé nyetyéémé hén, nyénōnēé ámín? Anén Yesue awě Dyöb ábélé bon áhíde átíntē echēn, ápūmē ámín, átim ámbíd melemlem ngáne nyényíné akag ámín.”

Matiasé atédé etál éche Judasé

12 Hée bembapēé bé nlomag bēhídté á Ekone é Menzab, bétim ámbíd á Jerusalem. Echē eké ebédé dyam epəd é Máyl ehóg.

13 Ade bésólé á dyad-tē, bēnkě bésól á ton eche bēdyéé’áá áte. Ene ton ebédé á esōŋ é ndáb éche édé ámín. Abē bembapēé bé nlomag bēbédéé Petro, Jōne, Jemse ne Andreyā, Filibē ne Tōmasē, Batolomyo ne Matyo, Jemse, mwān awe Alfōse ne Simōne awě anwōŋ kán e alon, ne Judasé mwān awě Jemse.

14 Abén bembapēé bēyógké’áá aladen áte hōm ahóg ákáne nchoo ne bebaád, Maria, Yesue nyaa, ne Yesue baányan.

15 Mmē mesú mēn, bad ábe bēndūbē Yesue bēnladén áte. Bēbédé dyam mbwókél ne móom mé bad mébe. Hée Petro átyéémé ámín átíntē echáb bon áhōbē aá,

16 “A-baányan, mekan míme méténlédé á kálag e Dyöb métəŋgéné alón. Edəəðəŋ éche Esáá énhōb á’sō é pónde á nsəl míme Dabidē t̄ŋgene Judasé awě antómén bad ábe bēnkě Yesue akób.

17 Judasé abédé nhóg átíntē e syānē. Yesue ampwəd mó ábel mímén nsón melemlem nēŋgáne ámpwēdté syānē.

18 (Mōné míme ánkudté áyāle ebébtéd éche ámbenlé, anchanén mó etúú. A etúú-te wē dēn-naá ánsongé dúu, awé-’e, abum ákán mó, mmii mbíd-te mó áwed.

19 Bad bēsyāāl á Jerusalem bēnwōg ádén akan, né-óó bēnchəg áde hōm áwab ehób-te bán Akeldama, nédē, ‘Ndəəb e mekií.’ ”

20 Petro ambád ahób aá, “Nén ábénlédé ngáne éténlédé a kálag e ngəse é Dyöb nén bán,

‘Ade hōm átim e’bwógen

modmod eelóó’ áhed.’

Éténlédé-’e nén bán,

‘Mod ampée átéd eche etál é nsón.’

21 “Né-óó, éhedne’ nén bán dépwəd mod nhóg. Ane mod atəŋgéné abé mod awě abágáá ne syānē pónde esyāəl eche echəd Sāŋ Yesue ne syānē dékágé’áá mebwóg ne mebwóg,

22 bootyaa á pónde echē Jōne ádúsánnáá bad ápe á pónde echē Dyöb dēmbenlé bon Yesue ápūmē. Mómpē atəŋgéné abé mod awě ambé mbón áde Yesue ámpuú’é.”

23 Hē dóo bēpwédé bad bébe, Josebē awě bēpwántánnáá bán Basabase (béchágé’áá mómpē bán Justusē) bó Matiasē.

24 Dóo békānnēé bán, “A-Sāŋ ebíi mod asyāəl nlém áte. Lúméd sé mod awě épwédé átíntē e ábén bad bébe,

25 átéd etál née mod a nlómag, éche Judase átédte bon mwën átimé' éche epɛd éche ébonédé mɔ́.”

26 Né-ɔ́, bɛnsɪd mbambú álúmed bó mod awě bɛpwɛdté. Dóo mbambú élúmté bó ápwɛd Matiasɛ. Né-ɔ́, bɛmbād Matiasɛ á mesonǵé mé bɛmpapɛɛ bé nlómag ábíní dyòm ne nhóg.

2

Epɛ éche Edǎǎdǎɣ éche Esáá

1 Ade ngande e Pentekɔs épédé, bad ábe bédúbpé Krɪstǎ bɛsyǎǎl bɛnladén áte hóm ahóg. *

2 Abwǔg-ábwǔg esaád émbíd ámín. Ebédé née ekukud é ngíne éche étóme'. Echɛ esaád énlǔn ene ndáb esyǎǎl áte echɛ ábê bad ábe bédúbpé bɛmbɛɛ áte.

3 Hɛ dóo bényíné bwɛm nɛɣǎne muú mímé nwǎgné née e'chém rɪtyéémé mod-téé á nló-mín.

4 Edǎǎdǎɣ éche Esáá êmpií bó moosyǎǎl, mod-téé ábootéd mehób mé bad bɛmpɛe ahób mímé bɛesebpɛɛ ayáge. Edǎǎdǎɣ chǔo élyǎgté'áá bó áhób kéchéé éche béhóbé'áá.

5 Enén pǔndé bad bé Israel ábe békánnáá Dyǔb bɛbédé á Jerusalem. Abén bad bɛmbíd mebwóg ne mebwóg á nkǔsɛ.

6 Awóg áde bɛwógé échɛn esaád, ndun e mod enladén áte wɛɛ ábê bad ábe bédúbpé bɛbédé. Yǎl enkóm bó áte bwámbwam áyǎle ngáne bad ábe bédúbpé béhóbé'áá ábíní bad bó mod-téé ácheme' échɛ ehób.

7 Ne nkǔmtɛn rɪ yǎl áte, bɛnsɛdéd bán, “Kíné saá á mebwóg e Galilia ábén bad bɛsyǎǎl bɛbíde-yɛ?”

8 Chán-nǔ ébɛnlédé bon syǎǎ mod-té áwǔgɛ' ngáne béhóbɛé éche ehób.

9 Átɪntɛ e syǎnɛ, baahóg bɛbíde á melon mé Patia, Mɛdia ne Elam; melon mé Mesopotemia, Judeya ne Kapadosia; melon mé Ponto ne mé Esia,

10 melon mé Frigia ne Pamfilia, alon á Egipto ne mebwóg mé alon á Libia, bɛnbɛn ne Sirine syǎnɛ bad behóg debíde á dyad á Roma.

11 Átɪntɛ e ábén bad bɛsyǎǎl donǵe achyáádté ne bad bé Israel, ábíní-'ɛ bad ábe bɛesɛ bad bé Israel ábe béhíde' adúbe á bad bé Israel. Syǎnɛ bad behóg debíde á alon á Krɛt ne á alon dé Arebia bon kɛnɛ, syǎnɛ mod téé awóge ngáne béhóbɛé áwe ehób-te ndǎle é mekan éche Dyǔb ábélé.”

12 Yǎl enkóm bó áte bényǎg-ke bwámbwam, bɛsɛdté nhóg ne aníní bánken, “Chán nɛn ádíí-yɛ?”

13 Kɛnɛ, donǵe á bad bɛwélé'áá bad ábe bédúbpé, béhǔbɛ bán bɛmáá mím amwé.

Pǔle éche Petro

14 Héɛ Petro átyéémé ámín átɪntɛ e ábíní bɛmpapɛɛ bé nlómag dyòm ne nhóg, áchǎgtɛ ehób, álǎngɛ ndun e mod echɛ embé áhed áá, “A-baányan bé Israel ne nyé baásyǎǎl ábe nyɛdyɛɛ á Jerusalem, nyélám metúu rɪláa nyé ngáne nɛn ádíí.

15 Abén bad bɛémwédɛé mím ngáne nyéwɛmtanné. Bɪn é'díí bǔɔb ngǎɣ abog é mbwɛmbwɛ ngɛn.

16 Bon nɛn ábɛnlédé ntɪned ne e'yale ábe nkal é edǎǎdǎɣ Joel ánhǔbpɛ áá,

17 Dyǔb áhóbé nɛn áá,

'A e'pun bé asóg,

mɛlǔm échɛm Edǎǎdǎɣ éche Esáá épí moosyǎǎl.

* 2:1 Nzé móom mé e'pun métáan méntǔm ámbíd e ngande e Nnyíme-ámín dóo enén ngande ébágáá. Echɛ epun chǔo bad bé Israel bɛdyǎgɛ'áá ngande e mpád rɪ bwɛm.

Abén bãñ bé bebaád ne bé baachóm béhōbē mam níme mébɛnléd á'sō é pónǵé.

Echén kǵdɛbad ényīnē ndǵg éche éhúú ne mɛ,
ábɛn bechun bé bad-tɛ bɛnanǵé nló.

18 Nê dɛn-ɛé mébɛnlé.

MǛlǵm échɛm Edǵádǵn nímê mesú, épií ké ábɛm bembǵledɛ, bebaád ne baachóm,

boñ béhōbē mam níme nǵhúú ne mɛ, níme mébɛnléd á'sō é' pónǵé.

19 MǛlǵmɛd menyáké ádyōb

nlúmed-tɛ e'chemléd á nkōǵsé.

Mekií mésyǵǵé, muú nǵhodɛn, mwǛntud-tɛ mbíde'.

20 Etondɛɛ ákwɛ ehíntén,

ngǵn-nɛ éyǵg nɛɛ mekií.

Mmén mekan mébɛnléd epun embáá é ehúmé é Sǵnǵú édêhōb bán épag.

21 Ene pónǵé kénzɛé awǛ akwɛnténé aá Yesuɛ adé mó SǵnǵwǛéé ákǵd e'soóson.'

22 Petro ambád ámpɛ aá, "A-bad bé Israel, nyélám metúu nyéwōǵlɛn chǵm éche nǵhɛdɛé ahób. Dyōb dɛmbǛl Yesuɛ mod a Nazaret ábɛl ndǵle é mekan mé menyáké ne e'chemléd álúmed nyé nɛn aá mó mwǛn-nɛé mǵlǵmɛ mó. Nyébɛn nyébíí nê bwám áyǵle nɛn átínté echɛn dǵǵ nê dɛmbɛnlédte.

23 Dyōb dɛmmad abíi, ámǵd-tɛ atíi nɛn aá nyéǛwúu Yesuɛ abɛ áde nyɛmbɛ mó á mekáá mé bad bé ekǵyí, boñ bébōmɛ-'ɛ mó á awǵg.

24 Boñ kénê, Dyōb dɛmpuúǵ mó, ahúǵ mó á metuné mé kwééd, áyǵle kwééd éhéle'aá-sɛ éhanǵ mó.

25 Dabidɛ anhób tâǵǵɛne mó aá,

'Nnyíné'aá SǵnǵwǛéé áwɛm á'sō-te pónǵé ésyǵǵ.

Adé mé á ekáá émbáá, né-ǵǵ, meétǵǵɛɛ áte.

26 Nê ábélé nlóné ne menyíǵǵɛ

nkale-'ɛ pǵle ne menyíǵǵɛ mésyǵǵ.

Echem yǵl-lɛ ámpɛ éwǵlɛ e'lyǵg bé nlém abé áde nǵdíí á alongǵé.

27 Áyǵle wéemwǵá-sɛ edǵádǵn échɛm émǵǵnéd á mbwǵg e kwééd,

wéemwǵá-'ɛ wǛ ndim níme awōǵ mbǵledɛ mbǵǵ á son-tê.

28 Elúmté mɛ menzii níme nǵpɛɛne' alongǵé, abé áde wǛbǛɛ-'ɛ mɛ á akéb mǛbɛ menyíǵǵɛ.' "

29 Petro ambád ámpɛ aá, "A-baányan, nǵǵnɛ nyé ne aláa dɛn nɛn mɛé Dabidɛ awesyánɛ sáá ambáá, anwé. Bénlímɛ mó, echǛ son edé-'ɛ hén kǵǵnɛ chii.

30 Dabidɛ abédɛɛ nkal é'dǵádǵn, ambíi-'ɛ chǵm éche Dyōb dɛnhōbpɛ aá mǵǵbɛ mó. Dyōb dɛmmwǛ melǛ nɛn aá mǵǵtéd mwǵn á mbyaa níme Dabidɛ mǵbɛl mó kǵn melemlem nǵǵǵáne Dabidɛ ámbǛɛ kǵn.

31 Dabidɛ ammǵd anyín á'sō é' pónǵé, dyam áde Dyōb dɛbɛnlé, né-ǵǵ, anhób mam tâǵǵɛn mpuu níme Ane-awǛ-Béwǵǵtɛ. Anhób aá,

'Dyōb dɛnkémwǵá aá ámaaned á mbwǵg e kwééd,

ndim ménkémǵǵǵ-aá mó á son-tê.'

32 Ane Yesuɛ mó-'aá Dyōb ápuúdtɛ, sé moosyǵǵl sɛdɛ-'ɛ mbóǵ bán apuúǵdɛ.

33 Dyōb ábǵg mó atíi dé edúbé áwɛ ekáá émbáá. Abǵgɛ-'ɛ mó Edǵádǵn éche Esáá éche ánhōbpɛ aá mǵǵbǛ mó. Yesuɛ mó-'ɛ ábǵg sé échê Edǵádǵn, chǵ-'aá ékǵǵ boñ nyényīnɛ', nyéwōǵɛ-'ɛ kéchéé échê ébɛnlad chii.

34 Debíi nɛn bán Dabidɛ enkémǵmɛé, boñ kénê anhób aá,

'Sǵn Dyōbɛ anláá awem SǵnǵwǛéé aá,

Dyéé áwɛm ekáá émbáá,

35 kááŋne á pónǵé echě mébɛnlé boŋ ékǵgtéd ábōŋ bad bé ekǵyí ámīn ne mekuu.’ ”

36 Petro ambád ahób aá, “Né-ǵó, nyé bad bé Israel bésyāāl nyékoŋ abíi nén bán anén Yesue awě nyébómmé á awǵg mwěn-naá Dyǵb dēmbɛnlé ábé Sǵŋgwéé mǵ-’aá adé Ane-awě-Béwǵgté.”

37 Awǵg áde ábē bad béwǵgé pǵle eche Petro, entagéd bó á mewēmtɛn-té bwámɛwam. Héε bésɛdtɛé Petro ne abíníi bembapɛε bé nlǵmag bánken, “A-baányan, cheé-ǵ sétǵŋgéné abel?”

38 Petro antimén bó aá, “Nyémǵd-téé nyétimɛn Dyǵb, nyétade alongé dé mbéb boŋ nyékud edusen á dīn áde Yesu Krístəə, ábel nén Dyǵb álagsɛn nyé mbéb Dyǵb débě-’ε nyé echě ndɛ, Edáǵdǵŋ éche Esáá.

39 Nyébíi nén bán chǵm eche Dyǵb áhóbé aá mǵǵbɛ nyé édíi áyāl echɛn ne áben bán ébɛ-’ε ké áyāl e bad ábe bédé nchabnede. Edé ne moosyāāl awě Sǵŋgwéé ádɛd Dyǵb, áchɛnlé ábɛ ne mǵ.”

40 Petro anléb bó, aláá-’ε bó mekan mémpɛe híin. Ansím bó etúu áte ahób aá, “Mod-téé ásoŋ ádɛ alongé, ésebé nê, né Dyǵb dékǵgsɛn nyé melemlem ngáne ákǵgsɛnné enén nyonǵel e ebébtɛd.”

41 Bad híin béndūbē dɛam áde Petro ánhǵbpɛ bédusɛn-ne bó. Mmê mbwɛ mesonǵé mé bad míme mémɛbád ámīn e bad ábe béndūbē, mébédé dɛam e’kálé é’láán.

42 Bēmbané nlém áyǵge mekan míme bembapɛε bé nlǵmag béyǵgté’áá bó, bɛbɛ-’ε nlatén ne bad ábe bédūbpé Krístəə. Bǵǵbǵǵ békānné’, bédyāg-ke ndyééd hǵm ahǵg.

Nlatén mí bad ábe bédūbpé

43 Bembapɛε bé nlǵmag bɛbɛlé’áá menyáké, bélūmtɛ-’ε e’chemléd híin. Kénzɛé awě annyín antǵgé nsəl áte.

44 Bad bésyāāl ábe béndūbē Yesue bémɛbɛ békɛɛne’ nlatén á’sǵ. Chǵm-té-’ε éche mod ánwǵŋgɛ ébédé é moosyāāl.

45 Bésómáá-’áá bwɛm, békāb ne mod-té ngáne ántǵgnɛnné.

46 Béyǵgké’áá aladɛn hǵm ahǵg epun-té á Ndáb-e-Dyǵb ákáne. Bédyāgé’áá ndyééd hǵm ahǵg áwāb mendáb ne nlém nhǵg ne menyīŋge mésyāāl.

47 Békéné’áá Dyǵb, bad bésyāāl béwǵóon-ne bó nlém mí bwām. Epun-té-’ε Dyǵb ábádáá bad ábe békúdé e’sǵósoŋ ámīn e mesonǵé mé bad ábe bédūbpé.

3

Petro achǵŋté mod awě awédé epɛd

1 Mbwɛ nhǵg Petro bó Jǵn békágé’áá á Ndáb-e-Dyǵb. Nén ábédé á ngǵŋ éláán é mǵte, pónǵé echě bad béyǵgké’áá akɛ á mekáne.

2 Mod nhǵg mǵ-’ε ambé á mmwɛ mé eyáde é Ndáb-e-Dyǵb. Béchágé’áá míme mmwɛ bán, Mmwɛ míme Mbóó. Ane mod anwé epɛd se áde béchyáá mǵ. Epun-té bépémé’áá mǵ, bɛbānē mǵ á mmwɛ hê, áchǵmē mǵné wéε bad ábe békágé’áá á Ndáb-e-Dyǵb.

3 Anyín áde anyíné Petro bó Jǵn bésǵle’ á Ndáb-e-Dyǵb-te, anchóm bó ndɛ.

4 Dǵǵ bɛnɛnɛé mǵ chǵóŋ, boŋ Petro áhǵbɛ aá, “Nǵné’ sé!”

5 Héε ane mod ánǵné bó ne mewēmtɛn nén aá mǵǵkǵd chǵm áwāb.

6 Dǵǵ Petro áhóbɛé aá, “Meewǵó-’é mǵné ké nhǵg boŋ chǵm éche níwǵó chǵó mébɛé wɛ. A dīn áde Yesu Krístəə a Nazaret, hidé ásɛ, ékag!”

7 Dǵǵ Petro áchǵŋgé ane mod ekáá émbáá, boŋ áwǵŋgān mǵ átyéem ámīn. Ábwǵg-ábwǵg mekuu ne mekǵge míme ane mod ménwédned.

8 Anhǵb, atyéem ámīn, ábootéd-te akɛ. Ansǵl á Ndáb-e-Dyǵb ne Petro bó Jǵn, ákag, áhebé’ ámīn, ábagé-’ε Dyǵb mekenag.

⁹ Bad bésyāāl ábe bɛbédé áhed bényīn née ákagké ákēmtē-’ε Dyōb.

¹⁰ Bɛnchem mó bán mó abédé mod awě adyεé’áá á Mmwε níme Mbóó rí Ndáb-e-Dyōb áchōmē bwēm. Yāl enkóm bó áte, bɛbɛ-’ε menyáké ne dyam áde ábénlédé ne mó.

*Pále eche Petro áhábé
á Ndáb-e-Dyōb*

¹¹ Yāl enkóm bad bésyāāl áte ábe bɛmbē á Ndáb-e-Dyōb. Né-óó bɛnnyāgéd békε bétán Petro bó Jɔn á abebpé á Ndáb-e-Dyōb áde béchágé’áá bán Abebpé áde Solomonε. Ene pón dé ane mod awě Petro bó Jɔn bɛnchoódté, ambé áhídé bó.

¹² Ade Petro ányíné ábɛ bad, anláá bó aá, “A-bānndé bé Israel, cheé ékǎá boŋ nɛn ákōmté’ nyé yāl áte? Chán-nō nyénōnεé sé nê? Nyêwɛmtan nɛn bán échɛd ngíne chɛn, ké’ε asáŋ ádɛ sésáá á’sō é’ Dyōb dǎó ákǎá boŋ sébɛl anɛn mod ábootéd akε-yε?”

¹³ Dyōb áde Abrahamε, Aisigε ne Jakōbε bɛbɛnleé, nádē Dyōb áde ábēd betaa, álúmté ehúmé éche awe mbɛledε Yesuε. Nyêmbε mó á mekáá mé benkamlenε, nyêbán-’ε mó áyāl á’sō wéε Payledε. Ké áde Payledε ánwɛmtɛnné mó atɛde, nyêmbé nyêbán mó áyāl.

¹⁴ Abédé mod awě asáá, abé-’ε ane awě abele mekan níme métǎngéné, boŋ nyêmbán mó áyāl. Nyêntīm nyéchāá’ Payledε bán áchɛnned nyé mod awě awúε’ bad.

¹⁵ Né-óó nyênkǎŋ bɛwúú mod awě apiinad bad alongé á mbále, boŋ Dyōb dɛmpuúid mó. Sébɛn sɛnyínné níme mekan díid.

¹⁶ Anɛn mod awě nyényínεé nɛn, awě nyébíí-’ε bwám, ngíne echɛ díin áde Yesuε áwóó ne adúbe áde áwóó ne adúbe áde áwánlé áyāle ádɛ díin, dǎó ábágé anɛn mod awě anwé epɛd ngíne, ádíid-tɛ mó bwám. Nyé bɛn nyényíné-’ε.

¹⁷ “Bǎǎb-pǎǎ, a-baányan mbíí nɛn mɛé, kéchéé éche nyáābe ábɛn belyáged nyêmbɛnlé Yesuε, nyêmbɛl chǎ áyāle nyênkɛmbíí’ é chǎm éche nyébeléé.

¹⁸ Kénεé ébénlédé-’áá nê, Dyōb dɛn dǎó álónté ábɛ e’yale se’ bǎǎd áde ánlāā’ é bekal bé’dǎǎdǎŋ bésyāāl áá béhǎb bán Ane-awě-Béwǎgté ákǎd metake.

¹⁹ Né-óó, nyétɛde ádɛn abé dé mbéb, nyétimɛn Dyōb ábɛl boŋ ábóded nyé mbéb.

²⁰ Nzé nyébelé nê, né pón dé épě echɛ Sǎngwéé áhóódté nyé nlém. Ene pón dé-’áá álómɛɛ nyé Ane-awě-Béwǎgté, nádē Yesuε, awě ápwédte nyé.

²¹ Yesuε atǎngéné asébe dé adyεε ádyōb kǎáŋ pón dé épε echɛ Dyōb déhǎŋlɛnné mekan mésyāāl boŋ métim ekǎólé. Nɛn dǎó Dyōb dɛmbɛnlé se’ bǎǎd áá bekal bé’dǎǎdǎŋ ábe bésáá bɛlǎa bad.

²² Mosεε mwɛn anhób áá, ‘Sǎngwéé awě adé ádɛn Dyōb ápwédte nyé nkal é’dǎǎdǎŋ áfínté e ábɛn bad melemlem née mε. Nyébel chǎm ésyāāl éche álǎngé nyé áá nyébel.

²³ Kénzéé awě eewógne ane nkal é’dǎǎdǎŋ, Dyōb déhūd mó áfínté e bad bé Dyōb ábóded-tɛ mó.’

²⁴ Bekal bé’dǎǎdǎŋ ábíníí ámpɛ bootya Samwεε ne ábe bɛmpě ámbíd echɛ, bó moosyāál bɛnwālɛ nlébtéd, béhǎb-pɛ mekan níme mébɛnléd nímén mesú.

²⁵ Dyam áde Dyōb dénhǎbpɛ mbwiined ne bekal bé’dǎǎdǎŋ ábédéé áyāl echɛn, nyémpɛ nyêwóó-’ε akab áyāle melé níme Dyōb démmwɛɛ ne ábɛn betaa. Dyōb dénlāā Abrahamε áá, ‘Mɛnaméd moonyon asyāál á nkǎŋsé mbwiined ne nímmōŋ nchyáátɛn.’

²⁶ Né-óó, Dyōb dɛmpwéd awě mbɛledε. Ade ápwédte mó, áwɛn dǎó ánsɛbɛɛ mó álóm ánamed nyé abɛl áde ábɛnlé boŋ nyétɛdɛ nímmɛn mbɛltéd mé mbéb.”

4

Kóte ekáádté Petro b́ Jɔn

¹ Petro b́ Jɔn bédii békánlé'áá bad mekan, d́o nguse é beprise ne mod ambáá a plúse a Ndáb-e-Dyõb, ne nguse e Besadusia bépédé wéé bém̄bē.

² Bēnlīh áyāle ábê bembapεε bé nlomag bébe béyágté'áá bad bán Yesue apuúdé, éche élúmte nén bán bad ábe b́wédé b́bē á alonjé ámpē.

³ B́nkõb Petro b́ Jɔne b́hé b́ á mbwɔg. Ngáne b́n b́mmadté ahín, b́mbē áhed kááj ne mbwεmbwε.

⁴ Kénεε b́nkõbpē Petro b́ Jɔne, ndun e mod eche enwóg mam míme békánlé'áá b́, endúbe. Mesonjé mé bad ábe b́dúbpé ménchāgē mépē dyam e'kálé é' bad é'táan.

⁵ Néε b́n é'sánjé, benkamleε bé Israel, bad b́mbáá bé dyad ne bemeléede bé mbéndé b́nladén áte á Jerusalem.

⁶ Anase awē abédé prise ambáámbáa ambé áhed, ne Kaifase, Jɔne, Alesandaa ne bad b́mpēe ábe bédé á túmbé echē Prise Ambáámbáa.

⁷ B́ntī Petro b́ Jɔne áwab e'só-te, bonj b́sεdté b́ bánken “Chán nyémwédé anén mod awē anwé epεd bwám adid? Ngíne ne d́n áde nzéé nyébénlédé?”

⁸ Héε Edáádāh éche Esáá épíídé Petro, élón-ne mó áte. D́o áhóbεé áá, “A-benkamleε ne bad b́mbáá bé dyad,

⁹ nyéchégé sé hén chii ákáad sé áyāle mbonj míme sébénlé anén mod awē anwé epεd ne ngáne ámwédé bwám adyεε.

¹⁰ Nyé bad bé Israel nyébii-ɔ́ nén bán anén mod awē atyéémé nyé á'sō-te adyéé bwám á ngíne e d́n áde Yesu Krístā, mod a Nazaret. Nyembomé mó á awɔg bonj Dyõb d́mpuú d́ mó.

¹¹ Ḿ adé ane awē éténlédé á kálag e Dyõb áyāl echē nén bán, 'Aláá áde belónj bé ndáb b́nchenéé d́o átímé aláá dé etógnén.'

¹² “E'soosonj béesaá ne mod ampée éetóméé Yesue, áyāle d́n d́mpēe déesaá á nkõjsé-te wén áde Dyõb ábágé moonyonj áde átánjéné syánē asonj.”

¹³ B́ɔɔb-pɔ́, yāl enkóm bad bé kóte áte ányín nén bán Petro b́ Jɔne b́hóbé ésebán mbwóg ké nhóg údé b́ áte. B́nsõnjtēn-ne nén bán bédii bad bé ngân ábe béeyágté kálag embáá. D́o b́chémmé nén bán b́o b́bágé'áá pón dé ésyāal ne Yesue.

¹⁴ Bonj ngáne b́nnyinnē néε mod awē Petro b́ Jɔne b́nchoódté atyéémé áhed ne b́, dyam d́nkēmbonjé b́ ahób.

¹⁵ Né-ɔ́, b́nlāá b́ bán b́bíd á ndáb e kóte. B́bídé-'áá b́, b́n ne b́n bébootéd akal,

¹⁶ b́sεdté bánken, “Chán débénlé ábén bad? Moosyáal á Jerusalem abíí áá b́o b́bélé enén ndāle e menyáké. Deéhēlēε-se dehób bán bébeleéé.

¹⁷ Bonj detánjéné ábén bad etúu asím áte nén bán b́sóg bad akale t́ngene Yesue, ábel bonj mímén nkalanj méekanlád se nkag á'sō.”

¹⁸ D́o b́chénlé b́ ámbíd ámpē bonj b́símē b́ etúu áte bán b́ehédéé awóg ámpē mbéd néε b́hóbεé ké'ε béyágtéé á d́n áde Yesue.

¹⁹ Bonj Petro b́ Jɔn b́ntimtén b́ bán, “Nyé b́n nyéhõb chõm-éε étánjéné á'sō é' Dyõb. Awógen nyé káa áwógen Dyõb?”

²⁰ Ayāle sé pen séhēlēε-se sédīb nsal bán séekanlé mam míme sé b́n sényinné d́id séwógén-ne etúu.”

²¹ Bad bé kóte b́nlyǎg b́sím b́ etúu áte ngíne ngíne. Ámbíd enē b́nchené b́, áyāle b́nkényinné nzii echē b́hēle b́kógsén b́ áyāle bad b́syāal b́kémte'áá Dyõb t́ngene dyam áde ábénlédé.

22 Mod awě menyáké mêmbernlédté áyāl boŋ ádyēē bwám antóm móom mé mwě méniin.

*Bad ábe bédúbpé békánne bán
Dyõb ábe b́ e'wéd bé nlém*

23 Ade bad bé kóte bétédte Petro b́ Jɔne, bēnkě echon é bad bé Krīsto atán, béléáá b́ mam níme beprise bémháá ne bad bémháá bé kóte béléngé b́.

24 Ade ábē bad bé Krīsto b́wógé nē, bēnlād nsal ákáne. Bēnlāā Dyõb bán, “Titée, wε awě ehagé nkon ní mín ne ní sé, edíb é nkwě ne bwēm é'syāāl ábe é'dé b́ áte,

25 wenlóm Edāádāŋ éche Esáá wée eched sán ambáá Dabide, awōŋ mbaledε wεé ébel áhōb ábén e'yale nēn aá,

‘Cheé ékáá boŋ bad ábe béesě bad bé Israel béliε’ bwāmbwam?

Cheé ékáá-’ε boŋ bad b́belé e'háké ngēn?

26 Kāŋ é nkōŋsé élade yāl,

benkamlεε-’ε ámpē békóbe mbom

átāŋgen Sán Dyõbe ne Ane-awě-Awógté.’

27 Ebénlédé nē dēn. Herōde b́ Pontus Payledε bēnkōb mbom á dyad-tē hén ne bad ábe béesě bad bé Israel ne belyáged bé bad bé Israel. Bēmbel nē áhage Yesue awōŋ mbaledε awě Asáá awě Éwógté.

28 Bēnkōb mbom ábel mam níme mmōŋ wēmmdaté atíi ne echon ngíne á'sō é' pónde mébernléd.

29 A-Sán, bōob-pōó, mmōŋ énon akím áde békíméé, ébe sé ábōŋ bembaledε nlém ákal échōŋ eyale ésebán sēwóge mbwóg.

30 Lúmed echon ngíne édide bad bwám. Ebel-le séhel e'chemléd ne menyáké ábel á dīn áde Yesue, awōŋ mbaledε awě asáá.”

31 Bémáá-’aá akáne, hōm áde bēnladénné áte ánāŋned. B́ moosyāál bēnlōn ne Edāádāŋ éche Esáá bébootéd-te eyale é Dyõb ákal ésebán mbwóg rídé b́ áte.

Bad ábe bédúbpé b́εle mekan ńε mod nhóg

32 Bad b́syāāl ábe bédúbpé b́nwōŋ nlém nhóg ne mewēmtεn mehóg. Modmod eehóbe'aá aá móó mówōō échén ké'ε échíníi boŋ bwēm é'syāāl b́mbē b́ ntéd.

33 Bembapεε bé nlómag b́mbē b́kalé' ne ngíne esyāál nēn bán bédé mbōŋ nēn bán Dyõb ápúúdté Sāŋgú Yesue. Dyõb-pe démbād b́ nsimé ábe ámīn e nsimé.

34 Modmod eetóge'aá chōm átíntē echáb. Pónde ne pónde té bad ábē b́nwōŋ e'túú ké'ε ndáb b́sómé'aá ch́, b́pēēn nímē mōné,

35 b́bē bembapεε bé nlómag, b́-’ε b́tédé'aá b́kāb ne mod-téé ngáne ántōgnēnnē.

36 Nē d́ó Josebe, mod a túmbé e Levi awě b́chyáá á alon á Sayprus ámbenlé. Bembapεε bé nlómag b́chágé'aá mó bán Banabase, (nédē mod awě awéde bad nlém á abum.)

37 Ansóm etúú, atéd nímē mōné, ábe wée bembapεε bé nlómag.

5

Ananiasε ne Safiraa

1 Mod nhóg abédé bán Ananiasε, mwaád-te bán Safiraa. B́mpē b́nsōm donge á bwēm ádāb.

2 Boŋ ankoó donge á mōné ámbíd, mwaád-te ámpē ámbíi. Ananiasε ampéén mōné níme ménlyǎg ásē wée bembapεε bé nlómag.

³ Hée Petro álângeé mó nén aá, “A-Ananias, cheé ékǎá bon ehé Satanε etál wεé ásal wε á nlém-tê. Bɔɔb-pɔɔ, abelé wε ekǎnlé Edǎádǎn éche Esáá metóm akoo áde ékǎngé epeɔ é mǎné níme ésómné bwēm.

⁴ Edêhób wě mǎsǎme’ etúú ébédéε échon, áde émáá-’ε chǎ asóm ámpē, mǎné níméd mǎbédéε nímǎn. Cheé ékǎá bon etíí áwǎn nlém-tê wεé mǎbél enén ndín e akan? Saké moonyon ékǎnlé metóm bon Dyǎb dǎó ékǎnlé metóm!”

⁵ Awóg áde Ananiasε áwógé nén, anhún ásē, awé-’ε. Mbwóg ní ngíne ménkǎb bad bésyǎál ábe bénwǎg ádén dyam.

⁶ Kǎdébád êmpě áhed, bétéd mó ndim, békǎn mó béke béliɛe.

⁷ Dyam háwa éláán ámbíd enê, Ananiasε mwaád ampě, enkêmbíí’ é pen dyam áde ábénlédé.

⁸ Petro ansedéd mó aá, “Láá me, mǎné nísyǎál mén níme nyékúde áyál e etúú éche nyé awon nchóm nyénsǎmmē-yε?” Safiraa ankwentén mó aá, “Eε, nísyǎál mē.”

⁹ Dǎó Petro álângeé mó aá, “Cheé ékǎá bon nyékǎgé’ Edǎádǎn éche Sǎngwéé? Nǎné’, bad ábe béliɛmmé awon nchóm bǎó bédé á mmwε níníí, bétéd-te wêmpē ndim hê bɔɔb.”

¹⁰ Abwǎg-ábwǎg ane mmwaád anhún ásē á’sǎ-te wéε Petro, awé-’ε. Echê kǎdébád énsǎl á ndáb-te bényín bán amaá awé. Dǎó bébídné mó ndim á ebwóg béke béliɛé á nkǎg ní son wéε nchóm.

¹¹ Mbwóg ní ngíne ménkǎb mwembé nísyǎál ne bad bésyǎál ábe bénwǎg ádén dyam.

Bad bé nlomag bǎbélé menyáké híin

¹² Bembapεε bé nlomag bǎbélé’áá e’chemléd ne menyáké híin átíntê e bad. Bad ábe bédúbpé-’ε báyǎgkǎ’áá abom née mod nhóg á Abepé á Solomonε á Ndáb-e-Dyǎb.

¹³ Kénéε bad béchǎgé’áá bó dǎn á bwám, bédíi bǎbáá’áá bó alaten.

¹⁴ Bon kénê, ekud é bebaád ne baachóm ábe bédúbpé Sǎngú Yesuε, bésǎlé’áá áwǎb nlatén, mesonǎgé mé bad ábe bédúbpé nǎchǎgke’.

¹⁵ Mekan níme bembapεε bé nlomag bǎbélé’áá mênkǎn bad bépēmē bad bé nkole bǎbanné’ bó á nkǎg ní nzii á menǎn ne á e’búm mín. Bǎbélé’áá nê ne mewêmtén nén bán, nzé Petro atóme’ ké tómmén échē edǎádǎn éhūn bó á yǎl bédyēē bwám.

¹⁶ Ekud é bad émbíd kǎáne á myad níme médé benben ne dyad á Jerusalem. Bénwǎlé ábǎb bad bé nkole áyál ne bad ábe e’dǎádǎn bé mbéb é’tágté’áá. Bembapεε bé nlomag béndíd moosyǎál bwám.

Béhédé bembapεε bé nlomag á mbwǎg

¹⁷ Ene pǎndé-’ǎó prisε ambáámbáa ne échē echon é bad nédē, bad bé epepé é Besadusia bémǎ kǎnjí bwámbwam ne bembapεε bé nlomag.

¹⁸ Bénkǎb bembapεε bé nlomag, béhé bó á ndáb e mbwǎg níme nídé á dyad tē.

¹⁹ Bon nímē nkuu, ángel e Sǎngú enhyě ekob é mbwǎg adibe ebídéd-te bó. Enláá bó aá,

²⁰ “Nyékǎg á ndáb e Dyǎb, nyélânge’ bad mam mésyǎál tǎngene ádén alonǎgé dékǎlē.”

²¹ Bembapεε bé nlomag bénwǎgēn ene ángel. Bín é’sǎngé-’aá, béke bésǎl á Ndáb-e-Dyǎb, bébootéd bad ayáged.

Ene pǎndé-’áá prisε ambáámbáa ne échē echon é bad, bénchēlē mbom ní mbwǎg níme ménlǎd belyáged bé Israel bésyǎál. A mbom hê dǎó béliómé nlébtéd á mbwǎg nén bán bépēen bembapεε bé nlomag áwǎb.

22 Boŋ áde sánze épédé á ndáb e mbwɔg, bɛnkɛntánné bembapɛɛ bé nlómag áwɛd-te. Né-ɔ́ bɛntɪm ámbíd, békɛ bɛláá ábê bad á mbom bán,

23 “Sêpedé á ndáb e mbwɔg, sêtáné ngáne bépéné chó hõm ásyā̄l. Bad ábe bɛnɔne’ mbwɔg-ke bó moosyā̄l bédé wɛɛ mod-té ánɔnɛé mmwɛ mé e’ké. Boŋ ádɛ sɛdíbpé ekob, séetánɛé mod ké nhóg áwɛd-te.”

24 Ade mod ambáá a plũɛ é ndáb e Dyõb ne beprise bɛmbáá bɛwógé nê, bényāg, bánken “Chán nɛn ádíí?”

25 Hê dɔɔ mod nhóg ápédé áhed boŋ álāngē bó aá, “Nyébíi nɛn bán bad ábe nyénhɛɛ á mbwɔg, bédé á Ndáb-e-Dyõb bɛyágte’ bad.”

26 Dɔɔ mod ambáá a plũɛ é Ndáb-e-Dyõb ábíde ne ábê bad, boŋ békɛ békõbê’ bembapɛɛ bé nlómag, bɛpɛɛnɛ’ bó. Boŋ pɛn bɛnkɛnkóbɛnné bó ewaŋge áyāle bɛbáá’áá bán bad ábe bɛmbɛ áhed bɛlũm bó meláá.

27 Bɛnsālɛn bó á ndáb-te, bétíi bó á’sõ é’ mbwóg. Hê dɔɔ prise ambáámbáa ábóótédé bó akáad, álāngé bó nɛn aá,

28 “Sɛnsím nyé etúu áte nɛn bán nyéɛkɛɛnɛ’ ayáge áde anɛn mod á’sõ ámpɛ. Bɔɔb-pɔɔ, Nyénɔne’ chõm-ɛɛ nyébélé. Nyébɛlé moosyā̄l á Jerusalem awógé ádɛn ayáge. Nyéhɛde-’ɛ kwééd echê abán áwɛd nló.”

29 Hɛɛ Petro ne ábííi bembapɛɛ bé nlómag bétimtanné bó bán “Dyõb dɔɔ sɛtāngɛné awógen, saké baányon.

30 Ade nyémáá Yesue abome á awɔg, nyêwúú-’ɛ mɔ, Dyõb áde ábɛd betaa, dɛmpuúú mɔ.

31 Dyõb dɛnchāgɛd mɔ, ábānē-’ɛ mɔ á ekáá é mbáá nɛɛ Nlyáged ne Nsoode. Ambɛl nê ábel boŋ álúmed bad bé Israel nzii eche bɛchenɛé ádab abé dé mbéb boŋ Dyõb álagsɛn bó.

32 Sɛbɛn sɛnyínné nímɛn mekan díd. Edáádɔŋ éche Esáá chómpɛ ébíde’ mbón. Chó-’áá édé ndɛ echê Dyõb ábagɛɛ bad ábe bɛwógne mɔ.”

Elébé eche Gamaliɛɛ

33 Ade mbwóg eche endyɛé ásɛ éwógé nê, bɛnliŋ bwāmbwam kááŋ bɛhɛdɛ-’ɛ bán bɛwúu bembapɛɛ bé nlómag.

34 Boŋ mod a mbwóg nhóg átɪntê echáb, awɛ bɛchágé’áá bán Gamaliɛɛ antyéem ámɪn. Anɛn mod abédɛɛ Farisia, abé-’ɛ meléede a mbéndé awɛ bad bɛsyā̄l bɛbágé’áá edúbé bwāmbwam. Anhób aá bɛsɛbe bɛbíden ábê bembapɛɛ bé nlómag á ebwóg.

35 Dɔɔ álāngɛé bad bé mbwóg aá, “A-baányan bé Israel, nyétɛd pɔndé ne chõm-ɛɛ nyéhɛdɛé ábɛn bad ábel.

36 Eɛchābɛɛ áte áde mod awɛ bɛchágé’áá bán Tiodase ábídáá dúu, ákumé’ ekáá á tâl aá módɛ mod. Bad ábe bɛnhíd mɔ ámbíd bɛbédé dɛm mbwókɛl éniin. Boŋ kááŋ ne á asóg bɛnwúu mɔ, ábê bad-te bɛpántɛd áte, échê epepé chó-’ɛ ébɔɔ.

37 Ámbíd e pɔndé, mod awe bɛchágé’áá bán Judase mod a Galilia mómpɛ ámbíd á pɔndé e tóŋgé. Ambɛl ndun e mod enhíd mómpɛ boŋ kááŋne á asóg bɛnwúu mɔ, ábê bad-te bɛpántɛd áte.

38 Bɔɔb-pɔɔ, áyāle ádɛn dɛm, nlānge nyé nɛn mɛɛ nyétɛde ábɛn bad bɛkag, nyéɛbɛlɛ bó dɛm. Áyāle nzé édé nɛn bán nímɛn ntíi ké’ɛ ádɛn dɛm áhúú ne moonyon, né dɛn dékwɛ.

39 Boŋ nzé édé bán áhúú ne Dyõb, né nyéehɛnlé bó dɛm ábel, né kááŋne á asóg nyéenyín bán Dyõb dɔɔ nyétāŋganné.”

Bad bé mbwóg bɛnkõb elébé éche Gamaliɛɛ

40 Hɛɛ bɛchɛnlé bembapɛɛ bé nlómag bán bɛsɔl á ndáb. Bɛnkūdɛ bó, bɛsím-mɛ bó etúu áte bán bɛéhɛdɛé awóg ámpɛ nɛɛ bɛtúbɛé dɪn áde Yesue. Dɔɔ bɛtɛdté bó bán bɛkag.

⁴¹ Bembapɛɛ bé nlomag bɛnysəá á'sō é' mbwóg. Bém̄bē menyɪnge ányín nén Dyōb ányíné aá békwoǵnéde ákud akwáké á d̄in áde Yesuɛ.

⁴² Epun ne epun-té békágé'áá á ndáb e Dyōb ne á ndáb é bad, báyāgtē bad, békale-'ɛ nkalan míme Yesuɛ, Ane-awě-Béwógté.

6

Mwembé mépwédé bad saámbé áwóŋgen

¹ Bɔɔb-pɔɔ, ngáne mesoŋgé mé bad ábe bédúbpé méchágk'é'áá acháge ne acháge, nswan̄ɽen mém̄bíd át̄intē e bad bé Israel ábe béhóbé'áá ehób é Grikia ne ábe béhóbé'áá ehób é dyad. Bad ábe béhóbé'áá ehób é Grikia béhóbé'áá bán ábāb bekúd béekudéé akab á m̄oné áde békábpáá bekúd epun-téé.

² Héɛ bembapɛɛ bé nlomag dyōm ne bébe béladéé bad ábe bédúbpé bésyāāl áte boŋ bélāŋgē bó bán, “Eeboó' é nén bán sétede akal dé eyale é Dyōb ábel boŋ séhíde nkabtéd mí m̄oné ámbíd.

³ Né-ɔɔ, a-baányan nyépwɛd bad saámbé át̄intē ech̄ên, ábe béwóó edúbé, ábe Edəádəŋ éche Esáá élyágtéé, bébíi-'ɛ akan, ábel nén sébane mímén ntíi áwab mekáá.

⁴ Ene pónde séēbĕ ech̄ed yāl esyāál ákáne ne ákal nkalan mí bwām.”

⁵ Moosyāāl anwóg menyɪnge ne dyam áde bembapɛɛ bé nlomag bɛnhōbpē. Né-ɔɔ, bɛmpwĕd Stefanusɛ. Abédéɛ mod awě andúbé bwāmbwam. Edəádəŋ éche Esáá-'ɛ élyāgtē mó. Bɛmpwĕd káŋne Filibe, Prokorosɛ, Nikanɔɔ, Tim̄onɛ, Pamenasɛ ne Nikolausɛ. Nikolausɛ abédéɛ mod awě ambíd á dyad á Antyɔg, eebédeé mod a Israel boŋ antimén adúbe á bad bé Israel.

⁶ Bɛmpɛén ábén bad á'sō wéɛ bembapɛɛ bé nlomag. Bembapɛɛ bé nlomag bɛnkānnéd bó bɛbán-ne bó mekáá á nló.

⁷ Né-ɔɔ, eyale e Dyōb émbē ékanlád mbwóg áte esyāál ékäg á'sō. Mesoŋgé mé bad ábe béndúbē á Jerusalem méchágk'é'áá acháge ne acháge. Ekud é beprise chómpē êmbootéd nkalan mí bwām ahíd.

Békóbé Stefanusɛ

⁸ Bɔɔb-pɔɔ Stefanusɛ abédé-éɛ mod awě adē alongé álúmté'áá nsimé ní Dyōb bwāmbwam. Awóŋ ngíne ábel ndale é mekan é menyáké át̄intē e bad.

⁹ Boŋ baahóg bɛmbootéd mó apɛntɛn. Abê bad bɛbédéɛ bad ábe bém̄bíd á echoŋ é bad éche émm̄ent̄én akɛ á ndáb e mekáne eche béchágé'áá bán ndáb e mekáne e betāŋ ábe bɛnkémbé betāŋ ámpē. Abé bad bɛbédé bad bé Israel ábe bém̄bíd á myad mé Sirinɛ ne Alesandria. Bɔɔbe bad bé Israel bɛmpēe ábe bém̄bíd á mbwóg e Silisia ne e Esia, bɛmbootéd aswan̄ɽen ne Stefanusɛ.

¹⁰ Boŋ Edəádəŋ éche Esáá émbĕ mó nyaa e debyéé eche nzé anhób dyam, béehelé'áá dó apele.

¹¹ Né-ɔɔ bɛns̄l baahóg áte bán béhōb nén bán “Séwógé néɛ Stefanusɛ ásyāá' é Mosɛɛ, ásyāá-'ɛ Dyōb.”

¹² Né-'áá bɛmbɛnlé boŋ békón bad bé dyad, békón bad bɛmbáá bé dyad ne bemeléede bé mbéndé. Héɛ békóbé Stefanusɛ boŋ békɛɛné mó á'sō é' bad bé mbwóg.

¹³ Hé-'áá bɛpééné bad ábíd mó mbón é metóm. Abê bad bɛnhōb nén bán, “Anén mod ahóbe' mekan mé mbéb pónde ésyāāl t̄ŋgɛne Ndáb-e-Dyōb ech̄é esáá ne t̄ŋgɛne mbéndé eche Dyōb ábágé syánē.

¹⁴ Séwógé néɛ áhóbéé aá ane Yesuɛ, mod a Nazaret, āpāŋ Ndáb-e-Dyōb áh̄ŋl̄én-ne e'lem ábe Mosɛɛ ályágnédé syánē.”

¹⁵ Bad bésyāāl ábē bɛbédé á ndáb e mbom bɛns̄m m̄id wéɛ Stefanusɛ. Bɛnnȳin néɛ e'só é'pɛnɛé mó néɛ e'só é' ángɛl.

7

Stefanus ɛ abɛ̀nlédé myanǵó
mí bad bé Israel ákǵá

¹ Prisɛ ambáámbáa ansɛdéd Stefanusɛ aáken, “Mmɛ́n mekan mésyā́l míme ábɛ́n bad béhóbé wɛ́ áyāl, médé mbále-yɛ?”

² Dóó Stefanusɛ ábóótédé bad bé káánsɛl pǵle akale. Anhób aá, “A-baányan ne besáá ábɛ́m, nyélám metúu. Dyǵb dé ehúmé dɛ́mpíi echɛd sáŋ Abrahamɛ́ áde ábédé á mbwǵg e Mesopotemia, adɛ́hób aá mókag adyɛɛ́ á dyad á Haran.

³ Dyǵb dénlā́a mó aá ‘Tɛ́dé echon túmbé, étɛde-’ɛ́ ádōŋ alon ékag á ndǵɔb eche mélūméd̄tɛ́ wɛ́.’

⁴ Né-ǵó, Abrahamɛ́ antɛ́dé ndǵɔb e Kaldeya áhyɛ́ ádyɛ́ á dyad á Haran. Ambíid e kwééd eche Abrahamɛ́ sáá, Dyǵb dɛ́mbɛ́l Abrahamɛ́ ákɛ́ ádyɛ́ á ndǵɔb eche nyédíí áhed nɛ́n bǵɔb.

⁵ Ene pǵndé Dyǵb dénkɛ́mbaá Abrahamɛ́ ké abɛ́n á ndǵɔb eche ándaāsɛ́nnɛ́ mó. Bon pɛ́n Dyǵb dénhób nɛ́n aá ene ndǵɔb ɛ́suunéd bó míme mbyaa. Pǵndé eche Dyǵb dénlā́a-’ɛ́ Abrahamɛ́ nɛ́, eenkɛ́nwáléé mwǵn ké nhóg.

⁶ Dyǵb dénlā́a mó nɛ́n aá, ‘Mmōŋ mbyaa mébɛ́ beken á alon á bad bémpɛ́e. Awed-taá bébɛ́ɛ́ betāŋ, békūd-tɛ́ metuné etūn é pǵndé éche édé dyam mbwǵkɛ́l é mwɛ́ éniin.

⁷ Bon mɛ́kǵsɛ́n ádɛ́ alon á bad áde bébɛ́nléé nɛ́ɛ́ betāŋ. Ambíid enɛ́, mímōŋ mbyaa mébíid á alon-tê wɛ́, bétim áyāl e ádɛ́n abwǵg á hǵm, békānnɛ́ á dīn ádɛ́m áhed.’

⁸ Héɛ́ Dyǵb ábélé bon Abrahamɛ́ ápɛ́ á nchemtɛ́n ne mó tǵŋgɛ́ne ngáne béyagɛ́ bad, nɛ́ŋgáne e’chemléd bé melɛ́ míme Dyǵb ámwédé ne ábɛ́ bad. Né-ǵó, Abrahamɛ́ an’yǵg awe mwǵn Aisigɛ́ ámbíid e e’pun saámbé áde béchyáá mó. Aisigɛ́ mó-’ɛ́ an’yǵg awe mwǵn Jakǵbɛ́, Jakǵbɛ́ mó-’ɛ́ áyāg ábe bǵn dyǵm ne bébɛ́ ábe bédé ábɛ́d betaa.

⁹ “Ábɛ́ betaa bɛ́nwōōn mwǵnyan nhóg, Josɛ́bɛ́ kǵnjí á nlém-tê. Né-ǵó, bénsǵm mó nɛ́ŋgáne ntāŋ. Bad ábe bénsǵmmɛ́ mó áwāb, bɛ́nkɛ́ɛ́n mó á alon á Egipto. Bon Dyǵb démbɛ́ mó ámbíid,

¹⁰ ábɛ́l-lɛ́ atóm metake mésyā́l áte. Dyǵb dɛ́mbɛ́l Farao kǵŋ e Egipto anwǵgɛ́n Josɛ́bɛ́ menyinǵɛ́ ábɛ́-’ɛ́ Josɛ́bɛ́ debyéé, áde ápédé áwe á’sǵ. Nɛ́n dɛ́mbɛ́l Farao ambɛ́ Josɛ́bɛ́ atii á ngǵmenaa ámīn e alon ne ámīn e ábɛ́ bwɛ́m é’syā́l.

¹¹ Ambíid enɛ́, nzaa e ngíne empɛ́ á alon á Egipto ne á alon á Kanahan. Ene nzaa empɛ́ɛ́n metake mé ngíne, ábɛ́d betaa bɛ́nkɛ́nwōŋ-’aá ndyééd eche bédyǵkɛ́.

¹² Né-ǵó, áde Jakǵbɛ́ áwǵgɛ́ bǵn ndyééd edé á Egipto, anlóm ábe bǵn áwed. Nédɛ́ ábɛ́d betaa. Nɛ́ dǵó ábédé bó ngen e’sǵ ákɛ́ áwed.

¹³ Ade bǵn ábe Jakǵbɛ́ békíí á Egipto ngen éche élóntɛ́né ébɛ́, Josɛ́bɛ́ ampalé yǵl áte wɛ́ɛ́ baányan. Hɛ́ dǵó Farao ásǵŋtɛ́né tǵŋgɛ́ne túmbé echɛ́ Josɛ́bɛ́.

¹⁴ Né-ǵó, Josɛ́bɛ́ anlyǵtɛ́n baányan aá bɛ́lāa sáá Jakǵbɛ́, áhyag ne eche túmbé esyā́l á Egipto. Bó moosyā́l bɛ́bédé móom mé mod saámbé ne bétāan.

¹⁵ Dóó Jakǵbɛ́ bó moosyā́l békíí á Egipto. Awed-taá mó ne ábe bǵn, betaa ábe syánɛ́ bɛ́ndyɛ́é’ɛ́ kǵáŋ béwɛ́-’ɛ́.

¹⁶ Ambíid e nɛ́, bɛ́ntɛ́d bó ndim bɛ́sūɛ́n ámbíid á dyad á Shekɛ́m, bɛ́límé mó áwed á ndǵɔb echɛ́ Abrahamɛ́ ánchanɛ́nnɛ́ mǵnɛ́ wɛ́ɛ́ bǵn bé túmbé e Hamǵ.

¹⁷ “Ade pǵndé ékwǵgɛ́ apɛ́ echɛ́ Dyǵb délōnɛ́d̄tɛ́ dyam áde ánlā́a’ɛ́ Abrahamɛ́ aá móǵbɛ́l, mesonǵɛ́ míme ábɛ́d bad ábe bɛ́bédé á Egipto mɛ́mmǵd acháge bwǵmbwam.

¹⁸ Kǵáŋne á asǵ, kǵŋ empɛ́e echɛ́ enkɛ́mbíí myanǵó míme Josɛ́bɛ́, empɛ́ á nkamlɛ́n.

19 Anwón akwáb tângene ábēd betaa átagté-'ε bó. Ankǎŋ bétēdē ábab bǎn á ebwóg, ábel bonj béwê.

20 Mmê mesú dǒo béchyaá Mosεε. Abédée mwǎn awě ambõŋ bwámbwam. Béntǒgén mó á ndáb wée sáá á etûn é ngõn éláán.

21 Ambíd enê dǒo bétédte mó á ebwóg-te. Héε mwǎn a mmwaád awě Farao ádíbté mó, átēdē mó ngáne awě mwǎn, átǒgné-'ε mó kǎŋ ákwogé'.

22 Bén'yāgēd Mosεε debyée á bad bé Egipto ásyāēl kǎŋ abé ndǎle e mod á nhóbtéd ne á mbɛltéd.

23 “Ade Mosεε ápédé móom mé mwě méniin, mewēmtēn mēmpií mó áke dényīn baányanj bé Israel.

24 Antán ngáne mod a Egipto átagtéε mwǎnyan nhóg. Dǒo ákíí áhed átimtēn. Anwónǵén mó áwúé-'ε ane mod a Egipto.

25 Mosεε anwémtén aá ábē bad béchem nén bán Dyõb áhede mó abenled áhúd bó á mekáá mé bad bé Egipto, bonj bénkēnyínné nê.

26 Epun éche ébádténé, antán ábē bad bé Israel bébe bēn ne bēn béwane'. Anhēd nzii eche áyālēē bó ákóm nsaŋ. Dǒo álāŋgēé bó aá, 'Eesaá mbále bán baányanj bóo nyédí-yε? Chán-nō nyé mod-té áhedεε waáb alógen?'

27 Bonj ane mod awě ahedé'áá waáb alógen nê, antínéd Mosεε á nkǎg ásedté mó aáken, 'Nzé-módé abagé kunze aá ékamlan ne ákáad sé?'

28 Ehede mémpē awúu ngáne éwúú mod a Egipto chǎn-ε?'

29 Awóg áde Mosεε áwógé nê, ansõb ákē á mbwóg e bad bé Midian. Áwed-táá ádyée kǎŋ bonj áchyāá ábe bǎn bé baachóm bébe.

30 “Ambíd e móom mé mwě méniin dǒo ángel épíídé Mosεε á ehyáŋge. Empíí mó a muú-te, rímé ménkōbēn mwǎ bwel. Nén ábédé benben ne mbǒod e Sinai.

31 Ade Mosεε ányíne ádén akan, menyáké ménkōb mó. Ansíde benben aá móton anõn bwám, dǒo áwógé ehób éche Sǎŋgwéeé nén aá,

32 'Mée ndé Dyõb áde ábõŋ betaa, Dyõb áde Abrahamε, Aisigε ne Jakõbe bēbēnlé'áá.' Ne mbwóg ní ngíne Mosεε enkēnchu'ε anõn áhed.

33 Héε Sǎŋgwéeé álāŋgēé mó aá 'Húd metámbe á mekuu áyāle abwóg á hõm áde étyéémé nén ádíi hõm áde ásáá.

34 Nnyíne ngáne ábēm bad ábe bédé á alonj á Egipto békudεε metake bwámbwam. Nwógé ngáne bēwennadté dǒo nhyédé bó awõŋgen. Bǒob-pǒo hyǎg, mēlõm wε á Egipto.'

35 Anén Mosεε móo bad bé Israel bēmbāŋgē á yǎl bonj bésedté mó bánken, 'Nzé-módé abagé wε kunze ákamlēn ne ákáad sé?' Mó-'aá Dyõb dénlõmmé ákamlēn ne ásonj ábē bad. Nén dēmbenléd áde ángel émpií'ε mó áde bwel bénkōbpē muú.

36 Mosεε awed móo ambídén bad bé Israel á Egipto. Ambēl ne e'chemléd áwed ne á Eyake é edíb é nkwě. Ambēl-ε menyáké ne e'chemléd áde bēbédé á ehyáŋge á etûn é móom mé mwě méniin.

37 Anén Mosεε móo anláá bad bé Israel aá, 'Dyõb délõmē nyé nkal é'dǎádǎŋ awě ábíid átínté echēn melemlēn nēŋgáne álómé me.'

38 Melemlēn mé Mosεε móobédé nlatén ne ábēd bad á ehyáŋge. Abédé áwed ne ábēd betaa áde ángel eche Dyõb dénlõmēnnē nlébtéd á Mbǒod e Sinai énhõbpē áwāb. Mmén nlébtéd míme Mosεε ánkudté wée ángel móo syánē dédíi déhídeé.

39 “Abēd betaa bénkēnwógénné Mosεε, bonj bēmbāŋ mó á yǎl, bétimé bēwēmtān átim ámbíd á Egipto.

40 Ade Mosεε ályágé adé á mbǒod e Sinai dǒo bad bé Israel bēlāŋgēé mwǎnyan Arõne bán, 'Bélé sé bwēm ábe bēbē nēŋgáne myõb ábe bēlyāgēd sé áyāle séebii'ε dyam áde ábēnlédé ne Mosεε awě ambídéd sé á Egipto.'

⁴¹ Hée bébélé chõm éche éwagné mwän a nyag bonj bébootéd e'lém awúu ábe chó mendε. Bêmbel kááñne ngande, áwóg menyinje ne chõm éche bébénlé nímab mekáá.

⁴² Dóo Dyõb ákúnnédé bó mbíd bonj áchenné' bó ákânned ngumε éche édé ámin. Ebénlédé ngáne éténlédé á kálag e bekal bé'dæádəñ nén bán, 'A-bad bé Israel, áde nyémbēē á ehýánje á etún é móom mé mwé méniin saké mεε nyékwénlé'áá káa nyétúmmé'áá e'lém ábe mendε.

⁴³ Téndε echē dyõb áde béchəgεé bán Molek móo nyémpēmē. Ediidingε-'ε éche tintinε a dyõb áde béchəgεé bán Refan chóo nyéhyómnaá. Mmén myõb móo nyébénlé mekáá bonj nyébwəgkē meböbõñ. Né-óó, mēbēñ nyé, nlóm nyé hõm áde áchábñédé tómaa alonj á Babilõn.' ”

⁴⁴ Stefanuse ambé abád ámpē áá, “Ade ábēd betaa bébédé á ehýánje bēnwõñ Ebem é Dyõb échē élúmte nén bán Dyõb ádé ne bó. Bēnlõñ chó nyaa echē Dyõb dénlāā'ε Moseε áá álõñ chó. Nsáaned níme Dyõb délūmēdtē Moseε móo ánhīdtē.

⁴⁵ Ambíd e pónédé ábēd betaa bēnkõb ene téndε á mekáá níme ábab besáá. Bēnwālē chó áyāl áde bóobe Josua békóbné melonj ndəob echē Dyõb dēnnanēé bó bad áte. Ene téndε embé ebé áhed kááñne á pónédé eché Dabidε.

⁴⁶ Nsimé ní Dyõb ríhídé'áá Dabidε. Né-óó, anchánj Dyõb áá ábe mó kunze mólõo Dyõb áde Jakõbe ábénlé'áá ndáb.

⁴⁷ Bonj Solomonε, Dabidε mwän, móo antīm Dyõb ene ndáb alóo.

⁴⁸ Bonj kénē Dyõb á Ngum éēdyēē'ε á ndáb eché baányonj bēlõñné mekáá. Edé nén ngáne nkal é'dæádəñ nhóg ahóbé áá Dyõb áhóbé áá,

⁴⁹ 'Nkonj nímīn móo nídé ádēm atii dé nkamlen,

nkõñsé-'ε níbé wéε mbanneé mekuu.

Nyaa e ndáb ehéé nyéhεle-se nyélóo mε?

Ké'ε héé mékōmmēē áte?

⁵⁰ Mmēñ meémaa'ε ábén bwēm abel-ε?' ”

⁵¹ Stefanuse ambád ahób áá, “Nyédii bad ábe bēwúú nló áte. Nyélelé nlém á abum. Nyékólé metúu áyāl e eyale é Dyõb. Nyédii melemlen nēñgáne ábēñ betaa, nyétāngan Edæádəñ éche Ésáá.

⁵² Nkal é'dæádəñ ké nhóg alyəgé áse awē enkēnkūd metake á mekáá níme áben betaa-yε? Bēnwūū mésénzε mé Dyõb mésyāal níme se' bóod mēmbēl ehóñgé áyāl e epe éche Ane awē abele mekan níme métāngéné. Nyé-'ε bóob nyésómé mó, nyéwúú-'ε mó.

⁵³ Nyé bēn-naá nyékudé mbéndé éche Dyõb álómé mbwiined ne éche ángel bonj kénē nyéehídeé chó.”

Bélumé Stefanuse meláá

⁵⁴ Ade bad bé mbwóg bēwógé mekan níme Stefanuse áhóbé, bēnlīñ bwāmbwam kááñ yāl ésōgē bó áte.

⁵⁵ Stefanuse-'ε Edæádəñ éche Ésáá énlõn mó áte. Néε ánóné ámin ányīnē' ehúmé é Dyõb, ányīnē' Yesuε ngáne átyéémé Dyõb á ekáá émbáá.

⁵⁶ Dóo áhóbéé áá, “Nyénəne', nnyīne' néε dyõb ánédñédé, Mwän-a-Moonyonj átyéémé Dyõb é ekáá émbáá.”

⁵⁷ Hée bad bé mbwóg bēhédé esaád é ngine békútén-ne metúu ne mekáá bonj bó moosyāal bēbōnlād mó. ⁵⁸ Bēndol mó bésyāñnéd mó á dyad-tē, bébootéd mó meláá alúm. Bad ábe bēntyēēm mbõñj ákógsen Stefanuse bēnhūd nímāb nkob áyāl béke bēbānē á'sō-te wéε kódemod póg bán Səale ánəne bó. *

* **7:58** Atínté e bad bé Israel émbē nén bán ábe bébídé mbõñj bán mod abelé awusé bóo bébágé'áá bad bé'só alúm mó meláá.

⁵⁹ Ade bélúmɛé Stefanusɛ meláá nê, ankáné aá, “A-Sánjú Yesu, mmõŋ kõb échêḡ edáádàŋ.”

⁶⁰ Dóó ábwógé mebóbónŋ bonŋ ákántē ehób ámīn aá, “A-Sán, lagsén bó nímén mbéb nīme bébɛléé.” Amaá-aá ahób nê, awé-’ɛ.

8

¹ Sɔɔɛ abédé ásē ákwentén-ne aá béwúu Stefanusɛ.

Metuné mébélé Ebɛɛ épántédé áte

Echê epun chèn mwembé mé Jerusalem mêmbootéd metake mé ngíne akud á mekáá mé bad bé Israel. Bad ábe bédúbpé bésyāāl bémpan̄téd áte á mbwóg e Judeya né e Samaria ésyāāl. Bonŋ bembapɛɛ bé nlómag bēnpen-ɛɛ bēnlyǎg.

² Nguse é bad ábe bēmbané nīmab nlém rīsyāāl ábɛle Dyõb bēnlīmē Stefanusɛ. Béchyɛɛ’, bélebé-’ɛ mó.

³ Bonŋ Sɔɔɛ mó-’ɛ ahɛdáá mwembé abóded. Ahúé-’á enén ndáb átimé eníní, ábíd̄tē bó á ebwóg, bebaád ne baachóm, ahág-ke bó á mbwóg.

Filibɛ akalé nkalaŋ ní bwām á Samaria

⁴ Bad ábe bédúbpé bémpan̄téd áte, békag békale nkalaŋ ní bwām.

⁵ Filibɛ mó ankē á dyad ambáá á mbwóg e Samaria ákanlé bad t̄ŋgene Ane-awě-Béwógté.

⁶ Ade ndun e mod éwógé mam nīme Filibɛ áhóbéé bényín-ne e’chemléd bé menyáké ábe ábélé, bēntōŋ metúu atále áte áwóg dyam áde áhóbéé.

⁷ Filibɛ amběl e’dáádàŋ bé mbéb é’syǎŋgé’áá ekud é bad áte ne e’saád é’ ngíne, ekud é bad-tɛ ábe yǎl énwēɛ epɛd ne ábe bésyǎgté’áá bēndyɛɛ bwām.

⁸ Nén dēmběl bad bésyāāl á dyad-tē wē bēwóg menyīŋge bwāmbwam.

⁹ Bɔɔb-pɔɔ, mod nhóg abédé ádē dyad áte bán Simɔne, akumé’áá ngaŋ eche ekómté’áá bad bé Samaria yǎl áte bwāmbwam. Akumé’áá ekáá á t̄l aá modmod eépedɛɛ mó.

¹⁰ Bad bésyāāl á dyad, ndale é bad ne bekwěkwě bé bad bēmbané nlém áwē, béhōbē-’ɛ bán, “Anén mod adíi ngumɛ e Dyõb echē béchágéé bán, Ngum embáá.”

¹¹ Bēmbané nlém áwē áyāle á et̄n é pónde ankõŋ bad yǎl akómed áte ne echē ngaŋ echē ákúme’áá.

¹² Bonŋ áde bédúbpé nkalaŋ nīme Filibɛ ânkaléé bó t̄ŋgene nkalaŋ ní bwām mé nkamlɛn ní Dyõb ne t̄ŋgene Yesu Kr̄istə, bēnkúd edusɛn, bebaád ne baachóm.

¹³ Simɔne mwēn ámpē andúbé, ákūd-tɛ edusɛn. Ambootéd Filibɛ ahíd kéhéé áde ákágé’áá. Yǎl enkóm mó áte áde ányíné mbeltéd mmé menyáké nīme Filibɛ ábélé’áá.

¹⁴ Bembapɛɛ bé nlómag bēnwóg á Jerusalem bán bad bé Samaria békóbé eyale é Dyõb, hée bélómé Petro bó Jɔne áwed.

¹⁵ Ade bépédé áwed bēnkānnéd bad ábe bédúbpé nén bán békud Edáádàŋ éche Esáá.

¹⁶ Bēnkānnéd bó áyāle bēnkēmpaá Edáádàŋ éche Esáá akud. Bēndusén bó dás̄ á d̄n áde Sánjú Yesuɛ.

¹⁷ Dóó Petro bó Jɔne bēbáné bó mekáá á nló bó-’ɛ békudé’ Edáádàŋ éche Esáá.

¹⁸ Ade Simɔne ányíné aá nzé bembapɛɛ bé nlómag bēbáné mod ekáá á nló akude’ Edáádàŋ éche Esáá, ambídéd mōné ábe Petro bó Jɔn,

¹⁹ áhōbē aá, “Nyébag mémpē enén ngíne ábel bonŋ kénzéé awě nībáné ekáá á nló ákud Edáádàŋ éche Esáá.”

²⁰ Petro antimtén mó aá, “Nzé ewémténé wéé móhɛle-se móchānēn ndɛ e Dyõb mōné, nyáábe nīmōŋ mōné nyékag á d̄-á-muú.

21 Weewóo' é akab ké ahóg áyāl e nímɛd nsón áyāle nímōη ním méeboo' é áte á'sō é' Dyōb.

22 Kunnéd-te mbíd étimɛn Dyōb, áyāle nímén mewêmtɛn mé mbéb nímɛ éwóó áte, ékáne' wéé Sánḡwéé álagsɛn wɛ áyāle awêmtɛn áde éwémtné enén ndín e akan.

23 Mmaá anyín nén mée, kán emaa wɛ akób áte, mbéb-pe ríhédé wɛ á mehanḡé-te."

24 Héé Simōne álânḡéé Petro bó Jōn aá, "Sōn, nyékánned mɛ wéé Sánḡwéé, ábel boη nímén mésyāāl nímɛ nyéhóbé ké ahóg déebɛnlád ne mɛ."

25 Ade Petro bó Jōn bémáá mam mésyāāl ahób tâḡɛne Yesue, bémād-te nkalan nímɛ Sánḡwéé akal, bēntīm ámbíd á Jerusalem. A nzii á esú békálé'áá nkalan nímɛ Yesue á myad mé mbwóg e Samaria híin.

Filibɛ bó mod e alon dé Etoopia

26 Mmíníí mbwɛ ángɛl e Sánḡú enláá Filibɛ aá, "Ladé yāl, ékag á ped e mbəη wéé nzii echē ebíde á Jerusalem áke á Gaza étóméé" Béebɛnládté enén nzii ámpē.

27 Filibɛ abōḡséné-'aá ákăḡ-ke. Héé ábomné soη e mod á nzii ngáne ásué' é áwē alon. Anén mod abédéé ndəle e mod awē akamlánnáá, áñóné-'é ngáb eche Kandɛɛ, mmwaád awe akamlánnáá alon dé Etoopia. Ane mod ankē á Jerusalem.

28 A ehúu ámbíd échē, andyéé á ebambam. Ngáne ákágé'áá, aláá'áá kálag echē nkal é'dəádəη Yesayaa.

29 Héé Edəádəη éche Esáá élanḡéé Filibɛ aá, "Kăḡ á ebambam hê, ébê chó bɛnbɛn."

30 Filibɛ annyəḡéd áhed, dōo áwógé ngáne ane mod aláá' é kálag e nkal é'dəádəη Yesayaa. Dōo áseɛtɛé mó aáken "Esōḡtan chōm éche éláá' é-yɛ?" 31 Ane mod antimén mó aá "Chán mémwéé asōḡtɛn áde mod éētānledéé mɛ áte?" Né-óó, anchélé Filibɛ aá ácháḡe á ebambam, bómō bédyēē áhed.

32 Epɛd éche ane mod ákóó'áá alán ébédéé nén, "Abédéé nēḡáne rídyəη nímɛ mbód nímɛ békagké awúu, ambé-'ɛ ngáne mwān a rídyəη nímɛ mbód awē bésɛɛé nyoη boη eéchyēē', enkēnhóbpé dyamdyam.

33 "Bēnsudéd mó edúbé, békōbɛn-ne mó kunze.

Nzé-módé átūb nímɛ nchyáátén dīn áde édíí bán bēnhūd mó ámīn á nkōḡsé."

34 Ane mod ansɛdéd Filibɛ aáken, "Nzé-módé ane nkal é'dəádəη áhóbéé, eche yāl chēne ké'ɛ mod ampée?"

35 Héé Filibɛ álânḡéé mó nkalan nímɛ Yesue, átānlād mó mekan áte, mbooted ne échén epɛd.

36 Ade békagké nē, bēmpě hōm áde mendīb médíí. Héé ane mod áhóbéé aá, "Mendīb móō mén. Weédūsānnē mɛ ngen póg-ɛ?"*

38 Ane mod anhób aá bétíi ebambam. Dōo bó Filibɛ bésúdé ásē bésól á mendīb-te boη Filibɛ ádusán mó.

39 Bébídé-'aá á mendīb-te bídén, Edəádəη é Sánḡú ékēēn-ne Filibɛ. Ane mod eenyíne' aá mó ámpē boη ambé ákăḡ, alón-ne ne menyīḡe.

40 Filibɛ annyín yāl á dyad á Azotus ábooted-te akɛ dyad ne dyad té, ákalé' nkalan nímɛ bwām, káəη ápe á dyad á Kaisaria.

* **8:36** Donḡe á kálag dé'só ábádé nchoo 37: *Filibɛ anláá mó aá, "Nhele rídūsɛn wɛ, nzése edúbpé Yesue ne ním nhóg." Ane mod ankwentén aá, "Ndúbpé nén mée Yesu Krīstə adli Mwān a Dyōb."*

9

Sɔɔle atimé Yesue adúbe
(Mbɛl 22.6-16; 26.12-18)

¹ Bɔɔb-pɔɔ Sɔɔle ambé ákímē' áwúu bembapɛɛ ábe Sánḡwéé. Ankě wée prise ambáambáa,

² aláá mó aá átel kálag échě ábɛé belyáged bé ndáb é mekáne é Damaskɔs, ábel nén áwōḡ kunze echě nzé anyíné bad ké béhéé ábe béhíde' nzii e Yesue áwed, áhan bó, ken bebaád-'é ké'ε baachóm, akób bó, ákēēn bó á Jerusalem.

³ Dóo Sɔɔle áhídté bon ákag. A nzii e Damaskɔs wê, áde ádíí benben ne dyad, emwɛdmwɛd émbíd ádyōb, épen mó yǎl esyáál.

⁴ Anhún á ndɔɔb. Dóo áwógé ehób élāḡḡé mó aá, "A-Sɔɔl, á-Sɔɔl, cheé ékáá bon étagté me?"

⁵ Sɔɔle ansɛdéd aáken, "A-Sán, nzé-módé ne?" Dóo échě ehób étimtanné mó aá, "Mɛ-ɛé ndé Yesue awě étagtéé.

⁶ Bɔɔb-pɔɔ, hidé ásē, ékag á dyad-tê, áhed dóo béléā-'é wɛ chōm éche étāḡḡéné abel." ⁷ Bad ábe bóobe Sɔɔle bēnwōḡ bēntyéem, dyam déeboó bó ahób. Bēnwōḡ ehób bon bēnkēnyínné mod awě ahóbe'.

⁸ Sɔɔle anhidé ásē, ánēdē mǐd áte, bon eenyíne'aá ekíde. Né-ɔɔ, bēnchāā mó é ekáá, békēēn mó á dyad-tê á Damaskɔs.

⁹ Andyéé e'pun é'láán adé eenyíneé ekíde. Ene pónde esyáál-le eemwédeé, eedyéde-'áa chōmchōm.

¹⁰ A Damaskɔs mod abédé awě andúbé Yesue, béchágé'áá mó bán, Ananiase. Annyín ndóg. A ndóg-te wê, Sánḡú Yesue anchəḡ mó aá, "A-Ananias." Ananiase ankwentén aá "Mɛ nén, a-Sán."

¹¹ Dóo Sánḡwéé álāḡḡéé mó aá, "Bonśén, éke á nkon ḡ nzii níme béchəḡéé bán Ntyéémé. Wěpě á ndáb wée Judase. Nzé epedé áhed, ésēdéd mod awě abíde á dyad á Tásus, béchəḡe mó bán Sɔɔle. Adé áhed bɔɔb akāne',

¹² anyíné-'ε ndóg. A ndóg-te wê, anyíné mod awě béchəḡéé bán Ananiase, abáné mó mekáá á nló ábel bon anyínen ámpē."

¹³ Ananiase antimtén mó aá "A-Sán, nkénwōḡ ane mod dúu bwāmbwam ne nhel mí mekan níme ákébenlé ábōḡ bad áyāl á Jerusalem.

¹⁴ Apedé-'ε á Damaskɔs hén ne ngíne echě beprise bémbáá bébágé mó akób bad bésyáál ábe békāne' á dīn ádōḡ."

¹⁵ Bon Sánḡwéé anláá Ananiase aá, "Kǎḡ, áyāle nén mpwɛdé anén mod ábele me. Mó ábēl bad ábe béesě bad bé Israel, échab kḡḡ é bad, ne bad bé Israel bēbí me.

¹⁶ Mmēn méléuméd-te mó metake níme ákudté áyāl echēm."

¹⁷ Né-ɔɔ, Ananiase ankě, asól a ndáb echě Sɔɔle ámbēē áte, abán mó mekáá á nló, álāḡḡé mó aá, "A-mwānned Sɔɔl, Sánḡwéé mó alómé me, nédē, Yesue mwēn awě ampíi wɛ á pónde eche éhyagké wén. Alómé me áwōḡ ábel nén ényínen ámpē élōn-ne ne Edáádəḡ éche Esáá."

¹⁸ Abwōḡ-ábwōḡ bwēm bēmbíd Sɔɔle á mǐd ábe bédé nēḡḡáne e'kíd é' sūu, ábooted-te anyínen. Héé ápádté ásē bon bédusán-ne mó.

¹⁹ Andyé ndyééd, amaá-'áa ndyééd adyé bon yǎl étimé mó áte.

Sɔɔle akalé eyale é Dyōb á Damaskɔs

Sɔɔle andyéé á Damaskɔs nguse é e'pun ne bad ábe béndūbē Yesue.

²⁰ Ankě á ndáb é mekáne ésebán abébite pónde ákanle bad tḡḡene Yesue, aá mó adé Mwān a Dyōb.

²¹ Yǎl enkóm mod téé áte awě anwóg mó póle á nsəl. Bésɛdté bánken, "Saá anén mod mó awúé'áá bad ábe bétúbé'áá dīn áde Yesue á Jerusalem-ε? Eesaá

mbále nén nɔm echě ápééné hén edii ákób bó átimen-ne bó ámbíd wée beprise bémbáá-ye?”

²² Bon Sɔle ambé ákalé' mímé nkalan ákäg á'sō ngíne ngíne. Metote míme ámbéé álúmed nén bán Yesue mó adé Ane-awě-Béwógté, méntāngēn nyaa echě bad bé Israel ábe bébédé á Damaskos bēnkēnwóngé dyamdyam ahób.

²³ Ambíd e e'pun híin bad bé Israel bēnladén áte áháge Sɔle ngáne béwūū-'é mó.

²⁴ Bon Sɔle anwóg ntii míme bébélé. Bénóné'áá mmwe mé e'ké ní dyad nkuu ne mūte ábel béwūú mó.

²⁵ Bon nkuu nhóg Sɔle ábē bembapεε béntéd mó, béhé mó á elón-tê, bébídéd mó á epən é eséd bé e'ké ábe bēnləñned dyad, bon bésūdéd mó ámbíd e ebwóg.

Sɔle atimé ámbíd á Jerusalem

²⁶ Sɔle ankě á Jerusalem. Ade ápédé áwed, anwanén aá móbê ne bad ábe bédúbpé Yesue bon ábê bad bébáá'áá mó áyāle bēnkēndúbéé bán mómpé adúbpé Yesue.

²⁷ Héε Banabase áchāngē mó á ekáá bon ákεené mó wée bembapεε bé nlomag. Anchemtéd bó áte ngáne Sɔle ányíne Sāngwéé á ndóg-te á nzii ne chōm éche Sāngwéé álāngé mó. Anláá-'ε bó ngáne Sɔle álāngé'áá bad mam tāngene Yesue á Damaskos ésebán abáá' dyamdyam.

²⁸ Né-ɔó, Sɔle ambé ne bó, ákag mebwóg mésyāāl á Jerusalem ákalé' nkalan ní bwām á dīn áde Sāngwéé ésebán abáá' dyamdyam.

²⁹ Akānlé'áá káəñne bad bé Israel ábe béhóbé'áá ehób é Grikia áswantán-ne ne bó. Dóó bébóótédé nzii ahed áwūú mó.

³⁰ Ade bad ábe bédúbpé Yesue bésónténé bán béhede Sɔle awūú, béntéd mó bésyāgnéd mó á dyad á Kaisaria bon bēlōmē mó á dyad á Tásus.

³¹ Né-ɔó, ene pónde esyāál bad ábe bēndūbē Yesue á mbwóg e Judeya esyāál, á Galilia ne á Samaria bémbē ne nsan, béwōñ-'ε mbwóg ní Dyōb áte nê ábēl béwūú áte, Edáədəñ éche Esáá éwōñgān-ne bó.

Petro akii a myad mé Lida ne Jopa

³² Petro akagé'áá mbwóg áte esyāál. Ebédé pónde póg eche akíí bad bé Dyōb ábe bébédé á dyad á Lida aleled.

³³ Ade ápédé áwed, antán mod awě béchəgeé bán Aniesε. Esón é mekuu énwē mó, átimēn ndáb mwě waam.

³⁴ Petro anláá mó aá, “A-Anies, Yesu Krístəə áđíd wε bwām hén bəəb. Pádé ásē énabe ádon anən.” Abwōg-ábwōg Aniesε ampádé ásē.

³⁵ Ade bad bésyāāl ábe bédyéé'áá á Lida ne Sharən bényíne née ane mod ádyéé bwām, bēmbootéd Sāngú Yesue adúbe.

³⁶ Mwaád nhóg abédé á dyad á Jopa awě béchəgé'áá bán Tabitaa, andúbé Yesue. (Dīn á Tabitaa á ehób é Grikia ádii bán Dəkase nédē e'sél.) A alongé áde ásyāāl mbon mó ne mós ábéláá áwōñgān-ne betóótōkē bé bad.

³⁷ Mmē mesú-'ɔó, ankwě nkole awé-'ε. Bēnwobé mó ndim bétéd mó bēbānē á ton e ndáb echě ebédé ámīn.

³⁸ Bəəb-pəə dyad á Jopa dénkēnchabnédté dyad á Lida áyāl. Né-ɔó, áde bad ábe bédúbpé Yesue béwógé bán Petro adé á Lida, bēnlōm bad bébe áwē, ne mechāngé nén bán, “Sōn hyāg á mehélé-te.”

³⁹ Né-ɔó Petro ambonśén, bósəbəə békē-'ε. Ade ápédé áwed, bēnchāgnéd mó á ton e ndáb eche ebédé ámīn. Bekúd bé bebaád bēnləñned mó, béchyεé', bēlūmtē-'ε mó mbóté ne nkobe míme Dəkase ámbanédte bó áde ábédé á alongé.

⁴⁰ Petro ambídéd bó moosyáál á ebwóg, akóg mebóbón ábootéd-te akáne. Dóo ákúnné yál á ndim bon áhóbé aá, “A-Tabita, pádé ásē!” Tabitaa andibé mǐd áte. Anyín áde anyíné Petro, ampádé ásē.

⁴¹ Petro ansád ekáá, awóngén anyen mó ásē. Dóo áchénlé bad ábe béndübē Yesue, ne bekúd bé bebaád ábe bémbē áhed, bon álūmtē bó Tabitaa áde ádíí á alongé.

⁴² Mmén nkalān mēnkanléd á dyad á Jopa áte ásyāāl a etūn é pónDé, ekud é bad édúbé-’ε Sánjú Yesue.

⁴³ Petro andyεé á Jopa nguse é e’pun. Andyεé á ndáb e mod awě abelé’áá nsón mé e’kob é’ nyam, awě béchágé’áá bán Simōne.

10

Petro akii wée mod awě eésē mod a Israel

¹ Mod a Roma nhóg abédé á dyad a Kaisaria bán Kōneliōse. Akāmlánnáá echon é mbwókél e sánze éché béchágé’áá bán, “Echon é mbwókél e sánze é Italia.”

² Kōneliōse abédé mod awě ahídé’áá mekan mé Dyōb ámbíd. Mwēn ne eche ndáb esyāál bébénlé’áá Dyōb. Ansálé ekáá áte, áwōngān betóótōkē bé bad bé Israel, ákānnē-’ε pónDé ésyāāl.

³ Ebédé dyam ngān éláán mǐte nhóg, anyín ndóg. A ndóg-te wē ankōn ángel e Dyōb anyín. Enchāg mó aá, “A-Kōneliōs.”

⁴ Annōn ángel ne chóón, ne mbwóg, bon ásedtē nēn aá, “A-Sán, cheé édé?” Angel enkwentén mó aá “Dyōb áwógé mímōn mekáne, anyíné-’ε ábōn e’bon bé nlém. Adé-’ε mbonjén ákwentēn wε mekáne.

⁵ Bōob-póó, lóm bad á Jopa, békē béchéle mod nhóg awě dīn ádíí mó bán Simōn awě béchāgεé bán Petro.

⁶ Adé nken á ndáb e mod nhóg awě akīnte’ e’kob é’ nyam awe béchāgεé bán, Simōne. Simōne ne adyεε’ á nkāg mé edīb é nkwě.”

⁷ Dóo ángel eched éhídté, bon Kōneliōse áchēnlē ábē bembāledε bé ndáb bébe, ne sánze póg échē chōmpē ehídé’áá mekan mé Dyōb ámbíd, ebé-’ε sánze échē enoné’áá Kōneliōse.

⁸ Alángé-’áá bó dyam ádē ábénlédé, alóm-me bó á Jopa.

⁹ Ade békāgkē, nēε bīn é’sāngé, áde békwógé aεε á Jopa, Petro anchágé á ndáb mīn akáne. Nē ábédé dyam kād.

¹⁰ Nzaa enkób mó, ádān-’ε ndyééd adyé. Ade bébonjanné ndyééd, anyín ndóg.

¹¹ Anyín ngáne ngob e dyōb énédnédé. Chōm émbíd nēngáne sánkalaa a abad, ébé nēε béchōngé dó mekéb méniin, bésudtē dó ásē.

¹² A abad-tē wē, ndín é nyam ésyāāl émbē áwēd-te; éche ékεεne’ mekuu méniin, éche édole abum ásē ne menōn mé ahín. ¹³ Héε áwógé ehób élānge mó nēn “A-Petro, syāá ásē, éwúu échén nyam, édyág.”

¹⁴ Bon Petro anhób aá, “A-Sán, meéhēlē se mǐbēl ene ndín e dyam. Meedyédéé chōmchōm mbéd éche mbéndé ehóbé aá béēdyāg, ké’ε éche éesáa á’sō é’ Dyōb.” *

¹⁵ Echē ehób émbād mó aláa nēn aá, “Weetédé chōm ké ehóg éche Dyōb áhóbé aá éesáa, wεé éesáa’ε.”

¹⁶ Nēn dēmbenléd ngen éláán. Dóo bétímné ádē abad ámbíd ádyōb.

¹⁷ Petro adolé’áá áte ábíi chōm éche ene ndóg élūmtéé. Ene pónDé dóo bad ábe Kōneliōse ánlōmmē bédíbté wée ndáb eche Simōne édíí. Bentyēm á mmwε mé e’ké.

* **10:14** Bad bé Israel bēnwōn mbéndé éche énkēmbě bó kunze ádyé donje á bwēm.

18 Hée bélébpéé ehóǒ bánken, “Nken adé áte wê awě béchəgəé Simōn Petro-ye?”

19 Ade Petro ádíi ádólé áte ášōntən chōm éche ndóg élúmtéé dǒo Edáádəŋ éche Esáá elāngéé mǒ aá, “Wóglén! Bad beláán bépédé, béhede we.

20 Né-ǒǒ lǎd yǎl, ésud á ndáb mín, weebáá bǒ ahíd áyāle meé nlómé bǒ.”

21 Né-ǒǒ, Petro ansǔd ásē, áke atán ábê bad, álāngē bǒ aá, “Mée ndé ane mod awě nyéhedeé. Cheé épídé nyé hén?”

22 Béntimtén mǒ bán, “Mod ambáá a sánze, Kōneliǒse mǒo alómé sé. Adíi mod a bwám awě abenle Dyǒb. Bad bé Israel bésyāǎl-le bébage mǒ edúbé éche échábé ámín. Angel e Dyǒb elángé mǒ nén aá álébe we áwē ndáb, ábel nén áwóg dyam ádē étāngéné mǒ aláa.”

23 Petro awógé-’aá nê, asóled bǒ á ndáb, ábē-’e bǒ e’noŋ.† Bon Petro ansóléd ábê bad á ndáb kénéé béébédéé bad bé Israel. Née bǐn é’sáŋgé, Petro anlǎd yǎl, ahíd ábê bad. Nguse é bad ábe bédúbpé Yesu e á Jopa bómpé bēnwōón bǒ.

24 Epun ehóg ámbíd e nê, Petro bémpe á Kaisaria. Kōneliǒse mwēn, ádē abum á ndáb, ne ábē besón bé ehoŋ ábe ánlēbēē, bésiné’áá Petro bǒ.

25 Ade Petro áhédeé asól á ndáb, Kōneliǒse ankē mǒ atán, ákwē mǒ á mekuu, ábwāām-me ásē ábe mǒ edúbé.

26 Bon Petro annyen mǒ ásē ahób aá, “Tyéém ámín. Mémpe ndíi moonyon ngēn.”

27 Petro ambé ákanlé Kōneliǒse ádē bésoléé á ndáb-te. Antán née ndun e mod éládné á ndáb-te.

28 Hée álāngéé bǒ nén aá, “Nyé bēn nyēbíí bwám nén bán edé mod a Israel mbéndé áwoon mod awě eésé mod a Israel ké’e ásol áwe ndáb. Bon Dyǒb álúmté me nén aá meéchāgē modmod meé adé mod awě eesáa ké’e née mod awě adé mbinde á’sō é’ Dyǒb.

29 Né-ǒǒ, áde élómé me achəg mēmpádé ásē ábwāg-ábwāg, menkēnhóbpé meé méehyáá. Bǒǒb-pǒǒ, nsedte we, cheé ékáá bon élōmē me achəg?”

30 Hée Kōneliǒse ákwētanné mǒ aá, “Sú eláán chíi, née bǒǒb, nkánné’áá áwēm ndáb-te á ngəŋ eláán é’ mǔte. Dǒo mod awě awáá mesan nímé mémwaa’ áte átyéémé me á’sō-te tǎled.

31 Bon áhǒbē aá, ‘A-Kōneliǒs, Dyǒb awógé we mekáne, ányíné-’e ábōŋ e’bon bé nlém.

32 Lóm mod á Jopa, áke áchéle Simōne awě béchəgəé bán Petro. Adé nken á ndáb wée mod nhóg awě akǐnte’ e’kob é’ nyam awě béchəgəé bán Simōne. Simōne ne adyee’ á nkəg mé edíb é nkǔē.’

33 Né-ǒǒ menlóm we atéd ábwāg-ábwāg. Ebelé-’e bwám ngáne épédé. Bǒǒb-pǒǒ sé moosyāǎl sēdé hén, Dyǒb áde-’e ne syánē. Sēsine’ áwóg dyam ké ahéé áde Sán Dyǒbe álāngé we aá eláa sé.”

Petro akānlé Kōneliǒse nkalanj mǒ bwám

34 Dǒo Petro áhédeé pǒle á nsəl aá, “Bǒǒb dǒo mbíí meé Dyǒb átédé moosyāǎl nyaa pǒg.

35 Akobe kénzéé awě abage mǒ edúbé awě abele-’e mekan nímé métāngéné, ké alon áhéé ane mod ábídté.

36 Nyēbíí nkalanj nímé Dyǒb dénlōmēē bad bé Israel. Mmé nkalanj mbédéé tāngene ákal nkalanj mǒ bwám mé nsan nímé mpédé mbwiined ne Yesu Krístə. Mǒ adé Sāngwéé á moosyāǎl.

37 Nyēbíí-’e dyam áde dēmbenléd mbwóg e Judeya áte esyāǎl mbooted ne á Galilia. Nén démbē áde Jōne ámáá bad aláa tāngene edusen.

† 10:23 Bad bé Israel béesǎlte’áá mod awě eésé mod a Israel áwab ndáb.

³⁸ Nyêbíí nén bán Dyöb dénwōgēd Yesue, mod a Nazaret, ábe mó Edáádəŋ éche Esáá ábē-’ε mó ngíne. Yesue akagé’áá hōm téé ábelé mboŋ. Ngáne Dyöb démbēē-’áá ne mó, adidé’áá bad bésyāal ábe bém̄bē áse e ngíne e Satan bwám.

³⁹ Sé bēn sēnyínné mekan mésyāal níme ámbenlé á alon á bad bé Israel ne á Jerusalem díd. Bénwūū mó, abome áde bēmbomēé mó á awōg.

⁴⁰ Boŋ Dyöb dēmpuúd mó ámbíd e e’pun é’láán, ábel-le bad bényín mó.

⁴¹ Saké bad bésyāal bēnyín-ne mó. Bad ábe Dyöb dēmmadté apwēd, bōō bényín mó. Nédē sé ábe sēndyé ndyééd sēm̄wé-’ε mmítéd ne mó.

⁴² Anlyágtén sé áá sékanle bad nkalan ní bwám, sébīde-’ε mbōŋ nén bán móó módē Ane awē Dyöb ápwédé, ákaad bad ábe bédé á alongé ne ábe bēwédé.

⁴³ Bekal bé’dáádəŋ bésyāal bēnhōb tâŋgene mó bán, mod ké ahéé awē adúbpe mó, Dyöb délagsén mó mbéb. Nén débēnléd á ngíne e ádē dīn.”

⁴⁴ Ade Petro ádíi áhóbēé nê, Edáádəŋ éche Esáá ênsūd áse, épīi moosyāal awē áwóglánnáá nímē nkalan.

⁴⁵ Bad bé Israel ábe bēndübē Yesue, ábe bōōbe Petro bēmbíd á Jopa bēmbē menyáké bwāmbwam ányín nén bán Dyöb ábágé echē nde e Edáádəŋ éche Esáá káŋne wēε bad ábe béesē bad bé Israel.

⁴⁶ Bénwōg ngáne bēhóbēé mehób mēmpēe, bēbagé-’ε Dyöb ehúmé. Dóo Petro áhóbēé áá,

⁴⁷ “Abén bad békúdé Edáádəŋ éche Esáá melemlem ngáne sēmpē sēnkudté. Né-óó, nzé-módé ahēle-se ahób áá bēdusán bó ne mendíb?”

⁴⁸ Hé-’áá áhóbé áá bēdusen bó á dīn á Yesu Krīstəə. Dóo ábē bad bēlángé mó bán ádyεε ne bó nguse é e’pun.

11

Petro ahóbé tâŋgene chōm éche ábélé

¹ Bembapεε bé nlómag ne bad bēmpēe ábe bédúbpe Yesue á mbwōg e Judeya-tê esyāal, bénwōg bán bad ábe béesē bad bé Israel bōmpē békóbé eyale é Dyöb.

² Ade Petro átimé ámbíd á Jerusalem, bad ábe bēhóbé’áá bán bētāŋgéné bad ábe béesē bad bé Israel ayag, bēmbootéd mó ahób bán,

³ “Cheé ékóá boŋ ékäg wēε bad ábe béesē bad bé Israel, bad ábe bēeyagéé boŋ nyáābōō nyédyāg-ke káŋne ndyééd hōm ahóg?”

⁴ Hé-’áá Petro áhédé nkalan á nsəl, aláá bó mekan mésyāal ngáne mēmbenlédte se á mbooted.

⁵ “Mbédé á mekáne á dyad á Jopa boŋ rínyīnē ndóg. Chōm émbíd á ádyōb nēŋgáne sánkalaa a abad, ébé nēε bēchāŋgé dó mekéb méniin, bēsudté dó áse. Bēnsudéd dó áwēm e’só-te.

⁶ Ade rínóné áwēd-te menyín nyam éche édé á abad-tê, nyam é mehín, nyam éche édole abum, ne menōn mé ahín.

⁷ Héε ríwógé ehób élāŋge me nén áá, ‘A-Petro, syāá áse, éwúε’ échén nyam, édyāg.’

⁸ Boŋ me-’ε menhób meé, ‘A-Sán meéhēlēε-se mbēl ene ndín e dyam. Chōmchōm éche mbéndé éhóbé áá bēedyāg ké’ε éche éesáa á’sō é’ Dyöb éēsōlēε me á nsəl mbéd.’

⁹ Ehób émbíd ádyōb ámpē nén ‘Weetédé’ chōm ké ehóg éche Dyöb áhóbé áá esáá, wēε éēsā’ε.’

¹⁰ Nén dēmbenléd ngen éláán. Dóo bétímné chōm ésyāal ádyōb.

¹¹ Ene pónde chēn dóo bad bēláán ábe bēbídé á dyad á Kaisaria ábe bēlómé áwēm, bēpédé á ndáb echē rídyéé’áá áte.

12 Edǎádǎŋ éche Esáá énlāā me aá syáābōō sékag, aá meebáá bó ahíd. Abê bad ntóób ábe bédúbpé Krístǎá ábe bébidé á Jopa bómpē bēnhíd me á Kaisaria. Syáābōō moosyáál sēnkě sēsól á ndáb wée Kǎneliǎse.

13 Kǎneliǎse anláá sé ngáne anyíné ángel etyéémé áwe ndáb boŋ ene ángel eláá mó aá, ‘Lóm mod á Jopa áke áchǎg mod awě mǐn métsyāāl médíí bán Simǎn Petro.

14 Nzé apedé ǎlāā nyé póle eche ǎbǎl boŋ Dyǎb ásǎŋ ádǎŋ alongé, ásǎŋ-’é ádǎŋ abum á ndáb.’

15 Ambíd enê, mboótédé-’aá dyam ahób, Edǎádǎŋ éche Esáá épiidé bó melemlem nēŋgáne êmpíí’é sé á mbooted.

16 Dǎǎ ríkám-téné dyam áde Sǎŋgwéé ánhǎbpē. Anhób aá, ‘Jǎne adūsánnáá bad ne mendíb boŋ bédusén nyé ne Edǎádǎŋ éche Esáá.’

17 Enyǐnnad nén bán Dyǎb ábágé ábén bad ábe béesě bad bé Israel melemlem me nde míme ámbéé syánē áde dédúbpé Sǎŋgú Yesu Krístǎá. Nzéé-ǎ rídíí ákǎŋ ntíí rí Dyǎb?”

18 Ade bėwógé nê, bėnsǎg Petro mekan ahób áyāl, bėbootéd Dyǎb aken. Bėhóbé’áá bán, “Dyǎb ábágé kǎŋne bad ábe béesě bad bé Israel etál áte de nímab mbėb átimen Dyǎb, ákud-te alongé áde déemaá’.”

Mwembé mbóótédé á dyad á Antyǎg

19 Bǎǎb-pǎǎ, áde bėwúú Stefanuse, bad ábe bėmpǎntéd áte áyāle metake míme bėkúdáá, bó donge á bad bėnkě kǎŋse á Fonisia, donge ákē á Saiprus, ábíníí-’é bėkē á Antyǎg. Bėkágé’áá, bėkanlé dásǎ bad bé Israel bėnpen nkalan ní bwām.

20 Boŋ bad bėmpēe ábe bėndúbē Yesue ábe bėmbíd á myad mé Saiprus ne Sirine, bėnkě á Antyǎg, bėkanlé kǎŋne bad bé Grikia, bėlǎŋgē-’é bó nkalan ní bwām tǎŋgene Sǎŋgú Yesue.

21 Ngíne e Sǎŋgú embé ne bó. Ndun e mod endúbe, étimēn-ne Sǎŋgwéé.

22 Mmē myǎngó mēmpě á metúu mé bad bé mwembé ní Jerusalem. Né-ǎǎ, bėnlǎm Banabase á dyad á Antyǎg áke dēnyǐn bó áwed.

23 Ade ápedé áwed boŋ anyín ngáne Dyǎb ánámte bad, anwóg menyǐnge, ambě-’é bó elébé aá bėhíde’ Sǎŋgwéé ne nlém nhóg.

24 Banabase abédéé mod a bwām, Edǎádǎŋ éche Esáá émbē ne mó, adúbe dēnwū-’é mó áte bwāmbwam, ekud é bad-te éndúbē.

25 Dǎǎ Banabase ákíí á dyad á Tasus áhed Sǎǎle.

26 Ade ányíné mó, ampéén mó á Antyǎg. Né-ǎǎ á etún é mwě nhóg, bó bad bėbe bėbómé’áá ne bad bé mwembé. Bėn’yǎgēd-te ndun e mod. A Antyǎg wē dǎǎ bėsébpé bad ábe bédúbpé Yesue dǐn achuu bán Bad bé Krístǎo.

27 Mmē mesú dēn, donge á bekal bė’dǎádǎŋ bėnhídé á Jerusalem bėke á Antyǎg.

28 Bó mod nhóg awě bėchágé’áá bán Agabuse antyéém ámín. A ngíne e Edǎádǎŋ échě Esáá, anhób aá, “Nzaa e ngíne ekwógé ape, ǎbē-’é nkǎŋsé-te rísyāāl.” Nén dēmbenléd-te á pǎndé eche Kladios ábédé á nkamlen.

29 Bembapēe bėntíí nén bán bó mod téé bėlǎmē nwǎŋgen wée bad ábe bédúbpé Yesue á mbwóg e Judeya ngáne bó mod téé áhenlé akud.

30 Nê dēn-naá bėmbenlé. Bėnlǎd mǎné, bėlómén Banabase bó Sǎǎl ábe wée belyáged bé mwembé.

12

Herǎde ádđi apiinad bad ábe bédúbpé metake

1 Benben ne ene pǎndé chēn, kǎŋ Herǎde ambootéd donge á bad bé mwembé ahé á meséb.

² Ambɛl bɛnkōb Jemse, Jone mwānyan, bɛwúɛn mó nkwáté.

³ Ade anyíné nɛn aá nê áwógté bad bé Israel menyinje, ankɛ á'sō, ábɛl békób Petro. Nɛn dɛmbɛnléd á pón dé e Ngande e Ewɛle é Ngɛn.

⁴ Ade bémáá Petro akób, anlóm mó á mbwɔg. Bɛmbané e'choŋ é' sánze é'niin ânɔn mó. Echoŋ téé énwōŋ sánze éniin. Hɛrɔde anwōŋ mewɛmtɛn ákáad mó á'sō é' mbwɔg nzé Ngande e Nnyíme ámɪn etómé.

⁵ Né-ɔ́ bɛmbane Petro á mbwɔg. Boŋ bad békánné'áá Dyòb ngíne ngíne áyɛl echê.

Angel ebídté Petro á mbwɔg

⁶ Hɛrɔde ahɛdé'áá Petro apɛɛn á'sō é' bad mbwɛmbwɛ. Mmê nkuu mɛn níme Hɛrɔde ánwōŋgɛ mewɛmtɛn ápɛɛn Petro á'sō é' bad chɛn ábíníí, Petro akúné'áá átínté e sánze ébɛ. Bɛnhɛ mó bengɔbɛngɔbɛ pɛd ébɛ, sánze émpɛɛ ébɛ énné mmwɛ ní ndáb e mbwɔg.

⁷ Dóo ángɛl e Sánjú ébídé tɛléd, ndáb e mbwɔg épɛné áte. Angel ne enságéd Petro á ekágél, ényem mó ásɛ, élanjɛ mó aá, “Pádé ásɛ á mehélé-te.” Abwɔg-ábwɔg bengɔbɛngɔbɛ bɛnhunnéd mó á mekáá.

⁸ Dóo ángɛl élanjɛé mó aá, “Wéd ngóá atád, étád-te nkɔɔd mé metámbé.” Petro ambɛl áned. Dóo ángɛl élanjɛé mó aá, “Hé mbóté á yɛl, éhíde mɛ.”

⁹ Petro anhíd chó, bɛbíid á ndáb e mbwɔg. Boŋ kénê enkɛmbíí' é ké dyaam áde ángɛl ébɛléé dɛn ákoo abɛnled. Anwɛmtɛn aá mónyíne' ndóg.

¹⁰ Béntóm echoŋ e sánze é'só ámɪn, bétóm-mɛ éche élónténé é'be káŋ ne á asóg bɛmpɛ á mmwɛ mé e'ké bé e'kii níme mbídé'áá á dyad-tê. Nsɛl mé e'ké méndibnéd ne mó mwɛn. Héɛ bɛbíidé boŋ bɛhídé nzii. Ade békagké nê dɛn dóo ángɛl ne étédte Petro ábwɔg-ábwɔg.

¹¹ Héɛ debyéé ápédé Petro boŋ áhɔbɛ aá, “Bɔɔb dóo mbíí mɛé dyaam dɛn dóo ákoo' abɛnled. Sánjwéé alómé eche ángɛl, asó-’ɛ mɛ á mekáá níme Hɛrɔde, abélé-’ɛ mbídé mekan mésyáɛl áte níme bad bé Israel bɛnwɛmtɛnnɛ mɛ abɛl.”

¹² Achemé'áá dyaam áde ábɛnlad ne mó, dóo ákíí á ndáb wɛɛ Maria, awɛ achyáá Jɔn Makɔsɛ. Ndun e mod enladɛn áhed békáanne'.

¹³ Ade Petro ápédé ankúm ekob éche édé á ebwɔg-te boŋ mbɛledɛ a mmwáád nhóg bán Rodaa, áhyɛ ánné mod awɛ akume ekob.

¹⁴ Anchem Petro ehób. Dó-'aá ne menyinje mésyáɛl áchádtɛnɛ ekob adibe, atóm mehélé ámbíd á ndáb-te boŋ áke aláá bad aá, “Petro atyéémé á ebwɔg-te.”

¹⁵ Bɛnláá mó bán, “Epag mɪn!” Boŋ ambé álánjɛ bó aá chóm éche móhóbɛ édé mbále. Dóo bɛhóbɛ bán, “Né eche ángɛl chó edé.”

¹⁶ Ade nímén mésyáɛl mébɛnladte Petro ambé ákumé' ekob. Káŋne á asóg bɛndibé ekob. Bényíné-'aá mó, yɛl ekóm bó áte bwámbwam.

¹⁷ Ampebtɛn bó ekáá aá bɛlám ehób, boŋ álúmtɛ bó áte ngáne Sánjwéé ábídté mó á mbwɔg. Anláá bó aá, “Nyéláa Jemse ne bad ábíníí ábe bómpɛ bédúbɛ Yesue nímén mekan.” Dóo átédte bó boŋ ákag hóm démpɛɛ.

¹⁸ Ade bɪn é'sánjɛ, sánze éche énné'áá Petro émpuutéd á mewɛmtɛn bwámbwam áyɛle bɛnkɛmbíí' é chóm éche ébɛnlédé Petro.

¹⁹ Hɛrɔde anlóm bad aá bɛhɛd mó boŋ bɛnkɛnhɛnlé mó anyín. Héɛ ákáádté echê sánze boŋ ábagé mbakú aá bɛwúu bó. Ade nímén mésyáɛl métómé Hɛrɔde ansyáá á Judeya áke ádyɛɛ á Kaisaria á esóŋ é pón dé.

Hɛrɔde awédé

²⁰ Ene pón dé Hɛrɔde anwóón bad bé myad mé Tirɛ ne Sidɔn melinjá níme méchábé ámɪn. Né-ɔ́, bad bɛmbíd níme myad mébe áke dényín mó. Mod awɛ bɛnsɛbɛɛ áke déttán ábɛl bóɔbe kɛŋ bɛtim ásɛ abédɛɛ Blastusɛ. Blastusɛ abédɛɛ

mbɛledɛ á ndáb e kâñ. Bɛmbel nê áyāle á alon wée Herɔde dɔɔ nímab medyɛ mébidé'áá.

²¹ Epun éche Herɔde ántíí'é épédé-'áá áte, awáá megombe mé kâñ, ádyɛɛ atii dé nkamlɛn bon ábootéd bó mam aláa.

²² Ade áamáá ahób, ábê bad bêmbootéd abón bán, “Dyɔb dɛn dɔɔ áhóbe' sake moonyon.”

²³ Abwɔg-ábwɔg ángel e Sǎngú embɛl Herɔde ankwɛ nkole áyāle enkɛmbaá Dyɔb edúbé. E'ken bé abum béndyɛ mó áte, awé-'ɛ.

²⁴ Eyale é Dyɔb chó-'ɛ émbɛ ékanláád ékag á'sō.

²⁵ Banabase bó Sɔɔl bɛmmǎd nímab nsón béhidé-'ɛ á Jerusalem. Ade béhidéé, bɛnwālɛ Jɔn Makɔse áyāl.

13

*Edǎdɔñ éche Esáá épwédé,
bélómé-'ɛ Banabase bó Paale*

¹ A mwembé mé Antyɔg, donge dé bekal bé'dǎdɔñ ne bemeléde bɛbédé áwed. Abê bad bɛbédé Banabase, Simionɛ (awe béchágé'áá bán Ehíndɛɛ), Lusiasɛ (awe ambíd á Sirinɛ), Manahɛnɛ (awe bó Ngómenaa Herɔde békwógé hóm ahóg) ne Sɔɔlɛ.

² A pónde échɛ bɛbɛnléé Sǎngwéé bédidé-'ɛ yǎl nzaa á mekáne-tê, dɔɔ Edǎdɔñ éche Esáá élângeé bó nɛn áá, “Nyébanned mɛ Banabase bó Sɔɔl ábɛl bon bébele mɛ nsón míme nípwédé bó méé bɛbel.”

³ Abé bekal bé'dǎdɔñ ne bemeléde bɛnkānɛ, bédid-tɛ yǎl nzaa á mekáne-tê, bɛbán Banabase bó Sɔɔl mekáá á nló bon bélómɛ bó bán békag.

*Banabase bó Paal bétáné
nkum-é-ngan, Elimase*

⁴ Né-ɔɔ, Edǎdɔñ éche Esáá énlóm Banabase bó Paalɛ. Dɔɔ békíí á dyad á Selusia. Ahed-taá bésyǎngé bon békǎg á mbwóg e Saiprus eche mendíb méléñnéde.

⁵ Ade bɛpédé á dyad á Salamis, békálé'áá eyale é Dyɔb á ndáb é mekáne. Bɛnwálɛ Jɔn Makɔse áyāl áwónɛn bó.

⁶ Bɛnkɛ ádé alon áte áde mendíb méléñnéde káñ bɛpɛ á dyad á Pafɔs. Ade bɛpédé áhed, bɛntān mod a ngan nhóg awɛ béchágé'áá bán Báá Yesu. Abédéɛ mod a Israel awɛ anchǎg yǎl áá módíi nkal é'dǎdɔñ a Dyɔb.

⁷ Báá Yesuɛ abédéɛ nsón a echoñ awɛ Sɛgyus Paolusɛ. Sɛgyus Paolusɛ mó abédé nkamlɛnɛ a ene mbwóg échɛ mendíb mɛnlǎñnédté. Abédéɛ mod awɛ anwón debyéé bwāmbwam. Ane ngómenaa anchélé Banabase bó Sɔɔl áyāle ahédé'áá eyale é Dyɔb awóg.

⁸ Bon anɛn mod awɛ dɛn démbɛɛ á ehób é Grikia bán Elimase enkɛnháá bó etál. Ahédé'áá áá nkamlɛnɛ a mbwóg eedúbpé nkalan ní bwām.

⁹ Dɔɔ Sɔɔlɛ awɛ béchágé'áá ámpɛ bán Paalɛ, ngáne ánlōnnɛ ne Edǎdɔñ éche Esáá, ánóné ane mod a ngan á mǐd-te,

¹⁰ bon áhōbɛ áá, “A-mwān a Satan! Ekɔɔ dyam ké ahéé áde áde bwām. Mwane mé mbɛb mwɛn ne mwɛn-ɛé ríloné wɛ áte. Pónde ésyāɛl ebélé éhɛdɛ wée móhǎñɛn mbále eche Sǎngwéé mótimed chó metóm.

¹¹ Sǎngú Dyɔbɛ ákǎgsɛn wɛ bɔɔb nɛn dɛn. Wɛkwɛ ndím, wéenyínénné-'ɛ á esón é pónde.” Abwɔg-ábwɔg Elimase anwóg nɛngáne mbag ékwédé mó á mǐd-te, ábootéd-tɛ ahyóm áhed mod awe áchāɛ mó á ekáá.

¹² Ade ngómenaa ányíné dyam áde ábɛnlédé, andúbé Yesuɛ. Yǎl enkóm mó áte bwāmbwam áyāl e ayáge áde Paalɛ bó Banabase bɛyágté'áá tǎngɛne Sǎngú Yesuɛ.

*Paale bó Banabase bépédé
á dyad á Antyɔg*

¹³ Paale bóɔbe baáb bénsāl a Stíma a Pafos béke kááŋ bépē á dyad á Pega á mbwóg e Pamfilia. Bon Jɔn Makose anlyág bó áwed asú mó ámbíd á Jerusalem.

¹⁴ Běnsyáó á Pega bépē á dyad á Antyɔg á alon á Pisidia. A mbwe-mé-nkóme-áte, bēnkě á ndáb e mekáne bedyēē ásē.

¹⁵ Běnwōg née beláá eped á kálag e mbéndé eche Mosēe ne á kálag e metelag mé bekal bé'dáádəŋ. Ade bémáá alán dɔɔ belyáged bé ndáb e mekáne belébpēé Paale bó Banabase nén bán, “A-baányan, nzé nyēwóó póle echē eēwēd bad nlém á abum, nyéhób chɔ.”

¹⁶ Dɔɔ Paale átyéémé ámīn, apebtán bó ekáá aá belám ehób, bon abootéd dyam ahób.

Anhób aá, “A-baányan bé Israel ne bad bēmpēe ábe nyēdé hén bóɔb ábe nyēbenle Dyɔb, nyéwóglen me.

¹⁷ Dyɔb á bad bé Israel dēmpwēd ábēd betaa ábēl-le ábē bad bēbūū áte á pónde eche bēbédé née beken á alon á Egipto. Ámbíd enē, ambēnléd eche ngine echē echabé ámīn ábided bó a Egipto.

¹⁸ A etún é móom mé mwě méniiin, anwesén bó á ehyánge.

¹⁹ Dyɔb dēmbēbēd melon saámbé á ndɔɔb e Kanahan, ábē-’e echāb ndɔɔb wēe ábē bad.

²⁰ Mmén mēsýāāl mēmbēnléd á etún é dyam mbwókél e mwě éniin ne móom mé mwě métáan. Ámbíd enén, Dyɔb dēmbě bó bad ábe bēkáādtē kááŋne á pónde echē nkal é'dáádəŋ Samwēle.

²¹ Ade bēhédé kəŋ, Dyɔb dēmbě bó Sɔɔle, mwān awe Kishē. Ámbíd á túmbé e Benjamin, abédēe kəŋ á etún e móom mé mwě méniiin.

²² Dɔɔ Dyɔb áhúdé Sɔɔle á atii. Áhúdé-’aá mó, átimēd Dabidē. Anhób tənge Dabidē aá, ‘Nkudé nyaa e mod eche rídás, Dabidē, mwān awe Jesē. Adii mod awē ábēl mam mēsýāāl níme níhedeé meé ábel.’

²³ Yesue mó-’e awē abídé á nchyáátén níme Dabidē móɔ Dyɔb dēmbēnlé Nsoode a bad bé Israel, ngáne ánhōbpē aá móɔbēl.

²⁴ Byánán Yesue ábootéd níme nsón, Jone álánge’áá bad bé Israel aá békunned mbíd, bétede nímbab mbéb, békud-te edusen.

²⁵ Ade Jone ákwógé níme nsón amad, ansédéd bad aáken, ‘Nzé-módé nyéwémténé bán ndé. Saké me ndé ane awē nyésineé. Nyénəne’, Ahúe’ ámbíd echēm, mmēn meékwognedé áhune mó metámbé á mekuu.’ ”

²⁶ Paale ambád ahób aá, “A-baányan bé mbyaa níme Abrahamē ne bad ábe bēbenle Dyɔb hén bóɔb, syánē-éé belómmé nímén nkalan mé e’sóson.

²⁷ Bad ábe bedyéé’áá á Jerusalem ne ábab belyáged bēnkēmbíí’é bán Yesue móɔ adé Nsoode. Bēnkēsónjén-naá metelag mé bekal bé'dáádəŋ níme beláá’áá á mbwe-mé-nkóme-áte tēé. Kénē bēmbēl mekan níme bekal bé edáádəŋ bēnhōbpē ménlōn, ahób áde bēnhōbpē bán bēwúu Yesue.

²⁸ Kénēe bēnkēnkudtē nzom echē bētōmēdtē mbakú nén bán atángeéné awé, bēnlāā Payledē bán ábel bēwúu Yesue.

²⁹ Ade bémáá mekan mēsýāāl ábel ngáne méténlédé á kálag e Dyɔb tənge mó, bēnsudéd mó á awɔg, bēbānē mó á son-tē.

³⁰ Bon Dyɔb dēmpuúd mó. Ámbíd e nē,

³¹ anlúmed yəl ngen ne ngen wēe bad ábe bóɔbɔ bēnwōŋ bootya á Galilia ápe á Jerusalem. Bɔɔb ábē bad bóɔ bēkanle’ bad bé Israel dyam áde bényinnē.

³² Bɔɔb-pɔɔ nímén nkalan ní bwām móɔ sépíínédé nyé. Mmē nkalan rídii nén bán dyam áde Dyɔb dénhōbpē aá móɔbē ábēd betaa alónté dɔ ne syánē.

³³ Alónté dyam áde ánhōbpē ne syánē awě dedé nchyaátén mímāb, apuud áde ápuúdté Yesue. Né-'aá éténlédé á kálag e Ngāse e Dyōb echě elónténé ébe bán,

'Edíi awem mwān,
chii ndíi Sóó.'

³⁴ Dyōb dēmpuúdté mó ésebán atime ámbíd á ndōob se ábōo. Dyōb dénhōb tângene nê aá,

'Měbě wε nnam ní ngāngú, míme méehidté ásē, míme ménhōbpē mēé mēbě kōn Dabidε.'

³⁵ Né-'aá áhóbé pεd empée wée éténlédé bán,

'Wéekwénténé wée awōn mbaledε awě abεnle wε ne nlém nhóg ábōo á son-tē.'

³⁶ Debíi nén bán áde kōn Dabidε ábédé á alongé, aběnlé'áá Dyōb ngáne Dyōb áhédé'áá. Ámbíd e nê, anwé, bélímé mó wée bēnlímēē ábē betaa, ábōō-ε.

³⁷ Bōn ane awě Dyōb dēmpuúdté, enkēmbōō-ε.

³⁸ Bōob-pōó, a-baányan, nyétāngéné abíi bwām nén bán, Yesue mó akāá bōn bēkanlé nyé bán Dyōb álagsan bad mbéb.

³⁹ Nyébíi-ε nén bán kenzéé awě adúbpé mó akōbnédé á'sō é' Dyōb née mod awě atāngéné. Mbéndé e Mose eéhele'aá-sε ébel ákobnéd.

⁴⁰ Né-ōó, nyétéd pōndé ábel bōn dyam dé ebébtéd áde bekal bédáádān bēnhōbpē déebēnláád ne nyé. Bēnhōb bán,

⁴¹ 'Nōné', nyé bad ábe nyēwele Dyōb! Yāl ěkōm nyé áte, nyēēwē-ε,

áyāle nén, dyam áde mébēnlé mímén mesú,

ádíi dyam áde nyéedúbéé ké mod anlúméd nyé áte.' "

⁴² Pōndé echě Paalε bó Banabasε bēbídéé á ndáb e mekáne, bad bēnlāā bó bán bēpε ámpē á mbwε-mé-nkóme-áte míme níhúé' áhyε déláa bó míme mekan ámpē.

⁴³ Ade bad bémáá ahide á mekáne, bad bé Israel híin ne bad híin bēmpēe ábe bēnwōn adúbe á bad bé Israel bēnhíd Paalε bó Banabasε. Paalε bó Banabasε bēnkālén ábē bad, bēwéd-tε bó nlém á abum bán bēbē békude mímén nsimé míme Dyōb ábágé bó.

⁴⁴ A mbwε-mé-nkóme-áte míme mémbādtēn, bēnbēn ne baásyāāl ábe bēbédé á dyad-tē wē, bēmmaá ámbíd, áhyε déwóg eyale éche Sāngwéé.

⁴⁵ Ade bad bé Israel bényíné ene ndun e mod, kónjí embé bó áte bwāmbwam. Dyam téé áde Paalε áhóbé'áá, bēhóbé'áá bán ádíi metóm, bēhōbē-ε mó mekan mé mbéb á yāl.

⁴⁶ Paalε bó Banabasε bēmbē bēhōbē bōob ésebán bēbáa' dyamdyam. Bēhóbé'áá nén bán, "Nyé bad bé Israel nyéé séntāngēnnē eyale é Dyōb asébe dé akale. Bōn ngáne nyébáá chó áyāl, nyéētéde-'áa yāl née bad ábe bēkwógnédé ákud alongé áde déemaá', né-ōó, séētédé nyé, sékε wée bad ábe béesě bad bé Israel.

⁴⁷ Dyam áde Dyōb áhóbé aá débél ádíi, nén,

'Mbānné wε née e'nyínēn bé ekíde é' bad ábe béesě bad bé Israel

ábel bōn bad bé nkōnsé bésyāāl békud e'soóson áwon mbíd.' "

⁴⁸ Ade bad ábe bēbēde bad bé Israel bēwógé nē, bēmbē menyínge, bēkēné-ε nkalan míme Sāngwéé. Bad ábe bēpwédnédé nén bán békūd alongé áde déemaá' bēndūbē Sāngú Yesue.

⁴⁹ Moosyāāl awě ambé ene pεd e mbwóg anwóg nkalan míme Sāngwéé.

⁵⁰ Bōn bad bé Israel bēnkōn baámbáá bé dyad ne bebaád bēmbáá ábe bēbēnlé'áá Dyōb. Béchódé-'aá Paalε bó Banabasε yāl áte, bēnān-nε bó áwab mbwóg.

⁵¹ Ade bēhédéé akε, bēnkūd ebumbú á mekuu álúmed ábē bad nén bán nkógsen ne bó. Ade bémáá ábel nē bēnkě á dyad á Ekōniom.

⁵² Bad ábe béndübē Yesue á dyad á Antyɔg bénlōn ne menyinje bélón-ne ne Edəádəŋ éche Esáá.

14

Nkalanj mí bwâm n̄pédé á dyad dé Ekoniom

¹ Ade Paale bó Banabase bépédé á Ekoniom, bēnkě á ndáb e mekáne. Bēnkāl nkalanj míme Yesue áwed, nyaa echě bad híin bé Israel ne ábe béebéde bad bé Israel béndübēē Yesue.

² Boŋ bad bé Israel ábe bēnkēnkobé adúbe, bēnkōn bad ábe béesě bad bé Israel, bēhé bó mewēmtēn mé mbéb áte t̄ŋgene bad ábe béndübē Yesue.

³ Paale bó Banabase bēmbēm áhed, békálé nkalanj t̄ŋgene dyam á bwâm áde Dyōb ábēnlé bad ésebán bēbáa' dyamdyam. S̄ŋgú Yesue amběl bēnlūméd e'chemléd, bēbēl-le menyáké híin, álúmed nēn bán mam n̄mē ábē bembapεε békálé'áá t̄ŋgene n̄mē nsimé médé mbále.

⁴ Nkabēn mém̄bē át̄intē e bad bé dyad. Doŋge á bad bēntimēn bad bé Israel ábíní-'ε bētīmēn bembapεε bé nlómag.

⁵ Dóo bad ábe béesě bad bé Israel ne bad bé Israel nchoo ne ábāb benkamleε bētíídé bán bētagéd Paale bó Banabase bán bēlūm-me bó meláá.

⁶ Ade Paale bésóŋténé nē, bēnsōb békē á mbwóg e Likonia bésól á myad mé Listra ne Debe ne abwóg áde ábédé benben.

⁷ Békálé'áá nkalanj mí bwâm n̄mē mebwóg mésyāal.

Mam n̄mē mébēnlédé ne Paale bó Banabase

⁸ Mod abédé á dyad á Listra, mekuu ménwē mó. Nē dóo bēnchyāā'é mó, eékíi-'áa mbéd.

⁹ Ade Paale ákaléé nkalanj mí bwâm, ambé áhed áwōglān. Paale annyín aá awóó adúbe aá móhēle módyēē bwâm, dóo Paale ánóné mó chóóŋ,

¹⁰ boŋ áchāgtē ehób ámīn aá “Syə́ ə́sē, étyéem ámīn.” Ane mod ahebé-'áá ámīn, ábootéd-te akε.

¹¹ Ade ndun e mod echě ebédé áhed ényíné dyam áde Paale ábélé, bēnhē e'saád á ehób é Likonia bán, “Myōb mēsúdé ə́sē métimé baányon, áhyε dé awōŋgen sé.”

¹² Bēnchǎg Banabase bán mó adé dyōb áde bēchǎgεé bán Zeuse bēchǎg-ke Paale bán mó adé dyōb áde bēchǎgεé bán Hεmεε áyāle mó ahóbpé'áá búmō.

¹³ Abón áde bēbēnlé'áá dyōb áde bēchǎgεé bán Zeuse áte ábédé ámbíd e dyad. Né-ɔ́, prise awé Zeuse ampeén nyag ne mbonja á mmwε mé e'ké é' dyad. Ambel nē, áyāle bóobe ene ndun e mod bēhédé'áá Paale bó Banabase mende abε.

¹⁴ Ade Banabase bó Paale bēwógé dyam áde ábē bad bēhedeé abel, bēnsalted mbóté á yǎl, bēnyāgéd bésól át̄intē e ene ndun e mod bēbōnē bēhōbē bán,

¹⁵ “Cheé ékáá boŋ nyébelé nēn? Sémpē sēdíi baányon melemlem ngáne nyēē nyédíi. Sēpedé hén, ákale nyé nkalanj mí bwâm míme Yesue, ábel boŋ nyéchene ábēn bwēm ábe béesě dyam dé abelen, nyéhíde Dyōb dé alongé áde áhágé nkoŋ mí mín, ní sé ne edíb e nkwě ne bwēm é'syāal ábe é'dé áwēd-te.

¹⁶ Bóód Dyōb dēntédé bad bēsyāal ábel kéchéé éche bédáá.

¹⁷ Boŋ kēnē, alūmte e'chemléd nēn aá módē, abel áde ábeléé mekan mé bwâm. Alómme nyé mbúú echě ebídé ádyōb, ábagé-'ε nyé mbote á pónde eche etánǎgéné. Abage nyé medyé, áwōgtē-'ε nyé menyinje.”

¹⁸ Ké nēŋgáne Paale bó Banabase bēnhōbpē n̄mēn mekan mésyāal, éebédéé bó mwān e akan ákǎŋ bad ábe mende míme bēhédé'áá abε.

¹⁹ Doŋge á bad bé Israel bēmbíd á dyad á Antyɔg á mbwóg e Pisidia, bēbíd-te á dyad á Ekoniom bēpē á Listra. Bēntéd ene ndun e mod nlém á abum, bóobōo

bélúm Paale meláá, bédol mó ásē, bébided mó á dyad-tê ne mewêmtɛn nén bán awédé.

²⁰ Bon ádé bad ábe bédúbpé bépédé bon bélə̀néd mó, anhidé ásē átim ámbid á dyad-tê. Néé bin é'sánǵé, dǒo bó Banabase békíí á dyad á Debe.

Paale bó Banabase bétimé ámbid á Antyoǵ

²¹ Paale bó Banabase bēnkāl nkalaní m'bwám á dyad á Debe, bēmbēl bad híin bétim bēbé bembapɛɛ ábe Yesue. Ámbid enê, bēntim ámbid á myad mé Listra, Ekoniom ne Antyoǵ á mbwǵ e Pisidia.

²² Hóm ké áhéé áde bēmpɛé, bényágté'áá bad ábe bédúbpé Yesue bēwéde-é bó nlém á abum, ábel bétyéem á adúbe-tê. Bényágté'áá bó bán "Detə̀ngéné metake akud bon dɛ́sɔ́l á nkamlɛn ní Dyǒb."

²³ Mwembé ké ríhéé míme bēmpɛé, bépwédáá bad ábe bényágte' míme mwembé. Nzé bēnkānē, bédid-tɛ yǎl nzaa á mekáne-tê, bēbē belyáged á mekáá míme Sǎngwéé awě bésúmé nlém á yǎl.

²⁴ Ade bémádé mbwǵ e Pisidia áte, bēmpɛ á mbwǵ e Pamfilia.

²⁵ Bēnkāl eyale é Dyǒb á dyad á Pɛga, bon bésyoǵké á dyad á Atalia.

²⁶ Ahed-taá bésyoǵé bon béchabpé edib, betimé ámbid á Antyoǵ, wéé bēnkānēdtē bó bán nsimé ní Dyǒb nílyáged bó áyāle nsón míme bémádé bǒob.

²⁷ Ade bépédé á Antyoǵ, bēnlǎd bad bé mwembé áte, béléáá bó mekan mésyāal míme Dyǒb ábélé mbwiined ne bó. Bēnlāā-é bó ngáne Dyǒb ánédte nzii echě bad ábe béesě bad bé Israel bédúbpɛé Yesue.

²⁸ Bēnkoód-tɛ mwǎ adyɛɛ áwed ne bad ábe bédúbpé Yesue.

15

Mbom ríkóbté á Jerusalem ámad ehób á mwembé-te

¹ Bad behǒg bēmbid á mbwǵ e Judeya bépē á Antyoǵ. Bēmbootéd bad ayáged nén bán, "Nzé béeyage mod ngáne mbéndé e Mosɛ éhɛdɛé, né éekudtɛ e'soóson."

² Nén dēmbēl Paale bó Banabase béswántánnáá ngíne ngíne káə̀n bǒobǒo bétíí bán Paale bó Banabase ne nguse é bad émpɛe béke á Jerusalem, béke bényín bembapɛɛ bé nlomag ne belyáged bé mwembé tǎngene áde atón.

³ Bad bé mwembé bēnlyāgēd bó á nzii. Bēmbwě á mbwǵ é Fonisia ne Samaria béléngé bad ngáne bad ábe béesě bad bé Israel bédúbpé Dyǒb. Mmén nkalaní ménwōgēd bad ábe bédúbpé Yesue menyoǵe.

⁴ Ade Paale bó Banabase bépédé á Jerusalem, mwembé míme médé áwed, bembapɛɛ bé nlomag ne belyáged bé mwembé bēnkob bó nken. Paale bó Banabase bēnlāā bó mekan míme Dyǒb ábélé mbwiined ne bó.

⁵ Bon donǵe á bad ábe bédúbpé Yesue ábe bēmbē epepé éche Befarisia bentyēem ámin, béhób bán, "Bétə̀ngéné bad ábe béesě bad bé Israel ábe bédúbpé Yesue ayag, béléáá-é bó bán bétə̀ngéné mbéndé éche Mosɛ ahíd."

⁶ Dǒo bembapɛɛ bé nlomag ne belyáged bé mwembé békóbé mbom ánon áde akan áte.

⁷ Ade bélébé aswanɛn dǒo Petro átyéémé ámin bon áhǒbē áá, "A-baányan, édé etún é pǒndé bǒob áde Dyǒb ápwédé me áfintê echēn, ákale bad ábe béesě bad bé Israel nkalaní m'bwám ábel nén bēwǒg mó bédúbe-é.

⁸ Dyǒb áde ábíí-é moosyāal nlém áte, álúmté áá móbagé bad ábe béesě bad bé Israel kunze ádúbe, abe áde ábágé bó Edə́də̀n éche Esáá melemlem ngáne ábágé syánē ámpē.

⁹ Dyöb dénkéntédte bó aá bédé nhəŋlén ne syánē ké mwämpín. Anlagsén bó mbéb áyāle adúbe áde bənwālē.

¹⁰ Βοῶβ-ρῶό, cheé ékáá boŋ nyéhédé' Dyöb akəg, ápémed bad ábe bédúbpé Yesuε nted míme ábēd betaa bənkənhənlé apém míme ké syánē déehéé apém?

¹¹ Eeboo' é nê! Dedúbpé dekadé-'ε e'soosəŋ mbwiined ne nsimé míme Səŋgú Yesuε, melemlem ngáne bómpē békúdé."

¹² Moosyāəl anlám ehób bəwōglān Banabasε bó Paal. Banabasε bó Paal békánlé'áá bó e'chemléd ne menyáké míme Dyöb ábélé mbwiined ne bó áfíntē e bad ábe béesě bad bé Israel.

¹³ Ade bémádné, dōo Jemse áhóbéé aá, "A-baányan, nyéwóglen me!

¹⁴ Siməne alúmté syánē áte hén βοῶβ ngáne Dyöb ábootédé ábē e'boŋ bé nlém alúmed wée bad ábe béesě bad bé Israel, átéd áde átédé bad áfíntē echáb ábē ábē bad.

¹⁵ Nén dén ábélé e'yale ábē nkal é'dəádəŋ é'lóné. Eténlédé nén bán,

¹⁶ 'Me Səŋgwéé nhóbé meé, nzé nén amáá atóm, mǝpǝ ámpē, mǝlōŋ ndáb echě Dabidε ámpē echě empáa.

Mǝlōŋ chǝm ésyāəl éche émpāŋtəd áte nítməd-te chó ngáne énsēbēē abé.

¹⁷ Nê débǝl bad bé nkǝŋsé bəsyāəl bǝpǝ áwēm,

nǝpwədé bad ábe béesě bad bé Israel ábē ábēm bad. Me Səŋgwéé meé nhóbe.

¹⁸ Mée mbélé boŋ mímén mekan mébyéén se' bōód.' "

¹⁹ Dōo Jemse ákagké á'sō aá, "Ne me, nímm mēwēmtən médé nén meé deétagté bad ábe béesě bad bé Israel ábe bétímné Dyöb.

²⁰ Chǝm éche déťəŋgéné abel édíi átele bó kálag nén bán bēedyāg medyé nímm bébágé myöb mémpēe née mendε, áyāle nímm medyé méēsáá' é, bēékābē mesón, bēedyāg nyam echě bēēsēlēē nkǝŋ, bēedyāg-ke mekií.

²¹ Debíi nén bán se' bōód bēláá'áá mbéndé éche Mosεε á ndáb é mekáne á mbwε-mé-nkǝme-áte. Békale-'ε ábē e'yale dyad ne dyad téé."

Béténlé bad ábe béesě bad bé Israel kálag

²² Dōo bembapεε bé nlomag ne belyáged bé mwembé, ne bad bé mwembé bəsyāəl bényíne nén bán ébóó bán bǝpwəd bad áfíntē echáb, bélóm bó á Antyog nchoo ne Paale bó Banabasε. Bǝmpwǝd Judasε awě béchágé'áá bán Basabasε bó Sailas, bó bad bébe ábe belyágté'áá áfíntē echáb.

²³ Kálag eche bənlōmēnnē bó á Antyog, ebédé nén, "Sé bembapεε bé nlomag, ne belyáged bé mwembé, áben baányan, səlōmme nyé meləntən. Nyé ábe nyédé bǝnned ábe nyéēsě bad bé Israel. Nyé ábe nyédyεε á dyad á Antyog ne á mbwóg é Siria ne Silisia.

²⁴ Sēsóŋténé nén bán bad behóg ábe bēbídé áwəd, bǝmpǝ áwēn, bǝpuutád nyé nló áte ne mam míme béhóbé'áá. Boŋ nyébii nén bán sēnkəmbagké bó kunze ábel nê.

²⁵ Né-ῶó, sēdyéé ásē moosyāəl sētíídé nén bán ébóó sǝpwəd donge á bad álóm bó áwēn. Bəwoón Paale bó Banabasε ábe sédáá bwāmbwam.

²⁶ Bó bad bébe bəbagé yǝl ábele echəd Səŋ Yesu Křístəə ésebán bēbáa' kwééd.

²⁷ Né-ῶó, səlōmme nyé Judasε bó Sailas, bēláā nyé melemlem mé mekan míme séténlé nyé.

²⁸ Edəádəŋ éche Esáá élyágté sé áti nímm sēetagté nyé ne mekan mémpēe étōmεé nímmén mekan míme médé etognén.

²⁹ Nyéedyág medyé míme bébágé myöb mémpēe née mendε, nyéedyág mekií, nyéedyág nyam ké póg echě bēēsēlēē nkǝŋ, nyéékābē-'ε mesón. Nzé nyéēbēlē nímmén mekan né ébōŋ. Dényinne' ámpē."

³⁰ Ade bémáá ene kálag atel, bényāgēd ábê bad á nzii, béke-'ε á Antyɔg. Ade bépédé áwed, bēnlād bad ábe bédúbpé Yesuε bésyāāl áte boŋ bēbe bó kálag.

³¹ Ade ábê bad béléáá ene kálag, bēmbē menyiŋge bwāmbwam áyāle nkalan mé e'wéd bé nlém míme mbédé áwēd-te.

³² Judasε bó Sailas bēbédéε bekal bé'dəədəŋ, bēnkálén-ne bó áyāle e etún é pón dé, bēnhōdēd bó mewēmtεn bēwéd-te bó nlém á abum.

³³ Ade bélébé mwā adyεε áwed, bad ábe bédúbpé Yesuε bényāgēd bó ne nsaŋ boŋ bétim ámbīd wée bad ábe bēnlōm bó.*

³⁵ Paalε bó Banabasε bēndyεé á Antyɔg mwā etún é pón dé. Bényāgtē, bēkalé-'ε eyale éche Sāŋgwéé nlatén ne ekud é bad émpēe.

Paalε bó Banabasε békābné áte

³⁶ Eebeméé áte ámbīd enê, dōo Paalε álāŋgēé Banabasε aá, “Détim ámbīd, déke dénən ábēd baányan bé Krīsto dyad-té áde dékálé nkalan míme Sāŋgwéé, boŋ déhed-te áte ngáne mekan mékééneé bó.”

³⁷ Banabasε anwōŋ mewēmtεn áwále Jōn Makōse áyāl,

³⁸ boŋ Paalε annyín aá éetāŋgenεé, áyāle Jōn Makōse ansébé bó achene á nzii áde béēpidēē nsón á asóg. Antédé bó á dyad á Pamfilia átīm ámbīd.

³⁹ Mpentεn ní ngíne mēmpě átínté echáb káŋŋ békābēn áte. Banabasε antéd Makōse bēchābē edib békē á alon a Saiprus.

⁴⁰ Paalε ámpē ampwěd Sailasε. Baányan bé Krīsto bēnkānnēd bó bán nsimé míme Sāŋgwéé nlyágtε bó.

⁴¹ Paalε ambwēén Sailasε á mbwóg e Siria ne Silisia békag bēwēdē mwembé áte.

16

Timotiε awōŋné Paalε bó Sailas

¹ Paalε bēnkě á myad mé Debe ne Listra. Mod nhóg abédé áwed awě bēchágé'áá bán Timotiε. Nyaá abédéε mmwāád a Israel, mómpē andúbé Yesuε, boŋ sáá abédéε mod a Grikia.

² Bad ábe bédúbpé Krīstə á myad mé Listra ne Ekōniom bésyāāl bēnhōb mam mé bwām tāŋgene Timotiε.

³ Ngáne Paalε áhédé'áá Timotiε awále áyāl, an'yag mó. Ambel nê áyāle bad bé Israel ábe bēbédé míme mebwóg bēmbī bán Timotiε sáá adii mod a Grikia.

⁴ Paalε bó Timoti békágé'áá myad ne myad bēlāŋgē bad ábe bédúbpé Krīstə mekan míme bembapεε bé nlomag ne belyáged bé mwembé bé Jerusalem bétíídé, bēlāŋgē-'ε bó bán bēhíde mímé mekan.

⁵ Né-ɔɔ, mwembé nisyāāl mēmbootéd awúu áte á adúbe-tē mesonjé mé bad-te méchāgkē epun-téé.

Paalε anyiné ndóg

⁶ Paalε bóɔbe baáb bēmbwě á mbwóg e Frigia ne Galesia áyāle Edəədəŋ éche Esáá énkēnkwenténné aá bēkal nkalan ní bwām á mbwóg e Esia.

⁷ Ade bépédé á nchii ní mbwóg e Misia bēnwānén asól á mbwóg e Bitinia, boŋ Edəədəŋ éche Yesuε énkēmwaá aá bésôl.

⁸ Né-ɔɔ, bēntōm á Misia, bésyāgē káŋŋ bēpē á dyad á Troas.

⁹ Mmē nkuu Paalε annyín ndóg. A ndóg-te wē, mod a mbwóg e Masēdonia antyéém áchāá mó aá, “Hyāg, á Masēdonia, éhyε éwōŋgen sé.”

¹⁰ Paalε amaá-'aá ndóg anyín, dōo séládé yāl áke á Masēdonia áyāle sēndōl áte nén bán Dyōb áchénlé sé ákal nkalan ní bwām áwāb.

* 15:33 Donje á kálag dé'só ábádé nchoo 34: 'Boŋ Sailasε pen antii áá mólyāg dhed.'

*Mmwaád nhóg awě béchagɛɛ
bán Lidia adúbpe*

¹¹ Sênsól á Stíma á Troas, sékē á Samotras ésebán sêtyéeme á nzii. Née bìn é'sángé sétimé' á Niopoli.

¹² Sêbídé-'aá áhed, sékε a Filipi. Filipi adii dyad ámbáá á mbwóg e Masedonia. Abédé káəηne dyad áde mbéndé é Roma chɛmpɛn chók bébénládtaá. Sedyéé áhed nguse é e'pun.

¹³ A Mbwe-mé-nkóme-áte, sênsyáá á dyad-tê sékē á nkin mé edíb. Sênwémten bán séētān abwóg á hóm áhed wée bad bé Israel békānneé. Sēndyéé áhed ne bebaád ábe séntānnē née béléádné áhed, syāābōó sékale'.

¹⁴ Átínté e ábê bebaád mmwaád nhóg abédé áhed awě béchagé'áá bán Lidia awě ambíd á dyad á Tiatira. Akábé'áá nyongé, ásōmē' mebad míme méyage' míme mélélé nkun. Ane mmwaád abénlé'áá Dyōb. Sāngwéé ankéléd-te mó nlém á abum áwóglɛn chōm éche Paale áhóbéé.

¹⁵ Bēndusén mwēn ne eche ndáb esyáál. Ambíd enê, anlébé sé áwe ndáb. Anhób aá, "Nzé édé bán nyétédé me nēηgáne mod awě akoó Yesue adúbe, nyéhye nyedyēē áwēm ndáb." Ambádnén sé káəη sékē-'ε.

Béhédé Paale bó Sailas á mbwóg

¹⁶ Epun ehóg-kóó, sēnkě á abwóg dé mekáne, dōó ngōndéε e ntāη póg étáné sé. Edáádəη é mbéb émbē mó áte, ébélé'áá álāngē bad mam míme mébenléd á'sō é pōndé. Ene ngəη échē ákúme'áá embél bad ábe bēnchan mó ntāη békudé ndun e mōné.

¹⁷ Héε ábóótédé syāābe Paale ahíd, ábōnē aá, "Abén bad bédii bembəlede ábe Dyōb á Ngum. Béhyédé nyé aláa ngáne nyémwéé e'soosəη akud."

¹⁸ Ene ngōndéε elébé Abel nê, epun ne epun-té. Káəηne á asóg Paale anlīη, dōó ákúnnédé boη álāngē' échē edáádəη éche émbē ene ngōndéε aá, "A dīn á Yesu Krīstəə, nkamlan we nén mée, bíd enén ngōndéε áte!" Abwōg-ábwōg échē edáádəη émbíd mó áte.

¹⁹ Ade bad ábe bēnchān ene ngōndéε ntāη, bényíné bán nzii e ngáb ekónlédé bó, bēntōl Paale bó Sailas bédolé bó, békēēn bó wée benkamlεε ábe bébédé átínté e dyad.

²⁰ Bēmpéén bó wée benkamlεε bé Roma, béléngē bó bán, "Abén bad bédii bad bé Israel, boη bépédé áwēd hén, bépééné mpongé.

²¹ Bényágte bad e'lem bé mbéb ábe mbéndé éche syánē éhedeé. Syánē bēn dedii bad bé Roma, né-óó, deéhēlēē-se dékob nê, deéhēlēē-'ε-se dehid nê."

²² Amute dōmpē dénsāl áte ábónléd Paale bó Sailas. Dōó benkamlεε bé Roma bésáltédé bó mbóté bēhúd-te bó chók á yāl. Dōó béléomé bad bán béswádted bó e'tangú.

²³ Bémáá-'aá bó awanɛn bwām boη bēhāg bó á mbwóg, béléáá-'ε nnōné mbwóg bán eehúde bó dīd á yāl.

²⁴ Béléngé-'aá nnōné mbwóg nê, ahé bó á toη e ndáb e meláá échē edé áte. Anhé bó e'pwóg á mekuu.

²⁵ Dyam melúde mé nkūu, Paale bó Sailas békānné'áá békōnnē-'ε Dyōb ngəse. Bad bé mbwóg ábíníi bésyāál bēwóglānnáá bó.

²⁶ Abwōg-ábwōg dōó ndōob énáηnéde ásē ngíne-ngíne. Ndáb e mbwóg énáηnéde se á mekon. Melemlem mé pōndé e'kob é'syāál bēndibnéd, bengōbengōbē ábe bēmbē bad bésyāál áyāl bēnhunnéd.

²⁷ Ade nnōné mbwóg ápádté ásē boη anyín ngáne e'kob é'syāál é'nédnéde, anwémten aá bad bé mbwóg bésyāál bémáá asob. Héε átédé páá aá mósóo' yāl.

²⁸ Dóo Paale áchágté ehób ámín bonj álēbpē aá, “Weewúé yǎ! Sé moosyǎál sēdé hén!”

²⁹ Héé nnóné mbwɔg áhóbé aá bépiined mó etrukán, asól á ndáb-te, ákwē Paale bó Sailas á mekuu ánə’ ne mbwɔg ní ngíne.

³⁰ Dóo ábídne bó á ebwɔg bonj ásedté bó aaken, “A besán, cheé rítəngéné abel ákud e’soóson?”

³¹ Bénlāā mó bán “Dúbé Sánjú Yesue, bonj ékud e’soóson, ádōn abum á ndáb dǎmpē dékūd.”

³² Bēnkálé mó ne moosyǎál awē ambé mó á ndáb nkalanj ní bwām níme Sánjwéé.

³³ Ene pǎndé chēn, níme nkúu, ane nnóné mbwɔg antéd bó, áwōbē bó síi áte. Hē dēn bēndusén mó ne eche ndáb esyǎál.

³⁴ Dóo ásónlé Paale bó Banabase á ndáb-te bonj ábagé bó ndyééd. Mwēn ne ádē abum á ndáb bēmbē menyinge áyāle adúbe.

³⁵ Néé bīn é’sánjé, benkamlene bēnlōm plūse ne nlébtéd nēn bán, “Nyéchene ábē bad békag.”

³⁶ Héé nnóné mbwɔg álāngéé Paale aá, “Benkamlene bēlómé nlébtéd nēn bán béchene nyé Sailas. Né-óó, nyébíd nyékag ne nsanj.”

³⁷ Dóo Paale álāngéé éché plūse nēn aá, “Béswádtédé sé e’tangu á nhéné áde séebeléé dyamdyam, áde sédíí-’aá bad bé alonj á Roma, bēhé-’e sé á mbwɔg. Bonj bɔɔb bēhedé sé abided á mesɔm-tē-ye? Eheléé-se ébé nē. Abē benkamlene bé Roma bēn bétəngéné ape béhye bēbídéd sé.”

³⁸ Plūse ēnkē benkamlene bé Roma aláa ngáne Paale áhóbé. Ade ábē benkamlene bēwógé bán Paale bó Sailas bédíi bad bé Roma, mbwɔg menkób bó.

³⁹ Né-óó, bēnkē Paale bó Sailas achánj, bēbídéd bó á mbwɔg bēlāá-’e bó bán ébonj bán bésyāá áwāb dyad.

⁴⁰ Paale bó Sailas bēmbíd á ndáb e mbwɔg, békē á ndáb wéé Lidia. Ade bépédé áhed, bēntān bad ábe bédúbpe Krístə. Paale bó Sailas bēnlāā ábē bad e’yale ábe é’wéde bó nlém á abum. Bémáá-’aá bó aláa bonj bésyāngé.

17

Paale bó Sailas békíi á Tesalonika

¹ Paale bó Sailas bēmpōnj á myad mé Amfipolis ne Apolonia, bēpē á dyad á Tesalonika. Ndáb e mekáne e bad bé Israel embé áhed.

² Paale ammentén ake á ndáb e mekáne, né-óó ankē áwed. Andyéé áwed sōndé éláán. A Mbwe mé Nkóme áte téé, akānlé’áá bad nkalanj ngáne níbídé á kálag e Dyōb.

³ Atógnádtáá bó mam níme ákánlé’áá bó, álūmtē-’e bó áte nēn aá Ane-awē-Béwógté atəngéné néé ákúde metake ápūū-’e ámbíd e kwééd. Alāngé’áá bó aá “Anén Yesue awē nílāngéé nyé nēn, mó adé Ane-awē-Béwógté.”

⁴ Donje á bad bēndūbē bán chōm éche Paale áhóbéé édé mbále, né-óó, bēntimén Paale bó Sailas. Bad bé Grikia híin ábe bēndūbē Dyōb ne ndale é bebaád bé dyad híin bómpē bēntimén Paale bó Sailas.

⁵ Bonj donje á bad bé Israel bésídé’áá Paale bó Sailas. Né-óó, bēnlād donje á bad bé mponjé áte, ábe bēbédé á dyad-tē. Bēmbuú áte bēpēēn-ne etəgké é ngíne. Bēmpēēn epuutéd dyad áte ásyāál, bēból á ndáb wéé Jasene ábel bonj békób Paale bó Sailas bēbídén bó á t̄l e ékwéé.

⁶ Bonj áde bēnóné Paale bó Sailas bonj béenyíne bó, bēndōl Jasene ne bad bēmpēe ábe bédúbpe Yesue, bēpēēn bó á’sō é benkamlene bé dyad. Bébóné’áá bán, “Abén bad bépéēné epuutéd hōm ásyāál. Bɔɔb-póó, bépédé káənjne áwe syáné dyad.

⁷ Jasεε ákōō-’ε bó áwe ndáb. Bébóo’ mbéndé eche Kaisεε. Béhóbe nén bán kâη empée edé eché béchəgέé bán Yesue.”

⁸ Mmén mekan míme bénhōbpē mēmbēl ene ndun e mod ne benkamlεε bé dyad bépuuted.

⁹ Benkamlεε bé dyad bēmbēl Jasεε ne bad ábe bédúbpé ábe bénkōbpē, bōōbō bésábé mōné ábel bétεde bó, bon bétεdté bó.

Paale bóobe baáb békúde metake á Beria

¹⁰ Bìn é’híné-’áá hínén, bad ábe bédúbpé Yesue bélóm Paale bó Sailas á Beria. Ade bépédé áwed bēnkě á ndáb e mekáne.

¹¹ Bad bé Beria bēnwōη nlem áwóglεn eyale é Dyōb tómaa bad bé Tesalonika. Epun-té, beláá’áá kálag e Dyōb áson̄ten ányín ké mekan míme Paale bó Sailas bēhóbé’áá médé mbále.

¹² Ekud é bad éndūbē. Ndale é bebaád bé Grikia híin ne baachóm bé Grikia híin bōmpē béndūbē.

¹³ Bon áde bad bé Israel bé Tesalonika bēwógé bán Paale akalé eyale é Dyōb káēηne á Beria, bēmpě áwed, bēbōōtēd ekud é bad asól áte ápεεn epuuted.

¹⁴ Abwōg-ábwōg dōo bad ábe bédúbpé Yesue bélómé Paale á nkin mé edíb é nkwě, bon Sailas bó Timoti pen bēnlyǎg á Beria.

¹⁵ Bad ábe bēnkě Paale alyáged, bēnkéén mó káēη bēpēēn mó á dyad á Atens bon bétimé ámbíd á Beria. Ade bétiméé ámbíd, Paale anlyágtén bó áá beláa Sailase bó Timoti nén bán béhye bétân mó á Atens ésebán bēbēbte pónde.

Paale akanlé bad bé Atens

¹⁶ Paale andyě á Atens ásiné’ áá Sailase bó Timoti. Ngáne ásiné’áá bó, nlem mémbēb mó á abum bwámbwam áyāle annyín nén áá myōb mémpēe míme bēbageé edúbé mélóné dyad áte ásyāāl.

¹⁷ Né-ōo ankě á ndáb é mekáne ákanlé bad bé Israel ne bad ábe béesě bad bé Israel ábe bēbage Dyōb edúbé. Akagé’áá káēηne áfinté e dyad epun téé ákanlé kénzée awě ampě áhed.

¹⁸ Bóobe bad ábe bēbédé á e’pépé ábe béchágé’áá bán Epikurian ne Stoik bōmpē bēpéntánnáá. Donje ásedt’é’áá bán, “Cheé anén mod awě abíde dúu múmó áhóbéé áde éebí’é dyamdyam?” Bēmpēe bēhóbé’áá bán “Edé kabyánán ahóbe t̄ηgene myōb mémpēe.” Béhóbé’áá nē, áyāle álánge’áá bó t̄ηgene Yesue ne mpuu.

¹⁹ Dōo bétédé Paale békēēn mó á káánsel e mbwóg eche béchágé’áá bán Ariopagus.* Bēnhōb bán “Sédáá ádén ayáge dékōōlē áde élāηgeé bad áson̄ten.

²⁰ Donje á mam áde éhóbéé áde sé nken á etúu, séēdǎη-’ε mó áson̄ten.”

²¹ Bad bé Atens bésyāāl ne beken ábe bēbédé áwed, bēbēbté’áá echab pónde esyāāl ákal ne áwóglεn nkalan̄ t̄ηgene dyam dékōōlē-té.

²² Dōo Paale átyéémé ámin á’sō é káánsel é Ariopagus bon áhóbé nén áá, “A-bad bé Atens nnyíne’ nén mée, nyébage myōb edúbé bwámbwam.

²³ Nhóbe nén áyāle áde rítóméé nyé á dyad-té, nnōné mebón míme nyébageé myōb edúbé. Nnyíne abwóg ahóg áde nyétélé áhed nén bán, ‘Hōm áde dyōb áde déebyéene.’ Adé dyōb áde nyébageé edúbé kénéε nyéebí’é dō, dōo r̄lāηgeé nyé bōob.

²⁴ Dyōb áde áhágé nkōηsé ne chōm ésyāāl éche édé áwēd-te, mó adé Sāηgwéé a nkon̄ ní mín ne r̄sé. Eedyēē’ é á ndáb é myōb éche baányon̄ belónné mekáá,

²⁵ eéhēdē-’áá chōmchōm éche déhele débε mó abele áde débεnléé mó. Ngáne édíí nén bán mwēn-εé abage alongé, ábagé pemε ne kéchéé éche déhedéé.

* **17:19 Ariopagus:** Abédéε káánsel e mbwóg á dyad á Atens.

²⁶ Mod nhóg mós ánsēbēē ahəg boŋ metúmbé mé nkõŋsé mésyāāl mébíd mbwiined ne ane mod nhóg. Abélé bédyεε-’ε nkõŋsé áte rísyāāl. Adēhób aá mǎhəge bó ammad pǎndé atíi ne mebwóg wée bédyεé-’é.

²⁷ Ambɛl nén, ábɛl boŋ béhɛd mós, nzé béhédé-’ε mós béhɛle-sɛ bényín mós awóg áde bówógé mós áyāl. Kénê, Dyõb déechabnedεé syánē modmod áyāl.

²⁸ Edé nêŋgáne mod nhóg áhóbé aá,
‘Abé áde dédíi ne mós, dedé á alongé, dekaŋ,
dedé-’ε chõm éche dédíi.’
Edé-’ε ámpē ngáne bekal bé ngan béhóbé bán,
‘Syánē ámpē dedíi ábe bán.’

²⁹ Ngáne dédíi-’aá bán bé Dyõb, deetâŋgenεé née dékamtanné nén bán Dyõb ádíi nêŋgáne chõm éche bébénlé gól, sílva ké’ε aláá áde baányon bébénléde ádab debyéé boŋ bélóón mekáá.

³⁰ A pǎndé eche bad bénkêmbíí’ε Dyõb, Dyõb dénkéntédte mbéb mímaŋ nêŋgáne dyam. Boŋ bǎb alânge’ moosyāāl hõm-té aá bétεde mímaŋ mbeltéd mé mbéb.

³¹ Amaá-’ε epun é bín atíi, éche ákāādtē mod-téé nkõŋsé áte rísyāāl nyaa eché etâŋgéné. Apwεdé mod awě ákāād mímê nkáá. Alúmté-’ε moosyāāl aá ane mod akwõgnédé, apuud áde apúúdté mós á kwééd.”

³² Ade ábê bad bówógé Paale ahóbé tãŋgene mpuu, donge á bad bówéláá mós boŋ bó donge á bad béhõb bán, “Séhεde bán ékale sé mímê nkalan ámpē.”

³³ Ambíd e nê, Paale anhidé átínté echáb.

³⁴ Kááj ne á asóg, nguse é bad êntimén Paale bédúbé-’ε Yesue. Atínté e ábê bad, mod abédé áhed awě béchágé’áá bán Dionesiõsε. Abédεε mod a káánsel e Ariopagus. Mmwaád ámpē abédé áhed awě béchágé’áá bán Damarisε ne bad bémpee.

18

Paale akii á dyad á Kõrinto

¹ Ambíd enê, Paale anhidé á dyad á Atens ákē á dyad á Kõrinto.

² Ade ápédé áwed antán mod a Israel nhóg awě béchágé’áá bán Akwilaa. Bényyāā mós á Pontus. Mmê mesú mên dǎo bó mwaád, Prísilía bémbídtē á Italia. Bémbíid á Italia áyāle Kaisεε a Roma, Kladiõsε antóméd ehãŋgé aá bad bé Israel bésyāāl bésyāā á dyad á Roma. Paale ankě Akwilaa bó mwaád anyín.

³ Andyéén bó bǎbǎo béhεle nsón. Bǎmpē, bélóó’áá tэндε ákud mǎné mímê bétognanné yāl melemlen nêŋgáne mǎmpē ábélé’áá.

⁴ Mbwe mé Nkóme áte téé, Paale akagé’áá á ndáb e mekáne, ákanlé bad bé Israel ne bad bé Grikiá ábɛl bédúbe mam míme áhóbéé.

⁵ Ade Sailasε bó Timoti bébídé á Masεdonia boŋ bétán Paale, ambě eche yāl esyāāl ákal nkalan mí bwâm. Alúmté’áá bad bé Israel áte aá Yesue mós adé Ane-awě-Bówógté.

⁶ Boŋ bépéntánnáá mós, béhõbē-’ε mós mekan mé mbéb áyāl. Nê dēmběl Paale ankūd ebumbú á yāl álúmed bó nén aá nkõgsen ní Dyõb rísine’ bó, aláá-’ε bó aá, “Nzé nyébóó, né nyébën-εé nyébelé. Meésáá me áte. Bootya bǎb, nkag nkalan mí bwâm akal wée bad ábe béesě bad bé Israel.”

⁷ Né-ǎo Paale antédé bó ákε ádyεé’ wée mod nhóg awě béchágé’áá bán Titus Justusε. Titusε abágé’áá Dyõb edúbé, ndáb embé-’ε mós benben ne ndáb e mekáne e bad bé Israel.

⁸ Krispusε awě alyógté’áá ndáb e mekáne mǎmpē andúbé Sãŋgwéé nchoo ne ádē abum á ndáb ásyāāl. Bad híin-ne ábe bémbe á dyad á Kõrinto, bénwõg mímê nkalan, bédúbe, békūd-tε edusen.

⁹ Ebédé nkuu nhóg Paale annyín ndóg. A ndóg-te wê, Sánḡwéé anláá mó aá “Weebáá’, kanlé bó ékag á’sō, weétimné mbíd.

¹⁰ Bíí nén wεé ndé ne wε, modmod éhēlēē wε dyamdyam abel, áyāle ábēm bad híin bédé á dyad-tē hén.”

¹¹ Né-ǝǝ, Paale andyεé áwed mwě nhóg ne eped, áyāgtē bad eyale é Dyōb.

¹² Ade Kaisεε ábélé Galio nkamlεε ambáá á mbwóg e Akaya, bad bé Israel ábe bēmbē áwed bēnladén, békób Paale, békēēn mó á kóte.

¹³ Bēnhāb nén bán “Anén mod atéde bad nlém á abum aá bēbenle Dyōb, nyaa echē eetāḡεene ḡáne mbéndé éhóbεé.”

¹⁴ Ade Paale áhóbé aá móhāb dyam, dōo nkamlεε Galio álāḡεé bad bé Israel aá, “Nzé ádén akan dēmbē néε awusé ké’ε dyam dé ebébtéd áde mod ábélé, né nwóo nzām áwóḡlén nyé bad bé Israel.

¹⁵ Boḡ ḡáne édíí bán ádíi dyam dé mpentēn tāḡεene e’yale, mīn ne échen mbéndé, nyébēn nyémad dó. Meekáádtéé échē ndín é mehób.”

¹⁶ Nén dēmbēl Galio anan bó á ndáb e kóte.

¹⁷ Héε bó moosyāól bétóle mod awé alyógté’áá ndáb e mekáne awé béchágé’áá bán Sōstεε, boḡ bēbōmé mó á’sō é’ kóte. Boḡ nén dénkēmbenlé Galio dyamdyam.

Paale atimé ámbíd á Antyōḡ

¹⁸ Paale ankoód mwā adyεε á Kōrinto ne bad ábe bédúbpé Krīstā. Dōo átédte bó, boḡ asól á stíma, áchabpé edīb é nkwě ákäg á mbwóg e Siria. Adēkě, ankě ne Prisilia bó Akwilaa. Adēhidé á dyad á Senkria, ankān nló áyāle melě míme ámmwēē. *

¹⁹ Bēmpé á Efesus. Ade bēpédé áwed, Paale antedé Prisilia bó Akwilaa, ákē á ndáb e mekáne bóōbe bad bé Israel békale’.

²⁰ Abē bad bēnlāā mó bán bóōbōo békood mwā adyεε ámpē, boḡ enkēnkwenténné.

²¹ Boḡ adé áhídté, anláá bó aá “Nzé ntíi ní Dyōb móō ndé, né mēḡīm ámbíd áwēn.” Né-ǝǝ, ansól á stíma áhīdē-’ε á Efesus.

²² Ade ápédé á dyad á Kaisaria, ankě á Jerusalem, áke álēléd bad bé mwembé, boḡ ákäg á Antyōḡ.

²³ Ade ákēlēbpē mwā adyεε áwed, anhidé, ákē á mbwóg e Galesia ne Frigia ábagé bad ábe bédúbpé Yesuε bésyāól elébé áwéd bó nlém á abum.

Apolose akalé eyale é Dyōb á myad mé Efesus ne Kōrinto

²⁴ Ámbíd enê, mod a Israel nhóg awé béchágé’áá bán Apolose awé bēnchyāā’é á dyad dé Alesandria ampé á Efesus. Anén mod abyéé’áá dyam ahób bwāmbwam, ansōḡtēn-ne kálag e Dyōb bwām.

²⁵ An’yágé mekan mé nzii e Sánḡú. Akalé’áá, áyāgtē-’ε bad mekan míme Yesuε nyaa eche etāḡéne ne kán esyāól. Boḡ pēn edusen éche Jōne chēmpēn chōó ámbīí’é.

²⁶ Ambootéd póle akal á ndáb e mekáne ésebán abáa’ dyamdyam. Ade Prisilia bó Akwilaa bēwógé mekan míme áhóbεé, bēntéd mó, békēēn mó wēε bēdyéé’áá. Hé-’áá bēlúmté mó mekan mé nzii e Dyōb áte nyaa echē etāḡéne.

²⁷ Apolose antíi aá mókag á alon á Akaya. Né-ǝǝ, bad ábe bēndūbē á Efesus bēnwōḡēn mó. Bēntelé bad ábe bédúbpé Yesuε a Akaya nén bán nzé apedé, békob mó nken. Ade ápédé áwed, anwōḡéḡ bad bwāmbwam ábe bēndūbē Yesuε áyāle nsimé ní Dyōb míme békúdé.

* **18:18** Bad bé Israel bēnwōḡ elem nén bán, nzé mod amwédé melě boḡ alógté míme melě atāḡéne néε ákāḡné nló.

²⁸ Ne mpentɛn ngine, antóm bad bé Israel áte átíntê e bad. Abɛnlád metón míme mébíde á kálag e Dyöb álúmed nén bán Yesue mó adé Ane-awě-Béwógte.

19

Paale akii á Efesus

¹ Apolose ambé abé á Kòrinto, dóo Paale ápóo ene pɛd e mbwóg áte bonj ápag á Efesus. Antán nguse é bad áwed ábe bédúbpé Yesue.

² Dóo ásedtɛé bó aá “Áde nyéndübɛɛ nyênküd Edəádəŋ eche Esáá-yɛ?” Bɛntímtén mó bán, “Aáy, séewōgɛɛ ké wógén bán chōm édé éche béchəgɛé bán Edəádəŋ eche Esáá.”

³ Paale ansɛdéd bó aáken, “Nyaa e edusen ehéé-’ɔ nyênkudté?” Bɛnkwentén bán, “Nyaa e edusen echě Jɔne áhóbé’áá.”

⁴ Paale anláá bó aá, “Nyaa edusen echě Jɔne áhóbé’áá ebédɛɛ áyāle bad ábe bétédte abel dé mbéb, Jɔne álāŋgɛ-’ɛ bad bé Israel aá bédúbe ane awě ápé ámbíd echě, nédɛ Yesue.”

⁵ Ade ábê bad béwógé chōm éche Paale áhóbé, bɛndusén bó á dɪn áde Sájgú Yesue.

⁶ Paale ambán bó mekáá á nló, Edəádəŋ eche Esáá épī-’ɛ bó. Dóo bébóótédé mehób mémpɛe ahób míme bad béesəŋtanne, békalé-’ɛ nkalanj ní Dyöb.

⁷ Abê bad bébédé dɪam dyōm ne bébɛ.

⁸ Paale andyě áwed dɪam ngɔn éláán. Póndé-té akagé’áá á ndáb e mekáne, ákanlé bó ésebán abáa’ dɪamdɪam. Bóɔbɔɔ bépéntánnáá, áwané-’ɛ áte ábel bédúbe nén bán chōm éche áhóbɛé tɛŋgɛne nkamlɛn ní Dyöb édé mbále.

⁹ Bonj bó donge á bad bɛnwū nló áte, béekobpe adúbe, béhōbɛ-’ɛ mekan mé mbéb tɛŋgɛne Nzii e Sájgú á’sō é bad bésyāɔl. Né-ɔɔ, Paale antɛdé bó, ákɛɛn bad ábe bédúbpé. Epun-tɛ* bóɔbɔɔ bépéntánnáá á ndáb e ayáge echě meléede Tiranuse.

¹⁰ Paale ambɛl nén á etūn é mwě míbɛ. Nê dɛmbɛl bad bé Israel ne bad ábe béesɛ bad bé Israel ábe bédyɛé’áá á mbwóg e Esia bɛnwōg eyale é Dyöb.

Bán ábe Skeva béwánné ábided bad e’dəádəŋ bé mbéb áte

¹¹ Dyöb dɛmbɛl Paale ábelé mam mé menyáké míme bad bɛnkɛmmenténné anyín.

¹² Bad bétédé’áá ké betumbɛ ké’ɛ bewāŋgɛɛ ábe Paale ábɛnlédé, békɛɛn wɛɛ bad bé nkole, bébɛnlád bó ámad bó nkole, bɛbídtɛ-’ɛ bó e’dəádəŋ bé mbéb áte.

¹³ Donge á bad bé Israel ábe bómpɛ békágé’áá mebwóg ne mebwóg bɛbídtɛ bad e’dəádəŋ bé mbéb áte, bómpɛ bɛnwánɛn ábɛnled dɪn áde Sájgú Yesue ábel nímtén nsón. Bélāŋgɛ’áá e’dəádəŋ bé mbéb bán, “Nkamlan nyé á dɪn áde Yesue awě Paale ákanlé bad, nén mɛé nyébíd ane mod áte.”

¹⁴ Prise ambáámbáa a bad bé Israel nhóg abédé awě béchəgɛ’áá bán Skeva. Anchyáá bán bé baachóm saámbé. Abê bán bóɔ bɛbélé’áá nê.

¹⁵ Bonj póndé póg, edəádəŋ é mbéb énlā bó nén aá “Mbíí Yesue, mbíí-’ɛ Paale, benzéé nyé-’ɛ nyédíí?”

¹⁶ Héɛ ane mod awě edəádəŋ é mbéb ebédé áte, ábónlédé bó ne ngine esyāɔl, atóm-mɛ bó áte. Bédɛhób bán bétóme mehélé né amaá bó alógen, ámad-tɛ bó mbóté anyabted.

¹⁷ Bad bé Israel ne bad ábe béesɛ bad bé Israel ábe bédyɛé’áá á Efesus bɛnwōg ádɛn dɪam. Ade béwógé dó, mbwóg ménkōb bó bwāmbwam. Dɪn áde Sájgú Yesue dó-’ɛ dɛnküd edúbé éche échábé ámín.

* **19:9** Donge á kálag dé’só ábádé nchoo *bootya dyōm á ngəŋ ne póg e’ mbwɛmbwɛ ápe ngəŋ éniin é’ ngukél.*

18 Bad híin ábe béndübē, bēmpě á nhéné, bépanlé yǎl áte, béhōbē' mekan mé mbéb níme békēbenlé.

19 Bad híin ábe békúmé'áá ngaŋ béntéd échab kálag éche bēbēnládtáá ákum ngaŋ, bēpēēn chók, béhyaád chók á nhéné. Kálag ésyāāl éche bēnhyāādtē éhéláá-se ébe nkun dyam móom mé mīlīon métáan.

20 Mmén mekan mésyāāl níme mébenládtáá mēnkǎŋ bad híin béndübē eyale éche Sǎŋgwéé, nímē nkalaŋ ríkanlád-te ngíne ngíne.

Mpongé nǐpédé á dyad dé Efesus

21 Ade nímén mekan mémáá abenled, Paale ammǎd áwē nlém-tē áá mǎōpōŋ á mbwóg é Masedonia ne á Akaya boŋ ákag a Jerusalem. Dók áhóbéé áá, “Nzé mbídé á Jerusalem ntǎŋgéné aké á Roma.”

22 Né-ǎǎ, anlóm bad bébe ábe bēwōŋánnáá mó, Timotie bó Erastus á Masedonia, mwēn-ne ályāg á mbwóg e Esia, ádyēē ámpē mwǎ esón é pǎndé.

23 Enén pǎndé chēn dók mpuuté d n ngíne mbédé á Efesus tǎŋgene Nzii e Sǎŋgú echē bad béhídé'áá.

24 Mod nhóg abédé bán Demetruse. Alúé'áá bwēm bé e'kii. Abelé'áá bwēm ábe bēnwāgēn bwēm é' ndáb e dyōb áde bēchágé'áá bán Atēmise. Mmén nsón nǐpíínádtáá ábe bad bé nsón nsyǎŋ níme ríchábé ámīn.

25 Anlád ábē bad bé nsón áte ne bad ábe bǎmpē bēbélé'áá ene ndín e nsón, álāŋgē bó áá, “Amúē, nyēbíí nēn bán níme syánē nhon rísyāāl ríhúú ne nímén nsón níme débēléé nēn.

26 Bǎǎb-pǎǎ, nyēbēn nyēnyíne', nyēwóge-'e chōm éche anén Paale ábēléé. Ahóbe nēn áá myōb níme bēbēnlé mekáá méesaá myōb ne abé dēn. Abelé-'e bad híin ábe bédé á Efesus ne á mbwóg esyāāl e Esia, bédúbpe bán mam níme áhóbéé médé mbále.

27 Né-ǎǎ mbáá' nēn mēé, nyonǎgé eche syánē ēbēb dīn. Saá-kaá nē dēmpēn, mbáá' mēé kǎŋne ndáb e ndǎle e dyōb, Atēmise chǎmpē éebáá dyam dé abēlen ámpē. Bad bēenyínné mó ámpē nēe dyam, áde édíí-'áá bán adíi dyōb áde bad bé Esia bēsyāāl ne bad bé nkōŋsé bēsyāāl bēbenléé.”

28 Ade ene ndun e mod éwógé nē bēnliŋ bwámbwam, bébootéd-te abón bán, “Atēmise, dyōb dé Efesus adé ngum tómaa myōb mésyāāl.”

29 Mmē mpuuté mēnkonnéd dyad áte ásyāāl. Ene ndun e mod entǎl Gayōse bó Aristakuse ábe bēmbíd á Masedonia ábe bǎǎbe Paale bēnwōŋ. Béntōmēn bó mehélé, békēēn bó á ndáb e mbom e bad bé dyad.

30 Paale mwēn amboŋsén ábíd ene ndun e mod á'sō, boŋ bad ábe bédúbpe Yesue bēnkēnkwenténné.

31 Nguse é bad ábe bēhóbpaá mbwóg ábe bǎǎbe Paale bēwóó'áá, bǎmpē bēnlōmē mó nlébtéd, ne mechǎŋgé nēn bán eékāgē' áá mókag bad atyéem á'sō wēe bēládne.

32 Ene pǎndé, epuuté d ēmpě á mbom-tē. Donǎge á bad bēbōnē' áyāle dyam ahóg, ábíníí-'e bēbōnē áyāle ádíníí, áyāle bó bad híin bēnkēmbíí' é ké atón áde áládé bó áhed.

33 Ngáne édíí nēn bán Alesandaa móo bad bé Israel bēntōmēdtē á'sō, bad behóg bēlǎŋgé'áá mó bán mó atǎŋgéné bad mekan alúmed áte. Hée Alesandaa alúmté ekáá áá bad bēlám ehób. Ahédé'áá bad alúmed áte nēn áá saké bǎǎbe ábē bad békǎǎ boŋ mpuuté d mbé.

34 Boŋ áde bad bēchéme nēn bán Alesandaa adíi mod a Israel, bó moosyāāl bēmbootéd abón bán, “Atēmise, dyōb dé Efesus adé ngum tómaa myōb mésyāāl.” Bēmbōn nēn áyāle háwa ébe.

35 Kǎŋ ne á asóg, mod a mbwóg nhóg mó ambēd bad áte. Anhób áá, “Abaányan bé Efesus, moosyāāl abíí áá dyad dé Efesus dók ánone ndáb e mekáne

eche Atɛmɪsɛ, eche syánē ndəle e dyɔb. Moosyáál abíí-’ɛ aá ádén dyad dó anóne kááŋne aláá á ngəŋgú áde ábídé ámín.

³⁶ Ngáne nyé moosyáál nyébíí-’aá nén bán modmod eéhɛlɛɛ-sɛ ahé nímén mekan nswan, éeboo’é bán nyéɛɛn mpongé ké nhóg.

³⁷ Ké nɛŋgáne nyépééné ábén bad hén, bééchíbeé chòmchòm á ndáb é myɔb, bééhóbɛé-’ɛ ádɛd dyɔb mekan mé mbéb áyāl.

³⁸ Né-óó, nzé Demɛtrusɛ ne ábē bad bé nsón bɛwónné mod mehób, bɛbíí nén bán e’pun é’ kóte é’dé, bad bé mbwóg-kɛ bédé ábe békáadte. Béhɛle-sɛ bésómén ane mod áhed.

³⁹ Nzé-’ɛ chòm émpɛe édé éche nyékoo’é ahɛd né mbom ní bad bé dyad, mós mɛyālɛ, ngáne mbéndé ékaléé.

⁴⁰ Nhóbe nén áyāle dyam áde ábénlédé chii, ngómena a Roma áhɔb aá syáné depɛɛné mpongé. Nzom ké póg eésaá eché débɛɛɛ nímén mpuuted nisyāal. Nzom e bwām ké póg-kɛ eésaá eché dehɛle débɛ bó áyāle nímén mpuuted.”

⁴¹ Ade amáá ahɔb nê anláá bad aá mod tée asúe’ áwe ndáb.

20

Paale akii á Masɛdonia ne á Grikiá

¹ Ade mpuuted nímáá bon ekíde émad ahóó áte, Paale anlād bad ábe bédúbpé Yesue áte, ályāgtān bó ne e’yale ábe é’wéde bó nlém á abum. Ade amáá bó alyāgtɛn dóó áhídté, bon ákág á Masɛdonia.

² Akagé’áá éché mbwóg, álāngɛ bad nkalan híin níme níwéde bó nlém á abum. Dóó ápédé á Akaya.

³ Andyɛɛ-’ɛ áhed á etún e ngɔn eláán. Abɔŋsánnáá áke á alon á Siria, dóó ásɔŋténé aá bad bé Israel béhəgke mó áwúu mó. Héɛ átíídé aá mósɔtīm ámbíd móbwɛ á Masɛdonia.

⁴ Bad híin bɛnwoón mó. Bébédɛɛ Sopataa, mwān awe Piirusɛ awɛ ámbíd á Beria, Aristakusɛ bó Sekundus ábe bémbíid á dyad a Tesalonika. Gayɔsɛ awɛ ámbíd á dyad a Debe, Timotie, ne Tikikusɛ bó Trofimus ábe bémbíid á mbwóg e Esia.

⁵ Abén bad bɛnkɛ á’sɔ, bésiné’ sé a dyad á Troas.

⁶ Ade Ngande e Ewɛle é Ngɛn étómé, sɛnsól bɔle á dyad á Filipi, bon ámbíd e e’pun étáan sɛntán bó a Troas.

Paale adĩmténé akɛ á Troas

⁷ A Satedé ngukél,* sɛnladén áte hɔm ahóg ádyé ndyééd álúmed edəŋge é Sāŋgú. Paale akānlé’áá bó póle. Akaláá akal ne akal, kááŋne melúde mé nkuu, ngáne édíí nén bán antəŋgɛn akɛ néɛ bɪn é’sāŋgé.

⁸ Bɛnchɔd e’trúkán híin á ton ámín wɛɛ sɛnladénné.

⁹ Kódemod póg ébédé eché béchágé’áá bán Yutikusɛ andyɛɛ á wínde, e’chá é’kénéé’áá mó mwātiíd tíid ngáne e’chá bémɛɛ mó á díid. Achabed áde Paale ánehábédte póle áte, dɛnkəŋ ansól á e’chó-te bwāmbwam. Dóó ápódté á ton ámín á ndágke eláán, ahún á ndɔb. Békíí-’aá mó atéd, bétānē amaá awé.

¹⁰ Paale ansūd á ndáb mín wɛ, akúdén mó ámín bon áseb mó. Dóó álāngɛɛ bad aá “Nyéētāgɛ áte, eewédeé, adíi adé á alongé.”

¹¹ Dóó Paale átímé ámbíd á ndáb mín, ásāl ewɛle áte bon bóɔbe bad ábe bédúbpé Krístəá bédyāg. Bóɔbɔ bɛnkoód adyɛɛ, békale’ póle kááŋ bɪn é’sáa, bon ákag.

¹² Bɛnlyāgɛd ene kódemod á ndáb áde mwɛn adíi alongé. Abɛ bad bémɛɛ menyɪŋge bwāmbwam.

* **20:7** Donje á kálag áhédé nén bán: *á epun é’só é sɔndé.*

Paale bésyǎngé á Troas, békii á Miletus

¹³ Sɛmbé á'sō sésól á stíma-tê, sépōŋ á edíb é nkwě, sékē á dyad á Asos. Awed dɔ́o séntǎngɛnnē Paale apém. Anhób aá sébê á'sō áyāle nzii e dyad-tê chɔ́o ánkɛ́enné.

¹⁴ Ade átáné sé á dyad á Asos, sɛmpém mó á stíma-tê bon syáábɔ́o sékǎg á dyad á Mitilɛnɛ.

¹⁵ Séhídté-'aá hê bon néɛ bɪn é'sǎngé sékag káǎŋ sépǎg á nkin ní dyad á Kias. Bɪn bán bésāá ámpē é'sǎngéd sé á nkin ní dyad á Samos, epun éche émbātɛn sépǎg á nkin ní dyad á Miletus.

¹⁶ Paale antíi nén aá sétôm dyad dé Efesus ámin ábel bon séebébté pón dé á mbwóg e Esia. Ahédé'áá aá mówâmsɛn apɛ á Jerusalem epun é Pentekos édêhób bán chɔ́o épag áte.

Paale alyágténé belyáged bé mwembé bé Efesus

¹⁷ Ade sépédé á dyad á Miletus, Paale anlóm nsəl wéɛ belyáged bé mwembé bé Efesus, aá bétân mó á Miletus.

¹⁸ Bépédé-'aá bon álǎngē bó nén aá “Nyébɛn nyébíi ngáne mbédé ne nyé bootya epun é'sō áde rísúme mekuu á mbwóg e Esia.

¹⁹ Mbɛ́nlé'áá Sǎngwéé ne asuded á yǎl ásyǎl, ríkudé ndutul ne mekágsɛn áyāle ahəge áde bad bé Israel béhǎgk'é'áá me.

²⁰ Nyébɛn nyébíi bán áde ríkánlé'áá nyé nkalanj ní bwâm, ní'yágté-'ɛ nyé á nhéné, ne áwen mendáb, menkênkonjédte nyé dyamdyam áde déntǎngɛn nyé awóŋɛn.

²¹ Melemlem nɛŋgáne ménsimmē bad bé Israel etúu áte né dɔ́-'aá ménsimmē bad ábe béesɛ bad bé Israel meé bétede ádáb abel dé mbéb, bétimɛn Dyɔ́b, bédúbé-'ɛ awed Sǎngwéé, Yesuɛ.

²² Bɔ́ɔb-pɔ́ɔ, Edəádəŋ éche Esáá élúmte me áte aá ntǎngéné akɛ á Jerusalem, meebíi-'áa chòm éche ébɛnléd ne me áwed.

²³ Mbíi pɛn nén meé dyad-té áde ríkagké Edəádəŋ éche Esáá é máá me etúu asím áte nén aá mbwəg ne ndutul bóo bésine me.

²⁴ Bon meetédéé ádɛm alongé néɛ dyam, nhede meé nípid nímmɛm nsón á asóg, nímad-tɛ nsón níme Sǎngú Yesuɛ ábágé me áte. Mmɛm nsón nídi ákal nkalanj ní bwâm tǎngɛne nsimé níme Dyɔ́b álúmteé baányonj.

²⁵ “Mbédé átínté echɛn, ríkanlé nyé nkalanj tǎngɛne nkamɛn ní Dyɔ́b. Bɔ́ɔb-pɔ́ɔ mbíi nén meé nyé modmod nyéenyínné me ámpē.

²⁶ Né-ɔ́ɔ, nkoo' nyé aláa chii nén meé, nzé nyé mod ké ahéé abódé ádē alongé, nyébíi nén bán meésáá me áte,

²⁷ áyāle nén dyamdyam déesaá áde mbáá nyé aláa tǎngɛne mekan mésyǎl níme Dyɔ́b átíidé aá móɔbɛl.

²⁸ Nyétédɛn yǎl pón dé, nyénɔne-'ɛ abem á bad áde Edəádəŋ éche Esáá ébánné ásɛ echɛn, bwâm. Nyébê néɛ benɔn bé mbód ánɔn bad bé Dyɔ́b. Abelé nímmɛ mwembé níde nímmē, mbwiined ne kwééd echɛ Mwǎn awédé á awəg.

²⁹ Mbíi nén meé, nzé mmaá akɛ, bad bépɛ átínté echɛn melemlem nɛŋgáne esɔb ésóléé á abem á mbód. Béehidé-'aá áde béébébtéé nyé mwembé.

³⁰ Pón dé épɛ áde bad bébídté átínté echɛn dɛn, bɛnabpé metóm, ábel bad ábe bédúbpe Yesuɛ béhíde bó.

³¹ Né-ɔ́ɔ, nyétéd pón dé nyékamtan-nɛ nén bán ní'yágté'áá nyé moosyǎl nkúu ne múte á etún é mwě rílán á metake-tê.

³² Bɔ́ɔb-pɔ́ɔ, nlyáge nyé á mekáá mé Dyɔ́b meé mwɛn ánɔne nyé. Nkalanj níme rílangé nyé tǎngɛne nsimé ní Dyɔ́b méwōngɛn nyé. Nwóo ngíne áwéd nyé áte, mɛbɛ-'ɛ nyé nsimé níme Dyɔ́b ákónjédé ábē bad.

³³ Menkênwóngé ním áte áted mod sílva, ké'ɛ gól ké'ɛ mbóté.

³⁴ Nyébèn nyébíí bán nímém mekáá mèn móō mbénlé nsón bon ríkuđ ngáb eche syáābe ábêm bad ábe sêbélé'áá nsón séchánné'áá kéchéé éche séntōgnēnē.

³⁵ Nlúmté nyé á menzii mésyāāl nén mēé nyéwêđ yāl áte ábel nsón ngáne mbélé'áá, ábel bon nyéwōngan bad bé nkole, nyékamtan-ne e'yale ábe Sánjú Yesu ánhōbpē aá, 'Edé nnam mod ábe tómaa ákob.' ”

³⁶ Paale amaá-'áá ahób nê, bōōbe ábê bad bēbwóg mebóbón békáne.

³⁷ Bó baasyāāl béchyé'áá áde bōōbōō bēhēenē tâl bēsōmnē-'e ályágtēn mó.

³⁸ Chōm éche êmbud bó ndutul awóged ébédēe ahób áde Paale ánhōbpē aá béenyínné mó ámpē mbéd. Dōō békíí mó alyáged á stíma.

21

Paale akii á Jerusalem

¹ Sēnyágtēn bó sékē-'e. Sēnsól á stíma. Sēnchabé edib ésebán sētyéeme hōmhōm káōñ sēpē á dyad á Kos. Néē bīn é'sángé, sēmpē á dyad á Rodēs. Sēsyāngé-'áá hê, sékag á dyad á Patara.

² Áwed dōō sētáné stíma echē ekag á Fonisia. Sēsólé-'áá bon sébwōgkē' eke.

³ Sēmpē á abwóg á hōm áde sényínaá alon á Saiprus áde ádé á mendíb-te. Sēmbamé dō sésyōgké á mbōñ sētímé á mbwóg e Siria. Sēnsūd á dyad á Tirē áyāle áhed dōō stíma éntāngēnē nted asuded.

⁴ Sēntán donge á bad áwed ábe bédúbpē Yesue, sēmbé-'e ne bó áyāle e'pun saámbé. Edāōdāñ éche Esáá ényāgēd bó bēláá Paale bán eékāg á Jerusalem.

⁵ Bon áde echēd pōndé émáá áte séntēdé bó séke. Ábê bad bēsyāāl, ne ábab bebaád bōōbe bán bēnhye sé alyáged káōñ syáābōō sēbíd á dyad-tē, sēpē á nkin mé edib. Syáābōō moosyāál sēmbwóg mebóbón, sékāne'.

⁶ Sēmaá-'áá akáne dōō syáābōō sélyágtēné, sēsālē á stíma bon bó-'e bétímé ámbíd á ndáb.

⁷ Sēnhidé á dyad á Tirē, sékēenē échēd eke á'sō, sēpē á dyad á Tolēma. Ade sēpédé áwed, sēnléléd bad ábe bédúbpē Yesue, sédyēē-'e ne bó epun ehóg.

⁸ Néē bīn é'sángé sēnhidé á Tolēma sékē á dyad á Kaisaria. Ade sēpédé áwed sēnkē á ndáb echē nkal-é nkalāñ ní bwām nhóg awē bēchágé'áá bán Filibē, sédyēē áhed. Filibē abédé nhóg átíntē e bad saámbé ábe bēmpwēdtē néē benwōngēne á mwembé ní Jerusalem.

⁹ Anchyáá bán bé bebaád bēniin ábe bēnkēmbíí mwēnchóm. Béhóbé'áá mam míme níhúú ne Dyōb.

¹⁰ Ade sédíí áwed, dōō nkal é edāōdāñ nhóg awē bēchágé'áá bán Akabuse ábídé á mbwóg e Judeya bon ápe.

¹¹ Apedé-'áá wēē sēmbēē bon átēdē ngáá awē Paale, átādnē míme mekuu ne mekáá bon áhōbē aá, “Edāōdāñ éche Esáá éhóbé aá, nén dōō bad bé Israel bētādtē mod awe awóó anén ngáá á Jerusalem, bēbē-'e mó á mekáá mé bad ábe bēesē bad bé Israel.”

¹² Ade séwógé nén, syáābe bad bēmpēe sēnchāñ Paale bán eékāg á Jerusalem.

¹³ Dōō Paale áhóbēé aá, “Cheé nyébeléé nê, nyéebíí'é bán nzé nyēchye' nyēhúnte mē nlém á abum-e? Saké átād mē á Jerusalem dēmpēn-eé mbōñséné, mbōñséné ké awē, ábele áde mbēnléé Sánjú Yesue.”

¹⁴ Sēnkēnhēnlé mó nlém ahāññen á abum, né-ōō sēnchené sēhób bán, “Ebenled ngáne Dyōb átíídé.”

¹⁵ Sēndyēé á Kaisaria nguse é e'pun, dōō sēládé yāl bon sékäg á Jerusalem.

¹⁶ Donge á bad ábe bédúbpē Yesue ábe bēbídé á Kaisaria bómpē bēnwōón sé. Bēnkēén sé á ndáb e mod nhóg wēē séntāngēnē adyēe. Bēchágé'áá ane

mod bán Naasine. Ambíd á dyad á Saiprus, abédé-’ε nhóg awě anlyăg Krístə adúbe.

Paale akii Jemse anyin

¹⁷ Ade sépédé á Jerusalem, bad bé Krísto ábe bédé áwed bēnkob sé nken ne menyinje.

¹⁸ Néε bīn é’sánjé syáābe Paale sēnke Jemse anyin. Belyáged bé mwembé bēbédé áhed.

¹⁹ Paale anléléd bó. Ade áamáá bó aleled, anhídé bó chōm ésyāāl éche Dyōb ábélé áfinté e bad ábe béesě bad bé Israel mbwiined ne nsón míme mó Paale ábélé.

²⁰ Ade bémáá chōm éche Paale áhóbé awóg, bēnken Dyōb. Dóo bélánjéé Paale bán, “Mmōη enyíne’ néε mekan médíí á Jerusalem hén. E’kálé ne e’kálé é’ bad bé Israel bédúbpé Dyōb bəəb. Béhíde-’ε mbéndé e Mosεε ne kán esyāál.

²¹ Bélánjé-’ε bó nén bán eyágte bad bé Israel bésyāāl ábe bédé melon mémpēe nén wě béēhídē mbéndé e Mosεε. Bán elánje bó wεé béeyagé ábab bán, wεé béēhídē-’ε elem éche syánē.

²² Bétánjé-’ε awóg bán epedé. Chán-nō débēnlé bəəb?

²³ Né-óó, éhíd ngáne sélāā’ε wε. Bad bédé hén bēniin ábe bémwédé melě mé Dyōb.

²⁴ Wěhíd bó nyáābəə nyéke á nwobe, ésábned-te bó kéchéé éche bēhédné bó. Ene pónde dóo bēhele békāən nló. Nén déběl moosyāál ábīi aá dyam ké áhéé áde bēhóbé wε á yāl déesaá mbále. Bébīi-’ε bán mmōη ámpē ebele mekan ngáne mbéndé éche Mosεε éhedéé.

²⁵ Bon pen sélómmé bad ábe béesě bad bé Israel ábe bédúbpé Krístə kálag nén bán béedyág ndyééd echě bēbágé myōb mémpēe néε mendε, béēmwāg mekií, béedyāg nyam eche béesínneé nkāη, béēkābē-’ε mesón.”

²⁶ Né-óó, néε bīn é’sánjé Paale antéd ábē bad, bəəbəə békē á nwobe. Dóo ásólé á Ndáb-e-Dyōb, ahób e’pun é’tāη nwobe métēdtē bó. Ambíd enē-’ε dóo bēbéé mendε á nló míme bó mod-té.

Békóbé Paale

²⁷ Ade e’pun saámbé bé nwobe é’kwógé apε á asóg, dóo nguse é bad bé Israel ábe bémbíid a mbwóg e Esia bényíné Paale á Ndáb-e-Dyōb. Héε bépééné mpuutéed bon bésālē bad áte, békōbē Paale.

²⁸ Bēmbootéd abón bán, “A-bad bé Israel nyéhyag sé hén-ee! Anén mod mó akag hōm-té áyāgtē bad aá bad bé Israel, mbéndé éche Mosεε, bóəbe Ndáb-e-Dyōb, béesaá chōmchōm. Ké bəəb dēn apεéné donje á bad ábe béesě bad bé Israel á Ndáb-e-Dyōb-te, nē ábélé-’ε enén ndáb e Dyōb eesáa’ε ámpē.”

²⁹ (Chōm éche ēnkāη bon bēhóbé nē édíi áyāle bēnyīn Trofimuse, mod a dyad dé Efesus bó Paal bėwóó á dyad-tē. Né-óó, bēnwēmtēn nén bán Paale asónlé mó á Ndáb-e-Dyōb.)

³⁰ Dyad ásyāāl dēmpuutéed áte, bad bésyāāl bēbíid áwed bēhé Paale abum ámīn, bédolé mó káəη bēbíidén mó á Ndáb-e-Dyōb. Abwōg-ábwōg bédīb-pe ekob é Ndáb-e-Dyōb.

³¹ Ade ábē bad bēhedéé Paale awúu nē, dóo bad behóg békíí mod ambáá a sánze a Roma aláa bán mpuutéed rídé dyad á Jerusalem áte ásyāāl.

³² Abwōg-ábwōg mod ambáá a sánze eebébtéé pónde. Ampwēd sánze émbáá ne esad ásyōgnéd bó á dyad tē wεε bad bēnkaánné. Bad bényíné-’aá ahúene sánze dóo bésógé Paale abōmted.

³³ Dóo mod ambáá a sánze asídté wεε Paale ábédé akób mó, ahób aá béhaan mó bengəbēngəbē bēbe. Héε ásedtéé aaken, “Nzé-módé nén? Cheé ábélé?”

³⁴ Bad bêmbootéd abón. Baahóg béhōbē échén, ábíníí béhōbē échíníí. Mpuutéđ níbédé nyaa eche mod ambáá a sánze énkênhenlé chòm éche ékóó abenled ahed áte. Né-ɔ́, anláá ábê bad aá békεεn Paale á ndáb e meláá.

³⁵ Bênkεέν mó káəŋ bépēēn mó wée mbwóg ébédé á mmwε ní ndáb e meláá. Bon áde bépédé ásol, bémpēm mó ámīn pémén áyāle amute dēmmāđ ayəg.

³⁶ Abê bad bésyāəl béhíídé'áá bó ámbíd, bēbōnē bán, “Béwúu mó!”

Paale alúmté áte ad móɔkwedé nkáá

³⁷ Ade béhóbé bán békεεne Paale á ndáb e meláá, dɔ́o álāŋgeé mod ambáá á sánze nén aá mówóo mwā dyaam áláa mó. Dɔ́o ane mod a mbáá a sánze áhóbéé aá, “Nédē ehóbe ehób é Grikia?”

³⁸ Nédē saké wε edé ane mod a Egipto awē ampě hén pónđé póg bon ábootéd mpuutéđ. Anlād e'kálé é sánze é'niin, bad bé ewúen, ákēēn bó á ehyaŋge.”

³⁹ Héε Paale álāŋgeé mó aá, “Ndíi mod a Israel awē abíde á dyad á Tasus á mbwóg e Silisia. Mod awē abíde á dyad áde áde etógnén. Són émwε nílaa ábén bad akan.”

⁴⁰ Mod ambáá a sánze ambε mó kunze aá áhób akan. Né-ɔ́, Paale antyéém á'sō é' ndáb, alúmed ekáá, ekíde énhōo baámm! Dɔ́o ábóótédé bó akalen á ehób é Hibru.

22

¹ “A-besāŋ ne baányan ábēm, nyéwóglen mε. Nhede nyé alúmed áte nén meé meékwedé nkáá.”

² Awóg áde béwógé néε Paale áhóbne bó ehób é Hibru, béntōŋ metúu atále áte. Héε Paale ákagké á'sō áhōbē aá,

³ “Ndíi mod a Israel. Béchyáá mε á dyad á Tasus á mbwóg e Silisia, bon á dyad á Jerusalem hén dɔ́o níkwógé. Mbédé mwān a esukéle awē Gamalia. Awe mekáá dɔ́o nítoó mekan mé mbéndé níme ábēd betaa béhíde'áá ayáge. Mémpē mbenláá Dyōb ne kán esyāəl melemlem ngáne nyémpē nyébenléé mó.

⁴ Bad ábe béhíde'áá Nzii é Krísto menhé bó á meséb, káəŋ donge áwāg. Nkóbé'áá bebaád ne baachóm níhāg-ke bó á mbwóg.

⁵ Prisε ambáámbáa ne káánsel e bad bémháá esyāəl béhele bébíđ mε mbón bán mbále chóo níkaléé. Menkob kálag áwāb eché béténlé bánned bé Israel ábe bédé á dyad á Damaskos. Né-ɔ́, menké áwed ákób ábê bad, áhan bó, ápεen-ne bó ámbíd á Jerusalem ábel békógsen bó.

Paale ahóbé ngáne ámwédé Yesuε adúbe (Mbɛl 9.1-19; 26.12-18)

⁶ “Ade níkagké, néε nípédé benben ne dyad á Damaskos, emwεdmwεd é ngine émbíd ámīn táléd, épēn mε yāl esyāəl. Nén dēmbenléd dyaam kəd é' mūte.

⁷ Dɔ́o níhúné á ndoob bon níwōgē ehób élāŋge mε aá ‘A-Sɔ́l, á-Sɔ́l, cheé ékáo bon étagté mε?’

⁸ Dɔ́o nísedtéé mó meé ken ‘Nzéé édíí A-Sán?’ Bon áhōbē aá, ‘Mε-εé ndé Yesuε á Nazaret awē étagtéé, awē éhédé á meséb.’

⁹ Bad ábe syāābōo sēbédé bényīn éché emwεdmwεd bon bénkēnwógké ehób éche mod awē ahóbé'áá áwēm.

¹⁰ Dɔ́o nísedtéé meé, ‘A-Sán cheé níťāŋgéné ábel?’ Dɔ́o Sāŋgwéé álāŋgeé mε aá, ‘Híde áse ékag á dyad tē á Damaskos. Nzé epedé áwed bēlāā wε chóm esyāəl éche Dyōb átíídé aá ébel.’

¹¹ Eché emwεdmwεd é ngine émbēl meéhele'áá anyīnen. Né-ɔ́, bad ábe syāābōo sēbédé bēnchāā mε á ekáá békēēn mε á dyad tē á Damaskos.

12 “Mod abédé á Damaskɔs awě béchágé’áá bán Ananiasε. Abédée mod awě aběnlé’áá Dyöb, áhídē-’ε mbéndé éche syánē bad bé Israel. Anwón edúbé bwāmbwam áfínté e bad bé Israel ábe bédé á Damaskɔs.

13 Ananiasε ampě áwēm, atyéem με á nkæg, bon áhōbē aá, ‘A-mwānned Sɔal, bootéd anyínen ampē.’ Ábwōg-ábwōg membootéd anyínen ampē, rínɔné-’ε mó.

14 Anhób aá, ‘Dyöb áde ábēd betaa ápwédé wε ábíi níme ntíi, ányín awě mbəledε awě abele mekan níme métəngéné, áwóg-kε ane mbəledε ehób á nsəl.

15 Wε-εé wěbid mó mbón áláa bad bésyāəl chöm éche ényíné ne éche éwógé.

16 Bɔɔb-pɔɔ, cheé-ɔ ésinεé? Pádé ásē, ékwentεn wεé Yesue mó adé wε Səngwéé bédusen wε. Nén débəl Dyöb déwobé nímoŋ mbéb.’

*Paale aá Dyöb álómé mó wée
bad ábe béesě bad bé Israel*

17 “Mentím ámbíd á Jerusalem. Ade níkánneé á Ndáb-e-Dyöb mennyín ndóg.

18 A ndóg-te wē mennyín Səngwéé. Anláa με aá, ‘Belé mehélé éwamsen ahide á Jerusalem áyāle bad ábe bédé á Jerusalem hén béekobpé chöm éche wéhōbpē təngene με.’

19 Dóo με-’ε níkwentanné Səngwéé nén μεé, ‘A-Səŋ ábén bad búbíi bwām nén bán nkagé’áá á ndáb é mekáne níkōbē, níwanné-’ε bad ábe bédúbpé wε.

20 A pónde eche bėwúé’ε Stefanuse awě ahóbé’áá mam təngene wε, mměn membé áhed, níkwentén μεé bėwúu mó, με-’aá menwálé nkobe nímé bad ábe bėnwūu mó.’

21 Dóo Səngwéé áləngéé με aá, ‘Kǎg, áyāle məlōm wε nchabnede, wée bad ábe béesě bad bé Israel.’ ”

22 Abé bad bėmbē bėwōglān Paale káəŋne á pónde eche átúbé đin aá mókag wée bad ábe béesě bad bé Israel. Hē dóo ábē bad bėbóótédé abón bán “Nyémaden mó! Nyéwúu mó! Eékwognedéé ábé á alongé.”

23 Bėbóné’áá bėpebté mbóté ámin, bėpúmté-’ε ebumbú ámin.

24 Héε mod ambáá a sənze áləngéé éche sənze aá bétéd Paale bėkεen mó á ndáb e meláá. Anláa-’ε bó aá bėswádted mó e’təngú ábel bon áhōb nzoŋ eché ekəə bon bad bé Israel bétəgké mó.

25 Bon áde bėháá mó ábel bėswádted mó e’təngú, dóo Paale ásedtéé sənze eché embé mó benben aáken, “Mbéndé ebagé kunze nén bán bėswádted mod awě mbéndé e Roma ébélé mó mod a Roma e’təngú áde bėekáadtéé mó-ye?”

26 Ade ene sənze éwógé nē, ankě wée mod ambáá a sənze ásedté mó aáken, “Cheé wεwε ébεléé? Ane mod adii mod a Roma.”

27 Dóo ane mod ambáá a sənze ákíi wée Paale bon ásedté mó aáken, “Láa με, mod a Roma móo édíi-ye?” Dóo Paale ákwentanné aá, “Éε.”

28 Héε mod ambáá a sənze áhóbéé aá, “Nsábpé nkúú ní mənέ bon ngómenaa a Roma ákwentén aá mbē mod a Roma.” Dóo Paale áhóbéé aá, “Me pen ndé mod a Roma se á nchyáátén.”

29 Ade bad ábe bėhédé’áá Paale awanen bėwógé nē, ábwōg-ábwōg bėntédé mó, bėsíde ámbíd. Mbwóg ménkōb ane mod ambáá a sənze áde ádíbté nén aá Paale adii mod a Roma aá mőhēdē-’ε mó á mehan áde mónkəntəngénné.

Paale atyéémé á nkáásé á’sō é’ káánsel

30 Mod ambáá a sənze ahédé’áá akon dé ahed áte ásoŋtεn chöm éche bad bé Israel bėhóbé bán Paale ábelé. Né-ɔɔ, née bín é’səngé, anhób aá bėhūd Paale bengɔbengɔbē á mekáá, anlėbé-’ε beprise bėmbáá ne káánsel esyāəl aá bóɔbɔ bėkōb mbom. Dóo átédé Paale bon áfídē mó á’sō ábāb.

23

¹ Paale annɔn ábê bad bé káánsɛl á mǐd mé mbɔm, boŋ áhɔbē aá “A-baányan, kááŋne e’chii, nlém rísáá me á abum bwâmbwam nyaa echê ádêm alongé ádíí á’sō é’ Dyɔb.”

² Héε prisε ambáámbáa, Ananiase, álângeé bad ábe bébéde bεnben ne Paale aá bébɔm mó abén á nsəl.

³ Dóo Paale áhóbεé aá, “Dyɔb ámpē débɔm wε. Ehóhó é chǔm chén! Edyεé hê ebεnlad mbéndé ákáad me, boŋ ké nê, mmɔn ebóo’ mbéndé ahób áde éhób wεé bébɔm me.”

⁴ Héε bad ábe bémbē bεnben ne Paale bélângeé mó nén bán, “Esyáa’ prisε ambáámbáa a Dyɔb.”

⁵ Paale ankwentén bó nén aá, “A-baányan, menkêmbíí’ε meé mó adé prisε ambáámbáa. Eyale e Dyɔb éhóbé aá, ‘Mod eetângeεé mod awé akamlan bad mekan mé mbéb ahób áyāl.’ ”

⁶ Ade Paale anyiné aá átíntê e echoŋ é bad éche ébéde áhed, baahóg bédé bad bé epepé é Sadusia ábíníí-’ε bédé bad bé epepé é Farisia, anchágéd ehób aláá bad bé káánsɛl aá, “A-baányan, ndii mod a epepé é Farisia mbé-’ε mwán a mod a epepé é Farisia. Ndé á nkáásé hén áyāle nén nsumé nlém nén meé bad ábe béwéde bépuú ámpē.”

⁷ Ahób áde áhóbé nê, bad bé epepé é Farisia ne bé epepé é Sadusia bεmbootéd asɛɛn. Echoŋ é bad éche ébéde áhed ênkabén áte.

⁸ (Nén dεmbεnléd áyāle bad bé epepé e Sadusia béndübē nén bán nzé mod awéde eépuudéé ámpē, bédúbé bán ángel éesaá, bédúbé-’ε nén bán e’daádəŋ béesaá. Boŋ Befarisia pεn béndübē bán nímén metón mesyāal meláán méde.)

⁹ Ehób émbē écháǵké ábê bad ngine ngine dóo donge dé bemeléede bé mbéndé ábe bémbē á epepé é Befarisia bétyéémé ámín, bébootéd abón ngine ngine bán, “Séenyínnεé anén mod awusé ké ahóg. Kapóg né edáádəŋ ké’ε ángel ekoó mó dyam aláá!”

¹⁰ Mmê mpentεn ménchāgē nyaa echê nlém ríhúné’áá ane mod ambáá a sánze aá béhele bényāb Paale áte. Né-ɔó, anláá éche sánze aá béke á amute-tê wê, béhúd Paale á mekáá nime ábê bad boŋ békεen mó á ndáb e meláá.

¹¹ Mmê nkuu dĕn, Sāŋgwéé antyéém Paale á nkəg, aláá mó aá, “Weebáá, ngáne ébídé me mbón á Jerusalem, wĕbĭd me mbón ámpē á Roma.”

Béháǵké Paale

¹² Néε bĭn é’sáŋǵé mbwεmbwε, nguse é bad bé Israel bεmbɔm bébel ntii, bεmwē melĕ nén bán béedyáá chǔmchǔm, béemwáá-aá chǔmchǔm kááŋ ne béwúú Paale.

¹³ Bó bad ábe bémbel nímén ntii béntōm móom méniin.

¹⁴ Dóo békíí wéε beprise bémbáá ne belyáged bé dyad boŋ bélāngē bó nén bán, “Sémwéde melĕ ne amwé dĕn nén bán séeháá chǔmchǔm á nsəl kááŋ né sĕwúú Paale.

¹⁵ Né-ɔó, nyáābe bad bé káánsɛl nyélóme mod ambáá a sánze a bad bé Roma nsəl nén bán ápiined nyé Paale. Nyébāmtan nén bán nyékoo’ mam mémpēe ahed áte áyāl echê. Boŋ sé pεn séēbē mboŋsén áwúu mó adêhób aá mópag hén.”

¹⁶ Boŋ Paale mwányan a mmwáád mwán anwóg ntii nime bébéle áwúu Paale. Né-ɔó, ankĕ á ndáb e meláá áke aláá mó.

¹⁷ Dóo Paale áchāgeé sánze póg boŋ álāngē chó aá, “Kεεné’ enén kódemod wéε mod ambáá a sánze awóó dyam áláa mó.”

¹⁸ Héε ene sánze étédé ene kódemod boŋ ákεεné mó wéε mod ambáá a sánze. Héε ene sánze élangeé mod a mbáá a sánze aá, “Paale awé adé á mbwəg mó acháǵé me aá nıpeεn enén kódemod áwōŋ áyāle enén kódemod ewóó dyam áláa wε.”

19 Dóo ane mod ambáá a sánze áchǎngé mó á ekáá bon ǎsǐdnǎd mó á nkǎg ǎsedtǎ mó ǎǎ “Cheé éhedeé me ǎláǎ?”

20 Dóo ene kódemod élanǎgǎé mó ǎǎ, “Bad bémbáá bé Israel bǎtǐdíde nǎn bán bǎlǎǎ we bán épǎen Paale ǎ’sǎ é’ kǎǎnsel, ne mbǎmtǎn nǎn bán kǎǎnsel ehede mam mémpǎe atǎǎ dé ahed áte tǎǎǎene Paale.

21 Bon weewóglǎn bó ǎyǎle bad bǎdé tǎmaa móom ménǐin ábe bǎsǎǎm ǎsin mó. Bǎmwǎdé melǎ nǎn bán bǎedyǎǎ chǎmchǎm bǎemwǎǎ-ǎǎ chǎmchǎm kǎǎǎ né bǎwúú mó. Bǎmǎǎ abonǎen, bǎsine-’ǎ chǎm éche wǎhǎbpǎ.”

22 Dóo ane mod ambáá a sánze ǎlanǎgǎé mó ǎǎ, “Weelǎngǎ modmod weé mólanǎgǎ me ǎdǎn dyam.” Amaǎ-ǎǎ ahǎb nǎ dóo ǎlanǎgǎ ene kódemod ǎǎ ákag.

Békééné Paale wǎe nkamlǎne, Felǎgǎe

23 Dóo ane mod ambáá a sánze áchǎnlǎ éche sánze émbáá émpǎe ébe bon ǎlanǎgǎ bó nǎn ǎǎ, “Nyétǎd mbwǎkel é sánze ébe, nyébonǎen chǎ áke á Kaisaria nchoo ne sánze móom saǎmbé éche ékǎene hǎse ne mbwǎkel é sánze ébe éche éwanne mekonǎ. Nyǎǎbǎǎ nyébonǎen nyéhǎde dyam ngǎǎ abog nkúu.

24 Nyéhede-’ǎ Paale hǎse eche ékǎén mó. Nyélyǎged mó nyépǎen mó wǎe nkamlǎne Felǎgǎe ésebǎn dyam dé mbǎb ǎbenlǎdé mó.”

25 Bǎdǎkǎ antel kǎlag eche bǎnwǎlǎǎ echǎ ehǎbe nǎn ǎǎ,

26 “Me, Kladios Lisiasǎ me-éǎ ntenle we, nkamlǎne a edúbé ambáá, Felǎgǎe. Nǎǎntǎ we.

27 Bad bé Israel bǎnkǎb ǎnǎn mod bǎhedé-’ǎ mó awúú. Nsǎǎntǎné-ǎǎ meé ǎdí mod a Roma, dóo syǎǎbe échǎm sánze sékǐí mó ahúd ǎwab mekáǎ.

28 Nhǎdé’ǎǎ meé mbǐi chǎm éche bǎhǎbǎ bán ǎbelé. Né-ǎǎ, menkǎén mó á kǎǎnsel.

29 Nhǎdé áte nnyǐné nǎn meé eébeléé dyam áde ǎlǎmte nǎn bán atǎǎǎné awǎ ké’ǎ atǎǎǎné áke á mbwǎg. Mam mésyǎǎl nǐme bǎhǎbǎ bán ǎbelé médíi mam nǐme ménǎne échab mbǎndé.

30 Bǎlanǎgǎ-ǎǎ me bán bad bé Israel bǎhǎgke mó ǎwúú mó, dóo nǐlómé mó ǎwǎǎ ǎbwǎg-ǎbwǎg. Nlanǎgǎ-’ǎ bad ábe bǎhǎde mó mekúu meé, bǎhyǎ bǎláǎ we chǎm éche bǎhǎbǎ bán ǎbelé.”

31 Echǎ sánze émbǎl ngǎne bǎnlǎǎ’ǎ bó bán bǎbel. Bǎntǎd Paale bǎkǎǎn mó nkúu ne nkúu kǎǎǎ bǎpǎǎn mó á dyad á Antǐpatris.

32 Néǎ bǐn é’sǎngǎ, sánze éche ékǎénǎǎ mekúu éntǐm ǎmbǐd á ndǎb e melǎǎ, bǎtǎdǎ sánze éche ékǎénǎǎ hǎse ákǎen Paale.

33 Bǎnkǎén mó á dyad á Kaisaria. Ade bǎpǎdé bǎmbǎ nkamlǎne ene kǎlag bǎbǎ-’ǎ Paale áwe mekáǎ.

34 Ade ane nkamlǎne ǎláǎ ene kǎlag ǎnsǎdǎd Paale ǎǎken mbwǎg ehéé ǎbǐdé. Ade ǎsǎǎntǎné ǎǎ Paale ǎbǐdé á mbwǎg e Silisia,

35 ǎnhǎb ǎǎ, “Mǎwǎg kéchéé éche éwǎǎ ahǎb nze bad ábe bǎhǎde we mekúu bǎpǎdé.” Héǎ ǎlanǎgǎ sánze ǎǎ bǎkǎen Paale á ndǎb e kǎǎ eche kǎǎ Héǎde ǎnlǎǎgǎ, bǎnǎne-’ǎ mó áhed.

24

Paale atyéémé á nkǎǎsé ǎ’sǎ wǎe Felǎgǎe

1 ǎmbǐd e e’pun é’tǎan, prǎǎ ambǎǎmbǎǎ ǎnǎnǎsǎ, ǎnkǎ á Kaisaria nchoo ne donǎe á bad bémbáá bé dyad ne mod a mbǎndé nhǎg awǎ bǎchǎgǎ’ǎǎ bán Tetuluse. Bǎmpǎ ǎ’sǎ wǎe nkamlǎne Felǎgǎe, bǎhǎb mekan nǐme bǎhǎbǎ bán Paale ǎbelé.

2 Dóo bǎchǎgǎ Tetuluse bon ǎbootǎd Paale mekan ahǎb á yǎl, ǎǎ, “ǎ-nkamlǎn Felǎgǎ, we awǎ edúbé échǎbǎ ǎmǐn. Debyéé áde ébenladtǎ ákamlǎn ǎpǎénǎdé syǎné nsǎǎ á etǎn é pǎndé. Ebelé-’ǎ nhǎǎlǎn híin nǐme nǐpǎénǎ mbon ǎwǎd ǎlon-tǎ.

³ Sêkóbé-'ε nê hõm ásyāāl ne pónde ésyāāl. Sêságnan-ne wε bwámbwam.

⁴ Meéhēdēē nén mεé ríbud wε pónde abébed boŋ pεn ndáó acháŋ nén mεé ébenled áboŋ e'boŋ bé nlém, éhê sé mwă etál, éwóglεn mwă dyam awě séwóó ahób.

⁵ Sényíné nén bán anén mod adé ekun é mbéb átíntê e bad. Apééné epuutéd átíntê e bad bé Israel nkõŋsé áte rísyāāl, adé-'ε nlyáged nhóg a epepé e Naazarin.

⁶ Aponé edúbé é ndáb e Dyõb asuded, dóó sékóbé mó. *

⁸ Nzé esědté mó, mekan míme aláā'é wε mmõŋ wényĩn nén wεé chõm éche séhóbéé édé mbále.”

⁹ Bad bé Israel ábe bémbē áhed, bómpē bénsāl áte béhób bán mekan míme Tetuluse áhóbéé médé mbále.

Paale akáádé nkáá á'sō wée Feligse

¹⁰ Héε dóó nkamlεε, Feligse ábágé Paale etál aá áhõb akan, boŋ Paale ábootéd ahób aá, “A-sáŋ, mbíi nén mεé ekékāād nkáásé á aloŋ tē hén á etũn é pónde, né-óó ndé menyĩŋge ákáa nímēm nkáá áwoŋ e'só.

¹¹ Nzé ehedé áte, mmõŋ wényĩn nén wεé éētõmēē dyõm dé e'pun ne é'be áde ríkíi á Jerusalem ábe Dyõb edúbé.

¹² Ké epun bad bé Israel béetáneé née sé mod sépentanné á Ndáb-e-Dyõb, béētāne-'áa née nřpuutadté bad, ken á ndáb e mekáne ké'ε kéhéé á dyad tē.

¹³ Béewóó'é chõmchõm éche élũmte nén bán mam míme béhóbé bán mbelé médé mbále.

¹⁴ Boŋ nkwentan pεn nén mεé, mbenle Dyõb áde ábēd betaa bébénlé'áá, ahíd áde ríhídeé Nzii echě etāŋgéné. Ndúbpé kááŋne mam mésyāāl míme méténléde á mbéndé e Mosεε ne á kálag é bekal bé'dáódaŋ.

¹⁵ Mémpē nsumé nlém ne Dyõb melemlεm née ábén bad bēn ámpē, nén mεé bad bésyāāl bépuú, bé bwám ne bé mbéb.

¹⁶ Nê dó-'áá ákáá boŋ ríwané áte pónde ésyāāl ábel boŋ nlém rísáŋ mε á abum á'sō é' Dyõb ne á'sō é baányoŋ.

¹⁷ Mensyǒg akε á Jerusalem nguse é mwě, né-óó menkě áwed áwánled ábēm bad mwă mōné ne ábe Dyõb mendε.

¹⁸ Ade ríhídeé mímén mekan ámbíd, dóó ábén bad bétáne mε á Ndáb-e-Dyõb, áde rímáá mekún mé nwobe amad. Ndun e mod eebédeé áhed, mpuutéd-te ménkēmbáá.

¹⁹ Boŋ bad bé Israel bébédé áhed ábe bémbíd á mbwóg e Esia. Ké bad bébágé'áá bépag áwõŋ aláa wε dyam áde mbélé né bóó béntāŋgēn apε, nzé émbē nén bán memběl dyam.

²⁰ Ké'ε ábén bad ábe bédé hén, bēn béléa wε dyam dé mbéb áde mēmbenlé áde bēnkāādtē nímēm nkáá á'sō é' káánsel,

²¹ éetóméé dyam ahóg áde mēmbenlé. Menchágéd ehób nén mεé 'Békáadte mε chii nén áyāle ndúbpé nén mεé bad ábe béwédé bépuú.' ”

²² Feligse abédéε mod awě ammad Nzii e mbále asõŋten. Dó-'áá áhúde nkáásé ásē. Anláá bó aá, “Nzé nkamlεε Lisiasε apedé, dóó mébídēdtē mímén nkáá mbakú.”

²³ Hé-'áá aláŋgé sánze e mbáá echě enoné'áá Paale aá átēd Paale, ábē ánõne mó. Aá, boŋ pεn ábe mó mwă kunze áhé-'ε etál nén besón ábe Paale béhyenad mó kéchéé éche átógnéné.

Paale atyéémé á'sō wée Feligse bó Drusilia

* **24:6** Donje á kálag dé'sō ébádé nchoo 6b-8a: *Sentti bán sékáadte mó ngáne eched mbéndé éhóbéé. 7 Boŋ mod ambáá a sánze, Lisiasε, ampě akõbēn sé mó ne epame. 8 Dóó Lisiasε dhóbéé ad bad ábe béwógné mó dyam bépe áwõŋ e'só.*

²⁴ Nguse é e'pun ámbíd enê, Feligse ampéén mwaád Drusilia. Drusilia abédée mwän a Israel. Feligse anlóm Paale achəg, áwóglən nkalanj míme Paale álāngéé mó t̄ngene adúbe á Yesu Kr̄stəə.

²⁵ Paale aboótédé-'aá mó akale, álāngē mó ngáne mod át̄ngéné abé á bwām awále, ngáne mod át̄ngéné yāl acháə bwām, ne Epun é nkáá eche éhúé'. Dóo mbwóg r̄kóbé Feligse. Héé ahóbéé aá "Sébé ekag bəəb. Nzé nkudé etál ámpē mēchēlē wε."

²⁶ Mewēmtən mébédé mó ámpē aá Paale äbe mó mwä mənē ámbíd-ámbíd, nén dēmbēl alómé'aá mó achəg pónDé té ákanlé mó.

²⁷ Nén dēmbenléd áyāle mwě m̄be, dóo Pokus Festuse átédé etál éche Feligse née nkamlənε. Ngáne Feligse ahédé'aá aá bad bé Israel bēwógen mó bwām, antédé Paale á mbwóg.

25

Paale aá Kaisεε múmó ákáad mó

¹ Festuse ampē á mbwóg e Kaisaria átéd atii dé nkamlən. E'pun é'láán ámbíd enê, ámbíd á mbwóg e Kaisaria ákē á Jerusalem.

² A Jerusalem wê, beprise bēmbáá ne bad bēmbáá bé Israel bēnlāā Festuse mekan míme bēhóbé bán Paale abelé. Bēnchānj Festuse

³ bán áwōngən bó äbel bēpεen Paale á Jerusalem. Bēnlāā mó nê áyāle bēnhəg áwúu mó á nzii.

⁴ Festuse antimtén bó aá, "Paale adé á mbwóg á Kaisaria, mmēn-νε mētim ámbíd áwed mwāmp̄in mí pónDé.

⁵ Né-óó, nzé édé nén bán Paale abelé dyam dé mbéb, äbēn bad bēmbáá bēhíd mε á Kaisaria, bésómεn mó."

⁶ Festuse andyεé á Jerusalem ámpē dyam e'pun waam ké'ε dyōm bonj átimé' á Kaisaria. Néε b̄in é'sángé, andyεé ásē ákáad nkáá. Anhób aá bēpεen Paale á kóte.

⁷ Ade bēpééné Paale, bad bé Israel ábe bēmbíd á Jerusalem bēntyēm mó benben bébootéd e'bébtéd é' mekan ahób, ábe bēhóbé bán abelé, bonj bēnkēnhenlé alúmed nén bán akoó nímē mekan abel.

⁸ Paale anhób aá mekan míme bēhóbéé mó áyāl méesaá mbále. Anhób aá, "Meébeléé dyamdyam áde álúmtε bán nt̄ngan mbéndé e bad bé Israel, ké'ε Ndáb-e-Dyōb ké'ε Kaisεε a Roma."

⁹ Festuse ahédé'aá aá mókud đ̄in á bwām á'sō é' bad bé Israel. Né-óó, ansédéd Paale aá, "Ebōjséné ake á Jerusalem äbel nén r̄káad wε áwed t̄ngene nímēn mam míme bēhóbéé wε á yāl-ε?"

¹⁰ Paale anhób aá, "A kóte eche Kaisεε a Roma dóo r̄tyéémé nén, áhed dó-'aá bét̄ngéné mε akáad. Meébeléé bad bé Israel dyam dé mbéb ké ahóg, mmōn ámpē ebíi nê bwām.

¹¹ Nzé édé nén bán mbóó mbéndé echē ekwōgnédé mbakú e kwééd, né nkweñténé awé. Bonj nzé édé nén bán mam míme bēhóbéé mε áyāl méesaá mbále, né modmod eewóó'ε kunze äbe mε áwab mekáá. Né-óó, nhóbe nén mēé Kaisεε múmó ákáad mε."

¹² Dóo Festuse álōjténé nló ne äbē bad ábe bélébé mó, bonj ákwentán aá, "Ngáne émáá ahób wě Kaisεε móōkāād wε, et̄ngéné ake wéε Kaisεε."

Festuse alúmté k̄nj Agripa nkáad míme Paale áte

¹³ Nguse é e'pun ámbíd enê, k̄nj Agripa bó Benise, bēmpē á Kaisaria ákob Festuse nken.

¹⁴ Ade bémádé áwed nguse é e'pun, Festuse anlúmed k̄nj Agripa ehób éche Paale áte. Anláá mó aá, "Mod adé hén awě Feligse änchenéé á mbwóg.

¹⁵ Ade nípédé-'ε á Jerusalem, beprise bémbáá bé Israel ne bad bémbáá bé dyad bénhōb mam níme béhóbé bán abelé, béchān-'ε me bán nkwid mó nkáá.

¹⁶ Bon me-'ε menláá bó meé bad bé Roma béwóó elem nén, béheléé-se bébídéd mbakú nén bán mod akwedé nkáá, ésebán asébpé akáádé níme nkáá á'sō wée bad ábe bésómné mó. Bétāngéné mó etál abe ákáá níme nkáá.

¹⁷ Né-óó, áde bépédé hén, menkēmbébédte pónde. Néε bīn é'sāngé sāngén, mendyē ásē á kóte nhób-pe meé bépεen mó.

¹⁸ Bad ábe bésómné mó béntyēēm ámin áhób mam níme ábélé, bon bēnkēnhóbpe bán abelé dyam dé mbéb ké ahóg áde ménwēmtenē meé béhōb bán abelé.

¹⁹ Ehób ésyāal ébédéε nswan níme bēnwōngē ne Paale tēngene adúbe ádāb ne dīn á mod nhóg awē béchāgēé bán Yesue awē amaá awé bon Paale ahóbe áá adé á alongé.

²⁰ Menkēkongé abii ngáne ríhéláá-se ríhēd nímén mekan áte, né-óó, mensédéd Paale nzé ādōn ake á Jerusalem ábel bon békáad mó áwed tēngene mekan níme béhóbé bán abelé.

²¹ Bon Paale anhób áá bēbē bēbane mó á mbwōg káān ne á pónde eche Kaisεε ábidēdtē níme nkáá mbakú. Né-óó, menhób meé sánze ébē énoné mó káān ne á pónde eche mēlōmmē mó wē Kaisεε."

²² Héε kōn Agripa álāngéé Festuse áá, "Mmēn mēdōn anén mod awóglēn." Festuse antimtén mó áá, "Wēwōglēn mó chān."

²³ Néε bīn é'sāngé, Agripa bó mwānyan Benise bēmpē ne edúbe ésyāal ne esímo. Bénsōl á ndáb eche mbwōg éládné'áá nchoo ne sánze é mbáámbáa ne bad bémbáá bé dyad. Festuse anhób áá béke bētéd Paale bépεen mó.

²⁴ Dóó Festuse áhóbeé áá, "A-kōn Agripa ne bad bésyāal ábe syāābōō sēde hén. Anén mod awē nyényínéé hén nén, adii mod awē bad bé Israel, ábe bédé wén ne ábe bédé á Jerusalem bēpééne ehób áwēm bán abele mekan mé mbéb. Béhāg e'saad nén bán eetēngeneé abé á alongé.

²⁵ Bon mmēn meenyínéé dyamdyam áde anén mod ábélé áde átāngéné kwééd. Ngáne édii-'áá bán mwēn-εé anhób áá Kaisεε mwēn-εé ákāād níme nkáá, né-óó, nhóbé meé mēlōm mó áwed.

²⁶ Ké nē, meékoo'ε dyam awōn áde mételée Kaisεε áyāl echē. Né-óó, mpééne mó hén á'sō é' bad, bwāmbwam á'sō ábōn, a-kōn Agripa, ábel bon nzé mmaá éche ehób ahed áte, rīwōn chōm éche métenlé.

²⁷ Áyāle nén éebáá bwām me álóm mod á mbwōg ésebán nlúmte áte bwām dyam áde ákóó abel."

26

Paale akáádé níme nkáá á'sō wée kōn Agripa

¹ Dóó kōn Agripa álāngéé Paale áá, "Ewóó kunze bōōb áhób dyam." Paale ansálé ekáá áte, bon ábootéd akáa. Anhób áá,

² "A-kōn Agripa, ntédé nén meé yāl eboó me áte ányín nén ntyéémé áwon e'só chii ákáa áhúd mekan mésyāal áyāl níme ábén bad bé Israel béhóbéé bán mbelé.

³ Nhóbe nē áyāle nén, mbíi nén meé edii mod awē asōnténé e'lem é' bad bé Israel, ne wée nswantēn ríbidéé bó. Né-óó ncháa we nén méε échēd yāl, éwóglēn me.

⁴ Abēm bad bé Israel bēbíi alongé ádēm se á mwēndemé áde ríbedé á Jerusalem.

⁵ Bélyógé me abii. Nzé bédáá-'ε, né bēn béhelé bēbíd mbōn nén bán se á mbootéd, mbédé mod a epepé éche éhíde' nímēd mekan mé Dyōb ámbíd nyaa echē ewúú áte. Nhíde' ngáne mod a epepé é Befarisia átāngéné abel.

⁶ Bɔɔb-pɔɔ, nzé ntyéémé á nkáásé hén chii, né édíi áyāle e'lyág bé nlém ábe n'wóó nén mɛé Dyöb débelé ábēd betaa chōm éche ánhōbpē aá mɔɔbɛlé bó.

⁷ Adén dyam dɔ-'aá nímɛd metúmbé dyōm ne mébe mɛsúmé nlém áyāl bán békūd, abe áde bébagɛé Dyöb edúbé nkuu ne müte. Bonj ábén e'lyág bé nlém bēn-naá é'káá bonj bad bé Israel béhōbē' mɛ mam mé mbéb á yāl, a-kāh.

⁸ Cheé ékáá bonj nyé bad bé Israel nyéēhēlē adúbe nén bán Dyöb ápuudte bad ámbíd e kwééd?

⁹ Mmēn ámpē menwémtén mɛé ntāngéné néε ríhédé nzii ésyāāl ábēbed dīn áde Yesue, mod a Nazaret.

¹⁰ Né-'aá mēmɛnlé á Jerusalem. Menkūd kunze wéε beprise bémbáá, nhé-'ε bad bé Dyöb híin á mbwóg. Nzé bémbídēd-tɛ mbakú nén bán bétāngéné awé, mémpē nkwéntánnáá.

¹¹ Memmentén bó akógsɛn á ndáb é mekáne ésyāāl, ríhédé nén mɛé béhōb Yesue mam mé mbéb áyāl. Ekanj énkōb mɛ áte áyāl echāb nyaa eché ríkágé'áá á myad mé melonj mémpēe átaged bó.

*Paale ahóbé ngáne ámwédé Yesue atimɛn
(Mbɛl 9.1-19; 22.6-16)*

¹² “Enén nzom chóo ekáá bonj ríkäg á Damaskos ne kunze ne ekag éche beprise bémbáá bēmbɛé mɛ.

¹³ A-kāh, á nzii wê, dyam kəd, dɔ-'aá rínyíné e'nyínɛn bé ekide ábe é'pɛne' tómaa enyɛn, é'bídé ámīn é'lāhned mɛ ne bad ábe syāābɔ sēnwōh.

¹⁴ Sé moosyāāl sēnhún ásē. Héε ríwógé ehób élānge mɛ á ehób é Hibru aá, 'A-Sɔɔl, á-Sɔɔl, cheé ékáá bonj ehé mɛ á meséb. Nzum eché éwannɛé mɛ edíi nēngáne mwān ákwaglɛé abíi ányan. Eché yāl chēn-éé ábelɛé mbéb.’

¹⁵ Dóo rísédte mɔ mɛé ‘A-Sāj, Nzé-módé édíi?’ Dóo Sāngwéé átímtanné mɛ aá, ‘Mɛ-éé ndé Yesue awé éhāgkē á meséb.

¹⁶ Bɔɔb-pɔɔ, hidé ásē étyéem ámīn. Mpiídé wɛ ápwɛd wɛ nēngáne áwɛm mbɔledɛ. Wɛ-éé wēlāā bad ábe belyágé ásē chōm éche ényíné chii ne éche mēlūmēdtɛ wɛ á pónidé eché ehúé' á'sō.

¹⁷ Mēsōh ádōh alongé á mekáá mé bad bé Israel ne á mekáá mé bad ábe béésɛ bad bé Israel ábe mēlōmmē wɛ áwab.

¹⁸ Wɛ-éé wēnedé bó mīd ábɛl béhide á ehíntén-tɛ, békud e'nyínɛn bé ekide, béhídé-'ε ásē e nkamlɛn rí Satan bétim á nkamlɛn rí Dyöb. Nê débēl békūd alagsɛn dé mbéb, bēbē-'ε hōm ahóg ne bad ábe Dyöb ásānté ne adúbe áde bédúbpe mɛ.’

*Paale ahóbé chōm éche ékáá
bonj bad bé Israel bésómén mɔ*

¹⁹ “Né-ɔɔ, a-kāh Agripa, ndóg eché ményinnē eché ehúú ádyōb, menkēmbāngé chó ahíd.

²⁰ Bootya hē, membootéd nkalanj rí bwām akal, membootéd á dyad á Damaskos, ríkɛ á Jerusalem bonj rítimé' á mbwóg e Israel esyāāl, ne á mbwóg e bad ábe béésɛ bad bé Israel. Nkänlé'áá bó mɛé bétɛde rímāb mbéb bétimɛn Dyöb, bébele-'ε mekan ríme mēlūmte' nén bán bétédte rímab mbéb.

²¹ Akal áde ríkálé'áá rímén nkalanj dóo dēnkāh bonj bad bé Israel békób mɛ áde ríbéde á Ndáb-e-Dyöb bépōn-ne mɛ awúu.

²² Bonj kááhne bɔɔb, Dyöb dēn dóo ákēwōngɛn mɛ. Né-ɔɔ, ntyéémé hén ákale nyé moosyāāl mbále. Ken bad ábe bédé etógnén ké'ε ábe béésɛ etógnén. Mekan ríme ríhóbeé médíi melelem mé mekan ríme bekal bé'dáádāh ne Mosɛɛ bēnhōbpē bán mébenléd.

²³ Bénhōb bán Ane-awě-Béwógté atəngéné ákūd metake, abé-'ε mod a'só ápuu. Akalé bad aá e'nyínen bé ekíde é'pente' ábēd bad bé Israel ekíde bəob é'pente-'ε bad ábe béesě bad bé Israel."

²⁴ Nyaa eche Paale ánkāá'ε emběl Festuse ankáné mó áte aá, "A-Paal weesáa'ε-ye? Adōη ayáge ámbáá áhede we mīn apid-ε?"

²⁵ Paale ankwentén aá, "A-kāη e edúbé, meépagké mīn. Chōm éche nhóbéé édé mbále nhóbne-'ε debyéé."

²⁶ Měpanléd kāη nímén mekan mésyāal áte áyāle mbíi méé asóηténé nímén mekan. Ndúbpé nén méé mwēn asóηténé akan téé áde ábénlédé, áyāle dyam áde ábénlédé déebenledéé á e'koηnéd-te.

²⁷ A-kāη Agripa, edúbpé mekan míme bekal bé'dəədəη bétélé ásē-ye? Mbíi méé edúbpé mó."

²⁸ Agripa antimtén Paale aá, "Ayāl e anén mwā esóη á pónde dōó éwémténé wéé móhele móbēl nítimēn adúbé á Krístə?"

²⁹ Paale ankwentén aá, "Ebē ké á esóη é pónde ké'ε pónde eche echabé áte, nkāanne' Dyōb nén méé, we ne moosyāal awě awóglan me, ábē ngáne ndíi. Boη pen meekánnéé méé béhē nyé bengəbengəbē ngáne béhédé me nén."

³⁰ Dōó kāη, nkamlēne Festuse, mwānyāη a kāη, Benise ne bad bésyāal ábe bébédé áhed béhídté ásē áke.

³¹ Bémáá-'aá abíd, áde békagké nē dōó bébóótédé akal nén bán, "Anén mod eébeléé dyamdyam áde ákwógnédé áhób bán béwúu mó ké'ε béhē mó á mbwəg."

³² Héε Agripa álāηgēé Festuse aá, "Nheláá-se nítēdē anén mod nzé enkēnhób aá Kaisēε móōmād míme nkáá."

27

Paale ahídté áke á Roma

¹ Ade bémáá atii bán sēsól á stíma áke á alōη á Italia, bēmbě Paale ne bad bé mbwəg bémpēe á mekáá wéε mod a mbáá a sánze awě béchágé'áá bán Julíose. Julíose akamlánnáá echoη é sánze éche béchágé'áá bán "Echoη é sánze é Kaisēε."

² Sēnsól stíma á dyad á Adramitium. Ene stíma emmād aboηsen áke á nkin mé edíb é nkwě á mbwóg e Esia. Dōó sébwógké eke. Sédé áke sēnwálé Aristakuse. Aristakuse abédéε mod a mbwóg a Masēdonia, awě ambíd á dyad á Tesalonika.

³ Néε bīn é'sángé, sēmpě á dyad á Sidōn. Julíose amboón Paale nlém. Antédé aá áke ányín baáb, bébe mó kéchéé éche átógnéné.

⁴ Sēnhidé hē, sébwógé eke. Boη ngáne édíi bán epub é ngíne échómmé'áá sé á'sō-te, sēmbamé epub, sébwē benben ne mbwóg e Saiprus pēd eche epub énkēmbáá ngíne. Saiprus abédéε mbwóg echě mendíb mēnləηnédté.

⁵ Héε sétédte nkin á pēd e mbwóg e Silisia ne mbwóg e Pamfilia boη sēsól á edíb é nkwě-te sépəg á dyad á Mira á mbwóg e Lisia.

⁶ Awed mod ambáá a sánze annyín stíma eche ebíde á Aleksandria etime' á Italia dōó áhédé sé áwēd-te.

⁷ Bootya hē, stíma ekeéné sé mwāləηləη e'pun híin bó-'ε é'tóme' sēdēhób bán sēpag á dyad á Sinidus. Ngáne édíi bán epub échómmé'áá sé á'sō-te, sēnkēnhēnlé áke á'sō ene pēd. Né-ōó sēmbamé sépōη á pēd e mbəη wéε epub éebude'aá atóm. Sēntóm á Kep Salmōn sépē á mbwóg e Krēt echě mendíb mēləηnédté.

⁸ Sēmbamé nkəg mé edíb mēn ne mēn, sēdēhób bán sēpag á hōm áde béchəgēé bán Sef Habos. Adē hōm déechabnedéé dyad á Lasi áyāl.

⁹ Sɛndyɛ́ áwɛd bwâmbwam kóǎŋ ényínnéd nén bán nzé sêkii á'sō né dyam dé mbéb áhɛle ábɛnléd sé, áyāle ene pónǎde mwě mêmǎd apɛ á asóg, Epun é ngande e abɛ dé mɛndɛ mé Alagsɛn dé mbéb chí-'ɛ emmad atóm. Né-ɔ́, Paalɛ ambɛ bó elébé aá,

¹⁰ “Amúē, nnyine nén mɛé bootya hén bɔɔb éhɛle ébēēn syánē ebébtéd ákɛɛn échén ekɛ á'sō. Nted mébēb bwâmbwam, stíma ebéb, nló mí bad-tɛ ríhɛle rítóm.”

¹¹ Bɔŋ ane mod a mbáá a sánze andúbé dásɔ chíŋ éche mod ambáá a stíma ne mod awě awóó stíma bɛnhōbpē, enkéndúbéé chíŋ eche Paalɛ ánhōbpē.

¹² Adé abwóg á hóm áde stíma émbēē áhed, dénkēmbáá hóm áde mod áhɛle ádyēé á pónǎde eché ekukud étómɛé. Né-ɔ́, bad ábe bēndəŋ nén bán békag á'sō bɛwanɛn bɛpɛ á dyad á Fonis bóɔ bēmbuú áte. Fonis abédéé hóm áde bɛbannɛé stíma á mbwóg e Krɛt áde ánəne' á akuu ne á mbəŋ. Áhed-taá bɛhélé'áá-sɛ bédyē á pónǎde e ahéb á ngíne.

Ekukud étáné Paalɛ bó á edib é nkwe-te

¹³ Mwǎ epub awě abídé á mbəŋ ambootéd atóm. Dóɔ ábɛ bad békámténé bán bɛhɛle békēēn mímab ntii á'sō. Né-ɔ́, bɛnhūd ekii éche bɛbwəgnɛé stíma, bɔŋ bɛbammé' nkin mé edib mí mbwóg e Krɛt.

¹⁴ Bɔŋ bɛepedéé ké akɛ bɔŋ epub é ngíne éche bɛchəgɛé bán “Epub é pɛd e akuu” ébídén ekukud á Krɛt ébootéd atóm ne ngíne.

¹⁵ Eché epub éntínéd stíma. Nzii enkēmbáá ákɛ á'sō wéɛ epub ébídéé. Né-ɔ́, sɛnsóg yǎl awaned áte akɛɛn stíma á'sō, sétédē nén bán epub chíhɛ́ ékɛɛn' chí pɛd eche édáá chí akɛɛn.

¹⁶ Ade sépóó á pɛd e mbəŋ e mwǎ dyad awě adé á mɛndíb-te awě bɛchəgɛé bán Kauda, sɛnkūd mwǎ etál wéɛ epub éebude'áá atóm. Áhed dóɔ séwǎnné kóǎŋ bɔŋ sɛnabpé bóɛ ábe sédólé'áá ámbíd e'dii, ábɛl bɔŋ bɛɛsanlé áte. Sédé amǎd ábɛl nê chíŋ émāá sé á yǎl.

¹⁷ Béndöl bóɛ, bésóléd bó á stíma-tê, bɛbíð-tɛ nkɔɔd á stíma séwéd bó atád. Bɛbáá'áá nén bán bɛhɛle bétómén nló, bɛhún á nsí-te á nkin mé edib á alon á Libia, né-ɔ́, bɛnsudéd abad* ásɛ áde ábɛle bɔŋ stíma ékag mehélé, bétédē bán epub chí ne chí ékɛɛn stíma.

¹⁸ Ekukud émbɛ étómñé' ngíne. Bín é'sánǎgɛ-'áá bɔŋ bɛbootéd donǎge dé nted ahúd bɛbwémé' á mɛndíb-te.

¹⁹ Née bín é'sánǎgɛ ámpɛ, bɛbootéd donǎge á bwēm atéd ábe bɛbénlé'áá ádol stíma, bɛbwémé á edib-te. Bɛn bɛnkōŋ ábɛl nê.

²⁰ E'pun híin bɛntóm ésebán sɛnyíne' enyɛn ké'ɛ betintinɛ, epub-pɛ émbɛ étómɛ' ne ngíne esyáál. Kóǎŋ ne á asóg, sɛnhúd yǎl nlém bán sɛmǎdné.

²¹ Sɛmadé e'pun híin ésebán mod áhɛle ké ndyééd adyé. Hê dóɔ Paalɛ átyéémé ámín átínté e bad bɛsyāál bɔŋ áhōbɛ aá, “A-baányan, nyēmbé nyēwóglan mɛ áde ríhóbé mɛé deéhídté á Krɛt. Nzé nyēnwógén mɛ, né deékudéé mímén metake ne enén mbólón eché dékúde nén bɔɔb.

²² Bɔɔb-pɔ́, ncháa nyé nén mɛé nyéwéd nlém á abum, nló mí mod méetómme, stíma chímpɛn chíɔ́ ébēb.

²³ Nhóbe nê áyāle nén nkúu míme rítómé nén ángɛl e Dyōb áde áwóó mɛ áde míbɛnle-'áá empíi mɛ, eláá mɛ aá,

²⁴ ‘A-Paal, weewógé' mbwóg, etǎŋǎné atyéem á'sō wéɛ Kaisɛɛ. Nlém mí bwám míme Dyōb áwónné-'áá wɛ, mibelé asó alonǎgɛ á bad bɛsyāál ábe nyáábɔɔ nyédé.’

²⁵ Né-ɔ́, a-baányan, nyéwéd nlém á abum, áyāle nén ndúbpɛ mɛé mekan mésyāál mébɛnléd ngáne bɛlǎŋgɛ mɛ.

* 27:17 Donǎge á kálag dé'só áwóó, ekii éche ébwogke stíma á mɛndíb-te.

²⁶ Epub étɔ̀ngéné nées étínté syánē á nkin.”

²⁷ Ambíd e e'pun dyòm ne é'niin nkuu, áde sédíi sédíí á edíb é nkwě é Adria, dɔ̀o dyam melúde mé nkuu, bad ábe bédole stíma békámténé bán kapóg syáábɔ̀o sèkwogé abíd á nkin.

²⁸ Hées bétédé nkɔ̀od míme bétádé chòm eche édélé áyāl bonj bébwēmē á edíb-te ànyín ngáne edíb épédé achab ásē. Dɔ̀o bédíbté bán e'che bé edíb ásē é'dé móom mé méta méniin. Mwämpín mí pónde ámbíd e nê, bémbwēm ámpē, bényín bán e'che bé edíb áse édé móom mé méta méláán.

²⁹ Bévógé'áá mbwóg nén bán stíma éke ebúl á meláa-tê, né-ɔ̀o, béntéd e'kii ábe bébwəgnadté stíma é'niin, béhūnéd bó ámbíd bonj bébootéd akáne nén bán bín é'sáa mehélé.

³⁰ Hées bad ábe bédole' stíma, bébóótédé nzii ahed ásob. Bênsudéd bɔ̀le á mendíb-te, bébāmtān bán békag ekii eche bébwəgnadté stíma asuded á'sō é' stíma.

³¹ Dɔ̀o Paale álɔ̀nggē mod ambáá á sánze ne sánze éche élyágé ásē áá, “Nzé ábén bad ábe bédole stíma béesē á stíma-tê hén, nyéelyágé nlém nén bán nyéebē á alonjé.”

³² Né-ɔ̀o, échē sánze énsēl míme nkɔ̀od míme ménchāā bɔ̀le bétédē bó é'hóo'.

³³ Ade bín é'kwógé asáa, Paale anchánj bó moosyāal áá bédyē mwā ndyééd. Anláá bó áá, “Nyêkedyē bɔ̀ob, dyòm dé e'pun ne é'niin, ene pónde esyāal-le nyéedyēdēē chòmchòm.

³⁴ Nchāa-ɔ̀o nyé nén mēé nyedyē ndyééd. Moonyonj atɔ̀ngéné ndyééd adyé ábé ámín. Ké mbum e esid póg éebóó'é.”

³⁵ Ade Paale áamáá ahób nén, antéd ewele á'sō wée bó moosyāal, aságnén Dyōb, ásāl áte bonj ábootéd adyé.

³⁶ Nén dénwēd bó nlém á abum, bó mod-téé adyé-'e mwā ndyééd.

³⁷ Mesonjé mé bad bésyāal ábe sēbédé á stíma-tê, mbédé mbwókél ébe móom saámbe ne ntóob.†

³⁸ Ade moosyāal áamáá akód, bēnsyōg ngun éche ébédé á stíma-tê á edíb-te ábel bonj stíma éhéle áte.

Stíma epángé áte

³⁹ Ade bín é'kénlé, bad ábe bédole' stíma bénkēnchemmé nkəg mé edíb wée bēbédé. Bonj bényín nkin wée stíma éhele etyéem. Dɔ̀o bétíídé nén bán nzé stíma ehēle ápē áhed, né bēbēl áke ásonj yāl áhed.

⁴⁰ Bēnsēl nkɔ̀od míme ménchāā e'kii ábe bébwəgnéé stíma, béhúnéd bó á mendíb-te, béhūnē-'e besánkalaa bé e'ped bé mebámbe ábe é'hyōmte stíma. Hées bépódté abad áte á péd e'só e stíma ábel bonj epub étínte stíma á'sō. Hées sébóótédé áke á nkin.

⁴¹ Bonj áde sékagké nê, dɔ̀o stíma ébómé yāl á akúd dé nsíí á mendíb sé. Atyág áde ped e'só e stíma étyágé-'áá nê, stíma enkēnhēnlé áke ámpē, bonj ped e mbíd embootéd apānted áte áyāle mendíb méhuéné'áá ngine mébómé yāl áhed.

⁴² Sánze émbel ntíi bán bēwūū bad bé mbwəg bésyāal, ábel nén bó modmod béenyalé' á nkin se bésob.

⁴³ Bonj mod a mbáá a sánze ahedé'áá áá mósonj Paale alonjé, né-ɔ̀o, anláá sánze áá éebelé nê. Antím aláá moosyāal áá bad ábe béhele anyal bóbb bésébe behéb á edíb-te bényal békag á nkin.

⁴⁴ Áá ábe bó-'e belyágé áse, béchāned e'ped é' stíma béhíde bó ámbíd. Né-'áá, sébélé bonj sé moosyāal sépē á nkin ésebán dyamdyam ábele sé modmod.

† **27:37** Donje á kálag dé'só áwóo mbwókél ébe móom saámbe ne ntóob, donje-'e móom saámbe ne ntóob donje-'e áwóo mbwókél ébe móom saámbe ne ntáan.

28

Paale bédyéé á Malta

¹ Ade sé máá aπe á nkin ésebán dyam dé mbéb ábélé sé modmod, dɔɔ sésónjténé nén bán ene mbwóg echě edé á edíb-te wée sébédé, béchəgεé chí bán Malta.

² Bad bé dyad ábe sétané áhed bɛnwōngēn sé. Mbúú embootéd achó, ahébpεe ábé, né-ɔɔ, bɛnkonéd muú bán séwále', békōb-pεe sé nken.

³ Paale anlād ngɛn é lõn áte á mbág. Ade áhāgkē chí á dũ, dɔɔ píí e nyă ébidé á mbág ní lõn-tê áde muú rínáné chí, boŋ ekób mó á ekáá etyág-ke áhed.

⁴ Ade ábê bad bé dyad bényíne ene nyă ekēnléne Paale á ekáá dɔɔ bɛlānggεé nhóg ne aníní bán, “Anén mod adíi mod awě awúε' bad. Aponé kwééd á edíb-te boŋ kénê nkáásé ní Dyōb rídii ríkóbé mó.”

⁵ Boŋ Paale answág ekáá ahúnéd ene nyă á dũ-te ésebán ene nyă ebele mó dyamyam.

⁶ Bésíné'áá bán ábooted achíd, ké'ε áhūn ásē mpátepém áwê. Boŋ néε békésinné kááj ésebán dyamyam ábenlad mó, dɔɔ bɛháŋléné mewēmten boŋ bétimé ahób bán, “Anén mod adíi dyōb.”

⁷ Nzag ébédé bɛnbɛn ne wée sémbēē nê. Mod awě anwōŋ éché nzag bɛchágé'áá mó bán Publiosε. Mó abédé nkamlɛne ambáá a ene mbwóg echě ebédé á edíb-te. Ankob sé nken achágéd-te sé bwám.

⁸ Publiosε sáá abédé á anōŋ dé nkole, ahéb dɛnsog mó, ekwaglɛne-ε akób mó. Paale ankě áwē toŋ-tê, akáne', abán mó mekáá á nló, ádíid-te mó bwám.

⁹ Ade bad bɛwógé nê bad bé nkole bɛmpēe ábe bɛbédé á dyad-tê wê, bɛmpě wée Paale ádíid-te bó bwám.

¹⁰ Bɛmbε sé ndε híin. Ade sébwógké ekε, bɛnhīi sé bwēm á stíma-tê ábe sébenlédté á nzii.

Paale bébidé á Malta bɛpédé á Roma

¹¹ Sɛmadé á mbwóg e Malta ngɛn éláán boŋ sésōlē stíma echě embíd á Alesandria. Bɛchágé'áá ene stíma bán, “Myōb míme médé Nhéd.” Sédé asyăó né ene stíma ekédyεé ádê hōm ene pónde e ahéb á ngíne esyăól.

¹² Sɛnkě, sɛpē á dyad á Sirakus. Sɛmmād áwed e'pun é'láán.

¹³ Bootya hê dɔɔ sékíi boŋ sɛpāg á dyad ámbáá a Regium. Néε bīn é'sánjé epub embootéd abíd á pɛd e mbəŋ. Ambīd e e'pun é'be sɛmpě á dyad á Putioli.

¹⁴ Sɛndibéd bad áwed ábe bédúbpé Krīstəə. Bɛnlā sé bán sébê ne bó sōndé póg. Néε sékíi boŋ sɛpag á Roma.

¹⁵ Bānɛd ábe bédúbpé Krīstəə bɛnwōg bán sɛhúε', né-ɔɔ, bɛmpě káájse á hōm áde bɛchágé'áá bán Dyɔn á Apíɔs, doŋge-ε bésíné sé hōm áde bɛchágé'áá bán Ndáb é Beken Eláán. Ade Paale ányíne bó, anságnén Dyōb, nlém níwédndé-te mó á abum.

Paale apedé á Roma

¹⁶ Ade sɛpédé á dyad á Roma bɛntɛdé Paale bán ábê ne mó mwɛn boŋ bɛmbané sánze bán éno ne mó.

¹⁷ Ambīd e e'pun é'láán Paale anchélé bad bɛmbáá bé Israel ábe bédé á dyad-tê wê á mbom. Ade bɛpédé anláá bó aá, “A-baányan bé Israel, menkɛmbɛnlé ábɛd bad dyam dé mbéb ké ahóg, menkɛmbɛl-laá dyam dé mbéb ké ahóg tɛngene e'lem ábe ábesyánē betaa bɛlyágké syánē. Boŋ kénê, ábɛd bad bɛnkōb mε á Jerusalem bɛbē-ε mε á mekáá mε benkamlɛne bé Roma. Né-ɔɔ ndé hén néε mod a mbwog.

¹⁸ Ade benkamlɛne bé Roma bɛmáá mε akáad, bɛhédé'áá mε achene, áyāle bɛnkɛnkudté nzɔm ké póg echě elúmte nén bán ntájgéné kwééd.

19 Boŋ bad bé Israel bɛnkɛnkwenténné bán bétɛde mɛ, né-ɔ́, menhób mɛé Kaisɛɛ móɔmăd nímêm nkáá. Kénê-'ɛ ménkɛnwónǵé dyaɔdyam dé mbéb áhób tǎŋgene ábêm bad.

20 Nén dɔ-'áá ákǎá boŋ níchɛnlé nyé ábɛl boŋ syáné dékal. A mbále ndáá mɛé nyébíi nén bán nzé bengǎbɛngǎbɛ bédé mé á mekáá, né édíi áyǎle mod awě bad bé Israel bésúmé áyǎl bán ápě.”

21 Héɛ ábê belyáged bɛlǎŋǵé Paalɛ bán, “Séékūđéé kálag ké pǔg echě ebídé á Judeya áyǎl echôn. Mod awe syáné ké nhóg-ke eébidéé áwed se ápɛɛn nlébtéd ké nhóg ké'ɛ ehób é mbéb áyǎl echôn.

22 Boŋ séédǎŋ nímôn mewɛmten awóg, áyǎle sɛbíi nén bán hǔm-téé bad béhóbe mam mé mbéb tǎŋgene echén epepé éche édíi áte.”

23 Né-ɔ́, bóɔɔ Paalɛ bɛntíi akag áde béhyě mó awóglɛn. Echě epun épédé-'áá ndun e mod épɛ-'ɛ wéɛ Paalɛ ádyéé'áá. Paalɛ ambootéd bó mekan mé nkamlɛn ní Dyǔb akale bootya mbwɛmbwɛ kǎáŋ ne ngukél. Anwanén ábɛl bédúbe Yesuɛ. Abɛnládtáá e'pɛd ábe é'bidé á kálag e mbéndé e Mose ne á metelag mé bekal bé'dǎáɔdǎŋ ábɛl bédúbe nén bán Yesuɛ mó adé Krístǎ.

24 Bó donǵe á bad béndúbé mó, boŋ donǵe dénkéndúbéé bán chǔm éche áhóbéé édé mbále.

25 Né-ɔ́, bɛmbootéd apɛnten áde békagké. Bédékě, Paalɛ anláá bó áá, “Edǎáɔdǎŋ éche Esáá éntǎŋgɛn áde élanǵé nkal é'dǎáɔdǎŋ Yesayaa mekan áá áláa ábɛn betaa áá,

26 ‘Kǎg, éláa ábê bad wɛé,

nyéwǔg nyéwóg-ke ámpɛ boŋ nyéesóŋtɛnné mbéd,

nyéɛnǎn nyénǎn-ne ámpɛ boŋ nyéenyínné mbéd.

27 Nhóbe nê áyǎle ábɛn bad bɛlélé nlém á abum,

békólé nímab metúu,

bédíbé-'ɛ nímab mǐd.

Nzé enkɛmbé nê, né nímab mǐd ményíinne'

nímab metúu méwógne'

nímab nlém-mɛ nísóŋten.

Né bétimén mɛ

né mǛchoód-te bó.' ”

28 Héɛ Paalɛ ásógtéé nén áá, “Nyébíi-ɔ́ nén bán nkalaŋ mé e'choóchoŋ níme Dyǔb álómé, alómé mó bóɔɔ wéɛ bad ábe béésě bad bé Israel. Bɛwóglɛn-ne mó.” *

30 Paalɛ andyéé áwed mwě nǐbɛ á ndáb echě mwɛn ásápé'áá. Bad bésyǎál ábe béhyágé'áá áwɛ akobé'áá-'ɛ bó nken.

31 Akalé'áá nkalaŋ mé nkamlɛn ní Dyǔb áyǎgtɛ-'ɛ bad tǎŋgene Sǎŋgú Yesu Krístǎ ésebán abáa' dyaɔdyam, modmod enkɛnkǎŋ-'áá mó áhób dyaɔ.

* 28:28 Donǵe á kálag dé'só ábádé nchoo 29: Ade Paalɛ áhóbé nén bad bé Israel ábe bébedé áhed, bɛnhidé bɛn ne bɛn, bébootéd-te apɛnten bwámbwam.

Kálag echë Paalε áténlé Baá Roma Ndibned n kálag

Kálag echë Paalε áténlé bad bé Roma ebédéε âbonſen bó áyāl e epe éche ántíí'ε âpe á mwembé míme rídé áwed. Enén kálag elúmte chõm éche adúbe á Krısto ne ngáne alongé á bad bé Krısto átánjéné abé. Paalε akoó ahób áwēdte aá, “Nkalan mí bwâm rílúmte nyaa eche Dyõb ábeléε bon bad békobnéd áwe e'só. Adúbe dós ákæa bon bad békobnéd á'sõ é' Dyõb” (1.17).

Paalε alúmté áte aá éhednad bán bad bésyā́l békobnad á'sõ é' Dyõb áyāle bó moosyā́l bédé ásē e ngíne e mbéb. Aá mbwiined ne adúbe áde bédúbpé Yesu Krıstæ dós nê ábenladté.

Paalε alúmté áte ámpē aá mod akude alongé dékṓlē abé áde ádíí mod nhóg ne Krıstæ. Ene ndín e mod abelé abé nsaſ ne Dyõb, Edæádæſ é Dyõb-pe ébelé éhúd mó ásē e ngíne e mbéb ne e kwééd. Asógté ne elébé éche ábágé bad ne mekenag míme ábágé Dyõb.

Nkabtéd n kálag

Ndibned ne atón áde kálag ékoo'ε ahób 1.1-17

E'soósõſ é'hednad ne moosyā́l 1.18-3.20

Nzii e Dyõb ákud e'soósõſ 3.21-4.25

Alongé dékṓlē abé ne Krıstæ 5.1-8.39

Bad bé Israel ne ntíí n Dyõb 9.1-11.36

Abé á mod a Krısto 12.1-15.13

Nsógten ne melenten 15.14-16.27

Paalε alómé melenten

¹ Mε, Paalε, mbæledε awē Yesu Krıstæ, mε-εé ntelé enén kálag. Dyõb ápwédé mε ábé awē mbapεε a nlómag, ábē-'ε mε nsón ákal nímē nkalan mí bwâm.

² Mmē nkalan mós Dyõb dénhõbpē á'sõ é' pónde aá mósõbē ábē bad. Anláá bekal bé'dæádæſ mam tñſene nímē nkalan ngáne bétélé mó ásē á Kálag e echë Esáá.

³ Mmén nkalan rídíí tñſene awe Mwän. A nyaa e moonyon, ane Mwän anchyáád á mbyaa míme Dabidε.

⁴ A nyaa e Edæádæſ, Dyõb dénlúméd á ngíne e Edæádæſ éche Esáá aá mó adé Mwän a Dyõb, apuud áde ámpuúdté mó. Ane Mwän adíí awéd Sånſwéé, Yesu Krıstæ.

⁵ A dín áde dós Dyõb ábágé mε nsímé ábēl-le mε mbapεε a nlómag ábel bon bad ábe béesē bad bé Israel bédúbe, béwõgne-'ε Krıstæ. Nén débēl áde dín déwõſ edúbé.

⁶ Nyémpē ábe nyédé á alon á Roma, nyédé átíntē e bad ábe Dyõb ápwédé aá bébē bad ábe Yesu Krıstæ.

⁷ Né-õó, ntenle nyé moosyā́l awē adé á Roma. Nyédíí bad ábe Dyõb ádáá, apwédé-'ε nyé, ábé ábē bad.

Nsímé ne nsaſ míme rñhúú ne Dyõb, Titéε awéd ne Sånſú Yesu Krıstæ míbē ne nyé.

Paalε aságnan Dyõb

⁸ Dyam dé'sõ, nságnan ádēm Dyõb áyāle nyé moosyā́l á dín áde Yesu Krıstæ. Nságnan mó áyāle adúbe áde nyédúbpé Yesuε ákanlaad nkõſé áte rısyā́l.

⁹ Dyõb áde mibenléé ne nlém nhóg akal áde rıkaleé nkalan mí bwâm tñſene awe Mwän, áde mε mbón nén aá nkamtan nyé akamtēn ne akamtēn,

¹⁰ pón dé téé nzé nkânne'. Nkânne' nén mée Dyöb ábel ríhél nyé ahye dényín, nzé nê ábónnéde mó.

¹¹ Ndáá bwâmbwam mée rínyín nyé ábel bon nzé mpedé, ríwéd nyé áte ne nnam míme Edáádəŋ é Dyöb ébágé mε.

¹² Dyam áde ríhóbée ádíi nén mée, syánē mod-té áwéd nhóg ne aníní nlém á abum. Adúbe ádēn áwéd mε nlém á abum, ádēm-mε ámpē áwéd nyé.

¹³ A-baányan, ndáá mée nyébii bán nkénwōŋ mewēmtən ngen ne ngen áhye dényín nyé, bon káəŋ ne bəəb nzii eénédnédeé. Ndáá mée mipe wê ábel nsón átíntē echēn míme méchyāā e'pun melemlem ngáne mbéle átíntē e bad ábe béesé bad bé Israel bémpēe.

¹⁴ Nsón míme ríwóó rídii ákale bad bésyāāl nkalan mí bwâm, ken bad bé dyad-ε, ké'ε bad bé ahín. Ntəŋgéné mó akal wée bad ábe béwóó debyéé ne ábe béewóó.

¹⁵ Nê dó-'aá ákáá bon nwōŋ nlém bwâmbwam ákale nyémpē ábe nyéde á Roma nkalan mí bwâm.

Nkalan mí bwâm ríwóó ngine

¹⁶ Meekwágéé ákal nkalan mí bwâm áyāle mós rídé ngine e Dyöb eché epiínéde moosyāal awē adúbpé mó e'soosŋ mbooted ne bad bé Israel átimé' wée bad ábe béesé bad bé Israel.

¹⁷ Mmēn nkalan mí bwâm rílumte' syánē nyaa eche Dyöb ábeleé bon bad békobnéde áwe e'só. Bad békobnad á'sō é' Dyöb adúbe áde bédúbpé. Adúbe dso ákáə' bon bad békobnéde á'sō é' Dyöb. Nén áde ne ngáne éténléde á kálag e Dyöb nén bán, "Mod awē aköbnéde á'sō é' Dyöb adúbe áde adúbpé, äbē á alongé."

Moonyon asyāal abelé mbéb á'sō é' Dyöb

¹⁸ Dyöb álumte' mímē melingá. Mébidé ádyöb təŋgene mbéltéd mé mbéb míme bad bébeleé ne e'bébtéd é' mekan ábe bad bébeleé. Mmē mbéltéd mé mbéb ríkáə' bad áhíd mbále.

¹⁹ Dyöb álumte' bó mímē melingá áyāle nén bébíi mam mésyāāl míme bad bétəŋgéné abii təŋgene Dyöb bwâm áyāle Dyöb dēn álumté bó.

²⁰ Se á mbooted áde Dyöb dēnhəgké nköŋsé, bwēm ábe áhágé é'lumte bad bwâm nén bán mam mé Dyöb míme mod éēnyinnēē díid méde ne mbále. Enyinnad-tε nén bán eché ngum edé á ngíndé ne á ngíndé, adé'ε ámín e bwēm ésyāāl. Né-óó béewóó'ε mbámten ké nhóg ákud alagsen.

²¹ Kénée bébíi bán Dyöb áde, béebagéé mó edúbé née Dyöb, béēsāgnān-naá mó. Bon pen mímab mewēmtən mēmbootéd mam míme méesé dyamdyam akamten, ehíntēn ékáá'ε bó mewēmtən.

²² Béhóbe bán béwóó debyéé, bon bétímé e'yóké é' bad.

²³ Bésóbe Dyöb áde áde á ngíndé ne á ngíndé edúbé abε, bétímé bébage bwēm ábe bad béhagné mekáá á nwágén mí bwēm ábe é'wág, bwēm née moonyon, menən, nyam ké'ε nyă.

²⁴ Né-óó, Dyöb átédte aá esí é mekan mé ekob é yäl ékamlan bó ábel mbinde é mekan éche ésudte bó edúbé.

²⁵ Bétédte mbále éche edé təŋgene Dyöb béhíde' metóm. Bétédte ábe Dyöb áde áhágé bwēm ésyāāl edúbé, bétímé bébage bwēm ábe áhágé. Dyöb dó-'aá bétəŋgéné mekenag abε á ngíndé ne á ngíndé. Ebê nê.

²⁶ Né-óó, Dyöb áhúde bó míd áyāl, atédte bó aá béhíde échab esí ábel mekan mé mbinde. Bebaád bélyáge' bechóm anaŋned, béanaŋnad baachóm bémpēe, áde béētəŋgené abel nê.

²⁷ Baachóm bómpē bélyáge' bebaád anaŋned ngáne étəŋgéné abé, béwōó' esí é ngine ánaŋned baáb baachóm. Baachóm bébele mekan mé e'són ne

baachóm bémpēe. Nê ábele' békudtad yǎl nkógsen míme bétǎngéné akud áyāle nímén mekan míme bébeleé.

²⁸ Ngáne édíí-'aá nén bán ábén bad béēwōηνεé Dyōb pónde á alongé ádāb, Dyōb áhúde bó mǐd áyāl aá béκεene nímab mewēmten mé mbéb á'sō, bébele mam míme béētēηνεé abel.

²⁹ Mbeltéd mé mbéb n̄syāāl níkáá bó nlém áte. Bébébé nlém, bédé ngoód, bélúmte e'beb bé nlém, bédé kónjí, béwúε bad, bédáá kəkəə, bédáá edogké, bédé akwáb, bédáá bad ahób ámbíd.

³⁰ Bédáá bad mam ahób á yǎl ábébed bó d̄in, békós Dyōb, bésyāā bad, bédé epame, bédé kúmbe, bédáə' ebébtéd ahəg, béēwōgnēē ábab besáá ne benyaa.

³¹ Bédé eyókéł, béēlōntēē akag, béewóo' é edənge á nlém-tē, béewóo-'aa nlém ní ngəl.

³² Bébíí nén bán Dyōb áhóbé nén aá bad ábe bébele' échē ndín é mekan bétǎngéné awé, boη kénē bédíi bébele nímē mekan. Saá-kaá nê dēmpen, békēmtē bad ábe bébele échē ndín é mekan káəηne kémtén.

2

Bad bé Israel béēh̄idēē mbéndé

¹ Né-ɔ́, nyé mod ké ahéé awé akáadte bad bémpēe, ábē kénzée, eewóo' é mbámten ké nhóg ákud alagsen. Ayāle nén nzé ekáadte bad áde mmōn ámpē ébeleé melelem mé akan míme ékáadteé bó, né ekwide' káəηne echon yǎl nkáá.

² Debíí nén bán mbakú echē Dyōb ábídtēé tǎngene bad ábe bébele' échē ndín é mekan etǎngéné.

³ Bəəb-pə́, nzé nyé mod ké ahéé abídtē mbakú áyāl e mod ampée, boη mwēn abele melelem mé akan, awémténé aá móhele móbíd mbakú e Dyōb áte-ye?

⁴ Ké'ε abon̄ áde Dyōb ábóó nlém bwámbwam, áchábtédé nyé e'kad áte, áwesén-ne nyé, nyéetédéé dó nēe dyam. Nyébíi nén bán e'bon̄ bé nlém ábe Dyōb áwánlé áyāl echēn, é'díí ábe nyé etál átēde áden abé dé mbéb.

⁵ Nyélelé nlém á abum, nyéēh̄ēdēē-'aá Dyōb atimen, né-ɔ́, nyéladte yǎl nkógsen ní Dyōb áte. Akógsen-ne nyé á Epun é nkáásé. Echē Epun Dyōb d̄élūmēd nímē meliŋgá, alúméd-te aá mókáadte' nyaa echē etǎngéné.

⁶ Asābē mod téé nchoo ne nsón míme ábélé.

⁷ Bad ábe bépéné mekuu ábel mam míme métǎngéné ne áhed ehúmé ne edúbé, bēbē á alongé á ngíndé ne á ngíndé. Echē ndín é bad Dyōb débe bó alongé áde déemaá'.

⁸ Bad bémpēe-'ε bédé ábe bétōηtan dásō échab yǎl, béebelée mam míme métǎngéné, bétímé bébele dásō e'bébtéd é' mekan. Echē ndín é bad, Dyōb d̄élūmēd bó nímē meliŋgá akógsén-ne bó.

⁹ Baásyāāl ábe bébele mbéb, Dyōb débēł bétǎg bwámbwam, bēwóg-ke ndutul, mbooted ne bad bé Israel átimé' wéε bad ábe béesē bad bé Israel.

¹⁰ Boη ne bad ábe bébele bwám, Dyōb débe bó ehúmé, edúbé ne nsan̄, mbooted ne bad bé Israel átimé' wéε bad ábe béesē bad bé Israel.

¹¹ Nyébíi nén bán Dyōb déekwognádté modmod.

¹² Bad ábe béewóo mbéndé é Mosεε, bébele mbéb. Dyōb dékáād-te bó ésebán abenlad mbéndé, bēb̄ō'ε. Bad bé Israel-le, bó ábe bēwóo mbéndé é Mosε, bébele mbéb, Dyōb débēnléd mbéndé ákáad bó.

¹³ Saké awóg áde mod áwógé mbéndé dós ákəə' boη ákobnéd á'sō é' Dyōb, ahíd áde mod áhídeé échē mbéndé dós ákəə boη ákobnéd á'sō é' Dyōb.

¹⁴ Bad ábe béesē bad bé Israel, béewóo' é mbéndé, boη pónde ké ehé echē bēbēnlédé nímab mewēmten boη bēbel chōm éche mbéndé éhóbé, né

bélúmte nén bán kénéε béewóó'ε mbéndé, áwab nlém-tê bébíí nhəŋlén átínté e mboŋ ne mbéb.

¹⁵ Mmāb mbəltéd nlúmte nén bán chǝm éche mbéndé éhεdεé éténlédé bó á nlém-tê, bébíí-'ε nén bán nímab nlém rílanŋe bó bán édé nê. Mmab nlém rílúmte bó ké dyam áde bébéle áde mbéb ké'ε ábóó.

¹⁶ Né-ɔ́, á Epun é nkáásé, Dyǝb dékǝād bad bésyāāl nchoo ne chǝm éche békámténé ké'ε éche bébéle ké á kun-tê. Abε Yesuε ene kunze ákáad bad. Adén akan dǝɔ rílanŋεé bad nzé nkale' nkalanj ní bwám.

Bad bé Israel ne échab mbéndé

¹⁷ Bǝɔb-pǝɔ, nyé ábe nyéchǝge yǎl bán bad bé Israel, nyésumé nlém áyāl e mbéndé éche Moseε, nyékumé-'ε ekáá á tǎl bán Dyǝb adíi áden Dyǝb.

¹⁸ Nyébíí chǝm éche Dyǝb áhεdεé aá nyébel, nyébíí-'ε nén bán nyétǎŋéné néε nyéhídé chǝm éche étǎŋéné, ngáne nyéyǎgké mbéndé.

¹⁹ Nyétédé yǎl nén bán nyéε nyélyǎgte bad ábe békwdé ndím abíi áde bébíí'ε Dyǝb, nyédúbpé bán nyéε nyédé néε etrukánj éche bad ábe bédé á ehíntén-tê.

²⁰ Nyétédé yǎl néε bad ábe bélébe' e'yókél é' bad. Bán nyé-'aá nyélyǎgte' bad ábe bébíi dyamdyam. Nyétédé yǎl nê áyāle nyêwəmtan bán ngáne nyébíi mbéndé é Dyǝb bwám, nyébíi mekan mésyāāl, nyébíí-'ε mbále.

²¹ Bǝɔb-pǝɔ, ngáne édíi bán nyéε nyélyǎgte bad bémpēe, cheé ekáá boŋ nyéeyǎgté échen yǎl? Nyékanle bad bán bééchíbe', nyé bən nyéechíbéε-yε?

²² Nyé ábe nyélanŋe bad bán béékābē mesón á ndáb e e'wǝŋgé, nyébən nyéekábéε mesón-ε? Nyékǝɔ abele á myǝb mémpēe, boŋ nyéekāgké á mebón mé myǝb nyéchíbe' bwəm-ε? *

²³ Nyékume ekáá á tǎl bán nyéwóó mbéndé é Mose, boŋ nyésudte Dyǝb edúbé abóó áde nyéboó'ε éche mbéndé.

²⁴ Eténlédé á kálag e Dyǝb nén bán, “Bad ábe béesǎ bad bé Israel béhóbe' Dyǝb mam mé mbéb á yǎl áyāle mekan míme nyébeléé.”

²⁵ Nzé nyéhíde' mbéndé, né ayag áde nyéyagεé bad ákóó etógnén abé á'só é' Dyǝb. Boŋ nzé nyéehídé mbéndé, né ayag áde béyagεé nyé, déesaá dyamdyam.

²⁶ Bǝɔb-pǝɔ, nzé édé bán mod awě béeyagεé abele ngáne mbéndé éhεdεé, né Dyǝb dékob mó néε mod awě béyagé.

²⁷ Né-ɔ́, bad ábe béhíde mbéndé kénéε béeyagεé bó, bélúmte nyé bad bé Israel bán mekan míme nyébeléé méetǎŋenεé. Béyagé nyé, nyéwóó-'ε mbéndé éche éténlédé á kálag, boŋ nyéehídéé chǝ.

²⁸ Nyébíi-ɔ́ nén bán, saké bad ábe bétǝmte' mekún álúmed nén bán bédé bad bé Dyǝb bóó békóó bad bé Israel abé. Saá-kaá ayag áde béyagé mod á ekob é yǎl éche ényínnad dǝɔ ákǝə' boŋ mod ákǝŋ mod a Israel abé.

²⁹ Boŋ mod awě akǝŋté mod a Israel abé adíi mod awě adé mod a Israel á nlém-tê, nédē, mod awě béyagé á nlém-tê. Edǝádǝŋ é Dyǝb chǝ-'aá ébele nímén nsón, saké ahíd áde mod áhídé mbéndé éche bétéléé ásē. Dyǝb dǝɔ ákεne' ene ndín e mod, saké baányoŋ.

3

Dyǝb ábele ngáne áhóbé

¹ Nsyǎŋ ríhéé-ɔ́ rídé ábé mod a Israel? Ké-'ε nyaa e nsyǎŋ ehéé edé áyag mod álúmed bán adé mod a Dyǝb?

² Nsyǎŋ rídé bwāmbwam. Dyam dé'só, áwab mekáá dǝɔ Dyǝb dēmbεé échē eyale.

* **2:22** Mebón míme bad bé' bǝɔd mébédeε ndáb éche énwǝŋ bwəm áte ábe é'lélé nkun.

³ Ngáne édífí bán bó bad behóg bébele'áá ngáne Dyöb dénhöbpē áá bébel, nédē Dyöb dōmpē débenlé chöm éche ánhöbpē áá móḡbel-ε?

⁴ Eesaá nê. Kénée moonyon asyāál ádíí nkal a metóm, Dyöb ádé mbále pōndé ésyāál. Eténlédé á kálag e Dyöb nén bán, “Nzé ehóbé dyam, bad bétāngéné anyín nén bán dyam áde ehóbé ádé mbále. Nzé békáadte wε, ekáa nyaa echē étāngéné.”

⁵ Boη nzé édé nén bán mam mé mbéb míme débēléé mélúmte bwām bán Dyöb déekwognádté modmod, chán-nō déhōbpē? Nédē dehele dehób nén bán Dyöb ábélé awusé ákōgsen syānē áyāle mbéb míme débēlé-yε? (Debyéé á moonyon dōó ríhōbnεé nén.)

⁶ Eesaá nê. Nzé émbē nén bán nyaa eche Dyöb ákáadtεé edé awusé, né chán-nō áhele akáád nkōḡsé?

⁷ Boη nzé édé nén bán dyam dé metóm áde ríkálé álúmte ngáne Dyöb ápédé mbále abé nyaa echē bad bébage-'áá mó ehúmé, né cheé-ḡ ékás boη Dyöb ábé ákáádté mε néε mod áwē abelé mbéb?

⁸ Cheé-ḡ syānē déehōbēē nén bán, “Syānē débēl mbéb ábel boη mboη rínyinned?” Donḡe á bad béhóbe syānē mam mé mbéb áyāl bán dehóbé ádé akan. Dyöb dékōgsen ábē bad ábe béhóbe nê nyaa éche étāngéné.

Modmod eébēlēē ngáne Dyöb áhεdεé áá débēl

⁹ Chán-nō syānē déhōbpē? Nyēwémtné bán syānē bad bé Israel detómé bad ábe béesē bad bé Israel-le? Eesaá nê. Mmaá alúmed nén mεé ngine e mbéb ekamlan bad bé Israel ne bad ábe béesē bad bé Israel nyaa póg.

¹⁰ Eténlédé á kálag e Dyöb nén bán, “Modmod eesaá áwe abele ngáne Dyöb áhεdεé. Mod ké nhóg eesaá.

¹¹ Mod eesaá awē asōḡtné mbále tāngene Dyöb, modmod eesaá-'áá awē awane áte ábíi Dyöb.

¹² Moosyāál abáá Dyöb á yāl.

Bó moosyāál bétímé béwóó abé dé mbéb.

Bó modmod eébēlēē dyam áde átāngéné. Bó mod ké nhóg mwēn eesaá.

¹³ E'yale ábe é'bíde bó á nsəl é'díi néε soη echē béekútεnεé.

Bébenlad échab echém é nsəl ádog bad. E'yale ábe é'bíde bó á nsəl é'díi néε kem e píi e nyā.

¹⁴ Mbon é mehób ne e'bébtéd bé mehób bēn ne bēn bóó é'bíde bó á nsəl.

¹⁵ Mekuu méhēnle bó ásē ásyog mekií.

¹⁶ Kéhéé áde bétómεé ebébtéd ne metake bóó bélyágεé.

¹⁷ Béébíi'ε nsan.

¹⁸ Béēwóo-'áá mbwóg rí Dyöb ké nhóg áte.”

¹⁹ Bōōb-pōó, debíi nén bán mekan míme bételé á kálag e mbéndé, ménone bad bésyāál ábe bēmbεé échē mbéndé. Né-ḡó modmod éēhēlēē-se ádíibē nsəl áte áhób áá mósuú nzom. Ken mod a Israel, ké'ε mod awē eēsē mod a Israel. Moosyāál átyēem á'sō é' Dyöb.

²⁰ Nyébíi nén bán modmod éēhēlēē-se ákobnéd á'sō é' Dyöb áyāle áhídεé mam míme mbéndé éhóbεé. Mbéndé edíi dásō álúmed bad bán bébélé mbéb.

Adúbe dōó ákəə boη bad békobnád á'sō é' Dyöb

²¹ Boη bōōb dōó Dyöb álúmté syānē nzii echē bad békobnadté áwe e'só. Ene nzii eewóó'ε dyamdyam ábel ne mbéndé é Mose. Echē mbéndé ne bekal bé'dáédan béhóbé mam tāngene ene nzii se' bōód.

²² Ene nzii edíi nén, mod ké ahéé awē adúbpe Yesu Krīstəə, mó akobnad á'sō é' Dyöb. Nhəḡlén ké nhóg méesaá ken mod ádé mod a Israel-le, ken mod eesaá.

²³ Moosyāál abelé mbéb, modmod eékwognedεé ákud ehúmé é Dyöb.

²⁴ Nsimé ní Dyöb mbélé Dyöb átéde bad née bad ábe békóbnédé áwe e'só. Abagé mímê nsimé ngên. Abelé nê akode áde Yesu Krístæ ákódté bad ábe bédúbpé mó.

²⁵ Dyöb dëmbě mó née mende aá áwê áwen nló. Bad béküð-te alagsen dé mbéb áyāle bédúbpé mó. Dyöb ábélé nê, ákoŋ bad bésyāal alúmed nén aá móbēle mekan nyaa echě etāŋgéné. Ngen e'só Dyöb awésánnáá bad, eekógsan-naá bad ábe bébélé'áá mbéb.

²⁶ Bəəb-pəə enén pónde, alúmte bad aá móbēle' mekan nyaa echě etāŋgéné, alúmte-'ε bad aá mókōb kénzée awě adúbpé Yesuε.

²⁷ Ngáne édíí-'aá nê, cheé-ō dékumneé ekáá á tâl? Nê déehednéé. Mbéndé ehée ehóbe nê? Dekume' ekáá á tâl áyāle déhídeé mbéndé-yε? Aáy. Deékūmēē ekáá á tâl áyāle nén, adúbe áde dédúbpé Yesuε dōó ákəə boŋ dékūd e'soósoŋ.

²⁸ Syánē denyíne nén bán mod akobnad á'sō é' Dyöb adúbe áde adúbpé Yesu Krístæ saké áyāle ahíd áde áhídeé mbéndé.

²⁹ Ké-'ε nyêwēmtan nén bán Dyöb ádíi Dyöb á bad bé Israel dēmpen-ε? Saá mó adé káŋne Dyöb á bad ábe béesě bad bé Israel-le? Εε, mó adé káŋne Dyöb á bad ábe béesě bad bé Israel.

³⁰ Dyöb ádíi ahóg. Né-ōó, átēd bad ábe báyágé née bad ábe békóbnédé áwe e'só nzé bédúbpé Yesu Krístæ. Melemlem née átēdtē bad ábe béeyagéé nzé bómpē bédúbpé Yesu Krístæ.

³¹ Chán-nō déhōbpē bəəb? Nédē dehóbe nén bán atéd áde Dyöb átédé bad née bad ábe békóbnédé áwe e'só, adúbe áde bédúbpé Yesu Krístæ álúmte nén bán bad bééhíde mbéndé ámpē-yε? Aáy, éesaá nê. Boŋ pen chōm éche mbéndé éhóbeé chōó syánē débáneé mekáá.

4

Adúbe dōó dēnkāŋ boŋ Dyöb ákob Abrahamε

¹ Chán-nō déhōbpē tŋgene taa awēd, Abrahamε? Cheé êmbenléd á pónde eché?

² Nzé ankobnéd á'sō é' Dyöb áyāle mekan míme âmbenlé, né anwōŋ dyam áde ákumneé ekáá á tâl. Boŋ eéhele'aá-se awōŋ dyam ké ahóg áde ákumneé ekáá á tâl á'sō é' Dyöb.

³ Eéhele'aá abel nê. Kálag e Dyöb ehóbe nén aá “Abrahamε andúbé Dyöb, né-ōó, Dyöb déntēd mó née mod awě akōbnédé áwe e'só.”

⁴ Nzé mod abelé nsón, bēbélé bésábé mó áyāle nsón míme ábélé. Mmê nsábe méēbāgkē ndε. Ndii chōm éche átāŋgéné akud áyāle ebábé éche ásálté.

⁵ Boŋ nzé mod eēbēlē nsón boŋ asumé nlém nén aá adúbe áde módúbpé Dyöb dōó débēl boŋ mókobnéd á'sō é' Dyöb, né Dyöb áde ábele boŋ bad ábe bébélé mbéb békobnéd áwe e'só, déntēd mó née mod awě akōbnédé áwē e'só adúbe áde adúbpé mó.

⁶ Melemlem nê dōó Dabideé ánhōbpē tŋgene nnam míme rídé ne bad ábe Dyöb átédé aá békóbnédé áwe e'só, kénée édíí bán béebēléé nsón ké nhóg.

⁷ Dabideé anhób aá, “Nnam ne bad ábe Dyöb álágséné mítab mewusé boŋ abódéd mítab mbéb.

⁸ Nnam ne mod awě Sán Dyöbe éetúbpé míme mbéb dīn ámpē.”

⁹ Nédē bad ábe báyágé bēnpen bōó béküð míme nnam míme Dabideé áhóbe, ngé bad ábe béeyagéé bómpē békud mó? Demaá ahób nén bán kálag e Dyöb ehóbe aá, “Abrahamε andúbé Dyöb, né-ōó, Dyöb déntēd mó née mod awě akōbnédé áwe e'só.”

¹⁰ Pónde ehée Dyöb dēnchəgkē mó aá adé mod awě akōbnédé áwe e'só? Ade béeyāgēē mó, ngé áde bémáá mó ayag? Nê dēmbenléd áde béeyāgēē mó.

11 Bën'yag mó áde Dyöb áamáá mó akob. Ayag áde bën'yagké mó démbē e'chemléd ábe é'sógtan nén bán aköbnédé á'sō é' Dyöb adúbe áde adúbpé, kénéé édíi bán áde ânkobnédte á'sō é' Dyöb bénkên'yagké mó. Nê ábédé ábel boŋ Abrahamε ábé sáá a bad bésyāāl ábe béeyagéé, ábe béköbnédé á'sō e' Dyöb adúbe áde bédúbpé Dyöb.

12 Nê ábédé ámpē ábel ábê-'ε sáá a bad ábe béyágé ábe bómpē bédúbpé Dyöb melemlem ngáne Abrahamε echéd sáŋ ándübēē á pónde eche béēyāgēē mó.

*Adúbe dōō ákəə' boŋ mod
ákud chōm éche Dyöb áhóbe*

13 Dyam démpēe áde débíi ádíi nén bán, se' bōód Dyöb dénlāā Abrahamε ne míme nchyaátén aá móšbē nkōŋsé áwab mekáá. Dyöb dénkēnhóbpé nén áyāle Abrahamε áhídé'áá éche mbéndé. Dyöb dénhōb nē áyāle Abrahamε andúbé mó, Dyöb átéd-te mó nēe mod awē aköbnédé áwe e'só.

14 Nzé émbē nén bán bad ábe behíde mbéndé bōō béküd chōm éche Dyöb áhóbe aá móšbē, né adúbe áde bad bédúbpé Dyöb áde ngēn. Né chōm éche Dyöb áhóbe-'ε aá móšbē éesaá dyamyam.

15 Chōm éche mbéndé ébeleé édíi dāsō ápiined bad meliŋgá mé Dyöb. Boŋ nzé mbéndé eése, abóo á mbéndé déēbāgkē.

16 Nê dō-'áá ákəə boŋ Dyöb álāŋgē dāsō bad ábe bédúbpé mó aá móšbēl dyam áde móhóbe. Abelé nē ábel boŋ ényíned nén bán míme nsímé móš ríkəə boŋ álāŋgē nchyaátén míme Abrahamε ngen póg ne ngen ésyāāl aá móšbelé bō dyam áde móhóbe. Saké bad ábe behíde mbéndé bēnpen bōō ámbéé akag. Ámbé káŋne bad bésyāāl ábe bédúbpé Dyöb ngáne Abrahamε ándübēē. Abrahamε adíi sáá awē syánē moosyāál.

17 Eténlédé á kálag e Dyöb nén bán Dyöb dénlāā Abrahamε aá, "Mbelé we sáá a meloŋ híin." Né-ōó, Abrahamε mó adé syánē sáá á'sō é' Dyöb. Dyöb áde Abrahamε adúbpé dōō áde Dyöb áde ábage bad ábe béwédé alongé, dō-'áá áhóbe' boŋ mekan míme méesē mébé.

18 Abrahamε andúbé Dyöb ásūm-me míme nlém áwē, kénéé édíi bán á míd mé moonyoŋ, nzōm ké póg enkēmbáá echē elúmte bán mam míme Dyöb dénhōbpē aá mébenléd mébenléd-te. Andúbé aá móšbē "Sáá a meloŋ híin" ngáne Dyöb dénlāā' é mó aá, "Mmōŋ nchyaátén mébuú áte nēe betintine."

19 Ade Dyöb álāŋgé Abrahamε nē, ámbé dyam mbwókel e mwē. Ámbíi aá móšlyagéé moonyoŋ ámpē, abíi-'ε aá mwaád Seraa adé ekōm. Boŋ ké nē, adúbe dénkēnsudté mó.

20 Nlém méehúne'aá mó tēŋene dyam áde Dyöb dénhōbpē aá móšbelé mó, boŋ adúbe dénwēd mó áte, ábage Dyöb ehúmé.

21 Ámmād áwe nlém-tē nén aá Dyöb débēl chōm éche áhóbe aá móšbēl.

22 Né-ōó, adúbe áde Abrahamε dénkəŋ Dyöb déntēd mó nēe mod awē ábele mekan ngáne Dyöb áhedéé.

23 Bōōb-pōó, e'yale ábe é'ténlédé nén bán, "Dyöb déntēd mó nēe mod awē ábele mekan ngáne áhedéé" béesaá áyāle Abrahamε mwēmpen.

24 Ábê e'yale é'dé áyāl e syánē ámpē. Dyöb déntēd syánē ámpē ábe dedúbpé nēe ábe bad, mó apuúdté Yesu Krístəə, Sáŋgwéé awêd.

25 Krístəə móo Dyöb démbéé aá áwē áyāle mbéb mímed. Dyöb ápuúdté mó ábel boŋ dékud nzii ákobned á'sō é' Dyöb.

5

Depedé á nchemten ne Dyöb

¹ Né-ɔ́, ngáne édíí bán adúbe áde dédúbpé ábélé Dyöb átédé syánē née bad ábe békóbnédé áwe e'só, syánē dedé nsan ne Dyöb. Echéd Sán, Yesu Krístæ mó akáá bon debé nsan ne Dyöb.

² Mó-'áá adíbnédé syánē nzii echě adúbe áde dédúbpé ábélé bon syánē debíí nsimé ní Dyöb. Né-ɔ́, dedé menyinge bwâmbwam áyāle desumé nlém nén bán deéküð ehúmé é Dyöb.

³ Dedé menyinge ámpē áyāl e metake míme dékudεé, debíí nén bán metake mépεene' e'wéd bé nlém.

⁴ E'wéd bé nlém-me é'bele dewón abé áde ákobnad ne Dyöb. Adê akobned áde dékobnadte-'ε á'sō é' Dyöb dó-'áá ábele bon dewón e'lyág bé nlém nén bán Dyöb déběl chöm éche áhóbé áá mósbelé syánē.

⁵ Nzé delyáge-'ε nlém, déebídté mekáá mé ngên áyāle nén, Dyöb álúmté syánē ngáne ápédé syánē adəŋ abel áde ábélé bon échē edəŋge ésól syánē á nlém-tē. Abelé nén abe áde ábágé syánē échē Edəádəŋ éche Esáá.

⁶ Ade dénkênwónge ngíne ké póg áwóngeŋ éche syánē yāl, Krístæ anwé á nló mímed, bebel bé mbéb á pónde eche Dyöb déntí'ε.

⁷ Elélé áte mod áwé á nló ní mod awě abele' mekan míme métəŋgené á'sō é' Dyöb. Kapóg-ke mod ahele ákwentén áwé á nló ní mod a bwâm.

⁸ Bon Dyöb álúmté syánē áá módáá syánē áyāle nén amběl áá Krístæ áwē á nló mímed áde dédíí débédé bebel bé mbéb.

⁹ Dekóbnédé á'sō é' Dyöb áyāle mekií míme Yesuε míme mésyógké á nló mímed. Nzé mekií míme Yesuε míme mésyógké á nló mímed mébélé deköbnédé á'sō e' Dyöb, nén déelúmtēē syánē bán Krístæ átōm syánē ason nê ásē e melingá mé Dyöb-ε?

¹⁰ Ade débédé bad bé ekoyí bé Dyöb, kwééd echě awe Mwän áwédé emběl dépē á nchemten ne mó. Ngáne édíí-'áá bán depedé á nchemten ne Dyöb, abé áde awe Mwän ádíí á alongé, á asóg, əson syánē.

¹¹ Saá-kaá nê dəmpen, bon dewóge menyinge áyāle Dyöb ábélé syánē dedé ábē bad, mbwiined ne echéd Sán Yesu Krístæ, mó awě akáá bon debé á nchemten ne Dyöb.

Nhəŋlén míme rídé átínté e Adamε bó Krístæ

¹² Mod nhóg mó amběl bon mbéb mípe á nkōŋsé-te, mbéb mó-'áá mípééné kwééd. Né-ɔ́, moosyáál awág áyāle moonyon asyáál abelé mbéb.

¹³ Dyöb ádêhób áá móbage bad mbéndé, né bad bébele mbéb á nkōŋsé-te. Bon kéhéé wéε mbéndé éesaá, modmod éhēlēē-se ahób áá mod abóó mbéndé.

¹⁴ Bon kénê, bootya á pónde eche Adamε əpe á pónde eche Mosεε, pónde eche Dyöb ábágé mbéndé, kwééd enwón ngíne ámín e moonyon asyáál. Bad béwágáá kénê bēnkēmbóó'ε mbéndé e Dyöb melemlen ngáne Adamε ámbō'ε.

Adamε abédé á nwágén míme ane awě antəŋgen əpe, nádē Krístæ.

¹⁵ Abē bad bébe béesaá nyaa póg, áyāle nén ndε echě Dyöb ábágé bad ngên, eche Yesu Krístæ ápééné, éesaá melemlen nēŋgáne dyam áde mbéb míme Adamε mémpεénné. Edé mbále bán bad híin béwédé áyāle mbéb míme mod nhóg ábélé. Bon nsimé ní Dyöb ríchábé ámín bwâmbwam tómaa mímé mbéb. Bad híin békúde ndε e Dyöb ngên nyaa echě echabé ámín, ámbíd e mod nhóg, Yesu Krístæ.

¹⁶ Ndε e Dyöb-pe ámpē éesaá melemlen née dyam áde mbéb míme Adamε ámbenlé dəmpεénné. Mmê mbéb nhóg míme Adamε ríkáá moosyáál akwedé nkáá á'sō é' Dyöb. Bon ene ndε ekáá Dyöb átédé bad née bad ábe békóbnédé awě e'só, kénéé édíí bán bad bébele mbéb abel ne abel.

¹⁷ Edé mbále bán mbéb míme mod nhóg Adamε ámbenlé, ríbéle bad bésyāál bédé ásē e ngíne e kwééd. Bon akan áde aníníí mod nhóg, Yesu Krístæ ábélé,

átómténé ngíne abé. Nén débĕl bad bésyāāl ábe békúdé nsimé rí Dyöb míme ríchábé ámĭn békobnéd-te áwe e'só békūd alongé áde déemaá', bėwóŋ ngíne ámĭn e chōm ésyāāl.

¹⁸ Né-ǎǎ, míme mbéb nhóg míme Adame ámbenlé, mēmbĕl Dyöb dēnkwid baásyāāl nkáá. Melemlem nê dǎo dyam á bwám ahóg áde Krĭstəá ábélé dēmbenlé bad bésyāāl békobnéd á'sō é' Dyöb, békūd-te alongé.

¹⁹ Awógen áde mod nhóg, Adame, énkēnwógēnné Dyöb dēmbĕl moonyon asyāāl ambé mod a mbéb. Melemlem nê dǎo awógen áde mod nhóg, Krĭstəá awógné Dyöb, ábélé bad hiin békobnéde á'sō é' Dyöb.

²⁰ Dyöb dēmpēēn mbéndé ábel abel dé mbéb ákag á'sō. Bon kéhéé wée abel dé mbéb ákagké á'sō, nsimé rí Dyöb mbelé rĭkag á'sō tómaa nê.

²¹ Né-ǎǎ, ngáne mbéb ríwóó ngíne ápēēn kwééd, nê dǎo nsimé rí Dyöb mǎmpē ríwóó ngíne ábel bon bad békobnéd á'sō é' Dyöb, békud alongé áde déemaá' mbwiined ne Yesu Krĭstəá, Sǎngwéeé awêd.

6

Mbėb ríwúú syánē bon Yesuē apuúdté syánē

¹ Chán-nō déhǎbpē bǎǎb? Edé bán débĕ débēle mbéb ábel bon nsimé rí Dyöb ríchágke-ε?

² Aáy éesaá nê. Syāá dewédé, deewóó'é dyamdyam abel ne mbéb ámpē. Chán-nō débēle debé débēlé' mbéb?

³ Nyéebíí' é nén bán áde dékúdé edusen bon debé mod nhóg ne Krĭstəá denwé ne mó-ye?

⁴ Edusen éche syánē dēnkudté, élúmte' bán syánē dewédé, bélímé-'ε syánē ne mó. Nén dēmbenléd ábel bon déwóŋ abé dékǎǎlē. Nén áde melemlem ne ngáne Titéē apúúdté Krĭstəá ne éche ehúmé á alongé dékǎǎlē.

⁵ Nzé syánē dedé nhóg ne mó áyāl e eche kwééd né syánē débē nhóg ámpē ne mó áde apuú'é.

⁶ Debíí bán áde bēmbomée Krĭstəá á awǎg, bēmbomnéd mó abé áde dēnwōŋgē bǎǎd. Abel bon ngíne echĕ áde abé dé' bǎǎd áde ábéltaá syánē mbéb ébǎo ne abǎo ásyāāl. Nén débĕl mbéb méetédte syánē ntāŋ ámpē.

⁷ Nzé mod awédé, mbéb méekamlánné mó ámpē.

⁸ Bǎǎb-pǎǎ, ngáne déwédé ne Krĭstəá, dedúbpé bán dĕbē á alongé ne mó.

⁹ Syánē dedúbpé nê áyāle debíí bán Krĭstəá apuúde, éewáá-'aá ámpē. Kwééd eewóo-'áa ngíne ké póg ámĭn echĕ ámpē.

¹⁰ Awé áde awédé, mbéb méewóó'é dyam ké ahóg abel ne mó ámpē. Alongé áde ádíí-'ε áte bǎǎb ádíi alongé áde ádíí ne Dyöb.

¹¹ Melemlem nê dǎo nyémpē nyétāŋgéné yāl anyín née bad ábe bėwédé, ábel bon mbéb méekamlán nyé ámpē. Nyényín-ne yāl née bad ábe bėdé á alongé ne Dyöb mbwiined ne Yesu Krĭstəá.

¹² Né-ǎǎ, nyéēmwāg se mbéb rĭkamlán echen yāl e moonyon echĕ éwāg. Nê débĕl nyéehídée mekan mé esíí mé ekob é yāl ámpē.

¹³ Nyéetāŋgené-'ε née nyétédte echĕn pēd e yāl ké póg á mbėb-te se nyébenléd chó ábel mekan mé mbėb. Bon pēn, nyébe yāl wée Dyöb née bad ábe bėbídté á kwééd-te, bon bėbe bó alongé dékǎǎlē. Nyébe echen yāl esyāāl á mekáá mé Dyöb ábel bon ábenlad nyé ábel mekan míme métāŋgéné á'sō é' Dyöb.

¹⁴ Mbėb méetāŋgenéé née rĭkamléné nyé. Nyéēsaá ásē e mbéndé bon nyéde ásē e nsimé rí Dyöb.

Débĕ betāŋ ábel mekan ngáne Dyöb áhedéé

15 Chán-nō déhōbpē bōob? Ngáne dédíí ásē e nsimé rí Dyōb, nédē débê débēle mbéb áyāle deesaá ásē e mbéndé ámpē-ye? Aáy, éesaá nê.

16 Nyéebíí'é bán nzé mod abagé yāl néε ntān ásē e mod ampée, ábel kéchéé éche ane mod áhóbéé, né adíi ntān awé ane mod-ε? Bad ábe bébágé yāl ábel mekan mé mbéb, chōm éche békudéé édíi kwééd. Boñ mod awé abagé yāl ábel ngáne Dyōb áhedéé, abág mod awé ábele mekan níme métāngéné á'sō é' Dyōb.

17 Nságnen rímbê ne Dyōb. Nyé ábe nyêmbé betān ásē e mbéb, nyêtime nyéhíde mbále e mekan mésyāāl níme báyágté nyé ne nlém nhóg.

18 Bōob-pe áde Dyōb áhúdé nyé ásē e ngíne e mbéb nyêtime betān, ábel mekan ngáne Dyōb áhedéé.

19 Nhóbe nímén mésyāāl á nyaa e moonyon áyāle nén nyé nēngáne baányon, nsōnten méechabéé nyé ámín. Ngen e'só, nyêmbé echen yāl esyāál néε betān, nyébelé mbinde é mekan ne e'bébtéd é mekan, nyébelé-'ε ebébtéd chēn ne chēn, nyékag á'sō. Bōob-pōó nyétāngéné echen yāl esyāál abε néε betān, ábel mekan ngáne Dyōb áhedéé, nén débēl alongé ádēn désān.

20 Ngen e'só áde nyébédé betān ásē e mbéb, nyēnkēnwóngé dyam abelen mekan níme Dyōb áhedéé aá nyébel.

21 Nsyān ríhée nyēnkudté áde nyébēláá mekan níme mékwágte nyé bōob. Chōm éche nímbē mekan mépēneé édíi kwééd.

22 Boñ bōob, Dyōb áhúdé nyé ásē e ngíne e mbéb, betān bé Dyōb-paá nyédíí. Nsyān níme nyékudéé rídíi nén bán Dyōb ábélé nyésáá ngáne ábē bad bétāngéné asān. Nê débēl nyēkūd alongé áde déemaá'.

23 Nyébíi nén bán nsábe níme mbéb nípēneé rídíi kwééd. Boñ ndε eché Dyōb ábagéé bad ngēn edíi alongé áde déemaá'. Dekude dó, abé áde dédíí ne Yesu Krístə, Sāngwéé awêd.

7

Bad bé Krísto béesaá ásē e mbéndé ámpē

1 A-baányan, nyédíi bad ábe bébíi mbéndé. Nyéebíí'é bán mbéndé ekamlan mod dásō á pónde eche ádíí á alongé-ye?

2 Détêd elānsén áyāl e ehób é e'wóngé. Nzé mmwaád awóó nchóm, mbéndé ehóbe nén bán atāngéné abé ne nchóm pónde esyāál eche nchóm ádíí á alongé. Boñ nzé nchóm awédé, mbéndé e e'wóngé eekóbéé mó ámpē.

3 Né-ōó, nzé adyééne mod ampée áde nchóm ádíi ádíí á alongé né béchag mó bán adíi nkáb-a-meson. Boñ nzé nchóm awédé né awóó kunze á'sō é' mbéndé, nzé awóó-'ε nchóm ampée, ene pónde, né eekábéé asón.

4 A-baányan, nê dōó édíí ne nyémpē. Mbéndé eekamlánné nyé ámpē áyāle awé áde Yesuε áwédé, nyémpē nyéwédé. Bōob-pōó, nyédíi bad ábe mod ampée, Yesuε awé Dyōb ápúúdté, ábel boñ nyébele Dyōb bwām.

5 Áyāle á pónde eche áded abé á moonyon ákamlánnáá syánē, mbéndé epuúdté'áá syánē esíí é mekan mé ekob é yāl áte. Nén ábēláá débēlé' mekan mé mbéb níme mépēne' kwééd.

6 Boñ bōob dehídté ásē e mbéndé, awé áde déwédé. Né-ōó, mbéndé eché ekāmlánnáá syánē néε betān eekamlánné ne syánē ámpē. Nén ábélé dehíde dásō nzii ekóólé bōob ábele Dyōb. Debenle mó nyaa eché Edəádəñ é Dyōb élāngéé syánē, saké nhídtēn ne mbéndé éche bétélé ásē.

Mbéndé e Dyōb chō elūmte' syánē nímed mbéb

7 Chán-nō déhōbpē bōob? Nédē déhōb bán mbéndé edé mbéb-ε? Aáy, deéhēlē-sε dehób nê. Boñ mbéndé chō ekəó boñ mbíi chōm éche mbéb rídíi.

Nzé mbéndé enkênhób aá mod eesíídé chõm é mod, né meebíí'é nén meé ásíi chõm é mod ádé mbéb.

⁸ Bonj ene mbéndé ennyëm me mewëmten mé mbéb ásē, ébel níbootéd bwëm é' bad asii nyaa ne nyaa. Nzé mbéndé eésě, né mbéb méesaá dyamyam.

⁹ Póndé ebédé echě ménkêmbíí'é mbéndé. Bonj á póndé echě mbíí mbéndé, esíí é abel dé mbéb êmpuú me áte, nwé-'ε.

¹⁰ Mbéndé eche Dyõb ábágé aá chõ epεene alongé chóchó étim me awúu.

¹¹ Mbéb ménkud etál ámbíd e mbéndé, rídõg me, mbel mbéb. Né-õó mbéb mõõ níwúú me.

¹² Né-õó, denyíne nén bán mbéndé chën esáá, chõm-ée mbéndé éhóbée ésáá, étánjéné, édé-'ε bwám.

¹³ Nédē nē álúmte nén bán chõm éche édé bwám étimé me nē kwééd apiined-ε? Aáy, éesaá nē. Saké mbéndé chõ epiínédé me kwééd, mbéb mõõ nípóó ámbíd e mbéndé, chõm echě edé bwám, ápiined me kwééd. Nén dēmbenléd ábel nén bad bényín ngáne mbéb rídíí. Né-õó, mbéndé e Dyõb ebele' mbéb níúmte eche ngíne bwámbwam.

Nzum echě ewante' moonyonj áte

¹⁴ Debíí nén bán mbéndé eche déhóbée edíi chõm é edáádəŋ. Bonj ndíi moonyonj a ekob. Ndíi née mod awě bésómé ásē e mbéb née ntəŋ.

¹⁵ Meesõŋtánné mbeltéd nímmēm. Mam níme níhedée abel, meébēlēē mó. Mam níme níkóó mõõ nítimeé abel.

¹⁶ Bõõb-põõ, abel áde mbelée chõm éche méehedée abel, nén álúmte bán nkwěnténé meé mbéndé edé bwám.

¹⁷ Bonj á mbále saké mměn nkoo' abel, mbéb níme rídé me áte mõõ mbelte me nē.

¹⁸ Mbíí meé dyam á bwám ké ahóg déesaá me áte, nédē, ne nlém ní moonyonj níme níwóó, kénéε edíí bán nlém rídé me áte ábel dyam á bwám, meéhēlēē dõ abel.

¹⁹ Meébēlēē dyam á bwám áde rídáá abel, bonj dyam dé mbéb áde méehedée abel, dõõ nítimeé abel.

²⁰ Bõõb-põõ abel áde mbelée dyam áde méehedée abel, nén álúmte nén bán saké mměn nkoo' nímmē mam abel ámpē. Bonj mbéb níme rídé me áte mõõ mbelte me mó.

²¹ Né-õó, nnyíne nén meé mbéndé edé echě ekamlan me. Póndé téé áde níhedée dyam á bwám abel, mbéb mõõ níwámsan me ekáá apε.

²² Awēm nlém-tē, mbéndé e Dyõb chõ rídáá ahíd ne nlém nísyāā.

²³ Bonj nnyíne nén meé mbéndé empée edé echě ekamlan échēm ekob é yāl, echě ewane nzum ne mbéndé echě nímmēm nlém rídáá. Ene mbéndé ehaá me, ebelé-'ε ndé ntəŋ a mbéb. Mmē mbéb mó-'aá nkamlan échēm ekob é yāl.

²⁴ Ebál é etyag éche étáné me! Nzé-módé ášõŋ me á mekáá mé échén ekob é yāl, éche epiinad me kwééd?

²⁵ Nságnen mbê ne Dyõb. Asoó ádēm alongé mbwiined ne Mwän, awed Sájgwée, Yesu Krístəə. Né-õó, mmēmpen ndé mbíd ébe, nímmēm nlém nílanje me áhíd mbéndé é Dyõb bonj échēm ekob é yāl éhíde mbéb níme rídé me áte.

8

Alongé áde Edáádəŋ é Dyõb ébagéé

¹ Bõõb-põõ, Dyõb déekwidée modmod nkáá awé adé nhóg ne Yesu Krístəə.

² Mbéndé e Edáádəŋ echě epiinad syánē alongé, abé áde dédíí ne Yesu Krístəə, ehúde me á mehanj mé mbéndé e mbéb ne á mekáá mé kwééd.

³ Mbéndé enkênhenlé mbéb amad áyāle nén baányonj bénkênwóngé ngíne ahíd ch́. Né-ɔ́, Dyöb ábélé dyam áde mbéndé énkênhenlé abel. Anlóm awe Mwän ne ekob é yäl e moonyonj éche ébele mbéb, ábóded ngíne e mbéb. Abel áde Dyöb dêmbenlé nén dêmbödéd ngíne e mbéb ámin e moonyonj a ekob.

⁴ Dyöb dêmbel nê ábel bonj bad ábe béehídē mam ne ngíne e moonyonj bonj bétimé' béhídē mekan ne ngíne e Edáádəj é Dyöb, bébel mekan nyaa echē etəngéné melemlem ngáne mbéndé ehóbeé aá bébel.

⁵ Bad ábe bébele mekan ngáne écháb ekob é yäl élanğeé bó, bébelé bésun nímab nlém áyāl e mekan mé ekob é yäl. Bonj bad ábe bébele mekan ngáne Edáádəj é Dyöb élanğeé bó, bébelé bésun nímab nlém áyāl e Edáádəj é Dyöb.

⁶ Nzé mod asúme nlém áyāl e mekan mé ekob é yäl, né áwē. Bonj nzé mod asúme nlém áyāl e mekan mé Edáádəj né Dyöb débe mó alongé áde déemaá' ne nsaj.

⁷ Nzé mekan mé ekob é yäl mékamlan mod, ane mod abelé ákᵛᵛ Dyöb áyāle eehídēé mbéndé é Dyöb, eéhēlē-'aá ch́ ahíd ne ahíd dēn.

⁸ Nén álúmte bán bad ábe béhíde échab esíí é mekan mé ekob é yäl, béehéléé Dyöb menyiŋge awóged.

⁹ Bonj ne nyé, nyéēbēlēē mekan ngáne ekob é yäl éhedeé aá nyébel. Nyébele' dásᵛ ngáne Edáádəj éhedeé aá nyébel, nzé édé bán ne mbále Edáádəj é Dyöb édé nyé áte. Kénzēé awē Edáádəj éche Krístəə éesaá áte, né éesaá ne Krístəə.

¹⁰ Bonj nzé Krístəə adé nyé áte, nyédé á alongé áyāle Krístəə abelé nyéköbnédé á'sᵛ é' Dyöb kénéé édíí bán échēn ekob é yäl éwē áyāle mbéb míme nyébélé.

¹¹ Nzé Edáádəj éche Dyöb áde dêmpuúđ Yesue édé nyé áte, né ké échēn ekob é yäl éche éwág émmad awé, né Dyöb áde ápuúdté Krístəə dépuúđ ch́. Abel nén á ngíne e Edáádəj éche édé nyé áte.

¹² Né-ɔ́, A-baányan, dyam áde áde détəngéné ahíd déesaá dyam dé ekob é yäl, saké ábé ngáne ekob é yäl éhedeé.

¹³ Ayāle nzé nyébele ngáne ekob é yäl éhedeé né nyéēwē. Bonj nzé á ngíne e Edáádəj é Dyöb nyéwúú mbeltéd mé mbéb míme nyébeleé, né nyéēkúđ alongé.

¹⁴ Dyam áde áde ádíí nén, bad bésyā́l ábe Edáádəj é Dyöb élyágtéé, bédíí bán bé Dyöb.

¹⁵ Edáádəj éche Dyöb ábágé nyé éebeléé-se nyébé néē betān, nyébé á mbwógte. Bonj pen Edáádəj é Dyöb ébélé nyékoó bán bé Dyöb abé. Ngíne echē échē Edáádəj ch́-'aá ekáá bonj délēbpē Dyöb bán, "A-Tê! Echem Sáj!"

¹⁶ Edáádəj é Dyöb ébélé syánē debíí á nlém-tē nén bán dedíí bán bé Dyöb.

¹⁷ Bᵛᵛᵛ-ᵛᵛᵛ, ngáne dédíí ábe bán, deékúđ nnam míme Dyöb ákóñnéde ábē bán, syánē deékúđ-te bwēm ábe Dyöb ákóñnéde mó, nzé ne mbále syánē dekwěnténé átag ne Krístəə ábel syánē ámpē dékud ehúme éche Dyöb débeé mó.

Ehúme éche bad bé Dyöb békudté

¹⁸ Nnyíne' nén meé, metake míme dékudeé bᵛᵛᵛ méesaá dyamdiam nzé behágténé mó ne ehúme éche bélūmédte syánē á pónde echē ehúe á'sᵛ.

¹⁹ Bwēm ábe Dyöb áhágé á nkōñsé é'sine' ne e'lyág bé nlém, pónde echē Dyöb délūmtēnnē ábe bán. Abēl nē ne ehúme ésyā́l.

²⁰ Embē nén bán bwēm ábe behágé é'díí ehóhó ngēn. Saké ábē bwēm bēn bᵛᵛ bēntíí bán ébē nē bonj Dyöb dᵛᵛ déntíí. Ambel nē ne e'lyág bé nlém aá epun épē éche

²¹ móhúdtē ábē bwēm bēn á mehanj mé ngíne echē ebᵛᵛᵛᵛ bwēm, bómpē békúđ-te kunze ákud melemlem mé ehúme éche Dyöb ábageé ábē bán.

²² Debíí nén bán kááŋ ne' bɔɔb, bwēm é'syāāl é'kəne' ne e'wε ábe bėwógεé ábe é'dé nēŋgáne e'wε bé achád.

²³ Boŋ saké nhəgtéd mwēmpen ríkəne'. Syánē bēn awě dewóó Edəádəŋ éche Dyöb ábágé syánē nēŋgáne ndε e'só, syánē ámpē dekəne' á nlém-té. Debänné nlém rísyāāl ásin pón dé echě Dyöb débenlé boŋ dékōŋ ábe bán abé, ahúd syánē yāl esyāál á mehaŋ-té, ábe syánē yāl ékōlē.

²⁴ Taase dekude e'sooson delyágé nlém bán deéküd chōm éche Dyöb áhóbé aá móɔbēl. Boŋ pen nze denyíne chōm éche delyágé nlém bán deéküd, né saké e'lyág bé nlém bóó é'kóó abé nē. Nzé-módé ahele alyág nlém áyāl e chōm éche ámáá akud?

²⁵ Boŋ, dechedé yāl ásin chōm éche déēnyīnēē, dekoó-'ε chó asin.

²⁶ Melemlem nē dáo Edəádəŋ é Dyöb éwōŋganné syánē áyāle deewóó'ε ngíne. Deebíí'ε ngáne déťəŋgéné akáne boŋ Edəádəŋ chēn chóó ékännad syánē ne nheemed míme rítómé e'yale bé nsəl.

²⁷ Dyöb ánəne syánē nlém áte, abíí-'ε mewēmtən mé Edəádəŋ áyāle Edəádəŋ ékännad bad bé Dyöb nyaa eche áhedéé.

²⁸ Debíí nén bán dyam-té áde ábenlad Dyöb ábele dó á mboŋ mí bad ábe bédáá mós, * ábe áchénlé ábel ngáne áhedéé.

²⁹ Dyöb dēmmad atíi nén aá bad ábe mōmmadté apwəd ádāb abé ábē nēŋgáne abé áde awe Mwān ábel boŋ ane Mwān ábē Mwān á'sō átíntē e baányan.

³⁰ Né-óó, bad ábe Dyöb dēmmadté apwəd, anchélé bó abé ábē bad. Abe áchénlé-'ε áhóbé aá békóbnédé áwe e'só, ábe bó-'ε békóbnédé áwe e'só, abagé bó éche ehúmé.

Dyöb ádáá syánē mbwiined ne Yesu Krístəə

³¹ Nzé denəné mímén mekan mésyāāl áte, cheé déhele dehób? Nzé Dyöb áde ne syánē, né nze ahele atəŋgéné syánē?

³² Nēε Dyöb déebāŋnēé ké awe Mwān. Antéd mós, ábe mós aá áwē á nló míme syánē moosyāál, né éebaá syánē kéchéé émpēe éche déhédné mós-ye?

³³ Nzé-módé áhōb aá bad ábe Dyöb ápwédé békwédé nkáá? Dyöb dēn dáo áhōbē nén aá dedíi bad ábe békóbnédé áwē e'só.

³⁴ Nzé-módé-ō áhōb aá dekwédé nkáá? Yesu Krístəə awédé, ápuu, adyεé-'ε á ekáá émbáá é Dyöb, áhed-taá ákännadté syánē.

³⁵ Nzéé-ō ahele ábēl boŋ Krístəə asóg syánē adəŋ? Mekan míme mélénlédé syánē áte, ké'ε ndutul, káa ahé áde bad béhāgkē syánē á meséb? Nzaa, káa awóŋ áde déwōó'ε mbóté? Nzé-'ε akíme áde bad békímméé syánē? Ké'ε awúu áde bad béhedéé syánē awúu?

³⁶ Kálag e Dyöb ehóbé aá,
“Pón dé téé bad bėwúε sé áyāl echōŋ.

Bényíne sé nēŋgáne rídyəŋ mí mbód míme békagké awúu.”

³⁷ Mmén mekan mésyāāl mébenlad boŋ detómé mós áte, mbwiined ne Krístəə, mós awě adəó syánē boŋ áwōŋgān-ne syánē.

³⁸ Mbíi bwām nén méé chōmchōm éesaá éche éhele-se épāŋ edəŋge éche Krístəə ádáá syánē. Ken kwééd-ε, ké'ε alongé. Ken ángel-ε, ké'ε benkamlenε, ké'ε ngíne éche édé ádyōb. Ken pón dé eche dédíi áte nén, ké'ε pón dé echě ehúε.

³⁹ Ké ngíne e nkoŋ mímín, ké'ε e nkoŋ rísé, chōmchōm éesaá átíntē e nhəgtéd rísyāāl éche éhele épāŋ edəŋge éche Dyöb áwóŋné syánē mbwiined ne Yesu Krístəə, awəd Sāŋgwéé.

* **8:28** *Dyam-té áde ábenlad Dyöb ábele dó á mboŋ mí bad ábe bédáá mós; donge á kálag áwóó mam mésyāāl mébenlad á mboŋ míme bad ábe bédáá Dyöb.*

9

Dyöb ne äbē bad bé Israel

¹ Nkale' mbále nêngáne mod awě adúbpé Krīstəə, meékālēē metóm. Mmēm nlém níme Edəádəŋ éche Esáá élyágtεé, nílange με nén aá chǒm éche nǎhóbé édé mbále.

² Ndutul e ngíne ne metake mé ngíne bédé με á nlém-té

³ áyāl e ábēm bad, ábēm baányəŋ ábe syáábō sédé mekií mehóg. Ayāl echáb nhede' nén meé né Dyöb dēmbě με ebómán, ábēl-le meebág ne Krīstəə.

⁴ Abēm bad bédii bad bé Israel. Dyöb áhóbé aá mótēdē bó nées ábē bǎn, alúmté-ε bó éche ehúmé. Dyöb dēmpě á nchemtεn ne bó, ábε-ε bó mbéndé. Anlúmed bó ngáne bétəŋgéné mó edúbé abε, bó-'aá ánlāā'έ aá mósbelé chǒm éche ánhǒbpē aá mósbel.

⁵ Bédii bad bé mbyaa níme ábēd betaa ábe bémbe se á mbooted. Ade Krīstəə áchyáádté-'aá, mómpē nées moonyon, áwāb mbyaa dǒo ámbídtē. Mekenag mébē ne Dyöb á ngíndé ne á ngíndé, mó awě ákamlan chǒm ásyāāl. Ebē nē.

⁶ Meehóbéé nén meé Dyöb déebenlé chǒm éche ánhǒbpē aá mósbel. Edé bǎn saké bad bésyāāl ábe bébídé á mbyaa n Israel bédé bad bé Dyöb.

⁷ Saá-kaá bǎn bésyāāl ábe Abrahamε bédé bǎn bé Dyöb. Dyöb dénlāā Abrahamε aá, "A mbyaa níme awon mwǎn Aisige dǒo bǎn ábe nǎhóbé meé mēbě wε bēbídte."

⁸ Nén álúmte nén bǎn bǎn ábe béchyáá á nyaa e moonyon béesaá bǎn bé Dyöb. Boŋ bǎn ábe bēnchyāā'έ nhídtεn ne ngáne Dyöb dénlāā'έ Abrahamε aá mósbel, bóo békoo'έ aton nêngáne bǎn bé mbyaa níme Abrahamε.

⁹ Ade Dyöb dénlāā'έ Abrahamε aá mósbelé mó dyam áde mósóbé, Dyöb dénhǒb aá, "Mětīm ámbíd á pónde eche ntíídé. Ene pónde Seraa áwālē mwǎn a mwēnchóm."

¹⁰ Saá-kaá nē dēmpεn. Sáá nhóg móo Rebekaa ábe bǎn bé baachóm bébe bēnwōŋgē. Ane sáá abédéε awesyánē taa, Aisige.

¹¹⁻¹² A pónde éche bēēchyāā'έ ábē bǎn, áde bēēbī'έ ábel dé mbéb ké'ε mboŋ, Dyöb dénlāā Rebekaa aá, "Mwǎn ambáá ábē mbəledε awe mwǎn asad." Dyöb dēmbel nén ábel ényínned nén bǎn nímē mewēmtεn móo ámbenlédté ábel mwǎn nhóg ábe ásē e aníní. Embonéd mó ápwεd mod awě ádáá apwεd, saké áyāle dyam áde ane mod ábélé.

¹³ Eténlédé á kálag e Dyöb ngáne Dyöb áhóbé aá, "Mendəŋ Jakəbε boŋ nǎkōō Esao."

¹⁴ Chán-nō déhǒbpē bǒob? Nédē déhǒb bǎn Dyöb ákwognad baahóg-ε? Aáy, éesaá nē.

¹⁵ Se' bǒod, Dyöb dénlāā Moseε aá, "Měwōg kénzée ngol awě nǎdáá ngol awóg, mēlūmed-tε e'boŋ bé nlém wée kénzée awě nǎdáá alúmed."

¹⁶ Né-óó, mpwεdtéd n Dyöb méewóo'έ dyamdyam ábel ne chǒm éche bad bēhedéé bǎn ébenled ké'ε éche bēbeléé. Dyöb dǒo ábenlad ábē e'boŋ bé nlém ábel kéchéé éche áwémténé ábel.

¹⁷ Eténlédé á kálag e Dyöb nén bǎn Dyöb dénlāā Farao aá, "Mpwεde wε kǎŋ ábel boŋ mbenled wε álúmed echem ngíne ne ábel boŋ ádēm dǎn ákanled nkōŋsé áte nisyāāl."

¹⁸ Né-óó, Dyöb álúmte' ábe e'boŋ bé nlém wée kénzée awě ápwédé, áwēdē-ε kénzée nló áte awě ápwédé aá áwúu nló áte.

Meliŋgá mé Dyöb ne e'boŋ bé nlém é' Dyöb

¹⁹ Kapóg nyé mod nhóg nyéēsedéd με bánken, "Nzé nē dǒo édíí, cheé ékáo boŋ Dyöb ábé áhǒbē' aá bad bēbélé mewusé? Debíí bǎn modmod eéhlēē-se ahób aá móobenlé dyam áde Dyöb áhóbé aá ábel."

²⁰ Bon̄ wε moonyon̄, nzé-móde édíí áseded Dyöb dyam? Mbeé e mɔg éēhēlēē-se ésedte' mod awě abelé ch́o aá, "Cheé éḱáá bon̄ éhágé mε nyaa eché éhágé mε?"

²¹ Nyébii nén bán ntumé-mbeé, awóó kunze ábelen hyæg ábe ábenléé mbeé nyaa eché ádáá. Nzé adáá, ahélese atéd hyæg ábēlēn mbeé ébe; póg ebé mbeé e edúbé, eníníí-ε ebé mbeé eché bébenladté pónde ésyāā.

²² Kapóg Dyöb áhédé'áá mímē melingá alúmed, áhedé-ε aá bad bényín eche ngine. Bon̄ anched yāl bwāmbwam áwesen bad ábe bēmbēl bon̄ áliṅ. Abe bad bēntāngēn-ne nkógšen akud.

²³ Kapóg-ke Dyöb dénwēmtēn-ne álúmed éche ehúmé é ngine ámín e bad ábe álúmté e'bon̄ bé nlém. Amaá ábē bad abonšen ákud éche ehúmé.

²⁴ Syánē dedé-ε átínté e ábē bad ábe áchénlé. Saá-kaá átínté e bad bé Israel dēmpen d́o áchénlé syánē. Achénlé syánē donge á bad ḱááne átínté e bad ábe béesě bad bé Israel.

²⁵ A kálag e Hoseya, Dyöb áhóbé nén aá,

"Bad ábe bēnkēmbé ábēm bad,
mēchæg bó mēé bédé 'Abēm bad.'

Alon̄ áde ménkēndāngé mēchæg d́o mēé ádíí 'Alon̄ áde nídáá.'

²⁶ Melemlem mé hóm wée ménlāā-'aá bó mēé 'Nyēsaá ábēm bad', áhed-taá méchægké bó mēé bédii ábēm bán, bán bé Dyöb áde ábage' alongé."

²⁷ Nkal é'dáádāṅ Yesayaa anháád tāngene bad bé Israel aá, "Ké mesongé mé bad bé Israel mēmbuú áte née nsíí mímē níde á nkæg mé edib é nkwe, nguse chēmpen ch́o ékúd e'soóson̄.

²⁸ Sāngwéeé éebébdé pónde ábel mekan mésyāā mímē átómté mbakú aá mósēl á nkōsé."

²⁹ Nén áde nēngāne Yesayaa ánhōbpē aá, "Nzé Sāṅ Dyöb á Ngumε enkēnlyágnéd syánē donge dé nchyáátén, né debágáá née myad mé Sodom ne Gomora."

Paale akánnédé bad bé Israel

³⁰ Chán-nō déhōbpē b́oob? Bad ábe béesě bad bé Israel bétímé békóbnédé á'sō é' Dyöb mbwiined ne adúbe áde bédúbpé Krístā, kénéé édíí bán béewane'aá áte ákobned á'sō é' Dyöb.

³¹ Bon̄ bad bé Israel bēwáné'áá áte béhedé bán bēhíd mbéndé ábel bon̄ békobned á'sō é' Dyöb, bon̄ bēnkēnhēnlé.

³² Cheé éḱáá bon̄ bēnkēnhēl? Bēnkēnhēnlé áyāle nén bēwáné'áá áte ákobned á'sō é' Dyöb áyāle nsón míme bēn bēbélé saké áyāle adúbe áde bédúbpé Dyöb. Bēnkād ekuu á aláá áde bad békōdé ekuu, bēkwē-ε.

³³ Eténlédé á kálag e Dyöb tāngene nē, nén bán,
"Nyénone', mbanne aláá á Zayōn
áde débēl bon̄ bad békōdé ekuu,
aláá áde débēl bon̄ bad bēkwag.
Bon̄ kénzée awě adúbpé mós éehúú'ε ne mekáá mé ngēn."

10

¹ A-baányan̄, ndáá ne mímēm nlém rísyāā nén mēé ábēm bad bé Israel békud e'soóson̄, nkānnad-te bó mēé nē abenled.

² Mbide bó mbón̄ nén mēé bédáá Dyöb abele ne nlém rísyāā. Bon̄ béekoo'ε asōṅten ngāne bétāngéné mós abele.

³ Béēsōṅtēnēē ngāne Dyöb ábeléé bon̄ bad békobné áwe e'só. Bétímé bēhede nzii echáb chēn eché ēbēl bon̄ békobné á'sō é' Dyöb. Né-óó, béesudtéé yāl áhíd nzii eché Dyöb átíídé ábel bad békobned áwē e'só.

4 Krīstəə abelé nsón míme mbéndé éntəŋgēnnē abel, né-ɔ́, kénzée awě adúbpé mọ́, akobnad á'sō é' Dyöb.

E'soosoj é'bágnédé ne metúmbé mésyāāl

5 Se' bɔ́d, Mosεε antəl t̄ŋgene akobned áde mod ákobnadté á'sō é' Dyöb áyāle áhídeé mbéndé. Anhób aá, “Kénzée awě abele chöm ésyāāl éche mbéndé éhóbeé, áküd alongé áde déemaá’.”

6 Bonj éténlédé á kálag e Dyöb bán nyaa eche adúbe ábeleé bonj mod ákobnéd á'sō é' Dyöb edii, “Weehóbé áwoŋ nlém-tê nén wεé, nzé-módé ákě ámín, ádyöb.” (Nédē, áhúd Krīstəə ámín, ásuded mọ́ ásē.)

7 Ké-'ε “Nzé-módé ákě ásē á echóg éche éewóo asóg?” (Nédē áhúd Krīstəə á echóg éche éewóo asóg áπεεν mọ́ ámbíd á alongé.)

8 Chöm-εε kálag e Dyöb éhóbé édii nén aá “Eyale é Dyöb édé wε benben. Edé ekale chó, édé-'ε wε á nlém-tê.” Mmê nkalanj nídii nkalanj míme sékaléé nén bán nyétəŋgéné adúbe awónj.

9 Nzé ehóbné nsəl nén wεé, Yesue adii Sánḡwéeé, edúbpé-'ε awónj nlém-tê nén wě Dyöb dēmpuúid mọ́, né wěküd e'soosoj.

10 Ayāle nén nzé edúbpé á nlém-tê, Dyöb ábele' ékobnéd áwe é'sō. Nzé ehóbné nsəl ne wεé mádúbpē, ebelé éküd e'soosoj.

11 Kálag e Dyöb ehóbé nén aá “Kénzée awě adúbpé mọ́, éehúú'ε ne mekáá mé ngēn.”

12 Nén áde ne moosyāál, ken mod adé mod a Israel, ken mod eesaá mod a Israel. Dyöb ádii Sánḡwéeé a moosyāál nyaa póg, abude-'ε kénzée anamed awě ahēdné mọ́ nwōŋgen.

13 Kálag e Dyöb ehóbe aá, “Kénzée awě achəgé d̄ín áde Sánḡwéeé aá ásonj mọ́, áküd e'soosoj.”

14 Bonj chán béhele béchəg mọ́ bán ásonj ádāb alongé áde béedúbpéé mọ́? Chán-ne béhele bédúbé mọ́, nzé béewóge míme nkalanj? Chán-nō béhele béwóg míme nkalanj nzé bad béekanle bó mọ́?

15 Chán-ne bad béhele béke békanlé bad míme nkalanj áde mod éelóméé bó? Eténlédé á kálag e Dyöb nén bán, “Nzé mod apééné nkalanj mí bwām, ébelé épēēn enyīŋge.”

16 Bonj saké moosyāál akobé nkalanj mí bwām. Nkal é'dəədəŋ Yesayaa mwēn anhób t̄ŋgene nê aá, “A-Sán, bó ahéé adúbpé nkalanj míme sékálé?”

17 Né-ɔ́, adúbe ápag ne awóg áde mod áwógé nkalanj, bad bétəŋgéné-'ε nkalanj míme Krīstəə akal bonj bad bédúbē mọ́.

18 Bonj ndəá asēded nén méé ken, édé mbále nén bán bénkēnwógké míme nkalanj-ε? Bénwōg mọ́ bwām. Eténlédé á kálag e Dyöb nén bán, “Ehób éche bad ábe békálé'áá míme nkalanj énwōgnēd nkōŋsé áte n̄syāāl. Abāb e'yale bēmpē mesóg mé nkōŋsé áte mésyāāl.”

19 Ndəá asēded nén méé ken, bad bé Israel bénkēnsóŋtēnné míme nkalanj-ε? Mosεε mọ́ asébpé ahób nén aá Dyöb áhóbé aá,

“Mēnaméd bad ábe béekoo alonj abé, ábel bonj nyéwóon bó kónjí.

Méenaméd bad ábe bédé eyókél ábel bonj nyélinj.”

20 Nkal é'dəədəŋ Yesayaa mómpe ankwentén ahób ngáne Dyöb dénhōbpē. Anhób á tâl e ékwéé aá,

“Bad ábe béehede'aá me bényíné me.

Menlúméd yāl wéé bad ábe béesēdte'aá me.”

21 Bonj Yesayaa anhób t̄ŋgene bad bé Israel aá Dyöb áhóbé aá, “Bootyaa mbwembwε káəŋ ne ngukél, nlyágé mekáá méé ábēm bad bétim ámbíd áwēm, bonj béwúú nló áte, béewógné-'áá me.”

11

Dyöb déebáa'é ábē bad bé Israel á yäl ne abánj ásyāäl

¹ Bɔɔb-pɔɔ, ndəá asɛded nén mɛéken, Dyöb ábáá ábē bad áyāl-ε? Eesaá nê. Mmñn ndii mod a Israel awě abídé á mbyaa níme Abrahamε, á túmbé e Benjamin.

² Dyöb déebáa'é ábē bad áyāl. Bédii bad ábe ápwédé se á mbooted. Nyébíi chöm éche éténlédé á kálag e Dyöb ngáne Elaijaa ácháá'áá Dyöb, álāngē mó mekan níme bad bé Israel bébélé'áá.

³ Anláá Dyöb áá, “A-Sánj, ábén bad béwúú ábonj bekal bé'dəádəj bésyāäl, bépántéd-te nímōj menyán mé mendε. Mmēmpɛn-εé nlyágé, béhɛde-ε mēmpē awúu.”

⁴ Chán Dyöb dēnkwenténné mó? Ankwentén mó áá, “Mbänné bad ekálé saámbé ábē ábēm bad. Bédii bad ábe béebagé Baalε, dyöb dé metóm, edúbé.”

⁵ Nê dɔɔ édíí kááj ne bɔɔb. Nguse é bad bé Israel édíí édé ábe Dyöb ápwédé ne nímē nsimé.

⁶ Apwɛd áde ápwédé bó ádii áyāle nímē nsimé saké áyāle mekan níme bébélé. Nzé émbē nén bán dyam áde bad bébélé dɔɔ ákəə bonj Dyöb ápwɛd bó, nédē né saké nsimé mɔɔ ápwédné bó.

⁷ Cheé-ɔ nén álúmtéé? Bad bé Israel bēnkēnkudté chöm éche békóó ahɛd. Bad ábe Dyöb ápwédé bēnkūd chöm éche béhédé'áá, bonj ábíníí, nlém mēnlēl bó á abum.

⁸ Eténlédé á kálag e Dyöb nén bán
“Dyöb dēmbɛl bó edimdim.
Káájne e'chii, béēnyīnnēē, béewógné-'áá.”

⁹ Dabidε mómpe anhób áá,

“Nkánne' nén mɛé ébel bwēm ábe é'wógte bó menyinje, bóbó é'bē bó nɛe melám.

Nkánne nén mɛé, békwe, Dyöb ákógsɛn-ne bó, áyāle mekan níme bébɛléé.

¹⁰ Nkánne nén mɛé Dyöb ákwid bó ndím ábel bonj béehelé anyīnen.

Nkánne nén mɛé ápēmte-d-te bó nted níme rídélé níme ményag bó mbíd pónde ésyāäl.”

¹¹ Né-ɔɔ, nsɛdte nén mɛé ken áde bad bé Israel bēnkɔdté ekuu bonj békwe, bēnkwe ne akwe ásyāäl-ε? Aáy éesaá nê. Abel áde bēmbɛnlé mbéb dēmbēl Dyöb dēmbē bad ábe béesě bad bé Israel etál ákud e'sóosoj, ábel bonj bad bé Israel bébē kónjí.

¹² Akwe áde bad bé Israel bēnkweé, ápíínédé bad bé nkōjsé ábíníí bésyāäl nsimé híin. Abé-ε áde bad bé Israel bēmbēē atóg áyāl e mekan mé edáádəj dēmpiinéd bad ábe béesě bad bé Israel nsimé ní Dyöb. Nzé Dyöb áhɛle ápē bad ábe béesě bad bé Israel anamed nê, áde bad bé Israel bébélé mbéb, né chán-nō nnam mɛpéé abé níme ábēé áde bad bé Israel bésyāäl békudté e'sóosoj.

Bad ábe béesě bad bé Israel béebāg kúmbé áyāle békúdé e'sóosoj

¹³ Chöm éche ríhɛdéé ahób nén bɔɔb, nyé bad ábe nyéesě bad bé Israel, nyéē rílángeé. Ndii mbapɛe a nlómag a bad ábe béesě bad bé Israel, né-ɔɔ mbage' nímēm nsón edúbé ésyāäl.

¹⁴ Kapóg nhélé mbēl bānned bé Israel bébē kónjí bó donje á bad bómpe békud e'sóosoj.

¹⁵ Abánj áde Dyöb dēmbāngē bad bé Israel á yäl dēmbēl Dyöb dēntīm ásē ne bad bé nkōjsé bésyāäl. Bɔɔb-pɔɔ, chán-nō ébēē áde Dyöb dékobpé bad bé Israel ámbíd ámpē nɛe ábē bad? Ebē byánán bad ábe bɛwédé bépúúdé ámbíd.

¹⁶ Nzé bébágé Dyöb eped é ewele é'sō nées mende, nê alúmte bán échê ewele ésyāāl édii échē. Nzé bébágé-'ε Dyöb nkanj mí bwel, né ngen chómpē edii échē.

¹⁷ Bépagké donje á ngen á bwel é menzab ábe béwéné, bébādtē á ngen é bwel é menzab ábe é'kwoge' á ahín-tê. Nyé bad ábe nyéēsě bad bé Israel nyédii nêngáne échê ngen é bwel bé ahín éche chómpē ekude mendíb míme mébidé á nkanj mí bwel é' bwām.

¹⁸ Ngáne édii-'aá nê, nyéetângenéé nées nyédíi kúmbe se nyénǎné échíníi ngen éche bésélé, nkóntéd. Nzé nyédé kúmbe nyééchatán nén bán saké nyé nyéchánjé nkanj bonj nkanj mós ríchánjé nyé.

¹⁹ Nyéhele nyékume' ekáá á tâl bán béhúdé échê ngen ábel bonj bébāde nyé áhed.

²⁰ Nê adé mbále. Béhúdé bó áhed áyāle bénkëndúbéé, nyé-'ε bétímté nyé áhed áyāle nyédúbpé. Bonj nyéebág kúmbe. Bonj pen nyébê mbwóg.

²¹ Nées Dyöb dénkémbánjé bad bé Israel akógsen, bó ábe bédé nêngáne ngen éche énsébe abé, nyêwêmtan bán ábān nyé akógsen-ne?

²² Nyényíne nén bán, ped póg Dyöb ábóó nlém, ped eníníi-'ε alélé áte. Alélé áte wée bad ábe bépáné nzii bonj abóñné nyé nlém nzé nyédé nyéhíde' eche nzii. Bonj nzé nyéehídé chó, né áhūd nyémpē.

²³ Nzé bad bé Israel ámpē bétédte ábab e'wúu bé nló áte bonj bétímné Dyöb, Dyöb détdé bó ámbíd ámpē. Awóó ngíne ábel nê.

²⁴ Nyé bad ábe béesě bad bé Israel, nyé ábe nyédé nêngáne ngen e bwel bé ahín-tê, nées Dyöb áhélé nyé ahúd á bwel bé ahín-tê, abádé nyé á bwel ábe béwéné, nyêwêmtan bán ééhēlē-se atéd bad bé Israel átímed bó ámbíd áhed ámpē-ye? Bad bé Israel bóo bédé nêngáne ngen e bwel echē énsébe abé áyāl e ábê bwel.

Dyöb áwóge' moosyaál ngal

²⁵ A-baányan, nhede méé nyésóñten dyan áde káñne bōob modmod éēsóñtēnēē, ábel bonj nyéewémtán bán nyétómténé debyéé awón. Nhede méé nyésóñten bán e'lel bé nlém á abum ábe donje á bad bé Israel éébē káñ né bad ábe béesě bad bé Israel ábe bédúbē bésyāāl, bédúbpé.

²⁶ Nén débēnléd ábel bonj bad bé Israel bésyāāl békud e'soóson. Eténlédé á kálag e Dyöb nén bán,

“Nsoodé ábíd a Zayón.

Abōdēd abé dé mbéb áde mbyaa míme Jakōbe úwóó.

²⁷ A pónde échē mébōdēdtē mímab mbéb dōo mépéé á nchemten ne bó.”

²⁸ Bad bé Israel bédé bad bé ekoyí bé Dyöb bōob áyāle bédúbpéé nkalanj mí bwām, nén ábēnlédé ábel bonj nyé bad ábe nyéēsě bad bé Israel nyékud e'soóson. Kénéé édii nê Dyöb ápwédé bad bé Israel, adii adāá-'ε bó áyāle melē míme ámmwēē ne ábāb betaa.

²⁹ Nén adé áyāle nzé Dyöb ápwédé mod bonj anāmté mós, né apwēdé, anāmté-'ε mós.

³⁰ Bōod, nyéē nyénwúén Dyöb nló áte, bonj bōob awúen áde bad bé Israel béwúéné Dyöb nló áte, ábélé Dyöb áwógé nyé ngal, awóñgēn-ne nyé áwógen mós.

³¹ Né-ōó bōob, bad bé Israel híin béwúéné Dyöb nló áte. Dyöb déwōg bó ngal, awóñgēn-ne bó áwógen mómpē. Abel nê ábel bonj áwóg bómpē ngal melemlem ngáne ánwōgkē nyé bad ábe béesě bad bé Israel.

³² Dyöb ábélé e'wúu bé nló áte é' bad é'dé nées é'hédé bó á mbwōg ábel bonj áwóg bó baásyāāl ngal.

Bad béé Dyöb mekenag

³³ Nyénəne' ngáne Dyöb ápedé nhən abé! Nyénəne' ngáne abíí mam mésyāā, awón-’ε debyéé áde áchábé ámin. Modmod ééhēlēē-se asóntén ngáne Dyöb ábeleé mam. Modmod ééhēlēē-se asóntén-ne nyaa eche Dyöb ábeleé mam.

³⁴ Eténlédé á kálag e Dyöb nén bán
“Nzé-módé ahεle se abíí mewēmtən mé Dyöb.
Nzé-módé ahεle aléb Dyöb.

³⁵ Nzé-módé akébě Dyöb chǝm
ábel bon Dyöb ásábe mó ámbíd.”

³⁶ Dyöb dǝw áhágé bwēm ésyāā. Mó akəá bon ábē bwēm é’syāā é’bé. Mó-’aá awóó ábē bwēm é’syāā. Ehúmé ébē ne Dyöb á ngíndé ne á ngíndé. Ebē nē.

12

Nyaa echē éhɛdnadté bán alɔngé á bad bé Krísto ábē

¹ Né-ǝw, a-baányan, ngáne Dyöb áwógé syánē ngəl bwāmbwam, ncháa’ nyé méé nyébē née mende míme médé á alɔngé. Mmē mende mésān, mékobned-te ne Dyöb. Nén dǝw áde nyaa echē éhɛdnadté bán nyébage Dyöb edúbé.

² Nyéehídé’ mbɛltéd mí bad bé nkǝnsé. Bon nyémwε Dyöb áhəŋlən nyé nlém á abum, ábel nén nyéwǝn abé dékǝlē. Nē déběł nyéēsǝntən nyéhídē-’ε mam ngáne Dyöb áhedeé. Nyéēbī mbon, nyébíí mam míme méwǝgte Dyöb menyinje, nyébíí-’ε mam míme métəŋgéné.

³ Ne nsimé míme Dyöb ábágé mε, nlānge nyé nén méé, nyé modmod eenyíné yǎł aá mótǝmtənē abé tǝmaa ngáne módíí. Bon mod-té ányín yǎł ngáne ákǝw abé. Mod-té ányín yǎł nchoo ne ndε echē Dyöb ábágé mó née mod awě adúbpé.

⁴ Yǎł e moonyon edíí pǝg, ewóó pǝg ne pǝg, pǝg téé-’ε ewóó míme nsǝn.

⁵ Melemlem nē dǝw edíí ne syāā bad bé Krísto. Debuú áte bon dedíí yǎł pǝg ne Krístə, syāā modmod eesaá ne mó mwən.

⁶ Dyöb ábénlé míme nsimé ábε syánē mod té echē ndε, ékábné-’ε áte. Nzé Dyöb ábágé mod ndε áhǝb mekan á dīn á Dyöb, ane mod áhǝbē’ míme mekan nchoo ne adúbe áde awóó.

⁷ Nzé mod awóó ndε ábele bad, ábenle bó. Mod awe mó-’ε awóó ndε áyǝged, áyǝgte bad.

⁸ Mod awě awóó ndε áwéd bad nlém á abum, áwéde bó nlém á abum. Mod awě awóó ndε ábíded chǝm á ekáá áwǝngən bad, áwǝngan bad, eénǝnē ámbíd. Awě awóó ndε ályǝged bad, ályǝgte bad nyaa echē etəŋgéné. Mod awě mó-’ε awóó ndε áwǝg bad ngəl, áwǝge bad ngəl ne menyinje.

⁹ Mod téé ákǝn bad adəŋ. Mod téé ákǝw ebébtéd. Mod téé ásum mekuu ábel dyan á bwām.

¹⁰ Mod téé ádəŋ mwǎnyan ne nlém rísyāā. Mod téé ábage waáb edúbé tǝmaa ngáne ábageé eche yǎł.

¹¹ Mod échéde yǎł ábel nsǝn. Mod téé áwéd mekáá áte, ábenle-’ε Sǝngwéé ne nlém rísyāā.

¹² E’lyǝg bé nlém ábe mod téé awóó ábēn bó menyinje. Mod téé áched yǎł á metake-tē. Mod téé áwεsən-ne á mekáne-tē.

¹³ Afínté e nyé bad bé Krísto, nzé nyé mod nhǝg atógé chǝm, waáb awě awóó chí awǝngén mó. Kénzée awě apedé áwən, nyékǝb mó nken bwām.

¹⁴ Nyékānne nén bán Dyöb ánamed bad ábe béhéde nyé á meséb. Nyéekānné nén bán békud ebómán, nyékānne dásǝ bán Dyöb ánamed bó.

¹⁵ Nyéwǝg menyinje ne bad ábe béwógé menyinje, nyéleb-pε ne bad ábe bélebe’.

¹⁶ Nyébé nsəl nhóg ne nhóg ne aníníí. Nyéenyēnē dúu ámīn. Nyébé ehoŋ ne bad ábe béesě dyamdyam. Mod eewémtán aá mótōmtēnē debyéé awóŋ.

¹⁷ Nzé mod abelé wε mbéb weétimtán mó mbéb. Boŋ pen etáŋgéné éwēmtán ábel mboŋ á'sō é' bad bésyāāl.

¹⁸ Mod téé áhed nzii ábé nsaŋ ne moosyāál.

¹⁹ A-baányan, nzé mod abelé nyé dyam dé mbéb, nyé bēn nyéētimtán mó. Nyétéde Dyōb dēn ákógsen mó. Nhóbe nēn áyāle, éténlédé á kálag e Dyōb nēn bán, Dyōb áhōbē aá, “Me-εε ntimtan mbéb ké ríhée nímě mod ábelé. Me Sáŋgwéé me-εε nhóbe'.”

²⁰ Eténlédé á kálag e Dyōb hōm démpēe pen bán, “Nzé nzaa ewag ábōŋ bad bé ekayí, ehé bó ndyééd, nzé píd ekóbé bó, ébe bó chōm éche bémwákē. Nzé ebelé nē, ekwágte bó, béhedé-ε nzii eche béhəŋlanné.”

²¹ Mod eémwāg-se mbéb ríkamlán mó. Boŋ nímēn mboŋ rítōm mbéb áte.

13

Nyébage benkamlεε edúbé

¹ Mod téé áwógne benkamlεε ábe békamlan mó. Ayāle nkamlεε ké nhóg méesaá níme Dyōb déetiídεé. Dyōb dó-'aá ábánné benkamlεε bésyāāl á atii.

² Né-ᵛó, kénzée awě eewógné' mod awě akamlan mó, né eewógnée ntii rí Dyōb. Bad ábe bébele nē, béhedte yāl nkógsen.

³ Bad ábe bébele bwām, béewōgēē benkamlεε mbwóg. Boŋ bad ábe bébele ebébtéd bōó béwóge benkamlεε mbwóg. Nzé weéhēdē wεé móbāŋ nkamlεε, ébelé mekan mé bwām. Nzé ebelé nē, né ákēmtē wε.

⁴ Nkamlεε adii mbaledε a Dyōb awě Dyōb ábánné áwōŋgen wε. Boŋ nzé ebele mekan mé mbéb étáŋgéné mó abāŋ, áyāle ngine echě áwóó ákógsen bad eesaá ngēn. Adii mbaledε a Dyōb awě Dyōb ábánné ákógsen bad ábe bébele mekan mé mbéb.

⁵ Né-ᵛó, mod atáŋgéné benkamlεε awógen, saké áyāle ábáa'ε nkógsen dēmpen, boŋ káəŋne áyāle ábíí nēn aá níme nlém ríláŋgé mó aá mótəŋgēnē abel nē.

⁶ Né-'aá, nyétáŋgéné tááse ámpē asaa, áyāle Dyōb dóó bad ábe bésaŋte tááse bébenléé.

⁷ Nyésábpe mod téé chōm éche nyétáŋgéné mó asábe. Ken tááse-yε, ké'ε mōné ké ríhée níme béláŋgé nyé bán nyésábe áyāle bwēm ábe nyéwóó. Nyébáa bad ábe nyétáŋgéné abāŋ, nyébage-ε bad edúbé ábe nyétáŋgéné edúbé abε.

Nyédaŋ nhóg ne aníníí

⁸ Mod eewánlé modmod alúm. Alúm áde nyé mod téé átáŋgéné awále adii ádaŋ nhóg ne aníníí. Kénzée awě adaá waáb, né alónte mbéndé esyāál.

⁹ Mbéndé édé nēn bán, “Mod eekábé asón á ndáb e e'wóngé. Mod eewúé mod, mod eechíbé. Mod eesíídé chōm é mod.” Echén mbéndé ne échíníí ésyāāl chōó éládné boŋ ébé mbéndé póg. Ene mbéndé edii nēn bán, “Dəŋ mwānyoŋ ngáne édáá ehoŋ yəl.”

¹⁰ Nzé mod adaá mwānyan eébēlēē mó mbéb. Né-ᵛó, edəŋge élōnte mbéndé ésyāāl.

¹¹ Ngáne nyébíí-ε nēn bán pōndé emaá ape echě nyétáŋgéné akábned, nyétáŋgéné akábned, áyāle pōndé e e'sooson eche syánē edé benben tómaa ngáne énsēbēē abé áde dédúbpé Krīstəə dúbpén.

¹² Ehíntén émaá ape, bīn é'kwógé asáa. Né-ᵛó, détdεe mbéltéd mé mbéb níme débélé'áá. Déwáa bwēm é' nzum áwan nzum e e'nyínen bé ekíde.

¹³ Déwále abé á bwâm née bad ábe bédé á e'nyínen bé ekíde. Nyéékāg á ngande éche bad bémwākē mím bonj mékōbē bó, nyéekábé mesón. Nyéēbēlē- 'ε e'tonjé é' mekan. Nyéēsēnlé', nyéebāg-ke kónjǐ.

¹⁴ Bonj nyéwōn abé áde Sāngú Yesu Krístəə. Nyéēbāgē mekan mé esíí mé ekob é yǎl etál, nyéēbēlē ngáne échēn ekob é yǎl éche ébēlte nyé mbéb éhēdēé aá nyébel.

14

Mod eekáadté waáb

¹ Nyékobe bad ábe ádab adúbe déewúú' é áte. Nyéēpētān-ne tǎngene mam míme bēwém-téné nén bán bétǎngéné abel, ké'ε béetǎngeneé abel.

² Adúbe áde donje á bad ábágé bó etál ádyé kéchéé bonj bad ábe adúbe déewúú' é áte, béedyākē donje á bwēm.

³ Bad ábe bedyāg kéchéé béenyīnē bad ábe béedyāg donje á bwēm nkóntéd. Bad ábe bó-'ε béedyāg donje á bwēm béekāadtē bad ábe bedyāg kéchéé áyāle bó moosyāál békóbnédé ne Dyōb.

⁴ Nzé-módé édíí ákáad mbəlede a mod ampée? Eche Sān chēn chōo etǎngéné ahób aá dyaam áde ábélé áde bwām ké'ε déesaá bwām. Bonj Sāngwéé eche ngine ēwōngēn ane mbəlede ábel dyaam á bwām.

⁵ Bad behóg bétédé donje dé e'pun bán áde etógnén tómaa ábíníí e'pun. Bad behóg-ke bétédé nén bán e'pun é'syāál é'díi nyaa póg. Mod-té átéd nén aá kéchéé éche mówém-téné, etǎngéné ne mó.

⁶ Bad ábe bétédé bán epun ehóg édé etógnén tómaa ábíníí e'pun, bébele nē ábe Sāngwéé edúbé. Bad ábe bó-'ε ámpē bedyāg kéchéé, bómpē bébele nē ábe Sāngwéé edúbé áyāle béságnan Dyōb áyāl e ene ndyééd. Bad ábe bó-'ε béedyāg donje á bwēm, bómpē bébele nē ábe Sāngwéé edúbé, béságnan-ne Dyōb.

⁷ Syánē modmod eesaá á alongé ne mó mwēn, modmod eewág-kaá ne mó mwēn.

⁸ Nzé dedé á alongé, né dedé á alongé ábel ngáne Sāngwéé áhēdēé. Nzé dewédé-'ε né dewédé áwóged Sāngwéé menyīnge. Né-ǎó, ken dedé á alongé, ké'ε dewédé, á mekáá míme Sāngwéé dōo dedíí.

⁹ Nzəm echē ekəá bonj Krístəə awé, ápuū-'ε, abé á alongé, edíí ábel bonj ábē Sāngwéé awé bad ábe bēwédé ne ábe bédé á alongé.

¹⁰ Cheé-ǎó ékáá bonj ékáadtē mwǎnyonj? Ké'ε, cheé ékáá bonj ényīnē' mwǎnyonj nkóntéd? Ebíi nén wéé syánē moosyāál deétyēēm á nkáásé á'sō é' Dyōb.

¹¹ Eténlédé á kálag e Dyōb bán,
 “Dyōb áhóbé aá, ngáne nídíí á alongé,
 moosyāál atǎngéné me mebóbónj abwóge,
 moosyāál ákēnē-'ε me aá me-εé ndé Dyōb.”

¹² Né-ǎó, syánē mod téé deétyēēm á'sō é' Dyōb, áláa mó chōm té eche débélé.

Mod eébelté mwǎnyonj mbéb

¹³ Né-ǎó, syánē modmod eekáadté waáb, bonj pen mod téé ámad áwē nlém-té aá móǎtǎngeneé dyaam abel mbéd áde débēl bonj mwǎnyonj ákōd ekuu káa ahún á mbéb-te.

¹⁴ Abé áde nídíí mod nhóg ne Sāngú Yesuε, ábélé nkoó abii nén meé ndyééd ké póg eesaá echē eesaá á'sō é' Dyōb. Bonj nzé mod adúbpé aá ndyééd edé echē eesaá á'sō é' Dyōb, eedyág chō.

¹⁵ Nzé edyāg chōm ké éhéé bonj nē ábele' mwǎnyonj aníníí ebébtéd, né weewánlenεé mwǎnyonj edǎnge. Weémwāg-se chōm éche édyāgkē ébébéd alongé áde mod awé Krístəə áwédé áwé nló.

¹⁶ Weémwāg-se kunze eche éwóó nées mod awe adúbe áwúú áte, ébēl mod ábel mbéb, ábel bon bad béhōbē' we mekan mé mbéb áyāl.

¹⁷ Saké adyé á ndyééd ne amwé á mīm dōó adé etógnén á nkamlēn ní Dyōb. Mekan míme médé etógnén médíi áwōŋ abé áde átāngéné á'sō é' Dyōb, ábé nsaŋ ne ábé menyiŋge míme níhúú ne Edāódaŋ éche Esáá.

¹⁸ Kénzée awē abenle Krīstā nē, akobnad á'sō é' Dyōb, bad ámpē bébelé béhōb bán abele dyam á bwām.

¹⁹ Né-óó syánē déwéd yāl áte débēle mekan míme mépēene nsaŋ, ne míme méwōŋgan syánē áwéd nhóg ne aníní áte.

²⁰ Ehób é ndyééd éebelé-se nyēbébed nsón míme Dyōb ábélé. Ndyééd ésyāāl ésáá á'sō é' Dyōb. Bon édé awusé ádyé kéchéé eche ébēl bon mod ampēé ákwē.

²¹ Ebóó mod eébēlē' chōm éche éhele-se ébēl bon mwānyan ákōd ekuu. Ken ádyé nyam-ε, ké'ε ámwé mīm, ké'ε ádyé kéchéé émpēe.

²² Kéchéé éche édúbpé tāŋgene nímén mekan, édíi áfintē e nyé Dyōb. Nnam ne mod awē abíi áá móóbeléé dyam áde áde mbéb tāŋgene dyam áde ámáá alúmed áá ábóó.

²³ Bon kénzée awē nlém níkōgladté á abum nén áá móótāŋgenéé nyaa e ndyééd póg adyé bon átim chó adyé, né Dyōb déhōb áá abelé mbéb áyāle eébenledéé áde adúbe ábel chōm éche átāngéné abel. Nzé mod abelé dyam áde nlém níkōgladté mó á abum áá átāngéné káa déetāŋgenéé, né abelé mbéb.

15

Awoged bad menyiŋge, saké échēd yāl

¹ Syánē awe adúbe áwúú áte, detāngéné nées déwōŋgéné bad ábe adúbe déewúú'é áte. Deébēlē mekan dásō nyaa echē ebōŋnéde syánē bēn.

² Syánē mod téé atāngéné nées ábeléé mam nyaa echē ewógte mwānyan menyiŋge, áwéd mó adúbe áte.

³ Ké Krīstā mwēn eébele'áá mam dásō nyaa echē ewógte' mwēn menyiŋge. Bon abelé'áá ngáne éténlédé á kálag e Dyōb nén bán "Nzyāŋ ésyāāl éche bad bésyáá'áá we, étímnédé mε."

⁴ Mam mésyāāl míme bēntenlé á kálag e Dyōb se' bōód, bēntel mó áyáged syánē. Nē démbē ábel déwōŋ e'lyág bé nlém ábe é'húú ne eyale é Dyōb éche ébele bon déwesán, éwēdē-ε syánē nlém á abum.

⁵ Nkānne nén mēé Dyōb áde ábele bon déwesán, áde áwēde-ε syánē nlém á abum, ábel nyébē á nchemtēn ne nhóg ne aníní ngáne nyéhídeé Yesu Krīstā,

⁶ ábel bon nlatén míme nyédíi mbél nyébē nsəl nhóg áken Dyōb, Sáá awē awed Sāngú Yesu Krīstā.

Nyékob nhóg ne aníní

⁷ Né-óó nyékob nhóg ne aníní melemlēn ngáne Krīstā ákóbé nyé ábel bon bad békene Dyōb.

⁸ Nlāŋge nyé nén mēé Krīstā atimé mbāledε a bad bé Israel, ábel bon álóned akag áde Dyōb démbēé betaa. Nē dénlūmēd-ε nén bán Dyōb ákale mbāle.

⁹ Ampē-ε ábel bon bad ábe béesē bad bé Israel, béε Dyōb mekenag áyāle ngəl eche awóge bó. Né-'áá éténlédé á kálag e Dyōb nén bán, "Né-óó mēkēn we áfintē e bad ábe béesē bad bé Israel, mēkōn-ne nkāŋgé áken ádoŋ dīn."

¹⁰ Eténlédé ámpē nén bán,

"Nyé bad ábe nyéēsē bad bé Israel, nyéwógen bad bé Dyōb menyiŋge."

¹¹ Eténlédé-ε ámpē bán,

"Nyé bad ábe nyéēsē bad bé Israel, nyékene' Dyōb,

bad bé nkõṅsé bésyāāl-le békene mó.”

¹² Nkal é'dæádæṅ Yesayaa mómpē ahóbé ngáne éténlédé bán,

“Mod äbíð á nchyaátén míme Jesε

awē äpē ákamlen bad ábe béesē bad bé Israel.

Awē-'aá bad ábe béesē bad bé Israel bésummé nlém.”

¹³ Nkánne nén mεé, Dyõb áde ábage' e'lyóg bé nlém ábel nyélõn ne menyinḡe mésyāāl nyébé-'ε nsaṅ áyāle adúbe áde nyédúbpé. Nê débēl ngíne e Edæádæṅ éche Esáá ébēl áden adúbe dékwogé' akwog ne akwog.

Nzom echē ekáá boṅ Paale átelé' enén kálag

¹⁴ A-baányan, mmēn mbíí bwám nén mεé nyé bēn nyēwóó nlém mí bwám ábel mam míme Dyõb áhedεé aá nyébel, nyēsõṅténé-'ε mam bwám, nyékwognéd-te áyáged nhóg ne aníníí.

¹⁵ Boṅ kénê, donḡe á mekan áde áde ríténlé nyé á kálag-tê wén. Ntelé mó, ákamten nyé mímén mekan mésyāāl ésebán mbáa' dyamdyam. Nsimé míme Dyõb ábágé me móó mbéle boṅ rítelé mímén mekan.

¹⁶ Dyõb ábágé me míme nsimé ábe mbæledε awe Yesu Krístæ, ákale bad ábe béesē bad bé Israel nkalaṅ mí bwám. Mbele mímén nsón néε prisε ákal nkalaṅ mí bwám míme ríhúú ne Dyõb, ábel nén bad ábe béesē bad bé Israel bébê mendε míme mbágé boṅ mékobnéd á'sõ é' Dyõb. Dyõb dékob bó áyāle Edæádæṅ éche Esáá ébéle básáá á'sõ é' Dyõb.

¹⁷ Né-õó, ngáne rídíí ne Yesu Krístæ, nwóó nzom ákum ekáá á tâl áyāle nsón míme mbenléé Dyõb.

¹⁸ Mééhēlēε-se nhób dyamdyam démpēe éetóméé áhób tâṅḡene nsón míme Krístæ ábéle boṅ ríhel ábel, ábel bad ábe béesē bad bé Israel bébele ngáne Dyõb áhedεé aá bébel. Mekan míme ríhóbé ne míme mbéle móó méde mekan míme bétāṅḡéné ahób míme bétāṅḡéné-'ε ábel.

¹⁹ Membēl míme mam á ngíne e e'chemléd ne menyáké, ne á ngíne e Edæádæṅ é Dyõb. Nén dēmbēl menkál Nkalaṅ mí Bwám míme Krístæ bwám ngáne ríkágé'aá bootya á Jerusalem ápe á mbwóg e Ilirikum.

²⁰ Nkénwõṅ nlém ákal Nkalaṅ mí Bwám mebwóg míme modmod éépēdēε mbéd átúb dīn áde Krístæ. Membel nê ábel boṅ meékāḡ wée mod ampée ámaa nsón abooted.

²¹ Nén áde ngáne éténlédé á kálag e Dyõb nén bán,

“Bad ábe béewógé néε béhóbé áyāl echē, bényin, ábe bó-'ε béewogē áyāl echē mbéd, bēsõṅtēn.”

Paale ábelé ntii áke á dyad á Roma

²² Mmēn meke míme ríkágé'aá móó mékáá boṅ meéhēlē ape áwēn.

²³ Boṅ bõb, ngáne mímadé nsón échén ped é mbwóg, nwóó nlém áte bwámbwam ápe áwēn, ngáne ríkénwõṅḡé mwē ne mwē.

²⁴ Mēbwē áwēn nzé nkag á aloṅ á Spen. Nwóó mewēmtēn mεé mēnyin nyé nzé nkag, mεé nyéwõṅḡēn-ne me áke áwed. Boṅ pen, mēdyéé ne nyé mwāmpin, dehóded nhóg ne aníníí nlém, boṅ ríkag.

²⁵ Boṅ bõb, ndé á nzii áke á Jerusalem áke déwõṅḡen bad bé Dyõb ábe bédé áwed.

²⁶ Bad bé Krísto ábe bédé á mbwóg e Masedonia ne á mbwóg e Akaya bényiné nén bán ébõṅ bán bēlad mōné bēlõme betóótõkē bé bad ábe bédé átintē e bad bé Dyõb ábe bédé á Jerusalem.

²⁷ Bényiné nén bán ébóó bébel nê, bán bétāṅḡéné bó áwõṅḡen. Ngáne édíí bán nnam míme Dyõb ábágé bad bé Israel, bébenlad mó ne bad ábe béesē bad bé Israel, ébóó bán bad ábe béesē bad bé Israel bómpē béwõṅḡen bad bé Israel bwēm nēṅḡáne medyé, mōné ne mbóté.

²⁸ Nzé nímádé nímén nsón á Jerusalem, áde nímáá bó mənə abe nime beládté bó, məhidé áke á alon á Spen. Ene pónde dó-'aá métyēmmē anyín nyé.

²⁹ Mbíí-'ε μεέ nzé mpedé, échēm επε έβελ nyééküd nnam nime Krístəə nime nloné mbon.

³⁰ A-banned, á dīn áde Sánjú Yesu Krístəə, ne áyāle edənge éche éhuú ne échē Edəádəη, ncháa nyé nén μεέ syánē délad mekáá déwéd με akānned nén bán Dyöb áwōηgen με.

³¹ Nyékānne nén bán Dyöb ánən με ábel nén bad ábe béédúbpe Krístəə béebelé με dyam dé mbéb ké ahóg nzé ndé á Judeya. Nyékānne-'ε nén bán mənə nime mékiinédte betóótōkē bé bad áfinté e bad bé Dyöb á Jerusalem, békob mó.

³² Ambíd enē dáo mépéé áwēn ne menyīnge, nzé Dyöb áhede aá ébē áned, ábel bon nókóme áte nzé ndé ne nyé.

³³ Dyöb dé nsaη ábē ne nyé moosyáál. Ebē nē.

16

Paale alómmé baáb melentən

¹ Ndəə μεέ nyébíi bán awe syánē mwānyan a mmwaád Fibii, awē awōηgan ábel nsón á mwembé nime ndé á dyad á Senkria, abele nsón ní bwām.

² Nzé apedé áwēn nyékob mó nken á dīn á Sánjú ngāne bad bé Dyöb bétāngéné abel. Nyébe-'ε mó nwōηgen ké nheé nime áhédné nyé. Nyébíi bán mómpē akéwōηgen ekud é bad, awōηgen-ne με ámpē.

³ Nyélentēd με Priskaa bó nchóm Akwilaa ábe syáábō sēbelé' nsón nime Yesu Krístəə.

⁴ Bēnkwentén awé á nló nímēm. Nságnan bó. Saá-kaá mwēmpen nságnan bó, bon káāηne mwembé nímé bad ábe béesē bad bé Israel rísyāāl, bómpe béságnan bó.

⁵ Nyélentēd με káāηne bad bé mwembé nime níbome' áwab ndáb.

Nyélentēd με awem nsón-a-nlém, Epanetuse, adii mod awē abédé mod a'só ádube Krístəə á mbwóg e Esia.

⁶ Nyélentēd με Maria, akébel nsón bwāmbwam áfinté echēn.

⁷ Nyélentēd με káāηne Andronikuse bó Junia, ábe syáábō sēdé bad bé Israel, bēmbē-'ε á mbwog ne με. Bébyééné bwām áfinté e bembapee bé nlomag, bēndūbē-'ε Krístəə bon médūbē.

⁸ Nyélentēd με Amplatuse, adii mod awē adé awem nsón-a-nlém awē rídáá á dīn á Sánjú.

⁹ Nyélentēd με káāηne Ubanuse awē syáábō sēbenle' Krístəə nsón. Nyélentēd με káāηne Stakise, awem nsón-a-nlém.

¹⁰ Nyélentēd με Apeluse, awē nímē mbeltéd ní bwām ninyínnédé nén bán nókóbnédé ne Krístəə. Nyélentēd με káāηne bad bé abum á ndáb áde Aristobuluse.

¹¹ Nyélentēd με Herodyone, awē adé awem mwānyan a Israel. Bad ábe bédé abum á ndáb áde Nasisuse ábe bédúbpé Krístəə, nyélentēd με bó á dīn á Sánjú.

¹² Nyélentēd με Trifane bó Trifosa, bebaád ábe bēbenle' Sánjwéé nsón. Nyélentēd με Pesisē awem nsón-a-nlém, awē akébel nsón bwāmbwam á dīn áde Sánjwéé.

¹³ Nyélentēd με Rufuse, awē Sánjwéé ápwédé ábele mó. Nyélentēd με káāηne nyaá, atédé με née awe mwān.

¹⁴ Nyélentēd με Asinkrituse, Flégone, Hemese, Patrobase, Hemase, banned bé Krístəə ábe bóbō bēbome'.

¹⁵ Nyé̄lented me Filologuse bó Julia. Nyé̄lented-te me bänned bé Krīsto bé baachóm, Olimpase bó Neriuse ne mwānyan a mmwaád ne bad bé Dyöb bésyā̄l ábe bédé ne bó.

¹⁶ Nyéhê nhóg ne aníní t̄al ne edənge é Krīstə. Mwembé nsyā̄l n̄lómme nyé melenten.

Nlyágtén mé asóg

¹⁷ A-baányan, ncháa nyé me-εé nyétêd pónde ne bad ábe béπεene' nkabén átintê echên, ábe bépante bad nzii. Béyágte nyé ayáge áde ápentan ayáge áde nyénsēbēē ayáge. Nyéehídé ábê bad.

¹⁸ Nyéehídé bó áyāle saké awed Sāngú Krīstə bébenléé bon pen mam míme mébōhnedé bēn m̄óó bébeléé. Bényinte' nsal áte, béhóbé-'ε mekan átéd bad ábe béēsōhtān bwām n̄lém á abum.

¹⁹ Bad bésyā̄l béwógé nyaa eche nyésúme mekuu áhíd nkalan mí bwām. Né-óó, mbééné nyé menyinge. Bon nhede n̄n meé nyébii ábel mekan mé bwām, nhédé-'ε n̄n meé nyéebíé' dyaandyam t̄henge abel dé mbéb.

²⁰ Dyöb dé nsan ákwógé Satanε ahinten áwēn ekuu-sé. Nsimé míme awed Sāngwéé, Yesu Krīstə m̄bê ne nyé.

²¹ Timotiε awé súmō sébele nsón, alómmé nyé melenten. Lusioσε, Jasene, ne Sosipataa, bänned bé Israel bómpē bélómmé nyé melenten.

²² Me, Tetiuse awē ntenle' Paale enén kálag, mémpē n̄lómme' nyé melenten née awen mwānyan a Krīsto.

²³ Gayoσε alómmé nyé melenten. Awe ndáb d̄óó sédíí, áhed-taá mwembé m̄boméé. Erastuse, nkoó-m̄oné a dyad, ne Kwatuse, awed mwānyan bómpē belénté nyé. *

Mekáne mé asóg

²⁵ Syánē débε Dyöb ehúme áyāle n̄n áwóó ngine áwéd nyé adúbe áte. Nê d̄ó-'aá ménlāā' é nyé áde r̄kánlé nyé Nkalan mí Bwām t̄henge Yesu Krīstə. Mmê nkalan r̄díi mbále echē Dyöb d̄enkoó' é se et̄un, ekēnlúmédte bad.

²⁶ Bon b̄oob alúmté syánē. Abídté m̄ó áwed b̄oob ne mekan míme bekal bé'dáádəh b̄entenlé á kálag e Dyöb. Abelé nê ábel bon bad bé melon m̄esyā̄l béwógne m̄ó. N̄n ábénlédé ngáne Dyöb dénhōbpē aá ébenléd. M̄ó adé á ngíndé ne á ngíndé.

²⁷ Dyöb d̄empen d̄óó áwóó debyéé ásyā̄l. Débe m̄ó mekenag áyāle ch̄om éche Yesu Krīstə ábélé, á ngíndé ne á ngíndé. Ebê nê. †

* **16:23** Donje á kálag dé'só ábádé nchoo 24: Nê, nsimé míme awed Sāngú Yesu Krīstə m̄bê ne nyé badsyā̄l. Ebê nê. Kálag émpēé ébádé n̄m̄én nchoo ámbíd e nchoo 27. † **16:27** Donje á kálag áwóó nchoo 25-27 hén ne ámbíd e nchoo 14.23; émpēé éwóó m̄ó ámbíd e n̄m̄én nchoo mwēmpen 14.23; donje áwóó m̄ó ámbíd e nchoo 15.33.

Kálag e'só echë Paalε áténlé Baá Kōrinto Ndibned n kálag

Kálag e'só eche Paalε átélé, bad bé Krīsto ábe bédé á mwembé n Kōrinto bōo ántelée chō. Paalε átélé enén kálag t̄ngene ndutul éche bad bé mwembé békúdáá á alongé ádab, békudé-'ε ndutul t̄ngene ádab adúbe. Póndé echë Paalε átélé enén kálag, dyad á Kōrinto dōo ábédé nló n dyad á mbwóg e Akaya á póndé e nkamlen e bad bé Roma. Adé dyad démbyēn bwāmbwam áyāl e mekan n̄ngáne nyongé echë etómnádtáá áwed, mekan mé mbwóg mīmāb bēmbēn mó kúmbe, abel dé mekan mé mbinde déntōm áte áwed, bēbēnlé'áá-'ε myōb hiin.

Mekan nīme Paalε ákóó awéd áte médii nkabén ne mbinde e mekan éche édé á mwembé-te. Ahóbe káōne t̄ngene nyaa echë bad bēnōné e'wóngé, nlém nīme bad bēt̄ngéné awōn átii ké dyam ábóó káa déeboó'ε, nyaa echë Edāád̄n éche Esáá ébageé bad nde ne t̄ngene mpuu. Akoó alúmed áte chōm éche nkalan n̄ bwām n̄hóbeé t̄ngene mīmén mekan.

A eped dyōm ne é'láán Paalε ahóbe t̄ngene ed̄nge. Echë eped chō-'áá bad bētómténé abii áf̄intē e enén kálag esyā́l.

Nkabté n kálag

Ndibned 1.1-9

Nkabén nīme n̄dé a mwembé-te 1.10-4.21

Mekan mé mbinde ne alongé á túmbé 5.1-7.40

Mbēltéd n̄ Bad bé Krīsto ne bad ábe bēedúbpe Krīstā 8.1-11.1

Alongé á mwembé ne abele á Dyōb 11.2-14.40

Mpuu nīme Krīstā ne n̄ bad bé Krīsto 15.1-58

Nde eche bēládté bad bé Krīsto bé Jerusalem 16.1-4

Mekan nīme ménōne bad bēn ne nsógt̄n 16.5-24

¹ Mε Paalε, awē Dyōb ápwédé ábē mbapεε a nlómag awē Yesu Krīstā ngáne Yesu Krīstā apwédé mε ábē awē mbapεε ngáne Dyōb dént̄f̄i'ε, mε ne Sōstene, awe syānē mwānyan, sēē sētēnlé nyé enén kálag.

² Mwembé n̄ bad bé Dyōb ábe bédé á dyad á Kōrinto, nyēē n̄tenlé enén kálag. Dyōb áchénlé nyé ábē ábē bad ábe bésáá. Asánté-'ε nyé abé áde nyédíi ne Yesu Krīstā. Melemlem n̄ dōo ápwédé bad bēmpēe ábe bédé hōm-téé, ábe bēbenlad d̄n áde awe syānē Sāngwéé, Yesu Krīstā. Adii awab Sāngwéé, abé-'ε awe syānē.

³ Nsimé ne nsan nīme n̄húú ne Dyōb, Titéε awéd ne nīme Sāngú Yesu Krīstā, mbē ne nyé.

Paalε aságnan Dyōb áyāl e mwembé n̄ Kōrinto

⁴ Nságnan Dyōb póndé téé áyāl echēn, áyāle nsimé nīme ábágé nyé mbwined ne Yesu Krīstā.

⁵ Abé áde nyédíi mod nhóg ne Yesu Krīstā ábélé Dyōb ábágé nyé chōm ésyā́l nyaa echë elóné mbon. Abelé nyékale nīmē nkalan nyaa eche ehednad, nyēsōnténé-'ε mam mésyā́l bwām t̄ngene nīmē mekan.

⁶ Nén álūmte bán nkalan t̄ngene Yesu Krīstā nīme sékánlé nyé níkóó nyé asól á nlém-tē.

⁷ Né-ōó, nyéetógéé nde ké póg ábele Dyōb, ngáne nyésinéé póndé eche Sāngú Yesu Krīstā álūmēdtē yāl.

⁸ Sàngú Yesu Krìstàa mwën-εέ àbël adúbe áwúú nyé áte káàhne á asóg dé nkòhse ábël nén á epun éche áπεε ákáad bad, bad béēhōbē bán dyam dé mbéb ké ahóg ádé áde nyébélé.

⁹ Dyōb ábele' ngáne áhóbé áá móōbël, mó apwεdé-'ε nyé ábé mod nhóg ne awe Mwān, Yesu Krìstàa.

*Paale áá nkabén méebāg
átíntē e bad bé Dyōb*

¹⁰ A-baányan, ncháa' nyé á ðín áde Sàngú Yesu Krìstàa nén meé, nyé moosyáál nyéπε á nchemtεn áyāl e kéchéé éche nyéhóbéé ábël bon nkabén méebāg átíntē echên. Bon pen nyébē mod nhóg á mewεmtεn ne áyāl e kéchéé éche nyéhóbé bán nyébele'.

¹¹ A-baányan, nhóbe nén áyāle bad ábe Kloo bélāngé με bán nyé bēn ne bēn nyēsεnle'.

¹² Chōm éche ríhóbéé édíi nén, átíntē echên, baahóg béhóbe' bán “Ndíi mod awē ahíde ayáge áde Paale”, donge bán, “Ndíi mod awē ahíde ayáge áde Apolose”, ábíníi bán, “Nhíde ayáge áde Petro”, bémpēe-'ε bán “Ndíi mod awē ahíde ayáge áde Krìstàa.”

¹³ Néde nyéhede ahób bán Krìstàa akābné áte-yε? Με Paale-εé bēmboméé á awog á nló mímēn'ε? Ké'ε á ðín ádēm, με Paale, dōo bēndusénné nyé?

¹⁴ Nságnan Dyōb nén meé menkēndusénné nyé modmod éetóméé Krispuse bó Gayos.

¹⁵ Né-ōó, nyé modmod nyéēhēlēε se nyéhób bán nyékudé edusen á ðín ádēm.

¹⁶ (Mendusén káàhne abum á ndáb áde Stefanuse. Méēkāmānnē pen με ndūséné mod ampée.)

¹⁷ Krìstàa enkēnlómmé με ádusen bad. Bon pen anlóm με ákal nkalan mí bwām, menkāl-ε mó ésebán mbēnlad e'yale ábe é'lúmte debyéé á moonyon. Nzé membēnléd e'yale ábe é'lúmte debyéé á moonyon né nkalan tñgene kwééd eche Yesue áwédé á awog, méebáá dyamdyam.

Paale áá Krìstàa adii ngine ne debyéé á Dyōb

¹⁸ Dyam áde ríhóbéé ádíi nén, nkalan tñgene kwééd eche Krìstàa áwédé á awog rídii chōm éche éde eyókél wεε bad ábe békē á ðū á muú. Bon ne syánē bad ábe békūd e'sooson, mímē nkalan rídii ngine e Dyōb.

¹⁹ Eténlédé á kálag e Dyōb nén bán Dyōb áhóbé áá, “Mēbel debyéé áde bad ábe bēwεmtan bán bēwóó debyéé ányínnēd nén déesaá dyamdyam, mélūmēd-τε nén meé bad ábe bēwεmtan bán bēbíi dyam, béebíi'ε dyamdyam.”

²⁰ Né-ōó, élúmté nén bán mod a debyéé eesaá dyamdyam, meléede a mbéndé a bad bé Israel eesaá dyamdyam. Bad ábe bēlāngé bad mekan ne debyéé enén pónde béesaá dyamdyam. Dyōb álúmté áá debyéé dé nkòhse ádíi eyókél ngên.

²¹ Ngáne édíi bán Dyōb ábēnlédé áde debyéé ábël bon bad bé nkòhse bébēnlád ádab debyéé ábíi mó, mó Dyōb amaá atíi áá móōsōn alongé á bad ngáne bédūbpé nkalan míme sékaléé tñgene Krìstàa. Kénéε bad ábe béebíi Dyōb bétédé nén bán póle e e'yókél é' bad chōo sékaléé.

²² Bad bé Israel bédā bán bényín e'chemléd é' menyáké bon bédūbē, bad bé Grikia-'ε béhede debyéé áde áchábé ámín.

²³ Bon sé pen, sékale nén bán Krìstàa, Ane-awē-Béwógté, anwé á awog. Ne bad bé Israel, mímē nkalan rídii dyam áde bēnkēndāngé awóg ne awóg ðēn, ne bad ábe bó-'ε béesē bad bé Israel, mímē nkalan rídii eyókél ngên.

24 Boŋ Dyöb áchénlé donge á bad ábé ábē bad. Bó donge á bad bédii bad bé Israel, ábínií-’ε bad bé Griquia. Ne ábén bad nímē nkalan míme sékaleé rídii Krístæ, mó adé ngíne e Dyöb, mó-’aá adé debyéé á Dyöb.

25 Chöm éche ényínnad née eyókél é Dyöb étómé debyéé á moonyon. Eche chó-’ε ényínnad née ewəmwəw é Dyöb, étómé ngíne e moonyon.

26 A-baányan, nyékamtən nyaa é bad éche nyébédé á pónde eche Dyöb áchénlé nyé ábé ábē bad. Bad bé nköŋsé bényiŋ nyé nguse é bad née bad ábe béwóó debyéé. Nyé nguse é bad nyébédé benkamlεε. Nyé nguse é bad nyēmbíd á túmbé é benkamlεε.

27 Boŋ Dyöb ápwédé bad ábe bad bé nköŋsé béntēdtē née e’yókél é’ bad. Abelé nê ákwáged bad ábe béchágé yäl á nköŋsé-te nén bán béwóó debyéé. Dyöb dēmpwēd-te bad ábe nköŋsé ményinnē née bad ábe béesě etógnén. Ambel nê ákwáged benkamlεε.

28 Dyöb dēmpwēd bad ábe bad bé nköŋsé bényinnē bán bédé nköŋtéd, ápwēd ábe bényinnē bán béesaá dyaamyam, bad ábe bényinnē bán béesaá dyaam dé abelen. Dyöb dēmbel nê álúmed nén aá mam míme bad bé nköŋsé bényiné bán médé etógnén, méesaá chömmchöm.

29 Amběl nê ábel boŋ modmod eékümē’ ekáá á tâl á’sō é’ Dyöb.

30 Chöm éche ábénlé nyé chóó ekáá boŋ nyébé mod nhóg ne Yesu Krístæ. Mekan míme Yesu Krístæ ámbenlé, ne syánē, debí bán ádii debyéé á Dyöb. Nédē, Yesu Krístæ mó abelé boŋ syánē débélé mekan míme métəŋgéné, debé bad ábe béesaá, mó-’aá aködté syánē á mbéb-te.

31 Né-ɔ́, éténlédé á kálag e Dyöb nén bán “Kénzée awē akume ekáá á tâl, akume’ ekáá á tâl dásō áyāle dyaam áde Sáŋgwée ábénlé mó.”

2

Paale abēnlédé ngíne e Dyöb ákal nkalan təŋgene kwéed eche Yesu

1 A-baányan, áde nípédé áwēn ákale nyé nkalan míme ríhóbe mam təŋgene Dyöb,* meébenlád-taá e’yale é’mbáá ké’ε debyéé ámbáá.

2 Membel nén áyāle áde níbédé átinté echēn memmäd á nlém-tē nén meé méebenlé dyaam dēmpēe étóméé ákal nkalan təŋgene Yesu Krístæ ne kwéed eché áwédé á awəg.

3 Ade níbédé ne nyé menkēnkwoŋnédte mmēn ábel nsón, mbwóg níbédé me áte, nlém ríhūnē-’ε me á abum.

4 Ade rí’yágté’áá nyé, ríkanlé-’ε nyé, póle eché rílangé’áá nyé eebédeé póle eché etéde bad nlém á abum eché edé debyéé ámbáá áte. Meékanle’áá-’ε nyé ne debyéé ámbáá ábel nén nyédúbe chöm éche rílangéé nyé. Boŋ pen áde ríkanlé’áá nyé nkalan rí Dyöb, mekan míme ríhóbé’áá mélúmté’áá bán ngíne e Edáádəŋ é Dyöb edé áwēd-te.

5 Meéhede’áá meé nyédúbe nkalan rí Dyöb áyāle mod ábénlédé debyéé ámbáá ákale nyé mó. Boŋ nhedáá meé nyédúbe nímē nkalan ngáne Dyöb dēn ábénlédé eche ngíne ábel nyédúbe.

Debyéé áde áhúu ne Dyöb

6 Kénē-’ε ámpē, nzé séde ne bad ábe bémáá awúu áte á adúbe-tē, sébelé sébenlád debyéé nzé sékanle bó póle. Adé debyéé pen déebāgkē debyéé áde mod a nköŋsé ábenladte. Déesaá-’aá debyéé áde ké benkamlεε bé nköŋsé bé’ chíi bébenladte. Ábē benkamlεε bédii bad ábe rímab nkamlεε mébēē á esón é pónde.

* 2:1 Mam təŋgene Dyöb; donge á kálag dé’só áwóó: mam təŋgene mekan mé e’koŋéd mé Dyöb.

⁷ Debyéé áde sébenladté ádíí debyéé áde Dyöb ábágé sé. Sêkale ntíi ní kun míme Dyöb ábenlédé áde debyéé abel. Ngen e'só Dyöb dénkênlúmedté modmod mímén ntíi áte. Mmén ntíi míme Dyöb átíídé ahóbé aá syánē ámpē dēbē áse e éche ehúmé á pónde echē ehúé'. Dyöb déntíi aá mósbelé syánē nē se áde éehāgēē nkōhsé.

⁸ Nkamlene a nkōhsé ké nhóg enkēnsōhtēnné ádén debyéé á Dyöb. Ayāle nzé bēnsōhtēn chōm éche Dyöb ábéláá, né bēnkēnwúú' é Sāngwéé a edúbé abome áde bēmboméé mó á awōg.

⁹ Boḡ kénê-'e ámpē, éténlédé á kálag e Dyöb nén bán,
 “Mam míme Dyöb ábōhséné ábele ábē bad ábe bédáá mó, médíi mam míme modmod éēnyínēē mbéd,
 míme modmod éēwōgēē mbéd,
 míme modmod éēkāmtenēē-'aá áwe nlém-tē mbéd.”

¹⁰ Mmén mekan mós Dyöb álúmté syánē. Echē edāádah chós ánlōmmē álúmed syánē mímén mekan. Edāádah éne mekan mésyāál áte, ébíi-'e mekan mésyāál, káāne mekan mé Dyöb míme mod éehelée-se awámsén asōhten.

¹¹ Modmod eebyéé' é mewēmtēn mé mod ampée. Edāádah éche édé mod áte chós ébyéé' míme mewēmtēn. Melemlem nē dós modmod ébíi' é mewēmtēn mé Dyöb, étōmēé Edāádah é Dyöb.

¹² Edāádah éche syánē déwóó ehúú ne Dyöb. Deewóó' é edāádah é nkōhsé. Dyöb ábágé syánē échén Edāádah ábel désōhtēn mam mésyāál míme ábééné syánē míme nsimé.

¹³ Né-ós, séebēnladtē e'yale ábe moonyon ábenladté áde debyéé áyáged bad. Boḡ sébenlad e'yale ábe Edāádah é Dyöb élyágtéé sé áhób. Sébenlad e'yale ábe Edāádah élángeé sé tāngene míme mekan.

¹⁴ Mod awē eewóó Edāádah é Dyöb áte eedúbpréé mekan míme Edāádah é Dyöb élángeé bad áyāle anyíne mó eyókél. Eéhēlē-'e mó asōhtēn áyāle Edāádah éche Esáá chēmpen chós éwōngan bad ádol mekan mé Dyöb áte bwám.

¹⁵ Mod awē awóó Edāádah áte ádol mekan mésyāál áte bwám. Boḡ modmod ééhēlē-se asōhtēn mewēmtēn míme ane mod.

¹⁶ Edé nén ngáne éténlédé á kálag e Dyöb nén bán,

“Nzé-módé abíi mewēmtēn míme Sāngwéé?

Nzé-módé ahele se aléb-pe mó?”

Boḡ syánē dewóó mewēmtēn míme Krístā.

3

Paale aá bembalede bé Dyöb bós bós moosyál bédíi

¹ A-baányan bé Krísto, meéhele'aá sé nláá nyé mekan ngáne rílangeé bad ábe adúbe ádāb áwúú áte áyāl e mekan mé Dyöb. Boḡ nlánge'áá nyé mam ngáne rílangeé bad ábe bēwóó mewēmtēn mé moonyon a ekob. Nyébédé nēe nkáál, mentéd nyé nēe bad ábe bēmbootéd ábé mod nhóg ne Krístā.

² Abíi dós nkáál mímwáá' é, eedyákgé ndyééd echē elélé. Né-'aá me-'e mēmbootédte nyé mam míme méelele áte tāngene nkalan ní Dyöb ayáged. Menkēnyágdte nyé mam míme méwúú áte, áyāle ene pónde nyēnkēnkwoágé ákob mó. Ké bōob-pe nyéēkwōgēē ákob mó.

³ Ayāle nyédíi nyéhíde' mekan mé ekob é yāl, nyēwánléné nhóg ne aníní kónjí, nyé bēn ne bēn nyéswanḡán-ne. Bōob áde nyédíi nyébeléé mímén mekan éelúmtēē bán nyédíi nyéhíde échēn esíi é mekan mé ekob é yāl-e? A mbále, nyébeléé nēe bad ábe bēwóó dāsō nsōhtēn ní moonyon.

⁴ Chōm éche ékáá boŋ r̄hōbē nēn édii nēn, átíntē echēn bad behóg bēhóbe bán, “Ndii mod awě ahíde ayáge áde Paale,” ábíní-’ε bán, “Ndii mod awě ahíde ayáge áde Apolose.” Enén ndín e mbeltéd elúmte’ bán nyēwóo dásō nsōntēn mí moonyoŋ.

⁵ Bōōb-pōó, nzéé Apolose ádíí? Nzéé me, Paale-’ε r̄díí? Bembāledε bé Dyōb ngēn bōó sēdíí. Sēwóngéné nyé ádúbe Kr̄stā. Sé mod téé abele nsón míme Sāŋgwéé ábágé mó aá ábel.

⁶ Ndii mod awě awéné mbál-e-bŷ, Apolose-’ε mó adé mod awě asyógé’áá ene mbál mendíb áyāl, boŋ Dyōb dōó dēmbēl boŋ mbál r̄kwoge’ saké sé.

⁷ Né-ōó, mod awě awéné ne mod awě asyógé mendíb bó modmod béesaá etógnén. Mod awě adé etógnén adii Dyōb. Mó abele boŋ mbál r̄kwoge’.

⁸ Mod awě awéné ne mod awě asyógé mendíb bébeleé nsón nhóg, Dyōb dēsābē-’ε bó mod téé nchoo ne nsón míme ábélé.

⁹ Bembāledε bé Dyōb ábe bébele nsón nhóg bōó sēdíí. Nyé bad ábe nyédúbpé-’ε nyédii nēŋgáne nzag eché Dyōb áwóó. Nhele r̄hāgtēn-ne nyémpē ábē nēŋgáne ndáb eché Dyōb álóó’é.

¹⁰ Mbēnlédé nsimé míme Dyōb ábágé me ábel nsón nēŋgáne nlóó-ndáb awě awóó debyéé álōŋ ndáb. Mensáá nsón r̄í Dyōb átíntē echēn, bembāledε bēmpēe békēné nsón míme r̄sáádé á’sō. Boŋ kēnzéé awě álóó’ atāŋgéné atéd pón dé ngáne álóó’é ámín e nsón míme bémáá asáa.

¹¹ Ayāle modmod éēhēlēē-se ábel nsáaned mémpēe éetóméé míme r̄ímáá abel. Mmē nsáaned r̄díí ayáge áde r̄’yágté nyé t̄ŋgene Yesu Kr̄stā nēn mēé, Dyōb ásoo’ áded alonjé mbwiined ne Yesu Kr̄stā.

¹² Donje dé bembāledε bébenlad bwēm nēŋgáne gól, sílva ne meláá mé etógnén ákēn míme nsón á’sō. Bembāledε bēmpēe-’ε bébenlad bwēm bé nsón bēmpēe ábe é’bídé áyāl e mel, ne ábe é’dé byaá, ákēn nsón á’sō míme bésáádé.

¹³ Pón dé ép̄ eché moosyā́l ányinnē nyaa e nsón eché mod téé ápédé abel. Ayāle á epun éche Yesue ápéé ábídēd mam mésyā́l áwed. Ebē nēŋgáne mod awě ahédé bwēm á dŷ, boŋ muú r̄bēl anyín éche éhele-se éhyāŋ ne eche éehelé-se éhyāŋ.

¹⁴ Nzé nsón míme mbāledε ábélé ámín e nsón míme bémáá asáa méehyáa, né ákud nsábe.

¹⁵ Boŋ nzé nsón míme mbāledε ábélé ámín e nsón míme bémáá asáa r̄hyáa, ane mbāledε éekudté chōmchōm, boŋ kēnē, mwēn ádíí abé mod nhóg ne Kr̄stā. Boŋ pen ábē nēŋgáne mod awě abídné mehélé á ndáb-te eché ehyáa. Adii abé á alonjé boŋ chōm ésyā́l éche áwóó émad ahyāŋ.

¹⁶ Ndúbpé mēé nyébíí bán nyédii abón áde Dyōb ádyεε’é áte. Edāádəŋ é Dyōb édé átíntē echēn.

¹⁷ Kēnzéé awě abé bte abón á Dyōb, Dyōb débēbēd ane mod, áyāle nēn wéε Dyōb ádyεε’é ádíí hōm áde ádé ngəŋgú. Nyébēn-naá nyédé ádé hōm áde ádé ngəŋgú.

¹⁸ Modmod eédōgē yāl. Kēnzéé awě awémténé átíntē echēn aá mōwō debyéé á nkōŋsé-te wén, átímed yāl eyókél é mod ábel boŋ ákoŋ debyéé awóŋ.

¹⁹ Nlāŋge nyé nēn áyāle, dyam áde bad bé nkōŋsé bényíneé bán áde debyéé dōó Dyōb ányíneé nēe eyókél é akan. Debíí bán nēn ádé mbále áyāle éténlédé á kálag e Dyōb nēn bán, “Bad bēwēmtan bán bēwóó debyéé boŋ Dyōb ábenlad ádab debyéé dēn ákób ádab akwāb.”

²⁰ Eténlédé ámpē nēn bán, “Sāŋgwéé abíí aá bad ábe bēwēmtan bán bēwóó debyéé ádab debyéé déesaá dyamdyam.”

²¹ Né-ōó, modmod eékūmnē baányoŋ ekáá á t̄l, áyāle nyēē Dyōb ábágé bwēm é’syā́l.

22 Dyōb álómé me, Apolose ne Petro áwōngēn nyé. Bwēm é'syāāl ábe Dyōb áhágé á nkōnsé, abagé nyé bó ábenled. Ké nyêbé á alongé ké'ε nyêwé, Dyōb ábélé nê á mbonj nímēn. Mekan-ne míme mébenlad ne nyé bōab ne míme mébenléd ne nyé á póndé eche ehúé' á'sō, médii á mbonj nímēn. Abén bad bésyāāl ne abén bwēm é'syāāl Dyōb ábágé nyé bó.

23 Nyédii bad ábe Krīstā, Krīstā mó-'ε abé ane awē Dyōb áwóó.

4

Paale aá Dyōb ápwéde bó ábele Krīstā

1 Nyétéd sé nēngáne bad ábe bébenle Krīstā, ábe Dyōb ábélé aá bélānge bad mekan mé e'kojnéd.

2 Chōm éche éhēdnad bán éhē ndín é bembaledé bébel édii ábel nsón bwām míme echab sán ábágé bó aá bébel.

3 Bonj me meewóó'ε póndé ábel ne kéchéé éche nyé ké'ε mod ampée áwóó áhób tāngene nsón míme Dyōb ábágé me aá mbel. Ké mmēn meehóbéé tāngene nsón míme mbelée, ké mbóó ké'ε mééboó'ε.

4 Meenyínéé awusé ké ahóg áyāl e nsón míme mbelée bonj nê déelūmtēē nēn bán chōm ésyāāl éche mbelée étāngéné. Sāngwéé mwēmpen mó abii nsón míme mbelée, ké rítāngéné ké'ε méētāngeneé.

5 Né-óó, nyéehóbé bán mod ábelé nsón mí bwām ké'ε ábelé nsón mé mbéb áde póndé éepēdēē ábel nê. Ene póndé ēpē áde Sāngú Yesu Krīstā ápéé. Ade ápéé, ábidéd bwēm ábe é'bédé á ehintēn-tē á e'nyínēn bé ekide abidéd-te bad mewēmtēn áwed míme modmod énkēmbii'ε. Ene póndé dō-'aá Dyōb dékenné mod téé ngáne ápédé nsón ábel.

6 A-baányanj bé Krīsto, nhóbe' nímēn mésyāāl áyāl echēm ne Apolose áwōngēn nyé ásoñtēn. Ntéde sé bad bébe nēngáne elānsén ábel nyéyáge e'yale ábe béhóbéé nēn bán “Mod ábele dāsō mekan míme méténlédé.” Modmod ekumné mod nhóg ekáá á tál se ányíné anínii nkōñtéd.

7 Dyōb áhágé mod nhóg etógnēn tómaa anínii-yε? Cheé mod ádii éche Dyōb déebelée bonj abé? Cheé-ō mod ákuménné ekáá á tál, áde édii bán kéchéé éche mod ádii Dyōb dōó ábélé mó?

8 Bōab nēn nyélūmte byánán nyêwóó chōm ésyāāl éche nyétógnéné. Nyélūmte byánán nyésudé nhōn. Nyétēdté sé bembaledé, nyé bēn nyêwēmtan bán nyédii kāñ. Mendāñ nēn meé nyékoñ kāñ abé ábel bonj sémpē sékamlan ne nyé.

9 Nwēmtan nēn meé Dyōb ábélé aá sé bembapεε bé nlomag sébē nēngáne bad ábe béesē etógnēn átintē e bad. Sédii nēngáne bad ábe bétómté mbakú bán béwê. Nhóbe nēn áyāle bad bésyāāl bēnōne sé ányín chōm éche ébenlad ne sé. Saá-kaá bad bēnpēn bonj káñ ne ángel éñone sé.

10 Bad bényíne sé nēε e'yókél é' bad áyāle sébenléé Krīstā. Bonj nyépen nyêwēmtan bán nyêwóó debyéé áyāle nyédii nhóg ne Krīstā. Bad béwēmtan bán séewóó'ε ngíne ábel dyamdyam bonj nyêwēmtan bán nyêwóó ngíne echē ehúú ne Dyōb. Bad béebagéé sé edúbé bonj bébage nyé edúbé.

11 Káñne ne bōab, séewóó'ε chōm éche sédyáγκē ne éche sémwáγκē. Séewóó'ε mbóté éche ékwógé sé ahé. Séyōγκké mbéte akud á mekáá mé bad. Séewóó'ε wéε sédyεε'ε.

12 Sébele ntū ní ngíne ábel bonj sékud chōm éche séwōnganné échēd yāl. Nzé bad bésyāá' sé sélānge bó bán mekan mébéen bó bwām. Nzé bad bébele sékude metake, séwesān.

13 Nzé bad béhóbe sé mekan mé mbéb áyāl, séhóbe bó mekan mé bwām áyāl. Ké bōab bad bédii bényíne sé mbinde áwab dīd-te. Séēsaá dyam dé ábelēn áwāb.

¹⁴ Ntele nén saké áwóged nyé e'sôn bon ntenle nyé áléb nyé tângene mekan míme nyétângéné abíi. Áyāle nyédíi nêngáne ábêm bán ábe rídóó.

¹⁵ Kénée édíi bán nyéwóó bemeléede bé Krīsto híin, mod nhóg mwēmpen mó adé nêngáne sáá awēn. Apēen áde mípíinedé nyé nkalan mí bwám ábéle ndíi nêngáne sáá awēn a Krīstā.

¹⁶ Né-óó, ncháa nyé nén mée nyébele mekan míme mémpē míbeléé.

¹⁷ Nén dáo akáá bon rílōmē Timotie áwēn. Adíi nêngáne awem mwān á dīn á Sāngú. Ndáó mó, ayōgké-'e mekan ábel ngáne éhēdnadté. Nzé apedé ákamtén nyé nyaa e alongé eche ríwóó nêngáne mod a Krīsto. Ene nyaa e alongé edé nchoo ne chōm éche ní'yágtéé mwembé ké ríhée míme ríkagké áte áyáged.

¹⁸ Nyé donge á bad nyédé kúmbe, nyéwēmtān bán méepaá áwēn.

¹⁹ Bon nzé Sāngwéeé akwēténé, nkwogé apē áwēn. Ene pónde-'aá méhēdté áte ábíi chōm éche ábē bad ábe bédé kúmbe békoo'é ábel. Mébīi ké békōnté ngine awónj echē ehúú ne Dyōb ké'ε nsal ngēn móó bébeléé áte.

²⁰ Nkamlen ní Dyōb méesaá chōm éche édé á nhóbtéd, bon rídíi ngine echē elúmté' á mbeltéd.

²¹ Ahée abōjnédé nyé, nyédáá bán nzé mpedé áwēn ríkógsan nyé áyāl e kúmbe eche nyédíi ké'ε nyédáá bán nzé mpedé rílúmed nyé nlém mé edānge, ríchedne nyé yāl?

5

Paale ahóbé tângene akáb dé mesón á mwembé ní Kōrinto

¹ Nwógé nén bán mod nhóg átíntē echēn akábe asón, nyaa e asón echē ké bad ábe béebíi Dyōb béehelée se békāb. Chōm éche ríhóbeé édíi nén mée, mod nhóg átíntē echēn akábe asón ne sáá mwaád.

² Chán-nō nyéhele nyébé kúmbe áde édíi bán ane mod míme mbéb rítāngéné nyé dásō ndutul awóged. Mó awē ábele enén ndín e dyam, nyétāngéné nēe nyénáné mó átíntē echēn.

³ Nhóbe mée nyébel nē áyāle kénée méesaá ne nyé, nkamtan nyé pónde téé. Nhóbe byánán ndé ne nyé nén mée mmaá mbakú atómed,

⁴ ne kunze eche Sāngú Yesu Krīstā ábágé me, nhóbe nén mée nyékógsen ane mod awē ábéle míme mbēb. Nzé nyélādné, ébē byánán ndé ne nyé, awed Sāngú Yesu Krīstā ábe nyé ngine ábel kéchéé éche nyéwēmténé ábel.

⁵ Nhede mée nyébe ane mod á mekáá míme Satanē ábel bon Satanē ábébed échē ekob é yāl. Kénée édíi bán Satanē ábēbēd échē ekob é yāl, Yesue ášōj échē edáádāj á epun éche ápéé ákáad.

⁶ Nyéetāngeneé kúmbe abé. Nyébíi nén bán mbumé ní ngun rísonle' nzé behédé mwā esulten áwēd-te, melemlen nē dáo ane mod awē ábelé míme mbéb áhele ábel bad bémpeé bébel mbéb.

⁷ Nyéhūd esulten é nchun ésyāāl, ábel bon nyébé nêngáne mbumé mékōālē míme méewóo esulten, né-'aá nyékóó abé. Nyédé nén áyāle Krīstā anwé á nló mímed. Mó ambé nēe Mwān-a-Ndyōj ní mbód awē bēmbéé nēe mende mé ngande e Nnyíme-ámín, áyāl e mbéb mí bad.

⁸ Né-óó, nyéwōg menyīnge ne ene ngande, esulten é nchun éēbāg ámpē. Abé ádēd ábē pónde ésyāāl nêngáne abé á bad bé Dyōb, deébēlē e'bébtéd é' mekan, deebébé-'ε nlém á abum. Bon pen déwōj abé dékōālē, déhíde Krīstā ne nlém nhóg, dékale-'ε mbále.

⁹ Kálag echē mēntelée nyé menláá nyé mée nyéēhojné' bad ábe békábe mesón.

¹⁰ Saké bad ábe béedúbpe Dyöb bós ríhóbáá, kénéε édíí bán bós donje á bad békábe mesón, bédé ngoód, bédé bechíb, donje ábenlé-’ε myöb mé metóm. Weéhélēε-sε ebán échén ndín é bad á yäl káan né ehídté á nköhsé.

¹¹ Bon bad ábe mēntelēé nyé mēé nyéēhōnē bédíi bad ábe béchágé yäl bán bédíi bad bé Krísto bon békābē mesón, bēbē ngoód, bēbagé myöb mé metóm edúbé, bēhōbē bad mekan mé mbéb á yäl, bēmwāg mīm bwāmbwam mēkōbē bós, bēbē-’ε bad ábe béchíbe’. Nyéedyág ké ndyééd ne échén ndín é bad.

¹² Meewóó’ε kunze ké póg áhób mēé békógsen bad ábe béesε bad bé Dyöb. Bad ábe bédé á mwembé-te bós nyétāngéné akógsen.

¹³ Dyöb dós dékād bad ábe béesε á mwembé-te. Eténlédé á kálag e Dyöb nén bán, “Nyéhūd mod awē abele mbéb átínté echén.”

6

Mod eesōmné mwānyan wēε bad ábe béedúbpe Krístā

¹ Nzé nyé mod ké ahéé awánléné mwānyan a Krísto dyan, éékāg wēε mod awē eedúbpe Krístā aá ákáad bós. Bon pen áke wēε bad bé Dyöb ábel bétimed bós ásē.

² Nyébíi nén bán bad bé Dyöb bós békād bad bé nköhsé. Né-ós, ngáne édíí bán nyéékād bad bé nköhsé, nyétāngéné nēε nyékāadtēε mpíntéd mé mekan.

³ Nyébíi bán syānē-εé dékād ángel. Nēε édíí-’aá nē, chán-nō déehelēé baá mam ábe bétoge mbóó átínté echen mbwe-téé amad?

⁴ Né-ós, nzé échē ndín é mam épédé átínté echén, nyéētīm chó nēε atéd, nyékēēn wēε bad ábe mwembé méētēdēε nēε dyan bán bós bémade nyé chó-yε?

⁵ E’sōn ne nyé. Nédē modmod eesaá átínté echén awē awóó debyéé ákóm nsañ átínté e mod bós mwānyan ábe bēwánléné-yε?

⁶ Bon mod atime mwānyan akēen á kóte, bad ábe béedúbpe Dyöb békāadtēε búmō.

⁷ Asōmen áde nyésōmnēé nhóg ne aníníí á kóte álúmte bán nyékwédé ne akwe dēn. Edé mbon mwānyon ápanen we tómaa we ákēen mó á kóte.

⁸ Bon nyétíme nyēpanne, nyédoge-’ε nhóg ne aníníí, nyēbele nē káōne wēε baányon bé Krísto.

⁹ Nyébíi nén bán bad ábe bébele e’bébtéd é’ mekan béebáá á nkamlen rí Dyöb. Modmod eédōgē nyé. Bad ábe békábe mesón, bad ábe bébenle myöb mé metóm, bad ábe békábe mesón á ndáb e e’wóngé, baachóm ábe bēnañnad baáb baachóm bēmpēε, ábén bad bésyāäl bós modmod béebáá á nkamlen rí Dyöb.

¹⁰ Bad ábe béchíbe’, bad ábe bédé ngoód, bad ábe bēbágé yäl á amwé á mīm, bad ábe bēhóbe bad mekan mé mbéb á yäl ne bad ábe bédumne bad bwēm bós modmod béebáá á nkamlen rí Dyöb.

¹¹ Nyé donje á bad nyébeláá échén ndín é mekan. Bon á dīn áde Sāngú Yesu Krístā ne á Edāádāñ éche ádēd Dyöb, bēhúdé nyé nímén mbéb á yäl, nyédé bad ábe bésáá, Dyöb ábānné nyé nēε bad ábe bésáá, nyékōbnédé-’ε á’sō é’ Dyöb.

Nyēbenlad échen yäl ábe Dyöb edúbé

¹² Nyé mod nhóg ahele ahób aá, “Nwóó kunze ábel kéchéé éche rídáá abel.” Nē ádé mbále. Bon pen saké chōm ésyāäl éche mod ábeleé éwōngan. Mod ahele ahób aá “Nwóó kunze ábel kéchéé éche rídáá abel.” Bon chōm ké éhéé éetāngēné nēε étēdēé me ntāñ.

¹³ Mod ampée ahele ahób aá “Bébéle ndyééd áyāle abum, bébēl-le abum áyāle ndyééd.” Nê adé mbále. Boŋ Dyöb débēl ábē bwēm bēpě á asóg. Dyöb déebeléé alongé á moonyon aá bébenle mbinde é mekan boŋ abelé dó aá bébenle Sǎngwéé, Sǎngwéé mó-’aá atagne yǎl e moonyon.

¹⁴ Dyöb dêmpuúd Sǎngwéé, nê dó-’aá ábenlédté eche ngíne ápuud syánē.

¹⁵ Nyéebíi’ é nén bán échen yǎl chók édé pág éche ébéle yǎl eche Yesuε-yε? Né-óó, nhele ntéd pág é yǎl éche Krístəə boŋ ríke rílatén ne yǎl e akwalεε-yε? Eetǎngeneé abé nê mbéd!

¹⁶ Ké’ε nyéebíi’ é bán mod awě atédé eche yǎl boŋ álatén yǎl e akwalεε abelé búmā bétímé yǎl póg-ε? Eténlédé á kálag e Dyöb nén bán, “Eché yǎl ébε étim yǎl póg.”

¹⁷ Boŋ mod awě mó-’ε adé nhóg ne Sǎngwéé abele átīm mod nhóg ne mó á edǎádəŋ.

¹⁸ Nyéewóó’ é dyan dé abel ne mbinde é mekan. Mbéb ké ríhéé mémpēe níme mod ábeléé méenənée eche yǎl. Mod awě akábé asón abelé mbéb tǎngene eche yǎl.

¹⁹ Nyéebíi’ é bán échen yǎl édii abón áde Edǎádəŋ éche Esáá édyεε’ é áte-yε? Dyöb dóó ábágé nyé échen yǎl. Saké nyé nyéwóó chók, Dyöb dóó áwóó nyé.

²⁰ Dyöb ácháné nyé ne nkun níme ríchábé ámín. Né-óó, nyébenled échen yǎl ábe Dyöb edúbé.

7

Paale alébe bad tǎngene e’wóŋgé

¹ Bóob-pók, mǎlāā nyé tǎngene mekan níme nyétélé á kálag eché nyéténlé mε. Ebók bán mod eewóó’ mmwaád.*

² Boŋ ngáne édii bán akáb dé mesón ábuú áte bwámbwam, ébók bán mwenchóm tée áwōŋ awě mmwaád, mmwaád tée-’ε awōŋ awe nchóm.

³ Mwenchóm tée atǎngéné ábelé’ mekan níme mwenchóm atǎngéné mwaád abele, mmwaád tée-’ε atǎngéné ábelé mekan níme mmwaád atǎngéné nchóm abele.

⁴ Mmwaád mwēn eékamlánné eche yǎl, nchóm mó akamlan mó, melemlem nê dóó mwenchóm eékamlánné eche yǎl, mwaád mó akamlan mó.

⁵ Nyé ábe nyéwóŋné, mod ké nhóg eebáŋné waáb e’noŋ é’sē, éetóméé né nyé bēn nyéchémtné bán nyébel nê á esón é pónké, ábel boŋ nyéwōŋ pónké e bwám ákáne. Boŋ pen ámbid e nê nyétǎngéné abé ámpē ngáne nyénsēbēē abé, ábel boŋ Satanε eépiinád nyé mekágsen ákáb asón.

⁶ Meehóbéé nén mée nnyágte nyé ábel nê, boŋ nhóbe mée nê dóó ébók bán nyébel.

⁷ Mendəŋ pen mée bad bésyāāl bébē áde béewōŋnéé néε mε. Boŋ mod tée awóó ndε eche Dyöb ábágé mó. Abelé donge á bad aá béwōŋ mewēmten áwōŋ mmwaád ké’ε nchóm, ábēl-le ábíníí aá béewō’.

⁸ Bóob-pók nlǎnge nyé bad ábe béewōō bebaád ké’ε bechóm ne ábe bédé bekúd mée, ébók bán nyéewóó bebaád ké’ε bechóm ngáne mε-’ε méewóó’.

⁹ Boŋ pen, nzé nyéehel yǎl akób, mod-tée awōŋ mmwaád ké’ε nchóm. Nhóbe nén áyāle édé mboŋ mod áwōŋ mmwaád ké’ε mmwaád áwōŋ nchóm, tómaa áwōŋ esíí é ngíne áte wée né móonwōŋ áde wéewóó’.

¹⁰ Bóob-pók, ne bad ábe béwóó bebaád ké’ε bechóm, saké mε nhóbe’ pen, Sǎngú Yesuε mó ahóbe’. Ahóbe nén aá mmwaád eetǎngeneé nchóm atεde.

* **7:1** Eewóó’ mmwaád, donge á kálag áwóó: eénaŋnáád mmwaád.

11 Boŋ nzé édé bán atědté nchóm, atə̀ngéné adyεε ésebán awóó' nchóm ampée, ké'ε bó nchóm bétim ásē. Mwenchóm-me eetə̀ngeneé nées ánáné mwaád á e'wóngé.

12 Bɔɔb-pɔɔ, ne nyé bad ábe nyelyagé ásē, me-εé nhóbe' saké Sə̀ngú Yesue. Nhóbe nén mée, mod awě adúbpe awě awóó mmwaád awě eedúbpe boŋ ákwentén aá búmō bedyεε, ane mod eénānē' ene ndín e mmwaád á e'wóngé.

13 Nzé mmwaád, awě mō-ε adúbpe awóó mod awě eedúbpe awě ákwenténé mó awón, ane mmwaád eetə̀ngeneé ane mod atede.

14 Nhóbe nē áyāle nzé mod awě eedúbpe awóó mmwaád awě adúbpe, ákobnéd á'sō é' Dyöb, abé áde ádíí mod nhóg ne mmwaád awě adúbpe. Melemlem, nzé mmwaád awě eedúbpe awóó mod awě adúbpe, ane mmwaád ákobnéd á'sō é' Dyöb abé áde ádíí nhóg ne mod awě adúbpe. Nzé énkembé nē, né bán ábe ábén bad béchyáá'é béekobnádté á'sō é' Dyöb. Boŋ édé nén bán békobnad á'sō é' Dyöb.

15 Boŋ pen nzé mod awě adúbpe awóó mod awě eedúbpe, boŋ awě eedúbpe ahóbe aá e'wóngé é'maa nyétēde, é'maa. Nzé nē ábénléde, mod awě adúbpe awóó kunze ádyεε nē ésebán bényágte mó ádyεε á ndáb e e'wóngé. Dyöb áhede aá syānē débē nsə̀ ne nhóg ne aníníí.

16 We, mmwaád awě adúbpe Yesue, kapóg ehεle ésōŋ alongé áde awon nchóm awě eedúbpe. Melemlem ne we mwenchóm awě edúbpe, kapóg ehεle ésōŋ alongé áde awon mmwaád awě eedúbpe.

Paale aá bad bebê ngáne Dyöb dempwεdté bó

17 Boŋ pen Sə̀ngú Yesue amaá atii ngáne alongé áde syānē mod té átə̀ngéné abé. Né-ɔɔ, syānē mod téé ábē nyaa eché ámbēé áde Dyöb dempwεdté syānē aá débē ábē bad. Adén dyaam dɔɔ rílanḡeé mwembé té.

18 Nzé edé mod awě bēmmadté ayag boŋ ámbíd e pónde Dyöb ápwēd we, weétimē e'chemléd ahúd ábe é'lúmte nén bán bēn'yāḡ we. Melemlem, nzé edé mod awě bēnkēn'yagké boŋ Dyöb ápwēd we, weémwāḡ-se béyāḡ we.

19 Ké béyagé mod ké'ε béeyagéé mó, nē déesaá etógnén. Chóm éche édé etógnén edíí áhíd mbéndé é Dyöb.

20 Mod téé ábē nyaa eché ámbēé áde Dyöb dempwεdté mó.

21 Nzé wembé ntāŋ á pónde eché Dyöb dempwεdté we, nén déetagte we. Boŋ nzé echon sə̀ŋ ahóbe aá wéebáá ntāŋ ámpē, ékōb áned.

22 Mod awě ámbé ntāŋ Dyöb ádēhób aá mópwεde mó adii nées kunze áyāle Sə̀ngú Yesue ahúde mó á mehaŋ. Melemlem ne mod awě énkembé ntāŋ Dyöb adēhób aá mópwεde mó. Apwεd áde Dyöb ápwédé mó ábélé adii ntāŋ awě Křístə̀.

23 Dyöb ácháné nyé ne nkun míme ríchábé ámín. Né-ɔɔ, nyéewóglán bad ábe bélāḡe nyé mekan míme nyétə̀ngéné abel.

24 A-baányan, nhede mée mod téé áwōŋ alongé áde ánwōḡē áde Dyöb ápwédé mó.

*Paale ahóbe tə̀ngene bekúd
ne bad ábe béewóo bebaád ké'ε bechóm*

25 Bɔɔb-pɔɔ, tə̀ngene bad ábe béewóo bebaád ké'ε bechóm, Sə̀ngú Yesue eelāḡeé me chóm éche rítə̀ngéné nyé aláa tə̀ngene ádén atón. Boŋ ké nē, awōŋgen áde Sə̀ngwéé áwōŋéné me ábē mod awě bad bésúme nlém áyā, mēlāā nyé dyaam áde míbíí mée átə̀ngéné.

26 Nnyíné nén mée ngáne ndutul edíí enén pónde, ébóó bán mod adyεε ésebán awóó' mmwaád ké'ε nchóm.

27 Nzé mod amaá mmwaád awón, eétēdté mó. Nzé mod eewóo mmwaád, eéhēde mmwaád awě áwóó'.

28 Boŋ nzé mod awóó mmwaád, eébeleé mbéb. Nzé mmwaád-te awóó nchóm eébeleé mbéb. Ké nê-'ε bad ábe béwóó bebaád ne bebaád ábe béwóó bechóm békudé metake híin á alongé ádāb. Nzəm eché ekáá boŋ ríhōbē nē edii, nhede μεé béekudé nímén metake.

29 A-baányan, chōm éche ríwémténé nyé aláa edii nén, póndé eché déwóó á nkōŋsé edé esōŋ. Né-óó, bootya bōob mod awě awóó mmwaád ábii nén áá mmwaád eésaá chōm éche étómténé etógnén abé áwē alongé.

30 Melemlem ne bad ábe bésudne', béētédé nē nēe dyam áde átómténé etógnén abé. Abe bō-'ε bédé menyiŋge, béētédé nē nēe dyam áde átómténé etógnén abé. Bad ábe béchane bwēm béētédé bán bwēm ábe béchanéé bōó é'tómténé etógnén abé á alongé ádāb.

31 Bad ábe béhíde mekan mé nkōŋsé ámbid, béebanné nlém á yǎl e nímé mekan. Ayāle mekan mésyāāl níme débēléé á nkōŋsé-te chii, mēpě á asóg.

32 Nhede μεé dyamdyam déetagté nyé nlém á abum. Mod awě eewóó mmwaád, Sánygwéé móó ákamtanné póndé ésyāāl, ngáne ábenlé-'ε boŋ awóged Sánygwéé menyiŋge.

33 Boŋ mod awě awóó mmwaád mekan mé nkōŋsé mwēn ne mwēn móó ákamtanné póndé ésyāāl. Póndé téé akamtan ngáne átánjéné mwaád menyiŋge awóged.

34 Né-óó, akamtan mekan méβε akamtan ahóg. Mmwaád-te awě eewóó nchóm, ké'ε mwān a mwaád awě eébii mwenchóm, Sánygwéé móó ákamtanné ne ngáne ábeléé mó. Mekan mésyāāl níme ábeléé níme nlém rísyāāl ríbbāg áhed ábel ásan á'sō é' Dyōb. Boŋ mmwaád awě awóó nchóm mekan mé nkōŋsé mwēn ne mwēn móó ákamtanné. Póndé téé akamtan ngáne átánjéné nchóm menyiŋge awóged.

35 Nhóbe nímén mekan mésyāāl ábel boŋ méwōŋgen nyé. Meehóbéé μεé nyétánjéné mó ahíd. Boŋ nhede μεé ríwōŋgen nyé áhíd chōm éche étánjéné ábel boŋ nyébenle Sánygwéé ne nlém nhóg.

36 Nzé mod anyíné áá móóchenlé yǎl akób ásin káŋŋ mówōŋ mmwaád awě áhóbé áá mówōó', ákag á'sō áwōŋ mó ngáne nímē mewémtan mélánjé mó. Nē déesaá mbéb.

37 Boŋ nzé mod amaá atii áwe nlém-tē, áde béēnyāgtéé mó boŋ akóbé yǎl, amadé-'ε á nlém-tē áá móówoŋgé ane mmwaád awě áhóbé áá móówōŋ, né ábelé dyam áde áde bwām.

38 Né-óó, nzé mod awóó mmwaád né ábelé dyam á bwām. Mod awě mó-'ε akóbé yǎl boŋ eewóó mmwaád ábelé dyam áde ábóó bwāmbwam.

39 Mmwaád awě awóó nchóm átánjéné abé ne nchóm á alongé áde ásyāāl. Boŋ pen nzé nchóm awédé, awóó kunze áwōŋ mod awě ádáá. Ane mod pen átánjéné abé mod awě adúbpé Sánygwéé.

40 Boŋ ne με, nnyíné μεé mmwaád awě nchóm awédé, ábē menyiŋge nzé adyéé nē áde éewóó'ε nchóm ampée. Mbíi nén μεé Edáédan é Dyōb chíó élyágte με áhób nímén mekan.

8

Paale ahóbé tñŋene medyé níme bébagéé e'diidinge

1 Bōob-pōó, nhóbe tñŋene medyé níme bad bébagéé e'diidinge nēe mende. Edé mbále ngáne éhóbnédé nén bán "Syánē moosyāál debíi dyam." Ene ndín e e'bii bé akan ebele mod abāg kúmbe. Boŋ edanŋe éwéde syánē áte.

2 Nzé mod awémtan áá móbii dyam, ane mod eébii'ε dyam ngáne átánjéné abii.

3 Boŋ nzé mod adáá Dyōb, Dyōb ábelé ábii mó.

⁴ Bɔɔb-pɔɔ, ríhâb tângene adyé dé medyé míme bébageé ediidinge née mende. Debíí nén bán e'diidinge, nádē myõb míme bébénlé mekáá, méesaá dyamdyam. Dyõb ahóg dēmpen dɔɔ ádé.

⁵ Bad béhóbe bán myõb mémpēe míme béchagēé bán myõb médé á nkoŋ mí mín ké'ε á nkoŋ rísé. Edé-'ε mbále bán myõb míme bad bēn bébénlé mekáá ne besāngwéé bé nkõŋsé híin bédé.

⁶ Boŋ kéné debíí bán Dyõb ahóg dɔɔ ádé. Mó adé Titée awě ahagé chõm ésyāāl, mó akáá-'ε boŋ debé á alongé. Sāngwéé nhóg mwēmpen-naá adé. Mó adé Yesu Krístaa. Mbwiined ne mó dɔɔ béchagé chõm ésyāāl. Mbwiined ne mó dɔ-'áá dédíí á nkõŋsé.

⁷ Boŋ saké moosyāāl abíí nímén mekan. Donje á bad pen béménténé ábē e'diidinge edúbé abe nyaa eche kááŋ ne chii nzé bedyág medyé, bédíí bēwēmtan bán bébage nímē myõb edúbé. Nlém méēwúú'é bó á abum, né-ɔɔ bēwēmtan bán nímē medyé mébele béēsā'é á'sō é' Dyõb.

⁸ Ndyééd éhēlē-se ébēl bad bésāŋ á'sō é' Dyõb. Dehēlē-se debé bad bé mbéb nzé dedyéde chɔ́ ké'ε debé bad bé bwām áde déedyédé chɔ́.

⁹ Nyétéd pónde pen ngáne nyēbenladté kunze echē ebāgnédé nyé bad bé Krísto. Nyēbenlad chɔ́ nyaa eche nyēbenlé se áben baányan bé Krísto ábe nímab nlém méēwúú'é á abum bēhún á mbéb-te.

¹⁰ Nzé mod awě nlém méēwúú'é á abum anyiné nyé ábe nyēhóbé bán nyēbíí akan nyēdyág medyé á abón áde nímē myõb, nyēbíí'é bán nén détdé mó nlém á abum ádyé medyé míme bébágé ábē e'diidinge née mende-ye?

¹¹ Né-ɔɔ, wε awě echagé yāl wéé mod awě abíí akan, ehede wéé mwānyon awě Krístaa áwédé áwe nló áwē áyāle ábõŋ e'bii bé akan-ε?

¹² Nzé ebelé mbéb wéε mwānyon, né Krístaa móó ébélé mbéb áyāle ebelé mwānyon a Krísto ebébtéd, ebébté-'é mó nlém á abum.

¹³ Né-ɔɔ, nzé ndyééd eche ndyágkē ebele mwānndé a Krísto ahúne' á mbéb-te, né méedyáá ene ndyééd ámpē mbéd, ábel boŋ, éebēlē se mwānndé ahún á mbéb-te.

9

Kunze e bembapεε bé nlomag ne nsón míme bétāngéné abel

¹ Mε, Paale ndíí mod awě awóó kunze nēngáne bad bēmpēe ábe bédúbpé. Ndíí mbapεε a nlomag. Nnyíne Yesuε, Sāngwéé awéd. Nyéē nyédé nēngáne mbakú áyāl e nsón míme Sāngwéé ábélé mbwiined ne mε.

² Ké bad bēmpēe béēnyīnē mε nēngáne mbapεε a nlomag, nyépen nyékobé mε nén bán ndíí mbapεε a nlomag. Abé áde nyédíí ne Sāngwéé nyé bēn nyédé née e'chem ábe é'lúmte bán ndíí mbapεε a nlomag.

³ Mekan míme mbélé rílanḡē bad ábe béhōbe mε mam áyāl médíí nén:

⁴ Séewóó'é kunze bad ábe sé ndyééd ne mmítéd áyāl e nsón míme sébelé-ye?

⁵ Séewóó'é kunze átéd mmwaád awě adúbpé Krístaa áhoon sé áke meke melem ngáne ábíníí bembapεε bé nlomag bébelé-ye? Saá nē dɔɔ Sāngwéé baányan ne Petro bébelé-ye?

⁶ Sé Banabase bēnpen-εé sētāngéné nsón abel átōgen échēd yāl-le?

⁷ Sónze ehéé ébelé nsón boŋ mwēn átōgné eche yāl? Nzé-módé áwõŋ nzag e besabé boŋ eedyág ké epum é sabé ehóg? Nzé-módé adé awě abõŋge nyag ésebán aminε' chɔ́ mebíí ákud mílḡ?

⁸ Saké á nsõŋten mí moonyon dēmpen ríhóbéé nímēn mam, mbéndé e Mose chõmpē ehóbé melem.

⁹ Ehóbe nén aá, “Weetádé nyag nsəl eche esálte ngun.” Bɔɔb-pɔɔ, nén álúmte nén bán Dyöb átédé nyag etógnén-ε?

¹⁰ Saá syánē bĕn-εé ákɔŋtεé ahób-ε? Syánē bĕn-εé dekáá boŋ átélé nê. Mod awĕ akwεle nzag abele aá móɔkũd mbote, mod awĕ mó-’ε asálte ngun abele nsón aá móɔkũd ngun.

¹¹ Sé bembapεε bé nlomag sĕwéné mekan mé e’dáádəŋ átíntĕ echĕn. Edé mbĕb nzé sĕhĕdné nyé mekan mé nkɔŋsĕ-yε?

¹² Nzé bad bĕmpĕe béwóó kunze áhĕdĕn nyé bwĕm, né sĕwóó’ĕ kunze áhĕdĕn nyé bwĕm tómaa bó-yε?

Boŋ séĕbĕnledéé enén kunze. Sĕkwĕntĕné metake mésyāāł, ábel boŋ nén déĕkāā’ akal dé nkalaŋ ní bwām míme sékaleé tĕŋgene Krĭstā.

¹³ Nyĕbíí bwām bán bad ábe bébele nsón á Ndáb-e-Dyöb, áhed dɔɔ bó-’ε bĕkudéé echab ndyééd. Melemlem nê dɔɔ bad ábe bébele nsón ábe mendε á menyán mé mendε, áhed dɔɔ bébelé bĕkud akab dé mendε.

¹⁴ Melemlem nê dɔɔ Sáŋgwéé áhóbé aá bad ábe bĕkale nkalaŋ ní bwām bĕkud ntɔgĕn wĕε bad ábe bĕkanléé míme nkalaŋ.

¹⁵ Kénĕε édíí nê, meĕbĕnledéé enén kunze ké pɔg. Saá-kaá nê ákáá boŋ rítelé’ enén kálag ábel boŋ bébĕnle me mímén mésyāāł. Mĕkwĕntĕn áwĕ tómaa mod ábel meewóó’ nzɔm ákum ekáá á tĕł tĕŋgene míme nnsón.

¹⁶ Meewóó’ĕ kunze ákum ekáá á tĕł áyāle nkalaŋ ní bwām míme rĭkaleé. Dyöb dĕn dɔɔ áhóbé aá mbĕl mímén nsón. Medim ne me nzé meékale nkalaŋ ní bwām.

¹⁷ Nzé mmĕn-εé mempweđ mímén nsón míme mbĕléé, né nsine nsábe. Boŋ ngáne méepwεdĕé mó, Dyöb dĕn dɔɔ ábágé me mó aá mbĕl.

¹⁸ Nsábe rĭhéé-’ɔ rĭkudéé? Nsábe míme rĭkudéé rĭdíi nén, nzé nkale nkalaŋ ní bwām meéhĕdné bad nsábe, meĕbĕnládtĕ kunze echĕ rĭtĕŋgĕné abĕnled akal áde rĭkaleé nkalaŋ ní bwām.

¹⁹ Ndé ne mmĕn, meésaá ásĕ e mod. Boŋ mbĕlé yĕł ntĕŋ a bad bésyāāł ábel boŋ bad híin bĕtim bad ábe Krĭsto.

²⁰ Ade mbĕléé nsón ne bad bé Israel, mbĕle mam néε mod a Israel ábel boŋ bĕtim bad bé Krĭsto. Kénĕε édíí bán mmĕn meésaá ásĕ e mbéndé éche Moseε, ndé byánán nhĭde chɔ áde mbĕléé nsón átíntĕ e bad ábe béhĭde chɔ. Mbĕle nén ábel boŋ bĕtimĕn Krĭstā.

²¹ Melemlem nzé mbĕle nsón átíntĕ e bad ábe béesĕ ásĕ e mbéndé é Moseε, mbĕlé mbĕlé’ mam néε bó. Mbĕle nén ábel boŋ bĕtimĕn Krĭstā. Nén déesaá bán meehĭdéé mbéndé é Dyöb. Mmĕn nkoó abé ásĕ e mbéndé e Krĭsto.

²² Nzé ndé ne bad ábe ádab adúbe déewúú’ĕ áte, mbĕlé mbé néε bó ábel boŋ bĕtimĕn Krĭstā. Né-ɔɔ, ntimé abé ngáne éboŋnédtĕ mod téé. Mbĕnlad nzii ké ehéé ábel boŋ rĭsoŋ alongé áde bó doŋge á bad.

²³ Mbĕle mímén mésyāāł áyāle nhĕde méé nkalaŋ ní bwām rĭkanlad, ábel boŋ rĭkud nnam míme míme nkalaŋ nípĕεεé.

²⁴ Nyĕbíí bán bad híin bényagte mehélé boŋ mod nhóg abelé atóm baáb, ákũd-tε nsábe. Né-ɔɔ, nyényagte ábel boŋ nyékud nsábe.

²⁵ Mod ké ahéé awĕ aboŋsan ányaged mehélé abelé ásũdĕd yĕł. Abĕle nén ábel boŋ béwáad mó ekóté é edúbé é mbonja. Echĕ ekóté éebeméé, ébĕb. Boŋ nsón míme sébĕléé, sébele mó ákud nsábe míme mébĕ á ngíndé ne á ngíndé.

²⁶ Nê ákáá meényagtĕé kéchán, meeluméé-’ε ábĕm e’chog kéchán.

²⁷ Né-ɔɔ, nwéde yĕł áte, nsudte-’ε chɔ ábel boŋ ébel kéchéé éche rĭhĕdéé me ébel. Mbĕle nén ábel boŋ meémāā bad bĕmpĕe nkalaŋ ní bwām akale boŋ mmĕn meékũdĕ nsábe.

10

Paale aá bad béebenlád myöb mé metóm

¹ A-baányan, ndəə mée nyékamten ábēd betaa ábe Mosεε ályágté'áá áde bébidé á Egipto. Dyöb dénlōmē bó mbag echē elyágté'áá bó. Bó moosyáál bēmpōŋ á edīb é nkwě te ésebán béhóó'.

² Apon áde bēmpōŋgé á edīb é nkwě-te ne abé áde bémbēē ásē e mbag dēmbēl bēnkūd edusen, béhīdē-'ε Mosεε.

³ Bó moosyáál bēndyē ndyééd e edəədəŋ eche Dyöb dénlōmēē bó mbwiined ne menyáké.

⁴ Melemlem bémmwē-'ε mmítéd mé edəədəŋ níme Dyöb dénlōmēē bó mbwiined ne menyáké. Bémmwē mendīb níme Dyöb dēmbēnlé bon mébid á ndim e aláá-te echē embé ne bó. Ene ndim e aláá ebédēε Krīstəə. *

⁵ Bon kénē Dyöb dénkēnwógēnné bó bad híin menyīŋge. Né dénkāŋ anwúú bó, ndim níhentéd bó áte á ehyāŋge.

⁶ Bəəb-pəə, nímén mekan mésyāál médii nēŋgáne elāŋsén ásíim syánē etúu áte, nēn deewóó nlém ábel mbéb ngáne bébélé'áá.

⁷ Nyéēbēnlé myöb mémpēe ngáne bó donge á bad bébēnlé'áá. Eténlédé á kálag e Dyöb nēn bán, "Ábē bad bēndyēε ásē, bēdyāg bwēm, bémwāg mīm, bébelé-'ε mbinde é mekan."

⁸ Syánē deekábé mesón ngáne bó donge á bad bébélé'áá. Nēn dēmbēl Dyöb dénkōgsēn bó, bó bad móom mé e'kálé mébe ne e'kálé é'láán bēwé epun ehóg.

⁹ Syánē deekāgē Sāŋgwéé ngáne ábēd betaa bēmbēnlé bon nyə éwúú bó.

¹⁰ Syánē deenyōŋnád Dyöb áte ngáne bó donge á bad bébélé'áá. Dyöb dénlōm ángel e kwééd ewúú bó.

¹¹ Mmén mam mésyāál mēmbēnléd ábel mébē nēŋgáne elāŋsén wée bad bēmpēe, bēntēl-le mó ásē ásíim syánē etúu áte. Syánē dedé bəəb á pónDé echē nkōŋsé níkwógé ape á asóg.

¹² Né-əə, mod a Krīsto ké ahée awě awémténé aá mótyēēmē á adúbe-tē átéd pónDé ábel bon eékwāg.

¹³ Mekāgsen ké méhéé níme métáné wε, médii nyaa e mekāgsen echē etáne bad bēmpēe. Bon Dyöb áwóó nlém níme bad béhele-se bésom mó nlém á yāl, éemwaá'áa-'ε aá ékud mekāgsen níme métómé wε. PónDé echē mekāgsen mépéé, ábel ebíd mó áte, abe áde ábée wε ŋíne átóm mó áte.

Paale aá bad béetāŋgené ake á ngande é myöb mémpēe

¹⁴ Né-əə, a-baányan, nyéēbēnlé myöb mé metóm.

¹⁵ Nhóbe áwēn née bad ábe níbí mée bēwóó debyéé. Nyébēn nyédol áte chōm éche nílāŋgé nyé.

¹⁶ PónDé eche syánē ábe dedúbpé démíidéé mbwendé ní mīm nhóg, debage Dyöb nsāgnēn níme Krīstəə. Melemlem ne ewele éche débélé déladné ádyé, débélé dedyé yāl echē Krīstəə.

¹⁷ Ngáne édíí bán ewele édíí ehóg, kénēε syánē débúú áte, dedíí yāl póg, áyāle melemlem mé ewele móo dédyāgkē.

¹⁸ Nyénəne bad bé Israel, bad ábe bēdyāg medyé níme bēbágé nēŋgáne mendε á menyán, bómpē bēlatan á menyán mé mendε ábe Dyöb edúbé.

¹⁹ Cheé níkoo'é ahób hén? Nhóbé mée e'díidīŋge ábe bad bēbagéé mendε, ne níme mendε níme bēbagéé, bédé dyan-ε?

* **10:4** Ene ndim e aldá ebédēε Krīstəə: Bad bé Israel bēmbíí bán ndim e aláá embé ne bó ngáne békágé'áá á ehyāŋge. Paale aá ene ndim e aláá ebédēε Krīstəə, Krīstəə-'ε abédé ne bó.

20 Aáy, chõm éche níhóbeé édíi nén mεέ, mende níme bébagεέ á menyán níme bad ábe béédúbpe Dyõb, saké Dyõb dáo bébagεέ mó, e'dáádə̀ə̀n bé mbéb báo bébagεέ. Meéhēdēē mεέ nyéwõn dyamdyam abel ne e'dáádə̀ə̀n bé mbéb.

21 Nyéehēlēē-se nyémīdē mbwendé níme Sàngwéé nyémīdē-'ε níme e'dáádə̀ə̀n bé mbéb. Nyéehēlēē-se nyéladné' ádyé ndyééd á menyán mé mende níme Sàngwéé, nyéladné-'ε ádyé á menyán mé e'dáádə̀ə̀n bé mbéb.

22 Dehede Dyõb kónjí ahé áte-yε? Dewēmtan bán dedé ngíne tómaa mó-yε?

Kéchéé éche débεlé débεl chó abε Dyõb edúbé

23 Bad béhóbe nén bán “Dewóó kunze ábel kéchéé éche dédáo abel.” Nê adé mbále, bon saké chõm ésyā́l ébóó abel. “Dewóó kunze ábel kéchéé éche dédáo abel”, bon saké chõm ésyā́l épεene nsyā́n.

24 Nyé modmod eéhēdē chõm éche épiinad mwēmpεn bwām bon nyéhede chõm éche éwõngan bad bémpēe.

25 Nyéwóó kunze ádyé kéchéé éche nyécháné á dyon-té adé nyéesεdteé dyam adé débēl bon nlém níkə́gléd nyé á abum t̄ngεne éche chõm éche nyécháné.

26 Eténlédé á kálag e Dyõb nén bán, “Nkõnsé ne chõm ésyā́l éche édé áwēd-te bédíi ábe Sàngwéé.”

27 Nzé mod awē eedúbpe Dyõb alébpé wε áhyε dé ádyé ndyééd, bon etíidé wéé mókag, edyé kéchéé éche ábágé wε ésebán esεdte mó dyamdyam t̄ngεne ene ndyééd. Nlém méekə́glád wε á abum áseded dyam t̄ngεne ene ndyééd.

28 Bon nzé mod alánjé wε aá “Enén ndyééd bēmbε chó nēε mende wéε e'diidingε,” weedyág chó áyāl eché ne ábel bon nlém méekə́glád modmod á abum.

29 Nédē, saké ngáne nê débεnlé bon nlém níkə́gléd wε á abum bon bwāmbwam ngáne nê débεnlé bon aníníi mod átagé áte á nlém-té. Cheé ék̄ə̀n bon nlém níme níkə́glád mod ampée á abum níbel bon meébεnlád kunze eché ebāgnédé mε?

30 Nzé mbagé Dyõb meságnεn áyāle ndyééd eché ábágé mε, chán edíi bán mod ampée ahele áhōbē mε mam mé mbéb áyāl, áyāle níbágé meságnεn.

31 Né-óó, kéchéé éche mod ábeléé, ké ádyāg ké ámwāg, ábele chó ésyā́l nyaa eché ebage Dyõb edúbé.

32 Nyébele chõm téé nyaa eché épεénné mpuuté́d, ken wéε bad bé Israel, bad ábe béesē bad bé Israel, ké'ε mwembé ní Dyõb.

33 Nyébele mam melemlem ngáne níbeléé. Nwane áte áwóged mod asyā́l menyínjε áyāl e chõm téé éche níbeléé. Meébēlēē chõm éche ébṍnédé mε bon mbele chõm éche ébṍnédé moosyā́l, ábel bon Dyõb áson alonjé á moosyā́l.

11

1 Né-óó, nyéhíde' nímmēm mbeltéd ngáne mε-'ε níhídeé mbeltéd níme Krístə́ə.

Paale ahóbe t̄ngεne akútεn dé nló á mwembé-te

2 Bóob-póó, nkεne nyé áyāle nyékamtan mε pónde ésyā́l, nyéhíde-'ε elem éche mén'yāgēdtē nyé.

3 Bon ndáo mεé nyésṍntεn nén bán Krístə́ə mó adé nló ámín e baachóm bésyā́l, mwεnchóm-mε abé nló ámín e mwaád. Dyõb dáo-'aá adé nló ámín e Krístə́ə.

4 Mwεnchóm ké ahéé awē akā́nne' ké'ε ahóbe mekan á d̄nín á Dyõb bon akútεn nló, awógte Krístə́ə awē adé nló ámín eché e'són.

5 Mmwaád-te awē akā́nne' ké'ε ahóbe mekan á d̄nín á Dyõb bon eekútεne nló, awógte nchóm awē adé nló ámín eché e'són. Nhə́n̄lén ké nhóg méesaá átínté ene ndín e mmwaád ne mmwaád awē ak̄ə̀néné nló.

⁶ Mmwaád awě eekútán nló, émbē mboŋ né ankəŋ mó ngen póg. Ngáne édíí-'aá dyam dé akwágkē mmwaád ákəən nló ké'ε áselēn nyon, bebaád békútan mímab nló.

⁷ MwENCHÓM eetəŋgenεé nló akúten ngáne édíí bán ahəg áde Dyöb áhagé mó á nwágén míme álúmte éche edúbé. Boŋ ahagé mmwaád álúmed edúbé é mwENCHÓM.

⁸ Dyöb dénkēnhəgēnné mwENCHÓM mmwaád, boŋ anhəgén mmwaád mwENCHÓM.

⁹ Saá-kaá mmwaád ankəŋ boŋ Dyöb áhagé mwENCHÓM boŋ mwENCHÓM mó ankəŋ boŋ Dyöb áhagé mmwaád.

¹⁰ Ayāl e enén nzəm mmwaád átəŋgéné néε áwóó e'chem á nló ábel boŋ ángel ényín.

¹¹ Kénê-'ε, ngáne dédíí nhóg ne Səŋgwéé, mmwaád éēhēlēε-se abé ésebán mwENCHÓM, mwENCHÓM-me éēhēlēε-se abé ésebán mmwaád.

¹² Edé nē áyāle Dyöb dēnhəgén mmwaád mwENCHÓM, nē dó-'aá mmwaád-te áchyáá'ε mwENCHÓM. Boŋ bwēm é'syāal é'húú ne Dyöb.

¹³ Nyébēn nyénən áte, mmwaád átəŋgéné akáne á elad é bad bé Dyöb áde éēkutεεé nló-yε?

¹⁴ Nyaa eche Dyöb áhagé bad chēn eelúmtéé nén bán édé akwágkē mwENCHÓM áte de esid ékwog mó á nló bwāmbwam-ε?

¹⁵ Boŋ nzé esid échábé mmwaád ébele áboŋ. Dyöb ábágé mó esid néε ekúten é nló.

¹⁶ Nzé mod ahede ádén dyam apentεn, chöm ésyāal éche níwóó ahób édii nén mēé, syánē ne mwembé ní Dyöb nísyāal, deewóó'ε nyaa empée eche débēléé mímén mekan, mwembé ní Dyöb-pe méewóó'ε.

Ndyééd e Səŋgú

(Mat 26.26-29; Mak 14.22-25; Luk 22.14-20)

¹⁷ Boŋ təŋgene mímén mekan míme rílāŋgεé nyé bəəb, méēhēlēε-se níkené nyé áyāle nzé nyēbomé ábele Dyöb, mekan mé mbéb móo nyébeleé saké mé bwām.

¹⁸ Dyam dé'sō, nwógé bán nzé nyēbomé néε mwembé, nkabén mbelé mbé átínté echēn, ndúbpe-'ε nén mēé kapóg nē ádé mbále.

¹⁹ Nkabén rítəŋgéné abé átínté echēn pεn, ábel boŋ bad ábe békoo Dyöb ahíd bényinned.

²⁰ Né-óó nzé nyēbomé nēŋgáne elad é bad bé Dyöb, saké Ndyééd e Səŋgú nyedyágkē.

²¹ Ayāle nzé nyēbomé ádyé Ndyééd e Səŋgú, mod téé adyāg eche ndyééd ésebán asine waáb, nē ábele baahóg bébāg nzaa, ábíníí-'ε mím mékób bó.

²² Nédē édé nén bán nyéewóó'ε mímén mendáb míme nyétəŋgéné medyé adyé nyémwāg-ke mím áte-yε? Ké'ε nyēnyíne' bán mwembé ní Dyöb méesaá dyamdyam, nyékwāgtē-'ε bad ábe béewóó chöm éche bedyágkē? Cheé nyéhedeé bán rílāa nyé təŋgene ádén akan? Nyéhede bán níkene nyé-yε? Meēhēlēε-se mbel nē.

²³ Nhóbe nén áyāle chöm éche Səŋgwéé án'yāgēdtē me chōo me-'ε rílāŋgεé nyé nén, mímē nkuu dēn áde békíí Səŋgú Yesue ntúré, antéd ewele,

²⁴ asəgnén Dyöb, ákáb chó áte, áhōbē aá, "Echem yāl nén, ebəgnédé áyāl echēn. Nyébele nén ákamten me."

²⁵ Ade bémáá ndyééd adyé ambēl melelem ne mbwendé mí mím. Anhób aá, "Mmén mbwendé mí mím ndíi melē mékōōlē mé Dyöb míme mímém mekií mésógténé. Nyébele nén pón dé téé ákamten me."

²⁶ Nén álúmte nén bán pón dé téé echē nyedyágkē échēn ewele nyémwāg-ke mímén mím, nyékale kwééd eche Səŋgwéé káəŋ ne á pón dé eche ápéé.

²⁷ Né-ɔ́, kénzée awě adyâg échén ewele, ámwāg-ke nímén mĩm nyaa eche éebāgē Sāngwée edúbé né abelé mbéb t̄ngene ȳl ne mekií nĩme Sāngwée.

²⁸ Né-ɔ́, mod tée ásebe ásimen ȳl boŋ ádyê ewele, ámwê-’ε mĩm nĩme Sāngwée.

²⁹ Nyébel nê áyāle kénzée awě adyâg échē ewele ámwāg-ke nímē mĩm, boŋ eékoo ahé á nlém-tē aá ȳl eche Sāngwée ch́ edé, ákudtéd ȳl nkógsen adyē áde ádyágkē échē ewele, ámwāg-ke nímē mĩm.

³⁰ Nê d́o akáá boŋ nyé bad híin nyéchiitéd, nyékonlé-’ε, donge-’ε béwédé.

³¹ Boŋ nzé syánē desébpé ȳl akáad, né Dyöb déekógsénné syánē.

³² Boŋ Sāngwée akáadte, akógsan-ne syánē áyāle mewusé nĩme débélé ábel boŋ eebáá syánē áyāl áde akāadtē nkõŋsé.

³³ Né-ɔ́, a-baányan, nzé nyélādné ádyé ndyééd e Sāngú, désinē nhóg ne aníní.

³⁴ Nyé ké ahée awě nzaa ékóbé, adyē ndyééd á ndáb, ábel boŋ nzé nyélādné weébēle akan áde débēl boŋ Dyöb akáad wε. T̄ngene mekan mémpēe, nzé mpedé, d́o mēlā’ε nyé ngáne nyétāngéné abel.

12

Nde éche éhúú ne Edáádāŋ éche Esáá

¹ Bɔɔb-pɔɔ a-baányan, ndáá mēé nyébii mbále t̄ngene nde éche Edáádāŋ éche Esáá ébageé.

² Nyébii nēn bán áde nyénkēmbíí’ε Dyöb, béntéd nyé nlém á ábum, bēpānēd nyé nzii ábele myöb nĩme méehōbē akan.

³ Né-ɔ́, ndáá mēé nyébii nēn bán modmod awě Edáádāŋ é Dyöb élyágtéé, éehēlē-se ahób aá, “Ebómán ne Yesue.” Nê d́o-’aá modmod éehēlē-se ahób aá, “Yesue adíi Sāngwée,” étōmēé nê Edáádāŋ éche Esáá élyágté mó.

⁴ Nde édé nyaa ne nyaa, boŋ melemlem mé Edáádāŋ móó mébage échē nde.

⁵ Nyaa éche déhele débēl nsón ní Dyöb édé nyaa ne nyaa, boŋ melemlem mé Dyöb móó bébenléé.

⁶ Ngude eche débēnléé nsón edé nyaa ne nyaa, boŋ melemlem mé Dyöb móó débēnladté áde debyéé ábel nsón.

⁷ Mod-tée akudé chōm éche Edáádāŋ élyágtéé mó abel, nê áde-’ε á mboŋ ní moosyáál.

⁸ Edáádāŋ élyágte mod nhóg áhób dyan ne debyéé, melemlem mé Edáádāŋ mélyāgtē aníní mod áyáged bad ne debyéé.

⁹ Melemlem mé Edáádāŋ nĩme mébele boŋ mod nhóg awón adúbe aá Dyöb débēl dyan áde áhóbé aá ábel bɔɔb ábēl-’ε d́o, nímē melemlem mé Edáádāŋ móó mébage aníní mod ngíne áhood bad.

¹⁰ Echē Edáádāŋ ébage mod nhóg ngíne ábel mekan mé menyáké, ábēl-le aníní álāngē bad mekan á d̄in á Dyöb. Ch́o ébágé-’ε bad bēmpēe debyéé ásoŋten ké chōm éche mod áhóbéé ké’ε ábeleé éhúú ne Edáádāŋ é Dyöb ké’ε éehúú’ε. Melemlem mé Edáádāŋ mébage mod nhóg debyéé áhób mehób mémpēe, ábē-’ε aníní debyéé átóge mehób nĩme ábē bad béhóbéé.

¹¹ Melemlem mé Edáádāŋ móó mébele nímén mekan mésyāál, abage mod tée echē nde ngáne ádáá.

Elad é bad bé Dyöb édii née ȳl póg eche ewóó pág híin

¹² Ȳl edii póg boŋ ewóó pág híin. Kénée édíí-’aá bán ȳl edé pág ne pág, edii ȳl póg. Melemlem nê d́o édíí ne Krístə.

¹³ Melemlem nê dɔɔ syánē moosyǎál, bad bé Israel ne bad ábe béesě bad bé Israel, betāŋ ne kunze, Edǎǎdǎŋ ehóg ébélé dekudé edusen bon debé pág éche ébélé ene yǎl póg. Dyǒb áhédé-’ε syánē melemlem mé Edǎǎdǎŋ á nlém-tê.

¹⁴ Saké pág pág chɔ́ ebelé yǎl e moonyon, bon pág híin.

¹⁵ Nzé ekuu éhɛle-se éhób aá, “Ayǎle nén meésaá ekáá, meésaá á yǎl e moonyon,” nén déélúmtéé bán éesaá á yǎl e moonyon.

¹⁶ Nzé etúu-’ε éhɛle-se éhób aá “Ayǎle méesaá dǐd, méesaá á yǎl e moonyon,” nén déehɛléé-se álúméd bán éesaá áyǎl e ene yǎl.

¹⁷ Nzé yǎl esyǎál embé dǐd dǛmpɛn, né chán ámwagké dyam awóg? Nzé yǎl esyǎál embé etúu chǛmpɛn, né chán ámwagké chǒm elod awóg?

¹⁸ Bon édé nén bán Dyǒb ábánné pág téé á yǎl e moonyon ngáne adáá.

¹⁹ Nzé pág póg chɔ́ yǎl e moonyon émbēē, ne béechǎgké chɔ́ bán yǎl.

²⁰ Edé nén bán pág édé híin bon yǎl póg chɔ́ éwóó chɔ́.

²¹ Né-ɔ́, dǐd déehɛléé-se áláá ekáá aá, “Meetógɛɛwε.” Nlɔ́-’ε méehɛléé-se ríláá mekuu aá, “Meetógɛɛwε.”

²² Etímé anyínned pɛn nén bán pág é yǎl éche dényíneé bán éesaá dyamdiam chɔ́ étómténé etógnén abé.

²³ Pág é yǎl-le éche dényíneé bán éewóó’ε edúbé chɔ́ débageé edúbé bwámbwam. Eche dényíneé-’ε bán éeboó’ε alúmtɛn, chɔ́ dékoo’ε anɔn.

²⁴ Pág échě ébóó alúmtɛn chɔ́-’ε éetógɛɛwε échén pág. Dyǒb ábéle yǎl e moonyon nyaa échě pág éche ényínnad byánán éesaá etógnén, chɔ́ débageé edúbé bwámbwam.

²⁵ Abelé nê ábel bon nkabén méebāg á yǎl e moonyon, bon pɛn pág téé éwǒŋgan waáb.

²⁶ Nzé pág e yǎl póg etage, échíníí ésyǎál chǒmpē ébelé étage’. Nzé pág póg ekudé mekenag, échíníí ámpē ébelé éwógén mó menyíŋge.

²⁷ Né-ɔ́, nyé moosyǎál nyédíi yǎl échě Krístǎ, nyé mod téé-’ε nyédíi pág échě ene yǎl.

²⁸ Dyǒb ábágé bad nsón á mwembé-te nyaa ne nyaa. Asébpé abelé baahóg bembapɛɛ bé nlomag, ámbíd enê, ápwɛdé bekal bé’dǎǎdǎŋ bon ápwɛdé-’ε bemeléede. Ápwɛd-te bad ábe ámbéé ngíne ábel menyáké, ápwɛd bad ábe ábágé ngíne áhood bad, ápwɛd bad ábe béwǒŋgan bad, ápwɛd bad ábe ábágé debyéé ályáged bad, ápwɛd-te bad ábe ábágé debyéé áhób mehób mé bad bémpeé.

²⁹ Saké bad bésyǎál bédé bembapɛɛ bé nlomag, saké bad bésyǎál bédé bekal bé’dǎǎdǎŋ, saké bad bésyǎál bédé bemeléede, saké bad bésyǎál bédé bebel bé menyáké.

³⁰ Saké bad bésyǎál Dyǒb ábágé ngíne áhood bad, saké bad bésyǎál Dyǒb ábágé debyéé áhób mehób mémpē. Saké bad bésyǎál Dyǒb ábágé debyéé átóge mehób mémpē.

³¹ Nyébane nlém áyǎl e nde éche étómténé etógnén abé.

Kénê-’ε méédíi nlúméd nyé nzii empée échě étómténé abon tómaa échíníí.

13

Edé etógnén ádǎŋ bad

¹ Nzé nhóbe mehób mé baányon ne mé ángel bon meédǎ baányon, ehób échém édíi née nkǎŋ níme níbele ntǎgag ké’ε ngǎŋ échě békuméé.

² Nzé mbyéé’ nkalan ní Dyǒb akal, nzé nsǒŋtan mekan mé e’konéd mésyǎál, nwóó debyéé ásyǎál, nwóó-’ε adúbe áde níhɛle-se nhób méé mbǎǎd éhǎŋlɛn e’dii, bon meédǎ bad, né meésaá dyamdiam.

³ Nzé mbage bad chòm ésyāāl éche níwóó, nkwěnténé-'ε áβε echem yāl meé béhyád, áde méedāá'ε baányon, bwám é'héé nê ábélé me?

⁴ Mod awě adāá bad, abelé áwesán, álūmtē-'ε e'bonj bé nlém. Eesíidéé bad, eésaá kúmbe.

⁵ Mod awě adāá bad, eebágké ewan̄ge, eéhēdtēē eche yāl chēmpen bwám, eewámsánné alin, eékonjéé-'ε mekan mé mbéb á nlém-tē.

⁶ Mod awě adāá bad, eewógnéé mekan mé mbéb menyin̄ge, mekan míme métán̄géné móó áwógnéé menyin̄ge.

⁷ Mod awě adāá bad, akobe mekan mésyāāl, adúbpe mekan mésyāāl, awóó' e'lyág bé nlém pón̄dé ésyāāl, ákaá-'ε nlém pón̄dé ésyāāl.

⁸ Edan̄ge éewōó'ε asóg. Ahób dé mehób á d̄in á Dyōb dépě á asóg, ahób dé mehób mémpēe, ámaa, debyéé-'ε áde mod áwóó'ε, ápē á asóg.

⁹ E'bíi bé akan ábesyānē béelónéé mbon, akal áde sékaléé nkalan̄ jí Dyōb, séelónéé mbon.

¹⁰ Bonj áde mekan míme mélóné mbon mépēé, mekan míme méelone mbon mépě á asóg.

¹¹ Ade mbédé mwēndem nhóbé'áá nēe mwēndem, mímem mewēmten mémbēē mewēmten mé mwēndem, ndolé-'ε akan áte nēe mwēndem. Bonj bōob áde nídíi mod ambáá, ntēdté abé á mwēndem.

¹² Denyíne chòm bōob nēngáne á ebudbud-tē á dyenē-te. Bonj ámbid e pón̄dé, syānē déēnyín Dyōb, syānē ne mó dénōnné-'ε e'só ne e'só. Meébudéé Dyōb asōnt̄en bōob bwám, bonj pón̄dé eche ehúe' mēsōnt̄en mó melemlen ngáne mómpē asōnt̄ennē me bwám.

¹³ Né-óó, metote méláán médé; áwón̄ adúbe, áwón̄ e'lyág bé nlém ne áwón̄ edan̄ge. Bonj atote áde átómténé etógnén abé átínté e mímén méláán, ádíi áwón̄ edan̄ge.

14

Nde émpēe éche ehúú ne Edāádān̄

¹ Nyéwan áte ádān̄ bad, nyéwōn̄-'ε nlém áte ákud mende míme Edāádān̄ ébageé nyé, bwámbwam áláa bad mekan á d̄in á Dyōb.

² Mod awě ahóbe mehób mémpēe eehóbéé wéε bad bonj wéε Dyōb dōó áhóbéé. A mbále, modmod eesōnt̄ánné dyam áde áhóbéé. Kénéε ngíne e Edāádān̄ élyágtéé mó áhób mekan, bad ábe álān̄géé míme mekan, ne bó, míme mekan médíi mekan míme mod éēsōnt̄ānnē.

³ Mod awě ahóbe mekan á d̄in á Dyōb, ahóbe mó áwón̄gen bad áwúu áte, áwéd bad nlém á abum ne áhóded bad nlém á abum.

⁴ Bad ábe behóbe mehób mémpēe béwōngan échab yāl bonj bad ábe behóbe mekan á d̄in á Dyōb behóbe mó áwón̄gen mwembé n̄syāāl.

⁵ Ndāá meé nyé moosyāál nyéhóbe mehób mémpēe, bonj métōmtēn adān̄ meé nyéhóbe mekan á d̄in á Dyōb. Mod awě ahóbe mekan á d̄in á Dyōb, atómé mod awě ahóbe mehób mémpēe, éetóméé né atógke' chòm éche áhóbéé ábel bonj áwón̄gen mwembé.

⁶ Né-óó, a-baányan̄, nzé mpedé áwēn bonj nhóbe mehób mémpēe, né chán méwōngēnnē nyé? Meéhēlēē-se nwóngén nyé ké mwātiíd, nzé meépēεne dyam áde Dyōb álúmté me, ké'ε dyam áde mbíi, ké'ε áhób mekan á d̄in á Dyōb, ké'ε dyam áde méyāgēdtē nyé.

⁷ Détéd elon̄ ne ndin̄gé, bwēm ábe béésé á alon̄gé ábe bébenladté ákum mesíke. Chán mod ahéle se abíi nkāngé míme békónéé nzé béekumé mó bwám.

⁸ Nzé mod ahéde elon̄ atón̄ éche élād bad áke á bel, bonj eetóo chó bwám, né chán áhéle ábel bonj bébōnsēn áke á bel?

⁹ Nê dōo édíí ne nyé ámpē. Nzé nyéhede mehób mémpēe ahób boŋ nyéhóbe mekan níme méēwōo nsōŋten, nzé mod eebíi dyam áde nyéhóbeé, né nyéhóbe nēŋgáne epub éche étóme’.

¹⁰ Mehób médé á nkōŋsé-te nyaa ne nyaa, ké ehóg-ke éesaá éche éewóo nsōŋten.

¹¹ Boŋ nzé meebíi ehób éche mod áhóbeé, mod awě ahóbe chó ábē nken áwēm, με-’ε mbé nken áwē.

¹² Ngáne nyéhedeé bán nyébele mekan níme Edáádəŋ é Dyōb élyágtéé nyé abel, nyéwane áte nyébele’ níme mébele boŋ mwembé ríkwogé bwām.

¹³ Né-ζó, mod awě ahóbe mehób mémpēe atāŋgéné akáné ábel boŋ Dyōb ábel mó átóge chōm éche áhóbeé.

¹⁴ Ayāle nzé nkānne’ ne ehób émpēe, échēm edáádəŋ chóo ékānne, boŋ mmēn meebyéé’ é chōm éche ríhóbeé.

¹⁵ Cheé-ῶ rítāŋgéné abel? Ntāŋgéné akáne ne échēm edáádəŋ, nkáné-’ε ne nímmēm nlém. Měkōnē nkāŋgé ne échēm edáádəŋ, ríkōnē-’ε ne nímmēm nlém.

¹⁶ Nzé ebenlad échōŋ edáádəŋ ábe Dyōb mekenag, chán mod a ngēn awě adé ásē, áhōbpē aá, “ébê nê” áde éēsōŋteneé dyam áde éhóbeé.

¹⁷ Ehele-se ékené Dyōb bwām boŋ dyam áde éhóbeé déēwōŋgān mod awě alyáge ásē ne awōŋgen dēn.

¹⁸ Nságnan Dyōb nēn meé nhóbe mehób mémpēe tómaa nyé bad bésyāal,

¹⁹ boŋ kénê, nzé dedé á mwembé-te, mēdāŋ meé ríhōb metote métáan níme méwōŋ nsōŋten, ábel boŋ bad béyáge, tómaa áhōb metote ekálé dyōm níme méēwōo nsōŋten.

²⁰ A-baányan, nyéewóo’ mewēmtēn mé bēndem. Nyébê pen nēe bēndem ábe béebíi chōm éche mbéb rídíí. Boŋ á mewēmtēn nyébê nēe bad ábe békwogé.

²¹ Eténlédé á kálag e Dyōb nēn bán me Sáŋgwéé nhóbe nēn meé, “Měbelén bad ábe béhóbe mehób mémpēe áhōb wéε ábēm bad.

Měbelén e’bēb é’ beken bé bad, boŋ ké ábēm bad béewógénné me.”

²² Né-ζó, ahób dé mehób mémpēe ádíi e’chemléd ne bad ábe béedúbpe, saké ne bad ábe bédúbpe. Ahób-pe mekan á dīn á Dyōb ádíi e’chemléd ne bad ábe bédúbpe, saké ne bad ábe béedúbpe.

²³ Nzé bad bésyāal béhóbe mehób mémpēe áde bédíí á mwembé-te, boŋ donge á bad ábe béēsōŋtene mekan mé Dyōb ké’ε bad ábe béedúbpe Krīstəə bésólé, béehóbpé bán nyépag mīn-ε?

²⁴ Boŋ nzé bad bésyāal béhóbe mekan á dīn á Dyōb, boŋ donge á bad ábe béēsōŋtene chōm éche béhóbeé ké’ε bad ábe béedúbpe Krīstəə bésólé, awóg áde béwōgkē nkalan rí Dyōb, débēl bébíi bán bébele mbéb, békwédé nkáá á’sō é Dyōb.

²⁵ Mmē nkalan méhūd bó mekan níme bēnkoo’ é á nlém-tē. Békwxé-’ε ásē, bébagé Dyōb edúbé béhōbē nēn bán, “Ne mbále, Dyōb áde átīntē echēn.”

Paale ad mpuutéđ mébāg á mwembé-te

²⁶ A-baányan, chōm éche ríkoo’ é ahób édíi nēn, nzé nyēlādné á mwembé-te, mod nhóg abelé awōŋ nkāŋgé, ampée-’ε awōŋ chōm éche áyágtéé, ampée awōŋ dyam áde Dyōb álúmte mó, ampée awōŋ dyam áde áhōbpē á ehób émpēe, ampée-’ε abé awě atógke mehób mémpēe. Nyébele nímmēm mésyāal áwōŋgen mwembé.

²⁷ Nzé bad béhóbe mehób mémpēe, bad béēhōbē tómaa bēlāán, bó mod téé áhōbē ámbíd eche waáb amáá ahób. Mod-te atāŋgéné abé awě atógke chōm éche béhóbeé.

²⁸ Boŋ nzé mod eēsē awě atógke', mod awě ahóbe mehób mémpēe, atǎngéné nēe ádíbé nsəl, áhōbē áwe nlém-tē ne wēe Dyōb.

²⁹ Ade bad bébe ké'ε bélaán bélanǵeé bad mekan á dīn á Dyōb, ábíní bad bétǎngéné béwōglān ábíi ké chōm éche béhóbeé étǎngéné.

³⁰ Boŋ nzé mod adé á mwembé-te awě akudé nkalaŋ níme Dyōb álúmté mó, mod awě ahóbe akan ásóg ahób.

³¹ Nyé moosyāal nyélǎnge bad mekan á dīn á Dyōb nhógē-nhógē ábel boŋ mod téé áyǎgke, nē áwéde-ε mod téé nlém á abum.

³² Nde echē Edǎǎdǎŋ ébageé bad áláa bad mekan á dīn á Dyōb, edii nde éche mod awě ahóbé níme mekan áhēleεe ákamlen.

³³ Dyōb déesaá Dyōb áde ápeene mpuutéđ, nsan móo ápeeneé.

A mwembé ní bad bé Dyōb nísyāal,

³⁴ bebaád bédib nsəl nzé bédé á mwembé-te, bétǎngéné abé ásē e baachóm ngáne mbéndé e Mose éhóbeé.

³⁵ Nzé dyam áde áde bédás abii, bésēdēd ábab bechóm á ndáb. Ayāle édé akwágké mmwaád áhób dyam á mwembé-te.

³⁶ Nyé bad bé Kōrinto, áwēn dǎo eyale é Dyōb émbídtē-ye? Awēn dēmpēe-é eyale é Dyōb émpēe-ye?

³⁷ Nzé mod anyíne yǎl aá módē mod awě alǎnge bad mekan á dīn á Dyōb, ké'ε aá mówōō nde echē ehúú ne Edǎǎdǎŋ, atǎngéné abii aá dyam áde nítenléé nyé ádíi dyam áde Sǎngwéé áhóbé aá nyébel.

³⁸ Boŋ nzé ahóbe aá móchídté nímén mekan nyéhúd mó mǐd áyāl.

³⁹ Né-ǎó, a-baányaŋ, nyébane nlém áláa bad mekan á dīn á Dyōb, boŋ nyéekáá bad áhób mehób mémpēe.

⁴⁰ Nyébele mekan mésyāal bwām, nyébele-ε mó nyaa echē etǎngéné.

15

Mpuu níme Yesu Krístǎ

¹ Bǎǎb-pǎǎ, a-baányaŋ, nkamtan nyé nkalaŋ ní bwām níme mēnkaleé nyé. Nyēnkob mó, mbélé-ε nyēsūmnédé áyāl e adúbe áde nyéwóó.

² Nzé nyédíi nyéchǎngéné áyāl e níme nkalaŋ níme édíi bán móo nípeene e'soóson, né nyéekūd e'soóson, éetóméé né adúbe áde nyédúbpé Krístǎ, dǎ-ε áde ngēn.

³ Menkalé nyé nkalaŋ níme mēnkudté, mó-'aá rítómténé etógnén abé. Mmē nkalaŋ, rídé nēn bán Krístǎ anwé á nló nímeé ngáne éténlédé á kálag e Dyōb.

⁴ Eténlédé nēn bán bēnlímē mó, ápuū ámbíd e e'pun é'láán.

⁵ Anlúmed Petro yǎl, boŋ ámbíd e pǎndé anlúmed-te ábíníi bembapeεe yǎl.

⁶ Ámbíd enē, tómaa mbwókel é bad étáan ábe béhídé'áá mó anlúmed bó yǎl alúmed ahóg. Abé bad híin bédíi bédé á alǎngé chíi, donǵe-ε bémáá awé.

⁷ Ámbíd e pǎndé anlúmed Jemsεe yǎl, boŋ alúmed-te ábíníi bembapeεe bé nlómag bésyāal yǎl.

⁸ Kǎǎŋne á asóg anlúmed mémpēe yǎl, kénéε édíi bán ndíi mod awě bēnchyāā'ε á pǎndé echē bad bēnkēmbíi'ε bán bēchyáa.

⁹ Nhóbe nēn áyāle áfínté e bembapeεe bé nlómag bésyāal, méε ndé mbapeεe awě éesē etógnén. Meékwognedéé áchǎgned ké nēε mbapeεe a nlómag áyāle menhé bad bé mwembé ní Dyōb á meséb.

¹⁰ Boŋ nsimé ní Dyōb mbélé ndé chōm éche rídíi. Mmē nsimé níme Dyōb ábagé-ε me, méesaá ngēn. Boŋ pen mbélé nsón tómaa ábíníi bembapeεe bé nlómag, kénéε édíi bán saké mmēn mbélé'áá níme nsón, nsimé ní Dyōb móo mbédé ne me.

11 Né-òó, ké émbē bán mēé nkanlé nyé nímén nkalan, ké'ε bembapεε bé nlomag ábíní bóó békálé mó, chòm ehóg chóó syáābōó moosyāól sékaléé, mó-'áá nyédúbpé.

Paale ad ngáne Dyōb dēmpuúdté Krīstā,
bad bé Krīsto bómpē bēpuú

12 Bóob áde sékale-'áa nén bán Krīstā apuúdé, chán-nō nyé donje á bad nyéhεle nyéhōbē bán bad ábe bēwédé bēpuú'έ?

13 Nzé ahób áde nyéhóbεé nén bán mpuu méesaá ámbīd e kwééd adé mbále, né élúmte bán Krīstā enkēmpuu'έ.

14 Nzé Krīstā enkēmpuu-'ε, né nkalan míme sékanléé nyé méesaá dyamdyam, né áden adúbe ámpē déesaá dyamdyam.

15 Né nē álúmte nén bán sékale Dyōb metóm áyāl ahób áde séhóbεé bán apuúdté Krīstā. Boη nzé édé mbále nén bán bad bēpuudéé nzé bēwédé, né Dyōb dēnkēmpuúdté Krīstā.

16 Nzé bad ábe bēwédé bēpuudé, né káōηne Krīstā eépuudéé.

17 Nzé Dyōb dēnkēmpuúdté Krīstā, né adúbe áden déesaá dyamdyam, né nyédíi nyédé-'ε á mbéb te.

18 Né élúméd-te bán bad ábe bédúbpé Krīstā ábe bēwédé, bēbóó-'ε.

19 Nzé e'lyág bé nlém ábe séwóó áyāl wéε Krīstā é'sógé áyāl e áden alongé dēmpen, né bad bétāηgéné se ngal atómten dé awóg tómaa nyaa echē béhεle bēwóg bad bēmpēe.

20 Boη édé mbále nén bán Dyōb apuúdté Krīstā. Mó abédé mod a'só apuu átínté e bad ábe bēwédé.

21 Dyam áde mod nhóg ábélé dóó ákáo boη bad bēwāg. Melemlem nē dóó dyam áde mod nhóg ábélé ákáo boη bad bēpuudé'.

22 Bad bésyāāl bēwē abé áde bédíi mod nhóg ne Adamε, melemlem nē dóó Dyōb débεnlé bad bésyāāl bēpuu abé áde bédíi mod nhóg ne Krīstā.

23 Mod téé apuú eche póndé echē átāηgéné apuu. Krīstā, mó awē adé mod a'só apuu, áde ápεé ámpē, bad ábe bédé ábe Krīsto bómpē bēpuú.

24 Ámbīd enē, asóg dēpě. Ene póndé e'dáádāη ábe é'kamlan, benkamlene ne ngíne é nkōηsé, Krīstā āmād echab ngíne. Dó-'áá ábεé nkamlen wéε Dyōb Titée.

25 Krīstā ābē á nkamlen káōη Dyōb ábēl atóm ábē bad bé ekōyí áte, ábānē-'ε bó ásē echē.

26 Mod a ekōyí awē ádimténne atóm áte adíi kwééd.

27 Edé nēηgáne éténlédé á kálag e Dyōb nén bán, “Dyōb ábánné mekan mésyāāl ásē echē.” Elúmte bwām pēn nén bán mekan mésyāāl míme Dyōb áhóbé aá móbānné ásē e Krīstā, Dyōb dēn déesaá áwēd-te.

28 Ade bwēm ésyāāl bémadté abé ásē e nkamlen míme Krīstā, mwēn-ne Mwān a Dyōb, ābē ásē e Dyōb. Dyōb dó-'áá ábánné bwēm é'syāāl ásē echē, ábēl boη mwēn Dyōb-pe ákamlen bwēm é'syāāl ngen póg ne ngen ésyāāl.

29 Bóob-póó, chán-nō déhōbpē áyāl e bad ábe békúdé edusen á nló mí bad ábe bémáá awé? Nzé bad ábe bēwédé béetōgné apuu, cheé ékáo boη bédusán bad á nló mí bad ábe bémáá awé?

30 Cheé-ō ékáo boη sébāg á nsal ní kwééd póndé téé?

31 A-baányāη, mbāg á nsal ní kwééd epun téé. Kúmbe eche mbééné nyé abé áde dédíi mod nhóg ne Yesu Krīstā, Sāηgwéé awēd, chó ekáo boη ríhōbē nén.

32 Nzé nnōné chó á nyaa e moonyoη, nsyāη ké nhóg méesaá né nzum éche syáābe e'loo nyam séwánáá á Efesus. Boη nzé édé nén bán bad ábe bēwédé bēpuú'έ, né dēhōb bán, “Dédyāg, démwāg-ke, áyāle chán mod áwē.”

33 Nyéedōgnād, “E'choη bé mbéb é'bēbte abé á bwām.”

³⁴ Nyéewóó mewēmtēn ámpē nēe e'yókél é' bad, nyésóg-ke mbéb abel. Nyé donje á bad nyéebíi'é Dyöb. Ngáne ríhóbeé nén, nén átəngéné nyé akwágkē akóbed.

Ngáne bad ábe bēwédé bēpuú'é

³⁵ Bon mod ásedéd aáken, “Chán Dyöb áhele ápuūd bad ábe bémáá awé? Yəl éhéé bēwōngē?”

³⁶ Eyókél é chōm, nzé ewené mbál-e-bū éēbēlēē-se ewé bon ekág-ε?

³⁷ Chōm éche bēhágkē á ndəəb édii mbál ngēn, saké alín á bwel ásyāāl áde ákwoge' bēwénéé, bon mbum, kapóg mbum e ngun ké'ε mbum empée.

³⁸ Dyöb dēn dōo ábele' ngáne ádáá bon mbál téé ríwōn yəl eche ríwóó. Abage mbál téé yəl eche etəngéné.

³⁹ Yəl é bwēm é'syāāl ábe é'dé á alongé éesaá nyaa póg. Baányon bēwóó echab ndín e yəl, nyam éwóó echáb, menən méwóó echáb, sūu-ε éwóó echáb.

⁴⁰ Bwēm é'dé ábe é'dé á nkon mímín, é'bé-ε ábe é'dé á nkon rísé. Bwēm bé nkon mí mín é'wóó ábāb e'bon ábe bwēm bé nkon rísé bēewóó'é. Bwēm bé nkon nsé-ε é'wóó ábāb e'bon ábe bwēm bé nkon mí mín bēewóó'é.

⁴¹ Etondeε awóó ábē e'bon, ngən ewóó ábē, betintine-ε bēwóó echáb nyaa e e'bon. Káəne átínté e betintine, e'bon ábe bēwóó é'dé nyaa ne nyaa.

⁴² Nén dōo ébēē ne bad ábe bēpuú. Yəl echē bēlímmeé edii yəl eche ebébe', echē Dyöb ápuudté edii yəl echē eebébé' ámpē.

⁴³ Yəl eche bēlímmeé eebágkē elóon, eewúe-áá áte. Nzé Dyöb ápuúdté chó eboo' elóon bwāmbwam, ewúe-ε áte.

⁴⁴ Ade bēlímmeé chó ebágkē yəl e ekob, bon nzé Dyöb ápuúdté chó ebágke yəl e edəádə. Yəl e ekob edé, yəl e edəádə-ε ámpē edé.

⁴⁵ Eténlédé á kálag e Dyöb nén bán “Mod a e'só, Adamε, Dyöb dēnhəg mós abé nhəgtéd ríme ríwóó alongé.” Bon Adamε a ndimten adii Edəádə eche ébage alongé.

⁴⁶ Saké mod a edəádə mós asébpé abé. Mod a ekob mós asébpé abé bon mod a edəádə mós-ε ábág.

⁴⁷ Mod a'só ambíd á nkōnsé, bēnhəgēn mós ndəəb. Awe mós-ε ampē ámpē, ádyöb dōo abídé.

⁴⁸ Bad ábe bédé á nkōnsé te, bédé nēngáne Adamε awē bēnhəgēnné ndəəb. Abe bós-ε bédé bé dyöb, bédé nēngáne ane awē abídé ádyöb.

⁴⁹ Ngáne déwágné mod awē bēhəgné ndəəb, melelem nē dōo déwāgēnnē ane awē abídé ádyöb.

⁵⁰ A-baányan, chōm éche ríhóbeé édii nén, chōm éche édé á nhəgtéd rí yəl e ekob ne mekií éheléé-se ékūd bwēm bé nkamlēn rí Dyöb. Eche chó-ε éebé abé ne abé éheléé-se ékūd bwēm ábe bēbē abé ne abé.

⁵¹ Nyélám metúu nyéwōg dyam áde rílanjéé nyé áde bad bēebíi'é. Syánē bad bēsyāāl déewáá', bon pen Dyöb déhənlén syánē baásyāāl

⁵² á esón é póndé. Mmē nhənlén mébē á mehélé-te, nēngáne mod áhelεε apēbēd dīd. Nén débēnléd áde bétōngē elon é asóg. Ade bétōngē elon, bad ábe bēwédé bēpuú, bēewáá ámpē, Dyöb déhənlén-ne syánē baásyāāl.

⁵³ Ene yəl eche ebəəde' étim yəl eche éebəó ámpē, yəl eche chó-ε ewág étim yəl eche eewág ámpē.

⁵⁴ Póndé eche yəl echē ebəəde' étimmé yəl echē éebəóde', ne áde yəl eche ewág étimmé yəl echē eewág, élōn ngáne éténlédé á kálag e Dyöb nén bán, “Kwééd éesaá ámpē ne abé dēn, Dyöb átómé chó áte.”

⁵⁵ “A-kwééd, héé echon ngíne átóm mod áte édii? A-kwééd, héé echon ngíne áwóged mod e'wε édii?”

⁵⁶ Mbé́b mósó ñkásá bon kwééd ewónj ngíne áwóged mod e'wε, ngíne e mbé́b-pe ehúú ne mbéndé.

⁵⁷ Bon séságnan Dyöb, mós abelé bon sétóm mbé́b áte mbwiined ne eched Sán, Yesu Krístä.

⁵⁸ Né-óó, a-baányan bé edənge, nyésunen bwám, dyamdyam déehōbtē nyé mekuu ásē. Nyébé nyéεene nsón míme nyébenléé Sánwéé á'sō. Nyébíí nén bán nsón míme nyébenléé Sánwéé ké nhóg méesaá ngên.

16

Bésánjé mənέ áwónjen bad

¹ Bóob-póó, ñláa nyé tñgene mənέ míme nyēnladté áwónjen bad bé Dyöb. Ngáne ménlāá'ε mwembé míme ñdé á Galesia mεé bébel, melemlem nē dós nyémpē nyétāngéné abel.

² Sōndé téé nyé mod téé áhūd mwā mənέ ákoo. Nén ábé nchoo ne mod téé ñímē nkudāg. Nzé nyébelé nén, nē débēl nzé mpedé, nyéetōgēnné mənέ asaa ámpē.

³ Nzé mpedé, bad ábe nyépwédé, mēlōmēn bó kálag áκεen ñímē mənέ míme nyéládé á Jerusalem.

⁴ Nzé ébóó bán mémpē ñke, né béwoón mε.

Ntii míme Paale ábéle

⁵ Mēpě áwēn nzé mmaá atóm á mbwóg e Masedonia, áyāle nwóó mewēmtēn átóm á mbwóg e Masedonia.

⁶ Kapóg mēdyéé ne nyé, nhele mbé-'ε ne nyé pónde esyáál echē ahéb ábágkē ngíne, ábel bon nyéwōngēn mε áκεen échēm eke á'sō hōm ké áhéé áde ñkagké.

⁷ Meédäá'ε mεé dényínēn ámīn-ámīn. Nwóó mewēmtēn ábé ne nyé mwā etún é pónde nzé Sánwéé akwēténé.

⁸ Mēdyéé á Efesus hén kááj ne á pónde e ngande e Pentekōs.

⁹ Nzii enēdnédé mε hén ábel kase e nsón, kénée édíí bán bad híin bédé ábe bétāngan mε.

¹⁰ Nzé Timotie apedé áwēn, nyényín bán nyékobé mós nken áyāle melemlem mé nsón míme Sánwéé míme ábeléé, mós mémpē ñbeléé.

¹¹ Modmod eenyíné mós nkōjtéd. Nyéwōngēn mós áκεen échē eke á'sō ne nsan ábel bon bóobe bad bé Krísto bēmpēe ábe ñsinéé, bétān mε hén.

¹² Bóob-póó, tñgene awesyánē mwānyan Apolose, menwéd mós nlém á abum bwāmbwam áhye dé anōn nyé nchoo ne bad bé Krísto bēmpēe, bon pen eewóó'ε nlém ápe bóob. Nzé etál ébāgnédé mós, āpě.

Melēnten mé asóg

¹³ Nyétéd pónde, nyésunen á adúbe-tē. Nyéwúu nlém á abum, nyéwúu áte.

¹⁴ Kéchéé éche nyébeleé, nyélúmed bán nyédäá nhóg ne aníníí.

¹⁵ Bóob-póó a-baányan, nyébíí nén bán abum á ndáb áde Stefanuse dós ábédé dé'só á mbwóg e Akaya ádúbe Krístä, bēbágé-'ε echab yāl ábele bad bé Dyöb. Ncháa nyé nén mεé,

¹⁶ nyébé ásē e ndín é bad née échén, ne ásē e mod ké ahéé ampée awē abele nsón née ñmēn.

¹⁷ Ndé menyīnge ne epe éche Stefanase, Fōtunatusε ne Akaikusε. Bépédé áyāle bēbéle nsón míme nyéntāngēnnē abel.

¹⁸ Bēwédé mε nlém á abum ngáne bēnwēdtē nyémpē nlém á abum. Kéchéé éche échén ndín é bad éhóbeé, nyétāngéné bó edúbé ábe.

¹⁹ Mwembé míme ñdé á mbwóg e Esia ñlómme nyé melɛntɛn. Akwilaa bó Prisia ne mwembé míme ñbome áwab ndáb, bélómme nyé melɛntɛn ne ñlém nhóg á ñin áde Sánḡwéé.

²⁰ Ábed baányan bé Krísto ábe bédé hén bélómme nyé melɛntɛn. Nyéhê nhóg ne aníí tál.

²¹ Me Paale, mbenlad éhém ekáá átele nyé ñmém melɛntɛn.

²² Kénzée awě eédəə Sánḡwéé ebómán ne mó. A-Sánḡú awêd, hyăg!

²³ Nsimé míme Sánḡú Yesuε ñbê ne nyé.

²⁴ Ndəə nyé bad bésyāāl á ñin áde Yesu Krístəə.

Kálag echě elónténé éβε echě Paale áténlé Baá Kōrinto Ndibned n kálag

Enén kálag chó edé kálag echě elónténé éβε, echě Paale áténlé bad bé dyad á Kōrinto áde ábédé á Masedonia. Paale antél chó á pónde echě mam méekage'aá bóbβε mwembé nime mbédé á Kōrinto. Bad behóg átíntê e nímê mwembé bēnhōb Paale mekan mé mbéb á yǎl, bon kénê Paale anwónj nlém bwāmbwam aá bób̄b̄ō bétim ásē. Ade bēntimmé-'ε ásē, Paale anwóg menyinje bwāmbwam. A kálag-tê wén, Paale ahóbé ngáne bóbβε bad bé mwembé bé Kōrinto bēmbēē. Awēd-te ahóbé nzom echě ekáá bon átelé' enén kálag ne e'yale ábe é'wúú áte t̄ngene nzyáñ éche ákúdé ne atyéem̄en áde baahóg átíntê e mwembé bétyéémánnáá mó. Alúmté-'ε nímē menyinje ngáne nyaa echě átélé enén kálag, ébélé bad bétédte abel dé mbéb bon bób̄b̄ō bétim-me ásē. Acháa-'ε mwembé aá bésaa mōné ne nlém nhóg áwónjen betóótōkē bé bad bé Krīsto ábe bēbédé á mbwóg e Judeya. A kálag-tê wē ámpē, Paale ahóbe mekan álúmed aá móbēdē mbapεε a nlómag a mbále awē Yesu Krīstəə. Ambel nén áyāle nguse é bad ébédé á Kōrinto échě ênchag yǎl bán bembapεε bé nlómag bé mbále ábe Krīstəə, bán Paale-'ε adé mbapεε a nlómag a metóm.

Nkabtéd n kálag

Ndibned n kálag 1.1-11

Paale ne mwembé n dyad á Kōrinto 1.12-7.16

Asañned bad bé Krīsto á mbwóg e Judeya mōné 8.1-9.15

Paale mbapεε a nlómag a mbále awē Krīstəə 10.1-13.10

Melent̄en mé asóg 13.11-13

¹ Mε Paale, mbapεε a nlómag awē Yesu Krīstəə ngáne Dyōb átíídé, mε-éé ntelé enén kálag. Mε ne awēd mwānyan a Krīsto, Timotiε, sêlómme' nyé elad e bad bé Dyōb ábe bédé á dyad á Kōrinto ne bad bé Dyōb bésyāal ábe bédé á mbwóg e Akaya, melent̄en.

² Nsimé ne nsañ n Dyōb Titée awêd ne Sánjú Yesu Krīstəə, mbê ne nyé.

Dyōb áwéde' moosyāal nlém á abum

³ Syánē déken Dyōb, Sáá awē awēd Sánjúwéé, Yesu Krīstəə. Mó adé Titée awē awóge moosyāal ngal, abé-'ε Dyōb áde áwéde' moosyāal nlém á abum.

⁴ Awéde' syánē nlém á abum áyāle ndutul ésyāal eche dékudéé, ábel bon syánē ámpē déhel bad nlém awéd á abum ábe bómpē békude nyaa e ndutul ké ehéé. Déwêd bó nlém á abum melemlen ngáne Dyōb áwédeé syánē nlém á abum.

⁵ Ngáne Krīstəə ákúdé'áá metake, née syánē ámpē dékudéé metake áyāl echē. Né-ōó, abé áde dédíí ne Yesu Krīstəə, Dyōb déwêd syánē ámpē nlém á abum bwāmbwam.

⁶ Nzé sêkude metake édii áwéd nyé nlém á abum ne áwónjen nyé ákud e'sooson. Nzé sêkudé e'wéd bé nlém á abum né nyémpē nyéékúd e'wéd bé nlém á abum, nyékúd-te ngine áwes̄en melemlen mé metake ne e'kanj bé nlém ngáne sémpē séwéséné.

⁷ Sêsumé nlém áwēn bwāmbwam. Sêbíí nén bán nzé nyékude' metake melemlen ngáne sémpē sékudéé, Dyōb déwêd nyé nlém á abum melemlen ngáne áwéde-'ε sé.

⁸ A-baányan, sêdǎá bán nyésǒnten nyaa e metake echě sékúdé á mbwóg e Esia. Metake míme sênkudté mēndenléd sé nyaa echě sēnwēmtēnnē bán séebáá á alongé.

⁹ Sēnwēmtén nén bán bébǐdté mbakú bán béwúu sé. Bon sékudé'áá mímén metake ábel séesūmē' nlem áwēd yǎl, bon pen sésum wéε Dyǒb, mó awě apuudte bad.

¹⁰ Kénéε édíi bán sēmbé á nsal ní kwééd, ansǒn sé. Nzé sêdé á ndutul-tê, Dyǒb débē áson sé. Sēsumé-'ε nlem nén bán ábē áson sé pónké téé eche sébēē á ndutul ámpē.

¹¹ Áson sé akánned áde nyékánnadté sé. Bad híin bēlad mekáá ákánned sé, Dyǒb-pe dénaméd sé. Nén débēl bad híin bésāgnēn Dyǒb áson áde ásóó sé.

Paale ahudé eke ásē

¹² Dyam ádé áde ábélé sêdé kúmbe. Nlem níkenlé sé á abum nén bán, abé áde séwóó á nkǒnsé-te wén, tanje nyaa eche sédíi ne nyé, ne nlem míme rísáá ne nlem nhóg, ádíi nyaa eche Dyǒb ábélé áá ébē. Adén abé dénkēmbáá ne debyéé á moonyon bon débē ne nsimé ní Dyǒb.

¹³ Chǒm éche sétenléé nyé édíi éche nyéhenlé alán, nyésǒntén-ne. Nsumé nlem méé nyésǒntēn mímén mekan pónké ésyāāl.

¹⁴ Ngáne nyémáá donje á mekan tǎngene sé asǒnten, ndúbpé nén méé nyéēkon sé asǒnten bwám. Nén débēl á pónké eche Sǎngú Yesue ápéé, nyéēhel ahób bán nyéde kúmbe ne sé melemlem ngáne sémpē séhenlé ahób bán sêde kúmbe ne nyé.

¹⁵ Adúbe áde méndūbēē méé nén ádé mbále mentíi méé mésēbē ape áwen ábel bon nyétombwen ngen éche élonťéné ébe.

¹⁶ Mentíi méé mēhyě áwēn nzé nkag á mbwóg e Masedonia, mentíi-'ε ámpē méé á ehúu métyēem áwēn ábel bon nyéwǒngēn me áke á mbwóg e Judeya.

¹⁷ Ade mēmbenlé mímén ntii, énkēmbáá éche níheláá-se níhǎnlén nlem á abum. Meébēlēē mímém ntii á nyaa e moonyon. Meésáá néε mod awě akwentan áá, “Eε, mébēl.” Bon ámbíd e pónké átim ahób áá, “Aáy, méebenlé.”

¹⁸ A'sǒ é' Dyǒb áde ábele ngáne ahóbé áá móǒbēl, nzé sélángé nyé bán séēbēl dyam, sébelé sébēl-le dó.

¹⁹ Nzom echě ekáá bon nén ábe edii áyāle nkalan ní bwám tǎngene Mwǎn a Dyǒb, Yesu Krístǎ, míme me, Sailase ne Timotie sékánlé'áá nyé. Yesue eehóbéé áá móǒbēl dyam bon eéťimé dó ábel. Yesu Krístǎ ábele dyam áde ahóbé áá móǒbēl.

²⁰ Chǒm ésyāāl éche Dyǒb ahóbé áá móǒbēl, ábelé mébenlad ábel áde ábélé bon debé ne Krístǎ. Nén dóo ákáá bon áyāle mekan míme Yesue ábeleé syánē déhǒbē bán, “Ebē nē” ábel bon Dyǒb ákud edúbé.

²¹ Dyǒb dóo ábélé bon syánē debé dédūbpē Krístǎ. Dyǒb dēn dóo áwógté syánē ábē ne Krístǎ.

²² Ahédé-'ε syánē ábē e'chem ábe é'lúmte bán syánē dedé ábē bad, ahé-'ε syánē éche Edǎádǎn éche Esáá á nlem-tê álúmed nén bán deékúd bwēm é'syāāl ábe ahóbé áá móǒbē syánē.

²³ Dyǒb ádé me mbón nén áá chǒm éche níhóbéé édé mbále. Nzom echě enkǎn bon menkēntim ámbíd á dyad á Kōrinto, edii áyāle meéhede'áá méé níwóged nyé ndutul.

²⁴ Sééhēdēē bán ébē byánán sēnyágté nyé ádúbe kéchéé. Bon pen sébele nsón ne nyé, ábel bon nyébē menyinjε áyāle nyésūmné á adúbe-tē.

2

¹ Né-ɔ́, memmäd á nlém-tê nén mɛé méehyaá nyé anyín ámpē. Nzé mēmpē nwógté'áá nyé ndutul.

² Nzé nwógté nyé ndutul, mod éebáá awě äwōgēd mɛ menyinge, áyāle nwógté bad ndutul ábe bémbē béwógte' mɛ menyinge.

³ Nén dɔ́ dēnkāḡ boḡ rítēlē nyé enén ndín e kálag. Meéhede'aá mɛé nzé mpedé áwēn, nyé bad ábe nyēwógte' mɛ menyinge, nyēwóged mɛ ndutul. Ndúbpé nén mɛé nzé ndé menyinge, né nyé moosyā́l nyéēbē menyinge.

⁴ Ntēnlé nyé enén kálag nyaa eche rítelē áyāle membé ndutul, metake mébé mɛ á nlém-tê, rítelē-'ε chɔ́ ne mɛsɔ́d. Menkēntelēé nyé chɔ́ ábel boḡ nyēwógt ndutul, boḡ mentelē nyé chɔ́ ábel nyébíi ngáne rídáá nyé bwāmbwam.

Paale ad bad bé Kōrinto bélagsen mod awě abelé mbéb

⁵ Nzé mod abelé dyam áde áwógté bad ndutul, saké áwēm dēmpɛn dɔ́ ábélé dɔ́, né abelé dɔ́ wéε nyé moosyā́l ámpē. Boḡ ádén dyam ádíi dyam áde méēhōbēē bwāmbwam.

⁶ Nkógsen míme bad híin átíntē echēn bébágé ene ndín e mod, ríkwógnédé mɔ́.

⁷ Boḡ nyētāḡgéné néε nyélagéséné mɔ́ nyēwéd-te mɔ́ nlém á abum, ábel ndutul eche ákúdé eetómtán mɔ́ adenled.

⁸ Né-ɔ́, ncháa nyé mɛé nyélúmed mɔ́ bán nyédíi nyédáá mɔ́.

⁹ Nzom echě enkāḡ boḡ rítēlē nyé enén kálag edíi ábíi nzé nyéēbēl mam mésyā́l míme ríhóbé mɛé nyébel.

¹⁰ Kénzée awě nyélagéséné, mémpē nlágséné mɔ́. Dyam áde rílagéséné, nzé édé bán nlágséné dɔ́, né nlagsan dɔ́ áyāl echēn. Krístā́ abelé abíi-'ε áá nlágséné dɔ́.

¹¹ Debele nê ábel boḡ Satanε eetómé' syánē áte, éesaá bán syánē deebíi'ε mwane míme Satanε.

Békale nkalaḡ tâḡgēne melē mékālē

¹² Ade mpedé á dyad á Troas, ákal nkalaḡ mí bwām míme Krístā́, Dyōb dēnnednéd mɛ nzii ábel míme nsón.

¹³ Boḡ nlém ménkēmbáá mɛ bwām á abum áyāle menkēntánné Titusε, mwānned a Krístā́ awě sūmā sēbele nsón. Né-ɔ́, menlyágtén bó, ríkāḡ-ke mɛ á mbwóg e Masedonia.

¹⁴ Nságnan Dyōb áyāle ayōḡké ábel syā́a dehele' míme nkalaḡ akal. Abé áde dédíi ne Krístā́ ábélé dedé nēḡgáne bad ábe Dyōb ákóbé boḡ ályāgtē áke dé akal nkalaḡ mí bwām mebwóg mésyā́l. Dyōb ábélé bad bébyéε Yesu Krístā́ áyāle míme nkalaḡ míme syā́a dékalé. Mmē nkalaḡ ríkag átíntē e bad ngáne elod é bwām.

¹⁵ Elod é bwām, elod é Krísto, chɔ́ dédíi á'sō é' Dyōb. Nzé dekale nkalaḡ tâḡgēne Krístā́, bad bésyā́l ábe bédúbpé míme nkalaḡ míme dékálé, Dyōb ásoo' ádāb alongé. Boḡ bad bésyā́l ábe bédúbpé míme nkalaḡ, Dyōb déesoó'ε ádāb alongé.

¹⁶ Ne bad ábe bédé á nzii echě epágnédé Dyōb á yāl, nkalaḡ mí bwām míme syā́a dékanléé bó rídé áwāb nēḡgáne ebébtéd é elod éche éwúε' bó. Abíníi-'ε ábe bédé á nzii áke wéε Dyōb nkalaḡ mí bwām míme syā́a dékanléé bó, rídíi nēḡgáne elod é bwām áyāle syā́a delāḡge bó bán bébē á alongé ne Dyōb á ngíndé ne á ngíndé. Nzé-ɔ́ adé awě ahéεε ábel enén nyaa e nsón?

¹⁷ Séesaá ngáne bad ábíníi híin ábe békale eyale é Dyōb ábel boḡ békud nsyāḡ. Ne sé séēbēlēē nê, áyāle Dyōb álómé sé ákal nkalaḡ mí bwām, míme nkalaḡ sēkale' mɔ́ ne nlém nhóg abé áde sédíi mod nhóg ne Krístā́, debíi-'ε nén bán Dyōb dɔ́ álómé syánē ábel míme nsón.

3

Bekal bé nkalanj mé melě mékōlě

¹ Nyēwémténé bán sēhóbe' mekan mé bwám t̄ngene échēd yāl ámpē-yē? Nyēwémténé bán séēbe nyé kálag ké'ε sēhēd kálag áwēn, álúmed nén bán sēkwognédé ábel nsón átíntē echēn, ngáne bad bēmpēe bēbeléé-yē? Séebenlé nē.

² Nyēdii sé á nlém-tē nēngáne kálag echē bétélé bonj bad bēsýāāl bēlāā ábíi chōm éche édé áwēd-te.

³ Nyēlūmtē' bán nyēdii kálag echē Krīstāā átélé bonj alómén sé. Enén kálag eesaá kálag echē béténlé ínke bonj edii echē Edāádān é Dyōb áde ábage alongé étélé. Bēnkēntenlé enén kálag á melāa m̄n, níme métánlé, bonj bēntel chó á nlém mí baányonj.

⁴ Sēhóbe nén áyāle sēsúme nlém ne Dyōb abé áde sédíi ne Krīstāā.

⁵ Sé bēn séēhēlēē-se sēhób bán sēhele-se sébēl nímén nsón. Sé bēn séēhēlēē-se sébēl mó. Dyōb dōo ábélé bonj séhēl mó abel.

⁶ Abelé sēkwōgnédé ákal nímē nkalanj mé melě mékōlě. Méesaá nkalanj áhíd mbéndé é melě mé nchun. Bad ábe bēhíde ene mbéndé bēwāg, bēēbāg-kaá ne Dyōb. Nkalanj áhíd melě mékōlě níme séyágtēé, rídé nén bán Dyōb ábage bad Edāádān éche Esáá, ébele-'ε bēbē ne mó á ngíndé ne á ngíndé.

⁷ Bōob-pōo, Mosēē an'yáged bad áhíd mbéndé é Dyōb é melě mé nchun. Dyōb dēntēl échén mbéndé ám̄n e melāá níme métánlé bonj ábe Mosēē aá áyágte bad. Ade Dyōb dēmbēé Mosēē échē mbéndé, ambēl e'só é'pēné' Mosēē féréd, álúmed bán échē mbéndé edii échē. E'só é'pēné'áá Mosēē nyaa echē bad bé Israel bēhele'aá mó anōn á'sō. Bonj kénéé é'pēné'áá bwāmbwam, nímē mwayé mēmbootéd asud mwāmp̄in mp̄in. Bad ábe bēnhíd melě mé nchun bēnwē, bēnkēmbāá-'aá ne Dyōb.

⁸ Né-ōo, nzé séyágte bad nkalanj t̄ngene Edāádān é Dyōb, Dyōb dēlūmēd bad nén aá nímē nkalanj rítómténé etógnén abé á alongé á bad.

⁹ Dyōb dēnlūmēd aá módē ngum áde ámbēé Mosēē mbéndé. Echē mbéndé ēmbēl bad bēbíi bán ákōgsēn bó áyāle mbēb níme bēbélé. Bonj anabpé echē ngum álúmed abel áde ábélé bonj sékalé' nímē nkalanj níme rílūmtē ngáne bad bēkobnadté áwe e'só.

¹⁰ Mbéndé éche Mosēē áyágté'áá bad bōod áhíd mbéndé é Dyōb émbē etógnén. Ayáged áde séyágtēé bad bōob bán Dyōb dēlāgsēn bó mbēb, bēbelé-'ε ngáne áhedéé, dōo átómténé etógnén abé.

¹¹ Kénéé edii bán Dyōb dēnlūmēd ngáne ádíi etógnén áde ábélé melě mé nchun, melě níme mēmbē á esōj é pōndé, alúmté aá mótōmtēnē etógnén abé abel áde ábélé melě méēkōlě. Mmén melě méēkōlě mōo méhāj̄léné alongé á bad, mébē-'ε abé ne abé.

¹² Né-ōo ngáne sēsúme nlém bán nkalanj níme sékaléé rídé etógnén bwāmbwam, sékale mó ésebán sēbāa'.

¹³ Séesaá nēngáne Mosēē. Mosēē ankúdtén e'só ábel bonj bad bé Israel bēēnyíné ngáne e'só ábe é'pēné'áá mó é'dímēé.

¹⁴ Bonj bēnkēnsōjtēnné. A mbále, bootyaa ene pōndé ápe chii, bēheleé asōjtén nén bán apen áde e'só é'pēné'áá Mosēē, nímē mpentéd r̄súdé. Pōndé ké ehéé nzé bad bēwógé mod aláá kálag e melě mé nchun, bēēsōjtānnē chōm éche bēwógé. Edé nēngáne abad ákúténé bó mewēmtēn. Nzé mod adé ne Krīstāā dēmp̄en dōo ásōjtānné.

¹⁵ A mbále, bootyaa ene pōndé ápe chii, pōndé ké ehéé echē bēlāá mbéndé é Mosēē, ébelé ébé byánán abad ákúténé bó nsōjtēn nyaa eche bēheleé chōm éche bēlāá' é abii.

¹⁶ Boŋ nzé bó ké ahée adúbpé Sánjú Yesue, chǒm éche ébág nēngáne abad éche ékutan bó nsōnten ébelé éhide.

¹⁷ Bɔɔb-pɔɔ, Sánjwée adii Edáádəŋ. Kéhée áde Edáádəŋ éche Sánjwée édii, bad béebāgkē á mehaŋ-tê.

¹⁸ Syánē ábe Dyöb áhúdé abad áde dénkütēn syánē e'só, abé ádéd ábele' bad bébii ngáne ehúmé éche Sánjwée épédé abé. Bénýíne' bán abelé syánē ngáne bad ábe bébele ngáne Dyöb áhédé. Edáádəŋ éche Esáá éhəŋlan syánē ahəŋlan ne ahəŋlan ábé ngáne Yesue ábel bad bénýín ngáne ápédé ngíne abé. Sánjwée, mó awě adé Edáádəŋ, mó abele mímén mekan.

4

Yesue alúmté syánē ngáne Dyöb ápédé abé

¹ Ngəl eché Dyöb adii chó ekáá boŋ sékalé' mímén nkalaŋ. Né-ɔɔ, séedonlé mekuu ámbid ákal mó.

² Séebenlé mekan mé e'són míme bad bébelé á mesəəm-tê. Séédōgnē nyé ehób é nsəl, séehəŋlan-naá eyale é Dyöb ádog nyé. Boŋ pen, séyágte' bad eyale é Dyöb nyaa eché bad bésōntēnnē chó. Ngáne séyágteé eyale é Dyöb ne nlém nhóg, modmod eéhēlē-sə ahób á nlém-tê aá sēdōge mó. Sēbii bán Dyöb ábii kéchéé éche sébelé.

³ Nzé donge á bad béehēle nkalaŋ mí bwám míme séyágteé asōnten, né édii wée ábē bad béedúbpé mó. Ngáne béedúbpē Dyöb béebáá ne mó.

⁴ Satane, nkamlene a nkōŋsé, akamlan mewēmtēn míme bad ábe béedúbpé Krístə. Béehēlé-sə bésōntēn bán nkalaŋ mí bwám ílúmté ngáne Krístə ápédé etógnén abé. Krístə adii née Dyöb dēn.

⁵ Nē dɔɔ ákáá boŋ séekālē təŋgene échəd yǎl. Boŋ sékanle nyé bán Yesue mó adé Sánjwée. Sédii bembəledé ábēn áyāl e Yesue.

⁶ Dyöb áde dénhəb aá, “E'nyínen bé ekide é'bē wée ehíntēn énsēbē abé,” mó abelé mímē nkalaŋ təŋgene Yesue ábé nēngáne e'nyínen bé ekide ábe é'pene' syánē á nlém-tê. Syánē baásyāal ábe dedúbpé Yesue bóɔ Dyöb ábēnlé nē. Dyöb ábélé nē ábel boŋ bad bébii nēn bán módé etógnén abii áde bad bébii' é bán Yesu Krístə adii née mó.

⁷ Boŋ nkalaŋ míme Dyöb ábágé sé ákal, ídii chǒm éche étómténé etógnén abé. Sédii nēngáne mbeé e mɔg eché chǒm édii áte. Nēn ábēnlédé ábel boŋ bad bébii nēn bán ngíne eché echabé ámín ehúú ne Dyöb saké ne sé.

⁸ Sēkude nyaa é ndutul híin boŋ séelyāgē awēd-te. Donge á pónde séebyé' é dyam áde sébelé, boŋ séehóbéé nēn bán Dyöb déelúmédté se chǒm éche sétəŋgéné abel.

⁹ Bad bétagte se pónde té boŋ Dyöb déetədté sé. Bélógne sé, boŋ Dyöb déekwəntánné aá béwúu sé.

¹⁰ Kéhée áde sékagké ákal nkalaŋ mí bwám sēhédé á nlém-tê nēn bán bad béhede' sé awúu ngáne bēnwū-é Yesue, boŋ bad bébii bán Yesue adé á alongé, mó-'aá ahág sé ngíne áte abé áde sédii á alongé.

¹¹ Sēbii nēn bán kénéé sédii á alongé bɔɔb, séde benben ne kwéed pónde té áyāle sébenle Yesue. Nēn áde ábel boŋ bébii bán Yesue adé á alongé, mó-'aá ahág sé ngíne áte abé áde sédii á alongé.

¹² Né-ɔɔ, sékwěnténé kwéed ábel boŋ nyékud alongé áde déemaá'.

¹³ Sédii melemlen ngáne mod awě ahóbé ngáne éténlédé á kálag e Dyöb nēn bán “Ndúbpé wε, né-ɔɔ, nkale' təŋgene wε.” Melemlen ngáne ane mod ándūbē Dyöb, sémpē sédúbpé Dyöb, sémpē sédii sékale-'ε təŋgene mó.

¹⁴ Sēbii bán Dyöb áde ápúúdté Sánjú Yesue dépuúd-te sémpē ábé á alongé ámpē ne Yesue. Dyöb dépēn-ne sé ne nyé wée adii.

¹⁵ Metake mésyāāl míme sékudεé médii áwóngen nyé, ábel bon nzé bad híin béwógé eyale é Dyöb, nsimé ní Dyöb mébēl békūd alagsen dé mbéb, bébūd-te mó aságnén. Nén débēl bad híin békene' Dyöb.

¹⁶ Né-ᵛó, séedonlé mekuu ámbīd ákal nkalaní m' bwām, kénéε édíí bán ngíne esude' sé á yāl, kéné Dyöb áwede' sé nlém á abum, áhāg-ke sé ngíne áte mbwe té.

¹⁷ Baá metake ábe sékudεé bᵛᵛᵛ béesaá ábe sétagtεé nlém á abum. Sékude metake bᵛᵛᵛ bon ehúmé éche ébē ne sé échāb ámīn nyaa echē séekamténné metake míme sékudé á nkōjsé wén, ébē-ε ne sé á ngíndé ne á ngíndé.

¹⁸ Nē dᵛᵛ ákásá bon séenyíné' metake míme sékudεé bᵛᵛᵛ néε dyam. Bon sébānné nlém áyāl e bwēm ábe Dyöb ákōjnédé sé, kénéε édíí bán séenyínéé bᵛ. Bwēm ábe sényínéε bᵛᵛᵛ é'dé dásᵛ áyāl e esón é pón dé, bon bwēm ábe séehelée-se sēnyín bᵛᵛᵛ, bēbē á ngíndé ne á ngíndé.

5

Dεékūd yāl ékᵛᵛlē ádyöb

¹ Sēbīí nēn bán échēd yāl éche sébééné á nkōjsé edíí néε e'bem ábe sédyεε' áte. Nzé bēpáá ábē e'bem, sébīí nēn bán séwóó ndáb ádyöb echē moonyon éelóó'ε. Dyöb dᵛᵛ álóó' chᵛ, ébē-ε á ngíndé ne á ngíndé.

² Sékᵛᵛmad áte bᵛᵛᵛ á ebem-tē wén, séwane áte bán ene ndáb echē ebíde' ádyöb ékútēn sé ngáne mbóté ékútanné mod.

³ Nzé sēdé ene ndáb áte, séebáá nēngáne mod awē adé nsöb.

⁴ Abéεn áde sébééné enén yāl á nkōjsé te wén, sékᵛᵛmad áte adenled áde nēn ádenlédé sé. Eesaá nēn bán séhede enén yāl e nkōjsé ahúd, bon séhede yāl ékᵛᵛlē eche edé ádyöb, ábel enén yāl e nkōjsé echē ewág émaa, étim yāl echē ébē á alonjé.

⁵ Dyöb dᵛᵛ ábónséné syánē ákud nímmén nhənlén alómmé-ε syánē échē Edáádəŋ éche Esáá álúmed nēn áá ádén akan débēnléd.

⁶ Né-ᵛó, pón dé téé desume' nlém nēn bán abé áde dédíí ne échén yāl á nkōjsé, deesaá hóm ahóg ne Səŋgwéé.

⁷ Sēdé á alonjé á nkōjsé ne échén yāl, áyāle sédúbpe mó saké ngáne sényínéé mó.

⁸ Sēsumé nlém nēn bán ábe syánē yāl ékᵛᵛlē, séhede-ε échēd yāl é nkōjsé atεde áke débé ne Səŋgú Yesuε.

⁹ Né-ᵛó, nímed nlém nísyāāl níťngéné abé áwóged Yesuε menyínge áyāl e kéchéé éche débēléé, ké ébē bán sédé ne échēd yāl á nkōjsé, kéε séesaá ne chᵛ.

¹⁰ Syánē mod téé átyēēm á nkáásé á'sᵛ ábe Yesu Krīstəə epun éche ákāádtē moosyāál, təŋgene mekan míme ábélé á pón dé echē ábédé á nkōjsé. Mod té ákūd nsábe təŋgene mekan mé bwām kéε mé mbéb míme ábélé.

Abé á nchemtεn ne Dyöb

¹¹ Ngáne sébīí bán Səŋgwéé ákāád bad, sébagé-ε mó edúbé, séwane' áte nēn bán bad bésōŋtēn nēn bán nkalaní míme sékaléé níde mbále. Dyöb ábíí nyaa é bad éche sédíí, mbíí-ε méé nyémpē nyébíí nyaa é bad éche sédíí, ndúbpe-ε méé nyébíí-ε bán sékale mbále.

¹² Séehóbéé mekan mé bwām təŋgene échēd yāl ámpē. Bon pēn séhede bán nyéwōŋ nzəm ábēεn sé kúmbe, ábel bon nyéwōŋ dyam áláa bad ábe bédé kúmbe áyāl e mekan míme bēbēléé míme bad bényínéé, saké áyāl e mekan míme médé bó á nlém-tē.

¹³ Donje á bad bēhóbe bán séhóbe mekan néε bad ábe nló méēsáa'ε áte. Nzé nē adé mbále, né Dyöb dᵛᵛ sébagéé edúbé. Nzé séhóbe mekan néε bad ábe nló nísaá áte, né áwóngen nyé dᵛᵛ séhóbéé.

¹⁴ Edəŋge éche Krīstəə ch́óó étédé sé nlém á abum ábel mekan míme sébɛlɛé, áyālɛ sɛmadé á nlém-tɛ nɛn bán Krīstəə awédé á nló mí moosyáál. Né-óó, édé nɛŋgáne moosyáál áwédé.

¹⁵ Anwé á nló mí moosyáál ábel boŋ bad ábe bédé á alongé, alongé ádáɓ déélūmtɛ bán bédé á alongé áyāl echáb dɛmpɛn. Boŋ pɛn bédé á alongé áyāl e Krīstəə, ḿó awɛ anwé, boŋ Dyöb ápūūd-tɛ ḿó á nló mímb.

¹⁶ Né-óó, bootya bɔɔb, déɛnɔnɛ mod nyaa eche moonyon ɔnɔnɛé. Kɛnɛɛ édíí bán sɛnɔné'áá Krīstəə á nyaa e moonyon, séɛnɔnɛɛ ḿó nɛ ampɛ.

¹⁷ Né-óó, kɛnzéé awɛ adé mod nhóg ne Krīstəə, adíí nhəgtéd mékɔɔlɛ. Mmɛ mbɛltéd mé nchun ńsyáál mímbáá atóm awóó-'ɛ mbɛltéd mékɔɔlɛ ńsyáál bɔɔb.

¹⁸ Mmɛn mbɛltéd mékɔɔlɛ ńhúú ne Dyöb. Abɛlé syánɛ detimé ásé ne Krīstəə, abagé-'ɛ syánɛ nsón ákale bad nɛn bán bɛhɛle bɛbɛ nsan ne Dyöb.

¹⁹ Chǒm éche ńhóɓɛé édíí áyāl e kwééd echɛ Krīstəə áwédé á awɔg. Dyöb ábɛlé bad bɛpédé á nchemtɛn ne ḿó. Dyöb déɛt́óó'áa mbɛb míme bad bɛbɛlé, abagé-'ɛ syánɛ nsón ákale bad nɛn bán bɛhɛle bɛbɛ nsan ne Dyöb.

²⁰ Aláa áde Dyöb álánɔgɛé sé mekan áláa bad sédíí bad ábe bɛhóɓɛ Krīstəə. Sésíme nyé etúu áte á dín á Krīstəə nɛn nyéɛ á nchemtɛn ne Dyöb.

²¹ Dyöb dɛmpwɛd Yesue átag áyāl e mbɛb ńsyáál míme syánɛ débɛlé. Yesue enkɛmbɛnlɛ mbɛb ké nhóg, boŋ kɛnɛ ankwentɛn atag áwɛd nló. Dyöb álágsɛné syánɛ mbɛb ahóɓɛ-'ɛ áá déɛbɛlɛɛ mbɛb ámpɛ melemlem ngáne mómpɛ éɛɛlɛé mbɛb.

6

¹ Né-óó, sé ábe sébɛle' nsón ní Dyöb ne Dyöb, sécháa nyé nɛn bán nsimé ní Dyöb míme nyékudɛé méɛbāg ngɛn.

² Dyöb áhóɓɛ ngáne étɛnlédé nɛn áá,
 “Ade pónɔdé épédé echɛ etánɔgɛné, menwóg chǒm éche nyéhóɓɛ.
 Ade epun é e'soóson-'ɛ épédé, menwónɔgɛn nyé.”

Nyɛnɔne' pónɔdé nɛn bɔɔb echɛ etánɔgɛné, eche nyétánɔgɛné nsimé ní Dyöb akud. Nyɛnɔne', epun épédé éche nyéhɛle nyékud e'soóson.

³ Séekáá'ɛ modmod nzii, ábel boŋ awusé déɛnyínnád áyāl e nsón míme sébɛlɛé.

⁴ Boŋ pɛn, nɛŋgáne bembɔledɛ bé Dyöb, sɛlúmtɛ' yál nyaa ésyáál ábɛ bad ábe bɛbɛle' mekan míme métánɔgɛné. Séwánlɛ e'kan bé nlém é' ngíne tánɔgɛne metake míme sékudɛé, tánɔgɛne alongé áde álɛnlad sé áte, ne ndutul éche étáne sé.

⁵ Sékude mbéte, bɛhág sé á mbwɔg, ndun e mod empɛɛn epuutéd béchodé sé yál áte, sébɛle ntú ní ngíne, sɛnánɔgɛ' e'pin, sédyɛé-'ɛ nzaa.

⁶ Sɛlúmtɛ' ámpɛ bán sédíí bembɔledɛ bé Dyöb ábel áde sébɛlɛé mekan mé bwám ne e'sán bé nlém, ábe áde Dyöb ábágé sé nsónɔtɛn ábíí alongé áde sétánɔgɛné awón, awɛɛn áde séwɛsanné, ne awóon áde séwónɔné bad bɛmpɛe nlém mí bwám. Edáádəŋ éche Esáá ch́óó élyágte sé, sédɔá-'ɛ moosyáál ne nlém nhóg.

⁷ Nkalan míme sékalɛé nídíí nkalan mí mbále, ngíne e Dyöb ch́ó-'áa sébɛnladtɛ ákal ḿó. Ábel áde sébɛlɛé mekan míme métánɔgɛné ábɛlé bad béewóó'ɛ dyam dé mbɛb ké ahóg ábán sé á yál.

⁸ Séɛbɛ sébɛnlɛ Dyöb ké békɛn sé, ké'ɛ béekɛne' sé. Ké bad bɛhóɓɛ sé mekan mé mbɛb áyāl ké'ɛ mekan mé bwám. Bad bɛhóɓɛ bán sɛlúmtɛ bán sédé ndín é bad éche séɛsáá, boŋ sédíí bad ábe séhóɓɛ bán sédé.

⁹ Bad bɛbíí sé bwám boŋ bɛmpɛe bényíne' sé bán sédíí bad ábe béesɛ dyam dé ábɛlɛn. Bad bɛwɛmtan bán séebáá á alongé boŋ kɛnɛ sédíí sédé á alongé. Sékude metake á mekáá mé bad boŋ kɛnɛ, béewúú'ɛ sé.

10 Sédé á ndutul tē, bon kénê, sêwóge menyinge pón dé ésyāā. Kénée édíi bán séebudéé chōm awōn, bon kénê nsón míme sébeléé ríbélé bad híin bédúbpe Dyōb. Né-ōó nê ábélé bébúde bwēm awōn bōab. Kénée séewóó'ē chōmchōm, nhon ní Dyōb rídii mímed.

11 A-bad bé dyad á Kōrinto, sētēnlé nyé chōm ésyāāl ésebán sēkonnad nyé dyamdyam. Sêlúmte-'ε ngáne nlém rídii sé áte áyāl echēn.

12 Sédáá nyé, séebáá-'aá alúmed bán sēdáá nyé. Nyé pen nyélúmte sé nēn nyéédáá'ē sé.

13 Nhóbe áwēn bōab néε ábēm bán. Nyémpē nyédəŋ sé ngáne sémpē sēdáá nyé.

Nyéebēlē' mekan míme bad ábe bēédúbpe Krístəə bēbeléé

14 Nyéebág nlatén ne bad ábe bēédúbpe Krístəə. Nhóbe nēn áyāle bad ábe bétāŋgéné á'sō é' Dyōb, béewóó'ē dyam abelen mekan míme e'bébtéd é' bad bēbeléé. E'nyínen bé e'kíde béewóó'ē dyam abelen ehíntén.

15 Krístəə eewóó'ē dyam abel ne Satanε. Mod awē adúbpe Krístəə eewóó'ē dyam dé abelen mod awē eedúbpe.

16 Ndáb-e-Dyōb eewóó'ē dyam dé abelen ndáb echē bad bēbenléé myōb mémpēe. Nhóbe nēn áyāle dedii ndáb e Dyōb, Dyōb áde áde á alongé. Edé nēn ngáne étēnlédé bán Dyōb áhóbe áá, “Mébē ne ábēm bad, rídyē-'ε áwāb.

Bébelé mé nēngáne ádab Dyōb, mé-'ε météd bó nēngáne ábēm bad.”

17 Sáŋgwéé alāŋge ábē bad áá,

“Né-ōó, nyétede, nyéebág-kε ne bad ábe bēédúbpe mé.

Nyéewóó' dyam abel ne e'bébtéd é mekan míme bēbeléé.

Mēkōb-pe nyé néε ábēm bán.

18 Mébē nyé sáá,

nyé-'ε nyéēbē ábēm bán.

Mε Dyōb á Ngum mé-εé nhóbe'.”

7

1 A-baányan bé edəŋge, ngáne Dyōb áhóbe áá módii awesyánē Sáá, syánē-'ε debé ábe bán, détede mekan míme méwógte syánē mbinde á ekob é yāi ne á edəđəŋ. Syánē débε Dyōb edúbé, déwōŋ-'ε alongé áde ásáá, nê débél débəgé Dyōb edúbé ngáne éhēdnadté.

Paale adé menyinge

2 Nhede méé nyédəŋ sé ne nlém rísyāā. Séēpānnēē modmod, séēbēltēē modmod mbéb, séēdōgēē-'ε modmod.

3 Meehóbéé nēn áhób nyé. Mensébé nyé atele nēn méé, sēdáá nyé bwāmbwam, ké á kwééd ké'ε á alongé, dēbē debé mod nhóg.

4 Nkumne nyé ekáá á tāt. Mbééné nyé kúmbe. Nyéwédé mé nlém á abum bwāmbwam nyaa echē rítómténé menyinge abé kénée sékudéé metake bwāmbwam.

5 Ade sépédé á mbwóg e Masēdonia, sēnkēnkóméé áte. Sēkudé'áá metake nyaa ne nyaa. Bad bēpentánnáá ne sé mbwóg-kε ríbé sé áte áyāle sékāmtánnáá nyé.

6 Bon Dyōb áde áwéde bad ábe béewóó e'lyág bé nlém, nlém á abum, dénwéd syánē nlém á abum alóm áde ánlōmmē Titusε áwesyanē.

7 Saá-kaá échē epe chēmpen ēmbel sêwóg menyinge, bon awéd áde nyénwēdtē mó nlém á abum dénwōgēd sé menyinge. Anláá sé ngáne nyédáá mé anyín bwāmbwam, aláá-'ε sé ngáne nyénwōgkē pél áyāle ndutul eche

ebédé nyé á nlém-tê ngáne nyénkênwógédté με menyinḡe. Anláá-’ε με ngáne nyéwóó nlém áte ábέ με ámbíd. Ade Tituse álángé sé nímén mekan, membé menyinḡe bwâmbwam.

⁸ Kénέε édíí bán ene kálag echě mēntelée nyé enwógéd nyé ndutul, meesaá ngol nén με nténlé nyé chό. Kénέε édíí nén bán membé ngol atel áde mēntenlé chό, nnyíné nén μεέ echem kálag echě nténlé nyé ewíídé nyé nê á esōḡ é pón dé.

⁹ Boḡ bōob ndé menyinḡe, saké áyāle ménwōgēdtē nyé ndutul, boḡ áyāle ndutul eche nyénwōgkē ebélé nyéhāḡléné áden abé dé mbéb nyēbele’ ngáne Dyōb áhedeé. Nyénwōg ndutul ngáne Dyōb áhédé’áá aá nyéwōg. Né-ḡó, ndutul ké ehéé echě sēmbenlé boḡ nyéwōg, enkēmbébénné nyé.

¹⁰ Nzé ndutul edé mod á nlém-tê ngáne Dyōb áhedeé, ane mod abelé ahēḡlén áde abé dé mbéb ábelé’ ngáne Dyōb áhedeé. Nén ábele’ ane mod ákūd e’soóson, nê déewiidéé modmod ámpē. Boḡ bad ábe bédúbpe Dyōb, ndutul echě edé bό á nlém-tê áyāle bédíí baányon ebéle’ bēwāg á edāádāḡ.

¹¹ Boḡ ndutul embé nyé á nlém-tê ngáne Dyōb áhedeé aá ébē. Né-ḡó, nyénone’ chōm éche nê ápíínédé nyé. Nyéhedeé’áá bán mbíi nén μεé nyéwane áte álúmed bad nén bán nyéēbēlēē awusé ké ahóg bōob. Melinḡá mémbe nyé áte nén bán ábέ bad bēbélé awusé á etūn é pón dé nyédé ahób bán nyēlanḡe bό bán bésōg mbéb abel. Nyénwōg mbwōg nén bán Dyōb dékōgsēn nyé nzé nyédé nyēbele échén ndín é mekan. Nyēndāḡ με anyín bwâmbwam, nyénwōḡ nlém ábέ με ámbíd, nyékōgsān-ne bad ábe bēbele mbéb. Abel áde nyébélé nímén mésyāāl, álúmté sé nén bán nyéēbēlēē mekan mé mbéb.

¹² Né-ḡó, kénέε rítélé ene kálag, menkēntenlé chό áyāle mod awē abelé epandé ké’ε mod awē bēpánné boḡ ntelé chό ábel boḡ nyébíi á’sō é’ Dyōb nén bán nyékoó sé adāḡ.

¹³ Nê dōó ákáá boḡ nyéwēdē sé nlém á abum.

Saá-kaá e’wéd bé nlém á abum bēnpen, boḡ sēmbé menyinḡe bwâmbwam anyín áde sennyínnē Tituse adé menyinḡe áde ápédé. Anláá sé ngáne nyébélé boḡ asóg atag áte.

¹⁴ Membé kúmbe áláa Tituse ngáne nyédíí bad bé bwām, nyénkênwógéd-taá με e’sōn áyāle nyēnlúméd nén bán mekan míme ménlāā’ é mó médé mbále, ngáne mekan mésyāāl míme sénlāā’ é nyé médíí mbále.

¹⁵ Nê ábélé míme nlém rítimé’ áwēn tómaa ké ngen e’só, akamtēn áde ákamtanné ngáne nyé moosyāál nyénwōḡē nlém ábel mekan míme ánlāā’ é nyé aá nyébel. Nlém rítimé mó áwēn ámpē nzé akāmténé ngáne nyénkōbpé mó ne edúbé, nyéwōḡgēn-ne mó ne nlém nhóg.

¹⁶ Ndé menyinḡe áyāle nsumé nlém rísyāāl áwēn.

8

Bad bé Krísto bétāḡéné bad ábe bétōḡnéé awōḡen

¹ Bōob-pōó a-baányan, sēhede bán nyébíi nén bán Dyōb ábágé míme nsimé wēe bad bé Dyōb ábe bédé á mwembé míme rídé á mbwōg e Masēdonia ábel boḡ bésále ekáá áte.

² Békúdé metake mé ḡíne míme mékōge bό áte bwâmbwam. Kénέε édíí bán bédé atóg bwâmbwam, bésánlé ekáá áte bwâmbwam, bédé-’ε menyinḡe.

³ Ndé mbōḡ nén μεέ, bēmbě chōm éche bēnwōḡē, bēntōmtēn-ne abe tómaa chōm éche bēmbēē bēbage’. Bēbágé’áá-’ε ngáne nlém mímbā ménlāā’ é bό.

4 Bēnchān syānē bwāmbwam ábē menyīnge áwōngēn bad bé Dyōb bé Jerusalem ngáne bōmpē bébeléé.

5 Bēmbēl tómaa ngáne sénwēmtēnnē. Bēnsēbē ádāb alongé abe á mekáá nīme Sāngwéé. Ámbīd enē bēmbē ádāb alongé áwēd mekáá ngáne Dyōb áhēdēé áá bébel.

6 Né-ṵó, sécháa' Tituse awē ambootéd nīmén nsón ne nyé nén bán ádíi áwōngan nyé, nīmén nsón nīme nyésánlé ekáá áte, nyébāgē-'ε bad kéchéé éche bétógnéné ne nlém nhóg, nyépid mós á asóg.

7 Bōob-pṵó, nyēbele bwām á menzii mésyāal. Adúbe áwúú nyé áte. Nyēkale' nkalaní mī bwām, nyēbíi mekan mé Dyōb, nyēwóó nlém áwōngēn bad nyédāá-'ε sé bwāmbwam. Né-ṵó, séhēde bán nyēbele bwām, kááñne ásale ekáá áte, nyébage-'ε bad kéchéé éche bétógnéné.

8 Meekamlánné nyé ábel nén. Bōñ ngáne rīnyíné bad ábe bédúbpé bēwōngan bad bēmpēe, nhēde mēé nyēmpē nyélúmed ngáne nyédáá bad bēmpēe.

9 Nyēbíi ngáne echēd Sāñ, Yesu Krīstā áwōnganné nyé ásale ekáá áte. Kéchéé éche Dyōb áwóó mós awóó. Bōñ kénē á etútú échēn antēdé nīmē nhōn rīsyāal ádyōb ápē á nkōñsé abé nēe ntógetōke mī mod. Ámbēl nē ábel bōñ nyékud nnam nīme Dyōb ábageé bad.

10 Mbage nyé elébé nén mēé, mwē nīme rítómé nyēmbé bad bé e'só áwōñ nlém áwōngēn bad, nyēmbé-'ε bad bé e'só ábooted bad awōngēn.

11 Bōob-pṵó, nyētāngéné nsón nīme nyébóótédé amad. Nē débēl bad bēbíi nén bán nyédé mboñsén ábe ngáne nyéwóó ápid-te nē á asóg melemlem ngáne nyēmbōñsēnné ábooted nē.

12 Nzé ewóó nīmē nlém ábe mod chōm ngáne éwóó chí, ébelé ékōbnéd ne Dyōb. Dyōb déehēdēé áá mod ábe tómaa chōm éche áwóó.

13 Meehóbéé mēé nwōngēn nīme nyébageé bad rīwōngēn bó bōñ nyé bēn nyébē á metake-tē, bōñ nhēde mēé nyé moosyāal melemlem, nyéwōñ chōm éche ékwógnédé nyé mod-téé.

14 Bōob-pṵó abud áde nyébúdé bwēm awóñ, nyéwōngan bad ábe bēdíi bēhēde', ábel bōñ á pōndé eche nyēmpē nyétógnēnnē bōmpē bēwōngēn nyé. Nē débēl mod téé áwōñ.

15 Eténlédé á kálag e Dyōb nén bán, "Mod awē ambud awóñ, enkēnwōngé tómaa ngáne ántógnēnnē, awe mós-'ε enkēmbud awóñ, andíi anwóñ ngáne ántógnēnnē."

Bélómé Tituse bós á Kōrinto

16 Nságnan Dyōb abe áde ábágé Tituse ámpē nlém áwōngēn nyé melemlem ngáne ábágé mē.

17 Tituse eépāgkē áwēn áyāle sélāngē mós bán apē, bōñ apag kááñ ne áyāle awóó nīmē nlém ápē, apag áyāle mwēn adáá apē.

18 Sélómne mós mwānned a Krīsto ampée. Anén mwānned a Krīsto, abyééné átíntē e mwembé rīsyāal akal áde ákaléé nkalaní mī bwām.

19 Saké alóm áde sélóméé mós dēmpēn, mwembé mēmpwēd mós áhoon sé ngáne sébeléé nsón áwōngēn bad ábel bōñ edúbé éche Sāngwéé ényínned ne álúmed nén bán sēwóó nīmē nlém áwōngēn bó.

20 Séēhēdēē bán modmod áhāb dyam dé mbéb tēngēne nīmén nsón mé asále dé ekáá áte nīme sébeléé.

21 Sēwóó nlém ábel dyam áde átāngéné saké á'sō ábe Sāngwéé dēmpēn bōñ kááñne á'sō é' baányōñ.

22 Sélómé' mwānned a Krīsto áwēn nchoo ne Tituse bó. Alúmté sé á menzii híin áá mós wóó nlém áte áwōngēn nyé. Bōob-pē áde ályágé nlém áwēn, anābpé nlém awóñ áwōngēn nyé.

²³ Tituse mós ne mós ayǒgké me ahoon ábel nsón áwōngēn nyé. Abíníí bǎnned bé Krīsto ábe békag ne Tituse bédii bad ábe mwembé melómé á dīn ádāb, kéhéé-’ε wée békíí mam míme bébeléé mépiinad Krīstæ edúbé.

²⁴ Né-ǒǒ, nyélúmed ábén bad nén bán nyédǎó bó. Abel áde nyébenlé nê, mwembé míme rílómé bó mésōñtēn nén bán nén dǒǒ ákǎá boñ sékumné nyé ekáá á tǎl.

9

Békag bad bé Krīsto bé Jerusalem mǎné asañned

¹ Bǒǒb-pǒǒ, éesaá etógnén me átele nyé tǎngene nsón míme séwōnganné bad bé Dyǒb.

² Mbíí nlém míme nyéwóó áte áwōngēn bó, mbééné-’ε nyé kúmbe awóñ áde nyéwóó nlém áwōngēn bad ábe bédé á mbwǒg e Masēdonia. Menláá bó nén meé, “Nyé ábe nyédé á mbwǒg e Akaya, nyémbé mboñsén se mpú-mwě ábe bó mǎné.” Nlém míme nyéwóó áwōngēn bad rítédé bó bad híin nlém á abum ábel melemem.

³ Bǒǒb-pǒǒ, nlóme’ ábén bǎnned bé Krīsto áwēn, ábel boñ ahób áde séhóbéé bán sékumne nyé ekáá á tǎl déēbāg bán sékale metóm. Boñ ébē bán ngáne rílǎngé bó meé nyéēbē mboñsén ábe bó mǎné, nyéēbē-’ε nê dēn.

⁴ Né-ǒǒ, nzé mpedé áde bad bé Masēdonia bépédé ne me boñ ntáné nyé áde nyéēboñsenéé, séēkwāg bwāmbwam, nyé-’ε ámpē nyékwág.

⁵ Né-ǒǒ, nê dǒǒ ákǎá boñ rídōl áte nén meé édé etógnén álóm ábed bǎnned bé Krīsto á’sō, ábel nyémad nwōngēn míme ríchábé ámīn míme nyéhóbé bán nyéēbe bó, aboñsen. Nzé nyébelé nê, né nwōngēn rísyāāl mébē mboñsén nzé mpedé. Nén délúmed nén bán nyébage ne nlém nhóg saké áyāle sényágté nyé.

⁶ Nyébíi nén bán mod awě eébude awén, eebudté ahúd, awe mó-’ε abudé awén ábüd-tē ahúd.

⁷ Nyé mod té ábe mǎné ngáne míme nlém rílǎngé mó. Mod éēbāgē sé nlém ríkǒglád mó á abum ké’ε ébé byánán bényágté mod. Dyǒb ádáá mod awě abage ne e’sañ bé nlém.

⁸ Dyǒb débe nyé kéchéé éche nyétógnéné abel boñ nyéwōñ chōm ésyāāl éche ékwógnédé nyé ásále ekaá áte ábe bad bémpēe. Nén débēl nyéēbude’ bad mekan mé bwām abele.

⁹ Eténlédé á kálag e Dyǒb nén bán, “Asánlé ekáá áte ábe betóótōkē bé bad nwōngēn, bad béechaténne ábē e’boñ bé nlém.”

¹⁰ Dyǒb dǒǒ ábage bad bwēm ábe béwénéé, ábagé-’ε bad chōm éche bedyákē. Ábe nyé bwēm ésyāāl ábe nyétógnéné áwén, ábēl é’kwōg é’chyáá mbote eche ebuú áte bwāmbwam. Abel nén áyāl e e’boñ bé nlém ábe nyéwóó.

¹¹ Dyǒb débēl nyébé nhōn áyāl e chōm ésyāāl, ábel boñ nyésále ekáá áte. Nén débēl bad híin bésāgnēn Dyǒb áyāle nwōngēn míme nyébageé bó míme ríhuú ne sé.

¹² Abel áde nyébeléé nén, déesaá áwōngēn bad bé Dyǒb dēmpēn, boñ áde kǎōñne álúmed bán bad híin bésāgnan Dyǒb bwāmbwam.

¹³ Mekan míme rímén nsón míme nyébeléé nén mébīdēdtē áwed, mébēl bad híin bébage Dyǒb edúbé áyāle nyébele ngáne nkalañ mí bwām míme Krīstæ ríhóbéé, nyélúmtē-’ε ábēn e’boñ bé nlém wée bad bé Dyǒb ábe bédé á Jerusalem, nyélúmtē-’ε wée bad bé Dyǒb bémpēe.

¹⁴ Béwóó nlém ányín nyé, békānnād-tē nyé áyāle nsimé rí Dyǒb rídé ne nyé. Mmē nsimé ríchábé ámīn bwāmbwam.

¹⁵ Nsāgnēn mbē ne Dyǒb áyāle abagé syánē nsimé míme ríléle ahəgten.

10

*Paale aláṅgé bad bé Kōrinto
ad nímē nsón ntáṅgéné*

¹ Me Paale, me awě mpwiítédé nsudte-’ε yǎl nêṅgáne Krīstəə, ncháa nyé. Baahóg béhóbe’ nén bán nzé ndé ne nyé mbelé níwógé mbwóg. Bán boṅ nzé meésě ne nyé, mbelé nítenlé nyé kálag éche éwúú áte.

² Ncháa nyé nén meé nyéēbēlē’ ngáne ábē bad bébeléé ábel boṅ nzé mpedé áwēn, ríhóbēn nyé ésebán mbáa’ dyaṃdyam. Bad ábe méhōbēnnē bédíí bad ábe béhóbe bán sēbele nsón ngáne bad bé nkōṅsé bébeléé.

³ Kénéé édíí bán sēdé á nkōṅsé-te, séēwānēē nzum ngáne bad bé nkōṅsé béwanéé.

⁴ Bwēm ábe séwannéé nzum béesaá melemlem ngáne ábe bad bé nkōṅsé béwannéé. Boṅ bwēm é’ nzum é’ ngíne é’ Dyōb bós sébenladté ábébed mebwóg mé ngíne nímé ábēd bad bé ekoyí. Abén bwēm é’ nzum bós sébenladté ásuded mpentēn ké ríhée nímé bad bépeeneé nímé meésě mbále.

⁵ Sēbenlad bós ámpē ámad mehób mé kúmbe nímé béhóbeé nímé mébele’ boṅ bad béēbyē’ Dyōb. Sēbele’ bad béhəṅlan níṃab mewēmtēn ábel níṃab mewēmtēn mésyāal mébē nyaa éche Krīstəə áhedeé aá mébē.

⁶ A póndé echě nyébenlé ngáne Krīstəə áhedeé ne nlém nísyāal, dós séboṅsēnné ákōḡsēn kénzée awě alúmté aá móobēnlé ngáne Krīstəə áhedeé.

⁷ Nyénəne’ chōm éche édé nyé á’sō-te. Mod ké ahée awě asumé nlém ne Krīstəə ábíí aá ngáne módíí, nê dós sémpē sédíí ne Krīstəə.

⁸ Ké menkūm ké ekáá á tǎl áyāle ngíne eche Sǎṅgwéeé ábágé me tómaa ngáne níkuméé bōob, méewógké e’són. Abagé me ene ngíne áwéd nyé áte saké ásuded nyé adúbe.

⁹ Mééhēdēē meé ényíned nén bán kálag éche nítenléé nyé édíí áwóged nyé mbwóg.

¹⁰ Nhóbe nén áyāle bad béhóbe bán kálag éche nítenléé nyé éwúú áte, éwóó-’ε, e’yale bé mbéb áte. Béhóbe-’ε ámpē bán boṅ nzé mmēn ndé, meewóó’é ngíne, kéchéé éche ríhóbe-’ε éewóó’é ngíne ké póg.

¹¹ Bad ábe béhóbe nê bēbíí nén bán kéchéé éche nítelé á kálag, nzé meésě ne nyé, mēbel chó nzé ndé ne nyé.

¹² Séēhēlēē-se sēhób mbēd bán sēhəḡtan yǎl, ké’ε sé bán sēdé nyaa póg ne bad ábe béhóbe’ mekan mé bwām áyāl echáb. Boṅ ngáne bēn ne bēn béhəḡtanné yǎl, béhōbe-’ε bán bēn ne bēn bétómné, bédé eyókél.

¹³ Boṅ sé pen séēkūmēē ekáá á tǎl tómaa ngáne sétáṅgéné akum. Hōm áde Dyōb álómé sé aá sébel nsón dós sébéeneé kúmbe. Nsón nímé sébeléé átínté echēn mómpē níde nsón nímé sébéeneé kúmbe.

¹⁴ Séēkūmēē ekáá á tǎl ábel nsón hōm áde Dyōb dénkēnlómmé sé nsón ábel. Sé-’aá sébédé bad bé’sō ábíid nchabnede áhye dé akale nyé nkalan ní bwām nímé Krīstəə.

¹⁵ Séēkūmēē ekáá á tǎl tómaa ngáne sétáṅgéné akum, nédē séēkūmēē ekáá á tǎl áyāl e nsón nímé bad bémpeeé bēbélé. Boṅ pen sēsumé nlém nén bán ngáne áden adúbe ákwogéé, nê dós nsón nímé sébeléé mékwogéé bwāmbwam mebwóg nímé sébeléé nsón.

¹⁶ Nén débēl séēkǎḡ mebwóg mémpēe nímé méchábndé, sékale’ Nkalan ní bwām, ésebán sēkume’ ekáá á tǎl áyāle nsón nímé bad bémpeeé bēbélé mebwóg mémpēe.

¹⁷ Eténlédé á kálag e Dyōb nén bán, “Kénzéeé awě akume’ ekáá á tǎl, atáṅgéné akum ekáá á tǎl, áyāle chōm éche Sǎṅgwéeé ábēnlé mó.”

¹⁸ Saké ahób áde mod áhóbéé yǎl mekan mé bwâm á yǎl dǒo álúmte' bán aköbnédé néε mbapεε a nlómag, bonj mod a mbále awě Dyöb áhóbéé mekan mé bwâm á yǎl mó adé mod awě aköbnédé.

11

Paale ne bembapεε bé nlómag bé metóm

¹ Ncháa nyé nén mée nyémwε níláa nyé mwǎ a akan ké nnyínnéd ké eyókél. Nyébân metúu.

² Nsíide' nyé nyaa echě Dyöb áhεle ásíí nyé. Nyédíi nēngáne ngan e mmwaád echě eébíí mwεnchóm. Ane mmwaád mǒo ríhóbé mée mod nhóg áwōn, ane mod adíi-'ε Yesu Krístəə.

³ Bonj ké nē, ndé mbwóg nén mée ngáne Satanε âmpongé Ifε nló áte ne mímē mwane, melemlem nē dǒo bépongé nyémpē nló áte nyaa echě nyéesummé mímεn nlém rísyāāl ámpē wée Yesu Krístəə nyéebelée-'ε mó ne nlém rísyāāl.

⁴ Nhóbe nén áyāle nzé mod apedé bonj akǎnlé nyé nkalanj míme méesě nkalanj míme Yesuε míme sēnkalée nyé, nyébelé nyésēbēn mó tǎl. Ké'ε nzé akǎnlé nyé tǎngene edǎádəŋ éche éesě edǎádəŋ éche sēnkalée nyé, nyébelé nyékob. Ké-'ε nzé mod akǎnlé nyé nkalanj mí bwâm míme méesě nkalanj mí bwâm míme sékǎnlé nyé, nyébelé nyékōbēn mó mekáá mébe.

⁵ Meedúbpeé mée ábén bad ábe béchágé yǎl bán bédé bembapεε bé nlómag bémbáá bétómé mε áyāl e nsón míme bébelée, nzé nhǎgténé syáābōo.

⁶ Nhεle se meebyéé' dyam ahób áfínté e bad ngáne béhóbéé, bonj nwóo nsōnten tǎngene dyam áde ríhóbéé. Sékélūméd nyé mímén mekan áte híin míme sébelée.

⁷ Ade ríkǎnlé'áá nyé nkalanj mí bwâm míme ríhúú ne Dyöb, menkēnhóbpe mée nyésábe mε. Mensudéd echem yǎl ábel bonj nyéwōn edúbé. Ade mēmbenlé nén, dyam dé mbéb dǒo mēmbenlé-yε?

⁸ Mbēnlé'áá nyé, mwembé mémpēε mēsábpē mε, né-ǒó, ébédεε byánán ndoge' mímē mwembé áwōngen nyé.

⁹ Ade mémbeε-'ε ne nyé donje á pónde meewóo'aá chōmchōm bonj meétagte'aá nyé, áyāle kéchéé éche méntōgnēnnē ábēm baányanj bé Krísto ábe bémbíd á Masεdonia bébágé'áá mε. Ngáne ménkēntagédté nyé ngen e'só, méetagéd-taá nyé pónde ké póg.

¹⁰ Ngáne ríkaleé mbále néε mod a Krísto, modmod á mbwóg e Akaya eéhēlēε-se ábēl se nsóg ekáá akum á tǎl akob áde méekobéé nsábe áwēn.

¹¹ Nyéwémténé bán ahób áde ríhóbé mée méetagédté nyé ákob chōm áwēn ádíi áyāle méedəé'ε nyé-yε? Dyöb ábíí áá ndəó nyé.

¹² Adén akan áde míbelée bōob, mēbē míbelé dó, ábel bonj méebāgē bembapεε bé nlómag bé metóm etál áwōn nzəm ákum ekáá á tǎl áhób nén bán bébele nsón melemlem ngáne sémpē sébelée.

¹³ Echē ndín é bad éche ékume' ekáá á tǎl, bédíi bembapεε bé nlómag bé metóm. Bédoge bad áyāl e nsón míme bébelée, alúmed áde bélúmteé yǎl byánán bédíi bembapεε bé nlómag ábe Krístəə.

¹⁴ Nén déékōmtēε mε yǎl áte, áyāle nén ké Satanε mómpē alúmte yǎl byánán adíi ángel e Dyöb echě esáá.

¹⁵ Né-ǒó, éesaá mε menyáké nzé bembəlede ábe Satanε bómpē bélúmte yǎl byánán bédíi bembəlede ábe béyágte' bad ábel mekan míme métǎngéné ngáne Dyöb áhεdeé. Káəŋne á asóg, nkógsen míme békudté métǎngēn mímāb mbéltéd.

*Metake míme Paale ákúde
néε Mbapεε a nlómag*

16 Nhóbe ámpē nén mēé, modmod eewémtán aá ndé eyókél. Bon nzé nyéwémténé bán ndé eyókél, nyéwôg-kóó chõm éche rílanḡeé nyé abel bon mémpē ríkum ekáá á tâl mwămpîn.

17 Kéchéé éche ríhóbeé bɔɔb éesaá chõm éche Sánḡwéé áhóbé aá ríhób. Nzé nkume' ekáá á tâl áhób kéchéé bɔɔb, né nhóbe nêḡgáne eyókél é mod.

18 Ngáne édíi bán bad híin békume ekáá á tâl néé bad bé nkõḡsé, mémpē mēbēl melelem.

19 Nyébën nyéhóbeé bán debyéé dën-éé nyékúdé, nê ábélé nyékobe ne menyinḡe kéchéé éche e'yókél é' bad éhóbeé.

20 Ké mod átímté' nyé nêḡgáne ntân, ké ádyāḡ nyé bwēm áyāl, ké'ε ádogé nyé, ké'ε áchāḡtē yāl ámîn, ké'ε ábɔm nyé abén á'sō, nyékobe mó.

21 Akwágkē ákóbe mē nén, sênkênwónḡé ene ndín e nlém ábel nyé échē ndín é mekan á yāl.

Nhóbe bɔɔb nêḡgáne eyókél é mod. Mēbē kúmbē, ríkumé-'ε ekáá á tâl áyāl e mekan míme mbelēé melelem nêḡgáne bembapεε bé nlomag bé metóm bēbeléé.

22 Bélánḡé nyé bán bédíi bad bé Hibru bën, mémpē ndíi mod a Hibru. Béhóbé bán bédíi bad bé Israel, mod a Israel móó mémpē rídíi. Béhóbe bán bédíi bad bé mbyaa míme Abrahamε, mod a mbyaa míme Abrahamε móó mémpē rídíi.

23 Béhóbé bán bédíi bembaledε ábe Yesu Krístəə, mémpē nlánḡe nyé mēé mbelé nsón tómaa bó. Nhóbe' bɔɔb nêḡgáne mod awē nló méēsáá'ε áte. Mbélé ntũ rí ngíne tómaa bó, nkénkě á mbwōḡ ngen ne ngen tómaa bó, nkénkūd mbéte é ngíne tómaa bó, nkémbē-'ε á nsəl rí soḡ ngen ne ngen tómaa bó.

24 Bad bé Israel békébõm mē e'tanḡú móom meláán ne abog, ngen étáan.

25 Bad bé Roma békébõmén mē ntón ngen éláán. Ngen póg bad bémpēe békébõmén mē meláá kósḡ bépõn mē awúu. Stíma ékékunnéd sé á edíb é nkwě-te ngen eláán. Póndé póg nhóó'áá á edíb é nkwě, nén dēmbenléd áyāl e epun ehóg ésyāāl, nkuu ne müte. 26 Nkénkě meke bwāmbwam. A meke-tē wê, e'díb é'képõn mē ahóod. Mponé alongé abód á mekáá mé bechíb, á mekáá míme ábêm bad bé Israel ne á mekáá míme bad ábe béesě bad bé Israel. Mponé alongé abód á dyad á mbáá, mípõn alongé abód á ehyánḡe, mípõn alongé abód á edíb é nkwě te, mípõn-ne alongé abód á mekáá mé bad ábe béhóbe bán bédé bad bé Krísto áde béesaá.

27 Mbélé ntũ rí ngíne, nnāḡḡé epin ngen ne ngen. Donḡe á póndé meewóó'aá chõm éche rídyáḡkē ké'ε ké chõm éche rímwáḡkē, meéyōḡke'aá-'ε póndé awón ḡdyé ndyééd. Donḡe á póndé ahéb ábágáá mē á yāl bwāmbwam meewóó'aá-'ε chõm éche ríhágkē á yāl.

28 Ámîn e rímén mésyāāl, nwóó míme nlém áte mbwε-té ânɔn mwembé rísyāāl míme rídé ásē echēm bwām.

29 Nzé mod eewúu áte áyāl e mekan mé Dyõb, mbélé nwóg yāl áte melelem ngáne mómpē áwóḡéé. Nzé bēbēlté mod mbéb, mbélé nwóg ndutul bwāmbwam.

30 Nzé rítánḡéné ekáá akum á tâl, né chõm éche rítánḡéné ekáá akum en á tâl édíi mekan míme mébele' bon bad bényín mē nêḡgáne mod awē eewóó ngíne.

31 Dyõb, Sáá awē Sánḡú Yesuε, abíi aá meékālēē metóm. Mekεnag mébê ne mó á ngíndé ne á ngíndé.

32 Ade mbédé á dyad á Damaskɔs, nkamlεne awē ambé ásē e kân Arεtasε ambané sánze ânɔn nsəl mé e'ké rí dyad rísyāāl ábel bon békõb mē.

33 Bad bēnhē mē á elón-tē, bēbídéd mē á wíndε echē ebédé á eséd éche ênlāḡnéd dyad, bésūdēd mē á ndɔɔb, dóó rínyáḡtē bon ríkē-'ε.

12

Dyöb álúmté Paale mekan á ndóg-te

¹ Měbē nkumé ekáá á tâl. Kénée édíi bán nê déewōngānnē. Boŋ mēkě á'sō áláa nyé tñgēne ndóg éche rínyíné ne mekan níme Sǎngwéé álúmté me.

² Mbíi dyam áde dēmbenléd ne mod awě adúbpé Krístəə nhóg. Dyôm á mwě ne ríniin áde átómé ámbíd, Dyöb dēnsog mó ákēēn mó ádyöb á ndógke echě etómténé achab ámín. Meebíi'é ké ankě áwed á ekob é yǎl ké'ε á edəádəŋ, Dyöb dóg ábíi.

³ Mbíi-'ε chōm éche ébénlédé ane mod áwed, kénée méēbíi'é ké á ekob é yǎl dóg ábédé ké'ε á edəádəŋ, Dyöb dóg ábíi.

⁴ Krístəə ansog mó, ákēēn mó á Paradis. Ahed Dyöb dénlaā mó mekan níme éemwagké aá moonyoŋ a ekob é yǎl áhōb wée bad bémpēe.

⁵ Ayāl e ene ndín e mod dóg mékummé ekáá á tâl saké áyāl echēm chēn. Chōm éche mékuménné ekáá á tâl édíi mekan níme mélúmté' bán nwóó yǎl e moonyoŋ.

⁶ Boŋ ké mendəŋ ké ekáá akum á tâl, méenyínédte nēe eyókél é mod áyāle mbále chóg mékanlé. Méekuménné échē ndín é mekan ekáá á tâl ábel boŋ nyéēbāgē me edúbé áyāle échē ndín é mekan. Boŋ pen ndəó méé nyétéd me ngáne ndíi áyāl e mekan níme mbéléé ne níme ní'yágtéé nyé.

⁷ Boŋ ábel boŋ meebág kúmbe áyāl e níme mekan mé menyáké níme Dyöb álúmté me, boŋ ábēl-le nwóg, Dyöb dēmbēl aá níwōŋ nkole á yǎl níme mbélé'áá me níwógé e'we bwāmbwam. Mmēn nkole mbédéé nēe mészēnzē níme Satane álómé átaged me ábel boŋ meebág kúmbe.

⁸ Nkánne wée Sǎngwéé ngen élaán, níchāā mó méé ákobēn me nímén metake.

⁹ Boŋ chōm éche ánlāā'ε me ébédéé aá, “Nsimé níme mbágé we níkwógé we. Nwédé we áte nyaa echě étóméé metake mésyāāl áte níme éwóó. Ayāle á pónde echě ngíne éēbāgkē mod áte dóg echem ngíne éwōŋganné mó áwéd mó áte.” Bəəb-pəó, mébē menyínge ákum ekáá á tâl áyāl e mekan níme mélúmté' bán ndíi moonyoŋ a ekob, ábel boŋ bad bényín nēn bán ngíne echě Krístəə édé me áte, chóg-aá ewéde me áte.

¹⁰ Né-əó, á yǎl e Krísto, mbélé mbé menyínge ké áde méewúu'ε áte, ké áde bad bésyāā'ε me, ké áde mekan mélénlédé me áte, ké áde bad bétagteé me ké'ε áde ndíi á ndutul tē. Nhóbe nēn áyāle pónde ké ehéé áde méewóó'ε ngíne, Krístəə abelé ábē me ngíne.

Paale atōŋtan mwembé níme níde á Kōrinto

¹¹ Nhóbe nēe eyókél é mod boŋ nyéē nyékəá boŋ níhōbē nē. Nyēmbé nēe nyéhóbeé me mekan mé bwām áyāl. Ké émbē bán meésaa dyam, boŋ pen bad ábe nyéchəgēé bán bembapēe bé nlomag bembáá, béētóméé me áyāl e chōmchōm.

¹² Ade mbédé ne nyé, menwesén álúmed nyé e'chemléd ne ábel menyáké mé ngíne álúmed nēn bán ndíi mbapēe a nlomag awě Dyöb álómé.

¹³ Etóméé abele áde mbénlé nyé boŋ meékwentene méé nyésábe me, nyéláa me nyaa empēe echě rítédé bad bé mwembé níminíi méé bédé me etógnēn tómaa nyé. Nzé édé nēn bán nē áde awusé, nyélagsén me.

¹⁴ Bəəb ndé mboŋsén ápe áwēn ngen éche élónténé élaán boŋ pen méetagédte nyé. Méepāgkē ábel boŋ nyébage me bwēm boŋ nyébēn-éé nyékəá boŋ nípag. Nyétəŋgéné abíi nēn bán besáá ne benyaá bé bán bóó bétəŋgéné ábab bán atəŋen saké bán bétəgné benyaá ne besáá.

¹⁵ Měbē menyínge ábenled kéchéé éche níwóó káəŋne yǎl echēm, áwōŋgen nyé. Nzé ndəó nyé bwāmbwam, nédē nyémpē nyéetəŋgenéé me adəŋ bwāmbwam-ε?

¹⁶ Nyébĕn nyĕbíí nĕn bán menkĕntagédte nyé, bon mod ampée ahóbé áá membé akwáb, nídogné-'é nyé metóm.

¹⁷ Chán mĕndogké nyé? Bad ábe mĕnlōmmĕ áwĕn menláá bó mĕe bédog nyé-ye?

¹⁸ Menchán Tituse mĕé ápe áwĕn, nlómĕn-ne mó aníníí mwánned á Krĭsto. Nédĕ nyĕĕhōb bán áde Tituse ápedé áwĕn, andog nyé-ye? Eesaá mbále nĕn bán sé Titus sĕwóó mewĕmtĕn mehóg-ε?

¹⁹ Kapóg enĕn pón dé esyāál nyĕwĕmtan bán sĕhĕde échĕd yāl nzom asuud ahób áde sĕhóbĕé bán sĕkánlé nyé mbále. Eesaá nĕ, kéchéé éche sĕlāngĕé nyé sĕlāngĕe nyé chó nĕe bad ábe Krĭstā ályágtĕé, Dyōb-pe áwóge' chōm éche sĕhóbĕé. A-baányan bé edāngĕ, kéchéé éche sĕbĕlĕé, sĕbĕle chó áwéd nyé áte.

²⁰ Mbáa' nĕn mĕé áde mĕpĕé áwĕn mĕtān nĕe nyĕbĕlĕé mekan míme méedā'ĕ, mĕ-'ε ámpĕ mĕbĕl mekan míme nyĕedāngĕ. Mbáa' nĕn mĕé áde mĕpĕé, mĕtān ngáne nyĕbĕn ne bĕn nyĕsĕnlĕé, nyĕsíidĕé nhóg ne aníníí, nyĕlĭnĕé nhóg ne aníníí, nĕe nyĕedā'ĕ bán mod ampée awóhĕ edúbé, nĕe nyĕsyāhĕé, nyĕhóbĕé nhóg ne aníníí ámbĭd, nĕe nyĕdíí kúmbĕ, nĕe nyĕbĕlĕé-'ε mam mé epuutéd.

²¹ Mbáa' nĕn mĕé áde mĕpĕé áwĕn ámpĕ, Dyōb déwōgĕd mĕ e'sōn áwĕn é'sō. Mĕsudĕn-ne áyāle bad híin átĭntĕ echĕn bédíí bĕbĕle' mekan mé mbĕb míme bĕbĕlé'áá bōb, ésebán bĕhānlan ádab abé dé mbĕb ábĕl ngáne Dyōb áhĕdĕé. Bĕbĕle' mekan mé mbinde, békábe mesón, bĕbĕle-'ε mekan míme mbinde míme méwōgte bó e'sōn.

13

Paale abage elébé é asóg

¹ Nĕn délōntĕn ngen éláán áde nípagké áwĕn. Etĕnlédé á kálag e Dyōb nĕn bán, “Nzé békáadte mod bĕtāngĕné awóg wĕe mbónĕ ébe ké'ε éláán.”

² Ade mĕmpĕé áwĕn ngen éche énlōntĕn ébe, menláá nyé mĕé mĕkōgsĕn bad ábe bĕbĕle' mbĕb átĭntĕ echĕn. Ndíi nlāngĕ-'ε bó bōb, nlāngĕ-'ε bad bĕmpĕe ábe bōmpĕ bĕbĕle' mbĕb, ké bōb áde méesaá ne nyé. Ade mĕpĕé ámpĕ, méewógké modmod ngal.

³ Ene pón dé dōo nyĕbíí'ĕ bán kéchéé éche rĕhóbĕé éhúú ne Krĭstā. Eesaá nĕn bán Krĭstā eewúu'ĕ áte áyāl e chōm ésyāál eche ábĕlĕé, bon alūmte' eche ngĭne átĭntĕ echĕn.

⁴ Edé mbále nĕn bán Krĭstā nĕngáne moonyon, enkĕnwóngĕ ngĭne áde bĕmbomĕé mó á awōg. Bon kĕnĕ, adé á alongĕ bōb, áyāle Dyōb démbĕnléd eche ngĭne ábane mó á alongĕ ámpĕ. Abé áde sédíí mod nhóg ne Krĭstā, sémpĕ nĕngáne baányon séewúu'ĕ áte. Bon sémpĕ séĕbĕ á alongĕ ne Krĭstā á ngĭne e Dyōb, sébĕlĕ-'ε nyé chōm ésyāál éche sétāngĕné nyé abele.

⁵ Nyé mod téé mwĕn átōh yāl asimĕn, ábíí ké alongĕ ádĕn adé nĕngáne alongĕ á bad ábe bédúbpĕ. Ndúbpĕ mĕé nyé mod téé abíí nĕn áá Yesu Krĭstā adé mó áte. Nzé nyé mod téé asĭmné yāl né nyĕĕbíí nĕn bán á mbále nyĕdé ne Krĭstā.

⁶ Ndúbpĕ mĕé nyĕchemé nĕn bán nsón míme sébĕlĕé nílūmte nĕn bán sédíí bĕmpĕe bé nlómag bé mbále.

⁷ Sékānne Dyōb nĕn bán nyĕĕbĕlĕ' awusé ké ahóg. Séekānnĕé nĕ abĕl bon bad bĕnyĭn bán sédíí bĕmpĕe bé nlómag ábe bĕbĕle nímbab nsón bwām. Bon pen, sékānne' nĕn bán, nyĕbĕle mekan nyaa echĕ étāngĕné kĕnéé édíí bán donĕe á bad bĕhōb bán sélūmteé chōmchōm éche élūmte' bán sédíí bĕmpĕe bé nlómag ábe bĕbĕle nsón bwām.

⁸ Edé nĕn áyāle séĕhĕlĕĕ-sĕ sébĕl dyamdyam áde átāngan nkalan ní bwām ní mbále. Bon pen chōm éche sébĕlĕé édíí áwōngĕn bad ábíí ne ábĕl ngáne nkalan ní bwām rĕhóbĕé.

⁹ Sêbelé sêbé menyinge nzé sênyíné nyébele mekan míme mélúmte nén bán adúbe áwúú nyé áte, ké sépen sênyínnéd bán séewúú'é áte áyāle séenyinéé nzəm ké póg ákógsen nyé. Sêkánne' nén bán Dyöb áwōngēn nyé nímēn mbēltéd mbê bwām ne abé dēn.

¹⁰ Nén dōo ákáo bon ítelé' nímén mekan, kénéé edíí bán meesaá ne nyé. Ntenle nyé ábel bon nzé mpedé áwēn meébēnlād ngíne eche Sāngwéé ábágé me ákáne nyé áte. Kunze eche Sāngwéé ábágé me edíí ábel bon íwōngēn nyé áwéd nyé áte saké ábel bon nibenled chó ásuded nyé.

Melēnten mé asóg

¹¹ Asóged enén kálag, a-baányan, nyébé menyinge. Nlānge nyé meé nyéhəŋlən, áden abé ábê bwām ne abé dēn. Nhəde meé nyéwōg échēm elébé. Nyéwōn mewēmtēn mehóg. Nyébé nsaŋ ne nhóg ne aníníí. Nzé nyébelé nímén mekan mésyāāl, Dyöb áde ábéle bon nyédəən, nyébé-'e nsaŋ ne nhóg ne aníníí, dénaméd nyé.

¹² Nyéhê nhóg ne aníníí tál á dīn á Yesu. Bad bé Dyöb bésyāāl bəlómme nyé melēnten.

¹³ Nkánne' nén meé nsimé míme Sāngú Yesu Krīstəə, edənge é Dyöb, ne nlatēn míme Edəədəŋ éche Esáá épēnēé, bēbê ne nyé.

Kálag echë Paalε áténlé Baá Galesia Ndibned n kálag

Békálé'áá nkalanj mí bwâm tâηgene Yesue átíntê e bad ábe béesë bad bé Israel, bad bēnkōb-pe mó. Atate démbīd áyāl e nímén nkalanj áde áhóbe ké mod atāηgéné mbéndé e Mosεε ahíd ábel boj ákoη mod a Krīsto abé. Paalε alúmté áte nén aá chōm éche ékəə' boj mod ákud alongé áde Krīstəə ábageé édii adúbe áde áwóó. Boj átíntê e mwembé níme mbédé a dyad á Galesia, dyad á mbwóg e Roma e Esia Mainə, bad bébédé ábe bétāηgánnáá ayáge áde Paalε, bēhōbē nén bán mod atāηgéné ahíd mbéndé e Mosεε ábel boj ákobned á'sō é' Dyōb.

Kálag echë Paalε áténlé mwembé ní Galesia ebédé ábel boj bad ábe bēhídé'áá adúbe áde déetāηgene bétim ámbīd bēhíde adúbe á mbále.

Paalε aboótédé enén kálag álumed bad áte kunze echë awóó ábē mbapεε a nlómag awë Yesu Krīstəə. Alúmté áte nén aá abé áde módíi mbapεε a nlómag áhúú ne Dyōb saké ne moonyoη. Alúmté-'ε áte nén aá níme nsón menkoη abé abel nsón átíntê e bad bé Israel. Ahóbé-'ε ámpē nén aá adúbe dēmpen dōó ákəə' boj bad békobned á'sō é' Dyōb. Asóged enén kálag, Paalε alúmté áte nén aá abé á mod a Krīsto ákag ne edāηge éche ehúú mó á nlém tē, adúbe áde adúbpe Krīstəə.

Nkabted n kálag

Ndibned n kálag 1.1-10

Kunze echë Paalε áwóó ábē mbapεε a nlómag 1.11-2.21

Nkalanj mí bwâm mé nsimé ní Dyōb 3.1-4.31

Kunze e mod a Krīsto ne chōm éche átāηgéné abel 5.1-6.10

Nsógten 6.11-18

Paalε alómé melentēn

¹ Me Paalε, mbapεε a nlómag nhóg, me-εé ntelé enén kálag. Saké baányoη bēpwédé me ábē mbapεε a nlómag. Meébēnlád-taá kunze e moonyoη. Boj nímēm mpwēdtéd ríhúú ne Yesu Krīstəə bó Dyōb Titée, awë apuúdté mó.

² Mmēn ne bad bé Krīsto bésyāal ábe bédé ne me hén, sēlōmme' mwembé rísyāal níme rídé á Galesia melentēn.

³ Nsimé ne nsanj ní Dyōb Titée awēd bó Sāηgú Yesu Krīstəə mbê ne nyé.

⁴ Nyēbīi bán Yesu Krīstəə abagé eche yāl áwé áyāl e nímēd mbéb ábel boj áhūd syánē á mbeltéd mé mbéb níme rídé á nkōηsé-te chii. Abelé nē áyāle nē dōó Dyōb Titée ántīi'é.

⁵ Mekenag mébê ne Dyōb á ngíndé ne á ngíndé. Ebê nē.

Nkalanj mí bwâm mémpēe méesaá

⁶ Dyōb ápwédé nyé ábē ábē bad ámbīd e nsimé níme Yesu Krīstəə ábénlé nyé. Boj édé me e'kōmtēn é' yāl-áte ányín nén bán nyēwámséné Dyōb atede, nyēhíde ayáge démpēe áde nyéwémténé bán áde nkalanj mí bwâm.

⁷ Nkalanj mí bwâm mémpēe méesaá. Baahóg bédé ábe bēpuutad nyé. Bēhēde nkalanj mí bwâm níme Yesu Krīstəə ahēηlēn.

⁸ Boj níláa nyé nén mēé, nzé ké sé, ké'ε áηgel ehúú ádyōb boj ekānlé nyé nkalanj mí bwâm níme rídé nhēηlēn ne níme sēnkaleé nyé, e'dim é'bê ne mó.

⁹ Sēmmād nyé aláa, nlāηge-'ε nyēmpē mēé, kēnzéé awë akānlé nyé nkalanj mí bwâm níme rídé nhēηlēn ne níme sēnkaleé nyé, boj nyékōb-pe, e'dim é'bê ne ane mod.

¹⁰ Ngáne ríhóbēé nén, nyéewémtán nén bán nhede' meé baányon béchəge' me dīn á bwâm. Meéhēdēē nê. Dyöb dōó ríhedeé meé áchəge' me dīn á bwâm. Nzé émbē nén bán ndii nhede meé baányon béchəge' me dīn á bwâm, né meésáá mbəlede awě Krístəə.

Nkalan míme Paale ríhuú ne Krístəə

¹¹ A-baányon, nhede' meé nyébii nén bán nkalan mí bwâm míme ríkánlé nyé, mééhūu' é ne moonyon.

¹² Moonyon ké nhóg eelāngeé me míme nkalan, modmod eeyágte' áa me. Bon Yesu Krístəə mwēn mōó alúmté me míme mekan áte.

¹³ Nyéwógé ngáne ádēm alonjé démbēē ngen e'só ádē ríhídé' áá mbeltéd mí bad bé Israel. Nyéwógé nén bán ntagtē' áá bad bé Krísto ne nhel rísyāāl. Nhédé' áá meé mímad bó moosyāál.

¹⁴ Nhídé' áá ayáge á bad bé Israel tómaa bēd bésyāāl ábe syāābōō sēbédé kōd. Menwōj- 'e kán áte bwāmbwam áhíd elem éche ábēd betaa.

¹⁵ Bon kénēé ébédé nê, Dyöb démmād me apwed né bēēchyáá' é me. Anchélé me ne míme nsimé, ábele mō.

¹⁶ Anlúmed me awe Mwān ábel bon ríkanle bad ábe béesē bad bé Israel nkalan mí bwâm míme ane Mwān. Ade ábélé nê, menkēntánné modmod meé ayáged me dyam áde rítāngéné ábel.

¹⁷ Bon ábwōg-ábwōg menkē á mbwōg e Arebia. Ambíd e pōndé, mentīm ámbíd á dyad á Damaskōs. Menkēnkaá-' áá ké á Jerusalem áke dényīn bad ábe bēnsēbē bembapēé bé nlomag abé.

¹⁸ Ambíd e mwě rílaán dōó nkíí á Jerusalem ányīn Petro.* Membé ne mō áwed dyōm dé e'pun ne é'táan.

¹⁹ Menkēnyīnné mbapēé a nlomag ampée ké nhóg ésebé Jemse, Sāngú Yesue mwānyon.

²⁰ Mam míme rítenléé nyé médé mbále. Dyöb ábíí áá saké metóm mōó ríkaléé.

²¹ Ade ríhuú á Jerusalem, menkē á mbwōg e Siria ne á mbwōg e Silisia.

²² Ene pōndé né bad bé Krísto bé mwembé mé myad mé mbwōg e Judeya bēēbīí' é me.

²³ Bēwógé' áá wógén bán, “mod awě ahágé' áá bad bé Krísto á meséb mwēn atimé bōōb akanle bad áá bad bédúbe Yesu Krístəə, melemlem mé adúbe míme áhédé' áá abóded.”

²⁴ Dyam áde Dyöb ábénlé me dēmbēl békéné' áá Dyöb.

2

Bembapēé bé nlomag ábinií béchémé nsón míme Paale

¹ Ambíd e dyōm á mwě ne ríniin, menkē á Jerusalem ámpē. Ene pōndé menkē áwed ne Banabase, menwálé-' e Tituse áyāl.

² Menkē áwed áyāle Dyöb dénhōb áá ríke. Ade míbédé áwed, syāābe belyáged bé mwembé sēnkē kun. Mentánléd bó nkalan mí bwâm míme mēnkáléé bad ábe béesē bad bé Israel. Membel nê ábán nén nsón míme míbélé, ne míme rídii mbele', méēbōō' ngēn.

³ Bēnkōb dyam áde ménlāā' é bó. Ké Tituse awě ambé mod a lonj á Grikia awě abédé ne me, bēnkēnyágédté mō nén bán bētāngéné mō ayag.

⁴ Kénē, donje á bad bé metóm ábe bēnsōl átínté e bad bé Krísto byánán bōmpē bédé bad bé Krísto bēhédé' áá bán bēyag mō. Abē bad bēnsōl átínté echēd á mesōm-tē ábel bēnyīn ngáne débēléé mekan ne kunze esyāál áyāle

* **1:18 Petro:** Kálag é'só éwóó Sepase. Adé dīn ádíi melemlem néé Petro.

syánē dedé ne Yesuε. Béhédé'áá bán débê betāη, déhíde' mbéndé e bad bé Israel.

⁵ Bon sēnkēnháá bó etál ké mwāmpin, áyāle sēhedé'áá nēn bán nyébê nyébii ngáne mbáale e nkalanη mí bwām ékóó abé.

⁶ Bad-te ámpē ábe bébédé áhed néε belyáged bé mwembé, bēnkēnwōngé dyamdyam ábád ámín e mam níme ní'yágté. Ké né-'ε, abé áde bémbēε belyáged dénkēnwōngé dyamdyam abel ne με áyāle moosyáál adii nyaa póg á'sō é' Dyōb.

⁷ Bon bēntim anyín nēn bán Dyōb ábágé με ekag ákale bad ábe béesě bad bé Israel nkalanη mí bwām.

⁸ Edé nēn bán, Dyōb ádē ápwédé Petro ábé mbapεε a nlomag wée bad bé Israel, dō-'áá ápwédé mémpē ábé mbapεε a nlomag wée bad ábe béesě bad bé Israel.

⁹ Ade Jemσε, Petro ne Jone ábe bad bémbī' é néε mekon mé mwembé bényíné bán Dyōb ábágé με níme nsimé ábé mbapεε a nlomag, bēnhē sé Banabase ekáá-áte, álúmed nēn bán békóbé sé néε bad ábe bóbō bebele' nsón nhóg. Syáábō sēntii nēn bán, sébê sékanle bad ábe béesě bad bé Israel nkalanη mí bwām, bó-'ε bébê bēkanle bad bé Israel.

¹⁰ Bēnlāā sé pen bán, séēchatán betóótōkē bé bad awōηgen. Nē dō-'áá ábédé dyam áde mēndəη' é abel bwāmbwam.

Paale akánné Petro áte á dyad á Antyog

¹¹ Ade Petro ápédé á Antyog, menkáné mó áte áfintē e bad áyāle abel'áá dyam áde déebo.

¹² Ade ápédé áwed pεén, ammentén ndyééd adyé ne bad bé Krīsto ábe béesě bad bé Israel. Bon áde donge á bad bé Israel bébídé wée Jemse á Jerusalem bon bépe á Antyog, Petro ambootéd mekuu adol ámbíd. Eedyáge'áá ndyééd ámpē ne ábē bad ábe béesě bad bé Israel. Ambel nē áyāle abáá'áá epepé é bad ábe bēhóbé'áá bán bétāηgéné bad ábe béesě bad bé Israel ayag.

¹³ Nē dēmbēl bad bé Israel ábe bémbē bad bé Krīsto bómpē bēmbootéd mekuu adol ámbíd. Kóηne Banabase mómpē anhíd bó abel ádē awusé.

¹⁴ Ade nínyíné nēn μεé béebeléε mam ngáne nkalanη mí bwām níhóbéε áá bébel, menláá Petro á'sō wée bó moosyáál μεé, “Ké néε édii mod a Israel, etēdté mbeltéd mí bad bé Israel, ebele mam bōob néε bad ábe béesě bad bé Israel. Chán-nō éhele ényágté' bad ábe béesě bad bé Israel áhíd mbeltéd mí bad bé Israel?”

¹⁵ Sōo bēn awē dedé bán bé Israel se á nchyáátén, deésáá néε bad ábe béesě bad bé Israel ábe débii nēn bán béebii' é mbéndé é Dyōb.

¹⁶ Bon kēnē, debii nēn bán Dyōb déekobéé mod néε mod awē asáá áyāle áhídeé mbéndé. Adúbe áde mod ádúbpé Yesu Krīstə dōo ábele' bon Dyōb ákōb mod. Né-ōó ké syánē ámpē dedúbpé Yesu Krīstə abel bon Dyōb ákōb syánē áyāle adúbe áde dédúbpé Yesuε saké áyāle dehíde mbéndé. Dyōb déekobéé modmod áyāle áhídeé mbéndé.

¹⁷ Ahed áde déhedéé bán désāη á'sō é' Dyōb áyāle adúbe áde dédúbpé Krīstə, ábele donge á bad bé Israel bényíne' syánē néε bebel bé mbéb áyāle deehídeé mbéndé é bad bé Israel ámpē. Nédē élūmte' bán Krīstə móo abelte' syánē mbéb-ε? Aáy, nē déehelée-se ábé.

¹⁸ Bon nzé ntimé ámbíd ámpē bon nhíde' mbéndé éche mēmmadté atede, né nkwedé mbéndé.

¹⁹ Nzé bēhídeé mbéndé chó ne chó, né nwédé. Né mbéndé chēn-naá ewúu με. Bon Yesu Krīstə anhúd με á mbéndé-te, ábel níhel Dyōb ábele.

²⁰ Awé áde Yesuε ánwēε á awog ádé nēn bán mémpē menwé. Meésáá á alongé ámpē. Krīstə mó adé με áte. Né-ōó, kéchéé éche mbelée á nkōηsé-te

wén bɔɔb, mbɛle' chɔ ne adúbe áde ndúbpe Mwän a Dyöb awë adəá me, bon awé-'ε á nló nímêm.

²¹ Meésaa nhóg awë ahɛle ahób nén aá nsimé ní Dyöb méesaá dyamdyam. Ayāle nén, nzé émbē nén bán Dyöb áhɛlesε ákōb mod áyāle ahídé mbéndé, nédē né Yesue awédé á awɔg ngên.

3

Mbéndé káa adúbe

¹ E'yókél é' bad bé Galesia. Nlem áhéé adyédé nyé nén? Nyéekamtánné ngáne ménlūmēdtē nyé áte nén mɛé, Yesue awédé á awɔg á nló nímme nyé moosyā́l-ε?

² Ndəá mɛé n̄sɛded nyé dyam ahóg. Póndé echë nyékúdé Edəádəŋ éche Esáá, áyāle nyéhídé'áá mbéndé e bad bé Israel dɔɔ nyénkudté chɔ-yε? Ngé áyāle nyéndūbēē nkaləŋ ní bwām nímme nyénwōgkē?

³ Chán nyédíí eyókél nén? N̄εε nyémáá abooted dé abel ngáne Edəádəŋ é Dyöb éhɛdɛé, mbɛltéd nímēn n̄hɛdé atim á asóg hén bɔɔb ngáne mewēmtɛn mé baányon n̄hɛdɛé-yε?

⁴ Nyékudé metake áde nyédúbpe Kr̄stəə. Nédē nímê metake médé ngên-ε?

⁵ Dyöb dēmbě nyé Edəádəŋ éche Esáá, ábēl-lɛ menyáké átíntê echên. Ayāle nyéhídé'áá mbéndé dɔɔ dēnkǎŋ bon ábɛlé né-yε? Aáy, saké nê dēnkǎŋ. Nkaləŋ ní bwām nímme nyéndūbēē mɔɔ mēnkǎŋ bon ábɛl nê.

⁶ Nyénəne mod n̄εε Abrahamε. Eténlédé nén bán, “Andúbé Dyöb. Nê dēmběl, Dyöb dēnkob mɔ n̄εε mod awë asáá.”

⁷ Nyésōŋtɛn-nɔɔ nén bán bad bésyā́l ábe bédúbpe Dyöb ngáne Abrahamε ándūbēē bɔɔ békóó bán ábe Abrahamε abé.

⁸ Eyale é Dyöb énhōb á'sō e' póndé nén bán Dyöb dékōb bad ábe béesě bad bé Israel n̄εε ábē bad áyāle bédúbpe mɔ. Nén démbyēn bootya póndé eche Dyöb dénláá-'é Abrahamε aá, “M̄éenaméd melon mé nkōŋsé m̄esyā́l ámbid echōŋ.”

⁹ Né-ɔɔ Dyöb dénaméd moosyā́l awë adúbpe mɔ melemlem ngáne ánnamédté Abrahamε.

¹⁰ Nyébíi-'ε nén bán e'dim é'dé ne baásyā́l ábe bébánné nlém nén bán ahíd á mbéndé dɔɔ déběl bon Dyöb ákob bɔ. Eténlédé á kálag e Dyöb nén bán, “E'dim ne kénzɛé awë eehídé' mbéndé ésyā́l éche éténlédé á kálag e Dyöb.”

¹¹ Bɔɔb-pɔɔ élūmte nén bán modmod eékobnadté á'sō é' Dyöb áyāle ahídɛé chōm-εε mbéndé éhɛdɛé. Nhóbe nê áyāle éténlédé nén bán, “Bad ábe békóbnédé á'sō é' Dyöb áyāle bédúbpe, békūd alongé áde déemaá'.”

¹² Mbéndé eewóó-'é dyamdyam ábɛl ne adúbe. Eténlédé á kálag e Dyöb nén bán, “Nzé mod ahíde' mbéndé ákud alongé, atəŋgéné mbéndé ésyā́l ahíd.”

¹³ Bon Kr̄stəə ahúdé syánē á e'dim ábe dékúdé á mbéndé-te. Eténlédé á kálag e Dyöb nén bán, “E'dim ne kénzɛé awe bébómmé á awɔg.” Né-ɔɔ, áde bébómmé Kr̄stəə á awɔg, ampém e'dim áyāle mbéb nímēd.

¹⁴ Yesu Kr̄stəə ampém e'dim ábɛl nén, bad ábe béesě bad bé Israel békud nnam nímme Dyöb dénhōbpē aá, Abrahamε ákūd. Nê ákáá adúbe áde dédúbpe mɔ, ábɛlé syánē ámpē dékudé Edəádəŋ éche ánhōbpē aá mɔɔbě syánē.

Mbéndé ne dyam áde Dyöb dénhōbpē aá mɔɔběl

¹⁵ A-baányon, ndəá mɛé n̄téd nhəgtén ne mekan nímme mébenlad epun tɛé. Nzé bad bébɛ bétédé nsəl, bon bétíídé dyam, bépédé-'ε á nchemtɛn, modmod éh̄l̄l̄l̄-εε ahúd dɔ áse.

16 Dyöb dêmbě Abrahamε ne mwän akag. Kálag e Dyöb eehóβεé nén aá, “bän” byánán bad bébúú áte. Ehóβε nén aá “mwän.” Krĭstəə mó-’aá adé ane Mwän.

17 Chöm éche níkoó’é ahób édii nén Dyöb démwē melě ne Abrahamε Dyöb áhób-pe aá móōlōnēd ádē akag. Mbwókel é mwě éniin ne móom mé mwě méláán, ámbíd e nê, dóo Dyöb ábágé Mosεε mbéndé. Echē mbéndé éheléé-se ébóó nímē melě, se éhúd dyam áde Dyöb áhóbé ásē.

18 Nzé émbē nén bán, Dyöb ábage’ nyé kéchéé éche átāngéné ábē bán abe áyāle nyéhídeé mbéndé, né nímē nnam nímē ábageé nyé méesaá ámpē áyāle dyam áde ánhōbpē aá móōbelé Abrahamε.

19 Cheé-ō émbē nzōm echē Dyöb ábágné mbéndé? Ambě chí álúmed bad chōm-ée abel dé mbéb ákóó abé. Ene mbéndé entāngén-ne abé káōñ ne pónde eche mwän a mbyaa nímē Abrahamε awě Dyöb dêmbεénné akag ántāngēnē ape. Dyöb dêmbě mbéndé wée ángel ábe Mosεε. Mosεε mó abédé mod-a-tíntē a baányon ne Dyöb.

20 Bōob-pōó mod-a-tíntē ahēdnad nzé bad bédé mbíd ébe. Bōñ Dyöb dêmbě Abrahamε akag ne mó mwēn, áde mod-a-tíntē éesaá.

Nsón nímē mbéndé éwōó

21 Nédē nén álúmte bán mbéndé epentan akag á Dyöb-ε? Aáy, éesaá nē mbéd. Nzé émbē nén bán mbéndé embé echē ebage alongé áde déemaá’, né desáá á’sō é’ Dyöb ahíd áde déhídeé chí.

22 Bōñ kálag e Dyöb ehóbe nén aá, mbéb níháá nkōñsé nisyāāl. Né-ōó nde echē Dyöb dénhōbpē aá móōbē, abagé chí wée bad ábe bédúbpé Yesu Krĭstəə.

23 A pónde eche Krĭstəə éēpēdēē, mbéndé enhañ syánē, dembé-’ε ásē e mbéndé káōñ ne á pónde eche Dyöb dénlūmēdtē nén aá bad bésūm nlém wée Krĭstəə.

24 Né-ōó mbéndé chí enōné’áá sé káōñ ne pónde eche Krĭstəə ápédé ábel nén Dyöb ákob sé áyāle adúbe áde sédúbpé Krĭstəə.

25 Bōob áde pónde épédé echē détāngéné nlém asum wée Krĭstəə, chōm éētāngēné abé éche éñone’ sēmpē.

26 Nyé moosyāal nyédii bán bé Dyöb áyāle adúbe áde nyédúbpé Yesu Krĭstəə.

27 Nyékudé edusen, né-ōó, nyédé mod nhóg bōob ne Krĭstəə, nyēwóó-’ε kunze bōob nēé mó.

28 Né-ōó nhəñlén méesaá ken mod adé mod a Israel, ken mod éesaá mod a Israel, ken mod adé ntāñ ké’ε kunze, ken mmwaád-ε ké’ε mwēnchóm. Nyé moosyāal nyédii mod nhóg áyāle nyédúbpé Yesu Krĭstəə.

29 Ngáne nyédíí bad bé Krĭsto, nyédíí bán ábe Abrahamε, nyéékūd-te nnam nímē Dyöb dénhōbpē aá móōbē Abrahamε.

4

1 Chōm-ée níhóβεé édé nén, mwän awě sáá átíídé aá móōdyé eche mbwóg, nzé adii adé mwēndem, abelé abé nēé mbāledε, kénéé édíí nén bán mó akóó ene mbwóg awóñ.

2 Ene pónde, abelé awóñ bad ábe belyágnédé mó ne ábe bēnōnne’ mó ene mbwóg káōñ né pónde eche sáá átíídé epedé.

3 Melemlem nē dóo syánē démbēē nēé bēndem áde Krĭstəə éēpēdēē. Pónde eched, ngine é nkōñsé éntēd syánē ntāñ.

4 Bōñ áde pónde eche Dyöb déntíí’é épédé, Dyöb dénlōm awe Mwän á nkōñsé-te. Ane Mwän ámbíd á abum dé mmwaád, ákwōg-ke ásē e mbéndé.

5 Dyöb dénlōm mó ákōde syánē á mehañ mé mbéndé, ábel bōñ syánē détim bán bé Dyöb.

⁶ Abé áde nyédíí-'aá bǎn bé Dyöb, ábélé Dyöb álómé Edǎédǎŋ é Mwǎn áwesyánē nlém-tê. Echê Edǎédǎŋ ébélé bǎǎb, dechǎge Dyöb bǎn, "A-Tê."

⁷ Né-ǎó nyéesaá betǎŋ ámpē. Nyédíí bǎn bé Dyöb. Abé áde nyédíí-'aá bǎn bé Dyöb, Dyöb débǎ nyé kéchéé éche átǎŋgéné ábe bǎn abe.

⁸ Ngen e'só, áde nyénkêmbíí'é Dyöb, nyêbédé betǎŋ ásē e myöb níme méesě dyamyam.

⁹ Boŋ bǎǎb áde nyébíí Dyöb, ké'ε nhǎb méε bǎǎb áde Dyöb ábíí nyé, cheé ékǎǎ boŋ nyéhede mbíd atimēn ábē betǎŋ ámpē ásē e ngíne é nköŋsé?

¹⁰ Nyéhíde donge dé e'pun née bǎn é'mbáá, nyéhíde-'ε donge á ngǎn, donge á pǎndé áyǎle mwě, ne donge á mwě née bǎn é' mbáá byánán Dyöb dǎǎ nyé bēnléé.

¹¹ Nê ábele' ndé mbwǎg nén méε mbébté pǎndé áyǎle nsǎn rísyǎǎl níme mbéle áyǎle echēn.

¹² A-baányan, ncháa' nyé méε, nyébê née me, áyǎle mémpē ndé bǎǎb née nyé. Meesaá ásē e mbéndé ámpē. Nyéebelē-'ε me dyam dé mbéb ké ahǎg.

¹³ Nyébíí nén bǎn áde rísebpé nyé nkalan mí bwám akale, ndyēéné-'áá nyé áyǎle menkëndyē-'é bwám.

¹⁴ Kénéε mímmē nkole nhéle'áá mbel nyébǎŋ me áyǎl, nyéekêmbǎŋ'ε me áyǎl, nyéekênnǎn-naá me. Nyênköb me byánán ángel e Dyöb chǎǎ rídíí, ké'ε byánán Yesu Krístǎǎ rídíí.

¹⁵ Ene pǎndé nyébé menyinge bwámbwam. Héé mímmē menyinge médíí bǎǎb? Mmēn mbide nyé mbóŋ nén méε, á pǎndé eched, nyéndǎŋ me nyaa echē, nzé émbē nén bǎn mod ahelé'áá-se ahúd mǎd ábe waáb, áá ábenlad, né nyēnhúd mímmēn mǎd nyébē me.

¹⁶ Nédē ntimé mod a ekǎyí awe nyé bǎǎb áyǎle ríkánlé nyé mbále tǎŋgene nkalan mí bwám-ε?

¹⁷ Abé bad ábe býǎgte nyé ayǎge démpēe, béwóó nlém nén bǎn nyétimēn bó, boŋ béewöŋnéé nyé nlém mí bwám. Béhede bǎn nyéebǎg ne me ábel boŋ nyéwöŋ nlém ábé ne bó.

¹⁸ Ebóó áwóŋ nlém ábel dyam, nzése mímmē nlém rídé ábel dyam á bwám. Ebóó áwóŋ nlém ábel dyam pǎndé ésyǎǎl, saké nzé nyédé ne me dēmpēn.

¹⁹ A-bǎn bé nlém ábēm, nwóge' e'we bǎǎb áyǎl echēn, melemlem ngáne mmwaád áwógeé e'we bé achád. Mééwöŋ-ke ábē e'we kǎǎŋ né abé á Krísto ásólé nyé áte bwám.

²⁰ Mendǎŋ méε mbé ne nyé bǎǎb ábel mbíí ngáne nhóbéé áwēn áyǎle nyéhóódté me yǎl áte.

Elǎŋsén éche Hagaa ne Seraa

²¹ Nyé ábe nyéhede abé ásē e mbéndé, ndǎǎ nyé asēded méēken nyébíí chǎm-éε mbéndé ékoo'é ahób-ε?

²² Eténlédé á kǎlag e Dyöb nén bǎn Abrahamε anchyáá bǎn bé baachóm bébé, nhǎg ne mmwaád a ntǎŋ, aníníí-'ε ne mmwaád a kunze.

²³ Mwǎn awě mmwaád a ntǎŋ anchyāā'ε, anchyáá mó nyaa eche moonyon áchyáá'ε mwǎn. Boŋ akag áde Dyöb dēmbéé Abrahamε dǎǎ dēnkǎŋ boŋ mmwaád a kunze achyáá mwǎn.

²⁴ Abén bebaád bébe, dehele déhǎgtén bó ne melě mé Dyöb mébe. Hagaa adé nhǎgtén ne melě níme Dyöb démwēē ne bad bé Israel á mbǎǎd e Sinai á pǎndé eche ábágé Mosεε mbéndé. Bad bésyǎǎl ábe bédé ásē e mímmē melě bédíí betǎŋ.

²⁵ Hagaa adíí nēŋgáne melě níme Dyöb démwēē ne Mosεε á mbǎǎd e Sinai, á alon á Arabia. Bad bé Jerusalem bómpē bédíí bǎǎb née Hagaa áyǎle bó moosyǎǎl bédíí betǎŋ.

26 Boŋ mmwaád a kunze, adé nhəgtén ne Jerusalem awě adé ámín. Ane mmwaád mó-'aá adé nyaá awesyánē.

27 Eténlédé á kálag e Dyöb nén bán, "A-ekəm é mmwaád, wε awě weechyáá', hé esaád é menyinje. Wε awě weéwōgē e'wε é' mwǎn mbéd, wóg menyinje áyāle,

we awě awonj nchóm ântédéé, echyáá bán bəəb tómaa mmwaád awě nchóm ádíí á ndáb."

28 Bəəb-pəə a-baányan, akag áde Dyöb dēmbεé Abrahamε ábélé bəəb nyédíi bán bé Dyöb melemlen née Aisigε.

29 Ene pón dé, ébédé nén bán, mwǎn awe bēnchyāā' é nyaá echē moonyon áchyáá' é, atágté'áá mwǎn awě bēnchyāā á ngíne e Edəádəŋ é Dyöb. Melemlen nē dōó édíí kááj ne chii.

30 Boŋ chán kálag e Dyöb éhóbé tǎŋgene nê? Kálag e Dyöb ehóbe' nén aá, "Nǎn mmwaád a ntǎŋ bó mwǎn. Mwǎn awě mmwaád a ntǎŋ áchyáá eetǎŋgenéé mbwóg eche sáá adyé nchoo ne mwǎn awě mmwaád a kunze áchyáá."

31 Né-óó a-baányan, deésaá bán bé mmwaád a ntǎŋ. Dedíi bán bé mmwaád a kunze.

5

Séesaá á mehan-tê ámpē

1 A mehan-tê dōó Krístəə áhúdé syánē ábel boŋ syánē deebág née betǎŋ ámpē. Né-óó nyéwéd mekuu ásē, nyéēmwāg-ke se modmod ahé nyé á mehan-tê ámpē.

2 Nyéwóglen mε. Mε Paale, nlánje nyé nén mεé nzé nyéwémténé nén bán nzé béyágé nyé, né nē débél Dyöb ákob nyé née bad ábe bésáá, né nsón níme Krístəə ábélé méehelée-se níwóngén nyé mbéd.

3 Nsimé nyé etúu áte ámpē nén mεé, kénzée awě akwěnténé aá béyag mó ábel boŋ Dyöb ákob mó, atǎŋgéné mbéndé ésyāāl ahíd.

4 Nyé ké ahée awě awémténé aá mótǎŋgēnē mbéndé ahíd ábel boŋ Dyöb ákob mó, asénlédé ne Yesuε, ahúdé-'ε yǎl á nsimé ní Dyöb-te.

5 Sé ne sé, Edəádəŋ é Dyöb ébélé sélyágé nlém nén bán Dyöb dékob sé nēŋgáne bad ábe bésáá áyāle sédúbpé Krístəə.

6 Ken béyágé mod-ε, ken béeyagé mod-ε, nē déewóó' é dyamdyam ábel ne abé áde dedíí ne Yesu Krístəə. Chǎm éche édé etógnén édíi, ádúbe Krístəə. Adé adúbe átǎŋgéné anyínned ne edəŋge éche déwóŋné nhóg ne aníníí.

7 Ngen e'só, nyékeéné'áá mekan bwám. Nzé-módé ahəŋléné nyé nlém á abum aá nyéehíde' mbále e nkalanj ní bwám ámpē?

8 Ahəŋlen áde nyéhəŋléné nlém á abum déehelée-se áhúú ne Dyöb, áyāle Dyöb dēn dōó ápwédé nyé ábe ábe bán.

9 Mod nhóg awě adé mbéb áfínté echēn, mó abébte' baáb ábíníí bésyāāl, nēŋgáne mbumé ní ngun nísonléé nzé bēhédé mwǎ esulten áwēd-te.

10 Boŋ pen ndúbpé nén mεé, Dyöb débél nyéehídté ayáge á bad bémpēe boŋ nyéehíd ádēm. Dyöb dékəgsēn mod ké ahée awě apuutad nyé, ábē kénzée.

11 A-baányan, nzé émbē nén bán ndíi nkale nén mεé bétǎŋgéné mod ayag boŋ Dyöb dékob mó née mod awě asáá ngáne baá Israel bédúbpé, né cheé ékás boŋ bēhé mε á meséb? Nzé nkalé'áá nén mεé bétǎŋgéné bad ayag boŋ meékale'áá kwéed eche Krístəə áwédé á awog, né nē déelinšéé bad bé Israel.

12 Ndəó nén mεé ábē bad ábe bépuutad nyé nló áte, békag á'sō, béke bésēlen yǎl e mwenchóm esyāál.

¹³ A-baányan Dyöb dénchēlē nyé áhide á mehan-tê. Bon abé áde nyéesaá á mehan-tê ámpē déebageé nyé kunze ábel kéchéé éche échēn ekob é yäl éhedeé. Bon pen, nyémod-téé ábenle waáb á edange-tê.

¹⁴ Nyébele' nê áyāle nzé bēlādē mbéndē ésyāāl, chōm éche éhóbēé édii nēn, “Edəŋ mwānyon ngāne édāá echoŋ yäl.”

¹⁵ Bon nzé nyétimé nyēkwaglan, nyēwanne-'ε nhóg ne aníní nēe nyam é mehín, nyétéd pōndé. Nzé nyéetēde pōndé, ne nyēwūū nhóg ne aníní ne awúu ásyāāl.

Edāádəŋ é Dyöb ne ekob é yäl

¹⁶ Né-ōó, nlébe nyé nēn mēé nyémwe Edāádəŋ é Dyöb élyágte nyé. Nê débēl nyéebelēé mekan mē mbéb míme ekob é yäl éhedeé.

¹⁷ Mam míme ekob é yäl édāá, méekagké ne mam míme Edāádəŋ édāá. Mam mē míme Edāádəŋ édāá méekagké ne mam míme ekob é yäl édāá. Echēn ngīne ébe éwane'. Nê ábele' nyéēhēlēē dyam abel áde nyédāá abel.

¹⁸ Bon pen nzé Edāádəŋ é Dyöb élyágte nyé, né nyéesaá ásē e mbéndē ámpē.

¹⁹ Mbeltéd mé ekob é yäl méēyāgtādtéd. Ndii mbeltéd nēe akáb dé mesón, abel dé mekan mé mbinde, akáb dé akwalēē.

²⁰ Abele á myöb mémpēe, alem, ekoyí, nselag, kónjí, melingá, abun dé e'tál, ngabén, nkabén,

²¹ asii á bad, sógké e mīm, epuutéd ne mbeltéd mé mbéb mémpēe nēe mímén. Nsimé nyé etúu áte ngāne ménsim-maá bōód nēn mēé, bad ábe bébele' échē ndín é mekan béekudté nnam mé nkamlēn ní Dyöb.

²² Bon nzé Edāádəŋ éche Esáá édē mod áte, chōó ébele bon ábelé mam ne edange, ne menyinge, ne nsan, ne nwesen, ne e'bon bé nlém, ne abé á bwām, abé-'ε mod awē bad béhele bésom nlém áyāl.

²³ Edāádəŋ chō-'aá ébele' bon mod ásudté yäl, acháá-'ε yäl bwām. Mbéndē éewóó'ε dyam ábelēn nēn.

²⁴ Bad ábe bédé ne Yesu Krīstəə béesaá ásē e nkamlēn mí mam mé ekob é yäl ámpē. Ebelé ebé byánán bébómme échab esii é mam mé ekob é yäl á awog, éwédé-'ε áhed.

²⁵ Ngāne Edāádəŋ é Dyöb ébágé syānē alongé dékōōlē, démwē échē Edāádəŋ chēn élyágte syānē áyāle chōm ké ehéé éche débēléé.

²⁶ Deényēnē yäl ámīn, deélinšé nhóg ne aníní, deesíidé-'ε nhóg ne aníní.

6

Kéchēé éche mod áwéné chōó áhūdtē

¹ A-baányan, nzé nyé mod nhóg nyéhúné á mbéb-te, nyé ábe nyédii nyébele' mekan míme Edāádəŋ é Dyöb éhedeé, nyétāngéné nēe nyéwōngéné mó áhúd mó á mbéb-te. Nzé nyéwōngan mó, nyéchēdēn mó yäl. Bon pen, nyétéd pōndé ábel nēn nyébēn ámpē nyéhúné' á mekəgsen-tê ábel mímé mbéb.

² Nyéwōngan nhóg ne aníní áhide á ndutul-tê. Nzé nyébele nê, ne nyéhíde' ngāne mbéndē e Krīstəə éhedeé.

³ Kénzēé awē awémténé aá mótomtēnē abé, adoge yäl. Ene ndín e mod eesaá dyamdiam.

⁴ Mod téé átōŋ yäl asimēn. Nzé mod abelé nsón mí bwām, né áwōgēn yäl menyinge. Né échəgtán-aá yäl ne bad bēmpēe.

⁵ Nhóbe nê áyāle mbeltéd mímé mod téé ínəne' mēn.

⁶ Kénzēé awē bēyágteé Eyale é Dyöb, atāngéné nēe áhágké mod awē ayágte' mó chōm é bwām ké éhéé éche áwóó, áwōngēn mó.

⁷ Mod eédōgē yäl. Mod eewémtán-ne aá móhele módog Dyöb. Kéchēé éche mod áwéné, chōó áhūdtē.

⁸ Kénzée awě abele mam mé mbé́b níme ekob é yǎ́l éhedeé, ábíi aá níme mam mḗn mépiinéd mó kwééd. Boŋ kénzée awe mó-’ε abele’ mekan mé bwâm ngáne Edáádəŋ é Dyöb éhedeé, ábíi aá níme mam mébḗl móókǘd alonǵé áde déemaá’.

⁹ Deekómé bwâm abel. Nzé deétednede ábel bwâm, né deékǘd nnam á pónde echē etǵéné.

¹⁰ Né-óó pónde téé eche etál ébágnédé syánē ábel bwâm, débḗl bwâm wée moosyáál, tanǵe wée bánned bé Krísto.

Elébe ne melḗnten mé asóg

¹¹ Nyébḗn nyényín mbóŋ mé e’yale ábḗ níbenléde átele nyé enén kálag ne échḗm ekáá.

¹² Bad ábe béhede nyé anyáged nén bán bétǵéné nyé ayag, bébele nḗ álúmtḗn yǎ́l, ábel boŋ békud dī́n á bwâm á’sṓ é’ bad. Bébaá’ bán bad béḗhāǵ bó á meséb nén bán bétúme akal nén bán, kwééd eche Yesue áwéde á awǵ chḗnpen chóó ekə́ə boŋ mod ákū́d e’choóchoŋ.

¹³ Ké bad ábe béyáǵé bḗn béḗhīdeḗ mbéndé, boŋ béhede bán béyag nyé ábel békume ekáá á tál nén bán nyḗkwḗnténé nén bán béyag nyé.

¹⁴ Dyam áde me pen mékuménne ekáá á tál ádíi kwééd echḗ awesyánḗ Sǵŋwéé, Yesu Krístə́ə áwéde á awǵ áwed nló. Eche kwééd ebélé mam mé nkṓŋsé méesaá me dyamdyam á dí́d-te, meewóo-’áa dyam ábelḗn nkṓŋsé.

¹⁵ Ken béyáǵé mod, ken béeyagé mod-ε, nḗ déewóo’é dyamdyam ábel. Dyam áde áde etógnén ádíi Dyöb átiméd mod ekóólé.

¹⁶ Nsaŋ ne ngəl e Dyöb ébḗ ne bad bésyáál ábe béhīde ádén ayáǵe. Abḗ bad bóó bédé bad ábe Dyöb ápwéde.

¹⁷ Asóged enén kálag, nlǵŋge nyé nén méé, modmod eétagtán me nímén mekan áyā́le mebaŋ méde me á yǎ́l hén níme mélú́mte nén bán mbenle Yesue.

¹⁸ A-baányan, nsimé níme Sǵŋú Yesu Krístə́ə níbḗ ne nyé moosyáál. Ebḗ nḗ.

Kálag echë Paalε áténlé Baá Efesus Ndibned n kálag

Kálag echë Paalε áténlé bad bé Efesus ehóbe' tñgεne ntíi ní Dyöb, áρεεn míme nhəgtéd rísyāāl, míme rídé á nkōnsé ne míme rídé ámín hōm ahóg. Krístəə m'áá adé nló ámín e míme nhəgtéd rísyāāl (1.10). Ehóbe-'ε ámpē ngáne bad bé Dyöb bétəngéné abé nēngáne mod nhóg abé áde bédíi ne Yesu Krístəə.

A mbooted, enén kálag ehóbe' tñgεne abé áde bad bé Dyöb bétəngéné abé nēngáne mod nhóg. Ngáne Dyöb ápwédé ábē bad, álagsén b'ó, ahúd-te b'ó á mbéb-te, mbwiined ne awe Mwān Yesu Krístəə. Ehóbe-'ε ámpē ngáne Edəádəŋ éche Esáá élúmtéé aá dyaam áde Dyöb áhóbé aá m'óǒb'él, débēnléd. Asóged, Paalε alébé bad bé Dyöb bé Efesus ngáne abé ádāb átəngéné abé nēngáne bad ábe bédé mod nhóg á dīn á Krísto. Paalε abēnlédé ngan híin álúmed ngáne bad bé Dyöb bétəngéné abe abé áde bédíi mod nhóg ne Krístəə.

Nkabtéd n kálag

Ndibned n kálag 1.1-2

Krístəə ne mwembé mí bad bé Krísto 1.3-3.21

Alonǵé dékōālē ábē ne Krístəə 4.1-6.20

Nsógteŋ 6.21-24

Paalε alōmme' bad melentēn

¹ Mε Paalε, mbapεε a nlomag awē Yesu Krístəə ngáne Dyöb áhédé'áá, mε-éé ntenle nyé enén kálag. Ntenle nyé bad bé Dyöb ábe nyédé á dyad dé Efesus. Nyédé mod nhóg ne Yesu Krístəə nyéhíde-'ε m'ó ne nlém nhóg.

² Nsimé ne nsaŋ ní Dyöb Titéε awēd ne míme Sáŋgú Yesu Krístəə mbē ne nyé.

Nnam míme bad ábe bédé nhóg ne Krístəə békúdé

³ Débε Dyöb mekenag. M'ó adé Dyöb áde awēd Sáŋgwéé, Yesu Krístəə, abé-'ε m'ó Sáá. Dyöb d'óo ánámte syánē abε áde ábágé syánē bwēm é'syāāl ábe é'bidé áwē nkamlēn mí mín. Abelé nēn abé áde dédíi mod nhóg ne Krístəə.

⁴ Byánán Dyöb déhəg nkōnsé, ampwēd syánē ábē ábē bad, abel áde ámbēnlé boŋ desāŋ, deew'ó-'ε atón dé mbéb ké ahóg áwe e'só. Adəŋ áde Dyöb ád'áá syánē,

⁵ dēmb'él antíi se' b'óod aá débē ábe bán mbwiined ne nsón míme Yesu Krístəə ámbel'éé syánē. Dyöb dēmb'él nēn áyāle nēn d'óo antíi' é aá m'óǒb'él ngáne éb'óŋnédé m'ó.

⁶ Abelé aá débē ábe bán ábel boŋ dékεne m'ó áyāle mekan mé bwām míme ábélé. Abagé syánē echë ndəle e nsimé ngēn. Dekúdé míme nsimé abé áde dédíi mod nhóg ne awe Mwān awē ád'áá bwāmbwam.

⁷ Abé áde dédíi mod nhóg ne Krístəə ne asy'og áde ásy'ogé míme mekií áwesyánē nló, d'óo ák'áá boŋ ák'ādē syánē alagsēn áde álāgsēnē syánē mbéb. Abel áde Dyöb ábélé nēn álúmtē syánē bán míme nsimé rídé kase e nsimé.

⁸ Abagé-'ε syánē m'ó nyaa echë elóné mbon, ábūd-te syánē deby'éé abε, áb'él-ε des'óŋtēn mekan mésyāāl.

⁹ Abelé mekan mésyāāl ngáne áhédé'áá aá m'óbel. Abelé syánē debíi mekan míme k'áəŋ ne b'óob modmod ées'óŋtēn'éé. Mmēn mekan médíi mekan míme ámbēnlé mbwiined ne Krístəə.

¹⁰ Dyöb átífidé aá m'óǒb'él mímén mekan mésyāāl á p'óndé echë etəngéné. Ene p'óndé állād bwēm é'syāāl ábe é'dé á nkoŋ mí mín ne rísé, b'ébē áse e Yesu Krístəə m'ó awē adé nēngáne nló.

¹¹ Dyöb ápwédé sé ábē ábē bad abel áde ábélé bonj debé mod nhóg ne Krístəə. Ambel nén áyāle ammad atíi se' bəód. Abele mam mésyāāl mébenlad ngáne áttíde.

¹² Ambel nén ábel sé ábe sēbédé bad bé e'só ásum nlém wée Yesu Krístəə séwále abé áde dékəŋ bonj bad bémpeé békən mó áyāl e echē ngumε echē echabé ámín.

¹³ Nyémpē nyēnwóg nkalaŋ ní mbále. Mmē nkalaŋ ní mbále nídii nkalaŋ ní bwám níme nípínédé nyé e'soosonj. Nyēndúbé Krístəə, nyēbé-'ε mod nhóg ne mó. Nén dēmbəl Dyöb dēmbě nyé Edəádəŋ éche Esáá éche ánhōbpē aá móəbě ábē bad. Echē Edəádəŋ édii nēŋgáne e'chem ábe é'lúmte bán nyédii bad bé Dyöb.

¹⁴ Echē Edəádəŋ chós é'lúmte syánē nén bán dééküd bwēm ábe Dyöb áhóbé aá móəbě syánē. Dééküd ábén bwēm á pónde eche Dyöb déhūdtē syánē ábe dedé ábe bad á mehaŋ-tē. Nén débəl bad békəné Dyöb áyāle echē ngumε echabé ámín.

Mekáne níme Paale

¹⁵ Nwógé bán nyédúbpé Sánjú Yesuε, nwógé-'ε bán nyédəá bad bé Dyöb bésyāāl. Né-óó,

¹⁶ nságnan Dyöb pónde téé áyāl echēn, nzé nkánnad nyé.

¹⁷ Nkánne-'ε mée, Dyöb áde echəd Sánj, Yesu Krístəə, Titée a ehúmé ábe nyé Edəádəŋ é debyée ne é nsōŋten mé mekan mé e'koŋned ábel bonj nyébii mó bwám.

¹⁸ Nkánne-'ε ámpē nén Dyöb ákéled nyé nlém á abum, ábel nén nyébii bwēm é' bwám ábe nyésummé nlém áyāl, áyāle apwédé nyé. Nkánne-'ε nén mée nyésōŋten ngáne nnam níme áhóbé aá móəbě ábē bad nípedé achab ámín.

¹⁹ Nkánnad-tε nyémpē nén mée nyébii eche ngíne. Ene ngíne etómé bwēm é'syāāl, chó-'aá ewōŋgan syánē ábe dedúbpé mó. Mmén melemlem mé ngíne eche echabé ámín,

²⁰ chós ámbenlédte áde ámpuúdté Yesuε, ábəl-lε ádyēē mó á ekaá émbáá áwē nkamlen ní mín.

²¹ Ahed-taá Krístəə ákamlanné ngumε ne benkamlεε bésyāāl. Ade dīn-ne áde ngíne tómaa mín mé benkamlεε bésyāāl, ábe bédé bəəb ne ábe bēbē á pónde echē ehúε'.

²² Dyöb ábágé Krístəə nkamlen ámín é chōm ésyāāl, abelé-'ε mó awě akamlan chōm ésyāāl, ábé nló, mé elad é bad ábe bédúbpé.

²³ Echē elad é bad ábe bédúbpé bédii née yəl echē Krístəə. Echē elad é bad élōgte Krístəə mbom, Krístəə mó-'aá alógte chōm ésyāāl eche édé kéhéé mbom.

2

Dedé á alongé abé áde dédii mod nhóg ne Krístəə

¹ Ngen e e'só, nyēmbé nēŋgáne bad ábe bēwédé áyāle nyéēbele'aá mekan níme Dyöb áhóbé'áá aá nyébel, nyébeláá-'ε mbéb.

² Ene pónde nyéhíde'áá mbeltéd mé mbéb ní bad bé nkōŋsé. Nyēwógné'áá nkamlεε awě akamlan e'dəádəŋ bé mbéb ábe é'dé á pemε-tē. Káəŋne chii echē edəádəŋ édii élyágte' bad ábe bēbelé' ngáne Dyöb áhedéé.

³ Syánē moosyāāl debédé née bó, dékōdtē esíí é mekan mé ekob é yəl. Debélé'áá ngáne mekan mé mbéb mé ekob é yəl méhéde'áá aá débél, déhíde-'ε mekan níme mewēmtεn mélánge'áá syánē aá débél. Mmén mbéb níme débélé'áá mēmbəl Dyöb déntəŋgēn syánē ámpē akógsen melemlem ngáne ántəŋgēnnē moosyāál akógsen.

⁴ Bonj ngáne Dyöb átómténé ngəl abé ádāŋ-'ε syánē bwāmbwam,

⁵ abelé syánē dedé á alongé abé áde dedíí ne Krístəə, kénéε édíí bán dembé nées bad ábe béwédé áyāle deébele'áá mekan míme Dyöb dénhōbpē áá débel. Nsimé ní Dyöb móó ríkáá bon nyékūd e'soóson.

⁶ Abé áde dedíí-'áá ne Krístəə, Dyöb ápuúdté syánē ne mó, adidé-'ε syánē hōm ahóg ne Krístəə á nkon mímín.

⁷ Ambel nén álúmed syánē ábē e'bon bé nlém mbwiined ne Yesue Krístəə ábel bon á pónde eché ehúé', bad bényín ngáne míme nsimé rípedé nhən abé ntom-me chōm ésyāal.

⁸ Nsimé ní Dyöb móó ríkáá bon nyékūd e'soóson. Adúbe áde nyédúbpé Krístəə dōó ákáká bon nyékūd ábē e'soóson. Saké mekan míme nyébélé mékáká bon nyékūd e'soóson. E'soóson ábe nyékúdé é'díi nde e Dyöb.

⁹ Saké mekan mé bwām míme nyébélé mékáká bon nyékūd e'soóson. Né-óó, nzom ké póg eésáá eche mod átəngéné ekáá akum átəl.

¹⁰ Syánē dedíi ekáá é nsón é Dyöb. Abé áde dedíí mod nhóg ne Yesu Krístəə, ábágé syánē alongé ábel bon débele mekan mé bwām. Nén dōó Dyöb déntíí'ε se' bōód áá déwōn ene nyaa e abé á alongé.

Abé nhóg ne Krístəə

¹¹ Nyé ábe nyéēsē bad bé Israel nyéēchatán ngáne nyémbēē bōód. Bad bé Israel ábe béchágé yəl bán, “bad ábe béyágé,” béchəge nyé bán, “bad ábe béeyagé.” Bon mímén meyagag mé ekob é yəl médíi chōm éche moonyon ábenléé mékáká.

¹² Nyéēchatán bán ene pónde nyénkēmbíí'ε Krístəə. Nyénkēmbáá nlatén ne echoŋ é bad bé Israel, bad ábe Dyöb ápwédé. Nyénkēnwóngé dyam ábel ne melē míme Dyöb démmwēē míme rílúmte' chōm éche Dyöb dénhōbpē áá móóbēl. Abé áde nyémbēē á nkōŋsé-te, nyénkēnwóngé e'lyág bé nlém hōmhōm, nyénkēmbíí-'áá Dyöb.

¹³ Bōód nyénchabnéd Dyöb á yəl. Bon bōób abé áde nyédíi nhóg ne Yesu Krístəə, apééné nyé benben ne Dyöb asyog áde ásyógé míme mekií áwən nló.

¹⁴ Krístəə mwēn mó apiínédé syánē nsan. Abelé bad bé Israel ne bad ábe béesē bad bé Israel bédé mod nhóg. Kwééd eche áwédé ehúdé ekoyí éche ébédé átínté echêd. Eché ekoyí ébédéé nées ekəŋned éche ênkab syánē áte.

¹⁵ Abelé mbéndé é bad bé Israel énkēnwóngé ngíne ámpē. Ambel nén ábel bon álad bad bé Israel ne bad ábe béesē bad bé Israel bēbē nées mod ekóólé nhóg awē bōóbōó bēbē mod nhóg ne mó mwēn Krístəə. Né-óó, ábel áde ábélé nén ápééné nsan átínté e bad bé Israel ne bad ábe béesē bad bé Israel.

¹⁶ Awé áde áwédé á awog, ábélé syánē dedé mod nhóg ne Dyöb, átímté-'ε syánē ásē ne Dyöb. Né-óó, amadé ekoyí éche ébédé átínté e' syánē.

¹⁷ Krístəə ampē ákanlé nyé ábe nyéēsē bad bé Israel, nyé ábe nyénchabnéd Dyöb á yəl nkalan mé nsan, ankalé-'ε bad bé Israel, bó ábe bēmbē Dyöb benben.

¹⁸ Mekan míme Krístəə ábélé, mébélé syánē moosyáal dekudé nzii ápe á'sō wée Titée. Melemlem mé Edəádəŋ ehóg chōó éwōŋgan syánē ábel nē.

¹⁹ Né-óó, nyé bad ábe béesē bad bé Israel nyéēsaá beken ámpē nyéēsaá-'áá bad ábe bēbídé etún. Bon pen nyáábe bad bé Dyöb nyédíi bad ábe bēbídé hōm ahóg. Nyé moosyáal nyédíi nées bad ábe bédé á túmbé e Dyöb.

²⁰ Nyédíi nées bwēm ábe bélōŋnéé ndáb. Bembapeε bé nlomag ne bekal bé é'dəádəŋ bóó bédé nsáaned ní ndáb. Yesu Krístəə mwēn-naá adé akon dé nchóméε.

²¹ Mó akáá bon ene ndáb etyéem, ékwogé', épē-'ε ndáb eche Esáá eche Səngwéé.

22 Abé áde nyédíí mod nhóg ne Krístəə, aladé nyé ne bad bé Krísto bémpēe. Abé áde nyédíí-'aá bəəb nyédíí nēe ndáb echě Dyöb ádyεε'έ áte. Dyöb áde áde nēngáne Edəədəŋ.

3

Paale akänlé bad ábe béesě bad bé Israel nkalanj ní bwâm

1 Enén nzəm chó ekəə bonj níkännád nyé. Abele áde mbenléé Yesu Krístəə ne akale áde níkanléé nyé dáo ákəə bonj mbé mod a mbwəg.

2 Ndúbpé mée nyéwógé bán Dyöb ápwédé me ákale nyé nkalanj ní bwâm tənġene nímē nsimé.

3 Dyöb ábágé me nsōŋten mé mekan mé e'koŋned nímē mbélé mbíí mekan nímē káəŋne bəəb modmod éesōŋtenéé. Mmaá nyé nguse é e'yale atele tənġene nén.

4 Nzé nyéláá mam nímē rítélé, nyéəchēm nímēm nsōŋten áyāl e mekan nímē káəŋne bəəb modmod éesōŋténéé tənġene Krístəə.

5 Bəəd, Dyöb dénkēnlúmédté baányonj nímén mekan nímē káəŋne bəəb modmod éesōŋténéé. Bonj bəəb abēnlédé échē Edəədəŋ álúmed bekal bé'dəədəŋ ne bembapεε bé nlómag ábe bédé ábele Dyöb, nímēn mekan.

6 Mmén mekan nímē moonyonj enkēmbíí'é médíi nén: Bad ábe béesě bad bé Israel, bəmpē békúidé nnam nímē Dyöb áhóbé aá móəbě melemlem nēngáne bad bé Israel békúidé. Bad bé Israel ne bad ábe béesě bad bé Israel bédé mod nhóg. Dyam-me áde Dyöb áhóbé aá móəbelé bad bé Israel, bad ábe béesě bad bé Israel bəmpē bétombwén dó áyāle bédé mod nhóg ne Yesu Krístəə. Nkalanj ní bwâm móə níkəə bonj nímén mekan mésyāal mébenléd.

7 Mmén nkalanj ní bwâm móə níkaléé. Dyöb ábenlédé nímē nsimé, abagé me nímén nsón. Mbele mó á nwōŋgen mé eche ngíne.

8 Kénéε méetəgnéé etógnén abé áfinté e bad bé Dyöb, Dyöb dēmbě me nímén nsimé, ákale bad ábe béesě bad bé Israel tənġene nnam nímē Krístəə ábagéé. Moonyonj échēlēε-se abíi ngáne nímén nnam nídíí.

9 Dyöb dēmběl mentánléd bad bésyāal nyaa echě ápidé nímē ntíi mé mekan á asóg nímē káəŋne bəəb modmod éesōŋténéé. Dyöb áde áhágé chōm ésyāal, dénkēnlúmédté modmod nímén ntíi bəəd.

10 Dyöb dēmběl nē, ábel nén benkamlene ne ngume echě édé á nkoŋ nímín, bényín ngáne ápedé debyéé awóg áyāl e chōm ésyāal éche ábeléé bəəb, mbwiined ne elad é bad bé Dyöb.

11 Se' bəəd, byánán Dyöb déhəg nkōŋsé, ammad atíi aá nímén mekan móə móbenlé. Bəəb-pe, abelé nímén mekan mébenlédé mbwiined ne mam nímē Yesu Krístəə, echəd Sáj abélé.

12 Adúbe áde dédúbpé Krístəə debé-'ε mod nhóg ne mó, dáo ádíbnédé syánē nzii ápe benben ne Dyöb ne e'sum bé nlém é'syāal ésebán debáa' dyamdyam.

13 Né-əə, ncháa' nyé nén mée nyéētímné mbíd áyāle metake nímē níkudéé áyāl echēn, médíi nímē nípiinad nyé bwâm.

Paale akännédé bad bé Efesus

14 Enén nzəm chóə ekəə bonj níbwəgē' mebóbónj á'sō wéε Titée ákänned nyé.

15 Mó adé Titée a metúmbé mésyāal, áwē dáo mīn mé metúmbé mé nkoŋ níse ne mé nkoŋ ní mīn mébíde.

16 Ngáne nímē nhən nímē ákōŋnedé nyé níchábé ámín, nkānne nén mée échē Edəədəŋ ébe nyé ngíne ábel bonj nlém níwúu nyé á abum.

17 Nkānne-'ε ámpē ábel nén adúbe áde nyédúbpé Krístəə ábel ásumen nyé á nlém-té. Nkānne-'ε mée nyédəŋ Dyöb, nyédəŋ-'ε nhóg ne aníníí. Nzé nyébele

nê, né nyéēbē nêngáne alín á bwel áde míme nkaŋ ríkíí ásē bwâm, nyêbê-'ε néé ndáb éche esümnédé ásē bwâm.

¹⁸ Nkânne' nén meé nyé ne bad bé Dyöb bésyāāl nyébíi bán Krístəə adəó syánē bwāmbwam, échē edəŋge éewóó-'aá asóg.

¹⁹ Nkânne' ámpē nén meé kénéé édíi bán modmod eéhēlēē-se ákoŋ abíi ngáne Krístəə ápédé nyé adəŋ, Dyöb ábel nyésōŋten. Nkânne' nê ábel boŋ abé ádēn ábê néé áde Dyöb.

²⁰ Dyöb áwóó ngíne ábel mekan míme méchábé ámín bwāmbwam tómaa mekan míme déhédné mó. Abele mekan tómaa ké ngáne déhele dewémten bán ábēl. Eche ngíne eche edé-'ε syánē áte chóó ábenladté ábel nímén mekan.

²¹ Mekenag mébê ne mó áyāle ndəle é mekan éche ábélé, éche ényínnédé átínté e elad é bad bé Dyöb, ényínnéd-te áyāl e mekan míme Krístəə ábélé. Mekenag mébê ne mó pónde ésyāāl, á ngíndé ne á ngíndé. Ebê nê.

4

Bad ábe bédúbpé Krístəə bédé mod nhóg ne mó

¹ Né-óó, me nêngáne mod a mbwəg áyāle nsón míme níbenléé Sánḡwéé, ncháa' nén meé, abé ádēn ábê abé á bwâm ngáne Dyöb áhedéé, apwəd áde ápwédé nyé.

² Kéchéé éche nyébeléé nyésuded yəl, nyébê bad ábe bépwiídtédé, nyéwesən-ne nhóg ne aníníí. Nyélúmed edəŋge awesən áde nyéwesanné nhóg ne aníníí.

³ Edəádəŋ éche Esáá ébélé nyédé mod nhóg. Né-óó, nyéwan áte ábē nsəŋ ne nhóg ne aníníí, ábel nén nyédíi nyébê mod nhóg.

⁴ Syánē baásyāāl dedíi yəl póg, melemlem mé Edəádəŋ ehóg chóó syánē dékúdé. E'lyág bé nlém e'hóg bó-'aá déwóó áyāl e melemlem mé nnam míme Dyöb dénhōbpē aá móóbe syánē áde ámpwədté syánē.

⁵ Sánḡwéé nhóg móó syánē baásyāāl déwóó'. Adúbe ahóg dóó syáā baásyāāl déwóó dékú-d-te melemlem mé edusən.

⁶ Dyöb ahóg dóó syánē baásyāāl débēnléé, mó-'aá adé Titéé awe syánē moosyāál. Mó akamlan syánē baásyāāl. Abele' syánē moosyāál debēle kéchéé éche áhedéé aá débēl, adé-'ε syánē moosyāál áte ne échē Edəádəŋ.

⁷ Syánē mod té dekudé nsimé á nhəgtéd míme Krístəə ábágé. Boŋ nímé nsimé méesaá nyaa póg.

⁸ Nê dóó ákəá boŋ étenléd á kálag e Dyöb nén bán,

“Ankě á hōm áde áchábé ámín.

Áde ákagké, ankéén ábē bad bé ekəyí ábe ántōmmē áte,

ábē-'ε ábē bad echē ndε.”

⁹ Ngáne étenlédé nén bán, “Ankě á hōm áde áchábé ámín.” Chán nê adíí? Nê alúmte nén bán ansébé apε a hōm áde adé se ásē, nédē á nkōŋsé wén.

¹⁰ Mó awē ampē a nkōŋsé mó adé melemlem me mod awē ankě á hōm áde áchábé ámín tómaa mebwóg mésyāāl. Ankě ámín ábel chōm ésyāāl elón mbom.

¹¹ Mó mwēn mó abagé bad ndε. Abele donḡe á bad ábē bembapεε bé nlomag, donḡe ábē bekal bé'dəádəŋ, ábēl donḡe ákal nkalaŋ mí bwâm, ábēl donḡe ábē belyáged bé bad ábe bédúbpé, ábēl-le donḡe ábē bemeléede áyáged bad ábe bédúbpé.

¹² Ambě ábē bad échén ndε áboŋsən bad bé Dyöb ábele mó. Ambel nê ábel boŋ bad ábe bédúbpé bó ábe bédé nêngáne yəl eche Krístəə béwúu áte.

13 Nén débē káǎne á pónǎde eche syánē débēē mod nhóg, adúbe áde déǎdūbēē Mwǎn a Dyǎb, debíí-’ε mǎ. Nzé dedé nê, nê débēl deélǎn mbon, debé nêngáne Krístæ awē alóné mbon.

14 Né déebáá nêngáne bēndem ámpē. Nén débēl bad bé akwáb ábe báyágte’ ayáge dé metóm, béehēnlé syánē adog, béehēl-laá ábel se dedúbé mekan míme méetǎngene. Déebáá nêngáne bǎle ábe epub é ngíne éhuēné pēd e mendíb póg étimné’ eníní.

15 Déebáá nê, bon pēn dékale mbále délúmtē-’ε edǎnge ne nhóg ne aníní. Débēle nê ábel bon dékwog á menzii mésyǎal débē nêngáne Yesu Krístæ awē adé nló.

16 Krístæ aladé ábē bad hǎm ahóg, ngáne mebón mé yǎl méladéé yǎl e moonyon. Nzé pēd e yǎl téé ebele míme nsón ngáne étǎngéné ábel, ne yǎl esyǎal ékwogé’, ewúú-’ε áte. Nê dǎo édíí káǎne á elad é bad bé Dyǎb, nzé mod-té adǎ mwǎnyan.

Alonǎgé dékǎǎlē á mod a Krísto

17 Né-ǎǎ, nkoo’ nyé aláa á dǎn á Sǎngú nén méé abé ádēn déēbǎg nêngáne abé áde bad ábe béebii Dyǎb. Mekan míme békamtanné médíi mekan míme méesē dyam dé ábelēn, méeheléé-’ε se méwǎngén bǎ.

18 Ayǎle mímb mewēmtēn médé mewēmtēn mé mbéb, béhídēē nyaa e Dyǎb. Béewóó-’ε alonǎgé áde Dyǎb ábagéé ayǎle béwúú nló áte béebii-’áa nyaa e Dyǎb.

19 Nzé bébélé dyam dé mbéb, akwǎgké déekóbéé bǎ. Bébágé yǎl ábel mekan míme échǎb ekob é yǎl éhedéé. Béwóo nlém áte pónǎde ésyǎal ábel mekan mé mbinde.

20 Bon nyé, áde bēn’yǎgēdtē nyé tǎngene Krístæ, saké ene ndín e abé bēnlǎā-’ε nyé bán nyétǎngéné awón.

21 Ndúbpé nén méé nyēnwóg mam mé mbále tǎngene Yesuē. Abé áde nyēmbēē-’ε mod nhóg ne mǎ bēnlǎā nyé mam ayǎl echē.

22 Bēn’yǎgēd nyé bán nyéte abé dé nchun áde nyēnsēbēē awón. Ene pónǎde ádēn alonǎgé démbēb ayǎle nyēnwón nlém dásǎ ábel mekan mé mbéb. Mmē nlém míme nyéwóó’áá-’ε ábel mekan mé mbéb nípánté’áá nyé nzii.

23 Bēn’yǎgēd nyé nén bán nyémwē Dyǎb áhǎnǎn nyé nlém á abum ábel bon nyéwón mewēmtēn mékǎǎlē.

24 Dyǎb ábágé nyé abé dékǎǎlē áde áde nêngáne áde abé. Né-ǎǎ, abé ádēn ábē nêngáne áde abé dékǎǎlē. Adēn abé dékǎǎlē ádíí abé dékǎǎlē á mbále ngáne Dyǎb áhedéé ásǎn-’ε.

25 Né-ǎǎ, modmod eékǎlē metóm ámpē. Syánē mod-té ákanle mwǎnyan mbále, ayǎle syánē moosyǎal dedíí nēe bad ábe bēlǎdné bon bēbēl yǎl póg.

26 Nzé nyélíi, nyéēmwǎg-se melingá mébēléd nyé mbéb. Nyéēmwǎg-se mímb melingá métom epub é bǎn.

27 Nyéēbǎgē Satanē yǎl ádog nyé.

28 Bad ábe béchíbe’ bésóg achíb. Bon pēn bēbenlad mímb mekáá ábel nsón ne nlém nhóg ábel bon békud chǎm, bēwǎngēn-nē betóótǎkē bé bad.

29 Eyale é ebébtéd ké ehóg éebídé modmod á nsǎl. Bon pēn nyēbenlad e’yale é’ bwám ábe bēwǎngēn bad áwúú áte á adúbe tē. Nyēbenlad e’yale á pónǎde eche ehēdnad, ábel é’wǎngēn bad ábe bēwǎnglan nyé.

30 Nyéēbēlē mam míme méwǎgēd Edǎǎdǎn éche Esáá ndutul. Edǎǎdǎn éche Esáá chǎo édé nêngáne e’chem ábe Dyǎb áhédé nyé ásin pónǎde eche ákǎdēé nyé ne akǎde ásyǎal.

31 Nyéhúđ mewēmtēn mé mbéb mésyǎal á nlém-tē, nyéchene-’ε ekan é ngíne ne melingá. Nyéēsēnlé’, nyéesyǎá-’ε bad ahób áde nyéhóbéé bǎ mekan á yǎl. Nyéelúmté’ e’bēb bé nlém wēe modmod.

³² Nyélúmed e'boŋ bé nlém wée nhóg ne aníní, nyéwōŋ-ge nlém ní ngol. Nyélagsan nhóg ne aníní melemlem ngáne Dyōb álágséné nyé áyāle Krīstā.

5

Abé áde bad bé Krīsto bétāngéné awōŋ

¹ Nyéwāle abé áde áde nēŋgáne abé á Dyōb, áyāle nyédii ábe bān ábe ádáá bwāmbwam.

² Nyédəŋ bad bémpēe, melemlem ngáne Krīstā ádáá nyé boŋ awé-'ε á nló míme syánē. Ambě yāl wée Dyōb nēe mende ne nde echě enwógéd Dyōb menyīŋge bwāmbwam.

³ Ngáne édíf bān nyédii bad bé Dyōb, éeboo'é bān nyékábe' mesón, ké'ε nyébele mekan mé mbinde ké'ε nyébê ngoód. Echén ndín é mekan éeboo'é ké awógned átíntē echén.

⁴ Eeboo'é bān nyéhóbe' mbinde ne e'nyōgléd bé mehób, ké'ε nyébele' e'kúkú bé ngwēl. Boŋ pen nyéságnan Dyōb.

⁵ Nyébii nén bān kénzée awě akábe mesón ké'ε awě abele mbinde é mekan ké'ε awě adé ngoód, éesónlé á nkamlen míme Krīstā ne míme Dyōb, éekud-taá bwēm é' bwām ábe Dyōb áhóbé aá mōōbě. Mod awě adé ngoód adii nēe mod awě abenle' myōb mémpēe.

⁶ Nyéēm wāg-se mod ádōgēn nyé e'yókél é' mehób. Dyōb dékōgsēn bad ábe béebelé' ngáne áhedeé boŋ bébelé échén ndín é e'bébtéd é' mekan.

⁷ Né-ōó, nyéelatán ne bad ábe bébele' échén ndín é e'bébtéd é' mekan.

⁸ Ngen e'só nyémbé á ehíntén-tē, boŋ bōōb abé áde nyédíi ne Sāŋgwée ábélé nyédé á e'nyínen bé ekíde tē. Né-ōó, abé ádēn ábē ngáne abé á bad ábe bédé á e'nyínen bé ekíde.

⁹ Nhóbe nén áyāle bad ábe bédé á e'nyínen bé ekíde tē bébele mekan mé bwām, bébelé mekan míme métāngéné ne mekan míme médé mbále.

¹⁰ Né-ōó, nyéwanen ábii mekan míme méwógte Sāŋgwée bwām.

¹¹ Nyéewóó dyam ábel ne mbeltéd míme méeboo míme bad ábe bédé á ehíntén tē bébelé. Boŋ pen nyélúmed bad nén bān échē ndín é mbeltéd éeboo'é.

¹² Edé e'sōn átúb échē ndín é mekan dīn éche bad bémpēe bébelé á mesōm-tē.

¹³ Nzé mod abídté échē ndín é mekan áwed bad bényīn ngáne mēn mékóó abé.

¹⁴ E'nyínen bé ekíde bōō é'koo mekan mé mbéb abided áwed. Nē dōō ákás boŋ éhóbnéd nén bān,

“Wε awě ekúne' kábnéd,

puú, weebág nēe mod awě awédé.

E'nyínen bé ekíde ábe Krīstā-'ε é'pen wε á yāl.”

¹⁵ Né-ōó, nyétéd pónde ne nyaa e abé echě nyéwoo'é. Aden abé déebāg nēŋgáne abé áde e'yókél é' bad boŋ ábē nēŋgáne abé áde bad ábe béwóó debyéé.

¹⁶ Pónde ké ehée eche etál ébágnédé nyé ábel bwām, nyébel. Ayāle mbéb rítómé áte enén pónde.

¹⁷ Né-ōó, nyéebág nēŋgáne bad ábe bédé eyókél. Boŋ pen nyésōŋten chōm éche Sāŋgwée áhedeé aá nyébel, nyébel-le chó.

¹⁸ Nyéemwág mīm se mékōbē nyé áyāle nén nē áwógte mod e'sōn. Boŋ pen Edāádəŋ éche Esáá cháchá ébē nyé áte.

¹⁹ Nyékōnne' nhóg ne aníní ngase é Dyōb áwéd nhóg ne aníní nlém á abum. Nyékōne' ngase éche ébidé á kálag e Dyōb, nyékōne' ngase éche ékene Dyōb ne Krīstā, nyékōne-'ε nkāŋgé ké ríhée míme ríhuú ne Edāádəŋ Eche Esáá, áken Dyōb.

20 Nyéságnan Dyöb, Titée awêd pónde ésyā̄l áyāl e kéchéé éche ébenlad. Nyéságnan mó á dñn áde echen Sán Yesu Krístæ.

Paale alébe' baachóm ne ábāb bebaád

21 Mod téé abele ngáne waáb áhédéé áyāle edúbé éche nyébageé Krístæ.

22 Mmwaád-téé áwógne nchóm melemlem ngáne áwógnεé Sánḡwéé.

23 MwENCHÓM té awóó nkamlen ámín e mmwaád, melemlem ngáne Krístæ áwóó nkamlen ámín e elad é bad bé Dyöb. Chó-'aá édé nēngáne eche yāl mó-'aá abage chó e'soosoj.

24 Né-óó, mmwaád-téé atāngéné áwōgnē nchóm áyāl e mam mésyā̄l, melemlem ngáne elad é bad bé Dyöb éwógnεé Krístæ.

25 Nyé baachóm ábe béwóó bebaád, mod téé ádān mwaád, melemlem ngáne Krístæ ádáá elad é bad bé Dyöb boj ábē-'ε ádē alongé áwé áwab nló.

26 Anwé á nló mímāb ábel boj bésān. Ambenléd mendíb ne échē eyale ásaad bó.

27 Ambel nēn ábel boj elad é bad éboj áwe e'só. Ahédé'áá áá mópεεn échē elad é bad áwē, ésebán atón á mbinde ké ehóg, ké'ε abān, ké'ε dyam dé mbéb ábāg bó áyāl. Boj pen bésān, béēwōō-'ε dyam dé mbéb ké ahóg áde mod ahele ahób bó áyāl.

28 Melemlem nē dōo baachóm bétāngéné ábab bebaád adān ngáne bédáá échab yāl. MwENCHÓM kéhéé awē adāá mwaád, adāá eche yāl.

29 Modmod eékōō'ε yāl, boj abelé átāgné chó ánōné-'ε chó bwām. Melemlem nē dōo Krístæ ábeléé elad é bad bé Dyöb.

30 Syānē dedé bad ábe bébélé eche yāl.

31 Eténlédé á kálag e Dyöb nēn bán, “Enén nzōm chó ekáá boj mwENCHÓM átedé sáá ne nyan, abé ne mwaád, boj búmō bad bébe bétim mod nhóg.”

32 Adén dyam ádíi ndāle e dyam eche modmod éhēlēē-se asōnTEN. Boj ndúbpé méé mímén mekan méhóbe tāngene Krístæ ne elad é bad bé Dyöb.

33 Né-óó, mwENCHÓM téé awē awóó mmwaád, adān mwaád ngáne ádáá eche yāl. Mmwaád a nchóm téé-'ε atāngéné nchóm edúbé abε.

6

Paale alébe' bānbān ne ábāb besáá ne benyaá

1 Nyé bānbān, nyéwógne' áben besáá ne benyaá ngáne bad ábe bédé ne Sánḡwéé bétāngéné abel.

2 Eténlédé á kálag e Dyöb nēn bán, “Nyéwógne' áben besáá ne benyaá.” Atíntē e mbéndé éche Dyöb ábágé, enén mbéndé chó ebédé mbéndé e'só eche Dyöb dénhōbēnnē dyam.

3 Dyam áde ánhóbpé ádíi nēn bán, “Nzé nyéwógne' áben besáá ne benyaá, né mekan mébēēn nyé bwām, né alongé ádēn-ne déchāb áte.”

4 Besáá bé bān-ne, nyéeliḡsé áben bán. Boj pen nyénōne bó, nyélébe bó, nyéyágte-'ε bó nyaa eche Sánḡwéé áhédéé.

Paale alébe betān ne bewóḡ bé betān

5 Nyé betān nyéwógne' áben bewóḡ. Nyébage bó edúbé nyéwógne-'ε bó ne nlém nhóg, melemlem ngáne nyéwógnεé Krístæ.

6 Nyéēbenlé bó dāsō á pónde échē bényínεé nyé ábel békémed nyé. Boj nyé, nēngáne betān ábe Krístæ, abele áde nyébenléé Dyöb ábíđ nyé á nlém-té.

7 Nsón ké ríhéé níme nyébeléé, nyébel mó ne kán esyā̄l. Nyébele mó byánán Dyöb dōo nyébenléé saké baányoj.

8 Nyébíi nēn bán mod téé ákud nsábe áyāle nsón ní bwām ké ríhéé níme ábelé. Ábē ké ntān ké'ε kunze.

⁹ Nyé bad-te ábe nyêwóó betân ásê echên, nyécháə áben betân bwâm. Nyéekímmé b́o bán bétäg. Nyébíi nén bán nyáábō moosyáál nyédé ásê e Sán̄gwéé, nhóg awě adé ámín, eékwōgnād-taá modmod.

Ngáne bad ábe bédúbpé

bétán̄géné Satanε at̄n̄gen

¹⁰ Asóged, nl̄ange nyé nén m̄é; Nyébê nyébê ne Sán̄gwéé ábel bon̄ eche ngíne eche ewúú áte éwêd nyé nlém á abum.

¹¹ Nyétêd bwēm é' n̄zum é'syāāl ábe Dyōb ábágé nyé ábel bon̄ nyéh̄el akwáb áde Satanε atóm áte.

¹² N̄zum echē déwanεé eésaá n̄zum eche déwanεé ne baányon̄. Bon̄ ngumε, ngíne, ábāb benkam̄lεε ábe békam̄lan nkō̄nsé mé eh̄int̄en ne ngíne é ebébtéd éche edé ámín, b́o déwannεé n̄zum.

¹³ Né-ōó, nyétêd bwēm é' n̄zum é'syāāl ábe Dyōb ábágé nyé ábel bon̄ n̄zé pón̄dé e ebébtéd epedé, nyéh̄el b́o atyéem̄en. Nyéewān n̄zum nyép̄id á asóg nyélyāg nyésūm̄en ngáne nyémbē.

¹⁴ Né-ōó, nyébon̄sen nyékale mbále pón̄dé ésyāāl. N̄zé nyéb̄elé n̄ê, ébê n̄n̄ngáne mod awě awáá ngáá á nkog awě abō̄ns̄ené ábel dyam. Nyéb̄ele mam n̄ime métán̄géné, áyāle ábel mekan n̄ime métán̄géné ádíi n̄n̄ngáne mod awě ahédé mbóté eche b̄éb̄en̄lé e'kii ákút̄en yāl á pón̄dé e n̄zum.

¹⁵ Nyébê nyékale' nkalan̄ ní bwâm. M̄óó n̄p̄ene' n̄san̄. N̄zé nyéb̄elé n̄ê, né éb̄ē byánán̄ nyéh̄édé metámbé á mekuu, méb̄ēl̄ nyésūm̄en bwâm.

¹⁶ Ámín e n̄m̄én m̄esyāāl, nyébê nyédúbp̄e Yesu Kr̄ist̄əə. Adúbe ád̄en̄ déb̄ē n̄n̄ngáne ekā̄ngé éche ék̄əə nyé ábel bon̄ mekon̄ mé muú n̄ime Satanε álōmm̄é nyé méeb̄elé nyé dyamdyam.

¹⁷ N̄zé nyékag awan nyébíi nén bán nyékudé e'soóson̄ á mekáá mé Dyōb, modmod éeh̄ēl-laá nyé dyamdyam ab̄el. Nyéēb̄ē n̄n̄ngáne nwan-é n̄zum awě ahédé ekóté éche b̄éb̄en̄lé ekii. N̄zé nyékag-ke nyétán̄géné n̄é nyéwán̄lé nkwaté n̄ime Ed̄áád̄an̄ éche Esáá ébágé nyé. M̄m̄ē nkwaté ndé n̄n̄ngáne eyale é Dyōb. ¹⁸ Nyékān̄ne' pón̄dé ésyāāl ngáne Ed̄áád̄an̄ éche Esáá élyágt̄é nyé. Nyéláa Dyōb bán áwō̄ngan̄ nyé áyāl e kéchéé éche nyéb̄el̄é. Nyétêd pón̄dé, nyékān̄ne' pón̄dé ésyāāl ésebán̄ nyékóme'. Nyékān̄nad-te bad bé Dyōb b̄esyāāl.

¹⁹ Nyékān̄nad mémp̄ē, nén bán pón̄dé kéhéé n̄zé nhóbé m̄é nhóbe dyam, Dyōb déb̄ē m̄e e'yale ábe é'tán̄géné. Nén déb̄ēl̄ m̄ēh̄ēl̄ bad nkalan̄ ní bwâm n̄ime bad b̄enk̄ens̄on̄t̄ēnn̄é aláa, ésebán̄ mbáa' dyamdyam.

²⁰ Yesu Kr̄ist̄əə apw̄edé m̄e áb̄é n̄ime m̄és̄enz̄e, ákal n̄m̄én nkalan̄ ní bwâm, ene n̄z̄om ch́o-áá ek̄əó bon̄ mb̄é b̄oob̄ n̄é mod a mbw̄og. Né-ōó nyékān̄nad m̄e nén bán Dyōb áwêd m̄e nlém á abum níkal n̄m̄én nkalan̄ ní bwâm ésebán̄ mbáa dyamdyam.

Paale áa Dyōb ánamed bad ábe bédúbpé

²¹ Tikikuse, awesyān̄ē mwānyan̄ a Kr̄isto awě dédáá, abenle Sán̄gwéé ne nlém nhóg. M̄ó álāa nyé mekan̄ t̄an̄gene m̄e. Nén déb̄ēl̄ nyébíi ngáne nídíi ne ch̄om̄ éche mb̄el̄é.

²² Nl̄óme m̄ó áw̄en̄ ábel bon̄ aláa nyé mam n̄ime mébenlad ne sé, áwêd-te nyé nlém á abum.

²³ N̄san̄ n̄ime Dyōb Tit̄éε awêd, ne ech̄ed Sán̄ Yesu Kr̄ist̄əə, mb̄ē ne nyé, bad ábe bédúbp̄é. B̄ébel nyébê nyéd̄an̄ nhóg ne aníníi, nyébê nyédúbe-'ε Kr̄ist̄əə.

²⁴ Dyōb álúmed n̄m̄ē nsimé ne moosyāál awě ad̄əó aw̄ed Sán̄gú Yesu Kr̄ist̄əə, ed̄an̄ge éche éb̄ē abé ne abé.

Kálag echë Paalε áténlé Baá Filipi Ndibned n kálag

Paalε mó aténlé mwembé míme rídé á Filipi enén kálag áde ábédé á mbwəg. Abédé ndutul ne ayáge áde déetāngene áde bad bémpee béyágté'áá. Kénée nímén mekan mébenládtáá, Paalε ambé menyinge, ásūm-me nlém áyāl e adúbe áde adúbpé Yesu Krístə.

Nzom eche ekəá boŋ Paalε átēl enén kálag edii áságnen bad bé Krísto bé Filipi áyāle nwōngēn míme bēmbéé mó á pónké eche antōgnēnē nwōngēn. Awédé bó nlém á abum, aláá-'ε bó aá bēbē bésūm mekuu. Acháa bó aá bēwōŋ asuded á yāl áde Yesuε, ésebán bémwag bán mekan mé esíí mé ekob é yāl mékamlan bó. Akamtan bó aá abé áde bédíí mod nhóg ne Krístə aádíi nsimé n Dyōb, aá Dyōb débēl-le bēbē menyinge bēbē-'ε nsan ábe áde bédíí mod nhóg ne Krístə.

Nkabted n kálag

Paalε alénté, aságnéné, akánéd-te mwembé n Filipi 1.1-11

Paalε aá ábē á nkōŋsé aádíi ábele Krístə, áwé-'ε déboŋné mó 1.12-30

Paalε aá abé á bad bé Krísto ábē ngáne áde Krístə 2.1-11

Paalε aá bad bé Krísto bēbē á nkōŋsé née tintinε 2.12-18

Paalε akené Timotiε bó Epafroditus 2.19-30

Paalε aá mod awē adúbpé Krístə ákobné á'sō é' Dyōb 3.1-11

Paalε aá mod téé áwan áte ápid mam á asóg bwám 3.12-21

Paalε alébe bad bé Krísto 4.1-9

Paalε aságnan mwembé n Filipi 4.10-20

Melēnten mé asóg 4.21-23

Paalε alómmé bad melēnten

¹ Mε Paalε, nchoo ne Timotiε, mε-εé ntenle nyé enén kálag. Sédíi bembəlede ábe Yesu Krístə. Ntenle bad bé Dyōb, bad ábe bédé mod nhóg ne Yesu Krístə ábe bédé á Filipi, nchoo ne belyáged ne bad ábe bēwōŋgan ákēen nsón n Dyōb á'sō.

² Nsimé ne nsan míme ríhúú ne Dyōb awēd Titée, ne Sánjú Yesu Krístə míbē ne nyé.

Meságnen ne mekáne míme Paalε

³ Nságnan Dyōb áde mbēnléé, pónké téé nzé nkāmténé nyé.

⁴ Mbelé mbé menyinge pónké téé nzé nkānnad nyé moosyáál.

⁵ Mbelé mbagé nságnen áyāle nwōngēn míme nyékébéé mε ákal nkalan n bwám, bootya á pónké eché nyéwógé mó, boŋ nyédúbe-'ε, ápe bəəb.

⁶ Ndúbpé mεé Dyōb áde ábótédé nímén nsón n bwám átínté echēn, dékéén mó á'sō káŋŋ ápēen mó á asóg á Epun éche Yesu Krístə ápéé.

⁷ Ntāngéné enén ndín e mewēmtēn awōŋ áyāl e nyé baásyāāl áyāle nyédé mε á nlém-tē. Ké áde rídíí á mbwəg, ne áde ríhóbeé mam tāngene nkalan n bwám, nhóbe mεé nímén nkalan méesaá metóm, rídé mbále. Dyōb álúmté syánē moosyáál nímē nsimé ngáne débēnléé mó.

⁸ Dyōb áde mε mbóŋ nēn aá nlém míme ríwōŋné nyé áte, rídé melemem ne nlém míme Yesu Krístə áwōŋné nyé.

⁹ Nkānne-'ε nēn mεé, edānge éche nyéwōŋné Dyōb ne éche nyéwóó ne nhóg ne aníníí ébē ékag á'sō. Nkānne-'ε mεé nyébíi mekan mé Dyōb, nyésōŋtēn-ne nhəŋlén átínté e mekan mé bwám ne mekan míme méesē mekan mé bwám.

¹⁰ Nén débĕl nyéĕhĕl mekan míme métómténé abon abii. Nén débĕl nyéĕsān-’ε á’sō é’ Dyōb, béekóbén-naá nyé awusé ké ahóg á Epun éche Krĭstāá ápéé ámpĕ.

¹¹ Nén débĕl abé á bwām ádĕn áde áhúú ne Yesu Krĭstāá dényĭnnĕd áyāl e mekan mé bwām mésyāāl míme nyébeleé, ábel bon Dyōb ákud ehúmé ne mekenag.

*Paale aá abé á nkōŋsé ádii ábele Krĭstāá,
áwé-’ε débonéd mó*

¹² A-baányan, ndáá méé nyébii nĕn bán mekan míme mébĕnlédé ne me hĕn, rĭkóó awōŋgen ábel bon nkalan mí bwām rĭkanlad rĭkag á’sō.

¹³ Nén ábélé sánze ésyāāl éche éne eyáde éche mod ambáá ne bad bémpĕe bésyāāl hĕn, bébii nĕn bán ndé á mbwōg áyāle rĭdii mbaledε awĕ Krĭstāá.

¹⁴ Abé adé rĭdii-’ε á mbwōg, áwédé ekud é bad ábe bédúbpé nlém á abum, bĕnápĕ nlém awóŋ ákal eyale é Dyōb ésebán bébáá’ dyaamyam.

¹⁵ Edé mbále nĕn bán bó baahóg béwōŋné me kōŋjí, béhede-’ε alúmed bán bédé etógnĕn tómaa me. Bon pen, bó baahóg-ke békale míme nkalan ne mewĕmtĕn mé bwām.

¹⁶ Bad ábe békale mó ne mewĕmtĕn mé bwām, békale mó áyāle bédáá me, bébii-’ε nĕn bán Dyōb ákwĕntĕné aá mbĕ á mbwōg hĕn ábel bon rĭhĕb mé nkalan mí bwām méesaá metóm, rĭdé mbále.

¹⁷ Abé ábe béwōŋné me kōŋjí béekaléé nkalan mí bwām ne mewĕmtĕn mé bwām, békale mó áhede échab yāl chĕn bwĕm. Bébele nĕ, ne mewĕmtĕn nĕn bán rĭwōg ndutul abé áde rĭdii á mbwōg.

¹⁸ Bon nĕn déĕwóó’ε dyaam dé abel. Áyāl e míme menzii mésyāāl, nkalan míme Krĭstāá móó békaleé, ké bébenlád mewĕmtĕn mé bwām, ké’ε mewĕmtĕn mé mbĕb, ákal mó. Né-óó, áyāle nĕ, mébĕ menyĭnge.

¹⁹ Mébĕ mbé menyĭnge áyāle mbii nĕn méé mekáne míme nyékānnadté me ne nwōŋgen míme Edáádāŋ éche Yesu Krĭstāá ébageé me, bébĕl rĭkúđ e’sóoson.

²⁰ Nwóó nlém áte ne menyĭnge mésyāāl, nlyágé-’ε nlém méé méewógké e’sōn, bon méwōŋ e’wéd bé nlém á abum pónđé ésyāāl, tanje bōb, ábel bon kéchéé éche mbeléé ébel ehúmé éche Krĭstāá ényĭnnĕd, ké ndé á alongé ké’ε nwédé.

²¹ Ne me, abé áde rĭdii á alongé ádii ábele Krĭstāá, nzé nwédé-’ε ébonéd me.

²² Nzé édé bán ndé á alongé mébĕ mbelé nsón míme ndé etógnĕn. Bōb-pōó, meebii’ε pĕd eche rĭtāŋgéné atéd.

²³ Mmĕn mekan mébe métyéémé me á’sō-te, étómé me áte éche rĭtāŋgéné apwĕd. Ndáá méé rĭtede hĕn mbĕ ne Krĭstāá, áyāle nĕn ábóó tómaa ábe á nkōŋsé wĕn.

²⁴ Bon áyāl echĕn, édé etógnĕn bán rĭdii mbĕ á alongé.

²⁵ Ndúbpé nĕn, mbii-’ε méé mébĕ mbé á alongé, mébĕ mbé-’ε ne nyé moosyāāl ábel bon adúbe áde nyédúbpé Krĭstāá ákwōge, nyébé-’ε menyĭnge áyāle nyédúbpé mó.

²⁶ Nén débĕl abé adé mébĕ ne nyé ámpĕ, nyéĕnabé nzōm awóŋ ábe Krĭstāá mekenag áyāl echĕm.

²⁷ Bōb-pōó, abé ádĕn átāŋgéné abé ngāne Krĭstāá áhóbeé áwĕ nkalan mí bwām. Nén débĕl ké mpedé ányĭn nyé ké’ε meépede, mébĕ nĕn méé nyĕsumé mekuu nĕŋgāne mod nhóg, nyĕwóó-’ε mewĕmtĕn mehóg áwan áte ákĕā chōm éche nyédúbpé.

²⁸ Nyéebáá’ bad ábe bĕtāŋgan nyé. Nlém rĭwúu nyé á abum pónđé ésyāāl. Nén délūmĕd nĕn bán béekudté e’sóoson bon nyéĕkúđ. Dyōb dó-’aá átiide mímén mésyāāl.

²⁹ Dyöb ábénlédé ábē e'boŋ bé nlém áwēn, saké ádúbe Krīstæ dēmpen, boŋ kááŋ ne ákud metake áyāl e Krīstæ.

³⁰ Syánē dewane nzum á yāl e nkalanŋ mí bwám bəəb. Melemlem mé nzum míme nyénnyínnē nwane' móo rídii ríwanéé bəəb.

2

Paale aá abé adēd abē nēŋgáne áde Krīstæ

¹ Abé áde nyédíí nhóg ne Krīstæ áwédé nyé nlém á abum, éché edəŋge-’ε épwitad nyé nlém á abum. Nyédé nlatén ne Edəádəŋ éche Esáá. Nyélúmte' e'boŋ bé nlém, nyēwóo-’ε nlém ní ngəl ne nhóg ne aníníí.

² Mmēm menyĩŋge mélōn mbon nzé nyēwóo mewēmten mehóg, nyélúmte melemlem mé edəŋge ne nhóg ne aníníí, nyēwóo nlém nhóg, nyédé-’ε nēŋgáne mod nhóg áyāl e kéchéé éche nyébeleé.

³ Nyéebēlē mekan míme mélúmte bán échen yāl chēn chóo nyéhēdteé bwám. Nyéebēlē mekan míme mélúmte nén bán nyédé kúmbe. Boŋ ne asuded á yāl, nyényín bad bémpēe etógnén tómaa échen yāl.

⁴ Nyéebēlē mekan míme mépiinad nyé bēn pen nsyáŋ, boŋ pen nyébele kááŋne mekan míme méwōŋgan kááŋne bad bémpēe.

⁵ Mewēmten mímēn mébē nēŋgáne míme Yesu Krīstæ mémbēē.

⁶ Abédé nyaa eche Dyöb ádíí, boŋ kénē, enkēnwōŋgé mewēmten nén aá móchəgned nén móo bó Dyöb bétáá.

⁷ Enkēntédte yāl etógnén, boŋ ambēl eche yāl nēŋgáne mbəlede, bēnchyāā-’ε mó nēe moonyoŋ.

⁸ Ade ábédé nēe moonyoŋ, ansudéd eche yāl, ákwentén-ne awé. Ankwentén áwé kááŋ ne kwéed e awəg.

⁹ Né-əó, Dyöb dēmbē mó etál éche étómténé achab ámín, ábē-’ε mó dīn áde átómé mīn mésyāāl.

¹⁰ Dyöb dēmbēl nén ábel boŋ á dīn áde Yesuε, nhəgtéd rísyāāl mbwəg mebóbóŋ, ké nhəgtéd míme rídé á nkoŋ mímín, á nkōŋ rísé, ké’ε á mbwəg e baásē.

¹¹ Moosyāāl áhəb aá Yesu Krīstæ mó adé Səŋgwéé, ábel Dyöb Titée ákud edúbé.

Nyébé átínté e bad ngáne tintine

¹² A-baányanŋ bé edəŋge, ngáne nyéyógké’áá mekan abel míme Dyöb áhóbé aá nyébel áde míbédé ne nyé, édé etógnén bwámbwam bán nyébel mekan míme áhóbé aá nyébel, bəəb áde méesaá ne nyé. Nyéwōŋ mbwəg ní Dyöb áte nyésuded-te yāl á’sō é’ Dyöb. Nyéwan áte bwámbwam ábel mekan míme Dyöb áhədeé, ábel boŋ e’sósoŋ ábe nyékúdé, é’lōn mbon.

¹³ Nyébel nē áyāle Dyöb áde ne nyé pónde ésyāāl, ábel nyéwōŋ nlém ábel mekan mé bwám mímé áhədeé aá nyébel, nyébenle-’ε mó.

¹⁴ Nyébele’ chōm ésyāāl ésebán nyényoŋge áte, nyēpentan-ne.

¹⁵ Nyébele nén ábel boŋ modmod eehóbé’ aá nyéwóo atón dé mbéb ké á hóg á yāl, nyésāŋ-’ε. Nén débēl nyéebē bán bé Dyöb ábe béewóo atón dé mbéb ké á hóg á yāl, ábe bédé átínté e bad bé mbéb ábe bébele mbéb pónde ésyāāl. Nyédé átínté echáb á nkōŋsé-te nēŋgáne betintine ábe bēpene’.

¹⁶ Nyébele nén akal áde nyékaléé nkalanŋ mímé mίpεene’ alongé áde déemaá’. Nzé nyébele nén mēbē kúmbe ne nyé á epun éche Krīstæ ápéé áyāle nén délúméd bán awan áde ríwané’áá áte ne ntū míme míbélé, béebəə’é.

¹⁷ Měbē nēngáne nzəm e mīn echě bésyógé ámin e nsón míme nyébeléé, nēngáne mendε, áyāle adúbe áde nyédúbpé. Nhele-se íkūd metake, nwé-'ε áyāle nkale' nkalanj mí bwām melemlen ngáne nyémpē áyāle nyédúbpé míme nkalanj mí bwām. Boj kénê ndé menyinje měwōgēn-ne nyé moosyáál menyinje.

¹⁸ Melemlen nê dōo nyémpē nyétánjéné menyinje awóg, nyéwógēn-ne mémpē menyinje.

Paale atelé tângene Timotie bó Epafroditus

¹⁹ Nzé édé á ntii míme Sánjú Yesuε, nwóo nlém álóm Timotie áwēn mwāmpin mí pónDé, ábel boj póle éche méwōgkē áyāl echēn, éwēd me nlém á abum.

²⁰ Meewóo'ε modmod ampée née mó awě akoó míme nlém awónj ádāj dé ábii ngáne nyédíí.

²¹ Nhóbe nēn áyāle bad ábe bélyágé ásē échab yāl chōo bétōntanné, béebeléé ngáne Yesu Krístəá áhedεé aá bébel.

²² Nyé bēn nyébíí ngáne Timotie álúmté aá móbele nsón bwām. Abelé nsón ne me ákal nkalanj mí bwām ngáne mwān ábeléé nsón ne sáá.

²³ Né-óó, nlyágé nlém meé mēlóm mó áwēn áde ményinnē ngáne mekan mébēennē me.

²⁴ Ndúbpé-'ε nēn meé Sánjwéé ábēl mwāmpin mí pónDé mmēn ámpē mépě áwēn.

²⁵ Nnyíné nēn meé édé etógnén me álóm awed mwānyan Epafroditus áwēn. Abele nsón míme Krístəá ne me, awōngan-ne átāngen bad ábe bétāngan nkalanj mí bwām, mó-'aá abédé nēngáne mésénze míme nyélómé áwōngen me.

²⁶ Awóo nlém áte bwāmbwam ányín nyé moosyáál, anwóg-ke ndutul áde áwógé bán nyéwógé bán mōnkolé.

²⁷ Edé mbále bán ankolé, ápōn-ne káāj ne awé. Boj Dyōb dénwōg mó ngəl, saá-kaá mwēmpen, Dyōb dénwōg mémpē ngəl. Enkēnkwenténné aá áwē ábel boj meénabpé abé á ndutul-té.

²⁸ Né-óó, nwóo nlém áte bwāmbwam álóm mó áwēn ábel boj nyéwōg menyinje ányín mó ámpē, me-'ε ámpē meébūdē atag áte áyāl echēn.

²⁹ Né-óó, nyébē menyinje ákob mó nken áyāle adúbpé Sánjwéé ngáne nyémpē nyédúbpé, nyébage-'ε bad nēngáne mó edúbé.

³⁰ Nyébage mó edúbé áyāle ampon awé, abé-'ε á nsəl ní soj abele áde ábenléé Krístəá. Ambel nēn ábel boj áwōngen me ábel nsón míme nyébēn nyéehéle'aá-se nyébel.

3

Bad ábe bédúbpé Yesuε bóo békobnad á'sō é' Dyōb

¹ Asóged a-baányan, nyébē menyinje abé áde nyédíí mod nhóg ne Sánjwéé. Eetagtéé me átele nyé mekan míme ménsēbēē nyé atele. Nēn ádii ákəə nyé.

² Nyétéd pónDé ne ábē e'bébtéd é' bad. Echē mbwé, bad ábe béhóbe bán bétāngéné mod ayag.

³ Syánē-εε báyágé nyaa echě etāngéné. Edəádāj éwōngan syánē ábe Dyōb edúbé ngáne débēnléé mó. Syánē dedé menyinje ngáne dedíí ne Yesu Krístəá. Debíí bán baányonj béeheléé-se béwōngēn syánē.

⁴ Kénê mmēn nwóo nzəm ályág nlém á yāl e mekan mé moonyonj. Kénzéé átínté echēn awě awémténé aá mówóo nzəm ásum nlém á yāl e mekan mé moonyonj né nwóo nzəm tómaa nē.

⁵ Ade béchyáá me bēn'yāg me ámbíd e epun saámbé. Ndii mod a Israel awě abídé á túmbé e Benjamin. Echem sán ne nyan bēbédé bad bé Hibru. Mbédé mod a Farisia, ríhídē mbéndé ngáne éhóbé.

⁶ Menwón kán áte bwámbwam nyaa echě nê dēmbenlé rítágté elad é bad bé Krísto. Modmod eéhele'aá-se ahób aá nwóó atón dé mbéb ké ahóg áyāl, áyāle nhídé'aá mbéndé é bad bé Israel ésyā́l.

⁷ Bon abé bwēm é'syā́l ábe rínyiné'aá nēe nsyón béesaá dyam dé abelen bōob, áyāle chōm éche Krístā́ abénlé me.

⁸ Saké nê dēmpen, nnyíne chōm ésyā́l mēé éesaá dyamdyam nzé nhǎgténé chó ne ndāle e dyam echě edé ábíi Yesu Krístā́, awem Sánǵwéé. Ayāl éché chōm esyā́l éesaá dyam dé abelen, nnyíne-'ε chó nēngáne mbinde ábel bon mbíi Krístā́,

⁹ mbê-'ε mod nhóg ne mós. Saké ahíd á mbéndé dōó ákǎá bon ríkobnéd á'sō é' Dyōb. Bon nkōbnédé á'sō é' Dyōb áyāle ndúbpé Krístā́. Dyōb-paá ábélé bon ríkobnéd áwe e'sō áyāle ndúbpé Krístā́.

¹⁰ Ndáó mēé mbíi Krístā́ ríwōn-'ε ngíne echě ánwōngē áde ámpuú'é. Ndáó mēé mbê ríkude metake melelem ngáne ánkudté. Ndáó-'ε mēé ríkud metake ngáne ánkudté kǎá bēwúu me ngáne bēnwū'é mós.

¹¹ Nlyágé nlém nēn mēé rímén mésyā́l mébenléd ábel bon Dyōb ápuud me ámbíd e kwééd echēm.

*Paale aá mōwane áte
ápid mam á asóg bwám*

¹² Meehóbéé nēn mēé mmaá rímén mekan amad ké'ε mēé mmaá atyéem á menzii mésyā́l. Bon ndii nwane áte ábé nyaa e mod echě Yesu Krístā́ áhédé'aá aá mbê áde ápwédé me.

¹³ A-baányan, meehóbéé nēn mēé mmadé chōm ésyā́l. Bon dyam ahóg áde mbeléé ádíi, áchaten mekan míme métómé ámbíd ne áwan áte áhíd mekan míme méhúé' á'sō.

¹⁴ Ndii nwane áte áke á'sō kǎá nǵe wēe rítǎngéné asóg ábel bon ríkud nsábe míme Dyōb ábánnédé me ádyōb. Achēnle me aá ríke ádyōb mbwiined ne Yesu Krístā́.

¹⁵ Syánē moosyā́l awě demaá akwōg á adúbe tē déwále rímén melelem mé mewēmtēn tǎngene rímén mekan. Bon nzé edé bán nyēwóó mewēmtēn mémpēe tǎngene rímén mekan, né Dyōb déwōngēn nyé ásoñtēn mós bwám.

¹⁶ Kénê-'ε detǎngéné déhídē mekan míme syánē démáá abíi.

¹⁷ A-baányan, nyéladtēn nyébē nyéhíde rímēm mekuu, nyénone-'ε bad ábe bébele ngáne nyényinnē ngáne sébéláá.

¹⁸ Nkǎnlé'aá nyé ngen ne ngen, bōob-pe ámpē nlǎnge nyé ne mēsod tǎngene bad híin ábe rímāb mbeltéd rílūmtēé nēn bán bédé bad bé ekoyí tǎngene nkalan míme ríhóbe kwééd eche Krístā́ áwédé á awōg.

¹⁹ Echén ndín é bad ádab asóg ádíi dū á muú. Chōm éche ékamlan bó édii mekan mé esíi mé ekob é yǎl. Bédáá ábel mekan míme bétǎngéné békwaǵne. Mekan mé nkōñsé mēmpen-naá békamtanné.

²⁰ Bon syánē pen dedii bad ábe echab mbwōg édii ádyōb. Desine-'ε awesyánē Nsoode, Sánǵú Yesu Krístā́ bán ábíi ádyōb átim ámbíd á nkōñsé.

²¹ Ábenléd eche ngíne eche ábenladté ákamlen chōm ésyā́l, áhǎñlen échesyánē yǎl é nkōñsé, yǎl éche éewóó ngíne, ábel bon dékud ndāle é yǎl ngáne ánkudté áde Dyōb dēmpuúdté mós.

4

Paale abagé elébé

¹ A-baányan, ndáá nyé anyín ámpē áyāle ndáá nyé bwāmbwam. Nyêbelé ndé menyinge nyêdé-'ε nêngáne nsábe nímêm áyāl e nsón míme mbéle. Né-
 zó, a-baányan bé edange, nyébê nyésu mēkuu tângene adúbe áde nyédúbpé Sán gwéé.

² Ncháa nén mēé Yudia bó Sintikε bébê á nchemten áyāle bó bad bébe bédii baányan bé Krīsto.

³ Nlānge wēmpē, awem nsón a nsón awē rilyágé nlém áyāl, nhede mēé éwōngēn ábén bebaád ábé nsañ. Abén bebaád bébe, Klemene ne bad bé nsón bēmpēe bébedé me benben. Syāābō sébelé ntū ábel boñ ríhel nkalan mí bwām akal. Mmab mīn mésyāāl mēdé á kálag e alongé.

⁴ Nyébê menyinge pón dé ésyāāl áyāle nyédii bad ábe Sán gwéé. Nhóbe ámpē, nyébê menyinge.

⁵ Abé ádēn álúmed á'sō é' bad bésyāāl nén bán nyēchedne bad yāl. Sán gwéé akwogé ape.

⁶ Nyéētāgē áte áyāl e dyamdyam. Boñ pen áyāl e kéchéé éche étané nyé nyékāne Dyōb nén bán ábe nyé chōm éche nyétógnéné. Nzé nyékāne-'ε nyésāgnān mó.

⁷ Nzé nyébelé-'ε nē, Dyōb débēl nyébé nsañ, nsañ míme ríchábé ámīn tómaa ngáne baányan béhele bēsōnten. Mmēn nsañ méwōngēn nyé ábel boñ nyéētāgē áte abé áde nyédii bad ábe Yesu Krīstā.

⁸ Asóged a-baányan, nyékamtan ábén bwēm pón dé ésyāāl. Nyékamtan kéchéé éche édé mbále, kéchéé éche ékwógnédé chōm éche ebóó, kéchéé éche étāngéné, kéchéé éche éewóo atón dé mbéb áyāl, kéchéé éche bad bétāngéné adāñ ne kéchéé éche nyényiné bán ébōgnédé nyé. Nyékamtan mekan míme mébóó bwāmbwam ne míme bad bēhóbēé bán mébóó. Echén ndín é mam chōó nyétāngéné ahé á mewēmtēn-tē pón dé ésyāāl.

⁹ Kéchéé éche n'yágté nyé boñ nyékōb-pe ne kéchéé éche nyéwógé áwēm ne éche nyényiné nēe mbéle, nyébele chó. Nzé nyébele nén, Dyōb, mó awē abage nsañ, ábē ne nyé.

Paale aságnéné nwōngēn míme akúde

¹⁰ Abé áde ndíi mod awe Sán gwéé, ábéle ndé menyinge bwāmbwam, áyāle káñne á asóg nyélúmté bán nyébōngē me. Mbíi nén mēé nyéwóó mewēmtēn ábóo me pón dé ésyāāl, boñ etāl éebagnedéé nyé ábel áned.

¹¹ Meehóbēé nén áyāle ntóge' chōm. N'yággkē ákob kéchéé éche étané me á alongé.

¹² Mbíi ngáne mod ábāgkē ésebán awóó chōm éche átógnéné, mbíi-'ε ngáne ébāgkē mod ábud dé awóñ chōm éche átógnéné. Mmēnténé ákob kéchéé éche étané me. Mmēnténé abé áde mbúdé chōm éche rídyāgkē awóñ, mímētēn-ne ádyεε nzaa. Mmēnténé ábē áde ríwóó tómaa ngáne rítógnéné, mímētēn-ne abé áde méewóó'ε chōm éche rítógnéné.

¹³ Kéchéé éche étane me, ngine eche Krīstā ábageé me ébēl métōm chó áte.

¹⁴ Nyébelé bwām áwōngēn me áyāl e nímêm metake.

¹⁵ Nyé bad bé Filipi nyébíi bwām nén bán áde mbóótédé nkalan mí bwām akal áde mbídé á Masēdonia, nyé bēnpen-εé nyébédé mwembé míme ménwōngēn me.

¹⁶ Ké áde mémbeē á dyad á Tesalonika, nyēnlómé me nwōngēn ngen ne ngen.

¹⁷ Meehóbēé nén áyāle nhede mēé nyélōmme me nde. Boñ nhede mēé rínyine' ngáne Dyōb ánamtéé nyé anamed ne anamed.

¹⁸ Nkudé chõm ésyāāl éche nyékélõmēē me, ríkūd-te ké tómaa nê. Epafrodituse ampiinéd me bwēm ábe nyénlõmēē me. Edii byánán nyébagé Dyõb nde eche ewóó elod é bwâm. Dyõb ákóbé mímê mendε, mébõjnédé-'ε mó.

¹⁹ Adêm Dyõb débǎ-'ε nyé kéchéé éche nyétógnéné átíntê e mímê nkúú mé nhon, mbwiined ne Yesu Krıstæ.

²⁰ Ehúmé ébê ne áded Dyõb, awêd Titée á ngíndé ne á ngíndé. Ebê nê.

Melenten mé asóg

²¹ Nyéled bad bé Dyõb bésyāāl ábe bédúbpé Yesu Krıstæ. Abesyánē baányan ábe bédé ne me bélómmé nyé melenten.

²² Bad bé Krısto bésyāāl bélómmé nyé melenten, bwâmbwam abum á ndáb áde Kaisεε.

²³ Nsimé míme Sánjú Yesu Krıstæ mîbê ne nyé moosyéal.

Kálag echë Paalε áténlé Baá Kolose Ndibned n kálag

Paalε, mbapεε a nlomag nhóg awe Yesu Kr̄stəə móō antël enén kálag áde ádíí á mbwóg á dyad á Roma. Antelé bad bé dyad á Kolose. Saké Paalε andibé mwembé míme n̄bédé á Kolose. Epafrasε móō andibé mwembé míme n̄bédé áwed. Epafrasε ambé á dyad á Efesus. Anwóg eyale é Dyöb áwed, adúbe-'ε Yesu Kr̄stəə. Anhidnéd échē eyale, áke ákal chó á Kolose, ádíbē-'ε mwembé áwed. Ambíd e pón dé, Paalε anwóg nén bán bemeléede bé metóm bépééné ayáge áde déeboó á mwembé-te wê. Abé bemeléede béyágté'áá nén bán, kénzée awē ahede' Dyöb abii, awē ahede-'ε e'soóson akud, atánǵéné nēε ábagεé ngíne ne benkamlεε bé nkōn̄sé edúbé. Bán mod atánǵéné-'ε nēε áhídεé mbéndé nēε áyag mod ne áhíd mbéndé émpēe tǵngene ndyééd échē mod éētǵngeneé adyé, ne ekud é mam émpēe. Mmén mekan mésyāāl-lóó móō mēnkǵn̄ bon̄ Paalε áténlé bad bé mwembé mé Kolose enén kálag, áléb bó ábel bēbii mbále tǵngene Yesu Kr̄stəə ákamlεn bad bésyāāl ne ákamlεn ngíne é nkōn̄ n̄sé ne n̄mín. Mwēnpεn-naá ahεle ahúd syánē á mbéb-te.

Nkabtéd n kálag

Ndibned n kálag 1.1-8

Nsón míme Kr̄stəə 1.9-2.19

Alonǵé dékōālē ábe ne Kr̄stəə 2.20-4.6

Nsógten 4.7-18

Paalε alómmé bad melenten

¹ Mε Paalε, mbapεε a nlomag nhóg awē Yesu Kr̄stəə, ngáne Dyöb átíídé mε-εé ntenlé nyé enén kálag. Se Timoti, awesyánē mwǵnyan̄ a Kr̄sto, sélomme nyé melenten.

² Ntenle nyé bad bé Dyöb ábe nyêdé á dyad á Kolose. Nyêdé ne Kr̄stəə, nyéhíde-'ε mó ne nlém nhóg. Nsimé ne nsan̄ n̄ Dyöb Titée awêd mbé ne nyé.

Paalε aságnéné Dyöb á mekáne-tê

³ Pón dé téé sékānnad nyé, sésāgnān Dyöb, Sáá awē awed Sǵngwée, Yesu Kr̄stəə.

⁴ Sésāgnan Dyöb áyāle séwógé bán nyédúbpé Yesu Kr̄stəə, nyédáá-'ε bad bé Dyöb bésyāāl.

⁵ Sébíí nén bán nyébele' nē áyāle nyésumé nlém nén bán nyéékūd nnam míme Dyöb ákōn̄néde nyé ámín. Nyēm̄m̄ád mam awóg tǵngene míme nnam áde bésébpé nyé nkalan̄ n̄ bwām n̄ mbále akale.

⁶ Mmén nkalan̄ n̄ bwām mé nsimé n̄ Dyöb n̄kanlad mebwóg ne mebwóg n̄kag á'sō. Epun e é'só éche nyéwógé nyénsōn̄tén bán Dyöb ákōn̄té nlém n̄ bwām awón̄ ne bad bé mbéb.

⁷ Epafrasε, mbáledε awe Yesu Kr̄stəə móō ankalé nyé míme nkalan̄. Adíí mod awē syāābōó sébele' nsón, sédāá-'ε mó bwāmbwam. Abenle' Yesu Kr̄stəə ne nlém nhóg. Abé áde ádíí-'ε ne nyé, nsón míme séntǵngēnnē ábel móó ábeléé.

⁸ Mó alǵngé-'ε sé áá Edáádǵn̄ é Dyöb ébéle nyédáá bad bé Dyöb.

⁹ Né-óó, bootya pón dé echē séwógé mímén mam, sékānnad nyé pón dé téé. Sékānne nén bán Dyöb ábel nyékon̄ chōm éche áhedeé áá nyébel asōn̄ten. Sékānne nén bán Dyöb ábe nyé debyéé ne nsōn̄ten ábel nyésōn̄ten mam mé Edáádǵn̄ bwām.

10 Nê débël ádēn alongé débē ngáne alongé áde bad bé Dyöb átəngéné abé. Nyéēbele' mam nímě méwógte mós menyinje. Mekan mé bwám mós ne mós-é nyébeléé. Nyaa eché nyésəntēn-naá Dyöb, échəgkē acháge ne acháge.

11 Sêkanne-ε ámpē nén bán, Dyöb ábē áwēd nyé áte ne eché ngum eché echabé ámín, ábel nén nyéhəl awesən, nyékaŋ nlém, nyébé-ε menyinje áyāl e mam mésyāāl.

12 Nyéēsāgnēn Titée áyāle chōm ésyāāl. Mós-áá abelé bon nyékwognéd ábē bad ábe békobe akab á bwēm ábe ákōŋnéde ábē bad hōm áde e'nyínen bé ekíde é'díí.

13 Ahúdé syánē ásē e ngíne e nkamləne a ehíntén, apééné syánē ásē e nkamlən míme awe Mwān a nlém.

14 Dyöb álágséné syánē níməd mbéb akəde áde ákódté syánē ne mekií míme awe Mwān ásyógé á awəg.

15 Modmod eenyínnéé Dyöb díd. Bon bad bénsəntēn ngáne Dyöb adíí áde bényíne Krístə áyāle adíí nwágén rí Dyöb.

16 Edé nê áyāle, mbwiined ne Krístə dós Dyöb áhágé bwēm é'syāāl á nkoŋ ní mín ne rísé. Ahágé bwēm ábē bényínnéé díd ne ábē béenyínnéé díd. Mós ahágé benkamləne, ne ngíne ésyāāl. Dyöb áhágé bwēm é'syāāl mbwiined ne mós, mós-áá Dyöb áhágké ábē bwēm é'syāāl.

17 Bédəhób bán béhəge' kéchéé á nkōŋsé-te né Krístə adé alongé. Mós-áá akəá bon bwēm é'syāāl ébē á e'dii.

18 Mós adé nló míme bad ábe bédúbpé mós, bós-áá bédé nēngáne eche yəl. Mós abage ábē bad alongé áyāle mós adé mod a'só awē Dyöb ápúúdté awē ábē-ε abé ne abé. Nén dēmbənléd ábel nén ábē nkamləne ámín mekan mésyāāl.

19 Mmén mekan médé nê áyāle nén Dyöb dēn-éé ádē.

20 Dyöb dēmbəl nén áá chōm ésyāāl étim ásē ne mós Dyöb mbwiined ne Krístə. Abén bwēm é'bédé bwēm bé nkoŋ rísé ne bwēm bé nkoŋ ní mín áyāle asyəg ádē awe Mwān ásyógé mekií á awəg. Bəəb-pəó, chōm ésyāāl éhəle ébē nsəŋ ne Dyöb.

21 Nyé ne nyé nyémbé nchabned ne Dyöb, nyáabe Dyöb nyéebédéé áyāle mewēmtən mé mbéb míme nyénwōŋ'é ne mbəltéd mé mbéb míme nyébélé'áá.

22 Bon bəəb, Dyöb ábélé nyétimé ásē ne mós, awé áde awe Mwān Krístə awé abédé moonyoŋ áwédé á awəg. Dyöb dēmbəl nê ábel nén nyébé wéε módíí, nyébé bad ábe bésáá, nyéewóó atón dé mbéb ké ahóg á yəl, béékōbnē-ε nyé awusé ké ahóg.

23 Ebē nén bán ádēn adúbe adíí awúú áte nyéehúde-ε mekuu ásē ne asum áde nyésumé nlém áyāl e nkalaŋ ní bwám míme nyéwógé. Mmē nkalaŋ ní bwám míme nyémáá awóg, rídíí nkalaŋ míme ríkánlédé nkōŋsé áte rísyāāl mós-áá me Paale, rítimé mbəledε a Dyöb ákal.

Nsón míme Paale

24 Ndé menyinje bəəb ne metake míme ríkudéé áyāl echēn. Ngáne ríkudéé nímén metake, mmade metake míme Yesue nímě rítəngéné abé, áyāl eche yəl, nédē bad ábe bédúbpé mós.

25 Dyöb ábélé me mbəledε ábele bad ábe bédúbpé Krístə. Alómé me áá ríkoŋ nyé échē eyale akale bwám.

26 Bəəd, éché eyale émbē dyam ádē bad bēnkənsənténné. Bon bəəb abele ábē bad bēbíí chó.

27 Dyöb áhəde' nén áá ábē bad bēbíí nén bán nhən ne ehúmé éche Krístə édé káəŋne ne bad ábe béesə bad bé Israel. Kun eché edé áwēd-te edíí nén bán, nyésum nlém nén bán nyéékúđ ehúmé éche Dyöb áhóbé áá mósəbē ábē bad.

28 Né-áá ákáá bon səlāŋgē bad təŋgəne Krístə kéhéé wéε sékagké. Sélébe', séyāgtē-ε bó ne debyéé ásyāāl áde Dyöb ábágé sé. Səbele nê áyāle sēhəde nén

bán békobned á'sō é' Dyōb nêṅgáne bad ábe mekuu mémáá awédned ásē á adúbe-tê.

²⁹ Bon nwane áte bwámbwam. Ngum echē Krīstā eche edé me áte, chό-'ε ebage me ngine áwan áte.

2

¹ Ndáá meé nyébii ngáne níkémpéé awan áte áyāl echên, ne áyāl e bad bé dyad á Laudesia, nyébii-'ε ngáne níkémpéé awan áte áyāl e bad bémpēe ábe béenyinnē me díd.

² Mbēle nê áwéd bó nlém á abum ábel bon edaṅge éche édé átintē echên ébel nyébê mod nhág. Nhede me nyáábō nyésun nlém ne asum ásyā́l nēe bad ábe bésōnténé dyam á Dyōb áde bad bēnkēnsōntēnnē. Adē dyam-me ádíi Krīstā mwēn.

³ Krīstā mōs ahēle ábēl bon nyēwōṅ debyéé ásoṅten mekan mé Dyōb. Mmē mekan méde etógnén bwámbwam.

⁴ Nlāṅge nyé nén ábel bon mod eédogné nyé e'nyin bé nsal áte se nyēwémtén nén bán dyam áde álāṅgeé nyé átāṅgéné.

⁵ Ndáá meé nyébii nén bán kénéē mmēn méesaá ne nyé, ndé ne nyé é edáádāṅ. Kénéē méesaá-'aá ne nyé, ndé menyīṅge nén adúbe áde nyédúbpé Krīstā ályágé áde ngine.

Bad bé Krīsto béesaá ásē e mbéndé é nkōṅsé ámpē

⁶ Né-ṵó, ngáne nyékóbé Krīstā nēe Sāṅgwéé awēn, nyébê nyébele' ngáne áhedeé.

⁷ Adúbe áde nyédúbpé chōm-éē ábēn bemeléde báyágté nyé édé mbále. Nyéságnan-ne Dyōb póndé té áyāle chōm ésyā́l.

⁸ Nyéēmwāg-se mod atéd nyé ntāṅ áhíd e'hóhó bé áyáge dé metóm áde báyágté. Ayáge áde báyágté nyé ádíi ayáge áde békóbé wēe ábāb betaa ne áde áhíde mbéndé é mekan mé nkōṅsé. Adē ayáge ádíi ayáge áde áhúú ne baányōṅ ngēn déehúu'é ne Krīstā.

⁹ Nyéēmwāg-se ábē bemeléde bé metóm bédog nyé áyāle nén ngine ne abé á Dyōb áde yāl e moonyōṅ echē Krīstā áte.

¹⁰ Né-ṵó, nyélóné mbon áyāle nén nyédé ne Krīstā, Mó-'aá akamlan ngine ne benkamlēne bésyā́l.

¹¹ Abé áde nyédíi ne Krīstā, Krīstā ayagé nyé. Eesaá nēṅgáne moonyōṅ ayagéé mod. Krīstā mó ayagé nyé é edáádāṅ-tē. Ahúde áden abé dé mbéb.

¹² Ade bēndusēnné nyé, édé nēe nyēnwé, bélímé nyé, Dyōb ápuūd-te nyé ne Krīstā. Nén dēmbēnléd ne nyé áyāle nyēndúbé nén bán ngine e Dyōb echē epuúdté Krīstā ēpuúd nyémpē.

¹³ Ngen e'só nyēmbé byánán nyēwédé áyāle nyēbóó'áá mbéndé é Dyōb. Ene póndé-'ε né Krīstā éehūdē nyé abé dé mbéb áyāl. Bon bōb, Dyōb ábágé nyé alongé dékōlē apuud áde ápuúdté syānē ne Krīstā. Alāgséné syānē nímēd mbéb rísyā́l.

¹⁴ Edé nēṅgáne apinné mbéb níme syānē wēe ántenlé mó. Nédē nímē mbéb méesaá ámpē. Dyōb ábómmé nímē mbéb á awōg abome áde bébómmé Krīstā á awōg bon awé-'ε.

¹⁵ Dyōb déntōm ngine ne benkamlēne bé nkōṅsé áte. Atóm áde ántōmmē bó, dényinnéd ne moosyā́l ne awé áde Krīstā ánwēé á awōg.

¹⁶ Né-ṵó, nyéēmwāg-se bad bēlāṅgē nyé bán nyébelé awusé áyāle nyédyáḡkē donḡe dé medyé, ké'ε áyāle nyémwáḡkē donḡe dé mmítéd, ké'ε áyāle nyéebāḡkē donḡe á ngande ásē, ké'ε ngande echē ebāḡ nzé ngān étúbé túbén, ké'ε ngande e Epun é Nkóme áte.

17 Echê mbéndé ésyāāl ébédé-'ε νέε e'diidingε ábĕ é'lúmté'áá mam mé bwâm níme Dyöb déntāngēnnē alóm. Krīstā mō-'áá alónté nímē mam mésyāāl.

18 Nyéēmwāg-se mod anyágéd nyé áá nyētāngéné yāl asuded. Nyéēmwāg-ke se mod anyágéd nyé nén áá nyētāngéné ángel edúbé abε ngáne ábagεé. Nzé nyēbelé nê né nyéēbōd ndε echĕ Dyöb áhóbé áá mōḡbĕ nyé. Kénzée awĕ ayágte' nĕ, ahóbé' áá mōnyīnē á ndóg-te. Ene ndín e mod edé kúmbe ngĕn ne mekan mé mbéb níme mbíde' mō á nlém-tĕ, boŋ eewóó'ε nzom ké póg ábĕ.

19 Ene ndín e mod esógé Krīstā awĕ adé nló ní bad ábe bédúbpé adúbe. Ngáne nló ríkamlanné yāl esyāāl, melelem nĕ dōo Krīstā ákamlanné bad ábe bédúbpé mō bésyāāl ábel bébĕ mod nhóg. Ngáne nsid ríladεé mebōŋ mé yāl mé mod boŋ abé mod nhóg, nĕ dōo Krīstā áladεé bad ábe bédúbpé mō ábĕ mod nhóg ásē echĕ. Mmē nlatén ríkwoge-'ε ngáne Dyöb átíídé.

Awé ne ábĕ á alongé ne Krīstā

20 Edé bōob byánán awé áde Krīstā áwédé, nyēwédé ne mō. Né-ḡḡ nyéēsaá ásē e mbéndé é nkōŋsé ámpĕ. Cheé-ḡ ékáá boŋ nyēbé nyéhīdĕ' échĕ mbéndé byánán nkōŋsé rídii ríkamlan nyé?

21 Abĕ bemeléede bé metóm bĕlānge nyé nén bán, “Nyéechāngé échĕn, nyéewóglán échíníí á nsəl, nyéēsítán échĕ.”

22 Echĕ mbéndé ésyāāl énoŋe' bwēm ábĕ béēbāg dyamdyam ámpĕ nzé mod amaá bó abenled. Echĕ mbéndé édíí mbéndé ne ayáge áde bad bĕn bĕhāgné nló.

23 Echĕ mbéndé ébelé ényīnnāād byánán édé debyéé áte bwāmbwam áyāle nén, éyágte bad nén bán bĕn bĕtāngéné νέε béwóó nlém ábel mekan níme mékámé ábel, álúmed nén bán békoo Dyöb ahíd. Eyágte bad bán bésuded yāl, bébane-'ε yāl á metake-tĕ bwāmbwam. Boŋ ké bad bĕnhūū échĕ mbéndé ahíd, éeheléeé bó awōŋgen ásóg mewĕmtĕn mé mbéb awōŋ.

3

1 Edé bōob byánán apuud áde Dyöb ápuúdté Krīstā, nyémpĕ nyépuúde ne mō. Né-ḡḡ, nyébĕ nyóŋgé áyāl e mam mé mĭn, wĕε Krīstā ádíí á nkamlĕn á ekáá émbáá é Dyöb.

2 Nyébĕ nyésum nlém áyāl e mam mé mĭn, nyéēsūmĕ nlém áyāl e mam mé nkōŋsé.

3 Nyébíí nén bán, awé áde Krīstā áwédé, édé nĕngáne nyémpĕ nyēwédé.

4 Krīstā mō áde alongé ádĕd, áde ápεé-'ε á nkōŋsé-te wĕn nyémpĕ nyéēbĕ ne mō ne ehúmé ésyāāl.

Alongé dé nchun ne alongé dékōlē

5 Né-ḡḡ, nyéhūd mekan mé ekob é yāl nlém ne ahúd ásyāāl. Nyéhūd nlém áyāl e mam nĕngáne, akáb dé mesón, mbinde é mekan, esíí é mam mé ekob é yāl, áwōŋ mewĕmtĕn mé mbéb ne ngoód. Nzé nyédé ngoód né édé nĕngáne nyēbage Dyöb démpĕe edúbé.

6 Dyöb dékōgsĕn bad bésyāāl ábĕ bébele' échĕn ndín e mekan. Echĕn ndín é mekan éliŋse' Dyöb, né-ḡḡ, ákōgsĕn bad ábe bébele chó hĕĕn.

7 Echĕn ndín é mekan chóo nyébĕláá ngen e e'só, áde esíí é mekan mé nkōŋsé ékámlánnáá nyé.

8 Boŋ bōob mekan nĕngáne meliŋgá, pĕl, ekoyí, ábébed mod dĭn, ne ábéb nsəl áte, nyētāngéné mō asóg dé ábel.

9 Nyéekanlé' nhóg ne aníníí metóm. Nyéēbĕlé' nímĕn mekan ngáne édíí bán nyēmaá áden abé dé mbĕltéd mé mbéb atεde.

¹⁰ Bɔɔb-pɔɔ nyêmaá nkob mékɔ̄lɛ ahé. Dyɔ̄b áhédé nyé ádén alongé dékɔ̄lɛ áte, akwogte-'é dɔ̄ ábel nyébê néé mó, nyékon-'é mó awě ahegé nyé abíi bwám. Awónj áde nyéwóó ádén alongé dékɔ̄lɛ ábélé

¹¹ nhəŋlén méesaá áfinté e mod awě adé mod a Israel ne awě eesě, ké'ε mod awě béyagé ne awě béeyagé. Ken mod adé mod a nken-ε, ken mod e ahín-té-yε, ken ntán-ε, ken kunze-yε. Krístəá mó adé dyaam ásyā̄l adé-'ε bó mod asyā̄l áte.

¹² Né-ɔ̄ó, nyétəŋgéné nlem ní ngəl awónj, nyétəŋgéné nlem abonj, nyétəŋgéné-'ε yəl asuded. Nyétəŋgéné apwiited, nyétəŋgéné-'ε awεsen.

¹³ Nyétəŋgéné nhóg ne aníníi awεsen. Nzé mod bó waab békúú waab álagsén mó. Ngáne Səŋgwéé álagséné nyé, nyémpē nyétəŋgéné nyélagsén nhóg ne aníníi.

¹⁴ Amín e mímén mésyā̄l, nyédəŋ nhóg ne aníníi. Edəŋge chɔ̄ó élade' chòm ésyā̄l.

¹⁵ Krístəá abelé nyédé nsəŋ ne nhóg ne aníníi. Né-ɔ̄ó mímē nsəŋ rítəŋgéné chòm ésyā̄l échē nyébeléé alyáged. Nyétəŋgéné nyésəgnēn-ne Dyɔ̄b pónde ésyā̄l.

¹⁶ Eyale éche Krístəá ébê nyé á nlem-té bwám abé ne abé. Nyébenlad échē eyale ne debyéé ásyā̄l áyáged ne áleb nhóg ne aníníi. Nyékəŋne' Dyɔ̄b ngəse éche édé á kálag e Dyɔ̄b. Nyékəŋne' Dyɔ̄b ngəse éche ékémte' Dyɔ̄b ne Krístəá, ne nkəŋgé ké ríhée míme mípíidé nyé ákéméd Dyɔ̄b. Nyékəŋne' mó ásəŋneen mó ne nlem rísyā̄l.

¹⁷ Kéchéé échē nyéhóbéé, ké'ε échē nyébeléé, nyébele chɔ̄ á dín áde Səŋgú Yesuε. Nyésəgnan Dyɔ̄b Titée á dín á Yesu.

Alongé dékɔ̄lɛ áde nyétəŋgéné awónj

¹⁸ Nyé bebaád bé bechóm, nyéwógne áben bechóm. Nê dɔ̄ó bad ábē bédúbpé Səŋgwéé bétəŋgéné abel.

¹⁹ Nyé baachóm ábe nyéwóó bebaád, nyédəŋ áben bebaád, nyéētagté-'ε bó ngēn.

²⁰ Nyé bənbəŋ, nyéwógne áben bésáá ne benyaá áyāl e kéchéé échē nyébeléé. Nê dɔ̄ó Səŋgwéé ádóó aá nyébel.

²¹ Nyé bésáá bé bəŋ, nyéēkanjé áben bəŋ. Nzé nyékanjé' bó, né nyésúnte bó yəl áte.

²² Nyé betəŋ, nyéwógne áben bewónj pónde ésyā̄l. Nyéēbenlé bó nsón dásɔ̄ pónde échē bényíneé nyé ábel békéméd nyé. Bonj nyébenle bó ne nlem nhóg áyāle nén Səŋgwéé mós nyébagéé edúbé.

²³ Nsón ké ríhée míme nyébeléé, nyébele' mó ne nlem rísyā̄l. Nyébele mó, nyébíi-'ε nén bán Dyɔ̄b dɔ̄ó nyébenléé saké baányonj.

²⁴ Nyébíi nén bán nyéēkūd nsábe míme Səŋgwéé ákónédé ábē bad. Krístəá mó adé mod awě nyékoo'ε abele.

²⁵ Dyɔ̄b dékəŋsēn kénzée awě abelé mbéb áyāl e mbéb míme ábélé. Dyɔ̄b déekwognádté modmod.

4

¹ Nyé bad ábe nyéwóó betəŋ ásē echēn nyéwále áben betəŋ nyaa échē Dyɔ̄b áhédéé, nyéchəə-'ε bó bwám. Nyébíi nén bán nyémpē nyéwóó mod ámín awě nyédíi ásē échē.

Paale awéde' bad nlem á abum

² Nyébê nyéwéd yəl áte á mekáne-tê. Nzé nyékəŋne-'ε nyébānē nlem ne kéchéé éche nyéləŋgéé Dyɔ̄b, nyésəgnēn-ne mó.

³ Nyékânned-te sémpē âbel nén Dyöb ánedned sé nzii âkal nkalan tângene Krístæ míme bad békênsónténné bôód. Mmê nkalan míme níkaléé mós níkáó bon mbé á mbwög.

⁴ Nyékânné' nén bán níkalé mós bwâm nyaa echê ntângéné abel.

⁵ Nyébii ngáne nyébeléé mekan nzé nyêdé ne bad ábe béédúbpe Krístæ. Póndé téé eche etál ébágné ne nyé, nyébenle' bós mekan me bwâm.

⁶ Nzé nyáábō nyékale', nyéched ehób á nsal, nyékale pále éche ébonje bad nlém á abum. Nzé nyébele' nê, né nyéēbī ngáne nyékwentanné kénzēé awé asēdté nyé dyam.

Melēnten mé asóg

⁷ Tikikusē, mwānned a nlém a Krísto ālāā nyé mam míme mébenlad ne me hén. Mómpe adii mbaledé awé abenle Sāngwéé ne nlém nhóg nchoo ne me.

⁸ Nlóme' mós áwēn âbel bon aláa nyé ngáne sédíí, áwēd-te nyé nlém á abum.

⁹ Nlóme' bós Onesimus. Onesimuse mómpe adii mwānned a Krísto awesyánē awé dédáá. Mómpe abenle Krístæ ne nlém nhóg. Adii mod awé abidé áwēn dyad. Bós Tikikusē bēlāā nyé mam míme mébenlad hén.

¹⁰ Aristakuse awé sūmō bedé á mbwög hén alēnté nyé. Banabase mwānyan mómpe alēnté nyé. Memād nyé aláa tângene Makōse. Nzé apedé, nyékob mós nken.

¹¹ Yesuē awé béchagēé bán Justuse, mómpe alente' nyé. Abén bad bēlāán bēnpēn bōó bédé bad bé Israel ábe bédúbpé Krístæ, ábe syáábō debele' nsón âkal nkalan tângene nkamlēn ní Dyöb. Békéwēd me nlém abum bwāmbwam.

¹² Epafraze mómpe alēnté nyé. Mómpe adii mod awé abidé áwēn dyad, abé-'ε mbaledé awe Yesu Krístæ. Akānnad nyé póndé téé. Aá Dyöb dēn âbel nyékon chōm éche áhedéé aá nyébel abii, nyébel-le chó.

¹³ Mmēn mbíde' mós mbón nén mēé abelé nsón bwāmbwam áyāle echēn ne áyāl e bad bé Krísto ábe bédé á Laudesia ne á Hirapōlis.

¹⁴ Lukase, dógtē awé dédáá bós Demase, bómpe bēlómme nyé melēnten.

¹⁵ Nyélēnted me bānned bé Krísto ábe bédé á Laudesia. Nyélēnted-te me Nímfaa, ne bad ábe bédúbpé bēsyāal ábe bēbome' áwe ndáb.

¹⁶ Nzé nyēmaá enén kálag aláñ, nyélóm chó á Laudesia âbel bómpe belāñ chó. Nyémpē nyényín nén bán nyéláá kálag echê nílómmé bad bé Laudesia.

¹⁷ Nyéláa Achipuse bán ányín nén aá mómadé nsón míme Sāngwéé ábágé mós aá âbel.

¹⁸ Me Paale mmēn-εé mbēnlédé échēm ekáá átele nyé nímmēn melēnten. Nyéēchatán nén bán ndé á mbwög. Nsimé ní Dyöb níbê ne nyé.

Kálag e'só echë Paalε áténlé Baá Tesalonika Ndibned n kálag

Dyad á Tesalonika dǎo ábédé nló mé alon á mbwóg e Masedonia. Ade Paalε ábidé á dyad á Filipi, ankë á Tesalonika ádíbē mwembé áwed. Ambíd e pǎndé, Paalε anhidé á Tesalonika áke á dyad á Beria. Anhidé áwed ámpē ákē á dyad á Korinto, áwed-taá ákúdé kálag echë mod awë búmǎ bébele nsón, Timotiε, álómmé mó, áláa mó tǎngene mekan míme mébenlad á mwembé míme ndé á Tesalonika.

Paalε antelé mwembé míme ndé á Tesalonika, enén kálag e'só áwéd bó nlém á abum tǎngene adúbe áde bédúbpé Sǎngwéé bédǎŋ-ε mó. Awéd-te, ankamtén bó nyaa e alonǎgé echë ánwǎŋgē áde ábédé ne bó, ákǎŋ-ε bó mekan alúmed áte tǎngene epe éche Krístǎá ápéé ámpē, éche êmpéén mpuutéđ átínté e mwembé míme ndé á Tesalonika. Anlúmed bó áte ngáne áwóó nlém áte átim ámbíd áwāb ábel bon áwéd bó nlém á abum tǎngene mam mémpēe míme ménǎne' ádab adúbe. Anláá bó mekan míme bétǎŋgéné ábel áwóged Dyǎb menyinǎge ne ngáne alonǎgé ádǎb átǎŋgéné abé asin áde básinéé epe éche Sǎngwéé.

Nkabtéd n kálag

Ndibned n kálag 1.1

Meságnen ne mekenag 1.2-3.13

Elébé tǎngene abé á bad bé Krístó 4.1-12

Elébé tǎngene epe éche Krístǎá 4.13-5.11

Elébé é asóg 5.12-22

Nsógten n kálag 5.23-28

¹ Mε Paalε, nchoo ne Sailase bó Timotiε, με-εé ntenle' nyé enén kálag. Ntenle nyé bad ábe bédé á mwembé míme ndé á dyad á Tesalonika, nyé ábe nyédé bad ábe Dyǎb Titée, nyébé-ε bad ábe Sǎngú Yesu Krístǎá.

Nsimé ne nsan míme Dyǎb mbê ne nyé.

Paalε aságnan áyǎle adúbe áde bad bé Tesalonika béwóó

² Séságnan Dyǎb áyǎl e nyé moosyǎál pǎndé té, séhǎg nyé á mekáne pǎndé-té nzé sêkǎnne'.

³ Nzé sêkǎnne' ádeđ Dyǎb eched Sǎŋ, sêbelé sékamtán nsón míme nyébeléé áyǎle adúbé áde nyédúbpé. Sêkamtan ngáne edǎŋge éche nyéwǎŋné bad bémpeé ébéle nyébele ntú áwǎŋgen bó, nǎŋgáne alyág áde nyélyágé nlém áyǎl e epe éche awesyánē Sǎngwéé, Yesu Krístǎá, ábéle mekuu méwúú nyé ásē.

⁴ A-baányan, sêbíí nén bán Dyǎb ádáá nyé apwéde-ε nyé ábe ábe bad.

⁵ Sêbíí nén áyǎle áde sémpeé áwēn bon sékanlé nyé nkalan ní bwām, saké e'yale bēnpēn bóó sémpeénné. Bon ngíne e Edǎádǎŋ éche Esáá chó embēl bon sékalé nkalan ne ngíne, sēnkǎŋ-ε adúbe nén bán kéchéé éche séhǎbéé édé mbále. Nyébíí ngáne abé ádeđ démbēē áde sémbēē ne nyé. Chǎm éche ênkǎŋ bon ábe nê édíí áwǎŋgen nyé.

⁶ Ne nyé, nyéhídé'áá nyaa e abé echë sénwǎŋgē, nyéhídē-ε abé áde Sǎngwéé. Edǎádǎŋ éche Esáá êmbēl nyéwóg menyinǎge akob áde nyénkobpe nkalan míme sémpeénné áwēn.

⁷ Né-óó, abé ádeđ démbē nǎŋgáne elǎŋsén átínté e bad ábe bédúbpé, ábe bédé á mbwóg é Masedonia ne Akaya.

⁸ Nyēē nyēkəá boŋ nkalaŋ míme Sánḡwéé íwógnéd mebwóg mémpēe. Saké á mbwóg é Masedonia ne á Akaya dēmpen-εε íwógnédé. Boŋ adúbe áde nyédúbpé Dyöb dómpe áwógnédé hóm ásyāā. Né-óó, nzəm ké póg eesaá eché sehóbēé ádén akan ámpē t̄ngene nyé.

⁹ Abē bad bēn bōó bétime ahób ngáne nyēnkobpé sé nken áde sépédé áwēn. Béhóbé-ε ngáne nyétímné Dyöb, nyétēdē-ε abele á myöb mé metóm boŋ nyébenlé Dyöb dēn áde ádé á alongé.

¹⁰ Béhóbe-ε ngáne nyésinéé epe éche Mwän a Dyöb awē abíde ádyöb. Ane Mwän a Dyöb, Yesue, awē asoo' syánē ásē e nkógsen í Dyöb míme íhúé', móó Dyöb dēmpuúdté.

2

Paale abelé nsón á Tesalonika

¹ A-baányan, nyé bēn nyébíí bán epe éche sēmpēé áwēn, énkēmbáá ngēn.

² Nyé bēn nyébíí ngáne sēnkudté metake béwógéd-tε sé e'són á dyad á Filipi. Boŋ ádesyánē Dyöb dēnwēd sé nlém á abum, ákale nyé míme Nkalaŋ mí bwám. Sēkalé'áá mó kénéé édíí bán bad híin bétyéémánáá sé bwāmbwam áyāle béehede'aá bán sékale mó.

³ Chöm éche sélánḡé'áá nyé bán nyébel, énkēmbáá nēn bán sēnwóŋ mewēmtēn mé mbéb, káa bán ébédé chöm éche sēnkētánḡénné abel ké-ε ádog nyé.

⁴ Boŋ pen sélánḡé'áá nyé mó, néε bad ábe Dyöb ápwédé ákwogned dé akal míme nkalaŋ. Né-óó, sékale míme nkalaŋ mí bwám saké áwóged moonoyŋ menyinḡe boŋ áwóged Dyöb áde ábíí sé nlém áte menyinḡe.

⁵ Nyébíí bán áde sémbēē ne nyé séebonḡe'aá nsəl áte, ngoód-tε eebédeé sé áte. Dyöb ádé sé mbón áyāl e nē.

⁶ Séehede'aá nēn bán nyé ké'ε bad bēmpēe békene' sé.

⁷ Kénéé édíí bán sé nēngáne bembapεε bé nlomag ábe Krístəə, sēnwóŋ kunze ápemed nyé nted, sēnkēmpémtédté nyé, boŋ pen sēmpwiitéd átínté echēn ngáne nyéé-mwän átōgnéé ábe bán.

⁸ Sédəá nyé bwāmbwam, saké ákale nyé nkalaŋ mí bwám í Dyöb mēmpen, boŋ káāŋne ábel nyaa eché sehēle sēwóŋḡén nyé, áyāle sédəá nyé bwāmbwam.

⁹ A-baányan bé Krísto, ndúbpé méé nyēkamtan nsón ne ntú í ngíne míme sébélé. Ade sékánlé'áá nyé Nkalaŋ mí bwám í Dyöb, sébelé'áá nsón nkuu ne múte ábel boŋ séētagté nyé modmod.

¹⁰ Nyédé sé mbón, Dyöb-pe ámpē ádé sé mbón nēn, áde sébédé átínté echēn, nyé ábe nyédúbpé, abé dénsāŋ sé, sébelé'áá mekan míme métāḡénné, sēnkēnwóŋ-'aá awusé ké ahóg á yāl.

¹¹ Nyébíí nēn bán sēnchəá nyé mod téé ngáne sáá-a-mwän áchēḡéé ábe bán.

¹² Sēwédé'áá nyé nlém á abum, sésímē-ε nyé etúu áte áwóŋ abé áde áwóḡte Dyöb menyinḡe. Dyöb dōó áchénlé nyé ábe átínté e ábē bad ábe ákamlanné ne ábe ásē e éche ehúmé.

¹³ Nzəm empée edé eché ekəá boŋ sēbagé Dyöb mesāḡnen pónde ésyāā. Ade sēmpēénné eyale é Dyöb áwēn, nyēnwóg chó, nyékōb-pe chó. Nyēnkēnkobpé chó nēngáne eyale éche éhúú ne moonoyŋ boŋ nyēnkob chó nēngáne eyale éche éhúú ne Dyöb, ngáne chēn-ne ékōḡté abé. Eché eyale chó-'aá Dyöb ábenladté átínté echēn, nyé ábe nyédúbpé, áwóŋḡen nyé.

¹⁴ A-baányan, melemlem mé mam míme mēmbenléd ne mwembé mí bad bé Dyöb ábe bédúbpé Yesu Krístəə ábe bédé á Judeya, móó mébénlédé ne nyémpē. Nyékudé metake á mekáá míme ábēn bad melemlem ngáne bómpē bēnkudté metake á mekáá mé bad bé Israel.

15 Abê bad bé Israel bó donje bénwūū Sǎngú Yesue, bémpēe-ε béwúú bekal bé'dǎədǎη. Abê bad bé Israel-ε bó donje-'aá bēnnǎn sé áwāb dyad-tê. Bēwǒgtéé Dyöb menyinge, bétyéeman-ne moosyál.

16 Bébεle nê ábel bon séekanlé bad ábe béesε bad bé Israel eyale é Dyöb, ábel bon béekudé e'soóson. Bébáde mbéb ámín e mbéb pǒndé ésyā́l, kǎ́ηne á asóg-ke, Dyöb átǎngéné bó akógsen.

*Paale awóó nlém áte ányín
bad bé Dyöb bé Tesalonika*

17 A-baányaη, sēhóbe nén bán sēpágnédé nyé á yǎl á esón é pǒndé. Kénεε séesaá hǒm ahóg ne nyé, sēdii sēkamtan nyé. Ngáne sénwōngē mewēmten bwámbwam ányín nyé, sénwǎn áte bwámbwam ányín nyé ámpē.

18 Nén ábédé áyāle sēhedé'áá ape áwēn. Mmēn Paale, nwané áte ngen ne ngen ápe bon Satanε enkēnháá sé etál.

19 Nyéε nyékǎá bon sēwón e'lyág bé nlém, nyéε nyékǎá bon sēbé menyinge, nyéε nyékǎá-ε bon sékumé ekáá á tǎl, áyāle nsábe míme sénǎnεé á'sǒ ákud á pǒndé echē Sǎngú Yesue ápεé. Nyébēn-εε nyékǎá.

20 Ne mbále, nyéε nyékǎá bon sékumé' ekáá á tǎl, bon sēbé-ε menyinge.

3

1 Né-ǎǎ, áde sēnkēnhεnlé adyεε ésebán sēdé ne nyé, sēntíi nén bán séēdyéé ne sé bēn á dyad á Atens.

2 Sēnlóm Timotiε, awesyánē mwǎnyaη áwēn. Syáábǎǎ sēbele nsón ní Dyöb ákal nkalan ní bwám tǎngεne Krístǎǎ. Sēnlóm mó áwēn áwōngεn nyé áwéd nyé áte á adúbe-tē ne áwéd nyé nlém á abum.

3 Sēhede bán áwéd nyé nlém á abum ábel bon nímén metake méebelé'-se nyétimēn mbíd. Nyébēn nyébíi bwám nén bán Dyöb ámáá atii nén áá syáá baásyā́l deékǔd nímén metake míme nyékudéé.

4 Nyébíi nén bán áde sēbédé ne nyé, sēnláá nyé á'sǒ é' pǒndé nén bán séēkǔd metake. Nyé bēn nyébíi-ε bán nén dēn-εε ébēnlédé.

5 Nén dǎǎ dēnkǎη bon nlóm Timotiε. Menkēnhεnlé nlém akan ámpē, né-ǎǎ, menlóm mó áhyε dé ahed áte ngáne adúbe ádíi nyé. Membel nê áyāle mbáá'áá mεé ane awē abele' bon bad béhún á mekǎgsen-tē, ahεle ahúnéd nyé á mekǎgsen-tē. Nén délūméd bán sēbelé nsón ngēn.

6 Bǎǎb-pǎǎ, Timotiε abídé áwēn apedé ámbíd áwεd, alángé-ε sé kǎse e nkalan, áá nyédii nyédúbpé, nyédii nyédǎǎ-ε nhóg ne aníníi. Alángé-ε sé áá nyédii nyékamtan sé ne nlém ní bwám, áá nyédii nyédǎǎ sé anyín ngáne sémpē sédǎǎ nyé anyín.

7 Né-ǎǎ, a-baányaη, áfínté e échēd ndutul ne metake mésyā́l, nlém níwúú sé á abum áyāl echēn. Aden adúbe dǎǎ áwédé sé nlém á abum.

8 Bǎǎb-pǎǎ, séēbē menyinge abé áde sédíi ámín, ngáne mekuu méwúú nyé ásē áyāle adúbe áde nyédúbpé Sǎngwéé.

9 Bǎǎb sēhεle sēságnén Dyöb áyāl echēn. Sēságnan mó áyāle menyinge míme sédíi áyāl echēn áwe e'sǒ.

10 Sēkǎnne' nkuu ne müte, bwámbwam nén bán séhεl ape áwēn ámpē, ábel bon dényínεn, séwōngεn-ne nyé ábel adúbe áwúu nyé áte.

11 Nhede mεé ádesyánē Dyöb, Titéε ne awesyánē Sǎngú Yesue bélúmed syánē nzii séhεl ape áwēn ámpē.

12 Nhede mεé Sǎngwéé ábel edǎngε éche nyéwóηné nhóg ne aníníi ne bad bémpēe ékwǎg akwǎg ne akwǎg melemlem ngáne edǎngε éche séwóηné nyé ékwǎgεé akwǎg ne akwǎg.

¹³ Sêkânne' nén âbel bon Sângwée áwêd nyé nlém á abum âbel nén nyéewóó' atón dé mbébé ké ahóg á yál, nyésân-'ε á'sō ábe ádesyánē Dyōb Titée, áde awesyánē Sângú Yesue áπεé ne ábē bad.

4

Nyéwōn abé áde áwógte Dyōb menyinge

¹ A-baányan sêhóbe ámpē nén bán, nyên'yágé áwēd nyaa e abé echē nyétàngéné awón, âbel bon nyéwóged Dyōb menyinge. Enén ndín e abé chō-'aá nyéwóó. Bōb-pōó, sêcháa', sêlânge-'ε nyé á dín á Sângú Yesu nén bán, nyébē nyékεene' enén ndín e abé á'sō.

² Nyébēn nyébíi mam míme sên'yāgēdtē nyé, sé nēngáne bad ábe Sângú Yesue ábágé kunze.

³ Dyōb áhede aá nyébē nēngáne bad ábe bésáá. Nyéekábé mesón.

⁴ Nyé mod-té ábíi ngáne ákóbéé eche yál.* Nyébele nē nyaa echē etàngéné, ne nyaa echē nē débéé nyé edúbé átínté e bad.

⁵ Yál échēn éébāg yál éche éwóó' esíi bwāmbwam áyāl e mekan mé ekob é yál ngáne bad ábe béébíi Dyōb béwóó'.

⁶ Ayāle ádén dyan, modmod eebēnlē mwānyan epandé atéd-tε chōm éche édé échē. Sēnláá nyé nímén mekan ngen e'só sēsím-mε nyé etúu áte nén bán Dyōb dékōgsēn bad ábe bébele nē.

⁷ Dyōb dénkēmpwēdtē syánē áwón abé á mbinde, bon ampwēd syánē áwón abé áde ásáá.

⁸ Kénzée awē eékobe ayáge áde séyágté mó, saké moonyon mōó ábáá á yál, bon Dyōb dōó ábáá á yál. Dyōb dō-'ε ábage' nyé échē Edáádān éche Esáá.

⁹ Nzōm ké póg éesaá echē ntenléé nyé ngáne nyé mod téé átàngéné mwānyan adān, áyāle Dyōb dēn ámáá nyé ayáged ngáne nyé mod téé átàngéné mwānyan adān.

¹⁰ A mbále nē dēn-naá nyédáá áben baányan bé Krīsto bésyāāl ábe bédé á mbwóg e Masēdonia esyāál. Kénē, a-baányan, sêcháa nyé nén bán nyédān bó tómaa nē pōndé ésyāāl.

¹¹ Sêcháa nyé ámpē nén bán mod téé áwōn alongé áde ápwítédé, modmod eēnōnē chōm éche waáb ábeléé, mod téé ábele-'ε míme nsón. Nén dōó sēnlāá' é nyé bán nyébele'.

¹² Abel áde nyébēnlé nén, bad ábe béédúbpe, bébéé nyé edúbé, nyé mod téé ábōngē-'ε eche yál.

Sângwée āpē taléd

¹³ A-baányan, sêhede bán nyébíi mbále tângene bad ábe béwédé, âbel bon nyéēlēbē nēngáne bad ábe béewóó e'lyág bé nlém.

¹⁴ Ngáne sēdúbpe nén bán Yesue anwé, ápwū-'ε, sēbíi nén bán áde Yesue áπεé, Dyōb débēl bad ábe bédúbpe ábe béwédé, bépuú, bébé ne Yesue.

¹⁵ Ayáge áde séyágtéé nyé bōb ádíi ayáge áde Sângwée. Adē ayáge ádíi nén bán, syánē ábe déēbē á alongé epun éche Sângwée áπεé, déebáá á'sō se bad ábe béwédé bébé ámbíd.

¹⁶ Sângwée mwēn ábíi ámín, esaád é ngíne éwōgnēd, ehób éche ángel embáá éwōgnēd, esaád é elon é Dyōb-pε éwōgnēd. Ene pōndé dyan dé'só, bad ábe bēndúbē Krīstā, bépuú.

¹⁷ Ámbíd enē syāá ábe dedé á alongé ábe dedé á nkōnsé, deélatén ne bó, déké ámín á mbag-tē átán Sângwée á pemε-tē. Né-'aá débēē ne Sângwée á ngíndé ne á ngíndé.

* **4:4** Nyé mod-té ábíi ngáne ákóbéé eche yál; Donje á kálag áwóó Nyé mod té ábíi ngáne áchāngéé mwáád.

18 Né-ɔ́, nyébenled ádén ayáge áwéd nhóg ne aníní nlém á abum.

5

Nyébé mboṣén áyāl e epε éche Sánḡwéé

1 Bɔɔb-pɔ́ a-baányan bé Krīsto, nzɔm ké póg eésaa átele nyé áláa nyé pónde ne epun eché nímén mekan mébenlédté.

2 Ayāle nyé bēn nyébíí bwám nén bán epun éche Sánḡwéé ápagké, āpē táléd, melemlem nēḡgáne nchíb ápagké nkuu áde mod éesinéé mó.

3 Ade bad béhóbεé nén bán, “Nsan ṛídé, dyamdyam déesaa áde sébáa’é,” dɔ́ ebébtéd épií’ é bó táléd. Ebē melemlem ḡgáne e’wε bé achád é’piidεé mmwaád awé adé nkog. Modmod éebíd-taa échén ebébtéd áte.

4 Boṅ a-baányan, nyé pεn nyéésaa bad bé mbéb ḡgáne bad ábe bédé á ehintén-té. Né-ɔ́, epun éche Sánḡwéé ápagké éētānē nyé táléd melemlem ḡgáne nchíb ápagké táléd.

5 Nyé baasyā́l nyēdii bad bé e’nyínεn bé ekíde, nyébé bad bé bīn ábe é’kénlé. Syánē déesaa bad bé nkuu ké’ε bad bé ehintén.

6 Né-ɔ́, deebág néε bad ábe bédé nēḡgáne békúne’. Boṅ syánē déttéd pónde décháa-’ε éche syánē yāl.

7 Nkuu dɔ́ bad békunεé, bad ábe mīm mó-’ε mékóbεé, nkuu dɔ́ bémwákē mīm boṅ mékōbē bó.

8 Boṅ ḡgáne syánē dédīi bad bé bīn ábe é’kénlé, syánē décháa éched yāl. Adúbe ne edaṅge éche édé syánē áte bebē nēḡgáne mod ahédé mbóté eché bebénlé e’kii ákútεn tál á pónde e nzum. E’lyág bé nlém-’ε ábe nyéwóó áyāl e e’soóson ábe nyékudté é’bē nēḡgáne mod awé ahédé ekóté éche bebénlé e’kii.

9 Dyōb déntīi áá móṣsōṅ syánē mbwiined ne awesyánē Sánḡwéé, Yesu Krīstā. Enkēntīi’ é áá nīmē meliḡá mépii syánē.

10 Yesuε anwé á nló nīmēd ábel boṅ ké nzé édé bán syánē dedé á alongé, ké’ε dewédé, dēbē ne mó.

11 Né-ɔ́, nyéwéd nhóg ne aníní nlém á abum, nyéwéd-tε nhóg ne aníní áte ḡgáne nyébélé’áá bɔ́d.

Elébé ne melεnten mé asóg

12 A-baányan, sēcháa nyé ábe edúbé bwámbwam wéε bad ábe béwōḡgan nyé. Bɔ́ bélyáḡte nyé, báyāḡtē-’ε nyé ḡgáne alongé ádén átāḡgéné abé nēḡgáne bad bé Krīsto.

13 Nyécháa bó ne edúbé éche échábé ámin, nyédāḡ-’ε bó áyāle nsón míme bébelé. Nyébē nsaṅ ne nhóg ne aníní.

14 A-baányan, sēlāḡge nyé nén bán, nyéléb bad ábe bébelé chōmchōm. Nyéwéd bad ábe béwóó mbwóḡ áte, nlém á abum. Nyéwōḡḡen bad ábe béewúu áte, nyéwεεn-ne nhóg ne aníní.

15 Nyényín nén bán modmod éētīmtē mbéb áyāl e mbéb. Boṅ pεn nyéwane áte pónde ésyā́l áwōṅ nlém mībwám wéε nhóg ne aníní ne wéε bad bésyā́l.

16 Nyébág menyiḡge pónde ésyā́l.

17 Nyékānne’ pónde ésyā́l.

18 Kéchéé éche ébenléde ne nyé, nyésáḡnan Dyōb. Mmén mekan móó Dyōb áhedeé áá nyébele’ abé áde nyédīi mod nhóg ne Yesu Krīstā.

19 Nyéētīmtē Edáádāḡ éche Esáá áte áyāle nsón míme ébelé.

20 Nyéebáá’ nkalaṅ á yāl míme Dyōb áhóbé áá nyékal.

21 Boṅ pεn nyékāḡ mam mésyā́l míme béhóbεé. Nyéchāḡned mam míme béhóbεé míme méttāḡgéné.

22 Nyéewóó’ dyam ábel ne mam míme béhóbεé míme méettāḡḡene.

²³ Dyöb dën, mó awě abage syánē nsaŋ ábel nyésân áyāl e mam mésyāāl. Nyébane edáádəŋ ne yāl échên ésyāāl bwâm, éewóó' atón dé mbéb ké ahóg á yāl kááŋne á pónde echě awesyánē Sánjú Yesu Krístəə ápeé.

²⁴ Dyöb áde áchénlé nyé ábele' ngáne áhóbé, ábĕl-le áned.

²⁵ A-baányaŋ, nyékánnad sé.

²⁶ Nyéleŋtad sé ábesyánē baányaŋ bésyāāl, nyéhê bó tâl.

²⁷ Nlânge nyé á dĭn áde Sánjwéé nĕn mĕé nyélân enĕn kálag wĕé ábesyánē baányaŋ bésyāāl.

²⁸ Nsimé níme awesyánē Sánjwéé, Yesu Krístəə mĭbĕ ne nyé.

Kálag eché elónténé éβε echě Paale áténlé Baá Tesalonika Ndibned n kálag

Kálag echě elónténé éβε echě Paale ântelée bad bé mwembé míme níde á Tesalonika, ehóbe tângene adúbe áde bad bēnwōngē nēn bán epe éche Krīstāa ápēé ámpē, émáá ape áte. Paale antelé bad bé Krīsto enén kálag átii bó nsōhten míme bēnwōngē tângene mímén mekan. Mmén mewēmtēn míme baahóg á mwembé-te bēnwōngē, mēmbēl bó donge á bad bēnkwān mekáá áte, bēnkētéd-taá e'boŋ bé nlém ábe donge á bad bé Krīsto bēlúmté'áá nēe dyam. Paale anlúmed bó áte nēn aá, Krīstāa ádēhób aá mópag ámpē, ebébtéd ne mod-e-ebébtéd bóṣ bēsēbē ape. Ane mod e ebébtéd mó ātāngēn Krīstāa, alúmed-te káōne lúmtén aá mó mwēn-éé módē Dyōb. Paale ansím bó etúu áte aá bēdii bēwēd ádab adúbe áte kénēe békudēe ndutul ne metake. Ansím-me bó etúu áte ámpē aá bēekwānē mekáá áte boŋ bó mod téé ábele nsón ábel boŋ áhel eche yāl atōgen, melemlen ngáne mó Paale ne bad ábe bóṣbōṣ bēbele nsón.

Nkabtéd n kálag

Ndibned n kálag 1.1-2

Mekenag ne e'wéd bé nlém á abum 1.3-12

Elébé tângene epe éche Krīstāa 2.1-17

Elébé tângene abé á bad bé Krīsto 3.1-15

Nsógtēn n kálag 3.16-18

¹ Mē Paale, nchoo ne Sailase bó Timotiē, me-éé ntenle' nyé enén kálag. Ntenle nyé bad ábe bédé á mwembé míme níde á dyad á Tesalonika, nyé ábe nyédé bad ábe Dyōb Titée awēd, nyēbé-'e bad ábe Sāngú Yesu Krīstāa.

² Nsimé ne nsan míme Dyōb Titée ne míme Sāngú Yesu Krīstāa núbē ne nyé.

Dyōb dēkāād bad nyaa echě etāngéné

³ A-baányan sētāngéné nēe sésāgnanné Dyōb áyāl echēn póndé téé. Etāngéné bán sébel nē áyāle adúbe ádēn ákwōge, akwōg ne akwōg, edānge-'e éche nyéwōŋné nhóg ne aníníí ch'-'e ékwōge'.

⁴ Né-ṣó, áfinté e mwembé n Dyōb, sébēn sékumne nyé ekáá á tāl tângene awēsēn áde nyéwéséné ne adúbe áde nyéwóó, ataged áde bētagtēé nyé ne metake mésyāāl míme nyékudēe.

⁵ Mmén mekan mésyāāl mélúmtē' nēn bán nyaa eche Dyōb ákáadtēe etāngéné. Mmén mésyāāl mó-'aá mékōŋ boŋ Dyōb átéd nyé nēe bad ábe bēkwógnédé ábē áwē nkamlēn. Mmē nkamlēn móṣ ríkáá boŋ nyékudé metake.

⁶ Dyōb ábele mekan nyaa echě etāngéné. Bad ábe bēbele' boŋ nyékudé' metake, Dyōb dépiinéd bó metake.

⁷ Dyōb débēl nyéekudtē metake ámpē, ábēl-le sé-'e ámpē séekudtē. Nēn dēbenléd áde Sāngú Yesuē ábīdtē ádyōb ne éche ángel é ngíne, muú míme ríchodne-'e mélāŋnéd bó.

⁸ Akōgsēn bad ábe bēbáá Dyōb á yāl bēbán-'e áhíd nkalan ní bwám míme nīhóbe tângene awesyānē Sāngú Yesuē.

⁹ Akōgsēn bó ne metake míme mébē á ngíndé ne á ngíndé. Bēebáá wēe Sāngwēé adíí, bēenyín-naá ngáne éche ehúmé épédé achab ámín.

¹⁰ Ade áπεέ échê epun, bad bé Dyöb béβε mó mekenag, bad ábe béédúbpe bésyā̄l-le, bényāg bwāmbwam. Nyémpē nyéēbē átíntē e ábén bad áyāle nyéndúbé nkalan míme sénlāā'é nyé.

¹¹ Abé áde nímén mekan mésyā̄l médíí sé á nlém-tê dōó ákáo bon sékānnād nyé. Sêkānne bán áded Dyöb ábel nyékwogned ákud bwēm é' bwām ábē áhēdēé nyé abele apwēd áde ápwédé nyé ábē ábē bad. Sêkānne-ε bán ábenled eche ngíne ábel bon mekan mé bwām mésyā̄l míme nyéhēdēé, adúbe áde nyédúbpe Krístā nyékud mó.

¹² Sêkānne nén ábel bon dín áde awesyānē Sāngú Yesu Krístā áwōn edúbé átíntē echên, nyé-ε ámpē nyéēkūd edúbé áyāl echê. Nsimé míme áded Dyöb ne míme Sāngú Yesu Krístā, móó mébēl bon nén ábenled.

2

Mod-e-ebébtéd āpě

¹ Bōob-pōó a-baányan, sêtenle nyé tângene epe éche awesyānē Sāngwéé, Yesu Krístā áπεέ ámpē ne aladen áde déladnēé ábē ne mó. Ncháa nyé nén mēé,

² nyéewámsán apuudted á mewēmtēn, ké'ε nyéetédnād áte ahób áde bad béhóbéé bán Epun éche Sāngwéé é máá ape. Kapóg bad béwēmtan bán sēnhób ádén akan áde séhóbé'áá mam míme Edāádān élyágté'áá sé aá séhób, ké'ε áde sékánlé'áá nyé nkalan mí bwām ké'ε bán sēntelé nyé mó á kálag-tē. Bon sēnkēmbenlé nē.

³ Nyéēmwāg-se mod ábenléd nzii ké póg ádog nyé. Ayāle Epun éche Sāngwéé áπεé éepaá káāne á pónde échē mpuutéđ ní ngíne mépeé á nkōnsé, mod awē mó-ε adé ebébtéd anyínned. Dyöb á máá atíí aá ane mod ákě á ehyán é muú.

⁴ Atyēēmēn kéchéé éche bad béchāgēé bán dyöb ké'ε kéchéé éche bad bébagēé edúbé, ábānē-ε eche yāl ámín echāb. Asāl, ádyēē-ε áse káāne á ndāb e Dyöb, áchāgē-ε yāl aá móó módē Dyöb.

⁵ Nyéēchatán nén bán áde mbédé ne nyé menláá nyé nímén mekan.

⁶ Nyébíí dyam áde áchāngé ane mod bon eépédé bōob. Adē dyam áchāngé mó ábel ápe á pónde échē etāngéné.

⁷ Mekan mé' ekoñéd mé ebébtéd mémáá abooted dé abenled. Ane awē achāngé nímén mekan abel bon méebenlād bōob, mó ábē acháo mó káāne á pónde échē Dyöb débēnle bon áhide.

⁸ Ene pónde-áá mod a ebébtéd anyínnēdtē. Adíí mod awē Sāngú Yesu áwūū'é ne échē pemε e nsal, abébed-te mó apen áde yāl épenné mó áde áπεé.

⁹ Mod-e-ebébtéd āpě ne ngíne eche Satanε. Abelé nsón mé edogké álúmed eche ngíne, ábelé' e'chemléd ne menyáké nyaa ne nyaa.

¹⁰ Ábenléd-te medogké mé ebébtéd nyaa ne nyaa wéε bad ábe ádāb alongé dēbōō'é. Adāb alongé dēbōō áyāle bēmbān mbāle akob, ábel bon békud e'soóson.

¹¹ Né-ōó, Dyöb dēmbēl bēwōn mewēmtēn mé mewusé mé ngíne ábel bon bédúbe metóm.

¹² Nén débēl bad ábe béédúbpe mbāle bon bétimé' bēwógé menyinge ábel mbēb, békūd nkógsen.

Dyöb ápwédé nyé ákud e'soóson

¹³ A-baányan, nyé ábe Sāngú Yesu ádáo, sētāngéné sēsāgnān Dyöb pónde téé áyāl echên. Sēsāgnan mó áyāle apwédé nyé bad bé Tesalonika ábē bad bé'só ákud e'soóson á ngíne e Edāádān éche Esáá ábel bon nyébē ábē bad ábe bésáá. Ambēl-le nyékūd e'soóson adúbe áde nyédúbpe mbāle.

¹⁴ Apwɛdé nyé ákud e'soóson mbwiined ne nkalan ní bwâm míme sékánlé nyé. Abélé nén ábel bon nyémpē nyébê ásē e ehúmé éche awesyánē Sánjú Yesu Krístə.

¹⁵ Né-ɔ́, a-baányan, mekuu méwúu nyé ásē nyéhíde-'ε ayáge áde sékúdé, bon sémpē sêyáged nyé. Sêyágté'áá nyé akale áde sékánlé'áá nyé ne atele áde séténlé'áá nyé kálag.

¹⁶ Awesyánē Sánjúwéé, Yesu Krístə mwën ne Dyöb Titée awêd, mó awě adəó syánē aběnlédé míme nsimé ábe syánē e'wéd bé nlém á abum ábe béemaá', ábē-'ε syánē e'lyág bé nlém ályág nlém áyāl e mam mé bwâm.

¹⁷ Awêd nyé nlém á abum awéd-tε nyé áte pónké ésyāā́l ábel ne áhób mekan mé bwâm.

3

Paale ad bad bé Krísto békánnad bó

¹ A-baányan, tñgɛne mekan mémpēe, nhóbe nén mɛé nyébê nyékánnad sé nén bán nkalan ní bwâm míme Sánjúwéé níbê níkanlad átínté e bad bémpēe níkag á'sō, bad békob-pe mó ne edúbé melemlem ngáne émbēē ne nyé.

² Nyékánné-'ε ámpē nén bán Dyöb áson sé á mekáá mé bad ábe bēbēbé nlém ne á mekáá mé e'bébtéd é' bad, áyāle saké bad bésyāā́l ábe bēwóge nkalan ní bwâm bédúbpe mó.

³ Bon Sánjúwéé abele' ngáne áhóbé áá mósōbēl, áwêd nyé áte ákāā́-'ε nyé ábel bon Satanε éēbēlē nyé ebébtéd.

⁴ Sêsumé nlém nén bán Sánjúwéé ábēl nyébēl kéchéé éche sélángé nyé bán nyébēl, nyéēbē nyébēlé-'ε chó.

⁵ Sánjú Yesu Krístə mwën ábel nyésōntɛn ngáne Dyöb ápédé nyé adəŋ, nyéwɛsɛn-ne melemlem ngáne ánwɛsēnné.

Paale ad mod atəŋgéné nsón abel

⁶ A-baányan, sēsíme nyé etúu áte á dñn áde Sánjú Yesu Krístə, nén bán nyéədōlē bad bé Krísto á yāl ábe békwané mekáá áte bēéhíde-'ε ayáge áde séyágté nyé.

⁷ Nyé bēn nyébíí bán sēē nyétəŋgéné ahəntɛn. Sēnkēnkwané mekáá áte áde sébédé ne nyé.

⁸ Sēnkēndyáá chóm é mod éche séēsábpéé, bon pɛn sēbélé'áá nsón ne ntū ní ngíne, nkuu ne mūte ábel bon séētāgté nyé modmod.

⁹ Sébélé'áá nén saké nén bán sēnkēnwóŋgé kunze áláa nyé nén bán nyéwōŋgen sé. Bon sébélé'áá ábel bon kéchéé éche sébéléé ébē nēngáne eláŋsén éche nyémpē nyétəŋgéné ahíd.

¹⁰ Ade sébédé ne nyé, sēyāgké'áá nyé etúu asím áte nén bán, "Mod awě abáá nsón abel, bēebagé mó chóm éche ádyēē."

¹¹ Sēhóbe nén áyāle sēwóge nén bán donge á bad bédé átínté echēn ábe békwané mekáá áte, bēebéléé chómchóm, bēhāg-ke nsəl áyāl e mekan mé bad.

¹² Echén ndín é bad sēsíme bó etúu áte, sélánge-'ε bó á dñn áde Sánjú Yesu Krístə nén bán bēbwāg yāl, bēbele nímbab nsón ákud ndyééd e epun é bín.

¹³ A-baányan, nyéekómé' ábel mbon.

¹⁴ Nzé mod abáá chóm éche sétélé á kálag-tē wén ahíd, nyébane mó mīd á yāl. Nyéewóó' dyam ábel ne mó ábel bon ákwāg.

¹⁵ Kénē, nyéetédé mó nēe mod a ekoyí. Bon pɛn nēngáne awɛn mwānyan a Krísto, nyéláa mó bán átéd pónké.

Melɛnten mé asóg

¹⁶ Sǎngú Yesuε mwěn, mó awě abage syánē nsan, ábε nyé nsan pón dé ésyāál ne á menzii mésyāál. Sêkâne-’ε bán mwěn ábê ne nyé moosyáál.

¹⁷ Mε Paale, mměn-εé ntelé mímén melentεn ne échêm ekáá. Nén dǎo á dé nêngáne e’chem áyál e échêm kálag ésyāál. Nê dǎo nítelé kálag.

¹⁸ Nsimé míme awesyánē Sǎngwéé, Yesu Krístəə, mbê ne nyé moosyáál.

Kálag e'só echë Paalε áténlé Timotiε Ndibned n kálag

Timotiε abédé kódemod echë endúbé Krīstə. Ambíd á Esia Mainə. Nyaá abédéε mmwaád a Israel, sáá-'ε mod a Grikiá. Ahōñné'áá Paalε ábelé-'ε nsón n Dyōb ne m. Kálag e'só echë Paalε áténlé Timotiε ekoo' metón meláán ahób.

Dyam dé'só, ene kálag esíme bad etúu áte átéd pónde ne ayáge dé metóm áde abédé á mwembé-te. Adén ayáge dēnladtén mekan míme bad bé Israel behídé'áá ne míme bad ábe béesε bad bé Israel behídé'áá. Adē ayáge abédé nén bán nkōñsé míme bad bédíí áte nídé ebébtéd, bán nzé mod ákūd-te e'soosōñ atāñgéné abíí mekan mé e'koñnéd ábelé-'ε mekan nēñgáne ákii donje á ndyééd ne ádyεε ésebán mod awóo' mmwaád ké'ε mmwaád awóo' nchóm. Enén kálag ehóbe ámpē ngáne bad bétāñgéné mwembé alyáged, ngáne bétāñgéné Dyōb edúbé abε, ne nyaá e abé echë bad ábe bélyágte mwembé ne ábe béwōñgan á mwembé-te bétāñgéné awóñ. Asóged, Paalε alébe Timotiε ngáne átāñgéné mbəledε awe Yesu Krīstə a bwām abé ne nsón míme átāñgéné abel áfínté e bad ábe bédúbpé Krīstə.

Nkabtéd n kálag

Ndibned n kálag 1.1-2

Elébé tñngene mwembé ne bad ábe bélyágte m 1.3-3.16

Timotiε akudé elébé tñngene míme nsón 4.1-6.21

Paalε alómmé Timotiε melēnten

¹ Mε Paalε, mε-εé ntelé enén kálag. Ndii mbapεε a nlómag awě Yesu Krīstə. Ndake echë ríkudé ábel mímé nsón ehúú ne Dyōb, m awě asó syánē áyāl e mbéb, ehúú-'ε ne Yesu Krīstə, m awě adé syánē e'lyág bé nlém.

² A-Timoti, wε-εé rítenlé enén kálag. Edíí nēñgáne awem mwāñ mwēñ, adúbe áde édúbpé Krīstə. Nsimé, ngol ne nsāñ míme ríhúú ne Dyōb Tités awēd ne Yesu Krīstə, Sāñgwéé awēd mbē ne wε.

Paalε alébe Timotiε tñngene bemeléede bé metóm

³ Ade ríkágé'áá á mbwóg e Masēdonia menláá wε mēé élyāg hē á dyad dé Efesus ábel bon weémwāg wεé donje á bad béyágte' ayáge áde déetāñgēne.

⁴ Weémwāg-ke-se ábē bad bebébtē pónde ákal póle éche éesε mbále ne póle éche ehóbe tñngene ábāb betaa ábe mod éehelée-se atōñ. Nzé béyágte échē ndín é póle épeene mpentēn, éēwōñgānnē bad áwóñ alongé áde álūmte bán bédúbpé Dyōb.

⁵ Nzom echë enkǎñ bon nláá wε mēé éyágte bad ayáge áde átāñgéné edíí ábel bon bad bédəñ nhóg ne aníníí. Etāñgéné edəñge awóñ éche ébide' á nlém míme rísáá, nlém míme mbíí dyam áde átāñgéné ne áde déetāñgēne, mbíí-'ε adúbe áde áde mbále.

⁶ Donje á bad béehídēē mímén mekan, nē ábelé bepáné nzii ahób áde behóbéé e'kúkú é' mekan.

⁷ Abé bad béwóo nlém áte ábe bemeléede ábe béyágte mbéndé é Dyōb bon béēsōñtēné mekan míme bélāñgēé bad, béēsōñtēné-'ε mekan míme behóbéé bán békóó abíí.

⁸ Debíí nén bán mbéndé eboó nzé bad bebēnlad chó ngáne éhednad-té.

⁹ Debíí'ε nén bán Dyōb déebeléé mbéndé áyāle bad ábe bébele' ngáne áhedéé. Bon Dyōb ábelé mbéndé áyāle bad ábe béehídē mbéndé ne bad ábe béebelé'

ngáne áhedeé. Abelé mbéndé áyāle bad ábe béewóo Edǎǎdǎŋ é Dyǒb áte, ne bad ábe bébele mbéb. Bébélé mbéndé áyāle bad ábe béewóo mbwǎg ní Dyǒb áte, ne ábe béhóbe Dyǒb mekan mé mbéb áyāl. Dyǒb ábélé mbéndé áyāle bad ábe béwúe' ábab besáá ne benyaá, ne bad ábe béwúe' bad bémpēe.

¹⁰ Bébélé mbéndé áyāle bad ábe békábe mesón, baachóm ábe bénaŋnad baachóm bémpēe, bad ábe békóbe bad boŋ bésóm bó née betāŋ, bad ábe békale metóm, bad ábe bémwǎg melě mé metóm á pǎndé e nkáásé ne bad ábe bébele' kéchéé éche éesě nchoo ne ngáne ayáge á bwām áhóbéé.

¹¹ Adé ayáge adé nchoo ne nkalaŋ ní bwām míme Dyǒb ábáge me ákale bad. Mmē nkalaŋ ní bwām níhuú ne Dyǒb dé ehúmé áde bad békeneé.

Nságnen áyāle ngǎle Dyǒb

¹² Nságnan Yesu Krístǎ, Sǎŋgwéé awêd, mó abage me ngine ábel nímmē nsón. Nságnan mó áyāle anyín áde anyíné aá mēbēl mó nyaa eche etǎŋéné, ápwēd-te me ábele mó.

¹³ Ambel nê, kénéé edíí bán ngen e'só nhóbé'áá mó mam mé mbéb áyāl, nítagté bad ábe bédúbpé mó, níbenlǎd-te e'yale bé mbéb áyāl eché. Boŋ Yesu Krístǎ anwóg me ngǎle áyāle menkēmpaá adúbe awón, menkēmbíí-'áá chóm éche níbeléé.

¹⁴ Sǎŋgwéé ambě me nímmē nsimé míme méesě ahǎgtēn, ábēl ndúbé Krístǎ, ábēl-'e aá nílúmed bad bémpēe edǎŋge áyāle dedé nhóg ne Yesu Krístǎ.

¹⁵ Yesu Krístǎ ampě a nkǎŋsé áson bebel bé mbéb. Mmēn-ne mbédé mod awě atómtǎnnáá mbéb ábel tómaa moosyǎál. Enén póle edé mbále detǎŋéné-'e chó akon dé adúbe.

¹⁶ Boŋ Dyǒb dénwǎg me ngǎle áyāle ahedé'áá aá Yesu Krístǎ alúmed aá nímmē nwesen méewóó'é asóg áyāl e me awě ntómtǎnnáá mbéb ábel tómaa moosyǎál. Nén dēmbenléd nēŋgáne elǎŋsén wéé bad ábe bédúbē, békūd-te alongé áde déemaá'.

¹⁷ Ehúmé ne edúbé bēbē ne Dyǒb á ngíndé ne á ngíndé. Mó adé kǎŋ echě edé á ngíndé ne á ngíndé. Mó-'aá adé ane awě bad béenyínnēē díd awě eewág-ke. Mwēmpēn-éé áde Dyǒb. Ebê nê.

¹⁸ A awem mwǎn Timoti, mekan míme nílǎŋgeé we meé ébel, médíi mekan míme Dyǒb dénlǎá'é bad aá béhób bán mébenléd áyāl echón. Abē e'yale é'wēd we áte. Abenled áde ébenladte ayáge á mbále é'bel we ébē nēŋgáne mod awě awane nzum bwām.

¹⁹ Enyín-ne nén wéé móchǎŋnēdē ne adúbe áde edúbpé Krístǎ, ébele-'e mekan bwām ngáne nlém nílǎŋgé we. Donje á bad béebeléé ngáne nímmē nlém nílǎŋgé bó. Nén ákǎá béchénné ádab adúbe béebíí'é wéé békagk.

²⁰ Atíntē e bad ábe níhóbéé nê, nhóg adé bán Himenose, aníníí-'e bán Alesandaa. Abén bad ntědté bó á mekáá míme Satane ábel boŋ bēbíi nén bán éeboó'é áhób Dyǒb mekan mé mbéb á yǎl.

2

Elébé tǎŋgene ábe Dyǒb edúbé

¹ Dyam dé'só, nwéde we aláa nén meé nyékǎnnad moosyǎál. Nyékǎnnad bad bémpēe. Nyékǎnne nén bán Dyǒb álóme nyé bwēm ábe nyétógnéné, nyéságnan-ne mó áyāle mboŋ míme ábenléé nyé ne bad bésyǎál.

² Nyékǎnnad kǎŋ é bad ne bad bésyǎál ábe bédé á nkamlēn. Nén débēl alongé áde syánē débē nsan ésebán mehób médé, débélé ngáne Dyǒb áhedeé, débage-'e mó edúbé á menzii mésyǎál.

³ Akǎnned bad ábóó. Nén áwógte Dyǒb áde ásóó syánē menyíŋge.

⁴ Dyöb áhede aá moosyáál ákud e'soóson bésōnten-ne mbále echě Eyale é Dyöb ékaléé.

⁵ Ebyééné nén bán Dyöb ahóg dēmpen dōo ádé. Mod nhóg mwēmpen-naá adé awě apεene Dyöb ne baányon á nchemten. Ane mod adii Yesu Krístə.

⁶ Ambě ádē alongé áwé á nló mí moosyáál. Ene kwééd echě awédé a nló mí moosyáál enlúmed á póndé echě etāngéné nén bán Dyöb áhede aá moosyáál ákud e'soóson.

⁷ Ayāle nén dōo ákээ bon Krístə álōmē me nēe mbapεe a nlomag áke dé akal nímē nkalan tāngene adúbe á Krísto ne mbále, wée bad ábe béesě bad bé Israel. Dyam áde ríhóbeé ádé mbále. Meékālēē metóm.

⁸ Né-óó hóm ké áhéé adé bad bé Krísto bēladnēé, nhede nén mēé baachóm ábe bēbágé échab yāl ábele Dyöb bényene mekáá ámín bēbage mekáne. Abě bad bēētāngeneé melingá ahé á nlém káa bēētāngeneé bad abé ábe bésenle'.

⁹ Nhede-'ε ámpē nén mēé bebaád bēhāg mesan nímé bad bényinnē nén bán métāngéné. Mmāb mesan métāngéné bó yāl akúten bwām ésebán métēde baachóm nlém á abum. Béenabpé esid é nló nyaa echě etómé áte, bēhāg bwēm é' gól, bēewāā' nsán níme bēbénlé bán bé meláá mé etógnén, bēhāg-ke mbóté éche étómténé nkun abé.

¹⁰ Bon pen nímāb mbeltéd mí bwām rílúmed nén bán bédii bebaád ábe bébenle Dyöb.

¹¹ Mmwaád atāngéné ádyēē piíb, ásūdēd yāl bon áwōglān ngáne baachóm bēyágtéé.

¹² Meehóbeé nén mēé mmwaád awóó kunze áyáged káa ákamlen baachóm. Mmwaád atāngéné ádyēē piíb.

¹³ Nhóbe nén áyāle Dyöb dēnsēbē Adamε ahag bon áhagé' Ifε.

¹⁴ Ebyééné-'ε nén bán mmwaád mōo Satanε āndogké bon abóó mbéndé, saké Adamε. Né-óó mmwaád mó ambóó mbéndé.

¹⁵ Bon Dyöb désōn alongé dé mmwaád á póndé e achád nzé adii asumé nlém wée Krístə alúmté-'ε edange ne bad bēmpēe, eewóo-'ε atón dé mbéb ké ahóg áyāl.

3

Paale atēnlé Timotie tāngene belyáged bé mwembé

¹ Nzé mod ahede aá móbē nlyáged a mwembé, né apwédé kase e nsón. Enén póle edé mbále.

² Bōob-pōó, mod awe alyágte mwembé, atāngéné abé mod awě bad bēhōbēē mekan mé mbéb á yāl, atāngéné-'ε dāsō mmwaád nhóg awon. * Abé mod awě akóbe yāl, abé mod awě adole dyam áte bwām, abé mod awě adēlté yāl áte, abé mod awě akobe beken, abé-'ε mod awě abíε bad ayáged.

³ Eebág mod awě abagé yāl á amwé á mīm, káa mod awě apεene epuutéd. Bon ábē mod awě apwiítédé, ábē-'ε mod awě eésenlé'. Eebág mod awě atómténé mōné adəj.

⁴ Atāngéné abé mod awě achāngé eche ndáb bwām, ábōngē-'ε ábe bán nyaa echě bēwógnēé mó bēbage-'ε mó edúbé á menzii mésyāāl.

⁵ Nhóbe nē áyāle nzé mod eéhele eche ndáb akamlen, chán-nō áhenlé mwembé rí Dyöb akamlen?

⁶ Eetāngeneé se abé mod awě adúbpé Krístə ekóólé ekóólé. Esebé nē, né ábē kúmbe, chó ēbēl ákwε, ákūd-te nkógsen melemlem ngáne Satanε ānkweé bon ákūd-te nkógsen.

* **3:2** Atāngéné-'ε dāsō mmwaád nhóg awon káa atāngéné dāsō mwaaád awon ngen póg ne ngen ésyāāl káa mod atāngéné dāsō mwaaád mwēmpen ananjed.

⁷ Abád ampē, ane mod atǎngéné abé mod awě kǎǎne bad ábe béesě á mwembé bébagéé edúbé. Nén débǎl éekudté akwágké éehûn-naá melám míme Satané áhínédé mó.

⁸ Bad ábe béwǎngan ábel nsón á mwembé, ébê melemlen néε bó. Bétǎngéné abé á bwâm awón, bébé-'ε bad ábe béhóbe dyam ne nlém nhóg. Béetǎngeneé bad ábe ábê bébágé yǎl á ámwé á mím, káa bad ábe bédé metǎg áyǎle mǎné.

⁹ Bétǎngéné béhíd mbále echě Dyǒb ábeleé boŋ bad bébíí tǎngene mewêmten míme áhedéé aá béwǎn ne abé áde áhedéé aá béwǎn. Bétǎngéné bébel nê ne nlém míme mǐbíi chǒm éche étǎngéné.

¹⁰ Belyáged bédêhób bán bépwe de bad ábe béwǎngan á mwembé-te, bétǎngéné bad ábe béhedéé apwed asebe dé asimēn. Nzé bényíné nén bán mod awě bésímné eewóó'ε awusé ké ahóg á yǎl nê ane mod akwǒgnédé ábel mímê nsón.

¹¹ Kǎǎne ábáb bebaád bétǎngéné abé á bwâm awón. Béēbāg bebaád ábe béhóbe bad ámbíd, bébê bebaád ábe békóbe yǎl, bébé-'ε bebaád ábe bad béhele-se bésūm nlém á yǎl ne kéchéé éche bébeleé.

¹² Mod awě awǎngan ábel nsón á mwembé atǎngéné dásō mmwaád nhóg awón. Atǎngéné abé mod awě abǎngē ábe bǎn ne bad bémpeé ábe bédé áwe ndáb bwâm.

¹³ Nhóbe nê áyǎle nzé bad ábe béwǎngan ábel nsón á mwembé bébele nsón bwâm, bad bébe bó edúbé. Nén débǎl béwón nlém áhób tǎngene adúbe áde béwóó ne Yesu Krístæ.

Dyam dé e'korǎd áde dēntīm abyên

¹⁴ A Timoti, kénéε édíí bán nwóó nlém ápe áwǎn mwǎmpin pǒndé, ndii ntenle wε enén kálag.

¹⁵ Ntenle wε mímén mekan míme étǎngéné ábel ábel nén ké meélyǎge ape, ehele ebíí nyaa e abé echě bad bé Dyǒb bétǎngéné awále. Bad bé Dyǒb bóó bédé mwembé ní Dyǒb, Dyǒb áde-'ε á alongé. Mímê mwembé móó rídé nêngáne akon ne nsáaned míme níchǎngé mbále Eyale é Dyǒb bwâm. Ahed dǎ-'aá ene mbále ébwǎgnédé. ¹⁶ Dyǒb ábélé syáá debíí nén bán mímê nkalan ndé etógnén bwámbwam. Ndé nén bán:

Krístæ ampě, abé-'ε moonyon,

Edǎdǎŋ éche Esáá énlūmēd sé nén bán adii Mwǎn a Dyǒb, ángel-le énnýin mó.

Bênkalé bad bé nkǒnsé bésyāāl, béndūbē-'ε mó.

Dyǒb dēmpuúid mó ákē-'ε ádyǒb ne ehúmé ésyāāl.

4

Paale alébé Timotié tǎngene bemeléede bé metóm

¹ Edǎdǎŋ éche Esáá énhób bwâm nén aá, mímén mesú donge á bad bétéde adúbe á mbále ádáb, bédūbpē bad ábe báyǎgte ayáge dé metóm. Adén ayáge dǎó e'dǎdǎŋ bé mbéb é'hedéé aá bédúbe.

² Abén bad bébele' byánán békale mbále boŋ metóm móó békaleé. Nzé báyǎgte chǒm éche étǎngene bélūmte nén bán béebíí'ε nhǎŋlén áfinté chǒm éche étǎngéné ne éche étǎngene.

³ Abén bemeléede bé metóm, báyǎgte bad bán béewǎnné, bán bad béēdyāge donge dé medyé. Dyǒb dēnhǎg mímê medyé ábel nén bad bedyág mó. Bad ábe bébíí nkalan ní bwâm, bédūbpé mó, béságnanne Dyǒb áyǎle mímê medyé.

⁴ Abé bemeléede béetǎngeneé, áyǎle kéchéé éche Dyǒb áhágé ébóó. Nzom ké póg eésáá ábán donge dé medyé. Né-ǎó, déságnen Dyǒb akud áde dékudéé abén bwēm.

⁵ Mod eékiē ndyééd, áyǎle Eyale é Dyǒb ne mekáne bébele chó éboŋ adyé.

*Paale aláγγé Timotie
ngáne átáγγéné mbaledε
a bwâm awe Krístaa abé*

⁶Nzé eyágte bad ábe bédúbpé Yesuε nímén mekan né wěbē mbaledε a bwâm awe Yesu Krístaa. Wéwēdnēd-te áte á edǎǎdǎη-tē áyāl e nkalanj níme édúbpé ne áyāle ayáge dé eyale é Dyōb áde éhídeé ámbíd.

⁷Weewóo dyam dé abelen ne póle éche élúmte bán bad béedúbpéé Dyōb, ne e'yókél é' póle. Bonj pen éyágke' pónde té ábel ngáne Dyōb áhedεé aá ébel.

⁸Edé etógnén mod áyáged yǎl e nkōjsé, áwéd chό áte. Bonj étómténé etógnén abé nzé mod awédé yǎl áte ábel ngáne Dyōb áhedεé áyāl e chōm ésyāāl. Débel ngáne Dyōb áhedεé áyāle, Dyōb áhóbé aá móǎbē syánē alongé áde déemaá', bǎǎb ne á pónde échē ehúé'.

⁹Adén dyam áde nǎhóbé nén áde mbále. Nyétáγγéné dó adúbe.

¹⁰Né-ǎǎ, nén dǎǎ ákǎǎ bonj dényǎde, déwanté-'ε yǎl áte áyāle delyágé nlem ne Dyōb áde áde á alongé. Mó abage baásyāāl e'soósonj, bwámbwam bad ábe bédúbpé mó.

¹¹Nyín nén wεé mólāγγē bad ábe bédúbpé nímén mekan, wεé móyāgtē-'ε bó mó.

¹²Weémwāg-se modmod anyín wε nkójtéd áyāle édíí kódemod. Bonj pen lúmed bad ábe bédúbpé abé a bwâm ábel bonj bómpē bébel melemlem. Nyaa échē éhóbεé dyam, abé áde éwóo, nyaa échē édǎǎ bad, nyaa éche édúbpé Dyōb ne abel áde wébeleéé mekan mé mbinde ábē née elánsén wée bad ábe bédúbpé.

¹³Enyín nén wεé mólāa' Eyale é Dyōb nzé bad béléádné á mwembé-te. Elāγγe bó chōm éche échē Eyale é Dyōb éhóbεé, éyágte-'ε bó kǎǎj né mpedé.

¹⁴Weéεdté nsón níme Dyōb ábágé wε née ndε, álāa bad mekan níme Dyōb dénhǎbpē aá élāa bó á pónde eche belyáged bé mwembé bémbānnē wε mekáá á nló.

¹⁵Belé nímén mekan ne nlem nhóg ábel bonj baásyāāl bényín nén bán ebele mó bwâm, ekeεne-'ε mó á'sō.

¹⁶Etōj yǎl achǎǎ bwâm ne kéchéé éche éyágtéé bad. Keεné' nē á'sō, ábel bonj Dyōb ásonj wε alongé, ásonj-'ε alongé á bad ábe éyágtéé.

5

*Paale aláγγé Timotie ngáne átáγγéné
donge á bad achǎǎ á mwembé-te*

¹Weekánné mod a mbáá áte. Chǎǎ mó melemlem ngáne ehεle-se échǎǎ sóo mwēn. Chǎǎ bad ábe béepede wε kǎd née baányonj bé baachóm.

²Chǎǎ bebaád bémbáá nējgáne éhεléε-se échǎǎ nyoó mwēn. Echǎǎ-'ε ngǎndéε née baányonj bé bebaád. Weewóγγné bó mekan mé mesón á mewēmtēn.

³Bekúd ábe béewóo bad ábe bēnǎne bó éwōγγan bó.

⁴Bonj nzé nkúd achyáá bán káa bán ábe ábē bán, bétáγγéné mó atγγen. Nén áde dyam dé'só áde bad ábe béεle ngáne Dyōb áhedεé bétáγγéné abel. Abāb benyáá ne besáá bēntγγén bó, bómpē bétáγγéné bó atγγen. Nén áwógte Dyōb menyíγγe.

⁵Nkúd awē adé mwēmpēn bonj eewóo mod awē awōγγan mó, wée Dyōb dēmpēn dǎǎ ályágeé nlem. Abé ákǎnne', áhedne-'ε mó nwōγγen nkuu ne mǎte.

⁶Bonj nkúd awē asólté yǎl á mekan mé nkōjsé, awédé á edǎǎdǎη, kénéε ádíí á alongé.

⁷Láá bad bé mwembé nímén mekan ábel bonj mod eehóbé bó mekan mé mbéb á yǎl.

⁸ Nzé mod a Krīsto eétɔgné bad bé túmbé ábē, bwâmbwam áde abum a ndáb, né alúmte nén aá móɔdúbpéé Krīstæ. Ene ndín e mod míme mbeltéd nílúmte nén bán adii mod awě abelé mbéb tómaa mod awě eedúbpe Krīstæ.

⁹ Nkúd awě éhɛle-se etón wɛé atánǵéné nwōngɛn akud, adii nkúd awě atómé móom mé mwě ntóób. Atánǵéné abé-'ɛ nkúd awě a nwón nchóm nhóg mwěmpɛn.

¹⁰ Ane nkúd atánǵéné abé mmwaád awě bad bényíne bán míme mbeltéd níbóó. Atánǵéné abé mmwaád awě apɛéné bán ámín bwâm, abé mmwaád awě akobe beken awe ndáb bwâm, abé mmwaád awě asudte yál, ábenlé bad bé Dyõb nyaa eché áwóbpé'áá bó mekuu. Atánǵéné mmwaád abé awě awónǵéné bad ábe bémbé á ndutul-té, abé-'ɛ eche yál ábel mekan mé bwâm.

¹¹ Bon weetóó bekúd ábe bédé etum nēngáne bekúd ábe békud nwōngɛn. Weetóó bó áyāle nzé béwóó esí áwón bechóm ámpē bébeléé Krīstæ ngáne éhɛdnadté.

¹² Nzé béwóó-'ɛ bechóm bémpē né békwoǵnéde ákud nkógsɛn, áyāle béelóntéé akag áde bénhēē nén bán bébelé Krīstæ.

¹³ Saá-kaá nê dēmpɛn, béwóó abé áde bébeléé chóm, béhyóme ndáb ne ndáb. Ámín enê béhóbe bad ámbíd, béhāg nsəl áyāl e mekan mé bad, béhóbe-'ɛ mekan míme bēnkētánǵénné ahób.

¹⁴ Né-ɔó, ndəá mɛé e'tum bé bekúd béwōng bechóm, béchyáa bán, bébōngɛ-'ɛ échāb ndáb. Nén débēl bébeléé mekan míme bad ábe békóó syánē béhōbēē syánē mekan mé mbéb á yál.

¹⁵ Nhóbe nén áyāle áben bekúd donǵe bébóótédé mekan abel míme Satane áhɛdɛé áá bébel.

¹⁶ Mmwaád ké ahéé awě adúbpe Krīstæ awě awóó bekúd áwē abum á ndáb, atánǵéné bó atóǵɛn, saké nén bán ápēmted mwembé míme nted. Nén débē mwembé etál ábóó bekúd ábe béewóó bad ábe bébōngɛ bó.

¹⁷ Mwembé mbe bad bémbáá ábe belyáǵte bó bwâm edúbé ne nsábe, bwâmbwam ábē belyáǵed ábe bébele nsón mé akal ne áyáǵed Eyale é Dyõb.

¹⁸ Edé nê áyāle éténlédé á kálag e Dyõb nén bán, “Weetádé nyag nsəl eche esálte ngun.” Eténlédé ámpē nén bán, “Bebel bé nsón bétánǵéné mímaab nsábe akúd.”

¹⁹ Weedúbpe mekan míme bad béhóbeé belyáǵed bé mwembé áyāl, éetóméé né mbón ébe káa éláán étyéémé nén bán nê áde mbále.

²⁰ Nzé mod ámbáá a mwembé abelé mbéb, káné mó áte á'sō é' mwembé ábel bon bad bémbáá bémpēé bébāng mbéb abel.

²¹ Nlāngɛ wɛ á'sō é Dyõb ne Yesu Krīstæ ne á'sō é ángɛl éche épwédnéde mɛé ébel chóm eche étánǵéné abel, ésebán ekwognad modmod. Weétimē-'ɛ modmod ámbíd.

²² Weewámsán mod mekáá abán á yál áwóǵed mó mod a mbáá a mwembé. Nzé ebelé nê bon ane mod atímé mbéb abel, ne wémpē ebelé mbéb. Mmōng weébēlē mekan mé mbinde.

²³ Weemwág mendíb mwěmpɛn ámpē. Mwág mwă mím ábel nén abum áde ákwaglan wɛ áte pónde ésyāēl ámaa.

²⁴ Donǵe á bad bébele mbéb á nhéné míme moosyáál ábíí, békāād-te bó. Ábíníí-'ɛ bébele mbéb á mesəəm-té míme bad béēbíí' é káǵn né béhédé áte.

²⁵ Melemlem nê dóo donǵe á bad bébeléé mbon míme míbyééné ne moosyáál. Bémpē-'ɛ bébele mbon a mesəəm-té míme bad béēbíí' é káǵn né béhédé áte.

6

¹ Bad ábe bédé betāng bésyāēl bétánǵéné bébage bad ábe bédíí ásē echāb edúbé ábel bon modmod eehóbé Dyõb mekan mé mbéb áyāl, eehóbé-'ɛ ayáǵe ádēd mam mé mbéb áyāl.

² Betân ábe bédé ásē e bad ábe bédúbpé Krístəə béewēmtān bán ngáne ábab besáá bédíi bad ábe bédúbpé, béetāngeneé bó edúbé abε. Bétāngéné bó abele tómaa ngáne béhélé'áá-sε bébēlē bad ábe béedúbpe Krístəə. Bétāngéné abel nê áyāle ábab besáá ábe bébenléé bédii bad ábe bédúbpé Krístəə bébé-'ε bad ábe ábāb bembəledε bédáá-'ε.

Paale ahábe tāngene ayáge dé metóm ne nhon míme ntāngéné

Eyágte bad nímén mekan éwəd-tε bó nlém á abum áhíd mó.

³ Donje á bad bédé ábe béyágte' ayáge áde déetāngene. Adab ayáge déesaá melemem ne ayáge áde awəd Sāngú Yesu Krístəə áde ayágte bad ábel ngáne Dyöb áhedéé.

⁴ Abē bad bélóné ne kúmbe, béebíi-'aá dyamdiam. Nyaa echē ábē bad bédáá mpentēn mé e'yale ne nselag edii bó nēε nkole. Nén áπεene kónjí átíntē echāb, áπεené mehób átíntē echāb, bad béhōbē-'ε baáb mehób mé mbéb áyāl, béwōñnē nhóg ne aníní mewēmtēn mé mbéb.

⁵ Nén ábele-'ε bépentan pón dé té nyaa echē béehelée-sε bébíi chōm éche étāngéné. Béehelée-sε básōñtēn chōm éche édé mbále ne éche éesē mbále. Béwēmtan bán nzé bébenle Dyöb, né bébē nhon.

⁶ Boñ mod ábē menyinge bwāmbwam nzé abele' ngáne Dyöb áhedéé nzé atéde-'ε aá kéchéé éche mōwóó ékwógnédé mó.

⁷ Depedé á nkōñsé, deéπεeneé chōmchōm, nzé dewédé-'ε, déeswéénné chōmchōm.

⁸ Né-ᶑᶑ, nzé dewóó ndyééd eche dédyāgkē ne chōm éche déhāgkē á yāl, né nê ákwógnédé syānē.

⁹ Boñ bad ábe béhede nhon asud, bébelé béhún á mekágsen-tē, bébé ngáne bad ábe békúwédé melám. Bébelé béhedé mekan abel híin míme mééboo ne mekan híin míme mééboñne bó. Nén ábele bétage bwāmbwam.

¹⁰ Mod ké ahée awē awóó nlém áte bwāmbwam ábud mōné awóñ, abelé ábelé' e'bébtéd é' mekan ákud nímé mōné. Nê ábélé donje á bad bétédte ádúbe Krístəə, békúdé-'ε ndutul híin á nlém té.

Paale abagé Timotiε elébé

¹¹ Boñ wε, á-Timoti, mod a Dyöb, bán ábē e'bébtéd é' mekan. Nané mekan ámbíd míme métāngéné á'sō é' Dyöb, édəñ bad, éwεsan pón dé ésyāāl, épwiited-tε.

¹² Wéd yāl áte ébē ésum nlém wéε Dyöb ébenle-'ε mó. Alongé áde déemaá' áde Dyöb ábágé wε, wéd dō achāñned. Dyöb dēmbē wε áde alongé áde wénhōbpē á'sō é' bad híin wéé módúbpē Krístəə.

¹³ Á'sō é' Dyöb, mó awē abage bwēm ésyāāl alongé, ne á'sō ábe Yesu Krístəə, mó awē ankal mbále á'sō wéε Pontus Payledε, nlāñge wε nén mēé,

¹⁴ ébele chōm ésyāāl ngáne Dyöb áhóbé aá ébel, káāñne pón dé eche awəd Sāngwéé, Yesu Krístəə áπεé.

¹⁵ Apē á epun éche Dyöb Titée átíídé aá áπε, Dyöb ane awē ábē bad bébageé mekenag. Mwēmpen-naá adé Nkamlεε a mbáá a nkōñsé n̄syāāl. Mó adé Kāñ e kāñ ésyāāl abé-'ε Sāngwéé a besāñgweé bésyāāl.

¹⁶ Mwēmpen-εé awóó ngine ábē á alongé á ngíndé ne á ngíndé, adé-'ε á e'nyínεn bé ekíde ábe é'πεne bwāmbwam nyaa echē modmod éehelée-sε áπε benben. Mó adé ane awē modmod éēnyínēē mbéd, modmod ééhēlēε-'ε-sε anyín mó. Edúbé ébē ne mó, ábē-'ε á nkamlεn á ngíndé ne á ngíndé. Ebē nê.

¹⁷ Síim bad ábe bédé nhon etúu áte nén wéé béekumé ekáá á tâl, béesumé-'ε nlém áyāl e nímāb nhon, bwēm ábe é'maa', boñ bésum nímāb nlém wéε

Dyöb. Mó adé ane awě abage syánē chǝm é'syāāl éche détógnéné âbel bon débê menyinge.

¹⁸Láá bó wεé bébele mbon âwóngen bad, ngáne bad ábe bébúdé mǝné awón bébágkē nhǝn, mekan mé bwâm níme bébeleé nǝbê nímāb nhǝn, béwōh-'ε nlem âwóngen bad ne kéchéé éche Dyöb ábágé bó.

¹⁹Nzé bad bébele nén ébē nēngáne békóngé nímāb nhǝn ádyōb. Nén débē nēngáne nsáaned níme nísúmnédé bwâm âbel bon nísōgtēn mekan níme méhúε' á'sō âbel békud alongé dēn áde ákóhté alongé abé.

²⁰A-Timoti, nsón níme Dyöb ábágé wε tónh mó acháǝ. Weewóó pǝndé ne mehób níme bad béhóbεé níme méēwōngān ábe Dyöb edúbé, ne mehób níme donge á bad béhóbεé bán chǝm ehóg édé mbále, bad bémpēe-'ε béhōbē bán chǝm émpēe chǝǝ édé mbále. Bon bó moosyāál bébele awusé nzé béhóbe bán, “Mε-εé ndé mod awe abíí.”

²¹Donge á bad ábe béwēmtan bán bébíí mam níme médé, bon bēn béekoó'ε adúbe áde Dyöb á mbále ahíd.

Nsimé ní Dyöb nǝbê ne nyé moosyāál.

Kálag eche elónténé ébe echě Paale áténlé Timotiε N̄dibned n̄ kálag

Kálag eche Paale áténlé Timotiε eche elónténé ébe ehóbe bwámbwam t̄ngene elébé eche ábageé Timotiε née mod awě búmā bébele nsón n̄ Dyōb ne awě awōngan m̄. Dyam áde Paale ákóó ahób awēd-te ádíi nwesen. Alébe Timotiε awéde-’ε m̄ nlém á abum aá ábê ábenle’ Yesu Kr̄st̄a ne nlém nhóg. Paale akoo Timotiε etúu asím áte aá átēd p̄ondé ne mpenten mé eyókél n̄ime méewōngān bad boŋ n̄itimé n̄puutád bad. Amin e n̄imén mésyāāl Paale akamtan Timotiε áyāl e ádē alongé, m̄ Paale nyaa eche adúbpé Kr̄st̄a, awesen áde áwesanné, edaŋge eche álúmté wée bad ne metake n̄ime ákudéé akal áde ákalé Eyale é Dyōb.

Nkabtéd n̄ kálag

N̄dibned n̄ kálag 1.1-2

Mekenag ne elébé 1.3-2.13

Elébé ne asím dé etúu áte 2.14-4.5

Paale ahóbé t̄ngene eche nyaa 4.6-18

Nsógten 4.19-22

Paale alómmé Timotiε melenten

¹ M̄ Paale, mbapee a n̄lomag awě Yesu Kr̄st̄a me-éé ntelé enén kálag. Dyōb áhede aá n̄kal nkalan t̄ngene alongé áde ahóbé aá dekudé abé áde dédíi nhóg ne Yesu Kr̄st̄a.

² A-Timoti, we-éé n̄itenlé enén kálag. Edii awem mwān a nlém. Nsimé, e’boŋ bé nlém ne nsan n̄ime n̄húú ne Dyōb Titée ne Yesu Kr̄st̄a awesyánē S̄aŋgwéé, n̄bê ne nyé.

Paale aságnéné Dyōb, awéde-’ε Timotiε nlém á abum

³ Nságnan Dyōb áde n̄benléé ne nlém nhóg melemlem ngáne ábēm betaa bébénlé’áá m̄. Nságnan m̄ p̄ondé té áyāl echōn nzé nkāne’, nkuu ne m̄ite.

⁴ Nzé nkāmténé ngáne w̄ensudénné boŋ échii, mbelé n̄dāŋ we anyín bwámbwam, ábel boŋ n̄lōn ne menyinje.

⁵ Nkamtan n̄én m̄é ekoó Yesu Kr̄st̄a adúbe, n̄imé melemlem mé adúbe m̄ó nyoó ambáá, Loise, ne nyoó, Yunise, b̄ompē b̄enwōngē. B̄ab-p̄ó, mbíi m̄é ádē adúbe d̄ó w̄émpē éwóó.

⁶ Enén nz̄m ch̄o ekáá boŋ n̄kamtán we n̄én m̄é nde echě Dyōb d̄embéé we áde mémbānnē we mekáá á n̄l̄o, ébê ébenlad ch̄o.

⁷ Dyōb débeleéé aá syánē déwōn mbwóg áte ábele m̄. Boŋ pen échē Edáádāŋ ébage syánē ngine ábele m̄, ébele delúmtē bad edaŋge, ébele-’ε dechāŋge échesyánē yāl.

⁸ Né-óó, weewógé e’sōn áláa bad t̄ngene awesyánē S̄aŋgwéé, Yesu Kr̄st̄a. Weewógé-’ε e’sōn áyāl echēm kénéé n̄díi mod a mbwóg áyāl echě Kr̄st̄a. Boŋ pen ne ngine echě Dyōb ábágé we, kwentén ákud metake ne me akal áde dékaléé nkalan n̄i bwām.

⁹ Dyōb d̄ó asóó syánē, achélé-’ε syánē ábē ábē bad. Abelé n̄én saké áyāle dyam áde débélé boŋ áyāle n̄imé n̄t̄ii m̄n n̄ime ámbenlé nkōŋsé n̄dēhób bán n̄bootad. Abage syánē n̄imé nsimé alóm áde alómé Yesu Kr̄st̄a á nkōŋsé áyāl e syánē.

¹⁰ Bɔɔb-pe, Dyɔb álúmté syánē nsimé apɛ adé Yesu Krístəə, Nsoode awêd ápédé. Abódté ngíne e kwééd, abɛnlédé-’ε nkalanj ní bwám álúmed syánē alonjé áde déemaá’.

¹¹ Dyɔb ápwédé me nêngáne mbapɛɛ a nlomag ne meléede ákal nímê nkalanj ní bwám.

¹² Enén nzom chó-’aá ekáá bonj níkudé nímén metake. Bonj meewógéé akwágké ké ahóg áyāle mbíí ane awè nísúmé nlém áyāl. Mbíí-’ε nén meé ákǎá chòm éche ábágé áwēm mekáá kǎáne á epun é nkáásé.

¹³ Ayáge áde átǎngéné áde ní’yágté wɛ, ékonj dǎ acháa. Abê nêngáne elánsén éche étǎngéné ahíd. Edúbe Yesu Krístəə, édǎj-’ε bad bémpɛe abé áde édíí mod nhóg ne Yesu Krístəə.

¹⁴ Edǎdǎj éche Esáá édé syánē áte, chǎó éwōngan wɛ ábel bonj nkalanj ní bwám nímé Dyɔb ábágé áwōnj mekáá écháa mó bwám.

¹⁵ Ebíí wɛé bad bé Krísto bésyāal bémbānj me á yǎl áde mbédé á mbwóg e Esia. Faygeduse bó Hemogenes bómpɛ bémbē átíntê e bad ábe bémbānj me á yǎl.

¹⁶ Nkǎanne’ nén meé Dyɔb álúmed ndáb echê Onesiforuse ábē e’bonj bé nlém áyāle awédé’áá me nlém á abum pǎndé té. Enkênkwágénné me aá ndé á mbwóg.

¹⁷ Ade ápédé á Roma pɛén, ambootéd me ahed kǎá anyín-ne me.

¹⁸ Nkǎanne meé Dyɔb álúmed mó ábē e’bonj bé nlém á Epun é nkáásé. Mmōnj ebíí-’ε bwám nwōngan nímé ábágé’áá me á dyad dé Efesus.

2

Paale aá Timotie atǎngéné abé sǎnze e bwám eche Yesu Krístəə

¹ Bɔɔb-pǎó á awem mwǎn Timoti, nsimé nímé Yesu Krístəə ábágé wɛ, mbê níwede wɛ áte.

² Mekan nímé wénwōgkê néé ní’yágtéé ekud é bad tǎngene Krístəə, wémpɛ yágéd bad mó ábe bédé bad ábe bómpɛ béhele béyágéd bad bémpɛe. Bébê bad ábe béyāgēd-te bó.

³ Wémpɛ ékwɛntɛn ákud metake, ébê ngáne sǎnze eche Yesu Krístəə.

⁴ Sǎnze echê edé á nsón, ebélé éhedé aá mówóged awè mod ambáá menyíngɛ, né-ǎó eesóléé mekan áte nímé bad ábe béesǎ sǎnze bébeléé.

⁵ Nyaa empɛe eche éhele ébēlê Krístəə edé nêngáne mod awè anyǎgte mehélé ne bad bémpɛe. Eēhēlē-’ε ákud nsábe éetóméé né ahídé mbéndé éche bétíídé anyǎged mehélé.

⁶ Mbélé-nzag awè abélé ntǔ móó atǎngéné mod a e’só abé ákud mbote.

⁷ Dǎl mekan áte nímé níhóbé áyāle Sǎngwéé ábēl esóntɛn mó mésyāal.

⁸ Kamtén nén wɛé Yesu Krístəə ambíd á mbyaa nímé Dabide, Dyɔb dɛmpuúd-te mó áde awédé. Mmén nkalanj ní bwám móó níkanléé bad.

⁹ Akal áde níkaléé nímén nkalanj ní bwám dǎó ákǎá bonj níkudé metake kǎánehāg-ke me á mehanj nêngáne mod awe abóó mbéndé. Bonj modmod éēhēlē-’ε ahé Eyale é Dyɔb bengǎbengǎbē.

¹⁰ Né-ǎó, nwēséné metake nímé níkudé ábel bad ábe Dyɔb ápwédé, bómpɛ békud e’sósonj ábe Yesu Krístəə ábēé bó, bēbē-’ε ásē e ehúmé éche ébé á ngíndé ne á ngíndé.

¹¹ Enén pǎle edé mbále, edé nén bán,
“Nzé syánē dewédé ne Krístəə,
né syánē dɛébē-’ε á alonjé, ne mó.

¹² Nzé dedé dewesan mekan ne mó,
dɛékamlén ne mó,

nzé debáá mó á yǎl
né mó-’ε ābāη syánē áyāl.

¹³ Nzé déēbēlē’ ngáne Krīstəə áhεdεé aá débēl,
mópen ābē ábel chōm ésyāēl éche áhóbé aá móōbēl,
áyāle eéhēlēε-se abāη eche yǎl á yǎl.”

Paale ad Timotiε abē mbelé-nsón a bwām

¹⁴ Ebē ébele bad ábe bédúbpé békamtan nímén mekan. Esím bó etúu áte á’sō é’ Dyōb wεé béepentán nhóg ne aníníi tǎηgene e’yale. Ene ndín e ntántén eewōηgánné boη pen ebéhte adúbe áde bad ábe bεwóglan.

¹⁵ Wéd yǎl áte ábel Dyōb ányín nén aá edé mod a nsón awē eékwágé ábel nsón míme ábeléé, ébē-’ε mod awē ayógte nkalanη mí mbále nyaa echē etǎηgéné.

¹⁶ Weewóo dyam ábel ne e’kúkú é’ mehób, ne mehób míme méesē etógnén áyāle nzé bad béhóbe échē ndín é mehób, nē débēl bénabpé mekan ábel míme Dyōb déehεdεé aá débēl.

¹⁷ Donje á bad ábe béhóbe échén ndín é mehób bédii Himenosε bó Filetus. Mmab mehób médii nēηgáne sii eche edyāg mod áte ésebán emaa’.

¹⁸ Bétédte adúbe áde átǎηgéné, bétimé bεyógte bán syánē ábe dedúbpé, Dyōb áamáá syánē apuud. Enén ndín e ayóge ebéhte donje á bad adúbe.

¹⁹ Boη kénē, mekan míme Dyōb áamáá anabe, méehāηlǎnné. Awedé mín-naá e’yale éténlédé nén bán, “Sāηgwéé abíi bad ábe bédé ábē bad,” éténlédé-’ε nén bán, “Bad bεsyāēl ábe béhóbe bán bédé ne Sāηgwéé, bétǎηgéné bésóg mbéb ábel.”

²⁰ A ndáb e mod ambáá, donje á mīse áde áde bébénlé gól, donje sílva, donje-’ε áde áde bépódé ne áde bébénlé hyæg. Bébēnlad donje nzé dyam dé edúbé áde, donje-’ε bébēnlád póndé kéhéé.

²¹ Nzé mod ké ahéé asógé mekan mé mbinde ábel, ābē nēηgáne mīse míme bébēnladté nzé dyam dé edúbé áde. Ane mod ábelé asāη, eche Sāη-’ε abēnlad mó. Ane mod abāg mboηsén ábel dyam á bwām ké áhéé.

²² A-Timoti, weébēlē mekan mé mbéb míme kódebad ébeléé. Boη pen éwane áte ébele mekan míme métǎηgéné, ébē édúbe Krīstəə, édāη bad bémpee, ébē-’ε nsāη ne bad. Ehíde nímén mekan nchoo ne bad bémpee ábe békāne Dyōb ne nlém nhóg.

²³ Weewóo dyam ábel ne e’yókél bé mpentēn mmé méewóo-’ε nwōηgen ké nhóg áyāl e mod. Ebíi wεé mpentēn mīpεene nsεlag.

²⁴ Syánē ábe dedé-’ε bembæleε bé Dyōb deésēnlé. Boη pen, detǎηgéné débōη nlém ne mod ké ahéé, detǎηgéné déyāgtē bad bwām déwesán-ne bad.

²⁵ Déyógte bad ábe bεtyéeman syánē ábel boη bēbii bán mam míme béhóbéé syánē á yǎl méesaá mbále. Déchedēn bó yǎl nzé debele nē. Délyǎg nlém nén bán Dyōb débēl béchēm ádāb awusé bēhāηlén, bésóηtén-ne mbále eche eyale é Dyōb ékaléé.

²⁶ Nén débēl debyéé dépē bó á nló-te, bēbíd-te Devæle á melám tē. Devæle ammad bó akób ádogé-’ε bó ábel mekan míme áhéde’áá aá débēl.

3

*Paale ahóbé tǎηgene ebébtéd
éche ébē á e’pun bé asóg*

¹ A-Timoti, nhede méé ébii nén wεé á e’pun bé asóg, mekan mébē ebébtéd.

² Ene póndé bad bēbē ábe bédáá chōm, ábe bédáá mōné, ábe bédé kúmbe, ábe bédé epamε, ábe bēbēbé nsal áte, ábe bεewógné ábab besáá ne benyaá, ábe bēebagé meságnēn áyāl e chōmchōm, ábe bēebelé ngáne Dyōb áhεdεé.

³ Bad bébē-’ε ábe béelūmtē bad bémpēe edəŋge, ábe béewóo nlém rí ngol, ábe békale bad metóm áyāl, ábe béehelé yāl akób, ábe bédé ekan, ábe béedəə bwām.

⁴ Bébé ábe békag bad ntúrē, ábe béwóo ehóhó é abé, ábe béwēmtan bán bétómténé abé, bébé ábe bédáá menyĩnge mé nkōŋsé, béedáá’ Dyōb.

⁵ Bad bébē ábe bélūmte byánán bébele ngáne Dyōb áhedéé bonj béemwaa bán ngine e Dyōb éhəŋlen ádāb alongé. Weékāg échén ndín é bad benben.

⁶ Abén bad donge áde áde ádoge bad, bésól áwab mendáb bédoge bebaád ábe béewóo debyéé ábe bédyεε áwēd-te. Abē bebaád bébélé mbéb bwāmbwam nyaa eche mímē mbéb rídénlédé bó nēe nted. Mewēmten mé mbéb mós ne mós ríkamlan bó.

⁷ Béwóglan meyáge nyaa ne nyaa bonj béeheléé ayáge á Dyōb á mbále abíi.

⁸ Ngáne Janεε bó Jambres béntəŋgēnnē Mosεε bóód, melemlem nē dós abé bemeléede bé metóm bétəŋganné ayáge á mbále. Mewēmten mé mbéb mós béwóo. Dyōb ábáá bó á yāl áyāle béetəgnéé adúbe awonj.

⁹ Bonj bédōg bad dásō á esōŋ é pónde áyāle bad bēchēm échab edimdim, melemlem ngáne êmbenlédte ne Janεε bó Jambres.

Paale adii alébe’ Timoti

¹⁰ Bonj we a-Timoti, ehidé ayáge áde rí’yágté bad bwām, ehidé abé áde ríwóo, ehíde-’ε chōm éche ríhedéé abel áwēm alongé. Ebíi weé ndúbpé Dyōb, ebíi awεsen áde ríwesanné, edəŋge éche rílūmteé bad. Ebíi ngáne ríkáá nlém áyāl e nsón míme mbéleé.

¹¹ Ebíi ngáne bad bétagteé me, ebíi-’ε metake míme ríkudéé áyāl enê. Ebíi ndín é mekan éche ébénlédé me á myad mé Antyog, Ekoniom ne á Listra. Ebíi ngáne mēnkangé nlém áyāl e metake míme mēnkudté áwed. Bonj Sāŋgú Yesue ansōŋ ádēm alongé ásē e mímē metake mésyāāl.

¹² Ne mbále mod ké ahéé awē abele mekan ngáne Dyōb áhedéé abé áde ádíi ne Yesu Krīstəə, atəŋgéné ákud metake á mekáá mé bad.

¹³ Bonj e’bébtéd é’ bad ne bad ábe bédoge’ échab yāl, bēnabpé mekan abel míme métómténé ebébtéd abé, bédogé bad, bad bémpēe-’ε bédogé bó.

¹⁴ We pen a-Timoti, ébê ébele mekan míme éyágté míme ébíi-’ε nén weé médé mbále, áyāle ebíi bad ábe báyágté we mós.

¹⁵ Ebíi-’ε weé se ámwēndemé móbīi chōm éche eyale é Dyōb édíi. Echén eyale é Dyōb chós ébágé we debyéé ásoŋten nén weé Dyōb ásóo we áyāle édúbpé Yesu Krīstəə.

¹⁶ Chōm ésyāāl éche bétélé á kálag e Dyōb ehúú ne Dyōb. Ewōŋgan áyáged bad, éwōŋgān áláa bad mímab mewusé, éwōŋgān bad átií mewusé míme bébélé, élāŋgē-’ε bad ábel mekan míme métəŋgéné.

¹⁷ Eyale é Dyōb éwōŋgan ábel bonj mod awē abenle Dyōb abé mbonjén ákwōgned-te ábel nsón mí bwām rísyāāl.

4

¹ A-Timoti, á’sō é’ Dyōb ne Yesu Krīstəə, mós awē ákáād bad ábe béwédé ne ábe bédé á alongé, á dīn áde mós awē əpř ámbíd abé-’ε nkamlene a moosyāāl, nkoo we mímén mekan áláa meé:

² Ekale’ nkalanj m bwām ké áde bad bédáá mós awóg ké’ε áde béedəə’é. Ebel bébii bán chōm éche éhóbéé édé mbále, ébel bésōg mewusé abel, éwéde-’ε bó nlém á abum, éyágtē-’ε bad mímén mekan ne nwεsen rísyāāl.

³ Pónde əpř echē bad béehédte bán béwōg ayáge áde átəŋgéné, bonj pen bébélé’ mekan míme mímab nlém rílāŋgé bó aá bébel. Bemeléede-’ε ábe bédáá bán bélāŋge bó mekan míme bédáá awóglen bēn ne bēn-naá béwōglānnē.

⁴ Bad bébāŋ mbále e Dyōb awóglen, bébāg metúu áwóg póle é metóm.

⁵ Βοη γε α-Timoti, échəə echon yäl bwâm pónδέ ésyāäl. Ewesen metake, ébele nsón mí mod awě akanle bad eyale é Dyöb ébele-'ε nsón rísyāäl míme Dyöb ábágé γε αά ébel.

⁶ Με πεn, pónδέ emaa mé ape echě bébéé με ngáne ndε, pónδέ emaa με abé benben áteđe ádén alongé.

⁷ Néε mod a nsón awě Krístəə, nwané nzum e bwâm, mmadé nsón míme Krístəə ámbéé με αά míbele mó. Nhídé-'ε adúbe nyaa echě etánǵéné.

⁸ Βοοb-πε, nsábe rísine με, míme rílúmte nén bán mbele nsón míme rítánǵéné ngáne Dyöb áhedéé. Mmê nsábe móo Sánǵwéé, mó awě akáadte bad nyaa echě etánǵéné ábéé με á epun é nkáásé. Saá-kaá mməmpen ábéé mó boη ábě káəηne bad bésyāäl ábe bésine' échē epe.

Paale alébe Timotiε

⁹ A-Timoti, éwan áte éwámsen ape áwēm.

¹⁰ Nhóbe nén áyāle Demase abáá με áyāl akií á dyad á Tesalonika áyāle adóó mekan mé nköηsé. Kresense akií á mbwóg e Galesia, Tituse mó-'ε ákē á dyad á Dalmatia.

¹¹ Lukase mwəmpen mó adé ne με. Nzé epag, épēēn Makose áyāle áwōηǵēn με áyāl e nsón míme ríwóó.

¹² Nlómé Tikikuse á Efesus.

¹³ Nzé epag, épiinéd με echem kóte. Mentédé chó á dyad a Troas á ndáb wée Kaapuse. Epiinéd-te με nhíbe rí kálag, bwámbwam rí ngob é nyam.

¹⁴ Alesandaa awe alúε e'kii abelé με ebébtéd bwámbwam. Sánǵú Yesue ákōǵsēn mó áyāle mbéb míme ábélé.

¹⁵ Wémpē étédēn mó pónδέ áyāle antyéémén sé bwámbwam áyāle nkalan míme sékaléé.

¹⁶ Ngen e'só eche rítyéémé a nkáásé modmod enkēnkwoǵnédté με. Moosyāäl ambán με á yäl. Nkánne nén meé Dyöb álagsen bó.

¹⁷ Kénē Sánǵwéé ambé ne με, ábē-'ε με ngíne. Nén dēmbēl menhēl nkalan rí bwâm akal nyaa echě bad ábe béesē bad bé Israel bēnwōǵkē mó. Sánǵwéé anhúd-te με á nsəl rí ngii.

¹⁸ Sánǵwéé ášöη με alongé áyāl e ebébtéd ké éhéé éche étán με ákéén-ne με áwē nkamlēn mí mín ne nsan. Edúbé ébē ne mó á ngíndé ne á ngíndé.

Melēnten mé asóg

¹⁹ Lentéd με Priskaa bó Akwilaa, élēnted-te με abum á ndáb áde Onesiforuse.

²⁰ Erastuse anlyǵg á dyad á Kōrinto, rítēdē-'ε Trofimuse á dyad á Miletus, áyāle akönlé'áá.

²¹ Ewan áte ényín nén wée mópedé áwēm, ahéb á ngíne ádēhób bán ápag. Yubuluse, Pudense, Laynuse, Klodia ne bānned bé Krísto ábíníi bésyāäl bélénté γε.

²² Sánǵwéé ábē ne γε. Nsimé rí Dyöb ríbē ne γε.

Kálag eche Paale áténlé Tituse Ndibned n kálag

Tituse eebédeé mod a Israel bon antim mod a Krīsto, áwōngān Paale, búmō bébelé nsón ní Dyōb. Paale antelé Tituse enén kálag alyág áde ánlyāgkē mó á mbwóg é Kret ānān nsón mí mwembé. Enén kálag ekoo' metote meláán anān á dīd.

Dyam dé'só, Paale akamtan Tituse nyaa e abé echē belyáged bé mwembé bétāngéné awōn, tanje ngāne bad bé Kret bēnwōngē abe dé mbéb. Paale alébe-ε Tituse ngāne átāngéné bad nyaa ne nyaa aléb á mwembé-te. Abēn bad bédii bechun bé bad, kódebad ne ngōndére, ne betān. Asóged, Paale alébe Tituse ngāne abé á mod a Krīsto átāngéné abé bwāmbwam ábé nsañ ne nhóg ne aníní, ábel ekoyí éebāg, mpentēn méebāg, nkabēn-ne méebāg á mwembé-te.

Nkabted n kálag

Ndibned n kálag 1.1-4

Belyáged bé mwembé 1.5-16

Nsón míme bad téé bétāngéné abel á mwembé te 2.1-15

Elébé ne asím dé etúu áte 3.1-11

Nsógten 3.12-15

Paale alómmé Tituse melēten

¹ Me Paale, mbaledé a Dyōb ne mbapere a nlomag awē Yesu Krīstā, me-éé ntelé enén kálag.

Yesue ampwēd me, alóm-me me ábel bon adúbe áde bad ábe Dyōb ápwédé ákag á'sō ne ábel bon bēbii mbále tāngene Yesue, bébele' ngāne Dyōb áhedéé.

² Nén ábele bad bé Krīsto bēwōn e'lyág bé nlém ákud alonje áde déemaá', dōo Dyōb, mó awē eekālē metóm ánhābpē aá móōbē, nkōjsé nídehób bán níbootad.

³ A pōndé eche etāngéné-ε Dyōb dēmbel aá bad bēbii nímē nkalan. Dyōb dēmbē nímē nkalan áwēm mekáá, me-ε níkal mó ne kunze eche mó Dyōb, awesyānē Nsoode ámbéé me.

⁴ Ntenle we, Tituse, awem mwān a mbále á adúbe áde syānē moosyāál déwóó. Nsimé ne nsañ míme níhúú ne Dyōb Titée ne Yesu Krīstā awēd Nsoode, níbē ne we.

Paale ahóbe tāngene nsón míme Tituse ábenlé á mbwóg e Kret

⁵ Mentédé we á Kret, mbwóg eche mendib melānédé ábel bon étii mekan míme méhednad abel, épwed belyáged bé mwembé dyad té. Ekamtēn ngāne ménlāā'ε we méé ébel.

⁶ Nlyáged atāngéné abé mod awē béehelée sé békóbēn awusé. Atāngéné awōn dāsō mmwaád nhóg, ábe bán-ne bétāngéné bédúbé Yesue. Bétāngéné abé awōn áde modmod éehēlē-se ahób aá bēwúú nló áte ké'ε aá bédé epuutéd.

⁷ Nlyáged a mwembé nēngāne mod awē ahíde nsón ní Dyōb ámbīd, eetāngeneé nēe áwóó awusé á yāl. Eetāngeneé epame abé, ké'ε abé mod awē awāmsan alij. Eetāngeneé-se abé mod awē abagé yāl á amwé á mīm káa mod awē apere ne epuutéd. Eetāngeneé-ε se abé metōg.

⁸ Bon pen atánǵéné abé mod awě akobe beken abé-’ε mod awě adəá akan á bwám. Atánǵéné abé mod awě abíε’ dyam abel, abé mod awě abele mekan níme métánǵéné, abé mod awě asáá, abé-’ε mod awě akóbe eche yǎl.

⁹ Atánǵéné abé mod awě akoó nkalanj ní bwám, nkalanj níme bad bétánǵéné nlém asum áyāl adúbe ngáne báyágté mó mó. Nén débǎl áhǎl bad bémpǣe ahébe áhíd nkalanj ní bwám nyaa eche etánǵéné áhǎl-le mewusé níme bad ábe bétánǵan nímê nkalanj abided áwed.

¹⁰ Nhóbe nén áyāle bad híin béekwεntεné áhíd nkamlεn níme belyáged bé mwembé. Bédii bad ábe béhóbe e’yale ábe béewóo nsóηtεn bédoge-’ε bad. Bad híin ábe báyágte enén ndín e ayáge bédii bad ábe bédé á epepé éche éhóbe nén bán bétánǵéné bad ayag.

¹¹ Weémwāg se ábê bad báyágte áyāle bébébte bad bé Krīsto híin ndáb áte ayáged áde báyágtεé mekan níme béewóo’ε kunze áyáged. Báyágte’ échê ndín e mekan ábel békud mǎné.

¹² Mod nhóg awě ambíd á Krεt se’ bəód awě abédé mod a debyéé, anhób aá, “Bad bé Krεt békale metóm pónǵé ésyāǎl. Bébébé nlém á abum, bédii bad ábe béhele nsón, bedyāg-ke ndyééd bwámbwam.”

¹³ Abê e’yale ábe ane mod ánhōbpē áyāl e ábê bad é’dé mbále. Né-əó, bad ábe bédúbpé Yesuε bonj béhíde áde ayáge dé metóm, ékonj bó nímāb mewusé aláa ábel bédúbe ayáge áde átánǵéné.

¹⁴ Nén débǎl béedúbéé póle é metóm éche bad bé Israél, béehíd-taá mekan níme bad ábe bébáá ayáge á mbále áyāl béhóbeé.

¹⁵ Ne mod awě asáá, chǒm ésyāǎl ésaá bonj ne mod awě eekênle áte ne awě eedúbpe, chǒmchǒm áyāle nímab mewémτεn ne nlém méekênléé áte.

¹⁶ Bad ábe báyágte áde ayáge dé metóm béhóbe nén bán bébíi Dyǒb, bonj nímāb mbéltéd nílúmte nén bán béébii’ε mó. Bébele mam níme bad békós, béebeléé-’ε ngáne Dyǒb áhədəé, béehéléé dyam á bwám ké ahóg abel.

2

Paale ad Titusε áyágte ayáge áde átánǵéné

¹ A-Titus, éyágte bad ayáge áde átánǵéné.

² Eyáged baachóm bémbáá wεé béchyáə échab yǎl bwám, bébele mam nyaa eché bad bébagéé bó edúbé bébê-’ε bad ábe bébyéε’ mam abel. Békag á’sō bédúbpe Krīstəə, békag á’sō bédəə bad bémpǣe, békag-ke á’sō béwεsan metake níme békudεé áyāl e adúbe áde bédúbpe.

³ Eyáged-te bebaád bémbáá wεé nímāb mbéltéd nílúmed nén bán bébage Dyǒb edúbé. Eláa bó wεé béehōbē nhóg ne anínii mam áyāl ábébed bó dín, béebagé-’ε échab yǎl á amwé á mím. Bonj éláa bó wεé báyágte bad mam níme métánǵéné.

⁴ Bébele nímén mekan ábel bonj béhel e’tum é’ bebaád ayáged ngáne bétánǵéné ábab bechóm ne ábab bán adəη.

⁵ Báyáged bó bán bébê bebaád bé e’wóngé bé bwám. Bésum nlém wεε ábab bechóm bēnpεn, báyáged-te bó nyaa eche bétánǵéné nímab mendáb abóo bwám, nyaa eche bébēē bebaád ábe bésúdté yǎl ásē e ábab bechóm. Nzé bebaád bébele nímén mekan mésyāǎl, bad béehóbpé nkalanj níme Dyǒb ábágé bad dyam dé mbéb áyāl.

⁶ Melemlem ébel kódébad échəə yǎl.

⁷ A mbéltéd nímōη-’ε nisyāǎl, ébele mekan mé bwám nyaa eche bad béhídtē nímōη mekuu. Nzé eyágte, chǒm éche éyágtεé étánǵéné ébé mbále, ébē-’ε mod awě ahíde mekan ámbíd bwám.

⁸ Enyín nén wεέ ayáge ádōη átāngéné ngáne bad béekudté etál áhób wε mam mé mbéb áyāl. Nén débēl bad ábe bētāngan wε békwāg áyāle nén béekudté nzii áhób syánē dyam dé mbéb á yāl.

⁹ Eyáged betāη nén wεέ béwōgne ábab besáá á menzii mésyāāl, bébele-’ε mam míme méwōgtē bó menyīnge. Béetāngeneé née bépentanné bó.

¹⁰ Béechībne-’ε bó. Boη pen bētāngéné alúmed bán ábab besáá béhele bésūm bó nlém áyāl. Nén débēl bad béwōη mewēmtēn mé bwām tāngene nkalan míme Dyōb, awesyánē Nsoode, míme déyágtεé.

¹¹ Dyōb álómé míme nsimé áfintē e syánē ábel áde ábélé nzii eche moosyāál áhele ákūd e’sósoη.

¹² Abē e’boη bé nlém é’ Dyōb é’yágte syánē áchene mekan míme Dyōb déhedéé aá débēl ne ásóg esíí awōη ábel mekan míme bad bé nkōηsé ábe béēbii Dyōb bébeleé. Eyágte syánē ábel mekan nēngáne bad ábe bébyéε’ mam ábel, ábel mekan míme métāngéné ne ábel mekan míme Dyōb áhedéé á nkōηsé wén.

¹³ Debele nén ngáne désinεé ne e’lyág bé nlém mam míme mépě échē epun áde ádēd Dyōb, mó awē adé Ngum ne awēd Nsoode, Yesu Krīstā ápεé ne éche ehúmé.

¹⁴ Yesuε ambě eche yāl ákōde syánē ásē e mbéb rīsyāāl ábel-le syánē debé bad ábe besáá, debé-’ε ábē bad bēnpen, ábe béwóó nlém áte ábel mekan mé bwām.

¹⁵ Eyágte bad mímén mekan. Ebenlad kunze eche Dyōb ábágé wε, áwéd bad nlém á abum ne áláa bad mímāb mewusé ábel béhāηlen. Weémwāg-se modmod anyín wε nkōηtéd.

3

Paale ahóbe ngáne abé á bad bé Krīsto átāngéné abé

¹ Nlānge wε mεé ékamtēn bad ábe éyágtεé wεé bésuded yāl ásē e benkamlene ne ásē e bad bémbáá. Wεé béwōgne bó bébé-’ε mboηsén ábel dyam a bwām ké áhéé.

² Eláa bó wεé béēhōbē modmod dyam dé mbéb á yāl, bébáa’ mpentēn, bēpwiited, béchedēn-ne moosyāál yāl.

³ Ngen e’só syánē bēn ámpē debédé eyókél, deewōgne’aá Dyōb, dempān nzii, debédeé née betāη awōη áde déwóó’áá esíí áyāl e mekan mé nkōηsé, déhedé-’ε menyīnge mé nkōηsé. Dekónáá bad, désīdē-’ε bad alongé ádēd ásyāāl. Bad bēnkōó syánē, syánē bēn-ne dékōō nhóg ne aníníí.

⁴ Boη Dyōb, awēd Nsoode, anlúmed syánē ábē e’boη bé nlém ne échē edānge.

⁵ Ansōη ádesyánē alongé. Saké nsón ní bwām míme syánē dēmbēnlé mēmbēl boη ábēl nē, boη ambēl nē áyāle míme nlém ní ngəl. Anlóm Edāádāη éche Esáá áwoobe syánē mbéb ábel nén déchyáad ekóólé.

⁶ Dyōb ábúdé syánē Edāádāη éche Esáá abε mbwiined ne Yesu Krīstā, awesyánē Nsoode.

⁷ Dyōb abélé nē, ábel boη míme nsimé níbel dékobned áwe e’só boη syánē ámpē déwōη e’lyág bé nlém nén bán deékūd alongé áde déemaá’.

⁸ Enén póle echē ríhóbéé edé mbále.

Nhede mεé ríkoη nyé mímén mekan aláa ábel boη bad ábe bédúbpé Dyōb bébii ngáne bébeleé mekan mé bwām. Nén dōó ébóó bán débēle’, nē dō-’aá dépiined moosyāál nsyāη.

⁹ Bon nyétede e'kúkú bé mpentén, akal á póle tângene ngáne mbyaa mêmbootédte. Nyétede-'ε ngabén ne ntântén tângene mbéndé é bad bé Israel. Abén bwēm béερενέé nsyān, béesaá-'aá dyam dé abelen.

¹⁰ Mod té awě apεene ngabén átinté e bad bé Krīsto, nzé ebagé mó elébé ngen póg ne ngen éβε bon eewóge wε, weewóó dyam ábel ne mó.

¹¹ Ebíi nén wεé ene ndín e mod abébé abele-'ε mbéb. Mbéb níme ábélé níúmte bán akwíde eche yāl nkáásé.

Elébé ne meléntén mé asóg

¹² Nzé nlómé Atemase ké'ε Tikikuse bó mod nhóg áwōn, éwān áte áhye dényín με á dyad á Nikopolis áyāle áwed dóó nííídé μεé mēbē á pónde e ahéb á ngíne.

¹³ Ewan áte ábel bon Zenase, mod a mbéndé bó Apolos béhide áκε εκε éche béhedé áκε. Nyín nén wεε mówōngēnē bó nyaa eche béetógké chōmchōm éche bébenlédté áκε.

¹⁴ Ebel-le ábesóo bad béyáge ábel mekan mé bwām. Béwōngen ábel mekan níme méhedne bán mod ábel. Béebelé mekan níme méesé dyam dé abelen.

¹⁵ Bad ábe bédé ne με básyāāl bélénté wε. Lentéd με ábesyānē baányan bé Krīsto básyāāl ábe bédáá sé.

Nsimé ní Dyōb níbê ne nyé moosyāál.

Kálag echë Paale áténlé Filemōne Ndibned ní kálag

Filemōne abédé mod awë andúbé Krístə abé-ε mod awë awóó edúbé bwámbwam á mwembé-te. Kapóg abédé á mwembé míme rídé á Kolose. Anwón ntān awë béchágé'áá bán Onesimuse. Ane ntān ansöb wéε Filemōne dó-'áá ámbíd e pónde ábómne Paale. Paale abédé á mbwəg ene pónde. Paale mó ankəñ bon Onesimuse abé mod a Krísto. Kálag echë Paale áténlé Filemōne, antel chó áá Filemōne bó awe ntān bétim ásē, áá mó Paale mólōme' awe ntān ámbíd, nēn Filemōne akob mó ámbíd saké áyāle ádíí awe ntān dēmpen bon akob mó nēngāne mwānyan á Krísto.

Nkabtéd ní kálag

Ndibned ní kálag 1-3

Paale akené Filemōne 4-7

Paale acháá' Filemōne átéd Onesimuse ámbíd 8-22

Nsógten 23-25

Paale alómmé bad melenten

¹ Me Paale, awë adé á mbwəg á dīn á Yesu Krístə, me-εé ntelé enén kálag. Sé Timoti, mwānyan a Krísto awêd, sélōmme nyé melenten. Sélente' we Filemōne, nsón e echoñ awêd awë mómpē abele' nsón míme sébeléé.

² Sélente' kóəñne Afia, awed mwānyan a mmwaád a Krísto. Sélente' Achipuse awë mómpē akale' nkalan ní bwām ne ngíne esyāal ngāne sémpē sékaléé. Sélente-ε bānned bé mwembé ábe bébome' áwoñ ndáb.

³ Nsimé ne nsan ní Dyöb Titée awêd ne Sāngú Yesu Krístə, mbê ne nyé.

Edənge ne adúbe áde Filemōne

⁴ A-Filemōn pónde téé nzé nkānne', mbelé nsāgnān Dyöb áyāle echōñ.

⁵ Nsāgnan Dyöb áyāle nwógé nēn bán edəá bad bé Dyöb bésyāal, esumé-ε nlém wéε Sāngú Yesu Krístə.

⁶ Nkānne' nēn meé, nlatén míme syāné déwóó nēngāne bad ábe bédúbpé Krístə, mbel nyékoñ mekan mé bwām mésyāal nímē Dyöb ábágé syāné asōñten. Nēn débēl ehúmé éche Krístə ényínned.

⁷ A-mwānyan, edənge éche éwōñné bad ábe bédúbpé Krístə, éwógté me menyīnge bwámbwam éwéde-ε me nlém á abum. Éwógté bad bé Dyöb menyīnge.

Paale áá Filemōne ákob Onesimuse

⁸ Né-óó, kénéé édíí bán nwóó kunze ákamlen we á dīn á Krísto ábel dyan áde étəngéné abel,

⁹ edənge éche níwānléné we ébéle ncháa' we cháán. Me Paale, nhóbe nēn nēngāne nchun ní mod míme rídé-ε á mbwəg bəəb á dīn á Krísto.

¹⁰ Ncháa we á nló míme Onesimuse. Adíí bəəb nēngāne awem mwān. Me-εé nkəə bon adúbé Krístə áde abédé á mbwəg hén ne me.

¹¹ Ngen e'só, enkēmbáá we etógnén. Bon bəəb adé sóo etógnén.

¹² Nlómé' mó ámbíd áwóñ bəəb, adíí mod awë rídáá bwámbwam.

¹³ Mendəñ meé ábê ábê ne me ábel bon áwōñgen me á etál échōñ bəəb áde rídíí á mbwəg hén á dīn dé nkalan ní bwām.

¹⁴ Kéné, meédəá'é meé rínyáged we áwógen me. Bon pen mēdəñ meé éwōñgen me áyāle mmōn edəá me awōñgen. Né-óó, meéhēlē-se mbel dyan dyan ésebān mmōn ekwēnténé.

¹⁵ Kapóg Dyöb dǎǎ dēmběł aá Onesimuse ápágned wε á yǎł é esón é pónǎé, ábel boŋ nzé atimé ámbíd áwón ǎbē ne wε ne abé ásyāǎł.

¹⁶ Bootya bǎǎb, saké ntāŋ ngēn adii. Adii awed mwǎnned a Krǐsto. Ndǎé mó bwámbwam, wε-’ε ámpē etǎŋgéné mó adəŋ ké tómaa ngáne rídǎǎ mó. Etǎŋgéné mó adəŋ ngáne ntāŋ awón, édəŋ-’ε mó nēε awon mwǎnyan a Krǐsto.

¹⁷ Né-ǎǎ, nzé etédé me nēŋgáne mod awě nyúmǎ nyēbele nsón, etǎŋgéné mó akob melemlem nēŋgáne wékobpé me.

¹⁸ Nzé édé nēn bán aběnlé wε epanǎé, ké’ε awánlé wε alúm, né mēsābē wε.

¹⁹ Me Paale, mmēn-εé ntelé nēn ne échēm ekáá. Mēsābē wε. Boŋ pεn, weéchatán nēn wεé abel áde mbélé boŋ ékud alongé dékǎǎłē, édé nēŋgáne wémpē ewanlé me alúm.

²⁰ Né-ǎǎ, a-mwǎnyan, ncháa’ nēn mēé éwōŋgen me á đŋn á Sǎŋgú. Wógéd me menyŋge á đŋn á Krǐsto.

²¹ Atel áde rítélé enén kálag ábélé nsumé nlém nēn mēé, wěbelé me kéchéé éche rílǎŋgé wε mēé ébele me. Mbíí mēé wěběl-le ké tómaa ngáne ríhóbé mēé ébél.

²² Dyam démpēε áde ríhóbé mēé ríláa wε áđii nēn mēé, é nabned me toŋ áwon ndáb áyāle ndúbpé nēn mēé Dyöb déwōg nyé mekáne, abidéd me á mbwǎg, ntán nyé ámpē.

²³ Epafrase, awě súmǎ sēdé á mbwǎg á đŋn á Yesu Krǐsto, mómpē alómme nyé melenten.

²⁴ Kǎǎŋne Makǎse, Aristakuse, Demase, ne Lukase ábe syáǎbǎǎ sēbele nsón bómpē bélénté nyé.

²⁵ Nsimé míme Yesu Krǐstǎǎ mbê ne nyé moosyǎł.

Kálag e Hibru Ndibned n kálag

Mod awě atelé enén kálag antel chó âwéd bad bé Krīsto nlém a abum áyāl e metake míme bó donje á bad békúdé'áá adúbe áde béndūbēē Yesue. Alúmté áte nén aá melě míme Yesue ápééné métómé melě míme ménsēbē abé. Alúmté- 'e áte ámpē nén aá béēhūntē nlém nén bán Dyöb déelónédte akag áde ábágé. A melě mé'sō míme Dyöb démwēē ne ábē bad mbwiined ne Mosēē, beprise bóó bēbágé'áá Dyöb mendē á nló mí bad. Boŋ bóób, Yesue mó adé mod a tīntē a bad ne Dyöb abé-'e prise ambáámbáa awe atómé bekal bé'dáádəŋ bé' bóód, atóm ángel, atóm-me káəŋne Mosēē, áyāle eche yāl chēn chóó ámbéé nēē mendē, ngen póg ne ngen ésyāāl. Höm áde ádíí Atómténé Asán tómaa höm áde beprise bé' bóód bēbágé'áá mendē á nló mí bad, mendē míme ábágé-'e mékwógnédé.

Nkabtéd n kálag

Krīstəə mó alúmté bad ngáne Dyöb ákóó abé 1.1-3

Krīstəə atómé ángel 1.4-2.18

Krīstəə atómé Mosēē bó Josua 3.1-4.13

Krīstəə adé prise awě atómé beprise bésyāāl á mbyaa míme Levi 4.14-7.28

Melě míme Krīstəə rítómé melě mé'sō 8.1-9.28

Mendē míme Krīstəə ábágé rítómé mendē míme beprise bēbágé'áá bóód 10.1-39

Adúbe atómé chōm ésyāāl 11.1-12.29

Abé áde áwógte Dyöb menyīŋge 13.1-19

Mekáne mé asóg 13.20-21

Melēntēn mé asóg 13.22-25

Dyöb áhóbé wée bad mbwiined ne Mwän

¹ Se' bóód, Dyöb dénhōb wée ábēd betaa, anláá bekal bé'dáádəŋ mam áláa bó. Anhób áwāb ngen ne ngen, ábēnléd-te menzii híin áhób áwāb.

² Boŋ á e'pun bé asóg hén, ahóbe wée syánē, álāŋgē awe Mwän mam áláa syánē. Wēē ane Mwän dōó Dyöb ápóó boŋ áhágé' nkoŋ mí mín ne rí sé. Mó-'aá Dyöb átíídé aá mó awóó nhəgtéd rísyāāl.

³ Ane mwän móó adé e'kin-áte bé ehúmé é Dyöb, mó-'aá alúmtē syánē ngáne Dyöb ákóó abé. Adíí melemlēn nēē Dyöb-pe ádíí. Ngíne e eyale é nsəl échē ane Mwän ebélé mekan mésyāāl mékag á'sō ngáne métəŋgéné abé. Ahúd áde áhúdé syánē á mbéb-te, abélé syánē moosyāál desáá. Ambīd e nē, andyēé Dyöb á Ngum é ekáá é mbáá ádyōb.

Mwän a Dyöb atómé ángel

⁴ Né-óó, Mwän a Dyöb atómé ángel. Melemlēn nē dōó dīn áde Dyöb áchágé mó aá, "Mwän" atómé dīn ádāb á "ángel."

⁵ Dyöb déēhōbēē wēē ángel ké póg mbēd aá, "Edíí awem Mwän, chíi, ndíí sóó."

Dyöb déēhōbē'áá wēē ángel ké póg aá,

"Mēbē Sáá,

mó-'e abé awem Mwän."

⁶ Boŋ Dyöb ádēhób aá mólōme' awe Mwän a'só á nkōŋsé-te, anhób ámpē aá, "Ángel échēm ésyāāl étəŋgéné mó edúbé abe."

⁷ Anhób tēŋgene ángel pēn aá,

“Abelé éche ángel édé née epub.

Echê Angel éche édé abē bembalede,
abelé édii née muú míme ríchodne’.”

⁸ Bon Dyöb dénhōb tângene Mwān aá,

“A-Dyöb,

wékamlén á ngíndé ne á ngíndé.

Wékamlén ábōn bad nyaa echē etāngéné.

⁹ Edāá mam míme métāngéné, ékō-’e mam míme méebo.

Né-’aá ákás bon Dyöb, ádon Dyöb,

ápweđ we ábé etógnén tómaa baásyāāl ábe nyāābō nyêdé,

ápweđ-te we ábé menyinge tómaa baásyāāl ábe nyāābō nyêdé.”

¹⁰ Dyöb áhóbé ámpē aá,

“A-Sán we-éé ehagé nkōnsé se á mbooted,

nkōn mí mín-ne ndii abwóg áde éhagné échōn ekáá.

¹¹ Abē bwēm é’syāāl bēpě á asóg, bon we pen wēbē abé ne abé.

Abē bwēm é’syāāl bēmaá ásē née mbóté.

¹² Wēnyag bó áte ngáne bényagēé mbóté,

wéhānlén-ne bó áte ngáne bēhānlanné mbóté.

Bon we pen wēbē ebé melelem, ádōn alōngé-’e déewōngé asóg.”

¹³ Dyöb déēlāngēē ángel ké póg mbêd aá,

“Dyéé me é ekáá émbáá hén

káān ne á pōndé eche mēbenlé

bon ékōgtéd ábōn bad bé ekōyí ámín ne mekuu.”

¹⁴ Cheé-ō ángel edíí? Edíí e’dāádān ábē é’benle Dyöb. Dyöb álóme-’e bó áwōngēn bad ábe békūd e’soóson.

2

¹ Né-ō ngáne débíí mímén mekan, detāngéné kéchéé éche déwógé nlém asum áyāl ábel bon deépānē’ nzii.

² Mekan míme Dyöb dénlā-’é ángel aá éláa ábēd betaa ménwōn ngíne. Bad bésyāāl ábe bēnkēnhíd mímé mekan, ábe bēnkēmbēl-le ngáne mímé mekan méhóbé’áá, bēnkūd nkógsen míme bēntāngēnnē akud.

³ Chán-nō nyéwémténé bán dehele debíd mímén nkógsen áte nzé deewōne nkalan mí bwām pōndé? Mmé nkalan mó-’aá nípeene’ enén ndín e e’soóson. Sāngú Yesue mwēn mó asébpé bad akale tângene áben e’soóson. Bad ábe bēnwōg-ke mam mímé ánhōbpē, bēmbēl syānē denyín nén bán médé mbále.

⁴ Dyöb dōmpē dénlūmēd syānē áte nén aá mímé nkalan rídé mbále. Ambel nē alúmed áde alúmté e’chemléd, mekan mé menyáké ne menyáké híin. Anlūméd nē ámpē ne mekan mímé bad bēbélé’áá á ngíne e Edāádān éche Esáá éche Dyöb démbēé bó. Dyöb dēmbē bad Edāádān éche Esáá ngáne ébonnéde mó.

Ane awē alyágte syānē akud e’soóson

⁵ Saké ángel chōo Dyöb ábānné aá ékamlén nkōnsé mékōlē mímé séhóbéé bán mépě.

⁶ Bon étēnlédé hōm ahóg á kálag e Dyöb pen nén bán,

“A-Dyöb, cheé moonyon ádíí awē éwōngé pōndé?

Cheé mwān a moonyon ádíí éche ékás bon éñné mó?

⁷ Ayāl e esōn é pōndé, wembēl enkēmpaá ángel. Wembané mó á atii dé ehúme ne edúbé.

⁸ Wembē mó ngíne ákamlén chōm ésyāāl.”

Abε adé ébágé mó ngíne ákamlen chõm ésyāāl, álũmte' bán chõmchõm éesaá éche éesě ásē e nkamlen nímē. Kénée édífí-'aá nê, deenyínée bōōb nén bán chõm ésyāāl édé ásē eché.

⁹ Bon denyíne' ngáne Yesuε ádíí. Ayāle esónj é pónde Dyõb dēmběl enkēmpaá ángel. Bōōb, Dyõb ábágé mó ehúmé ne edúbé née kēj ayāle metake níme ákúdé ne kwééd eche áwédé. Dyõb álúmté syánē nímē nsimé awé áde Yesuε áwédé á nló mí bad bésyāāl.

¹⁰ Bwēm é'syāāl é'díí é' Dyõb, mó-'aá anōne' bó. Ngáne édífí nén bán Dyõb áhede' aá bad híin békud etál ábé ábe bán, békud-te ehúmé, émbē mbonj nén bán ábel mod awě ásalé bó nzii ákud metake. Nê déběl ákwognéd ábé mod awě áběl bonj bad békūd e'soosonj.

¹¹ Yesuε awě abele' bonj bad bésánj, ne bad ábe bésáá, bó moosyāál bédíi bán bé Sáá nhóg. Né-'aá ákáá bonj Yesuε eekwágé' áchæg bó aá baányanj.

¹² Eténlédé nén bán anláá Dyõb aá,
“Mεéllāá ábēm baányanj ngáne ádonj dīn ápédé abé.
Měkēn wε nzé syāābōō sēlādné hõm ahóg.”

¹³ Anhób ámpē aá,
“Mεésũm nímēm nlém ne Dyõb.”
Anhób-pe ámpē aá,
“Mε nén, syāābe bán ábe Dyõb ábágé mε.”

¹⁴ Ngáne édífí nén bán ábé bán bé Dyõb bédíi baányonj ábe bēwóó ekob é yāl ne mekií, Yesuε ámpē antéd yāl e moonyonj née bó. Ambel nê ábel bonj kwééd eche ánwēē ébóded ngíne eche Satanε awě abele' bonj bad bēwág.

¹⁵ Awé áde ánwēē áhúdé bad á mehanj ábe bēmbē betānj á alongé ádāb ásyāāl ayāle mbwóg ní kwééd.

¹⁶ Enyínnédé bwām nén bán saké ángel ánhyé awōngen. Bonj ampě áwōngen bad bé mbyaa níme Abrahamε.

¹⁷ Né-ōó éhédnadtáá nén bán Yesuε ábē melemlem née baányonj á menzii mésyāāl ábel bonj ábē prise ambáámbáa awě awóó nlém ní ngol, abé-'ε mod awě bēhele bésun nlém ayāl. Abele áde ábenléé Dyõb, ábélé Dyõb álagsan bad mbéb.

¹⁸ Ngáne édífí-'aá bán mwēn antäg, ákūd-te mekægsen, awōngan bad nzé bédé á mekægsen-té.

3

Yesuε atómé Moseε

¹ Né-ōó a-baányanj, nyé ábe Dyõb áchénlé ábé ábē bad, nyénōne' Yesuε. Mó adé mbapeε awě Dyõb álómé, abé-'ε Prise ambáámbáa a mekan níme séhóbé bán sēdúbpé.

² Dyõb dēmpwεd mó, ábenlé-'ε Dyõb ne nlém nhóg melemlem ngáne Moseε ábenlé'áá Dyõb ne nlém nhóg á abum á ndáb á Dyõb.

³ Mod awě alóó ndáb, bēbelé bēbε mó edúbé tómaa ndáb eche alóó. Melemlem nê dōō Yesuε ákwógnédé ákud edúbé éche étómé edúbé éche Moseε.

⁴ Ndáb téé ewóó mod awě alóó chό. Bonj Dyõb dōō alóó chõm ésyāāl.

⁵ Moseε abédé mbaledε á abum á ndáb á Dyõb, awě abēnlé'áá Dyõb ne nlém nhóg, álũmte' bad mam á'sō é' pónde níme Dyõb débēnlé.

⁶ Yesu Krístæ pēn abédéε Mwān a Dyõb, ákamlán-ne abum á ndáb á Dyõb ne nlém nhóg. Syánē ámpē dedíi bad bé abum á ndáb á Dyõb nzé édé nén bán dedé déchágnédé, desumé-'ε nlém ne chõm éche débééné kúmbe, éche désúmé-'ε nlém ayāl.

Elébé ne bad ábe béedúbpe

- ⁷ Né-ᵛᵛ, nyéwôg chôm-έε Edᵛᵛdᵛᵛ ἔche Esáá éhóbé. Ehóbé aá,
 “Chii nén nzé nyéwógé ehób é Dyöb,
⁸ nyéewúéné’ Dyöb nló áte ngáne ábēn betaa bēnwūēnnē Dyöb nló áte á
 póndé echē bēnkunnénnē Dyöb yǎl.
 Bēnkunnén mó yǎl
 á póndé eche békágé mó é ehyánge.
⁹ A ehyange wê, bēnkǎg με,
 bényín-ne mam míme mbélé é etūn é móom mé mwě méniiin.
¹⁰ Nê dᵛᵛ dēnkǎḡ boḡ níliin ene nyongel e bad boḡ nhób μεέ,
 ‘Áwab nlém-té, bétamnad,
 béēhīdē-’aá nzii echēm.’
¹¹ Né-ᵛᵛ, menliḡ, mmwé-’ε melě μεέ
 ‘Béesónlé áwēm abwóg dé nkóme-áte mbéd.’ ”
¹² A-baányan nyétéd póndé ábel nyé modmod nyéewóó nlém mé mbéb
 míme méēdúbpe’ Dyöb, ábel boḡ nyéētēdté Dyöb áde ádé á alongé.
¹³ Boḡ pen nyéwéde’ nhóg ne aníníí nlém á abum epun téé, ngáne échē epun
 échágnédé bán “Chii”, ábel boḡ mbéb méedogé nyé modmod áwūēn Dyöb
 nló-áte.
¹⁴ Syánē dedii mod nhóg ne Yesu Krīstᵛᵛ, nzése delyᵛᵛgé dechánédé káḡḡ ne
 á asóg ne mekan míme désébpé adúbe tâḡḡene Dyöb.
¹⁵ Demaá anyín nén bán éténlédé á kálag e Dyöb nén bán,
 “Nzé nyéwógé ehób é Dyöb,
 nyéewúéné’ Dyöb nló áte
 ngáne ábēn betaa bēnwūēnnē Dyöb nló áte á póndé eche bēnkunnénnē
 Dyöb yǎl.”
¹⁶ Benzébádé bēnwōg ehób é Dyöb boḡ békunnén Dyöb yǎl? Abê bad
 bésyāḡ, saá bad ábe Mosεε ámbīdēnnē á Egipto bēbédé-yε?
¹⁷ Benzébádé Dyöb dēnliín-naá é etūn e móom mé mwé méniiin? Saá bad
 ábe bēmbel mbéb bᵛᵛ bēnnaá ndim é ehyánge-yε?
¹⁸ Benzébádé Dyöb démwēε melě aá béesónlé áwe abwóg dé nkóme-áte
 mbéd? Saá bad ábe békēmbēl ngáne áhédé’áá-yε?
¹⁹ Né-ᵛᵛ, denyíne’ nén bán, bēnkēnhēnlé asól áyāle bēnkēndúbéé Dyöb.

4*Nkóme áte míme bad bé Dyöb békudté*

- ¹ Ahób áde Dyöb dénhōbpē aá syánē dēsᵛᵛl áwe abwóg dé nkóme-áte ádii
 étyéémé. Né-ᵛᵛ détdéd póndé ábel boḡ nyé modmod eebᵛᵛ’ asól áhed.
² Syánē ámpē dewógé nkalan mí bwām melemlē ngáne bómpē bēnwōgkē.
 Bēnwōg míme nkalan mí bwām boḡ ménkēnwōḡénnē bó ne awōḡḡen dēn
 áyāle nén, bēnkēndúbéé mó.
³ Bᵛᵛb-pᵛᵛ, syánē ábe dedúbpe míme nkalan, desóle’ áde abwóg dé nkóme-
 áte. Boḡ ne bad ábe béedúbpe pen, Dyöb dénhōb aá,
 “Menliḡ, mmwé-’ε melě nén μεέ,
 ‘Béesónlé áwēm abwóg dé nkóme áte mbéd.’ ”
 Anhób nê, kénεε édíí bán ammād míme nsón amad se áde áhágé nkōḡsé, abwóg
 dé nkóme áte dēmmād-tε abé.
⁴ Eténlédé á kálag e Dyöb tâḡḡene epun éche élónténé epun saámbé nén
 bán, “Dyöb dēmmād míme nsón. Né-ᵛᵛ ankómé áte epun éche élónténé epun
 saámbé.”
⁵ Eténlédé á kálag-té wê ámpē bán Dyöb áhóbé aá,
 “Béesónlé áwēm abwóg dé nkóme-áte mbéd.”

⁶ Né-ɔ́, etál édii ébágnédé donje á bad ásol á hõm dé nkóme-áte. Bon bad ábe bénwõg nkalan mí bwám se' bɔ́ɔd, békênhenlé asól, áyãle nén békêmbenlé mekan míme Dyõb dénlaã' é bó aá bébel.

⁷ Nê dêmbël, Dyõb dêmpwëd epun émpëe, áchãg-ke chõ aá "Chii." Anhób nê etún é pónde ámbid echê ábëd betaa békêmbenlé ngáne ánhõbpë aá bébel. Anhób nê mbwiined ne e'yale ábe Dabidë ábe mímáá nyé atele nén meé, "Chii nzé nyêwógé ehób é Dyõb, nyéewúéné' Dyõb nló-áte."

⁸ Nzé émbë nén bán hõm áde Josua ânkeénné bad dõo dênkõh hõm dé nkóme-áte abé, né ámbid e pónde Dyõb dênkênhõbpé tângene epun émpëe.

⁹ Né-ɔ́ hõm dé nkóme-áte áde áde nêngáne nkóme-áte míme Dyõb dênkõmëé áte áde ámáá nkõnsé ahãg ályágé ásine ábë bad.

¹⁰ Kénzëé awë asólé á abwóg dé nkóme-áte á Dyõb, akõmme áte áyãle amadé míme nsón, melemlem ngáne Dyõb dênkõmëé áte áde ámáá nkõnsé ahãg.

¹¹ Né-ɔ́ syánë déwan áte désól adê abwóg dé nkóme-áte, ábel bon syánë modmod deebóó asól áhed. Deehidé' mekuu míme bad ábe békêmbël ngáne Dyõb dênhõbpë.

¹² Debíi nén bán Eyale éche éhúú ne Dyõb, édé alongé, édé-'e ngíne. Ekõbpë' tómaa páá e nsal míbe. Esóle' mod áte kááh se á mbom ní ngob e yãl ne edáádãh. Esóle-'e mod kááh se á mebõh mé yãl ne á e'hid-tê. Echê eyale écheme' mewêmten mé mod ne kéchéé éche mod áhedéé abel.

¹³ A e'só é' Dyõb, chõmchõm éesaá á e'konéd. Chõm ésyãl édé á tâl e ékwéé. Dyõb dõ-'aá détãngéné mekan mésyãl míme débéléé aláa.

Yesue adii ndale e prisë ambáambáa

¹⁴ Né-ɔ́, ngáne déwóó Prisë Ambáambáa, Yesue Mwãh a Dyõb, awë akií ámín á'sõ é' Dyõb, déchãhned adúbe áde désúme nlém áyãl.

¹⁵ Awesyánë Prisë Ambáambáa asõnténé mechínzé mímed, áyãle nén mómpë ankũd melemlem mé mekãgsen míme dékudéé á menzii mésyãl, bon kéné, enkênbenlé mbéb.

¹⁶ Né-ɔ́ ne e'sum bé nlém désíde benben ne atii dé nkamlen á Dyõb áde ábage nsimé. Deewógé mbwóg ké nhóg. Débël nê ábel bon Dyõb áwóg syánë ngól, ábãg-ke syánë nsimé míme méwõngãh syánë pónde téé eche détõgnéné nwõngën.

5

¹ Prisë ambáambáa téé awë Dyõb ápwédé átintê e bad, ápwede mó ábele mó á dín áde ábê bad. Ane prisë móó akobe' mendë wéé bad bon ábagé mó wéé Dyõb néé nde ne mendë ábel bon Dyõb álagsen bad mbéb.

² Ahële bad yãl acheden ábe bépane' nzii áyãle béebíi' é chõm éche bébeléé áyãle nén mwën ámpë adii moonyõh awë awóó mechínzé mé ngob e yãl.

³ Nê ábéle atãngéné néé ábageé mendë kááhne áyãl e míme mbéb mën, ábagé-'e áyãle mbéb mí bad.

⁴ Modmod mwën eéhëlé-se ábe yãl edúbé é prisë ambáambáa. Dyõb dõo ápwede' mod ábé prisë, melemlem ngáne ámpwëdté Arõne.

⁵ Melemlem nê dõ-'aá Krístã mwën énkênchágédté yãl ábé prisë ambáambáa. Dyõb dõo dêmpwëd mó. Dyõb dénlaã mó aá, "Edii awem Mwãh. Chii ndii Sóó."

⁶ Nê áde á kálag e Dyõb hõm dêmpëe bán Dyõb dénlaã mó aá "Wéébë prisë abe ne abé, néé Melkizédegë."

⁷ Ade Yesue ábédé á nkõhsé, akánné'áá, áchāā Dyõb, áchye' awé á ngíne, mésod mébidē' mós á mīd. Akánné'áá wéē mod awē ahele ásõη alongé ádē. Dyõb dénwõg mós mekáne áyāle anwõη mbwõg ní Dyõb áte.

⁸ Kénéē ábédé Mwān a Dyõb, an'yágé áwõgen Dyõb mbwiined ne metake míme ánkudté.

⁹ Dyõb dēmbēl ankwognéd abé-'ε prise ambáámbáa awē akwõgnédé, ábel bad ábe bēwõgne mós békud e'soõson ábe é'dé á ngíndé ne á ngíndé.

¹⁰ Dyõb dēmbané mós á atii áá mós adé prise ambáámbáa néē Melkizedεge.

Elébé ábel mod éétdé adúbe

¹¹ Nwóó mam híin áhób tñgene adén atón. Elénlé me áte ngáne mébenlé bon nyēsõntén mós, áyāle nén nyéewámsánné dyam asõηten.

¹² Nhóbe nén áyāle nén nyētñgén bad abé bõõb ábe bēyágte' bad bēmpēe. Bon nyédii nyēhednad ámpē bán mod áyáged nyé mam míme nyēmmadté abii tñgene nkalan ní Dyõb. Nyédii nyédé néē bán bé nkáál ábe bēhednad abii saké ndyéed.

¹³ Kénzée awē adii amwáa' abii, adii néē nkáál. Eébī' é mbon ne mbéb.

¹⁴ Ndyéed pen edii áyāle bad ábe bémáá akwog. Mod ambáá adii mod awē ayágte, awē amēnténe-'ε mbon ne mbéb ábii.

6

¹ Né-õó dékεene adúbe á'sõ nēngáne bad ábe bémáá dyam abii. Deetñgeneé néē détédeé pónde ámpē áyáge mam míme bēn'yāgēdtē syánē tñgene Krístæ se á mbooted. Demmād ayáge, debii-'ε nén bán bad bétñgéné békúné mbíd, bétédē ábel dé mekan mé mbéb míme mépεene' kwéed. Demmād-te abii nén bán bétñgéné Dyõb adúbe,

² bēyágtē bad tñgene edusen* ne tñgene abán á bad mekáá á nló. Debii-'ε nén bán bétñgéné bad ayáged tñgene mpuu ne tñgene mbakú e nkáásé echē ēbē abé ne abé.

³ Deétdé nímén mekan. Dékag á'sõ nzé Dyõb ábáge etál.

⁴ Nhóbe nén áyāle nzé bad bétédte ádab adúbe, mod ééhēlēē-se ápēēn bó ámbíd ámpē, bétédē nímab mbéb bétimēn Dyõb. Nhóbe bad ábe bēnkūd e'nyínēn bé ekíde, bēwóglén nnam ní Dyõb, békūd-te Edædāη éche Esáá néē bad bēmpēe.

⁵ Bēwógléné e'bon bé eyale é Dyõb, bēnyín-ne ngíne echē ēbē á pónde eche Dyõb dékamlénné.

⁶ Nzé ábē bad bémáá-'ε nímē mekan anyín bon bétíme bétédte ádab adúbe, mod ééhēlēē-se ápēēn bó ámbíd ámpē átēde mbéb áhíd Dyõb. Abán áde bēbáa' é Mwān a Dyõb áyāl, ébelé ébé byánán bēbomme' mós á awõg ámpē, bēkwāgtē-'ε mós á'sõ é' bad bēmpēe.

⁷ Ndõõb eche mbúú éyágte achóoted bon mendíb mésól ásē, ebele bwēm é'kwog bwām. Ábē bwēm é'belé é'wõngān bad ábe bēwéné bó. Nē álúmtē bán Dyõb ánamte' ene ndõõb.

⁸ Bon nzé ene ndõõb ekwogte' mekõd ne e'sum bé mbéb bēmpēe, né eésáá dyam de ábelēn. Né káāη ne á asóg bēhyāād-te chó.

⁹ A-baányāη, kénéē rílángeé nyé nén, ndúbpé nén meé nyébele' mekan nyaa eche nyékudté mekan mé bwām mé e'soõson.

¹⁰ Dyõb ábele' nímē mekan nyaa echē etñgéné. Eéchatánné nsón ké nhóg míme mod ábélé, ééchatán-naá edāηge éche mod álúmté mós ngáne nyédii nyébenlé bad bé Dyõb bēmpēe.

* **6:2 Edusen:** echē edusen énkēmbáá edusen echē bédúsánná bad ábe bédúbpé Krístæ bēnpen. Bad bé Israel bõmpē bēnwõη elem éche bédúsánná bad, bédusán-ne bwēm bēmpēe.

11 Mmed nlém ndii nén bán nyé mod téé nyébê nyéwôñ ene kán kóñ ne á asóg ábel bon nyékude' chöm ésyāāl éche nyésúmé nlém áyāl bán Dyöb débe nyé.

12 Séēhēdēē bán nyébê bad ábe béehēdé chōmchōm ábel. Bon sēhēde' bán nyébê bad ábe béhīde' mekuu nīme bad ábe béwēsan áyāle bédúbpé Dyöb. Echē ndín é bad éküd chōm ésyāāl éche Dyöb áhóbé áá móḡbē bó.

Dyam áde Dyöb áhóbé déehidtéé áse

13 Se' bōód áde Dyöb dénhōbpē áá móḡbelé Abrahamē dyam, ammwé melē áá móḡngēnē áde akag alóned. Ade dīn dēn dōó ámmwēennē melē áyāle nén modmod eebédéé awē atómé mó awē áhélé'áá-se amwé melē áwe dīn.

14 Anhób áá,

“Nhóbé nén mēé, ntāngéné we anamed,
mēbēl-le nīmōñ mbyaa nībūū áte bwāmbwam.”

15 Abrahamē anwēsén ásūm-me nlém, né-ḡó anküd chōm éche Dyöb dēmbēennē mó akag.

16 Nzé mod amwág melē abēnlad dīn áde mod awē atómé mó. Mpentēn ké nīhéé-'ε nīmē bad béwōó'é, melē móó méyānle'.

17 Dyöb áhédé'áá ábē bad ábe ámbēé akag alúmed áte nén áá, móóhúdté dyam áde móhóbé áse. Né-ḡó amwé melē ásógtēn akag áde ábágé.

18 Né-ḡó Dyöb ábágé syānē mekan mébe nīmē méehāñlán áyāle Dyöb déehelēé-se ákal metóm. Abagé syānē akag, amwé-'ε melē. Ábelé nē ábel syānē awē dekīí áwē ábel ákāā syānē, déwōñ e'wéd bé nlém, désum-me nlém ne mekan nīme áhóbé áá móḡbē syānē.

19 Abē e'lyág bé nlém é'dīi néē chōm éche ébélé alongé ádēd ásúmnédé, ákoñéd-te. Ebē e'lyág bé nlém bóó békāñ bon detóm abad dé mmwe ámīn, dépe á abwóg á hōm áde áasá wēē Dyöb ádíi.

20 Yesue mó asébpé asól áhed á nló nīme syānē ábonḡsen syānē e'dii. Bōob atimé prise ámbáámbáá awēd awē adé á ngíndé melemlem néē Melkizēdege.

7

Melkizēdege abédé Prise

1 Melkizēdege abédé kññ e dyad á Salem, abé-'ε prise a Dyöb á Ngum. Ambomén Abrahamē áde Abrahamē áhúé'é á bel ábe ánwūū'é kññ é bad, ánāmēd-te Abrahamē.

2 Abrahamē-'ε ábe mó akab á bwēm ahóg áfíntē mekab mé bwēm dyōm nīme ánhūēnnē á bel. Dyam dé'sō, dīn á Melkizēdege á ehób é Hibru ádíi bán, “Kññ eche ebele mam nīme nítāngéné.” Atón áde álónténé mébe ádíi bán “Kññ e Salem,” awē adé “Kññ e nsañ.”

3 Eetenledéé hōmhōm nén bán Melkizēdege anwōñ sáá, ké'ε mbyaa. Béetele-'áá ngáne béchyáá mó, ké'ε ngáne áwédé. Adíi prise á ngíndé ne á ngíndé melemlem néē Mwān a Moonyon ádíi Prise á ngíndé ne á ngíndé.

4 Nyénōne-ḡó nyaa e ndāle e mod echē Melkizēdege abédé. Abrahamē, sáá ambáá awēd, ambē mó akab ahóg áfíntē e mekab mé bwēm dyōm nīme ánhūēnnē á bel.

5 Mbéndé e Mosē ebagé kunze nén bán bad bé mbyaa nīme Levi ábe bédé beprise békobe' akab á bwēm ahóg áfíntē e mekab dyōm téé, wēē ábāb bad bé Israel, kénéé émbēē bán bómpē bēbédéé mbyaa nīme Abrahamē.

6 Melkizēdege enkēmbídté á mbyaa nīme Levi, bon kéné ankōb akab á bwēm ahóg áfíntē e mekab dyōm wēē Abrahamē. Annaméd-te Abrahamē, Abrahamē awē Dyöb dēmmadté akag ábe.

7 Ebyééné nén bán mod awē anamte' mod atómé mod awē ánámté.

⁸ Bɔɔb-pɔɔ, prise éche ébidé á mbyaa míme Levi ábe békobe' akab ahóg átíntê e mekab mé bwēm dyôm, bésyāāl bédii baányonj ábe bēwāg. Boj Melkizεδεγε awē ankōb akab ahóg átíntê e mekab dyôm, adii mod awē eewéde, ngáne kálag e Dyōb élúmteé.

⁹ Dehele dehób bán Levi awē akobé'áá mekab wéε bad mwēn ámpē abagé akab wéε Melkizεδεγε mbwiined ne sáá ambáá Abrahamε.

¹⁰ Dehele dehób nê áyāle nén, áde Melkizεδεγε ákíí Abrahamε abomen, né béēchyāā'é Levi.

¹¹ Dyōb dēmbě bad bé Israel éche mbéndé á pónde echě bad bé túmbé e Levi bēbédé beprise á alonj á Israel. Nzé nsón míme ábē beprise bēbélé'áá ménkwognéd ábel bad békobned á'sō é' Dyōb, né nzom enkēmbáá echě prise ampée ábídeé née Melkizεδεγε awē eebíde á mbyaa míme Arone.* ¹² Nzé mpwεdtéd mé beprise ríhōnléné túmbé, né mbéndé chōmpē etāngéné ahənlən.

¹³ Mod awē ríhóbéé nímén mekan áyāl, ambíd á túmbé empée. Modmod eébidē-'áá awe túmbé mbéd awē abelé nsón míme prise.

¹⁴ Ebyééné bwām nén bán Sāngwéé awēd ambíd á túmbé e Juda. Moseε enkētúbpé dīn nén áá beprise bēbíd á túmbé e Juda.

Yesue adii née Melkizεδεγε

¹⁵ Dyam áde déhóbé tāngene ahənlən á mbéndé ábúdé anyinned ne abíd áde prise ampée ábídeé née Melkizεδεγε.

¹⁶ Saké mbéndé é baányonj chōó émběl boj abé prise. Boj adé prise áyāle awóó ngíne ábē á alongé abé ne abé.

¹⁷ Eténlédé á kálag e Dyōb nén bán,
“Edii prise á ngíndé ne á ngíndé,
melemlem née Melkizεδεγε.”

¹⁸ Nzé denoné pεd póg, Dyōb ásídté mbéndé é' bɔɔd á nkag, áyāle énkēnwúú'é áte, énkēnkwógnéd-taá.

¹⁹ Debíí nén bán mbéndé eébēlēε-se chōmchōm ébé ngáne étāngéné abé. Nzé denoné-'ε pεd eníní, chōm é bwām épédé échě ékáá boj dewōj e'lyág bé nlém. Chó-'áá épεene syánē benben ne Dyōb.

²⁰ Dyam démpēe áde débíí ádii nén, Dyōb démwē melě áá Krístəə ábē prise abé ne abé. Boj áde bēmpwεdté beprise bēmpēe, Dyōb dénkēmmwáá melě ké nhóg.

²¹ Boj áde Dyōb ápwédé Yesue prise, anhób áá,
“Sāngwéé amwédé melě,
éehúd-taá nímē melě ásē,

aá,
‘Edii prise á ngíndé ne á ngíndé.’ ”

²² Mmē melě mélúmte nén bán Yesue mó adé e'chemléd ábē é'lúmte syánē nén bán melě míme Dyōb ámwédé méehídtéé ásē.

²³ Beprise bé' bɔɔd bēmbuú áte áyāle nén kwééd ebelé'áá béehēle'áá nsón akεεn á'sō.

²⁴ Boj ngáne Yesue ádíí á alongé abé ne abé, ábē prise á ngíndé ne á ngíndé.

²⁵ Né-ɔɔ, Yesue akwōgnédé ásonj alongé á bad ábe bēpag wéε Dyōb áwe mbíd. Akwōgnédé ásonj bó ne asonj ásyāāl áyāle nén, adé á alongé pónde ésyāāl ákānned bó.

²⁶ Ehédnádttáá nén bán déwōj ene ndín e prise ambáámbáa awē asáá, mod eéhēlēε se ahób mó awusé ké hóg áyāl, eewóó'é atón á mbinde ké hóg á yāl, awē apágnédé bad bé mbéb áyāl, bēbānē-'ε mó ámīn e atii dé nkamlən ámbáá.

* **7:11 Arone:** Arone ambíd á tumbé e Levi. Mó abédé prise ambáámbáa e'só e bad bé Israel.

²⁷ Eesaá née beprise ábíníí ábe bétáŋgéné bébage mende epun-té. Abê beprise básébppe mende abe áyāle nímad mbéb, bon bébage mende áyāle mbéb mí bad bémpeē. Bon Yesue ambe yāl née mende áyāle mbéb mí bad. Ambēl-le nê ngen póg ne ngen ésyāāl.

²⁸ Mbéndé epwede baányon abé beprise bémháámbáa. Baányon bébele' mewusé. Bon Dyöb dêmpwēd awe Mwān ne melě áde amáá mbéndé abe. Abelé-'ε ane Mwān aköbnédé á ngíndé ne á ngíndé.

8

Yesue mó adé syánē prise ambáámbáa a melě mékōālē

¹ Atón áde sékoo' é ahób ádíi nén; dewóó ene ndín e prise ambáámbáa awě adyē é ekáá émbáá é atii dé nkamlēn á Dyöb á Ngum ámín.

² Abenle' Dyöb wēe bwēm ábē é'sáá é'díí á hōm áde akóó ebem é Dyöb abé. Sāŋ Dyöbe mwēn móo alóó échē ebem, saké baányon.

³ Bépweede prise ambáámbáa tēé ábe Dyöb nde ne mende mé elém. Né-óó, anén prise ambáámbáa mómpē atáŋgéné chōm awóŋ éche ábēé Dyöb.

⁴ Bōob-pōó, nzé émbē nén bán ambé á nkōŋsé, né éebáá prise ne abé dēn, áyāle nén beprise bédé ábe bébage Dyöb mende ngáne mbéndé éhedéé.

⁵ Nsón míme ábē beprise bébeleé nídíi née e'chemléd ne ediídinge é' mekan míme médé ádyōb. Debíí nê áyāle nén, áde Mosēe ahóbé aá mólōo' ebem é Dyöb, Dyöb dénsím mó etúu áte aá, "Nyín nén wēe mólōo chōm ésyāāl á yāl e échē ebem nyaa e nlóŋtéd eche ílúmté we á mbōod mīn." ⁶ Bon bōob, nsón míme prise míme bébágé Yesue rítómé nsón míme ábē beprise bé' bōód. Melemlem nê dōo nchemtēn míme Yesue ápééné átínté e Dyöb ne ábē bad, rítómé nchemtēn mé'sō míme bēmpéenné, áyāle nén, Dyöb ábágé bad akag aá móóbē bó bwēm é' bwām.

⁷ Nzé émbē nén bán melě mé'sō mēnkwoŋnéd ábel bad békobned á'sō é' Dyöb, melě mémpēe méehēdnad-taá.

⁸ Bon Dyöb dénnýin awusé ne ábē bad, anhób-pe aá,

"Me Sāŋgwéé nhóbe' nén mēé e'pun é' bīn é'húe
áde mémwēē melě mékōālē
ne bad bé Israel
ne bad bé Juda.

⁹ Mmē melě méebáá née melě
míme mémwēē

ne ábāb betaa
áde ríchōŋgé bó á ekáá
bon mbídén bó á alon á Egipto.
Bénkēnhídté míme melě.

Né-óó, menhúd bó díd áyāl.

¹⁰ Dyöb ahóbé ámpē aá,

Me Sāŋgwéé me-éé nhóbe'.

Bōob-pōó melě míme mémwēē ne bad bé Israel
á pōndé echē ehúe' á'sō médíi nén:

Mābēl bēbíí échēm mbéndé,

béwōŋ-'ε nlém áhíd chó.

Mēbē ádad Dyöb,

bó-'ε bēbē ábēm bad.

¹¹ Bó modmod éeyágédté waáb,
modmod éeláá-'aá mwānyon nén aá ábíi Dyöb,
áyāle bó moosyāál bēbīí me,
bootya básad, káŋŋ ne bémháá.

12 Μεέlagsén nímab mbéb,
méekamtén-naá nímāb mewusé.”

13 Ahób áde Dyöb áhóbεέ tângene melě mékō̄lē, álúmte' nén bán abelē melě mé nchun rítomé póndé. Chõm kéhéé éche étóme póndé, éche échune-'ε, mwāmpin ní póndé éebáá ámpē ne abé dēn.

9

Abele á Dyöb dé ekob é yāl ne abele á Dyöb dé Edáádān

1 Bōōb-pōō, káōn ne melě mé'sō ménwōn mbéndé éche béhídé'áá ábele Dyöb, bēnwōn-ge abwóg á hõm á nkõnsé wéε bebénlé'áá Dyöb.

2 Bēnlōn ebem éche énwōn toñ ébe. Toñ eché embé á'sō béchágé'áá chõ bán Hõm áde Asáá. Atii dé etrukán ábédé áwēd-te, tébele abé, ne ewele éche bebágé Dyöb mendε.

3 Abad démbē áde ákábé toñ e'só ne toñ embíd áte. Ene toñ eche ebédé ámbíd e abad béchágé'áá chõ bán Hõm áde Atómténé Asán.

4 A toñ-tē wē, menyán míme bebénlé gól míme béhyánté'áá e'twé ámīn ábe Dyöb edúbé mébédé áhed. Ntyág míme béchágé'áá bán ntyág mé melě mómpē níbédé áhed. Mmē ntyág bēnkūtēn mó pēd ésyāāl ne gól. A ntyág-te wē, apom á gól áde ábédé mána áte abédé áwēd-te. Ntón míme Arōne míme ménkāg byaá, níbédé áwēd-te. E'pēd é' meláá é'be ábe bēntenlé mbéndé áyāl bómpē é'bédé áwēd-te.

5 A ntyág mīn wē, bwēm é'bédé é'be, ábe bebélé á nwágén ní ángel, ábe é'lúmté'áá ehúmé é Dyöb. Mepab míme ábē bwēm ménkūtēn ebéd é ntyág wéε ábédé hõm dé alagsen dé mbéb. Bon ábē bwēm é'syāāl deéhēlē-se dékon bó ahób bōōb.

6 Bémáá'áá chõm ésyāāl anabe bon, beprise bésóle á toñ e'sō epun-té bebélé' nímab nsón.

7 Bon prise Ambáámbáa mwēmpen móō asóle á toñ eché edé áte. Asóle áhed mwē-té ngen póg. Eesóléé mbēd áde éewanléé mekií mé nyam ábe Dyöb mendε áyāl e mbéb nímē ne ní bad bēmpēe, míme bebélé ésebán bebíí bán bebélé mbéb.

8 Edáádān éche Esáá ébele nímén mam álúmed syánē áte nén aá, abenled áde dédii débēnladté ebem é nkõnsé, ábélé nzii eesaá syánē ápe á Ebem éche Esáá wéε Dyöb ádíí.

9 Eché ebem élúmte mekan míme mébenlad chii. Elúmte syánē nén bán ndε ne mendε mé nyam míme bad bebágé'áá Dyöb, méehelée-se mébel nlém míme mod awē abage mendε se ríkélé á abum.

10 Mmén mbeltéd nisyāāl nñone' dāsō adyé á ndyééd, amwé á mīm ne nyaa é mekan émpēe híin éché bad bebélé'áá ásáad yāl. Mmē mbeltéd rídii mbéndé e ekob é yāl ngēn, éche émaá á póndé eche Dyöb dénabéé mam mésyāāl.

Mekií míme Yesuε móō médé ndε eché esáá

11 Krístā amaá ápe. Móō adé Prise Ambáámbáa a mekan mé bwām míme mémáá ápe. Abele míme nsón á ebem éche étomé ebem é nkõnsé, élón-ne mbom tómaa ebem é nkõnsé. Saké baányon bēlóó éché ebem. Eesaá ebem éche edé á nkõnsé.

12 Ade Yesuε ásólé á ebem-tē wē, ansól áde Hõm áde Atómténé Asán ngen póg ne ngen ésyāāl. Saké mekií mé mbód ne mé nyag ânkeénné áwēd-te ábe mendε. Bon nímē mekií mēn móō ántēdtē. Ambenléd mó ákōde syánē á mbébe ábel débē á alongé á ngíndé ne á ngíndé.

13 Ngen e'só, bétédé'áá mekií mé mbód ne mé nyag, bétéd-te mbúmbú é etum é nyag éche béhyánté, bémwagtaád bad á yäl ábe béesáa á'só é' Dyöb, ábel básân.

14 Nzé édé nén bán mekií mé nyam méhele méwôñ ngíne ábel bad básân, né élúmte nén bán mekií míme Krístæa méwóó ngíne bwámbwam, eche ehéle esáád bad. Abagé eche yäl eche eewóo mbéb ké nhóg néε mendε, ákade syánē moosyāál. Ambel nén á ngíne e Edáádāñ éche Esáá éche édé á ngíndé ne á ngíndé. Mmē mekií móo mēsāñte syánē nlém á abum ábel nén deébēlē mekan mé mbéb míme mépiinéd syánē kwééd. Boñ pen detāñgéné Dyöb dé alongé abele.

15 Né-'áá ákáá boñ Krístæa abé mod atíntē a melġ mékōālē ábel nén bad ábe Dyöb ápwédé békud nnam míme mébē abé ne abé. Mmē nnam móo Dyöb áhóbé áá móōbġ ábe bad. Kwééd echē Krístæa áwédé chókāá boñ nén ábenlad. Eche kwééd ekōdté bad ásē e mbéb míme bēmbēnlé áde melġ mé nchun médii mékámllánnáá bō.

16 Bōōb-pōō, melġ médii néε nlyáge. Póndé ké ehéé áde mod alyágkεé, étāñgéné alúmed nén bán mod awē abele míme nlyáge amaá awé boñ behíde chōm éche ályágké.

17 Nén ádé áyāle nén, á póndé echē mod áwédé dōo míme nlyáge níbagkē ngíne. Méēbāgkē ngíne á póndé eche mod awe abelé míme nlyáge ádíí adé á alongé.

18 Nē dōo ákáá boñ ké melġ mé'sō míme Dyöb démmwēē ne baányon ménkēnwōñ ngíne ésebán mekií mésyógke.

19 Se' bōód, Mosεε anláá bad mbéndé ésyāál éche Dyöb dénhōbpē áá bad behíd. Ade áamáá bō aláa, antéd mekií mé nyag ne mé mbód, ákumtén ne mendíb. Ambēnléd ngen e bwel é' hísōb ne nyon é mbód éche éyāge', ámwagtéd míme mekií á kálag eche mbéndé ébédé áte, ámwagtéd-te bad á yäl.

20 Ade áamáá míme mekií amwagted, anhób áá, "Mmén mekií móo mélúmte' nén bán melġ mé Dyöb méehāñlánné."

21 Melemlem nē dōo Mosεε ámmwagtédte míme mekií ámín e ebem é mendε, ne ámín e bwēm é'syāāl ábe bēbēnládtáá ábe mendε.

22 Á mbále, émbē nén bán á mbéndé, chōm ké éhéé éche bémwagtédé mekií áyāl chōo bad bétédé'áá bán ésáá. Mbéb-pe méewóo'ε alagsen ésebán mekií mésyógké.

*Krístæa eche yäl echē ábágé
néε ndε chōo ehúdé mbéb*

23 Né-ōó, nén dōo dēnkāñ boñ ebem é nkōñsé né bwēm é'syāāl ábe é'dé áwēdte básāñtē bō ne mekií mé e'lém. Abē bwēm é'syāāl é'bédéε nwágen mé mekan míme méde ámín míme mékōñté abé. Boñ ábē bwēm ábe é'dé ámín, bēntāñgēñ néε básāñtēé bō ne mekií míme métómé mekií mé e'lém.

24 Krístæa enkēnsónlé Hōm áde Asáá áde baányon bóbó bēbélé, áde ádé á nwágēñ á hōm áde ákōñté abé. Adyōb dēñ dōo ānkεé asól. Ankġ-ε áwed nēñgāne mod awē áhōbpe' syánē wéε Dyöb.

25 Enkēnkāá-'áá áwed ábe yäl néε mendε ngen ne ngen. Enkēnkāa nēñgāne prisε ambáámbáa ákagké mwġ téé á Hōm áde Atómténé Asāñ ábe mendε mé mekií mé elém. 26 Nzé néε émbēē, né Krístæa antāñgēñ néε átagεé ngen ne ngen taase nkōñsé míbootad. Boñ chō-'ε enkēmbáá nē. Krístæa ampġ ngen póg ne ngen ésyāāl bōōb áde nkōñsé níkagké ape á asóg. Ambġ eche yäl nēñgāne mendε áhúd mbéb mí baásyāāl.

27 Nē dōo moonyon asyāāl átāñgéné awé ngen póg, boñ ámbíd e póndé ákud nkáásé ní Dyöb.

28 Melemlem nê dóo Krístæa ábágé eche yǎl ngen póg ne ngen ésyāā́l áhúd mbéb mí bad híin. Apě-’ε ngen éche élonťéné ébe, saké áhúd mbéb mí bad, bon apě áson alongé á bad ábe básine mó.

10

*Krístæa ábágé eche yǎl
ngen póg ne ngen ésyāā́l*

1 Mbéndé éche Dyöb dēmbēé bad bé Israel ébédéε ngēn nēngáne nwágén mé mekan mé bwám míme méhúε’ á’sō. Echē mbéndé éehelée-se ékon syánē alúmed ngáne míme mekan mébēē. Beprise bébage’ Dyöb mendε abε ne abε, mwě ne mwě-té. Chán-nō échē ndín é mbéndé éche bébageé échē ndín e mendε éhele ébēl bad ábe bédé benben ne Dyöb básán? Ehelée.

2 Nzé émbē nēn bán bēhélé’áá, né bēnkēnsógké Dyöb mendε abε-yε? Né bēnsōg áyāle nēn né bad ábe bébage Dyöb mendε básáá’áá ngen póg ne ngen ésyāā́l, né béetage’áá-’ε áte bán bēbélé mbéb.

3 Bon míme mendε mēn-εé métímé mékamtan bad mwě ne mwě tée nēn bán bēbélé mbéb,

4 áyāle nēn mekií mé nyag ne mé mbód méehelée se méhúd mbéb mí bad mbéd.

5 Nēn dó-’áá dēnkǎn bon áde Krístæa ápédé á nkōnsé-te aláá Dyöb áá, “Saké mendε ne ndε éhedée.

Ebōnséné me yǎl e moonyon echē mébēé we nēε mendε.

6 E’lém ábe béhyánté á menyán, mendε-’ε ámpē míme bad bébageé we áhúd mbéb mí bad, béēwōgtēε we menyinje.

7 Dó-’áá nhóbēé mēé,

‘Me nēn A-Sán,

mbōnséné ábel ngáne éhedée

melemlem ngáne étēnlédé áyāl echēm á kálag echōn.’ ”

8 Ansébé ahób áá, “Saké mendε ne ndε éhedée saá-kaá e’lém ábe béhyánté á menyán áhúd mbéb mí bad é’wōgte we menyinje” kénéε édíi nēn bán bad bēbélé’áá mímén mekan ngáne mbéndé e Mosεε éhedée.

9 Ambé ambád áá, “Me nēn A-Sán, mbōnséné ábel ngáne éhedée.” Né-óó, Dyöb ásídté mendε mé’ bōód á nkæg ábel bon átimed mendε míme Krístæa.

10 Akwēnten áde Yesu Krístæa ákwēnténé ábel ngáne Dyöb áhedée bon ábe eche yǎl nēngáne mendε, ábélé syánē desáá á’sō é’ Dyöb ngen póg ne ngen ésyāā́l.

11 Nsón míme beprise bé Israel nídií átyéem ábe Dyöb mendε mehóg ne mehóg epun tée. Mmén mendε mó-’ε méehelée se méhúd mbéb mí bad mbéd.

12 Bon Krístæa pēn abagé mendε mehóg míme méwóó ngíne áhúd mbéb mí bad ngen póg ne ngen ésyāā́l. Ambíd enē, andyéé Dyöb á ekáá émbáá.

13 Ahed-taá ádyée ásin póndé echē Dyöb débēnlé bon ákōgtéd ábē bad bé ekōyí ámín ne mekuu.

14 Áyāle mendε mehóg mwēmpēn míme ábágé, ábelé bad ábe áhúdé mímab mbéb básáá nyaa eche elóné mbon.

15 Edáádān éche Esáá chómpē élúmté syánē áte nēn bán nē ádé mbále. Enhōb áá,

16 “Sángwée ahóbé áá

‘Mmén melě móó syáābōó sémwēε

á póndé echē ehúε’ á’sō.

Mēbēl bēbíi échēm mbéndé,

míbel-le ngáne béechaténne chó mbéd.’ ”

17 Anhób ámpē áá,

“Méekamtén-naá mbéb
ne mewusé mímāb ámpē.”

18 Dyöb áamáá bad mbéb alagsen. Mendε ké mehóg méesaá ámpē míme bad bétāngéné abε ákud alagsen dé mbéb.

Syánē dépe benben ne Dyöb

19 Né-ǎǎ, a-baányan dewóo kunze ásol ádé abwóg á Höm áde Atómténé Asán.

20 Yesue adibnéde syánē nzii e ekóólé echě epεene' alongé abε áde ábágé eche yāl. Eche yāl edé nēngáne abad áde dénkān syánē ápe wée Dyöb ádíí.

21 Syánē dewóo ndale e prisε awě anone' bad bé Ndáb e Dyöb.

22 Né-ǎǎ, syánē désíde benben ne Dyöb ne nlém nhóg, désum-mε nlém rísyāāl áwē. Nén ádé áyāle mekií míme Yesue ásyógé á awog, mébélé nlém ríkénlé syánē á abum, awöbpé-'ε syánē ne mendíb míme mésáá áte.

23 Déwéd adúbe áde dédúbpé achāned, désum-mε nlém áhed, áyāle dedúbpé nén bán Dyöb áde ábele dyam áde áhóbé áá mósǎǎl, éche ehób éehūnēē á ndǎǎb.

24 Dénan ngáne déhele dewéd nhóg ne aníníí nlém á abum, ábel dédāen débēle-'ε mekan mé bwām.

25 Deebág bán deébōmēē pónde ésyāāl ngáne donge á bad bébeléé. Bon pen débē déwéde' nhóg ne aníníí nlém á abum, tanje bǎǎb áde nyényíneé bán Epun éche Sāngwéé ápeé édé benben.

26 Nzé dedíí dekaa' mekan mé mbéb ábel áde démáá mbále abíí, né mendε ké mehóg méesaá ámpē míme méhūd mímē mbéb.

27 Bon nzé mod adíí akoo' mbéb ábel, né mbwóg móǎ mébē mó áte nén áá Dyöb dékwid mó nkáá é Epun é Nkáásé. Béhyāād mó á ebonde é muú é ngíne échě éhyāād bad ábe bétāngan Dyöb.

28 Kénzéé awě eehídé' mbéndé eche Moseε, bon bad bébe ké'ε beláán bébíd mbón nén bán eehídéé mbéndé, bébelé béwúú mó, béewōgēē-'ε mó ngol.

29 Nzé mod-te eetéde Mwān a Dyöb née dyam, eetéde mekií mé melě mé Dyöb míme mébéle bon asán née dyam, ásyāā-'ε káāne Edāádān eche epεene nsimé, né chán nkógsen míme ene ndín e mod ríhele ríbé?

30 Debíí mod awě anhób áá, “Mékāgsen bad. Mētímtén bó áyāle mbéb míme bébéle.” Anhób-pe ámpē áá, “Sāngwéé ákāād ábē bad.”

31 Edé ebébtéd ne kénzéé awě ahúné á mekáá mé Dyöb dé alongé ákud nkógsen.

32 Bon nyéēchatán ngáne nyémbēē-se á mbooted áde nyékúde e'nyínen bé ekíde. Ene pónde, kénéε nyēnkudté metake mé ngíne, nyēnkan nlém.

33 Pónde ebédé echě bad béwógté'áá nyé e'són á'sō é' bad, bétagté-'ε nyé. Donge á pónde ámpē nyébágé'áá ne bad ábe békúde échē ndín é metake.

34 Nyēwēnnádtáá bad ábe bémbē á mbwog. Ké áde bēndummé nyé bwēm, nyēmbé nyēbé menyiņge, áyāle nyēmbíí nén bán nyēwóo bwēm ábe é'tómé nē ábe bébē abé ne abé.

35 Né-ǎǎ, nyébē nyéwéd nlém á abum, áyāle nén Dyöb ábage nyé nsábe míme ríchábé ámín.

36 Nyétāngéné awεsen ábel nén nyébel ngáne Dyöb áhedeé, nyékud-te chōm éche Dyöb áhóbé áá mósǎǎ nyé.

37 Eténlédé á kálag e Dyöb nén bán,
“Mwāmpín mí pónde,
mod awě atāngéné ape, ápě,
éebébed-taá pónde.

38 Abēm bad ábe bébele mekan míme mé tāngéné
bébē á alongé áyāle bédúbpé ábēm e'yale.

Boη pen kénzée awě atimné mbíd,
méewógénné mó menyinje.”

³⁹ Syánē pen deesaá nyaa é bad éche étimén mbíd ébóó-’ε. Dedii bad ábe bédúbpé Dyöb, békúdé-’ε e’soósonj.

11

Adúbe

¹ Adúbe ádíi áwónj nlém wεé móskúđ chöm éche mósúmé nlém áyāl. Amad nén wεé chöm éche móñnyínnē díd ékóó abé.

² Adúbe áde bad bé’ bóóđ béndübēē Dyöb dóo dēnkǎj boη Dyöb ábéén bó menyinje.

³ Adúbe dóo ákáá boη desójtén nén bán eyale é nsal chóo Dyöb áhagné nkõjsé. Né-óó, bwēm ábe dényínnēé díd é’húú ne chöm éche déēnyínnēé díd.

⁴ Adúbe dóo dēnkǎj boη Abεε ábe Dyöb mende mé bwām níme méntōm níme Keenε ámbεé Dyöb. Adē adúbe dóo dēmběl boη Dyöb ábéén mó menyinje née mod awě abεle mekan níme métǎjgéné. Nén dényínnēd ne akob áde Dyöb dēnkobpé mende níme Abεε. Adúbe dó-’aá ákáá boη, kénéε ámáá awě, abé álǎngē bad mam.

⁵ Adúbe áde Enǎge dóo dēnkǎj boη eenyínne’ kwééd díd. Boη pen Dyöb dēnkéén mó ámīn, bēnkēnyín-naá mó ámpē. Eténlédé nén bán, byánán Dyöb dékéén mó ámīn, abel’áá mekan níme méwógté’áá Dyöb menyinje.

⁶ Modmod eéhēlēē-se awógéd Dyöb menyinje áde éedúbpeé Dyöb. Nén áde áyāle kénzée awě ahede ape benben ne Dyöb, atǎjgéné adúbe nén aá Dyöb áde, adúbe-’ε aá Dyöb désābē bad ábe béhede mó abíi.

⁷ Adúbe dóo dēnkǎj boη Noa awógén Dyöb áde Dyöb dénlāā’ é mó mam níme mébenléd á’sō é’ pónde. Kénéε edíi bán pónde eched enkēnyínnē nímē mekan díd, amběl ngáne Dyöb dénlāā’ é mó. Anlónj bǎle é’mbáámbáa. Awēd-te dóo bóóbe adē abum á ndáb bēnsōnlē békúd-te e’soósonj áde mendíb ménlōnnē nkõjsé áte nisyāal boη chöm ésyāal éhó. Abel áde Noa ámbenlé nē, dénlūmēd bán mbeltéd mí bad bé nkõjsé nídé mbéb. Adúbe pen áde Noa ánwōngē dēmběl Dyöb déntēd mó née mod awě abεle mekan níme métǎjgéné.

⁸ Adúbe dóo dēnkǎj boη Abrahamε awógén Dyöb áde Dyöb dénlāā’ é mó aá áhide á dyad wεε ábédé, áke hōm démpēe á mbwóg eche Dyöb dēmbõjsénné mó abε. Anwógén Dyöb ákē-’ε, kénéε énkēmbíí’ é wεε ákagké.

⁹ Adúbe dóo dēnkǎj boη áke ádyēē á mbwóg echē Dyöb dénlāā’ é mó aá móhābē móó móóbe mó. Ambé áwed née nken. Aisige bó Jakob bómpē bedyéé’áá á e’bem-tē. Dyöb dénlāā’ bómpē melelem ngáne ánlāā’ é Abrahamε.

¹⁰ Abrahamε adyεé’áá á e’bem-tē wē ásine’ pónde eche ádyεé’ é á dyad ámbáá áde ásúmnédé, áde Dyöb dēn átíidé boη alónj-’ε.

¹¹ Adúbe dóo dēnkǎj boη Seraa abé nkog kénéε ámmadté kād e achád atóm. Andúbé nē áyāle andúbé aá, nzé Dyöb áhóbé aá móóběl dyam, abelé alóned dó.

¹² Né-óó, kénéε Abrahamε ámmadté achun bwāmbwam nyaa echē éhele’áa-se achyáá mwān, nchyaátén nisyāal ménhūū ne mó. Mmē nchyaátén mēmbuú áte nēngáne betintine ábe bédé ámīn, mbūū-’ε áte nēngáne nsíi níme nídé á nkǎg mé edíb é nkwě, níme béehelée-se bétónj.

¹³ Abē bad bé’ bóóđ, bēnwōj adúbe káájne á kwééd. Kénéε bēn bēnkēnkudté chöm éche Dyöb dénlāā’ é bó aá móhābē móó móóbe bó, boη bēnyín ábē bwēm nchabnede bēwógen-ne bó menyinje. Bēnkēmbán-gaá ahób bán bédii beken ábe béewóo hōm áde bedyεé’ é á nkõjsé-te.

¹⁴ Bad ábe béhóbe échē ndín é mekan bélúmte nén bán béhede hōm áde béchǎgké ádāb.

15 Nzé bédii békámtánnáá wée bémbídtē, né bēnhēd nzii átim ámbíd.

16 Bon bēntīm bēhédé dásō mbwóg éche eboó, nédē mbwóg e ekombe é mīn. Né-óó, Dyöb déēkwāgnēē bó nzé béchágé mó bán ádāb Dyöb, áyāle amaá bó echab mbwóg abon̄sen.

17 Kénēē édíí nén bán Abrahamē mós Dyöb dénlāā'é aá bán bébuú mó áte, adúbe dós denkǎḡ bon abé mbon̄sén ábe Aisigē awē abédé mīmē mp̄om mí mwān nēe mende áde Dyöb ákágé mó.

18 Aisigē mós Dyöb dénlāā'é Abrahamē aá, "Mbwēen ne Aisigē dós ncháátén míme rílánḡe we mēé wēkūd mébídtē."

19 Abrahamē andúbé aá Dyöb áwóó ngíne ápuud ké mod awē amaá awē. Né-óó, dehele dehób bán Abrahamē ankūd Aisigē ámbíd áde ápuúdé.

20 Adúbe dós denkǎḡ bon Aisigē ahób aá Jakōbe bó Esao békūd nnam pónde éche ehúe' á'sō.

21 Ade Jakōbe ádíí benben ne kwééd adúbe dós denkǎḡ bon ánāmēd mwāntéé awē Josebe. Anwúlén á ntón míme átōmneé, ábe Dyöb edúbé.

22 Ade Josebe ádíí benben ne kwééd, adúbe dós denkǎḡ bon ahób á'sō é' pónde aá bad bé Israel bēbíid á Egipto. Dó-'aá denkǎḡ bon alágtén ngáne bétāngéné mīmē ndim abel.

23 Adúbe dós denkǎḡ bon Mosēē sáá bó nyan békōó mó á etūn é ngon éláán áde bémáá mó achyáa. Bénnyīn nén bán Mosēē aboó elóon bwāmbwam, bēnkēmbāḡ-gaá ábóo mbéndé éche kǎḡ éntōmēdtē.*

24 Adúbe dós denkǎḡ bon áde Mosēē ámáá akwōḡ, enkēnkwentén aá béchāge mó bán mwān awē mwān a mmwáád awe kǎḡ e Egipto.

25 Ankwentén ákud metake ne bad bé Israel tómaa áwóg bwām á mbeltéd mé mbéb-te á esón é pónde.

26 Ne mó, annyīn nén aá ákud akwágké á nló míme Ane-awē-Bésineé, áde nsábe míme rítómé nhon rí Egipto rísyāāl. Ambel nē áyāle asiné'áá nsábe míme Dyöb débeé mó á pónde eché ehúe'.

27 Adúbe dós denkǎḡ bon Mosēē áhídē á Egipto ésebán abáa' meliḡá míme kǎḡ e Egipto. Ankan̄ nlem abé áke nēḡgáne mod awē anyíne Dyöb áde mod éēnyīnnēē díid.

28 Adúbe dós denkǎḡ bon atíi Ngande e Nnyíme-ámin. Anláá bad aá bēmwagted mekií á mmwe mé e'kob ábel bon nzé ángel e Dyöb epedé áwúu bán bé'sō, eewúē' bán bé'sō bé bad bé Israel.

29 Adúbe dós denkǎḡ bon bad bé Israel bēchābē edíb é nkwē éche béchāgeé bán Edíb é nkwē éche Eyāge'. Bēnchabé chó byánán békag á ndōob mīn. Bon áde bad bé Egipto bēhóbé bán bómpē béchabe, bēnhō.

30 Adúbe á bad bé Israel dós denkǎḡ bon e'ké ábe bēnlāḡned dyad á Jeriko é'kwē áde bad bé Israel bēhyómnédé bó epun saámbé.

31 Adúbe dós denkǎḡ bon akwalee awē béchágé'áá bán Rahabe enkēnwé áde bad ábe bēnwūen Dyöb nló áte bēnwēē. Nén dēmbēnléd áyāle ankōb bad bé Israel nken áwe ndáb, áde bēlómé bó áhye dé anōn dyad áte á mesōom-tē.

32 Mbē ríkg á'sō-yē? Pónde eesaá eché ríhele nláá nyé mam áyāle bad nēḡgáne Gidionē, Baragē, Saamsinē, Jeftaa, Dabide, Samwēe ne bekal bé edāádāḡ bēsyāāl?

33 Adúbe áde ábē bad dós denkǎḡ bon bétóm melon̄ áte míme bósōbō bēnwān bel. Bélyágté'áá bad ábe bēbédé ásē echáb nyaa eché etāngéné. Bēnkūd-te bwēm ábe Dyöb dénhōbpē aá mósbe bó. Bēnkāḡ nsəl rí ngii.

34 Bēndīmēd e'bondē é' muú. Bēmbíd á mekáá mé bad ábe bēhédé'áá bó páá awúen. Kénēē á mbooted bēnkēnwōḡgé ngíne bon Dyöb dēmbē bó ngíne,

* 11:23 Kǎḡ e Egipto éntóméd mbéndé aá bēwúu bán bé baachóm bēsyāāl ábe béchyáá ekóólé ábe bédé mwē mibe átimé ásē.

bébédeé sánze é ngíne béwanne' sánze é melonj mémpēe, éche sánze étōmē' mehélé.

³⁵ Adúbe dōo dēnkān bonj donje dé bebaád anyín nēe ábāb bad ábe bēmmāđ awé bétímé ámbíd á alongé.

Donje á bad pen bēnkūd mbéte káánj béwé. Bēnkēnkwenténné Dyōb abánj á yāl ábel bétēde bó. Bēmbel nē áyāle bēmbīi bán bēpuú békūd alongé áde áde bwām tómaa dé nkōnsé.

³⁶ Donje démpēe dēnkūd metake, awel áde bad béwéláá bó, bēbōmé-'ε bó. Bēnhān donje béhé-'ε bó á mbwōg.

³⁷ Donje ábédé áde bēnwūēnnē meláá, bēmpēe-'ε bésél bó áte e'sónj é'be. Bēnwūēn bēmpēe páá. Abē bad béwáá'áá e'kob é'mbód béhyāmnē'. Bēbédeé betóótōkē bé bad, békudé' metake, békudé-'ε ndutul á mekáá mé bad bé ekoyí.

³⁸ Eehēdnád-taá bán bad bé bwām nēe bó bēbē á nkōnsé mé mbéb wén. Bétámnádtáá á ehyānje ne á mbōod mín, bēdyéé' á e'láá-tē ne á e'lóm-tē.

³⁹ Adúbe áde ábē bad bēsyāāl dēnkān Dyōb ábéén bó menyīnje. Bonj ké nē, bēnkēnkudté chōm eche Dyōb dénhōbpē áá móōbē ábē bad.

⁴⁰ Nén démbē áyāle Dyōb dēmmad atii áá móōbē syānē chōm éché étómé chōm éche ánhōbpē áá móōbe bó. Antíi nén áá, nchoo ne syānē dōo ábē bad békwognédté áwe e'só.

12

Dyōb dōo áde syānē Sáá

¹ Ngáne édíi-'áá bán enén ndun e mod elājnédé syānē edé-'ε mbónj, tānjene adúbe áde déwóó, detānjéné desidéd kéchéé éche ékáā syānē nzii á nkāg, détedē-'ε mbéb míme ríháá syānē. Detānjéné nēe dékáá nlém ānyaged mehélé míme Dyōb áhóbé áá dényaged.

² Detānjéné nēe désúmé mīd wēe Yesue mwēn, áyāle mó alyágte syānē áwónj adúbe. Mwēn-naá áwōngēn syānē káánj dépid-te dó á asóg. Ankwentén áwé kwéed e e'sónj á awōg, enkēntéd-taá ádé akwágké nēe dyam ábel nén ákud menyīnje míme Dyōb ákōjnédé mó. Nē ábélé-'ε bōōb, adyéé á ekáá é mbáá á atii dé nkamlēn á Dyōb.

³ Nyékamten ngáne Yesue ánkwenténné metake akud á mekáá mé bad bé mbéb ábe bēnkōó mó. Nyékamten míme metake ábel bonj nyéekómé', nyéedūlē-'ε mekuu ámbíd.

⁴ Nzum eche nyéwanéé ábóded mbéb, eépédéé ndágke eche nló mímmēn ríhele rítóm.

⁵ Nyéēchatán e'yale ábe Dyōb dēmbēnlédté áwéd nyé nlém á abum, achāg áde ánhāgké nyé áá ábe bán. Anhób áá, "A-mwān, nzé Dyōb ákánné wē áte áyāle mbéb míme ébélé, etéd míme nkáne áte nēe dyam dēn. Nzé Dyōb ákógséné wē, yāl eehóó' wē áte.

⁶ Bíi nén wēé mod awē Dyōb ádáá, móó ákánnéé áte. Mod awē átédé nēe awe mwān, móó ákógsanné."

⁷ Né-óó nyéwesēn míme nkógsēn áyāle nén, rílúmte nén bán Dyōb átédé nyé nēe ábe bán. Mwān ahéé adé awē sáá éekógsānnē áyāle awusé áde ábélé?

⁸ Nzé nyéekūdē nkógsēn áyāle mbéb míme nyébélé ngáne bán bé Dyōb bēsyāāl békudéé, né nē álúmte' nén bán nyéekoo'é bán bé Dyōb abé. Né nyédii bán ábe béchyáá á asón.

⁹ Nzé ábēd besáá bé nkōnsé béhele békógsēn syānē áyāle mbéb míme débélé, débagé-'ε bó edúbé, né detānjéné Sáá awēd awē adé ámín edúbé abe tómaa nē, ábel débē á alongé.

10 A esón é pónde dóo ábēd besáá bé nkōnsé békógsanné syánē, kéchán áde ébónnéde'-ε bó dóo bébeléé. Dyōb pen ákógsan syánē áwōngēn syánē ábel nēn débē bad ábe besáá ngáne mwēn ámpē ásáá.

11 A pónde eche dékúde nkógsen, dewóge mbéb áte, deewógeé bwám. Bon ámbíd e pónde, kenzéé awē nímé nkógsen ní'yágté debyéé, abelé abé nsaη, ábelé-'ε mekan míme métāngéné.

12 Né-óó, mekáá míme mēmmad nyé achii áte, nyéwéd mó áte. Nyéēmwāg-ke se mekuu mésāgē nyé ásē.

13 Nyébē nyéhíde' nzii echē etyéémé ábel nēn bad ábe bésyagte', béenabpé eped atim, bon bédyεε bwám.

Elébé áwógen Dyōb

14 Nyéwan áte ábé nsaη ne moosyáál. Nyéwan-ne áte ámpē áwōn abé áde ásáá, áyāle ésebán mod asáá, eéhēlē-ε anyín Sāηgwéé.

15 Nyényín nēn bán nyé modmod nyéebó'ε nsimé ní Dyōb akud. Nyényín-ne nēn bán nyé modmod nyéesaá nēngáne mbál mé mbéb míme nzé níkwóge mbélé mpxēn ndutul, mbébed-te mbál mémpēe.

16 Nyényín-ne nēn bán nyéekábéé mesón, nyéēbélé-'ε mam néε bad ábe béwōne Dyōb pónde ngáne Esao ámbenlé. Esao ansóm kunze echē ánwōngē néε mwān a'só á etútú é ebwog é ndyééd ehóg.

17 Nyébíí nēn bán, ámbíd e nē, Esao ahedé'áá aá sáá ánamed mó, bon sáá ambāη mó anamed. Kénéε ánchií'ε bwāmbwam, nzii enkēnbáá áhāηen dyaη áde dēmbenléd.

18 Nyékamtēn nēn bán hōm áde nyétyéémé bōb ádíí á'sō é' Dyōb. Nyéetyéeméé nēngáne bad bé Israel bentyēēmē benben ne mbōd e Sinai e nkōnsé echē muú ní ngine mbíde'áá ámín. Adē bentyēēmē áhed, ngāηen e ehíntēn embé áhed, bīn é'sūdēn áte, ekukud é ngine-'ε étōme'.

19 Bénwōg esaád é eloη, bēwōg-ke ehób. Mbwóg ní ngine ménkōb bó. Bénchāη Dyōb nēn bán eehóbé' ámpē.

20 Bénchāη Dyōb nē, áyāle dyaη áde ánlāā'ε bó aá bébel dénwōgēd bó mbwóg bwāmbwam. Anhób aá, "Chōmchōm éekidtán enén mbōd. Nzé ké nyam ekidténé chó, bélúm chó meláá káāη ewé."

21 Mekan míme bēnyínnē ménkōbēd bó mbwóg bwāmbwam. Mbwóg ménkōb káāηne Mosεε. Anhób aá, "Mbwóg rīnāηte mε."

22 Bon nyépen, nyépedé benben ne mbōd e Zayōn. Nyépedé bōb á dyad áde Dyōb dé alongé. Adē dyad ádíí Jerusalem awē adé ámín. Awēd-te, ángel bííb, éládné áte ne menyīnge.

23 Nyémpē nyépedé á nlatén mí bán bé'só bé Dyōb ábe Dyōb átélé mín ádyōb. Nyépedé wéε Dyōb áde ákáadte' moosyáál. Nyépedé átínté e e'dáádāη ábe bad bé bwám ábe Dyōb ábelé békwógnédé.

24 Nyépedé wéε Yesue awē adé mod atínté a bad ne Dyōb á melē mékōlē. Nyépedé bōb wéε Yesue ámwágtédé nyé míme mekií. Mmē mekií mébágé syánē nsimé tómaa mekií míme Abele. *

25 Nyényín nēn bán nyéekōnléé Dyōb metúu tāngene dyaη áde álāngéé nyé. Bad ábe bēnkēnwógen mod awē Dyōb dēmbanéé á nkōnsé-te áléb bad, bēnkūd nkógsen. Ngáne bēnkudté nkógsen, syánē ámpē detāngéné nkógsen akud nzé deewóge elébé éche ébíde ádyōb.

26 Bōd áde ánhōbpē akan, nkōnsé ménsāgnēd ásē. Bōb-pe ahóbé nēn aá, "Mābēl nkōnsé rísāgnéd ámpē. Saá-kaá nkōnsé mwēmpen ménsāgnēd, mēbēl káāηne ekombe é mín chómpē ésāgnéd."

* 12:24 Mekií míme Abele méhede' metuuten, bon mekií míme Yesue mépεene dāsō alagsen.

²⁷ Ahób áde áhóbé aá, “Ampē” álúmte’ syánē nén bán Dyöb déhūd bwēm ésyāāl ábe bésāgnéd ásē. Abē bwēm é’díi bwēm ábe áhágé. Abēl nê âbel bon bwēm ábe béésāgnéd é’lyag.

²⁸ Né-ᵛᵛ, désāgnen Dyöb áyāle nén abagé syánē mbwóg echē mod éehéléé-se aságéd ásē. Désāgnen Dyöb, débage-’ε mós edúbé nyaa echē éwōgéd mós menyinge. Débēle-’ε nê ne mbwóg ne edúbé ésyāāl.

²⁹ Ne mbále, Dyöb ádēd ádíi nēe muú míme nhýānte chōm ésyāāl.

13

Abé áde áwōgte Dyöb menyinge

¹ Edānge é Bad bé Krīsto ébê ékag á’sō átínté echên.

² Nyéebág bán nyéekobéé bad beken pónké ésyāāl. Donge á bad békékōb ángel nken, áde béébíi’ é bán ángel chōó édé.

³ Nyékamtēn bad ábe bédé á mbwóg. Ebē byánán nyāābōo nyédé áwed. Nyékamtan-ne bad ábe békude metake ásē e bad bémpeē. Ebē byánán nyémpē nyékude’ míme metake.

⁴ Mod-téé awē adé á ndáb e’wóngé ábage e’wóngé edúbé. Mod eekábé mesón á ebwóg. Nyéēchatán nén bán Dyöb dékāād bad ábe débēle’ e’tongé é’ mekan ne ábe békábe mesón.

⁵ Nyéēsūmē nlém áyāle edānge é mōné, nyébé-’ε menyinge ne kéchéé éche nyéwóó áyāle nén Dyöb áhóbé aá, “Méechenéé nyé mbéd, méebān-’aá nyé áyāl.”

⁶ Né-ᵛᵛ, dehēle dehób ne nlém rīsyāāl nén bán,
“Dyöb dōó adé nwōngene awēm,
méebāngé dyamyam,
chéé moonyon áhēle ábēl mē?”

⁷ Nyékamtēn bad ábe bélyágté’áá nyé bōód, ábe bēnkale nyé eyale é Dyöb. Nyényín nsón míme abé ádāb ábélé. Nyéhíd mímb mekuu, nyédúbe ngáne bōmpē bēndūbēē.

⁸ Yesu Krīstā adé melemlem pónké ésyāāl. Ngáne ámbēē chān, nê dōó ádíi chíi, nê dō-’aá ábēē abé ne abé.

⁹ Nyéēmwāg-se ayāge ké áhéé áde áde nhənlén áhənlén nyé nlém á abum. Ebóó nén bán nsímé n Dyöb múmó ríwéde nyé áte saké mbéndé tāngene adyé dé medyé. Echē mbéndé éēwōngānnē bad ábe bēhíde chó.

¹⁰ Dewóó menyán mé mēde míme beprise ábe débage mēde á ebem é Dyöb béewóó’ é kunze ádyé chōm áhed.

¹¹ Prīse ambáámháa, abage Dyöb mēde áyāle mbéb mí bad. Abélé atéd mekií mé nyam é mēde asólen mós á Hōm áde Atómténé Asān. Bébélé bétéd ndím rí nyam pēn, bēbídén ámbíd e eyáde béhyáád mós.

¹² Nê dōó dēnkān bon Yesuē ámpē átag, awé ámbíd e e’ké é’ dyad ábel bon míme mekií mébel bad bésān.

¹³ Né-ᵛᵛ syánē ámpē déke détān mós ámbíd e eyáde ábel bon syánē ámpē dékud e’són ábe ánkudté.

¹⁴ Déke détān mós áhed áyāle nén deewóó’ é dyad áde ásúmnédé á nkōjsé-te wén. Bon desumé nlém ábē á dyad áde áhúe’ á’sō.

¹⁵ Né-ᵛᵛ, débē dékene Dyöb mbwiined ne Yesuē. Mmēd mekenag mébē nēngáne mēde míme débageé Dyöb. Dékag dékale’ nén bán mós adé Sāngwéé.

¹⁶ Nyéēchatán nén bán, nyétāngéné bwām ábel wēe bad bémpeē. Kéchéé éche mod áwóó-’aá, áwōngan nhóg ne aníníí. Echē ndín é mēde chōó éwōgte Dyöb menyinge.

¹⁷ Nyéwógne bad ábe bélyágte nyé, nyésuded-te yǎl ásē e nkamlen nímāb áyāle bóo bēnōne nyé. Bětyēēm-me á'sō é' Dyōb álāa mó ngáne bēnóné'áá nyé. Nyéwógne bó ábel bonj bēbē menyīnge ânōn nyé. Esebé nê, né bēwōg ndutul ânōn nyé. Né nê déewōngén-naá nyé.

¹⁸ Nyékānnad sé. Sēbíi nēn bán nlém ríkénlé sé á abum áyāle chōm ésyāāl éche sébélé. Sēhedé'áá bán sébel chōm ésyāāl nyaa echē etāngéné.

¹⁹ Mbáde nyé achān nēn meé nyékānnad sé ábel nēn Dyōb ábel ríwāmsen atim ámbíd ábé ne nyé ámpē.

Mekáne mé asóg

²⁰ Dyōb dōo ábage' bad nsañ, dō-'áá ápúúdté Yesue, Sāngwéé awêd. Bōob-pōó, Yesue adíi néē ndāle a Nnōn-a-mbód awē bēbēnlédé nímē mekií ábel nchemtēn ríbē á ngíndé ne á ngíndé, átínté e Dyōb, ne éche mbód.

²¹ Nkānne nēn meé, Dyōb ábel nyébē mbonśén ábel chōm-té éche áhedéé áá nyébel, nyébé-'e nyóngé ábel mam nímē métāngéné. Yesue áwōngan nyé ábel mam nímē méwógte Dyōb menyīnge. Ehúmé ébē ne Yesu Krístāe abé ne abé. Ebē nê.

E'yale bé asóg

²² A-bānned, ncháa nyé meé, nyékonj échén elébé awóg. Enén kálag echē ríténlé nyé eéchabéé áte.

²³ Ndāó meé nyébíi nēn bán bēbídté mwānyañ awêd, Timotiē, á mbwōg. Nzé awámséné me atán, né súmō séēpě áwēn.

²⁴ Nyélentēd me bad ábe bélyágte nyé bésyāāl, nyéleled-te bad bé Dyōb bésyāāl. Bad bé Dyōb bēmpēe ábe bēbíde á Italia, bómpē bélómmé nyé melēntēn.

²⁵ Nsimé rí Dyōb ríbē ne nyé moosyāál. Ebē nê.

Kálag eche Jemse Ndibned ní kálag

Kálag echë Jemse átélé ehóbé tângene mekan míme bad bé Krīsto bétáŋgéné abel pónde ésyā̄l á alongé ádāb. Bad bé Dyōb ábe bépáŋtédé áte nkōŋsé áte rīsyā̄l bōo Jemse ántelée chō. Abēnlédé ngan híin áleb bad bé Krīsto tângene metón híin. Mmē metón médii, ábé nhon ne ábé atóg, mekagsen, abé á bwām, ánon bad nkōŋtéd, adúbe ne mbeltéd, ngáne bad bé Krīsto bétáŋgéné echém abenled, áwōŋ debyéé, nselag, kúmbe ne asuded á yāl, ábíded mbakú á yāl e bad, ákum ekáá á t̄l, áwesen, ne ákáne.

Jemse awédé áte á kálag tē wē nén aá mbeltéd níkag ekuu ehóg ne adúbe.

Nkabtéd ní kálag

Ndibned ní kálag 1.1

Adúbe ne áwōŋ debyéé 1.2-8

Abé atóg ne ábé nhon 1.9-11

Akag ne ákud mekagsen 1.12-18

Awóg ne ábel 1.19-27

Ngabén eéhednadté 2.1-13

Adúbe ne mbeltéd 2.14-26

Ngáne mod a Krīsto ábenladté echém 3.1-18

Mod a Krīsto ne mekan mé nkōŋsé 4.1-5.6

Elébé émpēe 5.7-20

¹ Me Jemse, mbaledé a Dyōb ne awē Sāngú Yesu Krīstā, me-éé ntenle nyé enén kálag. Nlente nyé metúmbé dyōm ne mébe mé bad bé Israel míme mépáŋtédé áte nkōŋsé áte rīsyā̄l.

*Jemse ad bad bédúbe Krīstā
béwōŋ-’e debyéé*

² A-baányan, pónde ké ehéé echë nyaa e mekagsen ké ehéé étané nyé, nyétéd nê e’bon é yāl áte.

³ Nyéhíí nén bán mímēn mekagsen míme nyékudéé áyāl e adúbe áde nyéwóó, méwéde nyé nlém á abum.

⁴ Nlém ríwúu nyé á abum kóŋŋ á asóg ábel bon mbeltéd mímēn rítyéem bwām rílōn-ne mbon, ábel bon nyéewóó’ abé dé mbéb ké ahóg á alongé ádēn.

⁵ Nyé ké ahéé awē atóge’ debyéé, áchāŋ Dyōb aá ábe mó. Dyōb dōo ábage moosyā̄l debyéé ne nlém nhóg, ésebán akwognad modmod, ábe-’e mó.

⁶ Bon pen nzé nyécháa Dyōb nyédúbé bán ábe nyé chōm éche nyésédté mó ésebán nlém níkáadte nyé á abum. Mod awē nlém níkáadteé á abum ádíi nées edíb é nkwe éche éhode’, epub éhúene’ mendíb ped enén étimne eníníí.

⁷ Ene ndín e mod eewémtán aá mókūd chōm wéé Sāŋgwéé.

⁸ Adíi mod awē awóó nlém míbe, eechāŋnád-taá hōm ahóg áyāl e kéchéé éche ábeléé.

Betóótōkē bé bad ne behon bé bad

⁹ Mod a Krīsto awē eesé etógnén á’sō é’ bad bémpeé atáŋgéné abé kúmbe nzé Dyōb áchágté mó ámín.

¹⁰ Mod a Krīsto awē adé etógnén á’sō é’ bad bémpeé atáŋgéné abé kúmbe nzé Dyōb ásúdté mó. Nhóbe nén áyāle ámaá melemlen ngáne ébéeneé mbonja e nkáákā awē adé á ahín-tē.

¹¹ Nzé enyɛn épene ne ngine ábe e'hyé bé ekíde é'belé é'hyáád ane nkáákəə, éche mbonja-ε ébelé ésoo, e'bonj é'bāb-pe é'belé é'maa. Melemlem nê dɔ́ behən bé bad bémaá'é anan áde bənanéé mímāb nhən ámbíd.

Jemse ad mekəgsen méēhūu'ε w'εε Dyöb

¹² Nnam ne kénz'ée awě awěséné mekəgsen, áyāle nzé atómé mímé mekəgsen áte, Dyöb débe mó nsábe míme ndé alongé áde áhóbé aá móḡbě bad ábe bédáá mó.

¹³ Nzé mod akudé mekəgsen eetāngeneé ahób aá, “Mmén mekəgsen méhúú w'εε Dyöb.” Mod eéhēlēē-se ákəg Dyöb ne ebébtéd, melemlem ngáne Dyöb-pe déekəgéé mod ábel mbéb.

¹⁴ Mewēmtən mé mbéb mé mod mwən móó mékəə bonj ahún á mekəgsen-tē, ene pónde-'aá mímé mekəgsen métédeé mó nlém á abum bonj mehanj mó.

¹⁵ Mmē mewēmtən míme mébāg mod áte mó-'aá mépene mbéb, nzé mímé mbéb-pe nkwogé mod áte, mīpiinad mó kwéed.

¹⁶ A-baányanj bé edənge nyéedōgnād.

¹⁷ Ndε e bwām ké ehéé ne kéchéé éche éloné mbon éhúú ne Titée awě adé ámín. Titée mó ahəgé bwēm é'syāā́l ábe é'pene ámín. Abén bwēm é'pene-ε nhənlén ne nhənlén, bonj Dyöb pen déehənlánné.

¹⁸ Dyöb dēmbel ntii ábe syánē alongé dékōlē abe áde ámbéé syánē échē eyale é mbále. Ambel nê ábel bonj átínté e mímé nhəgtéd n̄syāā́l, syánē débē ngáne mbote e'só echē bébageé mó n̄éε mende.

Jemse ad bad bé Dyöb bébele ngáne eyale é Dyöb éhábéé

¹⁹ A-baányanj bé edənge, nyébii mímén mekan. Mod téé ábē mehél áwóg dyam áde mod ampée áhóbéé, mod eewámsán dyam ahób pen, mod eewámsán-ne aliŋ.

²⁰ Meliŋgá mé mod méemwagké-se ábēl mekan míme Dyöb áhedéé aá ábel.

²¹ Né-ɔ́ nyéte de mekan mé mbinde ne mekan mé ebébtéd mésyāā́l míme nyébeleé. Ne asuded á yāl ásyāā́l, nyékob eyale éche Dyöb áwéné nyé á nlém-tē. Echē eyale chóó Dyöb ábenladté ásonj ádēn alongé.

²² Nyébele ngáne eyale éhóbéé. Nyéedōgē yāl se nyéwōgē chó wógén.

²³ Kénz'ée awě awóge' eyale é Dyöb, ésebán abele' ngáne éhóbéé, adii n̄éε mod awě anəne' ábe e'só á dyené.

²⁴ Amaá eche yāl anyín, bonj akε áde ákagké, ábelé áchatén ngáne e'só é'díí mó.

²⁵ Bonj bad ábe békoo' mbéndé echē etāngéné anən áte, mbéndé eche ehúde' bad á mehanj, nzé béhíde chó ngáne éhednadté saké bán béléá' chó bonj béchatén-ne, bonj pen, béhíde chōm éche éhóbéé, Dyöb dénaméd bó áyāl e kéchéé éche bébeleé.

²⁶ Mod ké ahéé awě awémténé aá móbele' ngáne Dyöb áhedéé bonj eekóbe éche échém, ene ndín e mod adoge eche yāl, áde abele á Dyöb-pe, áde ngēn.

²⁷ Abele Dyöb nyaa eche esáá ne eche etāngéné á'sō é' Dyöb Titée, adii anən menyuu ne bekúd ábe bétage', ne áchəə yāl bwām ésebán mekan mé mbinde mé nkōjsé méwóge mod áyāl.

2

Jemse ad béētēdē baahóg etógnén abini-ε nkójtéd

¹ A-baányanj, nyé n̄əngáne bad ábe bédúbpe echēd Sánj, Yesu Krīstəə, Sánjwéé awě échē edúbé échábé ámín, nyéetāngeneé n̄éε nyényíné mod á dīd-te se nyétéd mó etógnén ké-ε nkójtéd.

² Dětéd bán mod asólé wée nyéládné, ahédé nzêd é gól, ahédé-’ε kase é mbóté, ntógétōke mí mod mómpē ísólé, ahédé mbóté é mbinde.

³ Nzé nyébagé mod awě ahédé kase é mbóté edúbé bon nyélangé mó bán, “Hyě édyεε enén kase e e’dii,” bon nyélangé-’ε ntógétōke mí mod bán, “Tyéém hê,” ké’ε bán, “Dyεé á ndoob tê hê,”

⁴ né nyélúmté bán baahóg bétómé ábíníí, né nyékáadte-’ε bad ne mewēmtēn mé mbéb.

⁵ A-baányan bé edənge, nyéwóglan. Eesaá mbále nén bán Dyöb ápwédé betóótōkē bé bad á nkōnsé te aá bédúbe Krístəə-yε? Adé adúbe dó-’áá adé nímāb nhən, apwədə-’ε bó ábé bad ábe bēbē áwē nkamlēn. Mmē nkamlēn móo áhóbé aá móobě bad ábe bédás mó.

⁶ Bon nyéetédεé betóótōkē bé bad née dyam. Saá behən bé bad bóo bétagte nyé-yε? Eesaá mbále bán bóo békene nyé á kóte-yε?

⁷ Eesaá mbále bán bóo béhóbe đin dé edúbé áde ane awě akamlan nyé mekan mé mbéb áyāl-ε?

⁸ Nyéəbēl dyam áde átəngéné nzé nyékoo’ mbéndé e nkamlēn eche Krístəə ahíd eche éténlédé nén bán, “Edəŋ mwānyon ngáne édás echoŋ yāl.”

⁹ Bon nzé nyétede baahóg etógnén ábíníí-’ε nkóntéd, né nyébele mbéb, né mbéndé e Dyöb-pε ekóbé nyé née bad ábe bēbóo mbéndé.

¹⁰ Kénzée awě ahíde mbéndé bon abóo mbéndé póg, né abóo mbéndé ésyāāl.

¹¹ Mod awě ahóbé aá, “Nyéekábé mesón á ndáb e e’wóngé,” mó ahóbé ámpé aá, “Nyéewúé’ bad.” Né-óó, nzé mod eekábé mesón bon awúe’ bad, né abóo mbéndé.

¹² Nyéhóbe dyam, nyébele-’ε mekan née bad ábe bēbíí bán Dyöb dékāād bó, nchoo ne eche mbéndé éche éhúde bad á mehan-tê.

¹³ Mod awě eewóge mod ampée ngəl, Dyöb-pε déewógké mó ngəl nzé akáadte bad. Bon mod awě awóge bad bēmpēe ngəl, éewógké mbwóg mbwε míme Dyöb ákáadteé bad.

Jemse ad nzé adúbe déekii ne mbéltéd né áwédé

¹⁴ A-baányan, nzé mod ahóbé aá módūbpē Krístəə bon eébēlē mekan míme mélúmtē bán awóo adúbe, bwām é’hée é’dé áhed? Adé adúbe áhεle ásōŋ adé alongé-yε?

¹⁵ Dětéd nén bán mwānyon a Krísto nhóg eewóo’ é chöm éche áhāgkē á yāl, eewóo-’áa ndyééd e epun é bīn.

¹⁶ Bon nyé mod nhóg alángé mó aá, “Ekag bwām, ékud chöm éche éhāgkē, ékūd-tε ndyééd éche édyāgkē.” Nzé nyélangé mó nê ésebán nyébage mó chöm éche átógnéné, né bwām é’hée nyébélé mó?

¹⁷ Melemlem nê dōó édíí ne adúbe. Nzé mod awóo adúbe áde ébeeléé ngáne adé adúbe áhóbεé, né adé adúbe áwédé.

¹⁸ Mod nhóg ālāā me aá, “Mod nhóg awóo adúbe, aníníí-’ε abele mekan mé bwām,” me-’ε mētímtén mó meé, “Lúmed me ngáne mod áhεle awóŋ adúbe ésebán abele mekan mé bwām, mélúmed wε ádēm adúbe áyāl e mekan mé bwām míme mbéleé.”

¹⁹ Edúbpé nén wéé Dyöb ádíí ahóg. Nê adé bwām. Káəŋne e’dəədəŋ bé mbéb bómpē é’dúbpé nê, é’nəə-’ε ne mbwóg.

²⁰ A-eyókél é mod, ehεde wéé bélúmed wε nén bán nzé mod awóo adúbe bon eébēlē ngáne adé adúbe áhóbεé, né adé adúbe déesaá dyamdiam-ε?

²¹ Cheé énkəŋ bon Abrahame, awesyánē sáá ambáá, ákobnéd á’sō é’ Dyöb née mod awě abele’ mam míme Dyöb áhóbé? Saá akwēntēn áde ánkwēnténné ábe awe mwān Aisige née mende-yε?

²² Nyênyíne nén bán adúbe áde Abrahamε ne nímē mbeltéd békágé'áá ekuu ehóg, nímē mbeltéd-te mênkəŋ áde adúbe álón mbon.

²³ Nén dēmbēl eyale é Dyöb énnýinnēd mbále ngáne éténlédé nén bán, “Abrahamε andúbé Dyöb. Nén dēmbēl Dyöb dēnkob mó nēngáne mod awē abele mekan níme métəŋgéné.” Né-ᵛᵛ, bad bēnchəg Abrahamε bán nsón a Dyöb.

²⁴ Nyênyíne nén bán mbeltéd ní mod nímēle boŋ mod ákobnéd á'sō é' Dyöb néε mod awē abele' mekan níme métəŋgéné, saké adúbe dēmpən.

²⁵ Melemlem nê dᵛᵛ émbēē ne akwalεε awē béchágé'áá bán Rahabε. Ankobnéd á'sō é' Dyöb áyāle bad bé Israel ábe bēnlōmmē bán béhyε bēnən dyad áte á mesᵛᵛm-tē. Anköb bó nken, abídéd-te bó á dyad-tē, nzii empée á mesᵛᵛm-tē.

²⁶ Ngáne yəl e moonyoŋ echē eewóo edəádəŋ éwédé, melemlem nê dᵛᵛ adúbe áde déekəg ne mbeltéd áwédé.

3

Jemse ad mod-té akamlan échē echém

¹ A-baányan, nyé bad híin nyéebág bemeléede bé eyale é Dyöb. Nyébíi bán Dyöb dékāād se bemeléede tómaa ngáne ákáádté ábíníi bad.

² Syánē baásyāāl debele mewusé á ríhóbtéd. Kénzée awē éēbēlē awusé á ríhóbtéd adii mod awē áde abé átyéémé, ahele-'ε eche yəl akób ábel boŋ eēbēlē awusé.

³ Détéd eláŋsén ne hósε. Nzé mod ahele aá hósε ébel ngáne áhedéé, abelé ahé chó chöm á nsəl-tē. Echē chöm chó-'aá ábenladté ályáged ene hósε kéhéé wéε áhedéé aá éke.

⁴ Ké'ε dété d eláŋsén ámpē ne böle é'mbáá ábe é'dé á edib é nkwě-te. Kénée édii bán é'kálé bwāmbwam, epub é ngíne chó-'aá ékeεne bó, mod awē adole' ábē böle mwā abámbé mᵛᵛ ábenladté ákeεn bó kéhéé áde ádáá.

⁵ Melemlem nê dᵛᵛ édii ne echém. Kénée édii bán édé mwāmpin á yəl e moonyoŋ, édé kúmbe bwāmbwam áyāl e nímē mbeltéd.

Nyényín ngáne mwā muú ahele se ahyáád ahín ámbáá.

⁶ Echém ámpē édii nēngáne muú. Edii pεd e yəl e moonyoŋ póg, ébele' mbéb ní kamlan yəl e moonyoŋ esyāál. Ebele' alongé á moonyoŋ ásyāāl abé nēngáne ákobné muú, muú níme nímíde á dū-á-muú, níme méēdīmē'.

⁷ Moonyoŋ akamlan nyaa é nyam ésyāāl. Akamlan nyam é mehín, akamlan menən, akamlan nyam éche édole abum ásē, ákamlán-ne nyam ésyāāl éche édé á edib é nkwě-te, ambootéd-te chó akamlən se á mbooted.

⁸ Boŋ modmod ééhēlē-sε ákamlén echém. Echém édii chöm é mbéb éche modmod éehēlé-sε ákamlən, éloné-'ε ne e'wε bé mbéb ábe é'pεεne' kwééd.

⁹ Chᵛᵛ débenladté áken Sánjú Dyöbε, awéd Titée, chó-'aá débenladté ábe moonyoŋ ebómán. Moonyoŋ mó-'aá Dyöb áhágé áwágen mó.

¹⁰ A melemlem mé nsəl dᵛᵛ e'yale bé mekenag ne ebómán bēbídεé. A-baányan, éetəŋgénεé abé nê.

¹¹ N'yélé mé edib nhóg méehēlé-sε mébídte mendib níme mésáá ne mé mbinde abided ahóg.

¹² A-baányan, alín dé asáá déehēlé-sε áchyáá e'pum é píε. Ké'ε alín á sabé déehēlé-sε áchyáá e'pum é' mesáá. Edib-pε éche ébídte mendib mé nkwě, éehēlé-sε ébídéd mendib níme mésáá.

Debyéé áde áhúú ne Dyöb

¹³ Mod adé átínté echên awē awóó debyéé awón-'ε nsōŋten-ε? Alúmed nê ne alongé á bwām áde áwóó, áyāl e kéchéé éche ábeléé. Abel nê ne asuded á yəl áde debyéé áde áwóó ábélé boŋ awón.

14 Boŋ nzé nyêwóó kán áte eche edé mbéb, nyêtōŋtan-ne dásō échen yǎl, nyéēbenlád debyéé áde nyéwóó ábel mbéb tâŋgene ayáge á mbále, akum áde nyékuméé ekáá á tâl,

15 ene ndín e debyéé eehúé'é ne Dyöb. Edíi debyéé áde áhúú ne bad bé nkōŋsé. Adíi debyéé áde áhúú ne bad ábe béewóo Edáádəŋ é Dyöb, debyéé dé edáádəŋ é mbéb.

16 Kéhéé wéé bad béwóó kán áte eché edé mbéb, bétōŋtān-ne dásō échab yǎl, mpuutéđ mbéle mbé, nyaa e ebébtéd ké ehéé-'e ebāg áhed.

17 Boŋ debyéé áde áhúú ne Dyöb adé nhəŋlén. Kénzée awě awóó adé debyéé eewóó'é atón dé mbéb ké ahóg ayāl. Ene ndín e mod adəə nsəŋ, apwiitad, achede yǎl áwóglen bad bémpēe, awóo ngəl bwāmbwam. Abenle bad mekan mé bwām ésebán akwəgnad modmod, abele-'e nê ne nlém nhóg.

18 Nzé bekóm bé nsəŋ bébele nsón míme mípene' nsəŋ átínté e bad, nê débél bad bébelé mekan míme Dyöb áhedéé.

4

Jemse ad bad bésuded yǎl, Dyöb akamlen bó

1 Cheé épene nsum ne nsəlag átínté echēn? Eesaá mbále bán esíí é awón a bwēm éche éwane nyé nsum áte, chóó ekəə' boŋ nyébelé nēn-e?

2 Ehede chōm boŋ weékudéé chó, nê ábélé ewúú mod. Ewóó esíí áte bwāmbwam ákud chōm boŋ weéheléé chó akud. Nê ábélé nyésenle, nyéwanne-'e nhóg ne aníní nsum. Nyéekūdēē chōm éche nyéhedeé ayāle nyéēsēdtēē Dyöb chó.

3 Nzé nyéhedne Dyöb chōm, nyéekūdēē chó ayāle nyéhedne chó mewēmtən mé mbéb. Nyéhede bwēm dásō áwóged échen yǎl menyinje.

4 Nyédé nēŋgáne bad ábe bédé á ndáb é mewónge, boŋ bēbé békābē mesón. Nyéebíí'é bán ábane nlém ne mekan mé nkōŋsé ábele nyé bad bé ekoyí bé Dyöb-e? Né-óó kénzée awě adəə nlém abane ne mekan mé nkōŋsé, abelé eche yǎl mod-a-ekoyí a Dyöb.

5 Nyéwémténé bán ngēn-eé éténlédé á kálag e Dyöb nēn bán, “Dyöb ábánné nlém aá edáádəŋ éche móhédé syánē áte, ébē échē, adé-'e kónjí ne chó-yé?”

6 Boŋ Dyöb ábage syánē nsimé abe ne abe. Nê dó-'aá ákás boŋ étenléd á kálag e Dyöb nēn bán, “Bad ábe bédé kúmbe, Dyöb ákunnad bó yǎl, boŋ ne bad ábe bésúdté yǎl, Dyöb ábage bó nsimé.”

7 Né-óó, nyésuded yǎl á'sō é' Dyöb. Nyéwúen Satané nló áte. Nzé nyébelé nê, mós-'e ätōm mehélé.

8 Nyépe Dyöb benben, mómpe äpě nyé benben. Nyé bad bé mbéb, nyésôg mbéb abel. Bad-te ábe béwóó nlém míbe, nyébane mímen nlém ábel mekan míme mésáá.

9 Nyésuden ayāl e mímen mbéb. Nyélebe', nyéchyε-'ε. Nyésôg awəə, nyélebe' lebén, nyésôg menyinje awóg, nyésuden sudnén.

10 Nyésuded yǎl á'sō ábe Səŋgwéé. Nzé nyébelé nê, ächəgēđ nyé.

Jemse ad mod eekáádté mwānyan

11 A-baányan, nyéehóbé nhóg ne aníní mam mé mbéb á yǎl. Kénzée awě ahóbe mwānyan mam mé mbéb á yǎl, ké'ε akáadte mó, né ahóbe mbéndé e Dyöb mam mé mbéb ayāl, né ahóbe-'ε aá ene mbéndé eéboo'é. Nzé ehóbé wéé mbéndé e Dyöb eéboo'é né weébēlēē chōm éche mbéndé éhóbé aá bébel. Boŋ né etédé etál éché éesē échōŋ ábé mod awě akáadte.

12 Mod nhóg mwēmpen-eé adé awě abage' mbéndé, mwēmpen-naá akáadte bad. Mwēmpen-eé ahéle ásōŋ alonje á bad, mwēmpen-naá ahéle abébed dó. Boŋ we, nzé-módé edíí ákád mwānyon?

Jemse ad mod eebág kúmbe

¹³ Bɔɔb-pɔɔ, nyéwóglan, nyé bad ábe nyéhóbe bán, “chii ké’ε chän, séékë dyad dekalengɔme, séédyéé áwed mwě nhóg, sékábē nyonǵé, sékudé-’ε nsyáñ.”

¹⁴ Nyébíí dyam áde débēnléd chän-ε? Chän nyébíí bán alongé ádēn ádé? Alongé ádēn ádíi nēngáne mbag. Ebág á esón é pónǵé, ámbíd enē, weenyínéé chó ámpē.

¹⁵ Chǒm éche nyétǵéné ahób édíi nén, “Nzé Dyǒb ákwénténé, né séēbē á alongé, sébēl-le ádén dyam ké’ε ádííí.”

¹⁶ Bon bɔɔb, nyétimé nyékume ekáá á tâl ne kúmbe esyáál. Enén ndín e akum dé ekáá á tâl eetǵeneé.

¹⁷ Né-ɔɔ, kénzéé awě abíí dyam á bwâm áde átǵéné abel, bon eébele dá, abelé mbéb á’só é’ Dyǒb.

5*Jemse ad behɔn bé bad bétêd pónǵé*

¹ Nyé behɔn bé bad, nyéwóglan me! Nyéchyε’, nyéhágke e’saad áyál e metake míme mépií nyé.

² Mmén nhɔn míme nyékúme mímáá abɔɔ, síi-’ε émáá nyé asan adyé.

³ Echen gól ne sílva éche nyélímmé ásē, émáá ngag akób. Ene ngag eche ekóbé ábē bwēm, chɔɔ ēbēl bon Dyǒb ákǒgsén nyé, émǎd-te nyé ásē néε muú. Nyékúmmé yǎl nhɔn enén pónǵé echē edé benben ne e’pun bé asóg.

⁴ Nɔné’, weesábpεé bad ábe bēbēnlé wε nsón á nzag-tē. Etimé edogé bó dogén. Nén ábélé ábē bad ábe wéesábpεé ádab awé áwógnad á’só wée Titée, Dyǒb á Ngum.

⁵ Abé áde nyédíí á nkǒjsé hén ádíi áchog alongé, nyébele-’ε kéchéé éche nyédáá. Nyékódte mímen mewēmten, kénée nyébíí bán epun éche Dyǒb dékǒgsēnnē ábē bad bé ekoyí ékwógé ape.

⁶ Nyéhóbé bán bad ábe bēbele mekan míme métǵéné á’só é’ Dyǒb bédé bad bé mbéb, nyēwúú-’ε bó. Béehelée nyé atyéemen.

Jemse ad bad béwesen metake

⁷ Né-ɔɔ a-baányan, nyéwesen káñ Sǎngwéeé ape. Nyétêd eláñsén ne mod awě abele nzag. Abelé ásin káñ ne pónǵé echē ápádtē mbote é bwâm. Awesan káñ ne á pónǵé eche mbúú e’só ébootadté achó, ne áde édimtanné achó.

⁸ Nyémpē nyéwesen, nyéwéd-te nlém á abum, nyésine’ epe éche Sǎngwéeé, edé benben.

⁹ A-baányan, nyéēnyonǵé áte tǵene nhóg ne aníní abel bon Dyǒb déēhábē aá nyédé bad bé mbéb. Nyébíí nén bán mod awě akáadte’ adé nyé benben.

¹⁰ A-baányan, nyétêde e’chemléd ne bekal bé’dáádəñ. Békálé’áá nkalan á đín áde Sǎngwéeé, békudé metake, béwesán-ne míme metake.

¹¹ Ne mbále, syáā dechəge bad ábe béwéséné bán bad ábe békudé nnam. Nyéwógé ngáne Jobε ánwésēnné áde ákudé metake, nyényín-ne ngáne Dyǒb dēmbēnlé mó bwâm á asóg. Sǎngwéeé aboó nlém bwámbwam awóó-’ε nlém ní ngol.

¹² Amín e mímén mésyāāl, a-baányan, nyéēbenlád đín dé nkon mímín, ké’ε dé nkǒñ rísé, ké’ε chǒm émpēe ámwé melě. Bon pen, nzé ehóbé“Eε” abé εε, nzé ehóbé-’ε “Aáy” abé aáy. Nzé nyébelé nén, né Dyǒb déekǒgsēnné nyé.

¹³ Kénzéé awě adé á metake tē, ákánne. Kénzéé awě awóge menyinge, ákóne ákené-’ε Dyǒb.

¹⁴ Kénzéé awě eedyεε bwâm, áchəg belyáged bé mwembé, békanned mó. Nzé békannad mó béwǒgtē mó dyǒg á đín áde Sǎngwéeé.

¹⁵ Nzé édé bán békánnédé mós ne nlém nhóg, né Dyöb déwōg bó mekáne, né débĕl-le mod a nkole ádyĕĕ bwâm. Sǎngwĕé ábĕl áhídē á anonĕ dé nkole, ádyĕĕ bwâm, ké mbébb-pε mós ámbenlé Dyöb délagšén mós.

¹⁶ Né-ós, nyépale mbébb áte wĕε nhóg ne aníní, mod téé ákánned-te mwǎnyan, ábĕl bonĕ nyédyεε bwâm. Mekáne níme mod awĕ abele mam níme métǎngĕné á'sō e' Dyöb, méde ngíne bwámbwam, mébele-'ε nsón.

¹⁷ Elaijaa abédéε moonyonĕ melemlem ngáne syánē. Póndé póg ankáné bwámbwam aá mbúú eechóg, mbúú enkĕnchó-'aá á etún é mwĕ rílaán ne epeđ.

¹⁸ Ambíd enĕ ankáné ámpĕ, Dyöb ábĕl mbúú echó, bwĕm é'bootéd-te akwog.

¹⁹ A-baányan, nzé nyé ké ahéé atĕdté áhíd nzii e mbále e Dyöb, bonĕ mod ampée abelé atĕmné mbíd,

²⁰ ábíi nĕn aá, kĕnzéé awĕ abelé bonĕ mod awĕ abelé mbébb asóg mbébb abel, né asó alongé áde mod awĕ abelé mbébb. Nĕn débĕl-le mbébb híin níme ane mod ákébenlé, Dyöb déenǎnné mós á díđ.

Kálag e'só eche Petro Ndibned ní kálag

Kálag e'só eche Petro ântenlé, bad bé Krīsto bóo ânteléé ch́. A kálag-tê wê achágé bó aá, “Bad ábe Dyöb ápwédé.” Abén bad bémpāntēd áte á pēd e akuu á mbwóg e echē béchágé'áá bán Esia Mainō. Nzom echē enkāñ bonj átel enén kálag, ebédéé áwéd bad bé Dyöb nlém á abum áyāle metake míme békúdé'áá ne adúbe áde bēnwōngē. Awéd-te, abage bó e'lyág bé nlém ábe nkalanj mí bwám míme Yesu Krīstāa mbageéé bó. Mmē nkalanj mí bwám ríhóbe tñgene, kwééd, mpuu ne epe éche Yesue ápéé ámpē. Alūmēd-te bó áte aá bēkwēntēn metake ne e'lyág bé nlém. Anlúméd bó áte aá bēbii nēn bán rímē metake médii mekagsen ányín nzé adúbe áde bēwánlé áde adúbe á mbále. Bēbii-'e nēn bán békúđ nsábe á “Epun éche Yesue Krīstāa ápéé.” Anlúméd-te bó áte ámpē aá alonjé ádāb átāngéné abé ngāne alonjé á bad ábe bēhíde Krīstāa.

Nkabtéd ní kálag

Ndibned ní kálag 1.1-2

Dyöb d́oó ábage e'soósonj 1.3-12

Elébé ábel mekan míme mésáá 1.13-2.10

Mekan míme bad bé Krīsto bétāngéné abel á pón dé e metake 2.11-4.19

Asuded á yā́l ne ábele Dyöb née mod a Krīsto 5.1-11

Nsógten 5.12-14

¹ Me Petro, mbapēe a nlómag awē Yesu Krīstāa, ntenle nyé bad ábe Dyöb ápwédé, ábe bēpāntédé áte bonj bēbé beken á mbwóg é Pontus, Galesia, Kapadosia, Esia ne Bitinia.

² A ntii rímē Dyöb Titée, ammad nyé apwēd. Echē Edā́dāñ-'e ébéle nyédé bad ábe bésáá. Abelé nē ábel nyēbele mekan míme Yesu Krīstāa álāngé nyé aá nyébel. Abelé nē, ábel rímē mekií míme mésyógké á awóg mébel nyékud alagsen dé mbéb. Nsimé ne nsanj ní Dyöb ríbe ne nyé abé ne abé.

Dewóó e'lyág bé nlém

³ Mekenag mébē ne Dyöb áde áde Sáá awē awēd Sāngwéé, Yesu Krīstāa. Apuúdté Yesu Krīstāa. Né-óó dekudé alonjé dékōlē. Abel áde ábéle nē, ábágé syā́nē e'lyág bé nlém bé alonjé áde déemaá'.

⁴ Desine' káñne nhon míme Dyöb ákōñnéde ábē bad. Akōñnéde nyé mó ádyöb. Ahed-te méebóó'ē, méebéb-paá.

⁵ Dyöb ábenlad echē ngum ákē nyé adúbe áde nyédúbpé mó, káñ né nyékudé e'soósonj. Abē e'soósonj bēnyinnēd á epun é asóg.

⁶ Nyédii nyébē menyinge ne nē, kénéé édii nēn bán nyéékúđ metake nyaa ne nyaa é esónj é pón dé.

⁷ Mmē metake mápē ákē nyé adúbe, álúmed nēn bán adúbe áwúú nyé áte ne mbále. Gól ehéle ebéb, bonj ké nē, bēbéle bēhé ch́ á dū á́sáad ch́. Nzé bēhele bēbel nē ne gól, né bétāngéné áden adúbe d́mpē akēg ábel nēn áwúú áte áyāle áden adúbe átómé gól. Nzé áden adúbe átómé mekagsen áte, né Dyöb déken nyé, ábe nyé ehúmé ne edúbé áde Yesue álūmēdtē bad bé nkōñsē bésyā́l yā́l.

⁸ Nyédáá mó kénéé nyéenyīnēé mó. Nyédúbpé-'e mó kénéé nyéenyīnēé mó b́óó. Ké b́óó-pē nyétómténé menyinge abé nyaa echē mod éeheléé-se ahób.

⁹ Chóm echē nyékudté áyāle adúbe áde nyédúbpé mó édii e'soósonj ábe ábēn e'dā́dāñ békudté.

¹⁰ Bekal bé'daádəŋ bənhōb mam á'sō é' pónde t̄ŋgene ábē e'soosəŋ ábē Dyōb débēé nyé née nsimé. Béntōŋ ábē e'soosəŋ ahəd áte ábel bésōŋten bó.

¹¹ Edaádəŋ éche Kr̄istəə émbē bó áte áláa bó á e'só é' pónde ngáne Kr̄istəə átagké ne ehúmé échē ákudté ámbid e pónde, boŋ bémbē béhedé áte. Béhédé'áá áte ábíi pónde echē mímē mam mébenlédté ne wée mod awē mébenlédté.

¹² Dyōb dénlūmēd ábē bekal bé'daádəŋ áte aá nsón mímē bébeléé méesaá nsón míme bēn békudté nsyāŋ áhed, boŋ rídii nsón mímenyé. Dyōb dénlōmē bad Edaádəŋ éche Esáá échē ébidé ádyōb. Echē Edaádəŋ chōó émbēl boŋ baahóg békale Nkalaŋ mí Bwām mímē nyéwógéé bōob. Mmén mam mōó bekal bé'daádəŋ bēhōb'áá. Káəŋne ángel édáá mímén mekan asōŋten.

Mbēltéd mímēn nsāŋ

¹³ Né-óó, nyépūd abad, nyébē mbonjén ábel nsón míme Dyōb áhedéé. Nyétéd pónde nyésūm-me nlém r̄syāal áyāl e nsimé míme Dyōb débēé nyé á pónde echē Yesue ápéé ámpē alúmed-te nyé yāl.

¹⁴ Ngáne édii bán nyédii bad ábe bébele mekan míme Dyōb áhedéé, nyéemwāg-se mam mé mbéb mímē nyébélé'áá bōód mébé mékamlán ádēn alongé.

¹⁵ Dyōb áde apwedé nyé asáá. Né-óó nyémpē nyétāŋgéné asāŋ á mbēltéd mímēn r̄syāal.

¹⁶ Eténlédé á kálag e Dyōb nén bán, “Mbēltéd mímēn nsāŋ áyāle mbēltéd mímēm r̄sáá.”

¹⁷ Dyōb ákáadte' moosyāal nyaa póg. Eékwognáádté modmod. Nzé nyékāne-'e áwē, nyéchəge mó bán Titée. Né-óó, nyéwōŋ mbwóg ní Dyōb áte á alongé ádēn ásyāal á nkōŋsé-te wén wée nyédii beken.

¹⁸ Nyébii nén bán Dyōb ákódté nyé á ekúkú é abé-te. Ekúkú é abé échē ábēn betaa bēnlyāgnēdté nyé saké chōm née gól ké'e sílva échē ébébe' chōó ánkōdnédte nyé.

¹⁹ Ndəle e mekií echē Yesu Kr̄istəə chōó ánkōdnédte nyé. Kr̄istəə awē adé née r̄dyōŋ mí mbód mímē méēwōo awusé ké ahóg á yāl.

²⁰ Nkōŋsé r̄dēhōb bán míbootad, Dyōb dēmmād mó apwed. Boŋ bōob á asóg hén alúmté yāl wée bad bé nkōŋsé. Abelé nē áyāle nyé.

²¹ Kr̄istəə akəó nyédúbpe Dyōb. Nyéhele-se nyédúbé Dyōb nyésūm-me nlém r̄syāal áwē, áyāle apuúdté Kr̄istəə abídté-'e échē ehúmé áwed.

²² Abel áde nyébeléé mekan mé mbále ábélé nyésáá. Nē ábélé-'e nyáābe bad bēmpēe ábe bédúbpe Yesue nyédəŋné. Né-óó nyédəŋ nhóg ne anínii ne nlém r̄syāal.

²³ Nyébii nén bán Dyōb ábágé nyé alongé dékōlē mbwiined ne échē eyale. Echē eyale épééné alongé éesaá-'á chōm éche ébébe'. Ebē abé ne abé. Dyōb áde adé á ngíndé ne á ngíndé dōó ábágé nyé ádē alongé saké moonyoŋ.

²⁴ Eténlédé á kálag e Dyōb nén bán,
“Moonyoŋ adii née nkəákəə,
ábē e'boŋ-'e é'dé nēŋgáne mbonja échē ékwoge á ahín-tē.

Nkəákəə ayēnle', mbonja-'e ésoode.

²⁵ Boŋ eyale é Dyōb ébé abé ne abé.”
Echē eyale édii nkalaŋ mí bwām míme békánlé nyé.

2

Nyédii meláá mé alongé

1 Né-ṵó, nyéede nímēn mbeltéd mé mbéb n̄syā́l. Nyéēkālē metóm, nyéelúmté' á d̄id-te ngēn n̄n bán nyēbele bwām áde nyéebeléé, mod eesíídé waáb, e'yale bé mbéb béēb̄idē-'ε nyé á nsal.

2 Nyétán̄géné awan áte ákud ndyééd e edáád̄əŋ echē esáá, melemlem ngáne bán bé nkáál béchye'ε abii, ábel n̄n nzé nyédyédé ene ndyééd, nyékwog ákud e'soóson.

3 Nyēwógléné ene ndyééd, nyēb̄ii-'ε b̄əəb ngáne Sán̄gwéé ábeléé mekan mé bwām.

4 Nyéhyag wéε Sán̄gwéé, mó adé n̄ε aláá dé alongé áde belón̄ bé ndáb bēnchenéé, bon̄ Dyōb̄ ányin̄ d̄ó aá ákwógnédé, ápwēd, ákōō-'ε d̄ó.

5 Nyéhyag-kóó nyéb̄ē n̄ε meláá mé alongé míme Dyōb̄ ábenladté álón̄ eche ndáb e edáád̄əŋ. Awēd-te-'aá nyébenléé mó. Nyéēb̄ē beprise ábe bésáá, nyébagé mó mendε mé edáád̄əŋ míme mékóbnédé áwe e'só mbwiined ne Yesu Kr̄ist̄ə.

6 Eténlédé á kálag e Dyōb̄ n̄n bán,

“Ntédé aláá dé etógn̄n

nsumé á Zayon.

Kénzée awē adúbpe mó éekwágké.”

7 Adēn aláá-ṵó adé etógn̄n ne nyé awē nyédúbpe mó bon̄ ne bad ábe béédúbpe mó ádii n̄ngáne

“Aláá áde belón̄ bé ndáb bēmbāngē abenled,

d̄óó átímé aláá dé etógn̄n abé.”

8 Eténlédé ámpē n̄n bán,

“Mó adé aláá áde bad b̄elúmeé ámin

abé-'ε ndim e aláá echē ebele bad b̄ekwag.

Bad b̄ekwag áyāle béēwōgn̄ē Dyōb̄. N̄ē d̄óó Dyōb̄ átíídé aá ébenled ne b̄ó.”

9 Bon̄ nyé, nyéesaá n̄ē. Nyéd̄ii bad ábe Dyōb̄ ápwédé, beprise bé Dyōb̄ áde adé k̄əŋ. Nyéd̄ii alon̄ áde ásáá, Dyōb̄ d̄ēn-naá áwóó nyé ábel n̄n nyélúmed bad b̄émp̄ē ngáne ápédé bwām abé. Dyōb̄ áhúdé nyé á ehint̄n-t̄é, ap̄εn̄é nyé á e'nyin̄en bé ekíde.

10 Ngen e'só nyénk̄embáá bad bon̄ b̄əəb nyéēnyédé bad bé Dyōb̄. Ngen e'só nḡal e Dyōb̄ enk̄empaá áw̄en bon̄ b̄əəb Dyōb̄ áwógé nyé nḡal.

Nyéb̄ē bet̄əŋ bé Dyōb̄

11 A-b̄anned nh̄ede m̄εé nyésōŋt̄en n̄n bán nyéd̄ii beken, nyétome-'ε á nkōŋsé w̄en t̄óm̄n. Né-ṵó nyéēbanné n̄lém ne mekan mé ekob é ȳəl áyāle n̄n n̄ē áwanne áb̄en e'dáád̄əŋ b̄en nzum.

12 Nyéwále alongé á bwām át̄int̄é e bad ábe béedúbpe Dyōb̄, ábel bon̄ ké b̄enh̄ōb bán nyéd̄ii bad bé mbéb, b̄enyin̄ nímēn mbeltéd mí bwām. N̄ē dék̄əŋ bébe Dyōb̄ edúbé mbwε míme Dyōb̄ dép̄éé á epun é asóg.

13 A d̄in̄ á Sán̄gú, nyéwógne bad bé nkōŋsé ábe bédé á nkaml̄n, ken nkaml̄ne ambáámbáa,

14 ké'ε k̄əŋ échē édé ás̄ē e nkaml̄ne ambáámbáa, echē álómé ákógs̄en bebel bé mbéb ne ákémed bad ábe b̄ébele' bwām.

15 Dyōb̄ áh̄ede n̄n aá mekan mé bwām míme nyébeleé mékúdt̄en meh̄ób míme áb̄ē e'yókél é' bad b̄éh̄óbeé nyé áyāl, míme béēb̄ii'ε.

16 Nyéesaá bet̄əŋ, nyéd̄ii kunze. Bon̄ p̄en n̄ē déebagéé nyé nz̄om ábel mbéb. Nyéb̄ē n̄ε bemb̄aledε bé Dyōb̄.

17 Nyébage moosyā́l edúbé. Nyéd̄əŋ-'ε bad b̄émp̄ē ábe b̄ómp̄ē b̄édúbpe Kr̄ist̄ə. Nyéb̄áa Dyōb̄. Nyébage k̄əŋ Embáámbáa edúbé.

Metake míme Kr̄ist̄ə méb̄ē syā́n̄é e'chemléd

¹⁸ Nyé bad ábe nyêdé bembæde, nyésuded yǎl ásē e bad ábe nyéβenleé ne edúbé ésyāāl. Nê déēbāg ne ábe bébóó nlém bēnpēn, boŋ nê ábê ne káōŋne ábe bébébé nlém.

¹⁹ Dyöb débē menyiŋge ne nyé nzé nyēweséné e'wε é' metake míme nyénkēmbáá nyékude áyāl echê.

²⁰ Nzé ebélé mbéb, boŋ ewēséné mbéte áyāle míme mbéb, ne nsyāŋ ríhée wékudté? Boŋ nzé ewēséné metake ké áyāle dyam á bwām áde ébélé, né Dyöb débē menyiŋge ne wε.

²¹ Mmēn metake mébōŋnéde nyé awē Dyöb ápwédé, áyāle nēn Krīstæ mwēn antāg á nló míme. Anlyáge-'ε nyé elanšén ábel nyéhíd míme mekuu.

²² Enkēmbenlé mbéb ké nhóg, modmod enkēnwóg-kaá mó eyale é mbéb á nsāl.

²³ Ade bad bésyáá mó, enkēntimténné bó. Ade bétágté'áá mó, enkēnsidté bó. Boŋ ambē mésyāāl á mekáá mé Dyöb áde ákáadte bad bésyāāl nyaa póg.

²⁴ Krīstæ mwēn ampém mímed mbéb áwe yǎl á awōg ábel nēn deewóó dyamdyam ábel ne mbéb, débēle-'ε mekan míme Dyöb áhedé, á alongé ádēd. Echē sii ébélé nyékudé e'choóchoŋ.

²⁵ Nyēmbé nēe rídyāŋ mí mbód míme mbóó boŋ bōb Dyöb ápééné nyé ámbíd áhíd mod awē anone nyé ngáne nnōn-a-mbód ánōné éche mbód.

3

Bebaád ne ábab bechóm

¹ Nyé bebaád bé bechóm-me nyéwógne áben bechóm ábel boŋ ké émbē nēn bán bééhídē eyale é Dyöb, míme mbéltéd mí bwām míbel bómpē bétimned Dyöb, bédúbé-'ε mó. Ké nyéētōgne bó dyamdyam aláa,

² bényín áden abé á bwām áde ásáá.

³ Nyéēsūmē nlém nēn bán ábēn e'boŋ é'bíde dásō áyāle ekāŋ é mbíd ebwóg nēe anabe dé esid, ahé á bwēm nēngáne e'bōŋ, nsāŋ, ne e'bése ké'e kase é mbóté.

⁴ Boŋ bébíi nyé dásō ne e'boŋ ábe é'bíde nyé áte. Abê e'boŋ béehāŋlānné áyāle é'bíde ne edāōdāŋ échē épwítédé échē éetagtán-ne. Abê e'boŋ bōó Dyöb ányíneé áá é'dé etógnén.

⁵ Nê dōó bebaád ábe básáá bé' bōód ábe bēnsūm nlém ne Dyöb bébélé'áá boŋ é'bāb e'boŋ é'bíd áwed. Béwógné'áá ábab bechóm.

⁶ Seraa mwēn ambé nê. Awógné'áá Abrahamε áchāgé-'ε mó áá asāŋ. Nzé nyēbele' mam mé bwām ésebán nyēbāa dyamdyam, né nyédíi Seraa ábe bán.

⁷ Nyé baachóm-me ábe nyēwóó bebaád, nyétāŋgéné ábēn bebaád edúbé abε. Mod téé ábê ne awē mwaád, ánone mó bwām. Béepedéé nyé e'wúu áte, boŋ nyāābōó nyéēkūd alongé nyaa póg. Adē alongé ádíi nsimé míme Dyöb ábagéé. Nzé nyéewānle bó ngáne éhednéé, né Dyöb déewóóké nyé mekáne.

Nyēbele bwām ké nyékudé metake

⁸ Asóged, nyé moosyāal nyébē mod nhóg, nyéwōŋ nlém míme mípwítédé, nyésuded-te yǎl.

⁹ Nyéētímté mbéb áyāle mbéb. Nzé mod ahóbé nyé dyam dé mbéb áyāl, nyémpē nyéehóbé mó dyam dé mbéb á yǎl, nyékáné kánēn bán Dyöb ánamed mó, áyāle nnam móó Dyöb dénhōbpē áá móōbē nyé áde ámpwedté nyé.

¹⁰ Eténlédé nēn bán,
 “Kéznéé awe ahede alongé dé menyiŋge,
 áhedé-'ε áá mónyín e'pun é' bín é' bwām,
 eehóbé' mekan mé mbéb,
 eékālē-'ε metóm.

11 Asóg mbéb abel, ábele mekan mé bwâm.

Ἀwanen ábé nsaη ne moosyáál.

12 Ayāle Dyöb anóné bad ábe bébele mekan mé bwâm

awoge-’ε bó mekáne.

Boη akunnan bad yäl ábĕ bébele mbéb.”

13 Nzéé-ō ahele ádāη nyé mbéb abel nzé nyêwóó nlém áte ábel mekan mé bwâm?

14 Boη ké nyéntāg-ke ké tagén ábel mekan míme Dyöb áhedéé, né Dyöb dé naméd nyé. Nyéewógé mbwóg, nyéētāgē-’ε áte.

15 Boη pen nyébe Krístā edúbé, nén móódé Sāηgwéé á alongé ádēn. Nyébē mboηsén pón dé ésyāál átimtēn kénzée awē asēdté nyé dyam tāηgene nlém míme nyésūmē wée Krístā.

16 Nyékéled nlém á abum. Nzé nyébele nē, nyésūdēd yäl ne edúbé ésyāál, nyékéled-tē nlém á abum wée bad ábe béhóbe nyé mekan me mbéb áyāl, áyāle nyéhídeé Krístā. Bék wāg nzé bényíne ádēn abé á bwâm.

17 Nyébíi nén bán édé bwâm mod ákud metake áyāle dyam á bwâm áde ábéle, nzé nē ádé á ntíi ní Dyöb, tómaa ákud metake áyāle dyam dé mbéb.

18 Krístā mómpē ankūd metake awé-’ε áyāle mímed mbéb ngen póg ne ngen ésyāál. Abédéé mod awē abele mekan míme Dyöb áhedéé, boη anwé á nló míme bebel bé mbéb. Ambel nē, ábel dépe wée Dyöb. Bad bēnwū mó boη échē ekob é yäl chōó énwē. Dyöb dēmbēl échē edāádāη émbē ébē á alongé.

19 Echē edāádāη chō-’áá ánkéenné á mbwōg áke dé akale e’dāádāη eyale é Dyöb.

20 Abén e’dāádāη é’bédéé e’dāádāη ábe bēnkēnwógēn Dyöb se’ bōód áde Dyöb dēnchabtédte bó e’kād áte ábel bétēde mímab mbéb á pón dé echē Noa álóó’áá bōle é’mbáá. Bad waam bēnpen bōó bēmbē á bōle-tē. Bēnkūd e’soósoη áyāle mendib.

21 Nén ádé melemlē nēηgāne edusen. Echē edusen chōó ébele bōob boη bad békūd e’soósoη á ngíne e mpuu míme Yesu Krístā. Edusen éesaá awobe á yäl áhúd mbinde boη édíi ákwētēn dé abele Dyöb ne nlém míme ísáá.

22 Krístā akií ádyōb, áwed-taá ádyéé Dyöb á ekáá é mbáá boη ákamláán ángel ésyāál, benkamlēne ne ngíne échē édé ámín.

4

Alongé á bad ábe bédubpé ábē ngāne Dyöb áhedéé

1 Né-ōó ngāne édíi bán Krístā ankūd metake é ekob é yäl, nyémpē nyétāηgéné nyébē mboηsén áwōη melemlē mé mewēmtēn nēηgāne ánwōηgē. Ayāle, kénzée awē atagé é ekob é yäl, asógé mbéb abel.

2 Ngāne édíi-’áá nē, alongé ádēn á nkōηsé wén ábē ngāne Dyöb áhedéé saké bán mpúlé mé nkōηsé múmó íkamlan nyé.

3 Mekan míme bad ábe béebíi Dyöb bédāé’é abel móó nyémpē nyébélé’áá. Ene pón dé emaá atóm, ekwōgnédé-’ε. Nyékábé’áá mesón, nyêwōη nlém áte ábel mam mé mbéb, nyēm wágé’áá mím mékōbē nyé, nyēchagé’áá ngande échē bad bēmwágé’áá mím mékōbē bó, bébelé-’ε e’tōηgé é’ mekan, nyé bēnlé-’ε myōb mémpē, dyam áde déebo.

4 Bēn ábe nyáábōó nyébeláá mímén mbēltéd mé mbéb bōód, bédé menyáké bōob ányín nyéesaá ne bó ámpē ábel epuutéd ne e’kúkú é’ mekan. Né-’áá ákáo boη bésyāā nyé.

5 Boη bētyēm á nkáá á’sō é’ Dyöb áde ábōηséné ákáad moosyáál. Akāād ábe bédé álongé ne ábe bēwédé.

⁶ Nén dɔɔ dékəŋ boŋ nkalaŋ mí bwám ríkanléd káəŋ ne wée bad ábe bəwédé, ábel boŋ kénéé bənkāādtē bó áde bédíí á nkòŋsé-te, bəwé-'ε ngáne moosyāəl áwágkē, bəhele-se bəbé á alonǵé ngáne Dyōb ádíí.

Nyébenlad nde éche Dyōb ábágé nyé bwám

⁷ Asóg dé mekan mésyāəl ádé bənbən. Né-ɔɔ nyébwəg yəl nyétéd-te pónde ábel nén nyéhel akáne.

⁸ Amín e nímén mésyāəl, nyédəŋ nhóg ne aníníí ne nlém rísyāəl. Nyédəŋ nhóg ne aníníí, áyāle edəŋge ékúdtan mbéb híin.

⁹ Nyékob nhóg ne aníníí nken ésebán nyényonǵe áte.

¹⁰ Dyōb áwóó nde híin, abagé-'ε mod téé echě nde. Nyébê bembəlede bé bwám nyébenlad-te échēn nde áwónǵen nhóg ne aníníí.

¹¹ Ane awé abíe' dyaŋ ahób, ahóbé dó nées nhóg awé akale' e'yale ábē é'bidé wée Dyōb dēn. Ké nzéé-'ε awé awónǵan baáb, ábele' nê ne ngine esyāəl echě Dyōb ábágé mó. Nê débidēd ehúmé é Dyōb áwed á yəl e mekan mésyāəl mbwiined ne Yesu Krístəə. Ehúmé ne ngine esyāəl bəbágnédé mó á ngíndé ne á ngíndé. Ebê nê.

Metake nímē bad bé Krísto békudéé

¹² A-baányan, nyéebág menyáké ne mekəgsen mé ngine nímē mépiide nyé bəəb. Nén déebāg nyé nken.

¹³ Nyébê menyǵe pən nén, nyékude' metake melemlem ngáne Krístəə ákúde'áá, ábel nén nyélōn ne menyǵe á pónde echě Dyōb délūmēdtē ehúmé éche Krístəə.

¹⁴ Nzé bad bésyāə nyé áyāle nyédíí bad ábe bəhíde Krístəə, né yəl eboó nyé áte, áyāle ehúmé é Edəádəŋ é Dyōb édé ne nyé.

¹⁵ Boŋ pən nzé nyékude metake éebāg nén bán nyékude nímē metake áyāle nyéwúú bad, ké'ε áyāle nyéchíbé, ké'ε áyāle nyédíí bad bé ebébtéd, ké'ε áyāle nyésóléé mam mé bad áte nímē méenəné nyé.

¹⁶ Ké né-'ε, nzé nyékudé metake áyāle nyédíí bad ábe bəhíde Krístəə, nê déəkwāgtē nyé. Nyéságnen Dyōb ságnén nén bán bəchágé nyé bán bad bé Krísto.

¹⁷ Áyāle pónde edé echě Dyōb débootédte bad akáad, ábootéd-te ne ábē bad. Nzé Dyōb áhele ábootéd-te ne syánē awé dedé bad bé Krísto, chán-nō ébēənnē bad ábe bəebelé' mam ngáne nkalaŋ mí bwám rí Dyōb níhedéé.

¹⁸ Eténlédé-'ε á kálag e Dyōb nén bán,
 “Nzé éhele élenléd káəŋne mod awé abele ngáne Dyōb áhedéé áte ákud e'soósəŋ,
 né chán-nō ébēənnē bebel bé mbéb ne bad ábe bédúbpe Dyōb?”

¹⁹ Né-ɔɔ, bad ábe bétage' ngáne Dyōb átíídé, bəbê bəbele mekan mé bwám, bəbe-'ε yəl á mekáá mé Dyōb áde áhágé bó, mó awé ábele kéchéé échě áhóbé.

5

Petro alébe bad ábe belyágte mwembé

¹ Me nées nhóg awé alyágte', ndəá méé nímē bad ábe belyágte' átíntē echēn elébé. Nde nhóg awé ambé metake nímē Yesu e ásē. Ehúmé échě Dyōb débéé Krístəə épě awēm ámpē. Nlébe' nyé nén meé,

² nyénəne bad ábe Dyōb ábánné ásē echēn melemlem nēŋgáne nnən-amboód ánənēé éche mbód. Nyénəne bó áyāle nyédáá bó anən. Nyéēnənē bó byánán bényágté nyé anən bó. Nyébele' nímē nsón saké é etútú é nsyáəŋ, boŋ ébê bán nyéwóó nlém ábel mó. ³ Nyéekamlán bad ábe bédé ásē echēn ne ngine. Nyébê bad ábe bəhídtē mekuu nímāb.

⁴ Ade k̄n e ben̄n-bé-mbód ép̄é, äb̄ nyé nsábe míme ríchábé ámín. Mm̄é nsábe mébē á ngíndé ne á ngíndé.

⁵ Nyémpē ábe nyêdé ásē e bad ábe bélyágte', nyésuded yäl, nyésuded-te yäl nzé nyêwōngan nhóg ne aníníí. Ayāle éténlédé á kálag e Dyöb nén bán Dyöb ákunnan bad ábe bédé kúmbe yäl, bon abage bad ábe bésúdté yäl nsimé.

⁶ Né-ᵛó nyésuded yäl ásē e ngíne e Dyöb ábel bon mwën ácháged nyé á pónké echē ebōñnéde mó.

⁷ Nyéchene mekan mésyāäl míme métagte nyé áwe mekáá, áyāle atédé mam míme métagte' nyé née mímē.

⁸ Nyékób yäl, nyétéd-te pónké. Mod a ekōyí awên, Satanε, ahōnge née ngii echē edume áte, ahede mod awē anyabéé áte. ⁹ Nyéēmwāg-se atóm nyé áte. Aden adúbe déesudé'. Nyébíí nén bán bad bémpēe ábe bédúbpé née nyé nkōñsé áte rísyāäl bómpē békude metake mímē nyémpē nyékudeé.

¹⁰ Nyékude' metake bon mímē metake méechabpé áte. Ambíd e nê, Dyöb áde ábage' nsimé rísyāäl dēn déb̄ nyé kéchéé éche nyébóde. Ab̄l nyésūmēn, awéd-te nyé áte. Adíi Dyöb áde nsimé mímē ríkwógnédé moosyāäl, m̄bê-ε pónké ésyāäl. Mó apwédé nyé ákud éche ehúmé échē ébē á ngíndé ne á ngíndé. Nyéékü-d-te chó áyāle nyêdé ne Kr̄st̄ā.

¹¹ Ngíne esyāäl edii echē á ngíndé ne á ngíndé. Ebê nε.

Melēnten mé asóg

¹² Sailase mó awóngéné με âtel anén mwă kálag. Adíi με née mwānned mbānné-ε mó nlém á yäl. Ntenle nyé enén kálag áwéd nyé nlém á abum, áláa-ε nyé nén mēé mímén mam míme ríténlé nyé médii nsimé rí Dyöb mí mbále. Nyéehúde mekuu áhed.

¹³ Baányonj bé mwembé mí Babilōn ábe Dyöb ápwédé née nyé, bélómmé nyé melēnten. Awem mwān awē ríkwógté á adúbe-tê, Makᵛse mómpē alómmé nyé melēnten.

¹⁴ Nyéhê nhóg ne aníníí t̄l álúmed edānge. Nsanj m̄bê ne nyé bad bé Kr̄sto bésyāäl.

Kálag eche elónténé ébε eche Petro Ndibned n kálag

Kálag echë elónténé ébε echë Petro ântenlé, bad bé Krĭsto bé'só bésyā̄l bōo ânteléé chō. Ene pōndé bad bébéde ábe býágté'áá bad ayáged dé metóm. Adé ayáged dé metóm ábéle'áá bad bébéle e'tongé é' mekan. Né-ǎó, Petro antēl ene kálag álúmed aá nĭme mekan mééboo'é. Anlúmed bō áte nĕn aá béētāngeneé échē ndĭn é mekan ahíd. Aá dyam áde bétāngéné abel ádíi, ábíi mbále tāngene mam mé Dyōb ne Sāngú Yesu Krĭstā ne ádúbe bō ne nlém nhóg. Bad ábe bénýinné Yesuε béwóg-ε mekan nĭme áyágté'áá, bōo bébéle boŋ ábĕn bad bébíi nĭmē mekan. Atón ahóg áde Petro ânkoŋgé anōn áte ábéde tāngene bad behóg ábe bélúmté'áá bán Yesu Krĭstā éepaá ámpē. Anlúmed bō áte nĕn aá atoo áde Krĭstā átongēé āpe, ádíi áyāle Dyōb déehēdeé aá modmod ábōd alongé, boŋ áhede' aá bad bésyā̄l bétēde abel dé mbéb, béhĭde Krĭstā.

Nkabtéd n kálag

Ndibned n kálag 1.1-2

Mpwēdtéd n mod a Krĭsto 1.3-21

Bemelēede bé metóm 2.1-22

Epe e asóg éche Krĭstā 3.1-18

¹ Mε, Simōn Petro, mbālede ne mbapeε a nlomag awē Yesu Krĭstā, ntenle nyé bad ábe nyédúbpé Yesu Krĭstā melemlen ngáne sémpē sédúbpé mó. Yesu Krĭstā adĭi syānē Dyōb abé-'ε Nsoode. Abele' mekan nĭme métāngéné. Mwĕn-naá akāá boŋ syānē moosyā̄l dedúbé mó.

² Nsimé ne nsaj n Dyōb mbād mbé ne nyé abĭi áde nyébĭi Dyōb, nyébĭi-'ε Yesuε, awesyānē Sāngwéé.

*Nyēbele' mekan nĭme mélúmtē'
nĕn bán Dyōb dōo ápwéde nyé*

³ Ngĭne e Dyōb ebagé syānē mam mésyā̄l nĭme déhēdeé á alongé, ebelé-'ε syānē debelé' ngáne Dyōb áhēdeé. Nĕn ábĕnlédé áyāle debĭi mó. Abĕnlédé echē ngum ne ábē e'boŋ bé nlém ápwēd syānē ábé ábē bad.

⁴ Eche ehúmé ne ábē e'boŋ bé nlém é'bĕlé ahóbé aá móōbelé syānē ndāle é mekan é bwām. Abelé nĭmén mésyā̄l ábel boŋ nyéesólé' mbeltéd mé mbéb mé nkōŋsé áte. Esĭí é mekan mé ekob é yāl chōo ébelte' bad échē ndĭn é mekan. Nzé nē ábĕnlédé né abé ádĕn dēsāŋ nĕε abé á Dyōb.

⁵ Né-ǎó, bōob áde édĭi nē, nyéwan áte ábel mekan mé bwām. Saá-kaá nē dĕmpĕn. Nyētāngéné awan áte ámpē ábé bad ábe bébĕnlad debyéé ábel mekan.

⁶ Abád amĭn e debyéé, nyébĭi ngáne nyékóbéé échen yāl. Saá-kaá akób á yāl dĕmpĕn. Nyébē bad ábe békaa' nlém. Amĭn e e'kaŋ bé nlém, abé ádĕn átāngéné ábé ngáne abé á bad bé Dyōb átāngéné abé.

⁷ Saá-kaá ábel mam nĭme Dyōb áhēdeé dĕmpĕn. Edāŋge ébē átfĭntē echĕn nyé Bad bé Krĭsto. Saá-kaá edāŋge átfĭntē e nyé Bad bé Krĭsto bĕnĕn, boŋ nyédāŋ moosyā̄l.

⁸ Nzé ádē abé ákwoge-'ε nyé áte, né debyéé áde nyéwóó tāngene Sáá awĕd, Yesu Krĭstā, déebáá ngĕn, boŋ débĕl nyēchyáá' e'pum.

⁹ Boŋ kĕnzéé awē ádē abé déesaá áte, adé nĕngáne mod awē eéchābē' anyĭnĕn, ké'ε awē akwedé ndĭm. Achāténé-'ε aá Dyōb áwóbpé mó, álagsĕn-ne mó mbéb.

¹⁰ Né-ɔ́, a-baányan nyénabe awan áte álúmed nén bán Dyöb dɔ́o áchénlé nyé, ápwēd-te nyé ábē ábē bad. Nhóbe nén áyāle nzé nyébelé nê, né nyéehúnné á mbéb-te mbéd.

¹¹ Nén débēl-le Dyöb débē nyé kunze esyāól ásol ne ábē á nkamlen nímín wée Sáá ne Nsoode awēd, Yesu Krístə́ ákamlanné née kə́n á ngíndé ne á ngíndé.

¹² Né-ɔ́, ké née nyémáá nímén mekan mésyāól abii bon nyédúbé-'ε mbále echē edé áwēd-te, mēbē ríkamtén nyé mó.

¹³ Nnyíné-'ε nén méé, bɔ́ɔb áde rídii ndé á alongé, éhednad nén bán ríkamtan nyé nímén mekan pónde tée ábel bon nyékwanled.

¹⁴ Mbíí méé nkwogé nímén nkōhsé atede. Sánkwéé awēd, Yesu Krístə́ abel mbíí nê.

¹⁵ Nwane-'ε áte áláa nyé nímē mekan ábel bon ké nwé ké wéén, nyéhel mó akamten pónde tée.

Mbón edé éche ényinné ehúmé éche Yesu díd

¹⁶ Saké póle éche bad bēn bēnábpe sékánlé'áá nyé áde sénhōbpē bán Yesu Krístə́ ápē ámpē ne ngum. Sébēn sēnyinné éche ehúmé díd.

¹⁷ Sébédé áhed áde Dyöb Titée ábágé mó edúbé ne ehúmé. Ehób émbid ámín éche Dyöb á Ngum álāngéé mó áá, “Awem mwān a nlém mó nén, mó awógte' me menyinge.”

¹⁸ Sébēn sēnwóg échē ehób áde syāābɔ́ débédé á mbɔ́ɔd echē esáá.

¹⁹ Né-ɔ́ syānē dekoó adúbe nén bán e'yale ábē bekal-bé-e'dəádə́n bēnhōbpē é'dé mbále. Ebon nén bán nyétōn bó awóglēn. E'dii née etrukān éche échodne' á ehínten-tē káān né Epun épédé échē bīn bésāá'é bon Krístə́, tintine a mbwembwe, ápen nyé á nlém-tē.

²⁰ Amín e nímén mésyāól, nyétāngéné asōhten nén bán modmod eéhēlē-sé ábenléd áde debyéé átóge mekan míme bekal-bé-e'dəádə́n bēnhōbpē ngáne éténlédé á kálag e Dyöb.

²¹ E'yale ábe bekal-bé-e'dəádə́n bēnhōbpē bēnkēmbáá á ntii ní moonyon, bon Edəádə́n éche Esáá chɔ́o élyágté'áá bad ábe bēnhōb ábē e'yale. Abē e'yale bēnhūū ne Dyöb.

2

Bemeléede bé metóm ne ebébtéd éche békudté

¹ Se' bɔ́ɔd bekal-bé-e'dəádə́n bé metóm bēmbíd átíntē e bad. Melemlem nê dɔ́o bemeléede bé metóm bēbídte átíntē echēn. Bébenléd mwane ápen ayáge dé metóm. Adé ayáge débēbéd bad ábe bédúbpe dɔ́. Abē bemeléede bé metóm bēbān Sánkwéé awē ahúde bó á mbéb-te á yāl. Nén dékə́n bēn bēwāmsēn yāl ebébtéd akude.

² Bad híin bēhíd échāb mbinde é mekan. Mbéltéd míme ábē bad mébēl bad bēmpēe bēhōbē' mam mé mbéb tāngene Nzii e mbále.

³ Adə́n á chōm áde ábē bemeléede bé metóm débēl bēkanlé nyé póle éche bēn bēnábpe ábel békoben nyé bwēm. Dyöb dēmmād mbakú abided se' bɔ́ɔd áá mókōgsēn bó. Mmē nkōgsēn rísine-'ε bó. Echē ebébtéd édé-'ε bó á nzii.

⁴ Dyöb dénkēchenéé ángel éche émbēl mbéb, bon ambwém bó á ehyān é muú, áhed-táá bédíí á mehan é ehínten-tē, bésine' Epun é nkáásé.

⁵ Dyöb dénkēnagsēn-naá bad bé' bɔ́ɔd. Ambēl mbúú enchó káān mendíb ménlōne, méhód bad bésyāól ábe bēnkēnwōn abé á bad bé Dyöb. Noa awē alāngé'áá bad áá bébele' mekan míme métāngéné mwēmpēn-éé Dyöb dēnsongé alongé, nchoo ne bad saámbe bēmpēe.

⁶ Ambíid e nê, Dyöb dénkōgsēn myad mé Sodom ne Gomora. Anhyáád mō métim mbúmbú, áluúmed chōm éche ébenléd ne bad ábe béēwóo abé á bad bé Dyöb.

⁷ Dyöb dénkōgsēn nímé myad boŋ ansōŋ alongé áde Λατε, áyāle Λατε abédée mod a bwām awě enkēndāŋ mbinde é mbeltéd éche ábē bad bé mbéb bébélé'áá.

⁸ Ane mod a bwām adyēé'áá hōm ahóg ne ábē bad bé mbéb. Epun ne epun téé anyíné'áá, áwōgē-'ε e'bébtéd é' mekan ábe ábē bad bébélé'áá ne ábe behóbé'áá. Mmē mekan mébébté'áá mō nlém á abum áyāle abédée mod a bwām.

⁹ Né-ῶ, Sánḡwée ábíí ngáne áhúdeé bad ábe béwóo abé á bad bé Dyöb á mekagsen-tê. Boŋ ábē akógsén bad bé mbéb káəŋ ne é Epun éche ákāadtē bad bésyāəl.

¹⁰ Abē akógsén bad, tanḡe bad ábe békódtē esíí é mekan mé ekob é yəl, ábe béekobé-'ε nkamlēn.

Ábē bemeléede bé metóm bédé kúmbē, bébé-'ε epame. Béebagé-'áá ngume éche édé ámīn edúbé ké ehóg. Bésyāə' échē ngume káəŋne syāən ésebán béwóge' mbwóg ké nhóg.

¹¹ Ké ángel éche éwóo ngíne ébé-'ε ngum tómaa ábē bemeléede bé metóm, éehōbēē échē ngume éche édé ámīn mekan mé mbéb áyāl á'sō wée Sánḡwée mbéd.

¹² Boŋ ábē bemeléede bé metóm bébele' mekan née nyam é mehín. Echyáádté-'ε ábel békób chō béwúu. Bébele' kéchéé éche épíídé bó á nlém-tê. Ábē bemeléede bé metóm behóbe' dyam téé áde béesōŋtenēé mam mé mbéb á yəl. Né-ῶ, Dyöb débōdēd bó melemlēn nēŋgáne bad béwúé'ε échē nyam.

¹³ Dyöb débēl bétag bwāmbwam áyāle bétágté bad bémpēe. Bédəə' écháb esíí é ekob é yəl akóded. Béekwágé-'áá ábel nê ké müte. Béwóge' bwām ábel échē ndín é mekan áde bédyáḡkē ndyééd hōm ahóg ne nyé. Né-ῶ, bébébte nyé dīn, bépiináád-te nyé akwáḡké.

¹⁴ Nsón nímāb rísyāəl nídii ákáb mesón ne kénzée awě bényíné. Echab esíí ábel mbéb éemaá'ε mbéd. Bédoge' bad ábe adúbe déewúu'ε áte, behūnte' bó á mbéb-te. Ngoód édé bó á mekií-te bwāmbwam. Bédii bad ábe Dyöb ábágé ebómán.

¹⁵ Bétédte nzii echē etāŋgéné, behíde' nzii empée. Behíde' mbeltéd níme Balamε, * mwān awě Βεο. Balamε andəŋ mənέ níme básābēē mō ábel mbéb.

¹⁶ Boŋ Dyöb dēmbēl esel éche Balamε énhōb wée Balamε. Esel, nyam echē eehóbé' akan, énhōb wée Balamε ne ehób é moonyōŋ, ékáné mō áte. Nēn dēmbēl nímé mbeltéd mé mpemíne níme ane nkal é'dəədəŋ Balamε ménsōḡ.

¹⁷ Abén bad bédii née n'yélé nímé níléné. Bédii née mbembag éche epub ékēenēé. Ndib e ehíntén echē Dyöb ábánnédé bó esine bó.

¹⁸ Béboó' nsəl áte ngēn. Béenlad esíí é ekob é yəl átéd bad nlém á abum. Bad ábe bétédéé nlém á abum bédii bad ábe béboótédé mekuu ahúd á echoŋ é bad bé mbéb.

¹⁹ Bélāŋḡe' bad bán nze behídeé ádab ayáge né béebáá á mehaŋ-tê, né bébele' bébel kéchéé éche bédáá, áde edíí nēn bán mbéb nḡháá bēn. Mbéb nḡháá bēn áyāle nēn dyam ké áhéé áde ákamlan mod, ane mod ábelé abé ntāŋ asē e áde dyam.

²⁰ Nzé mod adúbpé Sánḡú Yesu Krīstəə, Nsoode, né amaá alongé dé mbéb dé nkōŋsé ahide áte. Nzé amaá-'ε dō ahide áte boŋ atímé ámbíid áwēd-te ámpē,

* **2:15 Balamε:** Balamε ambé nyōŋḡé bwāmbwam ákud nsábe níme kəŋ Balage ásābēē mō nyaa echē ámbēē mboŋsén ké ábel bad bé Israel mbéb. Nēn áde á kálag e (Nōm 22.4-35).

ádê alongé átédé-'ε mó ntân, né nyaa echê ádíí bɔɔb edé mbéb tómaa ngáne ánsēbēē abé.

²¹ Né émbē mbonj nzé bēnkētogén nzii e mbále abíi tómaa ámad ch́ abíi bonj bétimé' bēbāā' mbéndé é Dyōb éche ésáá á yǎl. Alyágned d́o bēnlyāgnēdtē bó échē mbéndé.

²² Nén ábele' ngan eche békálé nén bán, "Mbwé edyāg ábē e'chó," ne eche békálé nén bán, "Ké chán bēnwōgēdtē nguū mendíb échátánné elɔɔb," édé mbále.

3

Epun échē Sāngwéé ápéé ámpē

¹ A-baányan, enén kálag ch́ elónténé kálag ébe eche rítenléé nyé. Atíntē échē kálag, nkāmtné nyé mam míme nyémáá abii ábel bonj nzé nyéwémténé mekan míme rítélé, méwōngan nyé áwón mewēmtēn míme métāngéné.

² Nhede mēé nyékamtēn mekan míme bekal bé'dáádān bé Dyōb bēnhōbpē se' bɔɔd bán mébenléd. Nyékamtēn-ne chōm-éé Sāngwéé, Nsoode awēd ánlāā' é bembapēé bé nlómag aá béléa nyé.

³ Dyam dé'só, nyétāngéné asōntēn nén bán á e'pun bé asóg, donje á bad débíd ábe esíí é mekan mé ekob é yǎl ékamlanné ádāb alongé. Bēwélé nyé,

⁴ bēhōbē bánken, "Anhób aá mósōpē ámpē, héé-ɔ ádíí bɔɔb? Abēd besáá bēwéde bɔɔb échábé áte, bonj kááñne' bɔɔb mam médíi méde melemlem ngáne mémbeē se á mbooted mé nkōñsé."

⁵ Bēn békoo' ahúd á mewēmtēn nén bán Dyōb dēmbenléd échē eyale é nsál áhag nkonj mí mīn ne rí sé. Ambēl nkōñsé mbíd á mendíb-te, ambenléd-te mendíb áde áhagé nkōñsé.

⁶ Mendíb mwēn-naá ámbenlédte ábébed nkōñsé mé' bɔɔd. Anlóm mbúú. Ene mbúú enchó káāñ mendíb melóné nkōñsé áte rísyāā, chōm ésyāāl éhó.

⁷ Melemlem mé eyale míme Dyōb dēmbenlédte áhag nkonj mí mīn ne rí sé, mósó ábenlédé ákəə mósó ábel bonj ábébed mósó ne muú. Asinne' nkonj mí mīn ne rí sé mé' chii epun é nkáásé. Echē epun d́o ábōdēdtē bad ábe bēwōo abé á bad bé Dyōb.

⁸ Bonj a-baányan, nyéēchatán dyam ahóg. Nyéēchatán nén bán ne Sāngwéé, nhāñlén méesaá átíntē e epun ehóg ne ekálé é mwě.

⁹ Sāngwéé eétongéé álóned áde akag. Donje á bad bēwēmtan pēn bán atonje'. Bonj awēséné nyé áyāle eéhēdēē aá modmod ábōd alongé. Ahede' aá bad bésyāāl békuned mbíd bétēde abel dé mbéb.

¹⁰ Bonj epun éche Sāngwéé ápéé, āpē tǎléd, melemlem nēngáne nchíb ápagké. Echē epun, abobe dényōñ ne esaád é ngine, chōm ésyāāl éche édé ádyōb éhyāñ, ényóñ-'ε. Nkōñsé ne chōm ésyāāl éche édé áwēd-te éhyāñ, ényóñ-'ε.

¹¹ Ngáne édíí bán chōm ésyāāl étāngéné anyóñ, nyaa é bad éhéé-ɔ nyétāngéné abé? Abé ádēn átāngéné asāñ, nyéwōñ-'ε abé á bad bé Dyōb.

¹² Nyéwále ádén abé ngáne nyésinéé epun éche Dyōb átíídé aá Krístəə āpē. Nyéwan-ne áte ábel éwāmsen ape. Echē epun muú méhyāād abobe ámīn, muú ményāmēd chōm ésyāāl-le éche édé áwedé-mīn.

¹³ Bonj desine' akag áde Dyōb ábágé syānē aá mósōbēl abobe dékōōlē ne nkōñsé mé ékōōlē. Bad bésyāāl ábe bēbē á nkōñsé mékōōlē bēbelé' mekan míme rítāngéné.

¹⁴ Né-ɔɔ, a-baányan bɔɔb áde nyésinéé échē Epun, nyébel ngáne Dyōb dényínnē nyé nēe bad ábe bésáá, nyébel-le ngáne éhóbpé aá nyébele mekan mé mbéb. Nyébé-'ε nsañ ne mósó.

¹⁵ Nyébii nén bán atoo áde Sǎngwéé awêd átongeé ápe, ádíi ábel bon ábe bad pónde ákud e'soóson. Nén dǎo Paale ámpē ámbenlédté debyéé áde Dyǒb ábágé mó, átele nyé kálag.

¹⁶ Atelé áden atón á kálag échē ésyāāl. Donge a mekan áde áwe kálag-tē áde álélé asǒnten. Echē ndín é mekan chǎo bad ábe béewóo nsǒnten, ábe adúbe-'ε déetyéeméé béhǎnlanné nsǒnten míme rídé áwēd-te nyaa echē eetǎngene. Melemlem nê dǎo béhǎnlanné e'ped bémpēe á kálag e Dyǒb-te. Abel áde bébele'-áa nê dékǎn bebód ádāb alongé.

¹⁷ Bon a-baányan, nyé pen nyémaá mímén mekan abii. Né-ǎo, nyétéd pónde ábel bon bad ábe béehíde' mbéndé é Dyǒb, béehüntē nyé ne mewusé míme béyágtéé nyé. Nzé nyéhíde mímāb mewusé, né adúbe áden déetyéémmé.

¹⁸ Bon pen nyébê nyéwǒn abé áde Sǎngwéé, Nsoode awêd, Yesue Krístǎa, ábādē nyé mímē nsimé abe. Edúbé ébê ne mó bootya bǎob ne á ngíndé. Ebê nê.

Kálag e'só eche Jone Ndibned n kálag

Metote médé mébe míme mékáo bon Jone átél kálag e e'só. Atote dé e'só ádíi áwéd bad ábe áténlé chó nlém á abum ábel bébê mod nhóg ne Dyöb ne awe Mwän, Yesu Krístæ.

Metote míme mélónténé mébe médíi, Jone alânge bad ábe áténlé chó aá bétéd pónde ne ayáge dé metóm áyále débēbēd abé áde bédíi mod nhóg ne Dyöb ne Yesu Krístæ. Adê ayáge dé metóm áhóbe nén bán ebébtéd épag ne abé áde moonyon abágkē á nkōnsé tē, bán né-óó, Yesue, Mwän a Dyöb eéhele'aá-se ákōn moonyon abé. Abé bemeléede bé metóm béhóbe nén bán nzé mod ákūd e'sooson, atánghéné née ábáá mekan mé nkōnsé á yäl. Bényágte ámpē nén bán e'sooson béewóó'é dyamdyam ábel ne abé á bwám ne áwón edånge ne nhóg ne aníníi.

Alúmed aá adê ayáge déetångheneé Jone alúmté á kálag tē wén aá Yesue ankōn moonyon abé akoó-é alúmed áte nén aá bad ábe bédúbpé Yesue bon bédān-é Dyöb bétånghéné née bédáá nhóg ne aníníi.

Nkabtéd n kálag

Ndibned 1.1-4

E'nyínen bé ekíde ne ehíntén 1.5-2.29

Bän bé Dyöb ne bán bé Satanε 3.1-24

Mbále ne awusé 4.1-6

Chöm éche edånge édíi 4.7-21

Adúbe áde átómé mekan mésyāäl áte 5.1-21

Eyale é alongé

¹ Ntenle' nyé tånghene ane awē adé Eyale é Dyöb éche épeene' alongé. Abédé se á mbooted, sēnwóg mam tånghene mó, sēnnyínén mó mīd, sēmbán mó dīd áyāl, sēmbán-ne mó ekáá á yäl.

² Mó awē apene' alongé antīm moonyon awē bényínneé dīd, dennyín-ne mó. Sēbide' mó mbón, sélāngē-é nyé mam tånghene mó awē abage' alongé áde déemaá', mó awē ambé ne Titée, bon átīm abyéén átínté echêd.

³ Chöm éche sényíne, éche séwóge-é, chóó sélāngēé nyé, ábel bon nyébê nlatén ne sé. Mmēd nlatén-ne rídii nlatén míme déwóó ne Titée ne awe Mwän Yesu Krístæ.

⁴ Sételé enén kálag, ábel bon nímēd menyínge mélôn mbon.

Alongé á bad ábe bédé á e'nyínen bé ekíde

⁵ Bóob-póó, póle echē séwóge á nsəl wée Yesu Krístæ bon sélāngē-é nyé edíi nén, Dyöb ádíi e'nyínen bé ekíde. Atón dé mbéb ké ahóg déesaá mó á yäl.

⁶ Nzé dehóbé bán dedé nlatén ne mó áde alongé ádēd ádíi ádíi alongé dé ehíntén, né dekale metóm né míme syánē mbeltéd-te méēhídēē mbále.

⁷ Bon nzé dewóó alongé dé e'nyínen bé ekíde ngáne Mwän-ne ámpē áwóó, né syánē déēbē nlatén ne nhóg ne aníníi, mekií míme Yesue awe Mwän, mó-é méwobé mímesyánē mbéb nisyāäl.

⁸ Nzé dehóbé bán deewóó'é atón dé mbéb ké ahóg á yäl, né dedoge' échēd yäl, né mbále-é eesaá syánē áte.

⁹ Nzé depanle' mímesyánē mbéb áte, né äbēl ngáne áhóbé, äbēl-le chó nyaa echē etånghéné. Alagsén syánē mbéb, áwōbē-é mímesyánē mbéb nisyāäl.

¹⁰ Nzé dehóbé bán deébeléé mbéb, né dehóbe' bán Dyöb ádíi nkal a metóm, né eyale é Dyöb éesaá-'aá syánē áte.

2

Jone ad Krístəə mǎ adé awesyánē Nwōngene

¹ Nyé ábe nyêdé nēngáne ábēm bǎn, ntenle nyé enén kálag, ábel boŋ nyéebēlē mbéb. Boŋ nzé mod abelé mbéb, syánē dewóó mod awē abele' mekan míme métǎngéné, Yesu Krístəə. Mǎ achānge' syánē Titée.

² Krístəə mwēn-éé ambé nēngáne nde echē Dyöb dēmbenlédté ákǎde syánē áyāl e mbéb míme dēmbenlé. Ambel nē ábel dékud alagsen. Saá-kaá mbéb mímesyánē mēmpen, boŋ mbéb míme bad bé nkōŋsé bésyāāl.

³ Nzé dehíde' mbéndé é Dyöb né édé mbále bán debíí mǎ.

⁴ Kénzéeé awē ahóbé aá mǎbīí mǎ, boŋ eehídé' éche mbéndé, né ene ndín e mod adíi nkal a metóm, né mbále ké pǎg eesaá-'áa mǎ áte.

⁵ Boŋ kénzéeé awē abele' ngáne eyale é Dyöb éhóbéé, edānge éche ene ndín e mod ádáá Dyöb élóne' mbon. Nén dǎá ábele' boŋ debíí ne mbále bán dedé ne Dyöb.

⁶ Kénzéeé awē ahóbé aá módē ne Dyöb, áde alonǵé átǎngéné abé nēngáne alonǵé áde Yesu Krístəə.

Mbéndé e ekóólé

⁷ A-baányan bé edānge, enén mbéndé echē rítenléé nyé eesaá mbéndé e ekóólé, edíi mbéndé e nchun echē nyénwōngē se á mbooted. Enén mbéndé e nchun edíi nkalan mí bwām míme nyémáá awóg.

⁸ Boŋ kénē, mbéndé e ekóólé chǎá rítenléé nyé bǎab, mbále echē edé-'e á mbéndé-te wē, enyínnédé á alonǵé áde Krístəə, enyínnéd-te á alonǵé ádēn, áyāle nén ehíntén ébóótédé amaa, e'nyínen bé ekíde é' mbále é'máá abooted dé apen.

⁹ Kénzéeé awē ahóbé aá módē á e'nyínen bé ekíde boŋ ákǎā mwǎnyan, ene ndín e mod adíi adé á ehíntén-tē.

¹⁰ Kénzéeé awē adǎá mwǎnyan adé á e'nyínen bé ekíde-tē. Né-ǎó, ene ndín e mod éebēlēé dyamdyam áde ábelte' bad bémpee mbéb.

¹¹ Boŋ kénzéeé awē akǎó mwǎnyan, awóó alonǵé dé ehíntén. Ene ndín e mod akag á ehínten-tē eebyéé-'aá wéé akagké áyāle ehíntén ébélé adé néé mod awē akwedé ndím.

¹² Nyé ábe nyêdé nēngáne ábēm bǎn, ntenle nyé áyāle Dyöb álágséné nyé mbéb á dín áde Yesu Krístəə.

¹³ A-besán, ntenle nyé áyāle nyébíí ane awē adé se á mbooted. A-kódébad, ntenle nyé, áyāle nyétómé ane awē adé ebébtéd áte.

¹⁴ A-bǎnbǎn, ntenle' nyé áyāle nyébíí Titée. A-besán, ntenle nyé, áyāle nyébíí ane awē adé se á mbooted. A-kódébad ntenle nyé, áyāle nyēwúú áte, eyale é Dyöb édé nyé áte nyétómé-'e ane awe adé ebébtéd áte.

¹⁵ Nyéédǎā' nkōŋsé ké'ε bwēm ábe é'dé áwēd-te. Nzé mod adǎá nkōŋsé, né eédǎā'é Titée.

¹⁶ Bwēm é'syāāl ábe é'dé á nkōŋsé te, nádē bwēm ábe moonyon a ekob áwóó'é esíí áte, bwēm ábe mǐd médǎā'é anyín ne bwēm ábe bad békumnéé ekáá á tǎl, béehúu'é ne Titée, é'díi bwēm bé nkōŋsé.

¹⁷ Nkōŋsé ne ábe bwēm é'syāāl ábe baányon bēwóó'é esíí áte áyāl echáb, rítóme tómén, boŋ mod awē abele' ngáne Dyöb áhedéé, abág ne Dyöb á ngíndé ne á ngíndé.

*Jone ad nyétéd pǎndé
ne bad ábe bétǎngan Krístəə*

18 A-bānbān, asóg ákwógé apɛ. Bénlāā nyé bán Mod a Ekoyí awě Krístəə ăpɛ, bəɔb-pe bad bé ekoyí híin ábe Krístəə bémáá apɛ. Né-ɔ́, debíi bán asóg ákwógé apɛ.

19 Abé bad bēnkēnkongé bad abé ábe bédé nimesyānē nlatén, né-'aá dēnkəŋ boŋ bētēdē syānē. Nzé bēmbē bad ábe bédé áwesyānē nlatén, né bēmbē bēbé ne syānē, boŋ bēnchené syānē ábel boŋ ényinned ne mbále nén bán bēnkēnkongé abé ne syānē.

20 Boŋ ne nyé, Ane-awě-Béwógté abagé nyé Edəádəŋ éche Esáá. Né-ɔ́, nyé moosyáál nyébíi mbále.

21 Meētēnlēē nyé enén kálag áyāle nyéebíi' é mbále, boŋ ntenle' nyé chó áyāle nyébíi mbále, nyébíi-'é nén bán metóm ké mehóg méēbídēē á mbále-tē.

22 Nzéé-'s adé nkal a metóm? Nkal a metóm adii kénzée awě ahóbé aá, Yesue eesaá Ane awě Dyöb Awógté. Ene ndín e mod chó edé Mod a Ekoyí awe Krístəə, abáa' Titée á yəl, ábāā-'é Mwān.

23 Mod éhēlēē-se abāŋ Mwān a Dyöb á yəl se abé ne Titée. Kénzée awe akobé Mwān a Dyöb, akobé kóŋne Titée.

24 Nyényin nén bán nkaləŋ nime nyéwógé se á mbooted rídé nyé áte. Nzé nkaləŋ nime nyéwógé, rídii rídé nyé áte, né nyémpē nyéēbē ne Mwān a Dyöb nyébé-'é ne Titée.

25 Chöm éche Krístəə ahóbé aá móbě syānē édii alongé áde déemaá'.

26 Ntenle nyé nímén mam áyāle bad bédé ábe bēhəde nyé adog.

27 Boŋ ne nyé, Krístəə abagé nyé Edəádəŋ éche Esáá. Abé áde échē Edəádəŋ édii nyé áte, nyéetógnené modmod áyáged nyé. Echē edəádəŋ éyágte nyé mam mésyáál, mam nime éyágte-'áa nyé médé mbále, méesaá metóm. Né-ɔ́, nyébē nyébē ne Krístəə ngáne Edəádəŋ éche Esáá éyágté nyé.

28 Bəɔb-ɔ́, a-bānbān, nyébē mod nhóg ne mó, ábel boŋ epun éche ápɛé, nlém ríwúu syānē á abum, deewógé-'é e'sōn átyéem mó á'sō.

29 Nyébíi bán Krístəə abele mekan nime métəŋgéné á'sō é' Dyöb, né-ɔ́, nyébíi bán kénzée awě abele' mekan nime métəŋgéné, adii mwān a Dyöb.

3

Jone ahóbé ngáne alongé áde bán bé Dyöb átəŋgéné abé

1 Nyényin ndín e edəŋge échē Titée adáá syānē. Echē edəŋge échábé ámin kóŋ bēchəge syānē bán bán bé Dyöb, bēn-naá dékóó abé. Nzəm échē ekəó boŋ bad bé nkōŋsé bēebii syānē edii áyāle béēsēbpɛé Titée abíi.

2 A-baányəŋ bé edəŋge, syānē dedii bán bé Dyöb bəɔb. Eēbyēēnēē bwām pən chöm-éé syānē débēē. Boŋ debíi bán pónde échē Krístəə ápɛé, syānē déēbē nēŋgáne mó, áyāle nén deényin mó ngáne adíi.

3 Kénzée awě asumé nlém wéé Krístəə átəŋgéné nēé asəŋtə eche yəl ngáne Krístəə mwən ámpē ásáá.

4 Kénzée awě abelé mbéb, akwedé nkáá áyāle abóó mbéndé e Dyöb. Mbéb rídii abóó á mbéndé e Dyöb.

5 Nyébíi bán epɛ éche Krístəə ámpɛé á nkōŋsé ébédéé ámad mbéb. Krístəə mwən-ne eewóó' é mbéb ké nhóg á yəl.

6 Kénzée awě adé ne Krístəə éēbēlēē mbéb. Kénzée awě abele mbéb, eenyínéé Krístəə eebíi-'áa mó.

7 A-bānbān, nyéēmwāg se mod ádog nyé. Kénzée awě abele mekan nime métəŋgéné adii mod awě abele mekan nime métəŋgéné á'sō é' Dyöb, ngáne Krístəə ábeléé mekan nime métəŋgéné.

⁸ Kénzée awě abele mbéb, adii mwän awě Devæle áyāle Devæle ambootéd mbéb Abel sé á mbooted. Nzom echě enkəŋ bonj Mwän a Dyöb ápē á nköŋsé, ebédée ábébed nsón níme Devæle ábéle.

⁹ Kénzée awě adé mwän a Dyöb, éēbēlēē mbéb, áyāle abé á Dyöb adé mó áte, éēhēlēē-ε-se ábéle mbéb áyāle Dyöb dōo adé mó Sáá.

¹⁰ Chöm éche ékoo' syánē alúmed bad ábe bédé bán bé Dyöb ne ábe bédé bán bé Satan édii nén bán, bad ábe béebelé' mam níme métəŋgéné ne bad ábe béedəə baányanj bé Krīsto, béesaá bán bé Dyöb.

Jone ad bad bédəŋ nhóg ne aníní

¹¹ Nkalanj mí bwām níme nyénwōgkē se á mbooted mbédée nén bán, dédəŋ nhóg ne aníní.

¹² Deebág née Keene. Keene abédée mod awě Satanε, anwúú-ε mwānyan. Cheé enkəŋ bonj Keene awúú mwānyan? Anwúú mó áyāle mekan níme mwən ábéle' áá mébédé mam mé mbéb bonj níme mwānyan méntəŋgēn á'sō é' Dyöb.

¹³ Né-ɔó, a-baányan, nyéebág menyáké ngáne bad bé nköŋsé békóó nyé.

¹⁴ Dedəə bānned bé Krīsto bémpēe, nē dōo ábéle bonj debíí bán dehídté ásē e ngíne e kwééd dekudé alongé áde déemaá'. Kénzée awě eédəə bānned bé Krīsto bémpēe, alyəgé adé ásē e ngíne e kwééd.

¹⁵ Kénzée awě akóó mwānyan a Krīsto, adii mod a ewúen, nyēbíí-ε nén bán alongé áde déemaá' déesaá mod a ewúen ké nhóg áte.

¹⁶ Krīstəə ambě áde alongé á nló nímēd. Nén dōo ábéle bonj debíí chöm éche edəŋge édíí. Né-ɔó, syánē ámpē detəŋgéné née débágé áde alongé á nló níme bānned bé Krīsto bémpēe.

¹⁷ Nzé mod adé awě adé nhən, bonj anyíné mwānyan awě atóge' bonj eewóo nlém mí bwām áwōŋgen mó, chán áhelese ahób aá módəə Dyöb?

¹⁸ A-bānbān, edəŋge éche déwánléné nhóg ne aníní, éetəŋgené abé dásō á nsəl-tē ne á póle bonj étəŋgéné abé á mbeltéd ne á mbále-tē.

Jone ahóbe chöm éche ébele' bonj deewógé mbwóg á'sō é' Dyöb

¹⁹ Nzé delúmté nhóg ne aníní edəŋge, né debíí bán dedé bad bé mbále ne debíí-ε bán nlém méwūū syánē á abum á'sō e' Dyöb.

²⁰ Póndé ké ehéé echě nímēd mewēmtən méləŋgé syánē bán debelé mbéb, debíí bán Dyöb ábíí mam mésyāāl tómaa ngáne syánē débíí.

²¹ A-baányanj bé edəŋge, nzé nimesyánē mewēmtən méēləŋge syánē bán dedii bebel bé mbéb, deewógéé mbwóg ké nhóg nzé dekāne' á'sō é' Dyöb.

²² Dekude kéchéé éche désédté mó áyāle dehíde' éche mbéndé débélé-ε mam níme méwógte mó menyinje.

²³ Mbéndé echě ábágé, edii nén, dédúbe á dīn áde awe Mwän Yesu Krīstəə, dédəŋ-ε nhóg ne aníní. Melelem mé mbéndé móo Krīstəə mómpē ámbéé syánē.

²⁴ Kénzée-ε awě ahíde' mbéndé é Dyöb, abág mod nhóg ne Dyöb, Dyöb-pe ábē mod nhóg ne mó. Nén dō-'áá débéléé bonj debíí bán Dyöb adé ne syánē. Debíí áned áyāle Edəədəŋ éche ábágé syánē.

4

Jone ahóbe ad bad bétéd póndé ne e'dəədəŋ bé metóm

¹ A-baányanj bé edəŋge, nyéedúbpé bad bésyāāl ábe behóbe' bán bēwóo Edəədəŋ é Dyöb. Bonj pen, nyékəg bó ábíí nzé edəədəŋ éche édé bó áte éhúú ne Dyöb. Nyékəg bó áyāle ekud é bekal bé'dəədəŋ bé metóm bépédé á nköŋs-te.

² Chõm éche wébenlé bon ebíi mod awě Edǎǎdǎn é Dyõb édíi áte édíi; kénzée awě ahóbé aá Yesu Krístǎ apedé á nkõjsé née moonyon, né ane mod awó Edǎǎdǎn é Dyõb.

³ Bon kénzée awě ahóbé aá Yesu e epedeé á nkõjsé née moonyon, eewóó' Edǎǎdǎn é Dyõb áte. Edǎǎdǎn éche ene ndín e mod áwó áte édii edǎǎdǎn éche ehúú ne Mod a Ebébtéd. Nyênwóg bán échén edǎǎdǎn épě, bǎb-pe é máá ape á nkõjsé-te.

⁴ A-bǎnbǎn nyédíi bad bé Dyõb, nyétómé-'e ábê bekal bé'dǎǎdǎn bé metóm áte, áyǎle Edǎǎdǎn éche édé nyé áte édé ngíne tómaa Satan e awě akamlan bad bé nkõjsé.

⁵ Abê bekal bé'dǎǎdǎn bé metóm bédíi bad bé nkõjsé, né-ǎǎ, mekan míme behóbéé médíi mekan mé nkõjsé, bad bé nkõjsé-'e béwóglan bó.

⁶ Syánē dedíi bad bé Dyõb. Kénzée awě abíi Dyõb awóglan syánē, kénzée-'e awě eésē mod a Dyõb, eewóglánné syánē. Né-ǎǎ, nén dǎǎ mod áhele abíi nhǎlén átíntē e Edǎǎdǎn é mbále ne edǎǎdǎn é metóm.

Jone aá Dyõb ádǎǎ syánē

⁷ A-baányan bé edǎnge, dedǎn nhóg ne aníníi áyǎle nén edǎnge ehúú ne Dyõb. Kénzée-'e awě adǎǎ mwǎnyan a Krísto adíi mwǎn a Dyõb, abíi-'e Dyõb.

⁸ Kénzée awě eédǎǎ baányan bé Krísto, eebíi-'e Dyõb, áyǎle kéchéé éche Dyõb ábeléé élúmte' edǎnge éche áwóñné bad.

⁹ Dyõb álúmté syánē edǎnge ne nén, alómé míme mpǎm mí Mwǎn á nkõjsé-te ábel bon dékud alongé áde déemaá' mbwiined ne mó.

¹⁰ Chõm éche édé edǎnge édíi nén, saké bán syánē dedǎǎ Dyõb, bon nén Dyõb ádǎǎ syánē, anlóm-me awe Mwǎn ákǎde syánē áyǎl e mbéb míme débélé.

¹¹ A-baányan bé edǎnge, ngáne édíi bán Dyõb átómténé syánē adǎn, syánē ámpē detǎngéné dedǎn nhóg ne aníníi.

¹² Mod eényínē Dyõb mbéd. Nzé dedǎǎ nhóg ne aníníi, né Dyõb débē ne syánē, échē edǎnge-'e éche ádǎǎ syánē élōn mbon.

¹³ Nén dǎ-'aá débēl bon débíi bán syánē dedé ne Dyõb, Dyõb-pe áde ne syánē, áyǎle abagé syánē échē Edǎǎdǎn.

¹⁴ Syánē denyíné, delǎnge-'e bad bémpe nén bán Titée alómé awe Mwǎn ábē Nsoode a nkõjsé.

¹⁵ Bad ábe behóbe' bán Yesu e adíi Mwǎn a Dyõb, Dyõb áde ne bó, bǎ-'e bédé ne Dyõb.

¹⁶ Né-ǎǎ, syánē debíi, dedúbpé-'e edǎnge éche Dyõb ádǎǎ syánē.

Kéchéé éche Dyõb ábeléé élúmte edǎnge éche áwóñné bad, bad-te ábe edǎnge édíi áte, bédé ne Dyõb. Dyõb-pe áde ne bó.

¹⁷ Edǎnge éche édé syánē áte, élóné mbon ne nén, nlém méwūū syánē áte á mbwē mé nkáásé, áyǎle nén dedé mod nhóg ne Dyõb á nkõjsé-te hén melemlem ngáne Krístǎ ámbēē ne mó.

¹⁸ Mod awě Dyõb ádǎǎ eewógéé mbwóg. Edǎnge éche élóné mbon énane mbwóg rísyǎǎl. Abán dé nkógsén dǎǎ ápeene mbwóg. Né-ǎǎ, kénzée awě mbwóg ndíi áte, edǎnge éelónéé mó mbon áte.

¹⁹ Delúmte' edǎnge áyǎle Dyõb ásébpé syánē edǎnge alúmed.

²⁰ Nzé mod ahóbé aá módǎǎ Dyõb bon akǎǎ mwǎnyan a Krísto, ane mod akale metóm, áyǎle mod awě eédǎǎ mwǎnyan awě ányíneé, éhēlēē-se ádǎn Dyõb áde eényínē.

²¹ Né-ǎǎ, enén mbéndé chǎǎ bébágé syánē; kénzée awě adǎǎ Dyõb ádǎn káǎñne mwǎnyan.

5

*Jone aá bad ábe bédúbpé
Křístaa bétómé nkõjsé áte*

¹ Kénzée awě adúbpé aá Yesue mó adé Ane awě Dyõb Awógté, adii mwän a Dyõb. Kénzée-’ε awě adəá sáá-a-mwän adəá’ kááñne mwän.

² Nyaa echě débíé’ε bán dedəá bán bé Dyõb edii nén bán syánē dedəá Dyõb, dekonje-’ε échē mbéndé.

³ Adəñ Dyõb adii áhíd éche mbéndé, éche mbéndé-’ε éetómtεneé awúu áte syánē áhíd ch́.

⁴ Kénzée awě adé mwän a Dyõb atómé nkõjsé áte. Nzəm echě atómé nkõjsé áte, edii nén, dedúbpé bán Yesue mó adé Ane awě Dyõb Awógté.

⁵ Modmod ampée eésaá awě atóme nkõjsé áte éetómé mod awě adúbpé aá Yesue adii Mwän a Dyõb.

Jone ahóbe bwēm é’láán ábe é’bide Yesue mbõñ

⁶ Yesu Křístaa ampě á nkõjsé. Bëndusén mó ne mendíb bonj ámbíd e pónde echě áwédé á awəg nímē mekií mēnsyogé. Saké edusen é mendíb chěmpen êmbenléd ne mó, bonj áde áwédé nímē mekií mēnsyogé. Edəádəñ éche Esáá ch́ó élúmte syánē aá nén adé mbále, áyāle Edəádəñ éche Esáá éekalée metóm.

⁷ Nyaa édé éláán ábii mbále tñgene Yesue.

⁸ Debíi mbále tñgene Yesue áyāle Edəádəñ élangé syánē, bëndusén mó ne mendíb, ansyǝg-ke nímē mekií áde áwédé. Echén nyaa éláán ésyā́l élúmte syánē bán Yesue adii Mwän a Dyõb.

⁹ Ngáne dedúbpé mekan níme bad béhóbeé, kéchéé éche Dyõb álñgeé syánē étómténé etógnén abé tómaa mekan níme bad bélñgeé syánē. Nén adé áyāle Dyõb dēn d́ó álñgeé syánē, tñgene awe Mwän.

¹⁰ Kénzée awě adúbpé Mwän a Dyõb, abii nén aá nímén mekan mésyā́l méde mbále. Bonj kénzée awě eedúbpé Dyõb, edii nñgáne ahóbe’ aá Dyõb adii nkal a metóm, áyāle eedúbpé mekan níme Dyõb ahóbe tñgene awe Mwän.

¹¹ Chõm éche Dyõb álñgeé syánē edii nén; abelé syánē dekadé alongé áde déemaá’. Adén alongé adii alongé áde awe Mwän ábageé.

¹² Kénzée awě adé nhóg ne Mwän a Dyõb akudé adé alongé, kénzée-’ε awě eésē nhóg ne Mwän a Dyõb, eekudé adé alongé.

*Déwõñgen nhóg ne aniníi
ákuđ alongé áde déemaá’*

¹³ Ntenle’ nyé ábe nyédúbpé á dñn á Mwän a Dyõb, ábel bonj nyébii bán nyekudé alongé áde déemaá’.

¹⁴ Desumé nlém nén bán, kéchéé éche déhédné Dyõb ngáne ébõñnéde mó, abelé awóg syánē mekáne.

¹⁵ Ngáne débíi-’ε bán awóge’ syánē áyā́l e kéchéé éche déhédné mó, detñgné abii bán abage syánē kéchéé éche déhédné mó.

¹⁶ Nzé mod anyiné mwānyañ abele mbéb níme méepiinéd mó kwéed, atñgné akánnéd mó. Dyõb débě ane mod alongé. Bad ábe rñhóbeé meé nyékánnéd bédii bad ábe mbéb nímā́b méebelée bonj échā́b edəádəñ éwé. Mbéb nídé níme nibe bonj edəádəñ éwé. Nzé mod abelé ene ndín e mbéb meehóbeé meé nyékánnéd ane mod.

¹⁷ Mewusé mésyā́l médií mbéb, bonj donje dé mbéb adé áde déebelé bonj edəádəñ éwé.

¹⁸ Debíi nén bán kénzée awě adé mwän a Dyõb eébelḗ mbéb, áyāle Mwän a Dyõb akəñge mó, Ane awě adé Ebébtéd eéhelḗ-’ε-se ábel mó mbéb.

¹⁹ Debíi bán dedíi bán bé Dyǫb debíi-'ε nén bán Ane awě adé Ebébtéd akamlan bad bésyāāl ábe béēbii Dyǫb.

²⁰ Debíi nén bán Mwǎn a Dyǫb apedé á nkǫnsé-te abagé-'ε syánē nsōhten ábii Dyǫb á mbále. Dedé-'ε mod nhóg ne mó áyāle dedé mod nhóg ne awe Mwǎn, Yesu Krístəə. Mwěnpεn-naá adé Dyǫb, mwěn-naá abage bad alongé áde déemaá'.

²¹ A-bǎnbǎn, nyéewóó' dyamdyam ábel ne myǫb mé metóm.

Kálag echě elónténé ébe eche

Jone

Ndibned n kálag

Kálag echě Jone echě elónténé ébe elúmte bán, “Nlyáged a mwembé” móo atěnlé “Mmwaád nhóg ne ábe bán.” Ane nlyáged a mwembé awě atelé enén kálag adii Jone, mmwaád awě atěnlé chó ne ábe bán bédii bad ábe bédé á mwembé-te. Chõm éche Jone átélé á kálag-tê wén édé nén bán bad bédəŋ nhóg ne aníní, bétéd-te póndé ne bemeléede bé metóm, ne ádab ayáge.

Nkabted n kálag

Ndibned 1-3

Edəŋge étómé chõm ésyāal 4-6

Elébé təŋgene ayáge dé metóm 7-11

Nsógten 12-13

Melənten

¹ Mε, nēŋgáne nlyáged a mwembé, με-εé ntelé enén kálag. Ntenle, we mmwaád awě Dyõb ápwédé, ne ábõŋ bán. Ndáá we ne mbále, saá-kaá mməmpen ndáá nyé, boŋ káəŋne bad ábe bėbíí mbále bédáá nyé.

² Ndáá nyé áyāle mbále echě syánē débíí, débíí-’ε chó á ngíndé ne á ngíndé.

³ Dyõb Titée ne Yesu Krístəə, Mwän awě Titée bėbě syánē nsimé, bélúmed syánē ngəl, bėbě-’ε syánē nsaŋ. Abén bwəm é’syāal bėbē ábe syánē ngáne débéléé mekan mé mbále adəŋ áde dédáá nhóg ne aníní.

Jone aá dédəŋ nhóg ne aníní dédəŋ-’ε mbále

⁴ Mbédé menyŋge bwāmbwam áwóg bán donge á bán ábõŋ behíde’ mbále melemlem ngáne Titée ahóbé aá syánē déhíd.

⁵ Né-ɔɔ, a mwän a mmwaád, ncháa we nén meé dédəŋ nhóg ne aníní. Enén mbéndé echě ntenléé we, eésaa mbéndé e ekóólé. Edii mbéndé eche ebédé ne syánē se á mbooted.

⁶ Echén edəŋge éche rihóbéé edii nén bán syánē detəŋgéné dehíd mbéndé e Dyõb. Ene mbéndé ngáne nyémoosyāal nyéwógé se á mbooted, edii nén, nyétəŋgéné nyédəŋ nhóg ne aníní.

⁷ Bad bé medogké híin bédé a nkõŋsé-te chii. Bédii bad ábe bėekwentene nén bán Yesu Krístəə achyáádté á nkõŋsé née moonyon. Abé bad bédii bad bé medogké ne bad ábe bétəŋgan Krístəə.

⁸ Nyétéd póndé ábel boŋ ntū nímēn méēbōō’ ngēn, boŋ pen, nyékud nsábe níme ríloné mbon.

⁹ Kénzée awě atědté áhíd ayáge áde Krístəə boŋ atimé ahíde’ ayáge démpēe, eésaa ne Dyõb. Boŋ kénzée awě ahíde’ ayáge áde Krístəə, adé ne Titée adé-’ε ne Mwän.

¹⁰ Né-ɔɔ, kénzée awě apedé áwēn boŋ ápēēn ayáge áde déehúu ne Krístəə, nyéekōbē mó áwēn mendáb, nyéelənté-’ε mó ké lentén née mod a Krísto.

¹¹ Nhóbe nén áyāle kénzée awě alənté mó, aládténé mó ábel e’bėbtéd’ é’ mekan ábe ábeléé.

Jone ahóbé e’yale bé asóg

¹² Nwóó mam híin áláa we boŋ meéhēdēē we mó atele á kálag-tê. Boŋ pen nwóó nlém áte ápe wē ábel boŋ dényínen e’só ne e’só, ábel nímesyánē menyŋge mélõn mbon.

¹³ Bán ábe mwānyon a mmwaád awě Dyõb ápwédé, bəlõmme nyé melənten.

Kálag echë elónténé élaán eche Jone Nðibned n kálag

Kálag eche Jone echë elónténé élaán elúmte bán Jone, “Nlyáged a mwembé” mós átelé chós. Gayose nlyáged a mwembé ampée mós áténlé chós. Awēd-te Jone akene’ Gayose áyāle nwōngēn míme ábageé bad bé Krīsto bémpēe, alānge-’e mwembé aá bétéd pónde ne mod awē béchagēé bán Diotrefese. Jone akene-’e Demetruse áyāle nsón mí bwām míme ábéle.

Nkabtéd n kálag

Nðibned 1-4

Békéné Gayose 5-8

Béchágé Diotrefese ðin dé mbéb 9-10

Béchágé Demetruse ðin á bwām 11-12

Nsógten 13-15

Jone alente Gayose

¹ Me nēngāne nlyáged a mwembé, me-éé ntenle’ we Gayose, enén kálag. Nðéé we ne mbále.

² A-mwānyan a edānge, nkāne’ nēn meé mam mésyāal míme ébeleé mékeen we bwām, mmōn-’e ámpē édyēe bwām, melemlēn ngāne edāðdān échōn ámpē édyēē bwām.

³ Menwóg menyīnge bwāmbwam áde donge ábesyānē baānyan bé Krīsto bépédé hén bon bēhób ngāne ne mbále ébeleé mekan míme Dyōb álúmté syānē aá débēle’, mbíí-’e nēn meé elyāgé ebele’ míme mekan.

⁴ Chōmchōm éewōgtēē me menyīnge tōmaa áwóg bán bad ábe bédé ngāne ábēm bán bébele ngāne Dyōb áhedéé.

Jone aá bad béwōngan bad bé Krīsto ábe bébele nsón n Dyōb

⁵ A-mwānyan a edānge, ébele mekan ne nlém nhóg áwōngēn ábesyānē baānyan bé Krīsto, kénéé wēnkēmbíí’ é bó donge á bad.

⁶ Bélāngé mwembé míme ndé hén edānge éche élúmté bó. Nhede meé éwōngēn ábēn bad nzé bétédte nyé áke hōm démpēe. Ebel áned áyāle nē dōo Dyōb áhedéé.

⁷ Abēn bad békágé’áá mebwóg ne mebwóg ábele Yesu Krīstā, bēnkēnkwentēn-naá ákob nwōngēn ké nhóg míme mbíde wēe bad ábe béedúbpe Krīstā.

⁸ Né-óó, syānē ábe dedúbpe Krīstā detāngéné dewōngén ábē bad ábel bon syāā ne bó débēle nsón álāa bad nkalan mí mbále.

Jone achagé Diotrefese ðin dé mbéb ákēn-ne Demetruse

⁹ Mentelé mwembé míme ríde áwōn dyad kálag, bon Diotrefese eékwentēné ábel chōm éche nítélé áyāle áhede’ aá móbē nlyáged a mwembé.

¹⁰ Né-óó, áde mépēé mélāā bad bé mwembé bésyāal mam míme Diotrefese ábeleé. Akaltad sé metóm áyāl. Byánán nē déekwōgnedéé, abāa’ bānned bé Krīsto nken akob, ákāā-’e bad bémpēe ákob bó nken, ánané-’e bó á mwembé-te.

¹¹ A-mwānyan a edānge, wehāntān abé á bad ábe bébele mbeltéd mé mbéb, bon éhāntān abé á bad ábe bébele’ mbeltéd mí bwām. Kénzéé awē ábele

mbeltéd ní bwâm adii mwän a Dyöb. Kénzée-'ε awě abele mbeltéd mé mbéb, eebíi'έ Dyöb.

¹² Baásyāāl behóbe Demetruse mam mé bwâm á yǎl. Abele mekan mé bwâm níme mélúmte' bán adii mod a bwâm. Με-'ε ámpē nhóbe' mó mekan mé bwâm á yǎl, nyébií-'ε nēn bán kéchéé éche rihóbe édé mbále.

Jone ahóbe e'yale bé asóg

¹³ Nwóó mam híin áláa wε, boη mééhēdēē mεé ítel mó ásē.

¹⁴ Nwóó nlém áte ânyín wε mwǎmpīn ní póndé, ene póndé-'aá dényīnēnnē e'só ne e'só, boη dékal.

¹⁵ Nsaη níbê ne wε. Bēn bésyāāl bélómmé wε melentēn. Lentéd mε bēd bésyāāl, nhóg ne nhóg téé.

Kálag eche Judε Ndibned ní kálag

Kálag eche Judε ântenlé, antel chó âtângen bemeléede bé metóm ábe belúmté'áá bán bédé bad ábe bédúbpé Krístæ. Enén kálag eéchabéé áte. Chómpē ewágné kálag echě elónténé ébe echě Petro átélé (2 Petro). Judε awéde' Bad bé Krísto nlém, áá bésu mēkuu ámbíd e mbále e nkalaŋ ní bwám. Áá nímē nkalaŋ ní bwám méehəŋlǎnné. Áá Dyöb dēmbě mó wée ábē bad ngen póg ne ngen ésyāā.

Nkabtéd ní kálag

Ndibned ní kálag 1-2

Abé ne ayáged dé bemeléede bé metóm ne ebómán éche békudté 3-16

Bélébe bad áwúu áte á adúbe tē 17-23

Nnamed mé asóg 24-25

Judε alómé melentēn

¹ Mē Judε, ndii mbaledε awe Yesu Krístæ, mbé-'ε Jemse mwānyan. Mē-éé ntenle' nyé bad ábe Dyöb ápwédé enén kálag. Nyébii nén bán Dyöb Titée adáé nyé, Yesu Krístæ-'ε anəne' nyé.

² Ngəl e Dyöb, nsan ní Dyöb ne edəŋge é Dyöb ébād abé ne nyé.

Bad bé metóm

³ A-baányan, nkénwanén nyé atele bwámbwam təŋgene e'soóson ábe Dyöb ábágé syánē mbwiined ne Yesu Krístæ. Bon bəəb nnyíné mēé ébóó bán nítele nyé təŋgene mekan mémpē. Nwéde nyé nlém á abum nén mēé, nyésu mēkuu ámbíd e mbále e nkalaŋ ní bwám. Mmén nkalaŋ ní bwám méehəŋlǎnné. Dyöb dēmbě mó wée ábē bad ngen póg ne ngen ésyāā.

⁴ Nhóbe' nén áyāle bad ábe béewóo abé á bad bé Dyöb bésólé átínté echēn á mesəəm-tē. Ábē bad béhóbe' nén bán nsimé míme Dyöb ábágé syánē ne alagsen áde álagsanné syánē mbéb, ábágé syánē kunze ábel mbinde é mekan. Dyöb dēmməd nkógsen míme ábē bad békúdé atii se' bəəd. Ábē bad béekobéé Yesu Krístæ áde édíí-'áá bán Yesu mēwəmpen móo adé syánē Sáá abé-'ε Nkamlenε.

⁵ Kénéé nyébii nímén mekan mésyāā, ndáá mēé níkamten nyé ngáne Səŋgwéé ánhūdtē bad bé Israel á mekáá mé bad bé Egipto bon ámbíd e pónde abóded alongé a bad ábe bénkēsum nlém áwē.

⁶ Nyékamten-ne áŋgel ámpē echě énkēndyεé hōm áde Dyöb dēnnabnédté bó, bon bēnhidé áde abwóg á hōm wée bēntəŋgēnnē abé. Dyöb ábánné bó á mehan á mbwəg mé ehíntén wée bēbēē abé ne abé ké ámbíd e Epun émbáá é nkáásé.

⁷ Ndáá mēé nyékamten káəŋne myad mé Sodom ne Gomora ne myad míme mébédé bó benben. Bad ábe mébédé nímē myad, békábé'áá mesón, béhíde-'ε mekan mé esíí mé ekob é yāl míme moonyon éetəŋgenéé abel. Békúdé nkógsen ní muú míme méēđimē'. Mmén nkógsen níde álúmed bad bēmpē bán nén áheleε abenléd ne bó.

⁸ Bon kéné, ábē bad ábe bésólé átínté echēn bómpē bédii bəŋge nló bán nkamlen níde áwāb mekáá. Mmē nló níbele' bēbele' mbinde é mekan, béenyínē nkamlen ní Dyöb néε dyam, bésyāā-'ε ngumε éche édé ámin.

⁹ Boη ké Maikεε, ángel embáá enkêntédte ne mó mwën ásyáη Satane áde búmō bépéntánáá tâηgene mod awe átēd ndim míme Mosεε. Anláá mó dásō aá, “Sáηgwéé ákógsen wε.”

¹⁰ Boη ábê bad ábe bésólé átíntê echên pen, kéchéé éche béesonηtenεé béhóbe chó mam mé mbéb áyāl. Kéchéé éche épédé bó á mewêmten chóó bébeléé. Bébeléé née nyam é mehín. Mmê mekan mên móó mépiinad bó kwééd.

¹¹ Medim ne bó. Bómpē bébele’ ngáne Keene awē anwúú mwānyan ámbenlé. A etútú é mōné, béhele bébel kéchéé, ngáne Balame. E’wúu bé nló-áte ábāb bébēl bómpē béwē melemlem nêηgáne Koraa ánwēē áyāle anwúén Dyōb nló áte.

¹² Abé bad béekwāgēē, né-óó nzé nyāābōō nyēlādné ádyé ndyééd álúmed edāηge éche Sáηgwéé, bébelé bébé nêηgáne mbinde átíntê echên. Echab yāl chên chóó bétōηtanné. Bédii née mbag échē epub ékεεneé échē élúmte’ bán mbúú échō, áde éechó’é. Bédii nêηgáne mel míme méēchyāā’ e’pum ké á póndé échē mel méchyāá’é. Bénábpé awé nêηgáne bwel ábe béwúbne nkan ásē.

¹³ Bédii nêηgáne edib é nkwē éche éhode’ ne ngíne. Ahod áde éhodeé ébidte’ mbinde á nkin. Nê dōó ádāb abé dé mbéb ábidεé áwed. Bédii née betintine ábe bétamnad. Ndib e ehíntēn échē Dyōb ákōηnéde bó esine bó, ébē-ε abé ne abé.

¹⁴ Enōge awē anlóntēn nyongel saámbé á mbyaa míme Adame, anhób se’ bōód á’sō é’ póndé tâηgene ábēn bad. Anhób aá, “Nyénone’, Sáηgwéé āpεēn e’kálé ne e’kálé é’ ángel éche ésáá.

¹⁵ Akāād bad bé nkōηsé bésyāāl. Akwíd bad bésyāāl ábe ádab abé déesaá née abé á bad bé Dyōb nkáá, ákógsēn-ne bad bé mbéb ábe béewóo mbwóg rí Dyōb. Akōgsēn bó áyāle mam mé mbéb míme béhóbeé tâηgene mó.”

¹⁶ Abēn bad báyōgke’ anyoo áte báyōgké-ε bad ahób ngēn. Bébele’ dyam dé mbéb ké áhéé áde bédáá abel. Békume ekáá á tâl, bényinte-ε nsal áte ábel békud bwām.

Nyébê nyékeene’ adúbe á mbále á’sō

¹⁷ Boη a-baányan, nyé pen nyékamtēn mam míme bembapεε bé nlomag ábe Sáá awed, Yesu Krīstāē bēnlāā’ é nyé.

¹⁸ Bēnlāā nyé bán “Ade e’pun bé asóg bεpεé, bad bεpē, béwεlé nyé, béhīdē’ échab esíí é mekan mé ekob é yāl.”

¹⁹ Echén ndín é bad chóó épεene’ nkabēn átíntê e bad bé Dyōb. Esíí é mekan mé mbéb mé nkōηsé ékamlan bó, béewóo-’áa Edāádāη é Dyōb áte.

²⁰ Boη a-baányan, adúbe áde ásáá áde nyéwóó ábē ákwoge’ ákag á’sō. Nyékāanne’, ngíne e Edāádāη éche Ésáá élyágte’ nyé.

²¹ Nyékeene’ alonjé ádēn á’sō nyaa eche nyéchemlédté nēn bán Dyōb ádáá nyé. Nyésine’, nyélyāg nlém nēn bán Sáá awēd Yesu Krīstāē āpē, ábenléd míme nlém rí ngol, nyékud alonjé áde déemaá’. Abel nēn áyāle adáá nyé.

²² Nyéwōη nlém rí ngol wēε bad ábe béédúbpe ne nlém nhóg.

²³ Nyéson alonjé a bad bēmpēe. Nyéhūd bó á dū á muú mehélé. Bēmpēe bédé ábe nyétāηgéné nlém rí ngol awánlen, boη pen nyétédēn bó póndé. Nyétāηgéné káāηne échab mbóté akōō byánán esíí é mekan mé mbéb mé ekob é yāl ékóbté chó mbinde.

Mekáne mé mekenag

²⁴ Ehúmé ébê ne Dyōb áde ábele’ boη nyéehúné á mbéb-te. Mwën-aá apεene’ nyé abwóg á hōm wēε mwën ádíí ne ehúmé. Apεēn nyé áhed ésebán atón dé mbéb ké ahóg áde nyé á yāl, nyéēbē-ε menyīηge.

²⁵ Edúbé ésyāāl ébê ne mós. Mwěmpen mós adé Dyöb áde ásóó alongé ádēd mbwiined ne chōm-ée Yesu Krīstə Sāngwée awêd ábélé. Ehúmé, edúbé, ngum, ne nkamlen ísyāāl nííi níímē, se á mbooted, bəəb, ne á ngíndé. Ebê nê.

Kálag e Mam míme mébenléd Ndibned n kálag

Ndibned n kálag e mam míme mébenléd míme Dyöb álúmté Jone. Jone mó atelé ch́ á pónde eche bad ábe béndübē Krístæ békúde'áá metake áyāle adúbe áde béndübēē nén bán Yesu Krístæ adii Sāngwéé. Atote áde Jone ákóó ahób á kálag tē wén adii ábe bad ábe áténlé ch́ e'lyág bé nlém ne áwéd bó nlém á abum. Mekan míme Jone ábúde atel á kálag tē wén médií mekan míme Dyöb dénlümédte mó á ndóg-te aá mébenléd.

Kénéé edii bán mewēmtēn mébuú áte tēngene nsōtēn míme rídé á kálag tē wén, atón áde dēn ákóó abé áwéd-te adii nén; kóān ne á asóg, Dyöb détm̄ abē bad bé ekoyí ne Satanē áte. Dyöb débēl nén mbwiined ne Sāngwéé, Yesu Krístæ. Dyöb désābē abē bad ábe bédúbpe mó ne nlém nhóg, anamed áde ánamédte bó ábé á nkon n mí mín mékōlē ne nkon n sé mé ekóólé.

Nkabtéd n kálag

Ndibned 1.1-8

Ndóg e'só ne kálag eche béténlé mwembé saámbé 1.9-3.22

Nhíbe n kálag míme n'wóó e'diben saámbé 4.1-8.1

E'lon saámbé 8.2-11.19

Dragone ne nyam ébe 12.1-13.18

Ndóg hiin 14.1-15.8

E'bwog bé melingá mé Dyöb saámbé 16.1-21

Dyöb ábēbté Dyad á Babilon, nyam ekwedé nzum, nkal e'dáádān a metóm, ne Devæle 17.1-20.10

Mbakú e asóg 20.11-15

Nkon n mí mín mékōlē, nkon n sé mékōlē, Jerusalem a ekóólé 21.1-22.5

Nsogtēn 22.6-21

¹ Enén kálag ehóbe mekan míme mébenléd míme Yesue Krístæ ábelé bon mébyēen. Dyöb dēmbē mó nímén mekan aá mébyēen ábel bon álūmed ábe bembæde mam míme mékwógé abenled. Krístæ ambēl awē mbæde, Jone abii nímén mekan alóm áde ánlōmmē ángel áwē.

² Jone mó-'e anhób mam mésyāal ngáne ánnýinnē. Mmén mam mós anhōbpē tēngene nkalan míme rihúú ne Dyöb, ne mbōn echē ámbidte Yesu Krístæ.

³ Nnam mbē ne kenzéé awē aláá' enén kálag ábel bon bad bēmpēe bēwōg nímēn nkalan tēngene mekan míme mébenléd. Nnam mbē-'e ne kenzéé awē awógé nímē nkalan bon ahíd-te mam míme méténlédé á kálag-tē wén. Pónde emaa abé benben echē nímén mekan mésyāal mébenlédte.

Jone alómmé mwembé saámbé melēten

⁴ Me Jone, ntenle mwembé saámbé míme rídé á mbwóg e Esia. Nsimé ne nsañ n Dyöb mbē ne nyé. Dyöb áde áde, áde dēmbē, ne áde débē, ne e'dáádān saámbé bēlōmmé nyé nsimé ne nsañ. Abē e'dáádān é'dé á'sō bé atii dé nkamlēn ádyōb.

⁵ Yesu Krístæ mómpē alómmé nyé nsimé ne nsañ. Mó adé ane awē ahóbe mbále tēngene Dyöb nyaa echē débii bán edé mbále. Mó abédé mod a'só awē ansébe apuu, abé-'e nkamlēne a kēn é nkōhsé.

Adáá syánē, ábelé-'e mbéb méekamlánné syánē ámpē, asyog áde ásyógé nímē mekií a nló níméd.

⁶ Abélé syánē nées beprise ábe bébenle Dyöb eche Sánj awě akamlan bó. Eche ehúmé ne míme nkamlen míbê abé ne abé. Ebê nê.

⁷ Nyénone', áhūē' ne mbag, mod-té-'e ányín mós, kááñne bad ábe bēmbēl bonj awé, abome áde bēmboméé mós á awog. Metúmbé mé nkōñsé mésyāāl-le mélēb mós. Nê dēn dōō ébēē, ébê nê.

⁸ Sánj Dyöb á Ngume ahóbé aá, “Me-éé ndé Alfaa mbé-'e Omégaa.” Mós adé Dyöb áde adé, áde démbē ne áde débē.

Jone anyiné Krístaa á ndóg-te

⁹ Ndii Jone, awen mwānyan. Ndé nhóg awě mómpē adé melemlen ngáne nyé ákanj nlém áwesēn metake míme mépiide bad ábe bédé á nkamlen míme Yesu Krístaa. Bēmbané me á mbwóg echē mendíb méláñnéde eche béchagéé bán Patmōs áyāle menkāl Eyale é Dyöb níláá-'e bad mekan míme rínyínē tñgene Yesue.

¹⁰ Edāádāñ eche Esáá êmpií me á Epun é Sánjú.* Menwóg ehób é ngíne ébidé me ámbīd, émbē nées esaád é eloñ.

¹¹ Enhōb aá “Mam míme ényíné, tel mós á kálag-tê, élóme mímén mwembé saámbé míme rídé á Efesus, á Semaina, á Pegamum, á Tiatira, á Sadis, á Filadelfia ne á Laudesia.”

¹² Dōō nkúnné ányín ehób eche ehóbé'áá áwēm, bonj rínyínē metii míme bēbánné etrukánj ámīn saámbé mé gól.

¹³ Atíntē e míme metii saámbé dōō rínyíné mod awě awágné moonyonj. Anhé mengombe míme méchábé kááñ mépē mós á mekuu-sé, awáá-'e etūd é gól á tál.

¹⁴ Esid é nló épúbé'áá mós féréd nées mbóm, mīd méchodné mós áte nées muú.

¹⁵ Mekuu mémbe mós nées ekii eche béchagéé bán brōns eche béhédé á dū bonj ébé byánán épene' áte, ehób-pe é dumé mós áte nées mendíb míme mésobpe'.

¹⁶ Betintine saámbé bēmbē mós á ekáá émbáá, páá e nsal míbe echē ekóbpe bwámbwam ebíd mós á nsal-tê, e'só-'e é'pené mós nées enyen eche étómtan apen.

¹⁷ Ade rínyíné mós, menkwě mós á mekuu, mbé nées mod awě awédé. Dōō ábané me eche ekáá émbáá á yál bonj áhōbē aá “Weebáá', me-éé ndé Mod a Mbooted mbé-'e Mod a Asóg.

¹⁸ Me-éé ndé ane awě adé alongé. Menwé bonj bōob ndé á alongé abé ne abé. Nwóó nkamlen ámīn e kwééd nwōñ-ge ámīn e mbwóg e kwééd.

¹⁹ Bōob-pōó tēl mekan ásē míme ényínéé, míme mébenlad bōob ne míme mébenléd.

²⁰ Kun e e'konéd echē edé tñgene betintine saámbé ábe bédé me á ekáá émbáá ne metii mé etrukánj saámbé me gól edii nén: Betintine saámbé bédii ángel é mwembé saámbé, metii mé etrukánj saámbé-'e médií míme mwembé saámbé.”

2

Jone alómmé mwembé mé Efesus póle

¹ Ane awě anwágén moonyonj anláá me nén aá “Telé ángel echē edé á mwembé míme rídé á Efesus nén wéé, Mod awě awánlé betintine saámbé áwe ekáá émbáá awě akag átíntē e metii mé etrukánj saámbé mé gól mós alómé enén póle.

² Mbíí mekan míme nyébélé. Mbíí meé nyétédé ntū bwámbwam, mbíí-'e meé nyēkaá nlém áwesēn. Mbíí ngáne nyéeheléé e'bébtéd é' bad akob, mbíí-'e ngáne nyébélé bonj nyéchēm bad ábe béchagéé yál bán bédé bembapee bé nlómag áde béesaá, bonj nyédībēd-te bán bédii bekal bé'dāádāñ bé metóm.

* **1:10** Epun é Sánjú ébédéé melemlen nēngáne mbwe ní Sōndé.

³ Mbíí mée nyêwesan ne e'kan bé nlém, nyékude-'ε metake á dñn ádêm, bon kénê nlém rlyágé ríwúú nyé ábum ngáne nyéhídeé me.

⁴ Bon nhóbe áyāl echên nén mée, nyéedəə'ε me bəəb ngáne nyénsēbēē me adəŋ.

⁵ Bəəb-pəə, nyébēn nyékon anyín nyaa echē nyépédé akwε. Nyétede áden abé dé mbéb nyébele mekan míme nyébélé'áá áde nyébóótédé Yesuε ahíd. Nzé nyéētede áden abé dé mbéb, né mǝpǝ áwēn nhúd ádēn atii dé etrukán á e'dii.

⁶ Bon dyam á bwám áde nyébeleé ádíi, nyéētímtéé mǝd áyāl wée mam míme bad bé epepé ábe Nikolausε ábe mémpē méetímtéé mǝd áyāl.

⁷ Kénzée awě awóó metúu, áwóge chǝm éche Edəədəŋ élanǝgeé mwembé. Kénzée awě atómé mekan mé ebébtéd áte, mǝbe mó kunze ádyé epum é bwel éche ébele bad bébé á alongé á ngíndé, éche é'kwoge á Paradis."

*Jəne alómmé mwembé
míme rídé á Semaina póle*

⁸ Anláá-'ε me ámpē áá, "Telé-'ε ángel echē edé á mwembé míme rídé á Semaina nén wée,

"Mod awě adé mod a'só abé-'ε mod awě adé mod a ndimten, awě anwé bon abé á alongé ámpē, mó alómé enén póle.

⁹ Mbíí mímēn metake mbíí-'ε mée nyédii betóótōkē bé bad, bon kénê nyédii behən bé bad. Mbíí e'bébtéd é' mam ábe bad ábe behóbe bán bédé bad bé Israel kénée béesaá, behóbeé nyé áyāl. Bédii bad ábe bédé bad ábe Satanε ké'ε bad ábe bédé áwē echon.

¹⁰ Nyéebáá' metake míme méhúe' nyé á'sō. Nlanǝge nyé mée, Satanε əbəl béhē nyé donǝge á bad á mbwəg, wée nyékudté metuné áyāl e epun dyōm. Abel nē əkəg áden adúbe. Ké nyéwāg ké wúēn, nyébē nyédúbe me. Nzé nyébéleé nē, né mε-'ε mǝbe nyé alongé áde déemaá' nēngáne nsábe mí mod awě atōmbwéné.

¹¹ Kénzée awě awóó metúu áwóge' chǝm éche Edəədəŋ élanǝgeé mwembé. Bad ábe bétómé mbéb áte béewáá kwééd e edəədəŋ."

*Jəne alómmé mwembé
míme rídé á Pegamum póle*

¹² Anláá-'ε me ámpē áá "Telé ángel echē edé á mwembé míme rídé á Pegamum.

"Anε awě awánlé páá e nsəl míbe echē ekóbpe', mó alómmé nyé enén póle.

¹³ Mbíí wée nyédyé', wée Satanε míme nkamlen rídí. Nyébē nyésum nlém áwēm. Nyēmbé nyédúbé me ne nlém nhóg ké á pónde echē Antipasε. Antipasε ambíd me mbón e mbále, bēnwū'ε mó áfínté echên wée Satanε ádyé'ε.

¹⁴ Bon nwóó nguse e mam áhób nyé áyāl. Baahóg bédé áfínté echên ábe behíde ayáge áde Balame. Balame mó anlúméd Balage ngáne ásōlédte bad bé Israel á mbéb-te adyé áde bedyáge'áá medyé míme bébáge'áá myōb mémpēe née mende, ambəl-lε békābē mesón.

¹⁵ Chǝm émpēe éche ríwónné nyé édíi nén bán, baahóg bédé áfínté echên ábe behíde adúbe áde Nikolausε áyágté.

¹⁶ Né-əə, nyétede áden abé dé mbéb. Nzé nyéētede, né mǝwāmsēn ape áwanen ábē bad, mbenléd páá echē ebíde me á nsəl áwanen ábē bad.

¹⁷ Kénzée awě awóó metúu áwóge' chǝm éche Edəədəŋ élanǝgeé mwembé. Bad ábe bétómé mbéb áte, mǝbe bó mána míme ríkovánéde bó, mǝbǝ-'ε bó aláá áde ápúbe'. Amin e áde aláá, bétélé dñn dékōlē áde modmod éebíí'ε étōmēe mod awě bébéé áde aláá."

*Jəne alómmé mwembé
míme rídé á Tiatira póle*

18 Anláá me ámpē aá, “Telé ángel echē edé á mwembé nime rídé á Tiatira nēn wēé,

“Me Mwān a Dyōb awē mīd méchodneé áte nēe muú, mekuu-’ε mébé mó nēe ekii éche béchəgeé bán brōns boŋ ébé byánán echodne’.

19 Mbíí nsón nime nyébeleé. Mbíí edənge éche nyéwánléné me, mbíí-’ε adúbe áde nyédúbpé me. Mbíí abele áde nyébenleé me, ne nlém nime nyékáá awesən áde nyéwéséné. Mbíí-’ε nēn mēé, nsón nime nyébeleé bəəb, rítómé nime nyénsēbēē abel.

20 Boŋ chōm éche ríhóbeé nyé áyāl édii nēn mēé, nyéwesən mmwaád awē béchəgeé bán Jesebelē. Achəge yāl aá módii nkal é’dəádəŋ a Dyōb. Ayágte’, ádogné ábēm bembəlede ádē adúbe ákáb mesón ne ádyé medyé nime bébágé myōb mémpēe nēe mende.

21 Mbagé mó pónde mēé áte de nímē mbeltéd mé mbéb boŋ eéhēdēē akáb dé mesón atēde.

22 Nyénəne’, mébwēm mó ne bad ábe ákábneé mesón á anəŋ dé nkole, békūd-te metuné mé ngíne. Mēbel nēn nzé béēsóge nímē mekan mé mbéb abel ne ane mmwaád.

23 Mēwūū bad ábe béhíde chōm éche ayágteé, mwembé rísyāā-lē mébīī nēn bán me-éé ndé ane awē abíí mewēmtən ne nlém mí moosyāāl áte. Mod ké ahéé awē abelé mbéb né-’aá mékōgsēnnē mó.

24 “Boŋ nlānge nyé bad ábe nyélyəgé ásē á Tiatira, ábe nyéehídé áden ayáge, nyé ábe nyéeyáɡkē mekan nime béchəgeé mekan mé kun mé Satan, meéhēdēē mēé rítaged nyé ámpē.

25 Boŋ pen, nyébē nyésum nlém áwēm káəŋne áde mépeé.

26 Bad ábe bétómé mekan mé mbéb áte boŋ bébelé-’ε mam nime rílanjé bó mēé bébel, káəŋ ne á asóg dé ádāb alongé á nkōŋsé te wēn, mēbe bó kunze ákamlən meloŋ mésyāāl.

27 Békamlén bad bé nímē meloŋ ne ekáá éche éhyédé, békəgtéd-te bó áte ngáne mod ákotadté mbeé é məg áte.

28 Melemlem ngáne echem Sāŋ ábágé me ngíne, nēe mémpē mébeé ngíne wēe bad ábe bétómé mekan mé mbéb áte. Né-əó, áyāle bétómé mekan mé mbéb áte, mēbē bó tintinē a mbwembwē.

29 Kénzēé awē awóó metúu, áwóge’ chōm éche Edəádəŋ élāngeé mwembé.”

3

Jəne alómmé mwembé nime rídé á Sadis póle

1 Ane mod awē anwágén moonyoŋ anláá me ámpē aá, “Telé ángel eche edé á mwembé nime rídé á Sadis nēn wēé,

“Me awē nwánlé e’dəádəŋ é’ Dyōb saámbé, nwalé-’ε betintinē saámbé, me-éé nlómmé nyé enén póle. Mbíí nsón nime nyébeleé. Bad béhóbe nēn bán nyédé á alongé, boŋ nyéēsaá á alongé.

2 Nyékábned. Nyéhede nímēm nsón asóg dé abel, boŋ bəəb nyéwēd yāl áte nyébel mó bwām, áyāle nnyíné nēn mēé nímən nsón méekwōgnedéé á’sō ábe ádēm Dyōb.

3 Né-əó, nyékamtən chōm éche nyén’yāgēē ne eche nyēnwōgkē, nyékoo chó, nyéte de-’ε áden abé dé mbéb. Boŋ nzé nyéekábne de, né mēpē nēngáne nchīb, nyéebíí-’ε pónde echē mépeé.

4 Nyéwóó nguse é bad á dyad á Sadis ábe béewógté échab mbóté mbinde. Bébē ne me, béhé mbóté éche épúbe’ áyāle békwógnédé.

⁵ Né-ɔ́, kénzée awě atómé mekan mé mbéb áte, mómpē āwāā mbóté échě épúbe, melemlem ngáne bó, méehúd-taá mó dīn á kálag e alonǵé. Měhōb á'sō ábe echem Sáj ne á'sō ábe éche ángel nén meé bédii ábēm.

⁶ Kénzée awě awóó metúu áwóge chōm éche Edáádəŋ élánǵéé mwembé.”

*Jəne alómmé mwembé
míme rídé á Filadelfia póle*

⁷ Anláá me ámpē aá, “Telé ángel e mwembé míme rídé á Filadelfia nén weé,
“Mod awě asáá abé-'ε mod a mbále, mó alómé enén póle. Awóó ngine ákamlən nēŋgáne Dabidε ákamlánáá. Nzé adībpe modmod ééhēlēē adib, nzé adibé-'ε modmod ééhēlēē adibe.

⁸ Mbíi nsón míme nyébeleé. Nóné', ndībnédé we ekob éche édé we á'sō-te, modmod ééhēlēē-'ε chó adib. Mbíi meé ngine echě nyéwóó edé mwāmpīn bon kénē nyéhíde échēm eyale, nyéehóbéé bán nyéebíi'ε me.

⁹ Nyénəne', bad ábe bédé ečon éche Satanε, ábe behóbe bán bédé bad bé Israel kénεε béesaá, bédii bad ábe békale metóm. Měbēl bépē áwōŋ, békwe we á mekuu. Měbēl-le bó moosyāal bēbii bán ndəá we.

¹⁰ Ngáne edíi bán nyéhíde échēm eyale éche rílanǵé nyé meé nyékan nlem áwεsən metake, mémpē meékəá nyé á pónde e metake míme mépē á nkōŋsé, ákəg bad bésyāal ábe bédé á nkōŋsé-te.

¹¹ Nkwogé ape, nyédii nyésum nlem áwēm ábel bon modmod eékobné nyé nimen nsábe.

¹² Bad ábe bétómé mekan mé mbéb áte, měbel bó akon á ndáb echě adēm Dyōb, béebíd-taá áwēd-te ámpē mbéd. Mětél bó dīn áde adēm Dyōb áyāl, mětél dīn á dyad áde adēm Dyōb, Jerusalem a ekóólé awě ahúú ne adēm Dyōb, ámīn. Mětél-le bó adēm dīn dékōlē á yāl.

¹³ Kénzée awě awóó metúu áwóge' chōm éche Edáádəŋ élánǵéé mwembé.”

*Jəne alómmé mwembé
míme rídé a Laudesia póle*

¹⁴ Anláá-'ε me ámpē aá, “Telé ángel echě edé á mwembé míme rídé á Laudesia, nén weé,

“Ane awě adé Ebē nē, awě abele ngáne Dyōb áhedeé, abé mbōŋ e mbále, mbwiined ne mó-'aá se á mbooted Dyōb dēnhəgké chōm ésyāal, mó alómé enén póle.

¹⁵ Mbíi nsón míme nyébeleé. Mbíi meé nyéehóó'ε nyéehūnnē-'áa. Nyēmbé nyéhóó' ké'ε nyéhunne'.

¹⁶ Né-ɔ́, ngáne nyédii etoné, nyéehóó'ε nyéēchodté-'aá, mébidēd nyé áwēm nsəl tē.

¹⁷ Nyéhóbe nén bán nyédé nhən, nyéwóó bwēm é'syāal, nyé bán nyéetógéé-'ε chōmchōm. Bon nyéebíi'ε bán nyédii bad ábe bétómtan atag ábe békóbténé etyəg, ábe bédé atóg, ábe békwedé ndīm, bēbē-'ε nsób.

¹⁸ Né-ɔ́, nlébe nyé nén meé nyéchan gól áwēm echě bétómté á muú-te, ábel nén nyébē nhən. Nyéchan-ne mbóté áwem éche épúbe nyéwáa chó, ábel bon e'son ábe nimen nsób mpeeneé, béenyinnād. Nyéchan-ne dyǵg áwēm áde nyéwōgēdtē á mīd ábel bon nyényinne'.

¹⁹ Bad ábe rídáá nkāne bó áte ríkōgsān-ne bó. Né-ɔ́, nyéwōŋ kán nyéte-de-'ε áden abé dé mbéb.

²⁰ Nyénəne', ntyéémé á ekob nkume-'ε chó. Kénzée awě awóge me ehób bon adībē ekob, měšl, ndyé ndyééd ne mó, mó-'ε adyé ndyééd ne me.

²¹ Bad ábe bétómé mekan mé mbéb áte, měbe bó kunze ádyεε ne me á atii dé nkamlən, melemlem ngáne mmēn ámpē méntōmmē bad bé ekoyí áte bon rídyēē ne echem Sáj áwē atii dé nkamlən.

22 Kénzée awě awóó metúu áwóge' chõm éche Edáádəŋ élanġeé mwembé.”

4

Jone anyiné atii dé nkamlen áde áde amín

¹ Ambíd enén dóo rínyiné ndóg empée. Mennyín ekob ádyõb éche édíbnédé. Dóo ríwóge eháb éche ésébpé aháb áwem, ébedé née elon, élanġeé me nén aá, “Hyăg amín hén, mëlüméd we mekan míme métəŋġéné abenled ámbíd e enén pónde.”

² Abwõg-ábwõg dóo Edáádəŋ é Dyõb épíídé me. Hê dó-'aá rínyiné atii dé nkamlen, rínyinē-'e ngáne mod ádíídé dó.

³ Ane mod awě andii áde atii dé nkamlen, yəl epené'áá mó áte née meláá míme béchəġeé bán jáspa ne kanélian. Ngubélen-ne ámpē enlənéd atii dé nkamlen. Ene ngubélen epené'áá áte née aláá áde béchəġeé bán emeran.

⁴ Metii mé nkamlen mémpēe móom mébe ne méniin ménlənéd áde atii dé nkamlen, bad bémbáá-'e móom mébe ne béniin bēndii mímē metii mé nkamlen. Bénwāā mbóté éche épúbe béhé-'e e'kóté bé nkamlen é' gól á nló.

⁵ A atii dé nkamlen hê, emwēdmwēd ébídé'áá, e'saád ébīde', dyõb-pe ákumé áte. E'kag saámbé ábe é'chodne' é'bédé á'sō ábe áde atii dé nkamlen. Abé e'kag saámbé é'dii e'dáádəŋ é' Dyõb saámbé.

⁶ Chõm empēe ébedé á'sō ábe áde atii dé nkamlen éche émbē née edíb é nkwe éche ewáġne dyené bon ényinné'áá áte.

Nyam éniin enlənéd áde atii dé nkamlen ped ésyāal éniin. Míd mébedé bó yəl esyāal, á'sō ne ámbíd.

⁷ Nyam e'só ebédēe née ngii, nyam echē elónténé ébe ebédé née nyag, echē elónténé éláán enwõŋ e'só é' moonyon, echē chõ-'e elónténé éniin embé née mbye awě apumme'.

⁸ Echē nyam éniin téé, enwõŋ mepab ntóób, mīd-te ménlõn bó yəl esyāal, káŋne á mepab-tê. Békóné'áá bwēm nkuu ne müte ésebán békõmme áte. Békóné'áá bán,

“Sáŋ Dyõb á Ngume, asáá, asáá, asáá.
Mó ambé, mó adé, mó-'aá äpě.”

⁹ Echē nyam éniin ékõnne ane awě adiídé atii dé nkamlen mó awě adé á alongé abé ne abé. Békõnnē mó nkəŋgé míme níbage mó ehúmé, edúbé ne mesáġnen.

¹⁰ Pónde echē békónēe nê, ábê bad bémbáá móom mébe ne béniin bēnkwe áse á'sō wēe ane awě adiídé atii dé nkamlen, awě adé á alongé abé ne abé, bébagé mó edúbé, bébwēm ábab e'kóté bé nkamlen á'sō ábe áde atii dé nkamlen békõnē bán,

¹¹ “Awēd Sáŋgwéé ne ádeD Dyõb, ekwõgnédé
ăkud ehúmé, edúbé ne ngíne,
áyāle nén we-éé ehəġé bwēm é'syāal,
mmõŋ-éé etíídé áhəġ bó ne ábel é'bê.”

5

Mwän-a-Ndyəŋ ní mbód mó akwõgnédé ádibe nhibe ní kálag

¹ Héé rínyiné nhibe ní kálag á ekáá émbáá éche ane awě adiídé atii dé nkamlen. Mmē nhibe ní kálag, bēntel mó bwēm áyāal ped ésyāal ébe, bényāġ bédib-pe mó ne e'diben saámbé.* ² Dóo rínyiné áŋġel e ngíne ehóbe ne ehób

* **5:1** E'diben saámbé é'bédēe e'twé ábe bépennáá nhibe ní kálag, mod awě adíbpé'áá-'e bó abédēe mod awe ene kunze émbagnédte.

éche échágké aá, “Nzé-módé akwögnédé ábóo e’diben bonj ádíbe-’ε nhíbe ní kálag áte?”

³ Bonj ké ádyōb, ké á nkōnsé ké’ε á mbwóg e baásē, modmod eebédeé awě ahelé’áá míme nhíbe ní kálag adibe áte ké’ε ánon mó áte.

⁴ Menchií bwāmbwam áyāle nén bēnkēnyínné modmod awě akwögnédé ádibe míme nhíbe ní kálag áte ké’ε ánon mó áte.

⁵ Dóo mod ambáá nhóg álāngéé me aá, “Weéchyēē’. Nōné’, Ngii-e-nyamε awě abídé á túmbé e Juda, á mbyaa míme kāh Dabidε atómé nzum áte. Ahēle ahúd-te ábē e’diben saámbé, ádíbe-’ε míme nhíbe ní kálag áte.”

⁶ Dóo rínyíne Mwān-a-Ndyōh ní mbód atyéémé átíntē e atii dé nkamlēn ne échē nyam éniin, bad bémháá bēlāhnedé mó. Mmē rídyōh ní mbód mémbe nēε míme bēwúú. Ménwōh meséb saámbé, ne mīd saámbé. Mmē mīd saámbé móo méde e’dāōdāh é’ Dyōb saámbé ábe Dyōb álómé nkōnsé áte rísyāāl.

⁷ Ane Mwān-a-Ndyōh ní mbód ankē nhíbe ní kálag atéd á ekáá émbáá éche ane awě andii atii dé nkamlēn.

⁸ Ade átédé nē échē nyam éniin ne ábē bad bémháá móom mébe ne bēniin, bēnkwe áse a’só wēε ane Mwān-a-Ndyōh ní mbód. Abē bad bémháá bó mod té anwálé rílendε ne kúmbe é gōl, elón e’twé áte. Abē e’twé é’dii mekáne mé bad bé Dyōb.

⁹ Bēnkōn nkāngé mékōlē nén bán,
“Ekwögnédé átéd nhíbe ní kálag,
ne ádibe e’diben ábe bēndibpé.
Ekwögnédé áyāle nén bēnwūū wε,
ékōdnéd-te bad bé Dyōb nímhōh mekií.
Ebelé bétímé bad bé Dyōb.
Bémhid metúmbé ne metúmbé,
bēhóbé mehób nyaa ne nyaa,
bēbid melon ne melon,
bēbé-’ε ndín é bad ésyāāl.

¹⁰ Abelé syānē beprisε ábe bēbenle áded Dyōb,
békamlán-ne á nkōnsé.”

¹¹ Dóo rínóné ámpē bonj ríwōgē ehób é’ ángel bíib, élāhnedé áde abwóg dé atii dé nkamlēn wēε échē nyam ne bad bémháá bēbédé. Echē ángel ébédé e’kálé ne e’kálé, e’dun ne e’dun.

¹² Bēnkōn ne ehób éche échágké bán,
“Mwān-a-Ndyōh ní mbód míme bēnwūū’ε
akwögnédé ákud ngíne, nhōn, debyéé, ngum,
edúbé, ehúme ne mekenag.”

¹³ Dó-’áá ríwógé nhāgtéd rísyāāl míme rídé ádyōb ne á nkōnsé, á mbwóg e baásē,
á edib é nkwe-te, bwēm ésyāāl ábe é’dé áwēd-te békóne bán,
“Mekenag, edúbé, ehúme ne ngum
bēbē ne ane awě adíde atii dé nkamlēn,
bēbé-’ε ne Mwān-a-Ndyōh ní mbód, abé ne abé.”

¹⁴ Echē nyam éniin ehóbé’áá bán, “Ebē nē.” Bad bémháá-’ε bēnkwe áse bēbagé-’ε mó edúbé.

6

*Jōne anyíne Mwān-a-Ndyōh ní
mbód adibpé e’diben ntóob*

¹ Dóo rínyíne ane Mwān-a-Ndyōh ní mbód adibpé ediben ehóg átíntē e e’diben saámbé. Héε ríwógé nyam póg átíntē e échē nyam éniin ehōbē áá “Hyāg!” Ehób ébédé chó nēε dyōb ákume áte.

² Héε rínóné bon rínyinē hósε echē épúbe'. Mod awě andií chό anwálé épwεσε bébē-ε mó ekóté e nkamlen. Abédé mod awě ayǒgké nzum atóm áte akagé'áá-ε áke dētóm nzum émpēe áte éche áwanné ne bad bé ekoyí.

³ Dóo rínyiné ane Mwǎn-a-Ndyōη mí mbód adibpe ediben éche élónténé é'be. Dóo ríwógé nyam echē élónténé ébe, átíntē echē nyam éniin ehóbe aá, "Hyǎg!"

⁴ Héε hósε empée, echē eyǎge bwámbwam, ébídé áwed. Běmbě mod awě andií chό kunze bán áhūd nsarη á nkōηsé-te ábel bon baányonη béwúé' nhóg ne aníní. Běmbě-ε mó sǎηkalaa a nkwáté.

⁵ Ade rínyiné ane Mwǎn-a-Ndyōη mí mbód adibpe e'diben ábe élónténé é'láán, dóo ríwógé nyam echē élónténé éláán, átíntē e echē nyam éniin ehóbe' aá, "Hyǎg!" Héε rínyiné hósε echē ehíne'. Mod awě andií chό anwálé kilo á ekáá.

⁶ Dóo ríwógé ehób nēηgáne ehób éche ébídé átíntē e echē nyam éniin, ehóbe nēn aá, "Asii á ngun ahóg ngēn áyāl e nsábe mé nsón mé epun é bīn ne mesii mé báli méláán míme méelεle nkun áyāl e nsábe mé epun é bīn. Bon pen mod eebébté mōl ne mīm."

⁷ Dóo ane Mwǎn-a-Ndyōη mí mbód adíbpé ediben éche élónténé é'niin. Héε ríwógé nyam echē elónténé éniin ehóbe' aá "Hyǎg!"

⁸ Héε rínyiné hósε echē edé mbále. Mod awě andií chό béchágé'áá mó bán Kwééd, Mbwóg e kwééde-ε áhídē mó ámbíd. Běmbě bó ngíne ákamlen eped é nkōηsé ehóg átíntē e'ped éniin. Běnhōb bán ábenlad nkwáté, nzaa, nkole ne e'loo nyam áwúene bad, á nkōηsé te.

⁹ Dóo ane Mwǎn-a-Ndyōη mí mbód adíbpé ediben éche élónténé é'táan. Héε rínóné á menyán mé e'twé sé, bon rínyinē' e'dáádāη ábē bad ábe bēnwū' é áyāle békálé'áá eyale é Dyōb bēhōbē-ε mam mé mbále tǎηgene Dyōb nyaa eche sébíí bán mbále chό edé.

¹⁰ Abē e'dáádāη é'hóbé'áá ne ehób éche échágké bán, "A-Sǎη Dyōb a Ngum, wε awě esáá ebé-ε mbále, káōηse pón dé ehéé wékāadtē bad bé nkōηsé bon ékūn mekií mīmēd míme bésyógé?"

¹¹ Héε bébágé bó mod téé mengombe míme mépúbe', béléá-ε bó bán bésine mwǎmpīn mí pón dé, káōη ne á pón dé eche mesonégé mé baányarη bé bembaledε ne baányarη bé Krísto mélōnnē, ábe bēwū' é bōmpē melemlen ngáne bēnwū' é bó.

¹² Dóo ane Mwǎn-a-Ndyōη mí mbód adíbpé ediben éche élónténé ntóób. Héε rínyiné ngáne ndōob énéηnéde ne ngíne, enyεn-ne énhīn bwámbwam, ngōn esyāál-le éyǎge' nēε mekií.

¹³ Betintine bēnhūn á nkōηsé ngáne e'pum é' mēl é'soodéé nchōle áde epub éságté alín á bwel.

¹⁴ Abobe dényōη nēηgáne bédáá nhíbe ní kálag áte míme bēnyī' é áte. Mbōod ésyāál ne mbwóg ésyāál éche mendíb mélōnnéde bēnhidé á e'dii.

¹⁵ Héε kēη é nkōηsé, ndāle é bad, bad bēmbáá bé sánze, behōn bé bad, ngíne é bad, betāη ne kunze békōηgé yāl á pwóg é meláá tē ne á meláá míme mébéde á mbōod mīm.

¹⁶ Béchágé'áá mbōod ne meláá bēhōbē bán "Nyéhūnted sé ámīn nyékúten sé ábel bon ane awě adé á atii dé nkamlen eenyíné sé, meliηgá mé Mwǎn-a-Ndyōη mí mbód-te méepiidé sé.

¹⁷ Epun é ebébtéd éche mīmāb meliηgá mébídeé áwed é máá apε, modmod éehēnlé-'aá chό atēηgen."

7

*Bembaledε bé Dyōb
békúde e'chem a'só é' mbōm*

¹ Ade nê atómé, mennyín ángel éniin étyéémé á metónyé mé nkõnsé méniin. Echê ángel énkāη metónyé mé nkõnsé méniin míme epub étóméé âbel bon epub étómé' á nkõnsé, ké'ε á edíb é nkwě ké'ε tâηγεne bwel ké e'hóg.

² Dóo rínyiné ángel empée ebíde á ped echê enyεn ébídεé, awánlé e'chem é' Dyõb dé alongé. Héε ene ángel ne ehób éche échágké, échagεé échíníí ángel éniin eche bébágé ngíne âbébed nkõnsé ne edíb é nkwě

³ bon álāηgē bó aá, “Nyéebébté nkõnsé, ké'ε edíb é nkwě ké'ε mel, káāηne á pónde echê débādēē bembaledε bé Dyõb e'chem á mbom.”

⁴ Dóo ríwógé mesonyé mé bad míme bébádté e'chem á mbom. Bébedé Mbwókél ekalé póg, móom mé e'kálé méniin ne e'kálé é'niin. Mmê mesonyé mémbíid átíntē e metúmbé mé alon á Israel mésyāāl dyôm ne mébe.

⁵ Mesonyé mé bad míme bémbādēē âbê e'chem á mbom á túmbé e Juda mébedé dyôm dé e'kálé ne é'be. Á túmbé e Ruben mébedé dyôm dé e'kálé ne é'be, á túmbé e Gad mébedé dyôm dé e'kálé ne é'be.

⁶ Á túmbé e Ashεε mesonyé mé bad mébedé dyôm dé e'kálé ne é'be, á túmbé e Naftali mébedé dyôm dé e'kálé ne é'be, á túmbé e Manasε mébedé dyôm dé e'kálé ne é'be.

⁷ Á túmbé e Simionε mesonyé mé bad mébedé dyôm dé e'kálé ne é'be, á túmbé e Levi mébedé dyôm dé e'kálé ne é'be, á túmbé e Isaka mébedé dyôm dé e'kálé ne é'be.

⁸ Á túmbé e Zεbulon mesonyé mé bad míme bémbādēē e'chem á mbom mébedé dyôm dé e'kálé ne é'be, á túmbé e Josεb, mébedé dyôm dé e'kálé ne é'be, mébé'ε á túmbé e Benjamin dyôm dé e'kálé ne é'be.

Nsábe míme bad bé Dyõb békudté

⁹ Ade nén atómé dóo rínyiné nkuú mí bad. Bēmbuú áte nyaa echê modmod éehēle'aá bó atón. Bémbíid melon ne melon, bémbíid metúmbé ne metúmbé, bébé nyaa é bad ésyāāl béhōbē'ε mehób nyaa ne nyaa. Bentyēēm á'sō bé atii dé nkamlen ne é' Mwān-a-Ndyōη mí mbód. Bénhē mengombe míme mépúbe' béwálé'ε e'kikag é' mií á mekáá.

¹⁰ Béhóbé'áá ne ehób éche échágké bán, “E'sooson é' baányon é'húε ne áded Dyõb, Dyõb áde ádíidé atii dé nkamlen, é'húε'ε ne awe Mwān-a-Ndyōη mí mbód.”

¹¹ Bad ábe bēnlāηnéd áde atii dé nkamlen bébedéε ángel ésyāāl, bad bémbáá, ne échē nyam éniin. Bēnkwě ásē á'sō bé atii dé nkamlen bébagé'ε Dyõb edúbé.

¹² Béhóbé'áá bán, “Ebê nê! Nnam, ehúmé, debyéé, meságnen, edúbé, ngíne, ne ngum bébê ne áded Dyõb abé ne abé! Ebê nê.”

¹³ Dóo mod ambáá nhóg ásedtεé me aá ken, “Benzéé bēn ábe béwáá mengombe míme mépúbe'? Héé bébídé'?”

¹⁴ Mentimtén mó méé, “A-sāη, wε-εé ebíí.” Dóo álāηgεé me aá, “Abén bad bóo bétómé metake me ngíne áte; béwóbpé mímb mengombe ne mekií mé Mwān-a-Ndyōη mí mbód, bépúbté mó.

¹⁵ Né'aá ábéle bon bébé á'sō bé atii dé nkamlen á Dyõb, bébagé'ε Dyõb edúbé nkuu ne müte áwe ndáb e mekáne. Ane awě adé á atii dé nkamlen, adé áhed pónde ésyāāl ānān bó.

¹⁶ Nzaa éewaá bó ámpē mbéd, píd-tε ámpē éekóbpé bó mbéd. Enyεn éebábédté bó, béewóg-kaá e'chode bé ekíde é' ngíne.

¹⁷ Ayāle nén ane Mwān-a-Ndyōη mí mbód awě adé átíntē e atii dé nkamlen, mwēn ānān bó. Alyāgēd-tε bó wεε mendíb míme mbídé á n'yélé míme mbage' alongé médíí. Dyõb-pε ámpē dépinē bó mēsod mésyāāl á mǐd.”

8

Mwän-a-Ndyəŋ mí mbód adìbpé ediben éche élónténé saámbé

¹ Dóo ane Mwän-a-Ndyəŋ mí mbód adìbpé ediben eche élónténé saámbé. Ade adìbpé chó, ekíde énhōō áte ádyōb, dyam-éé áde eped é háwa.

² Héé rínyíné ángel saámbé éche étyéémé á'sō e' Dyōb, bébágé bó e'lon saámbé.

³ Dóo rínyíné ángel empée epedé, etyéémé á'sō é' menyán mé e'twé, awánlé dīse á gól áde béhyāŋtēé e'twé áte. Bēmbud mós e'twé abe bán áladtēn mekan mé bad bé Dyōb bésyāā́l ábe mendē á menyán mé gól. Mmē menyán mébéde á'sō bé atii dé nkamlēn.

⁴ Mwěntud ríbidé'áá áyāl e e'twé ábe ángel énwālēē, ríkāg ámīn ne mekáne míme ene ángel ékánnádtáá bad bé Dyōb. Ene ángel entyéém á'sō é' Dyōb.

⁵ Héé ene ángel étédé kúmbe eche e'twé é'béde áte, atéd muú míme mémbid á menyán mé e'twé, alónéd áwēd-te, bon ásyōg á nkōŋsé. Nén dēmbēl dyōb ákumé áte e'saád ébide, emwēdmwēd étóme, ndōb-pe éñəŋnad.

Ángel etóó e'lon bé'só é'niin

⁶ Dóo échē ángel saámbé éche énwālē e'lon saámbé ébōŋséné átōŋ ábē e'lon.

⁷ Ángel e'só entōŋ échē elon. Héé meláá mé mbúú ne muú míme meládténé ne mekií bébóótédé asoo á nkōŋsé. Eped ehóg átíntē e'ped bé nkōŋsé é'láán émmad ahyāŋ. Eped é ahín é mel ehóg átíntē e'ped é'láán ne byaá é'syāā́l bēmmad ahyāŋ.

⁸ Ángel eche elónténé ébe entōŋ échē elon. Héé chōm éche éwágné née sāŋkalaa a mbōod echē ehyáa' éhúné á edib é nkwě te.

⁹ Eped e edib é nkwě ehóg átíntē e'ped é'láán, éntīm mekií. Donje ahóg-ke átíntē e monje meláán mé bwēm ábe é'dé á alongé bēnwē á edib é nkwě-te wē. Donje á stíma ahóg-ke átíntē monje meláán éche ébéde á edib é nkwě te wē chōmpē émmäd abéb.

¹⁰ Ángel echē elónténé é'láán entōŋ échē elon. Héé sāŋkalaa a tintine awě achōdné'áá née ekag ábidé ádyōb, ahún ámīn e eped ehóg átíntē e'ped bé e'dib é'láán ne ámīn e mendib míme mébidé' á n'yélé.

¹¹ Dín áde ane tintine ádíi "E'chəə." Eped é mendib ehóg átíntē e'ped é'láán, é'chás'áá. Bad híin ábe bēmmwē nímé mendib bēnwē áyāle nén méchás'áá.

¹² Ángel echē elónténé éniin entōŋ échē elon. Dóo chōm ébómé eped é etondēe ehóg átíntē e'ped é'láán, ébōm eped é ngōn ehóg átíntē e'ped é'láán, ébōm eped é betintine ehóg átíntē e'ped é'láán. Nē dēmbēl eped ehóg-téé átíntē e'ped é'láán ábe ábēn bwēm bēnkwě ehíntēn. E'nyínēn bé ekíde bēnkēmbáá á eped é mūte ehóg átíntē e'ped é'láán, bēnkēmbáá-'áá á eped é nkuu ehóg átíntē e'ped bé nkuu é'láán.

¹³ Dóo rínóné bon rínyínē' mbye apumme se ádyōb te álēbpē-'e ne ehób éche échággé áá, "Medim, medim, medim mébē ne bad ábe bēdyéé' á nkōŋsé á pónde eche échíníi ángel é'láán étōŋgē ábāb e'lon, ábe bēkwógé atōŋ."

9

Elon éche élónténé é'taan

¹ Ángel echē elónténé étáan entōŋ échē elon. Dóo rínyíné tintine abidé ádyōb ahún á nkōŋsé. Bēmbē mós e'kii bé echóg échē éewóo asóg.

² Andibé nsəl mé echóg échē éewóo asóg. Mwěntud mémbid áwēd-te míme rídé nēŋgāne mwěntud míme ríbidé á muú rí ngīne. Mmē mwěntud, mémbēl enyēn éche épéné'áá éehelé'áá ekíde anyíned.

³ Dóo bengóméé bébídé á mwëntud tê wê, bésūd á nkõñsé. Bêmbě-’ε bó ngine nêngáne bengaabobe bé mpwen ábe bédé á nkõñsé.

⁴ Bénlāā ábê bengóméé bán béebelé nkæákæá ké’ε byaá ké’ε mel ebébtéd ké ehóg. Bon bán bébel ebébtéd dásō wée bad ábe béewōo e’chem é’ Dyõb á’sō é’ mbõm.

⁵ Békēmbaá ábê bengóméé kunze áwúu ábê bad. Bon bêmbě bó kunze átaged bó á etûn é ngõn étáan dēmpen. Metake míme ábê bad béwōgkē nzé ábê bengóméé béléde bó, mébē née metake míme mod ákudéé nzé ngabobe a mpwen aléde mó.

⁶ A etûn e échē ngõn étáan, ábê bad bēhēd kwéed bon béenyinné. Bédan bán béwē, bon kwéed ñnyagéd, eban bó áyāl.

⁷ Abê bengóméé bémbēē née hósē éche bébõñséné ákēen á bel. Bwēm ábe é’bédé bó á nló é’bédé née e’kóté bé nkamlen é’ gól, e’só-’ε é’bé bó née e’só é’ baányon.

⁸ Nyon ebédé bó née nyon é bebaád, meson-’ε mébé bó née meson mé ngii.

⁹ E’kíd é’bédé bó á tâl ábe é’bédé née e’kii ábe bad béwáa’é ákúdtēn tâl á pónde e bel. Ntõgag míme mímāb mepab mébéle’áá mbédé née ntõgag mé e’bambam ábē hósē híin édoléé áke á bel.

¹⁰ Bénwõn nkon béwõn-’ε nsyag née nkon ní ngabobe a mpwen. Mmē nkon mó-’áá níwóo ngine ábel baányon ebébtéd á etûn é ngõn étáan. ¹¹ Béwóó kãñ echē ekamlan bó. Ene kãñ edíi ángel echē enõne’ echóg échē éewóo asóg. Ade dñn ádíi á ehób é Hibru bán Abadõne, ábé-’ε á ehób é Grikia bán Apolyõne (nē áde nēn bán mod awē abéte).

¹² Née medim mé’sō métómé ámbíd enén, medim mémpēe mébe médii méhúé’.

Angel etóó elon éche élónténé ntóób

¹³ Ángel echē élónténé ntóób entõñ échē elon. Dóo níwógé née ehób ébídé á metóngé méniin mé menyán mé e’twé mé gól míme mébéde á’sō é’ Dyõb.

¹⁴ Echē ehób élanḡē ángel echē élónténé ntóób, echē ewánlé elon nēn áá, “Huné ángel éniin éche Dyõb ábánné á mehan á edíb embáá é Yufretes.”

¹⁵ Ene ángel enhuné échē ángel éniin. Bēmmäd bó abonñsen áwúu donḡe ahóg átíntē e monḡe mé bad méláán ene pónde chēn, échē epun chēn, ene ngõn chēn mímē mwě mēn.

¹⁶ Bénlāā me mesonḡé mé sánze éche edíide hósē. Ebédé mbwókel é e’dun é’bē.

¹⁷ Nēn dóo ményinnē échē hósē ne bad ábe bédíide chó á ndóg-te. Bad ábe bēndii chó bēnwāā e’kii ábē béwáa’é ákúdtēn tâl á pónde e bel. Abē e’kii é’yágé’áá née muú, é’bé-’ε ebāñ née blúu, é’bé-’ε ebāñ née nsule. Nló mbédé échē hósē née nló ní ngii, muú, mwëntud ne muú míme rídé ebāñ née nsule bēbídē-’ε chó á nsal.

¹⁸ Mmē medim méláán, nédē muú, mwëntud ne ebāñ éche édé née nsule, ábe é’bídé’áá échē hósē á nsal bēnwūū donḡe ahóg átíntē e monḡe mé baányon mé méláán.

¹⁹ Ngine edé échē hósē dásō á nsal ebé-’ε á nkon. Mmāb nkon rídé née nyă, ne nló áyāl, bēbenlad-te mó ábel bad ebébtéd.

²⁰ Moonyon aníní asyáál awē alyagé ásē awē mímē medim ménkēnwúú’é bēnkēntēdéé abele á myõb míme bēn bēbéle. Bēnkēnsógké e’dæádāñ bé mbéb abele, bēnkēnsóg-kaá myõb mémpēe abele, myõb míme bēbēnlé gól, sílva, brāns, ké meláá, ké’ε hyõn, myõb míme méēnyinnē’, méēwõgnē’, méēhelé-’ε akē.

²¹ Béētēdtē-’áá ádāb ábel dé mbéb átimen Dyõb. Béētēdtēē awúu á bad, bēētēdtēē akum á ngan, bēētēdtēē akáb dé mesón, bēētēdtē-’áá echíb.

10

Jone anyine ángel echě ewánlé mwă nhíbe ní kálag

¹ Hê dǎo rnyíné ángel e ngíne empée ebíde ádyōb, esude' ásē, mbag élanjéd mó, ngubélen-ne ebé mó á nló. E'só bémbē mó nēe enyen, mekuu-'e mébé mó nēe mekon mé muú.

² Anwálé mwă nhíbe ní kálag awě bédíbpé áte, ásūm ekuu é ekáá é mbáá á edíb é nkwě-te, ásūm-me ekuu é ekáá é emwēd á nkin.

³ Hēe áhóbé ne ehób éche écháǵké éche éwáǵné ehób é ngii echě edume áte. Ade álébpé esaád, ngin saámbé ênkweńtén ne ndumag.

⁴ Ade ékúmé áte kumén, nhédé'áá chǒm éche béhóbé abooted dé atel, bonj ríwōgē nēe ehób ebíde ádyōb nén bán "Kóo mekan nime ngin saámbé ehóbé, mébē kun, weétele' mó ásē."

⁵ Dǎo ángel echě ményinnē nēe ásúmé ekuu ehóg á edíb é nkwě-te bonj ásūm-me échíníí á nkin átííde ekáá é mbáá ámín

⁶ bonj ámwāg melé á dín á Dyōb áde áde á alonǵé abé ne abé. Mó áhǵé nkonj ní mín ne rísé ne edíb é nkwě ne bwēm é'syāal ábe é'dé áwēd-te. Ene ángel enhób áá "Abébed á pǒndé ké ahóg déebáá ámpē.

⁷ Bonj áde ángel echě elónténé saámbé étōǵgē échē elonj, Dyōb débēl dyam áde ántíí' é áá móǒbēl áde áde á e'konjéd-te. Abēl ngáne ánlāā' é abē bembaledē, bekal bé'dáédāj."

⁸ Hēe ehób éche ménwōǵkē nēe ebíde ádyōb élanǵéé me ámpē nén áá, "Kǵ étéd nhíbe ní kálag nime rídíbnédé áte nime rídé á ekáá é ángel echě etyéémé ne ekuu ehóg á edíb é nkwě échíníí-'e ebé á nkin."

⁹ Dǎo ríkíí wēe ene ángel bonj rílanǵē mó meé ábe me ane mwă nhíbe ní kálag. Dǎo álánǵéé me áá "Kǒb nén, édyē. Acháéd we abum áte bonj ānyīn we á nsal nēe e'chuu."

¹⁰ Dǎo ríkóbé mwă nhíbe ní kálag áwe ekáá, ndyé-'e mó. Annyīn me á nsal nēe e'chuu. Bonj áde ní máá mó amii, ancháéd me abum áte.

¹¹ Dǎo bélánǵéé me bán, "Etánǵéné mekan ahób nime mébenléd ne melonj híin, bad nyaa ne nyaa, mehób nyaa ne nyaa ne kǵh é bad híin."

11

Jone anyine mbóǵ ébe

¹ Dǎo bébáǵé me ntóǵ nime rídé nēe chǒm éche béhǵneé bwēm, bonj bélánǵē me bán, "Kǵ ehǵ ndáb e Dyōb, ehǵ-ke menyán mé e'twé, étōǵ-'e bad ábe bébage Dyōb edúbé áhed.

² Bonj weéhǵgē' eyáde pēn áyāle nén bébáǵé chǒ wēe bad ábe béebíi Dyōb. Bédyanǵtéd Dyad áde Asáá ámín á etún é móom mé ngǵn méniin ne ébe.

³ Mēbē échēm mbóǵ ébe kunze áhób mekan nime mébenléd á pǒndé echě ehúe' á etún é e'pun ekále ehóg mbwǒkel ébe ne móom ntóób. Bēwāā-'e mbóté é melebe."

⁴ Echén mbóǵ ébe édii mel mé menzab mébe ne metii mé etrukánj mébe nime métyéémé á'sō ábe Sánǵwéé awě akamlan nkǒǵsé.

⁵ Nzé mod awémténé-'e bó ebébtéd abel, muú níbíd bó á nsal nime ríhyānte ábāb bad bé ekǵyí nímad-te bó ásē. Nén dǎo kénzée awě awémténé bó ebébtéd abel bēwūū' é mó.

⁶ Abén bad bēwóó ngíne ákǵj abobe ámín ábel nén mbúú eechóg á pǒndé echě bélánǵéé bad mam nime Dyōb áhóbé áá mébenléd. Bēwóó-'e ngíne ábel e'díb é'tim mekií, bēwǒǵ-'e ápēen medim á nkǒǵsé pǒndé ké ehéé echě bédáá.

⁷ Ade bémād-taá mam ahób nime bélómé bó ahób, ene nyam echě ebíde á echóg echě éewóó asóg étyēēmēn bó nzum, etóm bó áte ewúú-'e bó.

⁸ Mmāb ndim-me ménaá á nzii echë epoo' á dyad ámbáá tê wée bêmboméé awab Sāngwéeé á awōg. Béchəge ádê dyad á ngan-tê bán Sodom káa Egipto.

⁹ A etún é e'pun é'láán ne eped, bad bébid melon ne melon, metúmbé ne metúmbé, mehób nyaa ne nyaa, ne bad nyaa ne nyaa bēnōn mīmāb ndim ésebān békwen-tan bán béli-me mō.

¹⁰ Bad ábe bédé á nkōjsé bēwōgēn ábēn bad bébe echab kwééd menyinge. Béchəg ngande, bēbāg-ke nhóg ne aníní nde álúmed menyinge. Bébēl nē áyāle ábē bekal-bé-e'dāədān bēbe bēpíinádtáá bō metake bwāmbwam áde bēbédé á nkōjsé te.

¹¹ Bōn ámbid e ábē e'pun é'láán ne eped, pemē e alonģé embid wée Dyōb esól bō áte bēpuu bētyéem-me ámīn. Mbwóg nī ngīne ménkōb bad ábe bēnyīn bō.

¹² Dōo ábē bekal-bé-e'dāədān bēwōgēé ehób echē échəgkē ébidé ádyōb nēe élanģeé bō nēn aá, "Nyéhyag ámīn hén." Dōo bēsólé á mbag-tē bēke-'e ádyōb. Abāb bad bé ekōyí bēnyīn nēe bēkagkē.

¹³ Abwōg-ábwōg ndōob énágnéd ne ngīne. Eped é dyad ehóg átintē e e'ped dyōm ábe ádê dyad ámbáá émpāntēd áte. E'kálé e' bad saámbé bēnwē áde ndōob énágnédé nē. Mbwóg ménkōb bad ábe bēlyágé ásē, bēbagé Dyōb á ngumē, mō awē adé ámīn, edúbé.

¹⁴ Medim míme mélónténé mébe méntōm. Bōn nōné! Medim míme mélónténé meláán mékwógé ape.

Angel etóó elon echē élónténé saámbé

¹⁵ Angel echē élónténé saámbé entōn echē elon. Dōo ehób éche échəgkē ébidé ádyōb éhābē nēn bán, "Nkamlēn mé nkōjsé rítimé nkamlēn míme awed Sāngwéeé, Dyōb ne awē Krístəə, ákamlēn-ne á ngíndé ne á ngíndé."

¹⁶ Hē dōo ábē bad bēmbáá móom mébe ne bēniin ábe bēdíídé metii mé nkamlēn á'sō é' Dyōb bēkwédé ásē á'sō é' Dyōb bēbagé mō edúbé.

¹⁷ Béhóbé nēn bán,
"Sēságnéné wē a-Sāj Dyōb á Ngum, wē awē edé ane ne awē ambé.
Sēságnéné wē áyāle ebēnlédé echōn ngum eboótédé akamlēn.

¹⁸ Bad ábe bēbenlé wē bēnlīn áyāle meliŋgá nīmōn mé ngīne mēmpě.

Póndé epedé echē bēkáadtē bad ábē bēwédé.

Póndé epedé echē ábōn bembəledē, bekal bē'dāədān,

ne bad ábe bēbenle wē ábe bēbage wē edúbé, bad bēsyāal,

ken bad ábe bédé etógnēn-ε ké'ε ábe bēesě etógnēn, wēsābēē bō.

Ene póndé dōo wēbēbēdtē bad ábe bēbēbte bad á nkōjsé te!"

¹⁹ Hē dōo rínyíné ndáb e Dyōb echē edé ádyōb nēe édíbnédé. A ndáb-te wē-'ε, nnyīn Ntyág mé Melě. Emwēdmwēd étómáá, e'saád é'bíde', ádyōb ákumé' áte, ndōob énágnád ásē, meláá mé mbúú mé ngīne-'ε méhúne.

12

Jōne ányiné mmwaád ne dragōnē

¹ Hē dōo e'chemléd é' ngīne é'bídé ámīn. Mmwaád ambé awē eche mbóté émbēē enyēn, ngōn chō-'ε ebé mō á mekuu sé. Ekóté é nkamlēn éche betintine dyōm ne bēbe bēdíí áyāl ébédé mō á nló.

² Ambé dyēm, ákwōg-ke achyáa. E'wē ne metake mé achád míme áwógé'áá mēmbēl akánéd awé ámīn.

³ E'chemléd bé menyáké bēmpēe bēmbid ámīn. Dōo dragōn ébidé táléd. Enkāl bwāmbwam, éyágé-'ε. Enwōn nló saámbé ne meséb dyōm. Nló téé ménwāā ekóté é nkamlēn.

⁴ Andolén míme nkon donge ahóg átíntê e monje mé betintine meláán ábe bébedé ádyōb, abwém-me bó á nkōnsé-te. Ene dragōn entyéém mmwaád awě ahedé'áá achyáá á'sō-te âbel nén nzé achyáá ádyê mó mwän.

⁵ Dóo ane mmwaád áchyáá mwän a mwenchóm awě atəngéné melonj mésyāāl akamlen ne ekaá éche éhyédé. Boŋ bənsog mwän, békēen mó wée Dyōb ádíí ne ádē atii dé nkamlen.

⁶ Ane mmwaád antóm mehélé á ehyänge wée Dyōb dēmbonjénné áá bətəgen mó á etún é e'pun ekále ehóg mbwókel ébe ne móom ntóob.

⁷ Hê dóo nzum ékúmmé ádyōb. Maikεε bó éche ángel bentyēēmēn ene dragōn nzum. Ene dragōn chó-'ε ámpē ne éche ángel betyéémén bó nzum.

⁸ Boŋ Maikεε ne éche ángel bəntōm ene dragōn ne éche ángel áte. Dragōne ne éche ángel bənkənwōngé etál ádyōb ámpē.

⁹ Dóo bəhúnté ene sánkalaa á dragōn á nkōnsé-te. Ene dragōn chó ebédé ene nyə e'boád echě bəchəgεé bán Devəle ne Satanε, awě adoge' nkōnsé rísyāāl. Bəmbwēm-me éche ángel ésyāāl ásē á nkōnsé nchoo ne mó.

¹⁰ Hê dóo níwógé ehób éche echəgké ébídé ádyōb ehōbē nén bán, “Bəb-pəó, e'soosəŋ é' Dyōb é'pédé. Dyōb álúmté eche ngíne e nkamlen née kəŋ. Awě Krístəə álúmté echě ngíne bəb. Ayāle ane awě ahóbé'áá á'sō é' Dyōb nkuu ne müte áá ábesyānē baányəŋ bəbélé mbéb, bəhúnté mó á nkōnsé. Abánáá bó mam áyāl á'sō é' Dyōb nkuu ne müte.

¹¹ Mekíí mé Mwän-a-Ndyəŋ mí mbód ne mbónj e mbále echě bəbídé'áá bəmbəl bétóm Satanε áte. Bənkweŋtén ké kwééd ákal eyale é Dyōb áyāle nkalaŋ míme békále'áá níbedé mbále.

¹² Né-óó, míne ne ábe bəsyāāl ábe bédé áwed, bənwōg menyŋge. Boŋ ndutul ébē ne bad ábe bédé á nkōnsé ne ábe bédé á edíb é nkwě áyāle nén Devəle asudé ásē áwēn ne meliŋgá mé ngíne ngáne ábíí áá eche póndé edé esónj.”

¹³ Póndé echě ene dragōn ényíne áá bəhúnté mó á nkōnsé, embootéd ane mmwaád awě anchyáá mwän a mwenchóm anan.

¹⁴ Boŋ bəmbě ane mmwaád mepab mébē míme sánkalaa a mbyε, âbel nén ápume ápe hōm áde bəbónjénné mó á ehyänge, hōm áde ákudté ntəgén á etún é mwě rílaán né eped, wée békəó'ε mó wée ene nyə.

¹⁵ Dóo ene nyə ésádé ane mmwaád aléed á yəl. Adē aléed dēnsyəgέ née edíb émbáá, âbel nén éhóod ane mmwaád.

¹⁶ Boŋ ndəb enwōngén ane mmwaád émī edíb éche émbíd ene dragōn á nsəl.

¹⁷ Dóo dragōn élíŋné ane mmwaád, boŋ ákəg ákumé' bel ne nchyáátén míme ane mmwaád rísyāāl míme rílyəgέ ásē, bad bəsyāāl ábe bəbele ngáne Dyōb áhedé boŋ bəbídé-'ε Yesuε mbónj.

¹⁸ Dóo ene dragōn étyéémé á nkin mé edíb é nkwě.

13

Jonε anyíne nyam ébe

¹ Hê dóo rínyíne nyam ebíde' á edíb é nkwě-te. Ene nyam enwōŋ meséb dyōm ne nló saámbe, ewōŋ-'ε e'kóté bə nkamlen dyōm áwe meséb mīn. Nló téé ménwōŋ dīn áde ásyáá' Dyōb.

² Ene nyam echě ményínnē embé née ebwé é ngə, míme mekuu-'ε mékəl mébé-'ε nyonj áyāl née mekuu mé nyam e ahín echě ekaa' ewōŋ-'ε nyän éche échábé eche bəchəgεé bán Bée. Mmē nsəl mémbe née nsəl rí ngii. Drəgəne ambě ene nyam eche ngíne, ábe-'ε chó ádē atii dé nkamlen ne ngíne e nkamlen.

³Ene nyam enwón nló nhóg míme mémbe byánán nkúdé sii echě empon chó awúu, bonj sii eched étim amaa. Yäl enkóm bad bé nkõjsé bésyāāl áte áyāle enén nyam, bébootéd-te chó ahíd.

⁴Bad bébágé'áá dragone edúbé áyāle ambě ene nyam míme nkamlen. Bébágé'áá ene nyam chómpē edúbé béhóbé nēn bán, “Nzé-módé adé nēngáne enén nyam? Nzé-módé ahele atyéémén chó nzum?”

⁵Bēmbě ene nyam kunze áhób e'yale é' kúmbe ne e'yale ábe e'syáa' Dyõb. Bēmbäg-ke chó kunze ábenled míme nkamlen á etún é móom mé ngon éniin ne ébe.

⁶Dóo ene nyam énédté míme nsal áte bonj ébootéd Dyõb asyān. Ansyān ðin á Dyõb, asyān abwóg á hõm wée Dyõb ádyee'é, asyēn-'e bad bésyāāl ábe bédé ádyõb.

⁷Dyõb dēmbě-'e ene nyam kunze áwan nzum ne ábē bad, átóm-me bó áte. Ambě-'e mó kunze ákamlen metúmbé ne metúmbé, melon ne melon, mehób té ne bad nyaa ne nyaa.

⁸Moosyāāl awě adyee á nkõjsé ábe chó edúbé. Bad ábe bébeé chó edúbé bédii bad ábe bétélé ðin á kálag e alongé e Mwān-a-Ndyon mí mbód awě bēnwū'é. Bēntel bó mīn se á pónde echě Dyõb dēnhægkē nkõjsé. Moosyāāl awě adyee' á nkõjsé ábe chó edúbé. Moosyāāl awě bételee mó ðin á kálag e alongé se á pónde eche Dyõb dēnhægkē nkõjsé. Mwān-a-Ndyon mí mbód awě bēnwū'é mó awóo enén kálag.

⁹Kéznéé awě awóo metúu áwóge'.

¹⁰Kéznéé awe edíi nēn bán atāngéné ake á mbwog ákě á mbwog, kéznéé-'e awě atāngéné awé ne nkwaté, nkwaté-'aá bēwūennē mó. Nēn áhednad bán bad bé Dyõb bēwõn e'kanj bé nlém, béchāned-te ngine-ngine ne eyale é Dyõb.

¹¹Hē dóo ínnyiné nyam empée ébidé á ndõb-tē, enwón meséb mébe nēngáne mwān-a-ńdyon mí mbód, éhõbē-'e dyam née dragone.

¹²Ebēnládtáá ngine echě nyam e'só, ébelé-'e áned áwe e'só-te ðen. Abelé-'e nkõjsé ne bad ábe bédé áwēd-te aá bébage' ene nyam e'só edúbé. Ene nyam ebédée nyam echě enwón sii echě empon chó awúu bonj ene sii émaa.

¹³Ene nyam echě elónténé ébe embēl mekan mé menyáké mé ngine. Embēl muú mībíd ádyõb nhún á nkõjsé bad bésyāāl bényin-ne.

¹⁴Andõg-ke bad ábe bédé á nkõjsé bésyāāl ne míme mekan mé menyáké míme ákúde kunze ábel. Abelé'áá-'e nē á'sõ wée ene nyam echě enkũd sii bonj ene sii épon chó awúu. Anláá bad aá bébel edíidĩnge éche bébagéé edúbé éche éwágné nyam echě enkũd sii e nkwaté bonj ebé ebé á alongé.

¹⁵Bēmbě nyam echě elónténé ébe kunze áhébe peme e alongé á edíidĩnge é nyam e'só ábel nēn échē edíidĩnge éhel dyam ahób éwúu-'e bad bésyāāl ábe béekwēntene mó edúbé abe.

¹⁶Ene nyam ennyágéd bad bésyāāl, ken bad ábe bédé etógnén ké'ε ábe béesē etógnén, nhon ne ntógétõke, ntān ne kunze, aá béhē bó e'chem áwab ekáá émbáá ké'ε áwab e'só é'mbõm.

¹⁷Modmod eéhele'áá chõmchõm achan ké'ε asóm ésebán awóo ábē e'chem. Abē e'chem é'bédée ðin áde enén nyam ké'ε eche nómbē.

¹⁸Nēn áhedne debyéé. Mod ké ahéé awě awóo nsõnten áhed áte chõm éche nómbē echě ene nyam edíi. Ene nómbē edii nómbē e ðin á mod. Ane mod eche nómbē edii mbwókēl ntóob ne móom ntóob ne ntóob.

14

Jõne anyiné Mwān-a-Ndyon mí mbód ne ábē bad

¹ Hê dǎo rínóné boŋ rínyínē Mwǎn-a-Ndyoŋ mí mbód atyéémé á mbǎod eche béchǎgǎé bán Zayoŋ. Bad bébéde ne mǎ mbwǎkél ekálé, móom mé e'kálé méniin ne é'niin ábe bénwōŋ áde dǐn ne dǐn áde Sáá áwab mesó mé mbǎm.

² Ene pǎndé dǎo rǎwǎgǎ ehǎb ébídé ádyǎb. Eché ehǎb ébédeé néé ntǎgag mé eláá éche ésobpe, ébé-'é néé ntǎgag mímé rǎbǎg nzé ngin etómé. Ehǎb éche ménwǎgkǎ ébédeé nǎŋgáne ntǎgag mí bad ábe békume rǎlende.

³ Abé bad mbwǎkél ekálé ne móom mé e'kálé é'niin ne é'niin béntyēm békǎnē' nkǎŋgé mékǎǎlé á'sǎ bé atii dé nkamlɛn ne á'sǎ é' nyam ché éniin éche édé á alonǎgǎ, ne á'sǎ é' bad bémbáá. Modmod enkǎnhenlé mímé nkǎŋgé ayǎge nzése bǎ bad mbwǎkél ekálé móom mé e'kálé méniin ne é'niin ábe Dyǎb ákǎdté á nkǎŋsé-te.

⁴ Abén bad bébédeé bad ábe béēwǎgǎ mbinde e mmwǎád áyǎle nén béēbǎi' é nsób mé mmwǎád. Abé bad bǎo béhǎde, Mwǎn-a-Ndyoŋ mí mbód kéhéé wéé ákagkǎ. Abén bad bǎo békǎdté áttǎnté e baányoŋ. Bǎ-'aá bédé néé e'pum bé'sǎ ábe bébǎgǎ Dyǎb ne Mwǎn-a-Ndyoŋ mí mbód néé mende.

⁵ Metóm ké mehǎg méesaá bǎ á nsǎl, béēwǎo-'áa awusé ké ahǎg á yǎl.

Angel éláán épééné nkalan ní mbakú e Dyǎb

⁶ Hê dǎo rínyíné ángel empée epumme' se ádyǎb. Ene ángel empéeén nkalan ní bwǎm míme rǎde abé ne abé. Mmē nkalan mǎ-'aá álǎngǎ'áá bad ábe bédé á nkǎŋsé, bad nyaa ne nyaa, metúmbé ne metúmbé, mehǎb nyaa ne nyaa, ne meloŋ ne meloŋ.

⁷ Ene ángel enhǎb ne ehǎb éche échǎgkǎ aá, “Nyébage Dyǎb edúbé, nyébage-'é mǎ mekenag áyǎle nén eche pǎndé e nkáásé emaa ape. Nyébage' edúbé ne ane awé ahǎgǎ ámǎn ne ásē, edǎb é nkǎwǎ ne n'yélé.”

⁸ Angel empée eché elónténé ébe enhǎd mǎ, éhǎbē nén aá, “Ndǎle e Dyad, Babilǎn amaa ne amaa ásyǎǎl! Ambél bad bé meloŋ bésyǎǎl bémmwē míme mǎm mé ngǎne. Mmē mǎm mébédeé esǎí é nkǎbtéd mé akwalɛɛ.”

⁹ Angel empée eche elónténé éláán enhǎd bǎ, éhǎbē ne ehǎb éche échǎgkǎ aá, “Kénzéé awé abage' ene nyam eche ebídé á edǎb é nkǎwǎ-te ne échē edǎdǎŋge edúbé boŋ ákǎd-te ábē e'chem áwe e'sǎ é' mbǎm ké'ε á ekáá,

¹⁰ mǎmpē ámwē mǎm mímé rǎde melǎgǎ mé Dyǎb. Bésyǎgǎ mǎ á kǎb e melǎgǎ mé Dyǎb ne ngǎne esyǎǎl. Kénzéé awé abage ene nyam edúbé ane mod ákǎd metuné mé muú míme rǎhunne' bwǎmbwam á'sǎ é' ángel éche ésáá ne Mwǎn-a-Ndyoŋ mí mbód.

¹¹ Mwǎntud míme rǎbǎde á muú míme rǎhyǎŋte' bǎ, rǎchǎgke' ámǎn á ngǎndé ne á ngǎndé. Nkuu ne mǎte, nkǎme áte méesaá ne bad ábe bébage ene nyam ne échē edǎdǎŋge edúbé. Né-'aá edǎí ne kénzéé awé awóó e'chem é' dǎn ábe ene nyam.”

¹² Nén áhǎdnad bán bad bé Dyǎb békǎŋ nlém. Bad ábe bébele ngáne mbéndé é Dyǎb éhǎdeé boŋ bédúbe-'é Yesue.

¹³ Dǎ-'aá rǎwǎgǎ néé ehǎb ébídé ádyǎb éhǎbē aá, “Tél ásē nén wéé, bootya bǎab, nnam ne bad ábe béwédé, áyǎle bédúbpé Sáŋgwéé.” Edǎǎdǎŋ éhǎbe nén aá “Ée, békǎd nkǎme áte áyǎle nsǎn míme bébélé, békǎd nsábe áyǎle nsǎn ní bwǎm míme bébélé.”

ŋone anyiné bépáde' mbote á nkǎŋsé

¹⁴ Dǎo rínóné boŋ rínyínē mbag eche épúbe'. A mbag mǎn wē, mod andyéé awé awǎgné Mwǎn-a-Moonyoŋ. Ekóté é nkamlɛn é gǎl ébē mǎ á nló, páá eché ekǎbpe eche bépádnéé bwēm nǎŋgáne ngun, chǎ-'é ebé mǎ ekáá.

¹⁵ Angel empée embíd á ndáb e Dyöb-te élēbpē ane awě andyεé á mbag mĩn ne ehób éche échágkē aá, “Benléd echoŋ páá ápád mbote, áyāle póndé epedé echē bēpadεé. Mbote é nkōŋsé é máá ayāg.”

¹⁶ Dóo ane awě adyεé á mbag mĩn átōmtéé páá á nkōŋsé, apád-te mbote é nkōŋsé ésyāā.

¹⁷ Dóo ángel empée echē chό-’ε ámpē enwálé páá echē bēpádnεé bwēm nēŋgāne ngun ébídé á ndáb e Dyöb echē edé ámĩn.

¹⁸ Angel empée empē echē ewóó ngĩne ámĩn e muú, embíd á menyán mé e’twé boŋ álēbpē ángel echē ewánlé páá echē ekóbpe ne ehób echē échágkē aá, “Benléd echoŋ páá, éladεn mechəŋ mé e’pum é’ mel á nzag éche edé á nkōŋsé, áyāle e’pum é’yógé.”

¹⁹ Dóo ene ángel étómté eche páá á nkōŋsé boŋ áladé ábē bad ábwēmē bó wée Dyöb álūmtéé mĩmē meliŋgá mé ngĩne, ngāne bēladεé e’pum é’ mel boŋ bēbwēm á bwāl bé e’pum é mel.

²⁰ Bēndyāŋ ábē e’pum é’ mel á bwāl ábe béesē á dyad tē. Mekií mémbūl, mébé e’che ásē dyam méta mehóg ne epεd, méchāb-pe áte dyam mbwókεl é máyl ébe.

15

Jōne anyiné ángel saámbé ne medim saámbé

¹ Hē dóo rĩnyíné e’chemléd bēmpēe ádyōb ábe bēmbē ngĩne, bēnkōmēd me yāl áte. Menyín ángel saámbé éche ewánlé medim saámbé. Mmē medim mósó médé medim mé asóg áyāle mósó Dyöb débēnlédté álúmed mĩmē meliŋgá ámād-te áte.

² Dóo rĩnyíné chōm néε edib é nkwě éche edé néε dyεné, éche békúmténé ne muú. Menyín-ne néε bad bētyéémé á nkəg mé échē chōm éche ébédé néε edib é nkwě, bēwálé rĩlendε ní Dyöb. Abē bad bēbédéε bad ábe bēntōm ene nyam áte, ne échē ediídingε ne nómbε e dĩn áde ene nyam e’só.

³ Békóné’áá nkāŋgé míme mbəledε a Dyöb, Mosεε, ne míme Mwān-a-Ndyōŋ ní mbód, bán,

“A-Sáŋ Dyöb á Ngum,

rĩmōŋ mbēltéd rídé ngĩne rĩkómté-’ε mod yāl áte.

Á kāŋ e meloŋ,* echōŋ nyaa etāŋgéné, edé-’ε mbále.

⁴ A-Sáŋ, nzé-módé éebāŋ wε?

Nzé-módé eébāgē wε edúbé?

Mmōŋpεn-naá esáá.

Bad bé meloŋ bésyāāl béhyē wε edúbé abε.

Mmōŋ mbēltéd míme rītāŋgéné rĩbídé áwed.”

⁵ Ade nén átómé dóo rĩnyíné néε bédíbpé ebem é Dyöb á ndáb e Dyöb.

⁶ Dóo ángel chē saámbé éche énwālē medim saámbé ébídé á ndáb e Dyöb-te wē. Bēnhē mbóté échē ésáá éche ekine’ áte, bēwáá-’ε bengáá bé gól á tāl tē.

⁷ Dóo nyam póg átĩntē nyam éniin, ébágé échē ángel kúmbe é gól saámbé, échē élóné ne meliŋgá mé ngĩne mé Dyöb, mós awě adé abé ne abé.

⁸ Dóo mwěntud mé ehúmé é Dyöb ne ngĩne e Dyöb bēlóné á ndáb é Dyöb-te. Modmod-te ekēnhenlé asól á ebem tē wē káāŋ né medim saámbé míme échē ángel saámbé mēpédé á asóg.

16

Kúmbe saámbé é meliŋgá mé ngĩne mé Dyöb

* **15:3** Donje á kálag dé’só áwóó: *kāŋ e meloŋ*; donje-’ε áwóó: *kāŋ e bad bé Dyöb*.

¹ Dóo níwógé néε ehób éche échágké ébidé á ndáb e Dyöb te wê, élāngē échē ángel saámbé aá, “Nyékag, nyésyög melingá mé ngíne mé Dyöb míme médé á kúmbe saámbé te á nkõjsé te.”

² Hê dóo ángel e'só ékíi ene kúmbe e melingá mé ngíne mé Dyöb asyög á nkõjsé-te. Melóg míme médé ebébtéd, míme méwag bwámbwam mémbíd bad á yál. Abê bad bébédeε bad ábe bēnwōη e'chem ábe ene nyam bébé-'ε bad ábe bébágé'áá échē ediidingε edúbé.

³ Dóo ángel echē elónténé éβε ésyógé ene kúmbe e melingá mé ngíne á edíb é nkwě te. Mēntīm nēngáne mekií mé ndim mí mod. Chóm-té éche ébédé á alongé á edíb é nkwě-te wê énwē.

⁴ Dóo ángel echē elónténé éláán ésyógé melingá mé ngíne míme mébédé áwē kúmbe', á e'díb ne á n'yélé tē. Abê e'díb bēntīm mekií.

⁵ Dóo níwógé ángel echē ekamlan mendíb ehóbe' aá, “Mbakú e nkáásé echōη etāηgéné. Wε awē edé, awē ambé-'ε. Wε awē Esáá.”

⁶ Mbakú échōη etāηgéné áyāle bēnsyög mekií míme ábōη bad ne ábōη bekal-bé-e'dáádāη, né-ó ebagé bó mekií ámwé. Mmē nkógsen mó-'aá bétāηgéné akud.

⁷ Dóo níwógé néε ehób ébidé á menyán mé e'twé éhōbē nēn aá, “A-Sāη Dyöb á Ngum, mbakú echōη etāηgéné edé-'ε mbále.”

⁸ Dóo ángel echē elónténé éniin ésyógé melingá mé ngíne míme mébédé áwē kúmbe-tē á etondεε. Dyöb dēmbě Etondεε ngíne áhyáad bad néε muú.

⁹ Bad bēnhyāη ne e'chode bé ekide é' ngíne. Héε bésyáá dīn á Dyöb mó awē ákamlan nímē medim. Boη bēnkēnhāηlénne mbéltéd mé mbéb átimen Dyöb ábe mó ehúmé.

¹⁰ Dóo ángel echē elónténé étáan ésyógé melingá mé ngíne míme mébédé áwē kúmbe á atii dé nkamlen áde ene nyam echē ébidé á edíb é nkwě-te. Hê dóo nkamlen míme ene nyam níkwédé ehíntén áte. Bad ábe bēhídé'áá ene nyam béléáádé'áá ábab e'chém áyāle e'wε ábe bēwógéé.

¹¹ Bénsyāη Dyöb ámīn áyāle mewε mé melóg míme bēwógé'áá. Boη bēnkēntedéé nímāb mbéltéd mé mbéb átimen Dyöb.

¹² Dóo ángel echē elónténé ntóob ésyógé melingá mé ngíne míme mébédé áwē kúmbe-tē á edíb é mbáámbáa é Yufretεs. Echē edíb énlēn, áboηsen nzii ábel boη kāη échē ébidé wéε etondεε ábídeé éhēl atóm.

¹³ Dóo rínyiné néε e'dáádāη bé mbéb é'láán ábe é'dé néε e'būd é'bídeé. Abê e'dáádāη, ehóg émbíd á nsāl míme dragone, ehóg ébid á nsāl míme nyam echē émbíd á edíb é nkwě-te, échíní-'ε ébid á nsāl míme nkal e'dáádāη a metóm.

¹⁴ Abê e'dáádāη é'díi e'dáádāη bé mbéb ábe é'bele menyáké, é'hyóme' nkõjsé áte rísyāāl, bētānē kāη é bad, bēladé bó áte, ábel béboηsen nzum e epun éche Dyöb á Ngum ákáádté bad.

¹⁵ Yesue ahóbé aá, “Nyénōné, mēpě á epun éche modmod éebíí'ε, ngáne nchíb ápagké. Nnam ne ane awē adyéé epin, awále-'ε eche mbóté áyāl ábel boη eékāg nsób boη awóg akwágké á'sō é' bad.”

¹⁶ Abê e'dáádāη bēnlād échē kāη áte á hōm áde béchagεé á ehób é Hibru bán Amagadn.

¹⁷ Dóo ángel echē elónténé saámbé chó-'ε ésyógé melingá mé ngíne míme mébédé áwē kúmbe-tē á pemε-tē. Ehób éche échágké émbíd á atii dé nkamlen á ndáb é Dyöb te, éhōbē nēn aá, “Ebénlédé.”

¹⁸ Emwεdmwεd étómé'áá, dyöb ákumé' áte, ngin-ne étóme'. Ndōob ennāηnéd ne ngíne nyaa echē ébénlédéé ámpē taa moonyoη abág á nkõjsé. Ndōob ennāηnéd ne ngíne nyaa echē ebédé ebébtéd.

¹⁹ Hê dóo dyad á ngíne ámbáá ákábné áte moηge méláán, myad mémbáá míme mébédé á meloη mésyāāl mémpāā. Dyöb dēnkamtén ngíne-e-dyad,

Babilōne, ábēl-le aá bad ábe bédé adē dyad békud nkógsen adēhób aá móbel bémwê mím míme míme melingá mé ngíne.

²⁰ Dyad ké ahéé áde mendib ménlənédte démbōo, mbōad ésyāal-le ényón.

²¹ Meláá mé mbúú míme médé e'del dyam móom mé kilo méniin ne étáan, mébídé'áá ámín méhüntād baányon ámín. Abē bad bénsyān Dyōb áyāle abē e'dim é' meláá-mé-mbúú béntōmtēn ebébtéd abé.

17

Jone anyiné mmwaád awē adiídé nyam

¹ Dóo ángel póg átintē échē ángel saámbé éche énwālē kúmbe saámbé épédé bonj élāngē me aá, “Hyäg, nke rílu med we nkógsen míme akwalee ambáámbáa ákudté. Ane akwalee adyēe' dyad ámbáá áde adé benben ne e'dib é'mbáá híin.

² Mmwaád awē kâh é melonj mé nkōjsé ésyāal énáñnáádtáá. Bad bé nkōjsé bémwágé'áá mím míme ane mmwaád mékōbē bō békābē-'e mesón ne mó.”

³ Dóo Edáádān é Dyōb épíidé me, bonj ángel ékēné me á ehyānge. Ahed dō'áá rínyiné mmwaád nhóg. Ane mmwaád andii nyam echē eyāge. Ene nyam enwōn mím míme mésyāo Dyōb yāl esyāal. Ene nyam enwōn nló saámbé ne meséb dyōm.

⁴ Ane mmwaád anwáá mbóté echē eyāge', ndín eche kâh éhāgkē ne echē etómtánnáá ayāg. Ankútēn yāl esyāal ne bwēm é' gól ne bán bé meláá mé etógnén abē bēpenē áte ne bwēm bé etógnén bēmpēe. Anwálé kōb e gól á ekáá éche elóné ne mekan mé nkólonjgó ne mekan mé mbinde mé akáb dé mesón.

⁵ Dín ábédé mó á'sō é' mbōm née kun e'kōjnéd áde mod énkēmbí'í, ábédé bán, “Babilōn, Dyad á ngíne. Nyaá a bekwalee ne mekan mé mbéb á nkōjsé te.”

⁶ Dóo rínyiné ane mmwaád, mekií mé bad bé Dyōb ne mekií míme bad ábe bébele' ngáne Yesue áhedeé, mékóbé mó née mím.

Ade rínyiné mó, menyáké mé ngíne ménkōb me.

⁷ Dóo ene Angel ésedtéé me aáken, “Cheé ékás bonj menyáké mékōbē we? Mēlāā we kun e mmwaád ne e nyam echē adiídé, echē ewóó nló saámbé ne meséb dyōm.

⁸ Ene nyam echē wényinnē, ekébē á alonjé bonj eésaá á alonjé bōab. Embíd á echóg échē éewóo asóg, áke wēe bēwūū' é chō. Bad ábe bédé á nkōjsé, ábe Dyōb déetelēé mímāb mím á kálag eche ewóó mím míme bad ábe békúdé alonjé adé déemaá' byánán áhāg nkōjsé, menyáké mékōb bō. Yāl ékōm bō áte ányín nyam echē embé á alonjé bonj eésē á alonjé bonj étim abé alonjé ámpē.

⁹ Né dōo debyéé ne nsōñten béhednadté. Mmē nló saámbé míme ene nyam éwóó rídii e'kone saámbé ábe ane mmwaád andii' é ámín, mibé-'e kâh saámbé.

¹⁰ Atintē échē kâh saámbé, étáan émáá awé, póg edii edé á nkamlēn, eníní póg-ke eépédéé á nkamlēn. Bonj áde épēé, édyéé á esón é pōndé.

¹¹ Ene nyam echē embé bonj eésē bōab, chō elónténé kâh waam. Echē kâh saámbé chōo éwóó chō, ekag-ke wēe éwēē.

¹² Meséb dyōm míme ene nyam médií kâh dyōm éche éēkūdē nkamlēn. Bonj békūd ngíne ákamlēn née kâh nchoo ne ene nyam áyāle háwa póg.

¹³ Ntíi nhóg móo échē kâh dyōm éwóó, bēbage-'e ene nyam echab ngíne ne mímāb nkamlēn.

¹⁴ Bēwān nzum ne Mwān-a-Ndyōn mí mbód. Mwān-a-Ndyōn mí mbód átōm bō áte á nzum. Nén débenléd áyāle mó adé Sāngwéé a baásyāal, abé-'e kâh e kâh ésyāal. Adé ne bad ábe Dyōb áchénlé bonj ápwēd-te, ábe bēbenle mó ne nlém nhóg.”

¹⁵ Dóo ene ángel élāngēé me aá, “E'dib ábe ényiné wēe ane mmwaád-a-akwalee ádyēē, é'dii bad, amute, melonj ne mehób.

¹⁶ Meséb dyôm míme ényíné bóωε ene nyam békóó ane akwalεε. Békobén mó chõm ésyāāl echē áwóó, bēbēl abé nsõb. Bēdyē mó nyam, bēhyāād-tε mó á muú.

¹⁷ Bēbēl nē áyāle Dyõb áhédé bó míme ntíi á nlém-tê, míme áhedeé aá bēbel. Dyõb átíidé nén aá échē nyam éwõη ntíi nhóg, ábele mó nēε mod nhóg. Bēbē ene nyam echab ngíne e nkamlen káōηne pónidé echē e'yale ábe Dyõb áhóbé bēlõnnē.

¹⁸ Mmwaád awē ényíné adíi dyad ámbáá áde ákamlan kâη é nkõηsé.”

18

Jõne anyíné ngáne Dyõb akógséné Babilõne

¹ Ade mímén mekan métómé dõó rínyíné nēε ángel empée ébídé ámín, echē ewóó nkamlen rí ngíne, éche ehúmé épené' nkõηsé áte rísyāāl.

² Dõó akáné áte ne ehób éche échágkē aá, “Akwedé, Babilõne, ndale e dyad akwedé! Atimé dyad dé e'dædæη bé mbéb, abón dé e'dædæη ábe béésáa é'syāāl, ne abón dé menõn míme méésáa* ne míme bad békóó.

³ Ayāle bad bé meloη mé nkõηsé bésyāāl bēnwõη esíi ábel mekan mé mbéb míme ábeleé byánán abagé bó míme míme mékóbé bó. Kâη é nkõηsé ékábne mó asón. Esíi é ngíne ábel mekan mé mbéb échē-’ε, ébélé bekáb bényonjé bé nkõηsé bésúdé nhõn.”

⁴ Dõó ríwógé ehób empēe ébídé ámín nén bán, “Abēm bad, nyébíd adē dyad áte, ábel nén nyéelatán bó ábel mbéb boη nyéēkūdē akab dé nkógsen míme békudté.

⁵ Mbéb míme ríkúmné mó á yāl rídé e'che se ádyõb, Dyõb-πε ákamténé míme mekan mé mbéb míme ábélé.

⁶ Bēl mó melemlen mé dyam míme mó-’ε ábélé wε. Sábé mó ngen éβε áyāle mekan mé mbéb míme ábélé. Hágé mó míme ngen éβε á kób echē áhágkē wε éβε mó.

⁷ Ewõgēd mó ndutul ne metake míme médé ngen éβε ne nhægtéd mé ehúmé ne esíi é ngíne ábel mekan mé mbéb éche ábágé yāl.

Ahóbe' áwe nlém-tê aá, 'Ndyéé nēε ndale e mmwaád, meésáa nkúd, méelēb-paá mbéd.'

⁸ Né-ωó, medim mésyāāl mépií mó epun ehóg.

Mmé medim médíi: Nkole, achii dé awé ne nzaa.

Bēhyāād mó ne muú, áyāle Sâη Dyõβε, mó awē ákāād mó, awóó ngíne.”

⁹ Kâη é nkõηsé éche ékábnaá mó mesón, bēlatán-ne mó ne esíi é ngíne ábel mekan mé mbéb, bēchii bēlēb-πε pónidé echē bényinnē mwěntud rímbíde' áde áhyáa'ε.

¹⁰ Bētyēem nchabnede áyāle bēwóge mbwóg bán bómpē békūd metake míme ákúde. Bēbõnē bán, “Etyæg, etyæg ne ndale e dyad, a ngíne e dyad á Babilõn, á etûn é háwa póg ngên dõó ékúde nkógsen nén-ε?”

¹¹ Bekáb bé nyonjé bé nkõηsé-’ε bēchyeé', bēlebe-’ε mó áyāle modmod échanéé ábab bwēm ámpē.

¹² Bwēm é' nyonjé bē é'bédéε bwēm é' gól, sílva, bán bé meláá ábe békine áte ne bán bé meláá bé etógnén. Abē bwēm é'bédé káōηne mebad míme mélélé nkun, ahóg áde bēchægeé línen, démpēe bán Sílíke, ne mémpēe míme méyæge', ndín éche kâη éhágkē ne míme métõmtan ayæg. Abē bwēm é'bédé mebámbé míme mébídé áyāl e mēl mé e'lod é' bwâm ne bwēm ábe bépóde ábe é'lélé nkun

* **18:2** Mbéndé é bad bé Israel elúmté'áá nén bán donje dé menõn ne donje á nyam déésáa'ε, né-ωó bēdyáge'aá ábén bwēm.

bwâmbwam. Abê bwēm é'bedé káñne bwēm ábe bébénlé meson mé nzyog ne e'kii, brâns ne meláá míme mékine áte míme béchəgēé mábel.

¹³ Bénwōñ káñne bwēm nēngáne sinamōn, bwēm bé elod é bwâm, e'twé, mía, frankinsen, mīm, dyōg dé menzab, kəse é mbumé ní ngun ne ngun éche béchəgēé bán wít. Bésómé'áá káñne nyag ne mbód, hóse ne e'bambam, ne betâñ ne bad ábe békóbé.

¹⁴ Bekáb bé nyongé béhóbé'áá áwē nēn bán, “Bwēm é' bwâm é'syāāl ábe nyénwōngē esíí áyāl, béesaá ne nyé ámpē. Ebóó bwēm é' bwâm é'syāāl ne bwēm bé elóon, wéekūd-taá bó ámpē.”

¹⁵ Bekáb bé nyongé ábe bēwóó ábén bwēm bésúdé nhon ne ábe bwēm. Bētyēēm nchabnede áyāle bēwóge mbwóg bán bómpē békūd metake míme ákúdé, béchyéé' bélebé-ε.

¹⁶ Bébōnē bán, “Etyəg, etyəg, á ndəle e dyad, wε awē ewáá'áá mbóté é bwâm éche bébáñnéde kəse e abad eche béchəgēé bán línen, éwāā-ε áde áyəge ne áde átómtan ayəg. We awē ehágáá bwēm é' gól, ábe bébénlé bán bé meláá mé etógnén ábe békine áte ne bán bé meláá bēmpēe ábe bélélé nkun ábe béchəgēé bán péel,

¹⁷ á etún é háwa póg ngēn mímē nhon ísyāāl níbóó.”

Bad bēmbáá bé stíma ne bad ábe békag ne stíma, bad ábe bēbele nsón á stíma tē, bad ábe békábe nyongé á edíb é nkwx̄ te, bēntyēēm nchabnede,

¹⁸ anyín áde bényínné mwěntud níbide' áde béhyāñtēé mó. Bénlēbē e'saad bán, “Ndəle e dyad ké póg eébédéé nēngáne enén!”

¹⁹ Dóó bésyogēé e'bumbú áwab nló áyāle béchyéé'áá', bélebé-ε, béhōbē bán, “Etyəg, etyəg, ne ndəle e dyad, echē bewōñ bé stíma bésúdé nhon ne ábe bwēm. A etún é háwa póg ngēn abódé chōm ésyāāl.

²⁰ “Bwēl-amīne asyāāl áwōg menyīnge áyāle nkógsen míme ane mmwaád ákúdé. A-bad bé Dyōb, bembapεε bé nlomag ne bekal-bé-e'dəədəñ, nyéwōg menyīnge áyāle Dyōb ábídtédé nyé mbakú tñngene mó.”

²¹ Dóó ángel e ngíne ényéné nyē ndim e aláá abwém-mε dó á edíb é nkwx̄ te, áhōbē aá, “Nén dóó bēbwēmē ndəle e dyad embáá, Babilōne, ásē ne ewanje ésyāāl, bad béenyín-naá dó ámpē mbēb.

²² Ene pónde ntəgag míme bechəg bé nílendε, ne bekón bé nkəngé, ntəgag míme betón bé ngombé ne betón bé e'lon méewógnédté áwōñ dyad-tē ámpē. Bad bé nsón mé mekáá ábē béebáá ámpē, ntəgag ní mesín míme mékəge' bwēm méewógnédté ámpē.

²³ Awōñ dyad tē, etrukáñ éepenné ámpē mbēd, ehób é sómbé bó nchóm éewógnédté ámpē mbēd. Adé dyad bēbēbēd dó áyāle ábē bekáb bé nyongé bóó bēbédé ndəle é bad á nkōñsé, bad bé melon mé nkōñsé mésyāāl-lε bēndognéd áyāl e echōñ ngan.”

²⁴ Dyōb ákógséné Babilōne áyāle bad bé Babilōn bēwúú bekal-bé-e'dəədəñ, ne bad bēmpēe ábe bēwédé á nkōñsé.

19

¹ Ade ene Angel é máá mímén mekan mésyāāl ahób, dóó níwógé chōm nēngáne ehób éche échəgkē é ndun e mod ébídé amín, bēbōnē bán “Mekεnag mébē ne Dyōb. E'soóson, ehúmé ne ngíne béhúú ne ádəd Dyōb.

² Echē mbakú edé mbále etāngéné-ε áyāle akáádté akwalεε ambáá awē abēlté bad bé nkōñsé bésyāāl mbēb ne áde akáb dé mesón, akuné-ε mekií míme ábē bembəledε míme ane mmwaád ānsyogkē.”

³ Dóó bēbóné ámpē bán, “Mekεnag mébē ne Dyōb. Mwěntud míme níbide' ngáne ene ndəle e dyad éhyáá'ε ríkag amín á ngíndé ne á ngíndé.”

⁴ Abê bad bémbáá móom mébe ne béniin ne échê nyam éniin bēnkwx̄ ásē á'sō é' Dyöb bébagé-'ε mó edúbé, mó awě adiídé atii dé nkamlēn, béhōbē nēn bán, "Ebê nê! Mekēnag mébê ne Dyöb."

*Jone anyiné ngande e e'wóngé
e Mwän-a-Ndyöj ní mbód*

⁵ Dóo níwógé ehób ébídé á atii dé nkamlēn, éhōbē' nēn aá, "Nyékene' ádeé Dyöb. Nyé ábe nyédé ábē bembælede, nyé ábe nyébage mó edúbé, ken bad ábe bédé etógnén-ε ké'ε ábe béesē etógnén."

⁶ Dóo níwógé chōm nēngáne esaád é ngíne é ndun e mod, ébédé byánán mendib míme mésobpe', ébédé ámpē nēe dyöb ákumé' áte ne ngíne. Echē esaád éhōbē nēn, "Mekēnag mébê ne Dyöb. Ayāle awēd Sāngwéé, Dyöb á Ngum adé á nkamlēn.

⁷ Syánē déwóge' menyinge bwámbwam, déhōbe bán dedé menyinge dékené-'ε mó, ayāle pónde e e'wóngé eche Mwän-a-Ndyöj ní mbód epedé, sómbé-'ε emaá abonjen.

⁸ Ayāle akwōgnédé, Dyöb ábágé mó kunze áhé mbóté eche bébāñnéde kase e abad áde béchāgēé bán línēn. Apene' áte ásáá-'ε." Ene kase e mbóté édé nēngáne mekan míme bad bé Dyöb bébeléé míme Dyöb áhedéé.

⁹ Dóo ene ángel élāngéé me aá, "Tēl nēn wε, Nnam ne ábê ábe belébpé á ngande e e'wóngé eche Mwän-a-Ndyöj ní mbód." Anhób áwēm ámpē aláá-'ε me ámpē aá, "Ábén e'yale é' mbále é'húú ne Dyöb."

¹⁰ Dóo níkwédé ásē áwe e'só ábe mó edúbé. Anláá me aá, "Weébēlē nē, mémpē ndii mbælede a Dyöb nēe wε, mbé nēe bad bémpēe ábe bédúbpe Krístæ, mbé-'ε nēe nhóg awě atyéémé ayāl e mbále eche Yesue áyágté. Dyöb dóo nyétāngéné edúbé abε. Ene mbále eche Yesue ábídté áwed, chōo ebage bad ngíne ákal nkalan ní Dyöb."

*Mod awě adiídé hōse eche épúbe'
atómé nyam echē ebídé
á edib é nkwx̄-te áte á nzum*

¹¹ Menyín mēé ádyöb ánédnéde. Héε rínóné bon rínyīnē' hōse echē épúbe', mod awě mó-'ε andii chó béchāgē'áá mó bán Ane Awě Adé mbále ábelé-'ε bad ábii mbále tāngene Dyöb. Akógsan bad nyaa echē etāngéné áwanné-'ε ábē bad bé ekoyí.

¹² Míd mébédé mó áte nēe muú míme níchodne', anhé-'ε e'kóté bé nkamlēn híin á nló. Anwónj dīn á yāl áde modmod éebii'ε éetómēé mwēn.

¹³ Anwáá-'ε megombe míme béchúbé á mekií-te, dīn áde béchāgēé-'ε mó adíí Eyale é Dyöb.

¹⁴ Sánze éche édé ádyöb énhē kase é mbóté éche bébāñnéde abad áde béchāgēé bán línēn, épūbē' ésan-'ε. Bēndii hōse éche épúbe' béhīdē mó.

¹⁵ Páá echē ekóbpe' bwámbwam embíd mó á nsəl-tē. Chōo ábenléé ákógsen bad bé melonj. Akamlén-ne bó ne ekáá éche éhyédé. Akógtéd bwāl bé e'pum áte ábel ámīn besabé ábe bébenléé mīm, álúmed nímē meliṅgá mé ngíne mé ébēbtéd míme Dyöb á ngumε.

¹⁶ Dīn adé áwē mengombe ne áwē epəñ mīn nēn bán, "Kāñ e kāñ ésyāāl ne Sāngwéé a besāngwéé bésyāāl."

¹⁷ Dóo rínyíné ángel etyéémé á enyen-tē bon ábōnnē menon míme mépúmmé'áá ádyöb ne ehób éche échāgké aá "Nyéhyag nyéladēn ayāle sājkalaa a ngande echē Dyöb débonjénné.

¹⁸ Nyéhyag nyédyē nyam é kāñ, nyam é sánze émbáá, nyam é ndāle é bad, nyam é hōse ne nyam é bad ábe bédíídé chó. Nyéhyag nyédyē nyam é baányonj bésyāāl, é kunze ne é betāñ, bad ábe bédé etógnén ké'ε ábe béesē etógnén."

¹⁹ Dóo rínyíné nyam ne kâḅ é bad é nkõḅsé ne échab sánze éladné áwan nzum ne ane awě ansébé apε ádíí hósε echě épúbe' ne éche sánze.

²⁰ Dóo békóbé ene nyam ne nkal é'dáádəḅ a metóm. Ane nkal é'dáádəḅ a metóm ambé chό á'sō-te, álūmtē e'chemléd ádog bad ábe békúdé e'chem ábe ene nyam, bébagé-'ε échē edíídingε edúbé. Ade bédíí á alongé, bémbwēm bό bad béε á edib é nzab é muú, bēnhyāḅ ne muú míme ríhunne' bwāmbwam.

²¹ Ane awě adiídé hósε ambenléd páá e echě embíd mó á nsal tē awúú bad ábe belyágé ásē, échē kâḅ ne échab sánze. Menən mésyāēl ménkōd áde bédydé échāb nyam.

20

Devəle ābē á mehaḅ á etūn é ekálé é mwě

¹ Ade ane mod átómé ābē bad bé ekōyí áte, dóo rínyíné nēε ángel ébídéé ádyōb ésudé ásē ewálé e'kii bé echóg échē éewóo asóg, ewálé-'ε sánkalaa a ngōbéngōbē awě adelé.

² Dóo ákóbé dragōne, ene nyě e'boód echě edé Devəle, ebé-'ε Satane, áhaḅ mó á etūn é ekálé é mwě.

³ Ambwēm mó á echóg échē éewóo asóg ádíb, ápēn-ne chό ábel boḅ eéhēlē bad bé nkõḅsé adog ámpē káāḅne á pōndé echě ekálé é mwě émaá'ε áte. Ambíd enē bēnhūd mó á mehaḅ á esōḅ é pōndé.

⁴ Dóo rínyíné metii mé nkamlēn, bad ábe Dyōb dēmbεé kunze ákamlēn, bóo bēndyεé áhed. Mennyín-ne e'dáádəḅ é' bad ábe bēnwē. Bēnwūū bó áyāle mbōḅ echě bēbídé'áá Yesuε ne áyāle akal áde békálé'áá nkalaḅ míme ríhúú ne Dyōb. Bēnwūū bó áyāle béebage-'áá ene nyam edúbé ké'ε échē edíídingε ne áyāle akob áde bēnkēnkobpē e'chem á mbōm ké'ε á ekáá. Bétīm ámbíd á alongé, bóobe Yesu Krístəə bēbé á nkamlēn á etūn é ekálé é mwě.

⁵ Nén dóo dēbē mpuu mé e'só. Bad ábe bēnlyóg ásē ábe bēnwē bēnkēntimmé ámbíd á alongé káāḅne ámbíd e ekálé é mwě.

⁶ Nnam míbē ne ábē ábe bēbē mpuu mé'sō áte. Bédíi bad ábe bésáá. Kwééd echě edé kwééd e edáádəḅ éewóḅgé ngíne ámín e bad ábe bédé mpuu mé'sō áte. Boḅ bēbē prisε é Dyōb ne échē Krístəə bēbē-'ε á nkamlēn ne mó á etūn é ekálé é mwě.

Jōne anyiné Satane akwedé nzum

⁷ Ade échē ekálé é mwě épεé á asóg, bēhūd Satane á mbwōg.

⁸ Abíd áde ábídte á mbwōg, áke metóḅgé mé nkõḅsé méniin, ádog bad bé nkõḅsé. Mmén metóḅgé mé nkõḅsé médíi Gōg, ne Mágōg. Satane álad bó áwan nzum, bébuú-'ε áte nēḅgāne nsíí míme rídé á edib é nkwě.

⁹ Dóo békíí nkõḅsé áte rísyāēl, bēlāḅnéd abwóg á hōm áde Dyōb ádáá, wéε ábē bad bédíí, boḅ muú mémbíđ ámín ríhyāād bó baásyāēl bam.

¹⁰ Devəle awě andog bó, bémbwēm mó á edib é nzab é muú míme ríhunne' bwāmbwam, wéε ene nyam ne nkal é'dáádəḅ a metóm bédíí. Áhed dóo békudté metake mé ngíne nkuu ne müte á ngíndé ne á ngíndé.

Dyōb ákáádté bad á asóg dé nkõḅsé

¹¹ Dóo rínyíné mod adiídé atii dé nkamlēn ámbáá áde ápúbe'. Áhed-taá nkõḅsé ne abobe ámín bēnnyōḅ'ε áwe e'sō-te béetime abé ámpē.

¹² Héε rínyíné bad ábe bémáá awé, bad ábe bédé etógnén ne ábe béεš etógnén, bétyéémé á'sō bé áde atii dé nkamlēn. Kálag éche Dyōb dēntenlé rímāb mbéltéd áte, bēndibé chό áte, bēndibé-'ε empée áte. Ene chό enwōḅ mīn mé bad ábe bēbē abé ne abé ne Dyōb. Dyōb dékáād bad ábe bēwédé, nchoo ne mbéltéd rímāb ngāne éténlédé á kálag-tē wē.

¹³ Bad ábe béwédé á edib é nkwě-te bēnkě wée Dyöb ábel békáad bó. Abíníí bad-te ábe béwédé ábe bédé á mbwóg e kwééd, bómpē bētyēēm á'sō é' Dyöb ábel békáad bó nchoo ne nímāb mbeltéd.

¹⁴ Bēmbwēm Kwééd ne Mbwóg e kwééd á edib é nzab é muú. Enén kwééd e edib é nzab chó edé kwééd e edāádəŋ.

¹⁵ Kénzée awě bēnkēntenlé đin á kálag e alongé, bēmbwēm mó á edib é nzab é muú.

21

Jəne anyiné nkōŋsé ne nkoŋ ní mín mé ekóólé

¹ Ade nkáásé rítómé, dóo nnyíné nkoŋ ní mín mékōólé ne nkōŋsé mé ekóólé. Nkoŋ ní mín ne nísé mé'só bēnnyōŋ, edib é nkwě-'e énkēmbáá ámpē.

² Héé nnyíné Dyad áde Asáá, Jerusalem e ekóólé, ahúé', ábídeé ámín wée Dyöb. Dyöb dēmbōŋsén mó ngáne bebaád bēbōŋsanné sómbé echě ekag á e'wóngé.

³ Dóo n'wógé ehób éche écháŋké ébídé á atii dé nkamlēn éhōbē nén aá, "Nyénəne', e'dii é' Dyöb é'dé ne baányōŋ bōob! Dyöb dédyéé hōm ahóg ne bó, bó-'e bēbé ábē bad. Dyöb dédyéé hōm ahóg ne bó.

⁴ Apīnē bó mēsod mésyāāl á mīd. Kwééd éebáá ámpē, bad bēelebpé ámpē, bēechií-'aá ámpē, bēewóg-kaá e'we ámpē. Ebē nén áyāle mam mé nchun métómé."

⁵ Dóo ane awě adiídé atii dé nkamlēn áhóbéé aá, "Nyénəne', mbele' bwēm é'syāāl ekóólé!" Anhób ámpē aláá-'e me aá, "Tēl nén, áyāle e'yale ábe n'hóbéé é'dé mbále é'dé-'e ábe moosyāāl ádūbēē."

⁶ Anhób ámpē aláá-'e me aá, "Emáá. Me-éé ndé Alfaa mbé-'e Omégaa, me-éé ndé mbooted mbé-'e asóg. Kénzée awě píd ékóbé, mēbe mó mendib mé nhyélé nime mod ámwākē boŋ abé á alongé abé ne abé. Měbě-'e nyé mó ngēn.

⁷ Mod awě átōm metake áte, adúbe áde ádúbpé me, mēbe mó ábén bwēm é'syāāl. Měbē áde Dyöb mó-'e abé awem mwān.

⁸ Boŋ ne bad ábe béwóó mbwóg áte, ábe bēewóó adúbe, ábe bēbele' mbinde é mekan, bad bé ewúen, bekáb bé mesón, bekum bé ngaŋ, bad ábe bēbenle' myöb mé metóm ne bekal bé metóm bēsyāāl, ádab abwóg á hōm ádii edib é nzab é muú nímé n'hunne' bwāmbwam. Enén kwééd chó edé kwééd e edāádəŋ."

Jəne anyiné Jerusalem a ekóólé

⁹ Dóo ángel póg átínté e ángel saámbé éche énwālē kúmbe saámbé éche éloné ne medim saámbé épédé boŋ élanŋē me aá, "Hyāg, mélūmēd we sómbé, mmwaád awě Mwān-a-Ndyōŋ ní mbód."

¹⁰ Dóo Edāádəŋ éche Esáá épíídé me boŋ ene ángel ékēené me á mbōod mīn echě echabé ámín bwāmbwam. Ambané me áwedé-mīn alúméd me Jerusalem, dyad áde asáá, ngáne ábídeé ámín wée Dyöb,

¹¹ ápené-'e ne ehúmé é Dyöb. Adē dyad ákínáá áte nēe aláá dé etógnén áde álélé akud, ákiné áte nēe jáspa ányīnnē-'e áte.

¹² Adē dyad dénwōŋ sánkalaa a e'ké ábe é'chábé ámín. Bēnwōŋ nsəl mé e'ké dyōm ne mébe, ne ángel dyōm ne ébe éche énoné nímé nsəl mé e'ké n'syāāl. Ayāl e nímé nsəl mé e'ké, bēntēl mīn mé metúmbé dyōm ne mébe mé bad bé Israel.

¹³ Abé e'ké bēnwōŋ pēd éniin. Pēd e á akuu enwōŋ mmwe mé e'ké n'láán, á mekunekune mmwe n'láán, á mehúléhúlé mmwe n'láán á pēd e mbəŋ n'láán.

¹⁴ E'ké ábe bēnləŋnéd adē dyad bēnsumén ámín e meláá dyōm ne mébe. Ámín e nímé meláá, bēntēl mīn nime bembapēe bé n'ómag dyōm ne bēbe ábe Mwān-a-Ndyōŋ ní mbód.

¹⁵ Angel echë elánge'áá me mímén mekan, enwálé ntónj ní gól míme áhógné'áá adê dyad, míme nsál mé e'ké ne ábê e'ké é' dyad.

¹⁶ Adê dyad dénwōj metónge méniin, e'chab áte ne e'kál áte é'bédé nyaa póg. Ene ángel embenléd míme ntónj áhāg adê dyad. Abédé ekálé é máyl ehóg ne mbwókél étáan. A e'chab áte, e'kál áte ne e'chab ámīn bēbédé nyaa póg.

¹⁷ Ene ángel anhög káōj ne e'che bé e'ké, é'bédé móom mé méta ntóob ne ntóob. Ambenléd nhəgtéd míme bad bésyāāl bēbenladté.

¹⁸ Bēmbenléd jáspa álónj ábê e'ké. Bēmbenléd gól echë eēsē mbinde áte, éche epene áte nēe dyené álónj adê dyad.

¹⁹ Meláá míme bēsuméé ábê e'ké ámīn, mébédé bān bé meláá ábe bélélé nkun nyaa ne nyaa. Aláá dé nsumé dé e'só, ábédéé jáspa, áde álónténé mébe, ábédéé safia, áde álónténé méláán áget, áde álónténé méniin émeral,

²⁰ áde álónténé métaán, ónis, áde álónténé ntóob kanélia, áde álónténé saámbe krisolit, áde álónténé waam béril, áde álónténé abog topas, áde álónténé dyōm kaladóni, áde álónténé dyōm ne ahóg hyasín, áde álónténé dyōm ne mébe ametís.

²¹ Mmēn mmwe dyōm ne míbe míbédéé meláá mé etógnén, mmwe nhóg téé míbédéé aláá dé etógnén ahóg. Nzii eche empōj á dyad tē ebédéé gól echë eēsē mbinde áte echë epene' áte.

²² A dyad-tē wê, menkēnyinné ndáb e Dyōb áyāle Sāj Dyōb é Ngumē ne Mwān-a-Ndyōj ní mbód, bédii nēe ndáb e Dyōb.

²³ Adê dyad déehēdnéé bān áwōj enyēn ké'ε ngōn áwēd-te áyāle ehúmé é Dyōb édii ábe e'nyīnen bé ekíde, Mwān-a-Ndyōj ní mbód-te ápene' nēe éche etrukāj.

²⁴ Bad bé nkōjsé bésyāāl bēbenléd ábe e'nyīnen bé ekíde ábel mímab mam míme bétāngéné ábel epun ké éhéé. Kāj é nkōjsé épēēn mímāb nhōn á dyad-tē wê.

²⁵ Mmē mmwe mé e'ké dyōm ne míbe béepenné mó mbéd, áyāle nkuu méebáá áwēd-te mbéd.

²⁶ Bēpēēn bwēm é' bwām ne nhōn ní bwēm é' bad bé nkōjsé áwēd-te.

²⁷ Dyam á mbinde ké ahóg, ké'ε mod awē ábele' e'bébtéd é' mekan, ké'ε mod awē akale metóm ké nhóg éesónlé á dyad-tē wê. Bad ábe mīn médií á kálag e alongé eche Mwān-a-Ndyōj ní mbód bēnpen bóo bēsāl áwēd-te.

22

Jōne anyiné edib éche ébage alongé á ngíndé ne á ngíndé

¹ Dóo ene ángel élūmtéé me edib é mendib míme mébele boj mod abé á alongé á ngíndé ne á ngíndé, ényīnnē áte nēngāne dyené. Echë edib ébídé'áá á atii dé nkamlēn áde Dyōb ne Mwān-a-Ndyōj ní mbód,

² époó' átíntē e nzii á dyad-tē. A nkin mé échē edib, pēd ébe, nyaa e bwēl póg eche echyáá' e'pum ábe é'bele boj mod abé á alongé abé ne abé ebédé áhed. Mmē mēl méchyáá'áá e'pum nyaa dyōm ne ébe, méchyáá'áá ngōn té. Bad bé nkōjsé bēbenladtáá ábab byaá ákud e'choóchoj.

³ Chōmchōm éche Dyōb ábágé ebómán éebáá á dyad-tē wê. Atii dé nkamlēn áde Dyōb ne Mwān-a-Ndyōj ní mbód mébédé áwēd-te, bembēdeé bé Dyōb-pe bēbagé mó edúbé.

⁴ Bényīn Dyōb e'só ne e'só, áde dīn-ne démbē bó á mesó mé mbōm.

⁵ Nkuu méebáá ámpē, béehēd-táá etrukāj káa enyēn ányīnen ekíde áyāle Sāj Dyōbe ábē ábab e'nyīnen bé ekíde, bēbē-'ε á nkamlēn á ngíndé né á ngíndé.

Jɔne anyine epe éche Yesue

⁶ Dóo ene ángel élanḡeé me aá, “Abén e’yale ábe rílanḡé nyé é’dé mbále, né-òó nyédúbe bó. Sán Dyòbe awě abage bekal bé’dáádəŋ échē edáádəŋ ábel bonj békale nímē nkalan, alómé eche ángel álúmed ábē bembəledε mam míme mékwógé abenled.”

⁷ Dóo Yesue áhóbéé aá, “Nyénəne’, nkwogé ape. Nnam ne bad ábe behíde’ mekan míme bétélé á kálag-tê wén míme mébenléd bəob ne á pónde echě ehúe’ á’sō.”

⁸ Mε, Jɔne nwógé nnyín-ne nímén mekan. Ade ríwógé nímén mekan nnyín-ne mó, menkwě ásē á’sō é ángel echě enlúméd me nímén mekan, ábe mó edúbé.

⁹ Bonj anláá me aá, “Weébēlē nê! Měmpē ndii mbəledε a Dyòb née wε, ne née ábíníí baányonj bé Krísto ábe bédé bekal bé’dáádəŋ ne bad ábe behíde’ chòm éche éténlédé á kálag-tê wén. Dyòb dóo nyétəŋḡéné edúbé abε.”

¹⁰ Dóo álánḡeé me ámpē aá, “Nyéekōŋnād bad mekan míme mébenléd míme méténlédé á kálag-tê wē áyāle mékwógé abenled.

¹¹ Bad ábe bébele mbéb bébē bébele’ mbéb. Abe bébele mekan mé mbinde bébē bébele’ mekan mé mbinde. Abe bébele mekan míme métəŋḡéné bébē bébele’ mekan míme métəŋḡéné, ábe bó-’ε bésáá bébē bésāŋ.”

¹² Dóo Yesue áhóbéé aá, “Nyénəne’, nkwogé ape, ásábe mod-té nchoo ne nsón míme ábélé.

¹³ Mε-εé ndé Alfaa mbé-’ε Omégaa, awě Asébpé ne awě Adĩmténé, mbé-’ε Mbooted ne Asóg.”

¹⁴ Nnam mbê ne ábē ábe béwóbpé nímāb megombe, béwōŋ kunze áponj á mmwε mé e’ké ásól á dyad-tê ábel bédyê e’pum é’ bwel ábe é’bele mod abé á alongé abé ne abé.

¹⁵ Bad ábe béesól á dyad-tê wē, bédii bad ábe bébélé mekan mé mbinde, bad ábe békume ngan, bad ábe békábe’ mesón, bad ábe béwúε bad, bad ábe bébenle myòb mé metóm ne bad ábe bédáá akal dé metóm ne ábe békale metóm.

¹⁶ Mε Yesue, mε-εé nlómé echem ángel áláa nyé ábe nyêdé á mwembéte nímén mekan. Ndii ane awě abíde á mbyaa míme kəŋ Dabide, tintine a mbwεmbwε awě apene’.

¹⁷ Edáádəŋ é Dyòb ne Sómbe behóbe nén bán, “Hyăg.” Kénzée awě awógé nén, mómpē áhōb aá, “Hyăg.” Ane awě píd ékóbé áhyε ámwê mendíb míme mébele bonj bad bébe á alongé á ngíndé ne á ngíndé. Mod ké ahée awě ahede’ nímén mendíb ätēd mó ngen.

Jɔne ahábé ehób é asóg

¹⁸ Nsime mod ké ahée etúu áte awě awógé e’yale ábe é’ténlédé á kálag tê wén təŋḡene mekan míme mébenléd. Nzé mod abádé kéchéé á kálag tê wén, né Dyòb débādē mó medim míme bétélé á kálag tê wén.

¹⁹ Mod ké ahée-’ε awě ähūd ké eyale ámín e mekan míme méténlédé á kálag tê wén təŋḡene mekan míme mébenléd, Dyòb déhūd áde asii dé e’pum é’ mel é’ bwel ábe é’bele bonj mod abé á alongé á ngíndé ne á ngíndé. Dyòb déhūd-te éche etál á Dyad áde Asáá. Mmén mekan méténlédé á kálag tê wén.

²⁰ Ane awě abíde mbónj təŋḡene nímén mekan mésyāäl ahóbe nén aá, “Ne mbále, nkwogé ape.” Ebê nê, hyăg a-Sánjú Yesu.

²¹ Nsimé míme Sánjú Yesue mbê ne bad bésyāäl.*

* 22:21 *Bad bésyāäl*; donḡe á kálag dé’só áwóó *Bad bé Dyòb káa Bad bé Dyòb bésyāäl*.